



5.2.243




*Janus Nicius
Erythraeus*

JANI NICH ERYTHRÆI
PINACOTHECA
IMAGINUM

ILLUSTRIUM
DOCTRINÆ VEL INGENII LAUDE
VIRO RUM

^{qvi}
AUCTORE SUPERSTITE DIEM
SUUM OBIERUNT.
EDITIO NOVA.



—♦♦—
GUELFERBYTI,
APUD JO. CHRISTOPH. MEISNERUM.
—♦♦—
ANNO M DCC XXIX.

5.9.243



Illustrissimo ac Reverendissimo

DOMINO

D. FABIO CHISIO,

Apud Ubios Sedis Apostolicæ Nuncio,

IANUS NICIUS ERYTHRÆUS.

Postquam singularis tua virtus, ingenium, eruditio, atque sapientia memet mihi eripuit, arctissimoque amoris nexu tibi devinxit, sentio, illud mihi evenire, quod doctissime ingeniosissimeque commentus est Plato; nempe meum a me animum abesse in remotissimis istis regionibus, tantoque a nobis intervallo disjunctis peregrinari, tecum una vivere, fabulari, neque a latere tuo uspiam abscedere. Sed inter tot tantasque voluptates, quas ex te percipit, una tantum cura eum anxium habet; videlicet, ut tuis maximis in me beneficiis aliquam gratiam referat. Itaque nihil tam cogitat, quam ut quidpiam ad te remunerandum inveniat, si non par, grato saltem aliquo munere. At cum oculos usquequaque convertat, in nulla re alia eos defigit, quæ quidem re digna videri possit, præterquam in Pinacotheca, quam nuper absolvi, constatam ex imaginibus, tum clarissimorum hominum, atque omni virtute principum, tum quorundam aliorum, in quibus aliqua ingenii forma enituit. Sed quoniam multis erat vitiis depravata, atque distorta, multitudinis in se oculos sermonesque convertit; atque, cum nihil melius occurrat, pro ære alieno quo obstringitur quod dissolvat, quasi aliquo iudicio

eam tibi Pinacothecam adjudicare, teque in
ejus possessionem immittere statuit. Ne-
que id fortasse erit a re tua alienum. Nam,
si a negociis publicis feriatuſ, tanquam in eam
ingredi, relaxandi animi cauſa, volueris, mul-
ta poteris in ea ſpatia facere, & formarum
varietate oculos paſcere, & curas animi pel-
lere. Nam earum aliæ admirationem, riſum
aliæ movebunt. Nihil prætermiſſum eſt a
me, quod quidem ad notiſiam meam perve-
nerit, quod ad eas imagines delineandas, &
ad vivum exprimendas, requireretur, rudi ſa-
ne penicillo; at fuit optanda tua illa viſ inge-
nii, & orationis, qua, quidquid tibi libitum eſt,
ita affabre, ita concinne eleganterque, ver-
bis, tanquam coloribus, exprimis, ut illud
non tam deſcribere, quam oculis ſubjicere
videaris. Equidem cum, præter aliæ, ad il-
lud egregium nuperum carmen me conſero,
quo tu totum iter tuum, ab inſula Melitenſi
Coloniam uſque, elegantiffimis verſibus
complecteris, horrere ſoleo; tot maria, tot
flumina, tot regiones, elegantiffimo ſermone,
ſolertius exprimis, quam pictor quivis colo-
ribus ſimulaſſet, tot urbium nomina, quæ ne-
mo, poſſe dici verſu, exiſtimਾſſet, ſumma
cum venuſtate atque admiratione, pedibus
ſuis illigata, ad heroici carminis leges ac nu-
meros exigis: & id quidem ſucciliſvis horis,
iter agens, & in pugillaribus deſcribens. Quid
aliis eveniat neſcio; ego, cum illud lego, te-
cum videor ab inſula Melita diſcedere, mare
ingredi, per Siciliam iter facere, Neapoli
tranſire, Urbem ingredi, ab eadem egredi,
Fer-

*Uſque
Coloniam
usque
Melitenſi*

Ferrariam, Veronam, aliaque multa Italix oppida aspicere, immensa Germanix spatia cinctiri, ne multa, tecum Coloniam ingredi. Verum tantam vim eloquentix longe est optare, quam sperare, facilius; nostra vero ars quid efficere hoc potuit amplius? Neque tamen dubito, quin Pinacotheca hæc mea, multorum ad se studia conciliatura sit. Nam tuo clarissimo nomine, cui inscribitur, capti, ardebunt cupiditate inspiciundi, quid in ea contineatur. Illud me bono esse animo jubet, quod imagines ibi dispositas, utpote nec Zeuxis nec Apellis manu factas, si non laudabunt, tua tamen auctoritate deteriti, prorsus improbare non sustinebunt. Cui enim auctoritas tua non in primis gravis videatur, cum ab homine, summa nobilitate, singulari ingenio, ac maximis rebus gestis, emanet? qui gravissimas provincias, tibi commissas, tanta cum prudentix omniumque virtutum laude administrasti, ut majoribus semper dignus sis habitus? Primum Romæ sanctissimo doctissimoque Pontifici Urbano VI. a referendis supplicibus libellis, mox Ferrarix prolegatus, difficillimis temporibus, res arduas implicatasque tibi traditas, ita faciles explicatasque, opera consilioque tuo, reddidisti, ut omnium in te oculos atque ora converteres; ac statim Melitam, fidei causarum Quæsitore ac delegatus Apostolicus, & inde Coloniam, Sanctæ Sedis Nuncius cum potestate Legati de Latere, mittereris; ubi nunc, in totius Germanix luce, ita versaris, ut æquitatem tuam suspiciant omnes, prudentiam admirentur, innocentiam, Catholicæ fidei hostes etiam, in cælum laudibus efferant. Nulla in te avaritix suspicio, nullum contumacis animi signum, nullum elati indicium apparet; nulli volentibus te adire, aditus interclusi inveniuntur, sed omnibus aperti atque patentes; nemini morosus, iracundus, parcus, sed cunctis semper es comis, mitis, liberalis, atque beneficus. Sed alius erit de te dicendi locus; neque enim hoc mihi propositum est in præsentia, sed tantum a te petere, ut Pinacothecæ meæ foribus tuum nomen inscribi patiaris, quo ejus gravitate atque splendore operi, ceteroqui humili atque obscuro, gravitatis ac luminis plurimum arcessatur. Vale.

IDEM LECTORI.

Sl tantum mihi tributum a natura ingenium fuisset, ut possem illustrium virorum memoriam meis scriptis immortalitati mandare; nullum esset tam arctum obligationis vinculum, quo non mihi obstricti tenerentur ii, quorum imaginibus Pinacothecam meam instruxi. Verum, quia non ea mihi ingenii vis contigit, ut possem cuiquam laudem, gloriam, aternitatemque tribuere, mea tamen illis voluntas studiumque (si aliquis harum rerum sensus in mortuis residet) gratum esse in primis debet, quod optaverim, quae de illorum laudibus posteritati mandassem, esse aeterna, ideoque hoc illis praesidium ad immortalitatem nominis adipiscendam comparaverim. Sed adeo ab opinione mea abest, ut credam, posse mea scripta vim mortis effugere, ut satis bene ac feliciter illis eventurum existimem, si semel in hominum conspectum prodire, atque aliquam, neque ita longam, communis usuram lucis usurpare contingat. Sed ut id quoque minus illis procedat, mihi facit non ignobilem obtigisse materiam, in qua elaboranda, otium meum honeste ac cum voluptate traducerem, neque vitam, ut ait ille, pecudum more transigerem, & quoniam me ad id aetatis natura perduxit, in qua senectutem oblectarem meam. Nam senectus, nisi amœnis jucundisque rebus tractandis sublevetur, necesse est, ut deserta ac languida jaceat, ac molestis odiosisque cogitationibus succumbat, quae sollicitam ac miseram eam habeant. At quænam animi sive corporis oblectatio potest esse tanta, quæ comparanda ad eam sit, quæ ex literarum tractatione percipitur? Inter quam voluptatem aliasque hoc etiam interest, quod alia in nullum fere opus exeunt, quod magnopere laudes, immo simul ac percepta sunt, abeunt,

eunt, neque aliquod post se vestigium sui relinquunt; ut talorum, ut pila lusui; ut cantui, saltationes, convivium; ne cetera, quae minus honesta, commemorem: haec vero liberalissima & humanissima animi remissio plerumque ex se aliquid gignit, quod perpetuo maneat, tibi quoque sit utile, ac profit aliis. Quod si isthac, plena dignitatis jucunditatisque, a me suscepta exercitatio nata esset ingenium praestans ac magnum, quasi pingue aliquod solum ac fertile, quanto uberiores illa fructus dedisset! Sed quoniam incidit in meum jejunum ac miserum; accidit illi, quod semini optimo, in segetem deteriore dato, quod non sua vi, sed agri malignitate, degenerat in aliquod, a sua bonitate alienum. Verum quidquid illud est, quod mei vires ingenii peperere, tibi, lector humanissime, tanquam pabulum aliquod, antepono; ut, si illud neque insuave, neque succi totius expers, invenias, eo animum pascas ac satures; sin autem acerbum & cassa nuce inanius offendas, tanquam vitiosa ac marcida poma, rejicias, ad pecudum, hoc est, ad blattarum ac murium, pastum. Eorum tantum imagines in hanc Pinacothecam intuli, qui, meae aetate, memoria digni extitere, quique, me vivo, facto functi sunt suo; neque tamen omnium imagines sum complexus, sed eorum tantum, qui mihi, vel amicitia conjuncti, vel auditione & fama noti fuere; eos autem, de quibus tacui, iratos non vereor, quod se fuisse neglectos querantur; quoniam mortui omnino irasci nesciunt: quamquam neglecti non sunt dicendi illi, quorum ego scripta non legerim, quosque ne natos quidem noverim. Sed neque iis, de quorum memoria commemoravimus, lucri, neque iis, quos silentio praterivimus, damni, sane multum accessit. Etenim is sum, ut antea dixi, qui, ora-

zione mea obscurare, quam illustrare, facilius clarorum virorum laudes possim. Illud utrisque optandum est magis, ut feliciori, quam ego sum, ortis ingenio, banc Deus mentem injiciat, ut ipsorum laudes, quos ingenio, eruditione, doctrina, ceteris hac atate natis prastitisse constat, monumentis ac literis mandare constituant. Postremo, nulla in his imaginibus disponendis habita est a me atatis vel dignitatis hominum ratio, ut honestiores formosioresque seorsim ab aliis constituerentur; sed eo singulas loco atque ordine collocavi, quo sese mihi obtulerunt: neque alium eas inter se distinguendi laborem esse sumendum statui; primum, quia formosorum vultus, cum turpibus compositi, extant ac prominent magis; deinde, quia melius satietati fastidioque inspicientium occurritur, si eisdem illi simul pernisi proponantur, quam si illi, qui forma sua bono admirationem faciunt, separentur ab iis, qui in aliquo insigni ad irridendum vitio inveniuntur. Vale.

IANI NICII ERYTHRÆI

Elogium

Ex Hetruscis Laurentii Crassi Virorum

litteris illustrium Elogiis stylo liberiore
expressum.

Sensu communi careat necesse est, qui æternis laudibus mañtandum non censuerit IANUM NICIUM ERYTHRÆUM; si enim opera ejus, variæ rerum atque artium scientiæ plena, oculo fideli perlustrentur, omnes profecto ingenuæ veritatis cultores eruditionem Viri iis quæ meretur elogiis deprædicabunt. Qui si postea modestiam ejus examinarint, hanc ipsam admiratione dignissimam judicabunt, eo quod nunquam permittere voluerit, ut proprium nomen libris a se conscriptis præfigeretur. Fuit autem nobili apud Romanos loco natus, veroque nomine IOHANNES VICTOR ROSCIUS audiit. Cæterum in adolescentia statim bonis artibus deditus, cum ad ætatem maturiorem pervenisset, doctique Viri famam optimo sibi jure comparasset, Domos Principum Romanorum non aliam ob causam frequentavit, quam ut fortunam, alias sat mediocrem, licitis & honestis modis amplificaret. Quia vero moribus admodum venustis utebatur, brevi tempore gratiam, non Procerum tantummodo, sed aliorum etiam præstanti ingenio ac virtute Virorum tenuit, ut impense ab illis adamaretur. Etenim quo animi candore erat, minime per obliquas atque malas artes ad splendorem & magnificentiam grassabatur, verum

se ipso contentus, Socratis exemplo, placida
quietaque constantia, tum secundis, tum ad-
versis suis rebus, vitam traducebat. Tenacis-
simus alioqui amicitiarum cultor, nec Lælius,
Ciceroni tantopere deprædicatis, nisi tempore
forſan inferior. Indignabatur idcirco sæpe
iis, qui ſe in omnes formas fingunt, nec id ta-
men ſatis fortasſe prudenter, aut ex re ſua,
cum aulæ, ut ſe nunc præſertim dant mores,
non niſi ſimulando & diſſimulando regantur.
Apud Cardinalem deinde Perettum nobili
ſane conditione ſerviens primum in amicitia
ejus locum occupavit, Purpurato, qui expe-
rimentum Viri cœperat, ſæpe numero, cum
res ita ferret, plurima ex conſilio ipſius faci-
ente. Enimvero hic, dum otio aulico frue-
batur, opera a ſe incoata non tantum perfe-
cit, ſed cum Viris etiam Excellentibus com-
municavit, illorumque animos eruditione ſua
quodammodo exſaturavit. Munditiei inpr-
mis & nitoris, illiusque, quæ Romanis quaſi
propria eſt, urbanitatis, ut ex ſcriptis videre
eſt, perquam ſtudioſus. Aſt Patrono poſtea
mortuo ipſe tanta jactura vitam ſibi acerbam
redditam animadvertens, omneſque cum eo
ſpes ſuas quaſi contumulatas exiſtimans, ne
fortunæ, in atriis Potentum nimium domi-
nantis, inſultibus amplius ſubjaceret, majo-
remque ad lucubrationes ſuas elaborandas
quietem nanciſceretur, ſibi ipſi vivere decre-
vit: eaque de cauſa aulæ valedicens, locum a
turba remotum elegit, ubi illi, cui adſueverat,
ſtudiorum rationi porro inhæſit. Penetra-
vit ſe in illo ſeceſſu, ut vi ingenii plane ſtu-
pen-

penda pollebat, in arcanos quosque Oraculorum Divinorum sensus, adhibitisque una cum sanctis nascentis Ecclesiæ Doctoribus, recentioribus quoque Interpretibus, reconditæ & selectæ eruditionis documenta, luce postmodum donata, excerptis. Neque hic tamen substitit, sed alia plura eaque multiplicis doctrinæ plena volumina publicavit, dissimulato tamen vero IOHANNIS VICTORIS ROSCHII, fictoque IANI NICII ERYTHRÆi nomine assumpto. Qua de re varie, ut fieri amat, prudentes senserunt. Quidam enim in animum sibi induxerunt, hoc ideo ab ipso factum, ut, quasi Apelles post tabulam, quoniam opera sua plausu exciperentur, exploraret. Alii contra literatæ cuidam superbiæ hanc dissimulationem adscripserunt, ut nimirum hac ratione Orbis eruditus non minus in nomen, quam libros Auctoris, inquireret. Plerique id a summa quadam modestia profectum voluerunt. Cordatiores autem credidere ipsum exemplo Jacobi Sannazarii, Actium sese Sincerus indigitantis, IANI NICII ERYTHRÆi nomen adoptasse. Cæterum, quocunque tandem modo ista se habeant, dignus revera est noster, qui ab omnibus ingeniorum excellentium æstimatoribus magnificat. Præmium tamen tot sudorum, quod ipsum a Fabio Chisio, ad Pontificis deinde Maximi sub Alexandri VII. nomine, fastigium evecto, pro summo quo nostrum complectebatur amore, haud dubie luculentum manebat, mors avara interceptit. Ex quo discere licet, quam instabilis, quamque imper-

perfecta sit felicitas humana. Pervenit autem, dum privatus, animo firmo atque imperturbato vitam ageret, ad extremam usque senectam, vivusque gloriæ suæ interfuit, cum opera, si non omnia, pleraque tamen typis elegantissimis excudi, mirificaque a Literatis omnibus gratulatione excipi vidisset. Tandem morbis, iisque continuis, magis quam ætate confectus, totusque ad auctorem suum, Deum ter optimum maximum, & pulcritudinis nunquam defluxuræ, quæ in cælis est, contemplationem conversus, ultimum vitæ terminum attigit, facultatibusque ad usus religiosos destinatis, ita finiit, ut aliis exemplo foret, quomodo rebus mortalibus sit excedendum. Homo, ut paucis multa complectar, non magis in amicitiiis colendis, quam aliorum moribus & ingeniis explorandis atque dijudicandis, liber & erectus.

Obiit Romæ Id. Nov. clō Id CXLVII.



IANI NICII ERYTHRÆI

PINACOTHECA

Imaginum illustrium doctrinæ vel ingenii laude virorum, qui, auctore super-
stite, diem suum obierunt.

MARTINVS AZPILCVETA,
NAVARRVS.

SI de cuiusque ingenio ac facultate existimare ex
celebritate nominis liceat, (quod magnos sæ-
pe viros, non tam virtute, quam nobilitate
metimur) non video, quem anteponam Marti-
no Azpilcueta Navarro, juris pontificii, sacro-
rumque canonum, nostra tempestate, antistiti. Ea enim,
de singulari hominis doctrina, omnium animos inuaserat
opinio, ut domus ejusdem, non tuius modo civitatis, sed
totius orbis terrarum oraculum haberetur, quo omnes
confugerent, unde, in suis rebus dubiis, responsum refer-
rent, quodque dictum ab eo esset, non aliunde quam ex
Apollinis ore prolatum acciperent. Denique, quemad-
modum olim Roscius, nobilis histrio, affectus fuerat,
ut in quo quisque artificio excelleret, is in suo genere
Roscius diceretur; ita is, conversis in se hominum stu-
diis, sibi pepererat, ut ex suo nomine, non jam hominis,
sed honoris vocabulo, quicumque in aliqua facultate ex-
celleret, Navarrus appellaretur. Fuit tribus summis
Pontificibus eximie carus, Pio V, Gregorio XIII, & Six-
to V, ut non alio consultore uterentur, in iis dijudican-
dis, quibus conscientia constrikti teneremur. Ac Gre-
gorius XIII. tantum homini honorem habuit, ut, cum
per Urbem iter habens, ante ejus ædes obequicaret, (nam
strenuum illum principem, quamvis ætate decrepita, vix
quisquam in itinere, nisi in equo sedentem, aspexit) con-
tinuo juberet evocari eum foras, & integram fere ho-
ram,

ram, in via, detineret. Literarum cupiditate usque adeo flagrauit, ut eam, arduorum accessione, non modo non remiserit, verum etiam acrius vehementiusque inflammaret. Nec mirum: nam ceterarum rerum voluntates eo angustius coarctantur, atque actiorem, ut ita dicam, in gyrum compelluntur, quo laxiore se spacio hominum vita diffundit: at hæc liberalissima humanissimaque studia non minuuntur ætate, sed augentur. Itaque non antea, legendi commentandique, quam vivendi, finem fecit; atque dies, ante suum e vita discessum, non amplius quinque, discendi, ac de jure respondendi laborem studiumque remisit. Difficile est memoratu, quam multa ipse, vel scripserit, vel cum exacta jam ætas scribendi laborem ferre non posset, quam multa amanuensibus dictaverit, ea celeritate, ut dictantis cursum, scribentis manus assequi non posset: sed ex omnibus, quæ doctissime scripsit, ipsius nomen, longius in ævum propagabit Enchiridion, seu Manuale, quod vocant, quo tanquam cortice sublevati, qui confessiones excipiunt, lato scopulosoque illo, sui muneris tanquam pelago, in quo non pauci antea errassent, nare tutius possunt: quam ita docte sapienterque scribendi facultatem, multorum annorum labore studioque assecutus est, quibus Tolosæ, Salamanticæ, Conimbricæque jus Pontificium docuit, tanta auditorum suorum cum utilitate fructuque, ut multi ab ejus disciplina viri clarissimi doctissimique prodierint, quos inter Didacus Covarruvias, magistrum etiam ipsum, non minimo intervallo, superavit, ingenii præstantia, judicii acumine, magisque recondita exquisitaque doctrina; cujus nomen, ne eundem celebritatis in locum evolarit, quo Martini fama pervenit, popularis auræ favor effecit, qui non æque ipsi atque illi secundus afflavit: nam ita usu venire videmus, ut eo quis altiore in opinione hominum locum obtineat, quo ejus opera, 1.º Navarro accidit, pluribus ac majoribus negociis adhiocatur. Sed præsertim Navarrus hominum animos, ad se, admirabili vitæ integritate & innocentia converterat; quam nunquam, ut multi faciunt, a præstantia doctrinæ segregandam esse duxit. Nul- lum diem abire sinebat, in quo horarias preces non reci-

recitaret, in quo humilibus ac demissis precibus Deo non supplicaret, ac rei divinæ faciendæ consuetudinem non teneret, nulla unquam ætatis excusatione usus est, cum annum ageret sextum supra nonagesimum; ad quam ætatem, parsimonia victus, & prætermittendis voluptatibus pervenerat, quo minus, indicta, Ecclesiæ legibus, jejunia, diligentissime persequeretur. Illud vero incredibilem, nulloque ætatis flexu inclinatam fatigatamque hominis pietatem ostendit, quod paucis, ante ejus interitum, mensibus, feriis, sacrosanctis Christi corporis mysteriis sacris atque solemnibus, invitatus a sodalitate, quæ Romæ est in Æde D. Andreæ, quam vocant a sepibus, divinam illam hostiam, prægrandi inclusam theca, ac sacerdotali indutus pallio, viarum duum ferme millium ambitu, gestaverit: quæ res fecit argutis piorum hominum sermonibus locum, qui dicerent, se vidisse Simeonem justum, Christum Dominum in manibus habentem; proinde posse eum, sicut illum, a Deo postulare, ut sibi liceret ex corporis vinculis, tanquam e carcere evolare; jam enim nihil ei opus esse vita, qui Christum, non oculis modo accipiat, verum etiam complexu retineat. Pauperes vero ita cordi cari erant suo, ut sæpe de quotidianis sumptibus non parum demeret, suum defraudans genium, quo suppeditare illorum necessitatibus posset; ac Tolosæ, ac Salmanticæ, qui mane conspectus fuerat, in magna auditorum corona, de suggestu, jus Pontificium interpretari, vespere deprehendebatur, in Nosocomiis, infirmæ sortis ægrotis, præcinctus linteolo, lectos sternere, sordes detergere, cibum in os inferere, nullum officii in eos genus, quantumvis illiberale vel sordidum, a se alienum ducere. Ingenio autem erat adeo liberali atque beneficio, ut neminem, qui vel levissima saltem in re utilem ipsi operam dedisset, immunem a se abire pateretur; ac magna puerulis nobis, inter me, fratremque meum erat contentio, uter nostrum menstruum illi stipendium afferret, quod capiebat ex munere Consiliarii, de quo diximus; cum videlicet agebatur, quænam, pro noxiarum qualitate, imponendæ iis essent pænæ, quos peccatorum suorum pœniteret. Nam parens noster, qui

A 2

ejus-

eiusmodi pecuniis distribuendis præerat, quique esset ejus moris gnarus, quo nos nummo aliquo, sine suo sumptu, exhilararet, modo unum, modo alterum ex nobis, cum eo stipendio ad Navarrum mittebat; neque quisquam nostrum opinione, quæ de ejus liberalitate erat, deceptus, ab eo tristis abibat, sed nummo saltem argenteo auctus, se hilaris ad patrem recipiebat. Sed quid mirum, si tot virtutum comitatu instructus, vite iter haberet? Erat enim consentiens cum ea disciplina, quam profitebatur. Nam adolescens iis Canonicis nomen dederat, qui ab eo, quod certis quibusdam legibus se voti religione obstringunt, Regulares appellantur. Ore fuit invenusto, macilento, naso, aquilæ in morem, in medio prominente, in imo depresso, statura oblonga, sed formæ damna, ingenii, animique dotibus, compensabantur.

BERNARDINVS BALDVS.

Bernardinus Baldus Vrbinas, puer, dedit operam Io. Audrez Palatio Fanensi, & Io. Antonio Turoneo Vrbinati, præstantissimis, suæ ætatis, Græcarum Latinarumque literarum magistris; e quorum scholis celeriter eruditus, excessit; & quo gravioribus studiis, quorum erat cupidus, melius obsequeretur, profectus est Pisas, ac Patavium; quæ dux civitates, præ ceteris Italix, bonarum artium studiis, atque optimorum magistrorum copia florent. Nam, cum aliis, tum Imperii majestatem, tum divitiarum opumque splendorem, tum bellicæ virtutis laudem concesserint, & in ejusmodi rebus, ab iis animo æquo se vinci patientur; at tamen disciplinarum omnium quasi possessionem retinent; neque alio nomine, magnificentius elatiusque se jactant, quam quod Musarum ædes, doctrinarum sedem, ac sapientiæ domicilium, ab omnibus appellari se audiant. In his igitur gymnasiis, a doctissimis magistris Dialecticam, ac Physicam didicit; quibus facultatibus instructus, ad Emanuelem Margranium Crentensem se applicavit; qui inter eruditorum suæ nationis, hoc est, Græcorum, principes, numerabatur. Apud quem tantum profec-

profecit, ut eo duce, & cereum quodammodo lucente, obscurissima Græcorum quorundam poetarum loca penetraverit, eaque intelligentiæ tanquam oculis perlustraverit. Quamobrem ea est incensus animi alacritate atque fiducia, ut ausus sit poemata Græca in nostrum sermonem convertere, atque alia ipse nova ordiri atque intexere. Reversus in patriam, Mathematicas disciplinas toto, ut ajunt, pectore complexus est, Federico Commandino magistro, Mathematico, temporibus illis, præstantissimo. Nec inanis Federici labor, & studium, in Bernardino erudiendo fuit. Nam, qua erat celeritate ingenii, in accipiendis iis, quæ tradebantur, quidquid recondita in illa arte, multiplici, subtilique, concluditur, totum brevi possedit. Quibus artibus, ita Fernando Confagæ, Molfettæ Principi, & Guastallæ Domino, conciliatus, atque probatus est, ut summam ab eo retulerit mercedem laudis & gloriæ. Quarum laudum fama compulsus Vespasianus Conzaga, Sabionetæ Dux, accersivit illum ad se, & in locis Vitruvii obscurissimis difficillimisque, præter eum non alio usus est interprete atque magistro. Quæ fuit causa, ut egregium illud in Vitruvium opus aggrediretur atque perficeret; quod Augustæ editum, immortalem illi famam, apud Transalpinos homines peperit. Verum, humanitate, doctrina, & in Vespasianum fide, perfecit, ut ei unus, ante alios, esset carissimus. Sed non propterea Guastallæ Domino singularis ejus virtus effluerat; sed in memoria penitus infederat. Nam cum Guastallæ nova dignitas hominis instituenda esset, qui Abbatis nomine, ac Pontificiis insignibus decoratus, rebus divinis præesset, & propter magnitudinem potestatis, hic honor a multis expeteretur, perfecit oppidi Dominus, ut Bernardino mandaretur, cujus probitatem ac fidem perfectam habebat. At ille tanto honore auctus, sacrisque initiatus, quo munus, quod sustinebat, tueri rectius posset, reliquum vitæ suæ tempus sacris literis earumque interpretibus penitus cognoscendis deberi constituit. In quo genere studiorum, sicut in reliquis, inventus est sui simillimus; nimirum brevi egregie doctus atque perfectus. Quamobrem tantam hanc quoque

sapientiam vimque doctrinæ affecutus multo ille poterat verius, quam Heleus Hippias gloriari, nihil esse, ulla in arte, rerum omnium, quod ipse nesciret; harum, inquam, artium, quibus liberales doctrinæ atque ingeniarum continentur, Theologiarum, Philosophiarum, Geometrarum, ejusque quam Mathematici profitentur scientiarum, Poësis, Artis Rhetoricæ, Architecturæ, aliarumque ingenuarum artium: nam illiberalium sordidarumque nullam attigit: neque enim unquam audivi eum, sicuti Hippiam, annulum, quem haberet, vestem, qua tegeretur, calceos, quos indueret, se sua manu confecisse; sed hæc sarcinatoribus, aurificibus, ac sutoribus relinquēbat; ut esset, quibus minus adjumenti a natura datum esset ad studia literarum, in quo, si non ingenium, manum saltem exercerent. Sed non multum illi relictum fuisse ocii ad hæc humiliora opera recolenda, declarant ea, quæ tum Hetrusco, tum Latino sermone, tum soluta oratione, tum versibus, tum ad veteres historias, tum præsertim ad Mathematicas disciplinas pertinentia, admirabili quadam laude scripsit: quorum tam magnus est numerus, ut iniri vix possit: & quamquam illud majorum vigiliarum opus, quod universi terrarum orbis regionum historiam ac descriptionem continebat, prope ad umbilicum perductum, non potuit absolvere; attamen conversioni Heronis, de Automatibus, hoc est, de Machinis se moventibus, ac de Balistis & Catapultis, in Latinum sermonem, Paradoxis Mathematicis, magnoque illi volumini, Novo-Gnomico nomine, Latine scripto, quod quinque libris distinctum, novam solariorum conficiendorum rationem continet, aliisque, extremam manum addidit. Factus Abbas & sacris initiatus, studium suum, ut diximus, transtulit ad sacrarum literarum interpretationem, ac primum Ierosolymitani templi, incredibili sumptu, ac magnificentia, a rege Salomone excitati, descriptionem, per Hieremiam literis consignatam & traditam, rem involutam, & multis difficultatibus obsessam, evoluit, illustravit, atque hominum intelligentiæ aperuit; librum tum scripsit de firmamento & aquis, quas, in mundi fabrica, Deus dicitur segregasse; & commentarium in

para-

paraphrasin Chaldaeam Onchalia, in Latinum a se conversam, qua Pentateuchus, hoc est, quinque Moysis libri fusius explicantur; deinde, paraphrasi Latina, Hebraeo ex fonte deducta, scholiis quibusdam additis, Iobi historiam maxime illustravit, explanavitque: voluit etiam Matthæi Evangelio, æconomia tropologica, moralibus sententiis, & ad vitam recte instituendam necessariis, confertissima, lucem addere; atque id, quod voluit, perfecit: quam scite interpretandi rationem, omnium linguarum notitia, assecutus est. Quam enim ille linguam non novit? Mitto Hetruscam, qua, orationes plures, Disputationes varias, Dialogos, Apologos, Federici & Guidi filii, Urbini ducum vitas, rhythmos, eclogas, juveniles lusus, anni coronam, aliaque edidit; mitto Latinam, qua, in epigrammatibus, imitatus est Martialis argutias, in Odis, Horatii cultum & nitorem, in poëmatibus, Virgilii majestatem ac decus: mitto Gallicam, Germanicam, Hispanam, Illyricam; in quarum singulis ita loquebatur, ut si in eis natus esset: mitto, inquam, has omnes linguas; nonne Hebraicam, Chaldaeam, Arabicam, res ad sacrum litterarum intelligentiam plane necessarias, adeo perceptas habebat, ut paucos haberet pares, superiorem fortasse neminem? Quid ne veteris quidem, Sicularum ac Narbonensium, sermonis fuit expertus; quos imitatus, plures in juvenia rhythmos composuit. Sed quid veteres Narbonenses ac Siculos memoro, quorum sermonis plura adhuc in libris, non adumbrata, sed expressa vestigia cernuntur? Pristinam Hetruscam assecutus est linguam, cujus, tot ante sæculis extinctæ, tanquam ex rogo, vix tenuis aliquis fumus, in antiquissimis illis æneis tabulis emergit, quæ a S. P. Q. Eugubino servantur. Denique vir hic longe clarissimus, quemadmodum sanctissime vixerat, ita etiam sanctissime, in complexu cucullatorum patrum, extremum vitæ spiritum edidit.

IACOBVS CLAVERIVS.

Iacobus Claverius Romanus, ex veteri Annibaldensi familia, a puero, ob generis nobilitatem, ac præstantem corporis formam, ingenuosque mores, Parnesiæ Principibus conciliatus, fuit illis mirifice carus. Multa, in adolescentia delicate, jocoseque, multa etiam graviter ac prudenter ab eo dicta & facta narrantur; sed non est tanti, ea referre. Posteaquam robustior esset factus, se intra Religiosorum claustra recipiendum adscribendumque curavit: sed non minus cucullatus, quam pilatus, in eorum Principum tutela præsidioque deliquit, a quibus antea diligebatur: unde etiam nova spe semper instatus, vel insigne aliquod sacerdotium, vel præfecturam expectabat. Suo postea tempore sacris initiatus, mittebatur quotannis, feriis clivialibus, in aliquem pagum, divinarum rerum interpres; atque etiam excipiendarum confessionum provinciam accepit; quæ res illi, coniungendæ cum multis amicitis, causa fuit, utque cupiditatem laudis & gloriæ, qua æstuebat, expleret. Nam utribus, unde confessiones excipiebat, ostiolo templi propinquum habebat, quæ discipulis, a scholis redeuntibus, transeundum necessario erat; ibi tanquam in statione manebat, & quemcunque adolescentem ingenio præstare audivisset, humanissimis verbis excipiebat, laudibus efferebat, suam illi operam pollicebatur, ac postea in cellulam deductum, juglande, melle condita, reficiebat; quibus blanditiis eo hominem adducebat, ut promitteret, se ejus laudes, quas ipse sigillatim enarrabat, vel prosa oratione, vel carmine celebraturum, ac per hanc rationem multis, qui postea in literis clari & magni extiterunt, non inelegantes versus, suam in laudem, expressit: nec minus audacter poetarum hujus ac superioris ævi principes est aggressus, videlicet Annibalem Carum, Torquatum Tassum, Benedictum Varchium, Iulium Cæsarem Stellam, Porphyrium Felicianum; quorum scripta in ipsum carmina leguntur: hæc ille postea in duo volumina collecta edidit; quorum alterum Latina, alterum

Hetrus.

etrusca poemata continet; & utrisque prefixa est
us, oppido ridicula. At voluit homo cupidus lau-
vivens, gloriola sua frui: quibus rebus persequeretur,
tota Vrbe celebratum suum nomen esset. Induxit
iam, nescio quem religiose ejusdem famule rerum
starum scriptorem, ut suæ ipsi historie, summis
adibus ornatum, infereret. Quæ quamquam superio-
rus non probarentur, nemo tamen se illi audebat op-
nere, Alexandri Cardinalis Farnesii auctoritate de-
titus; in cuius ille tutela erat, ut diximus. Sed eo
ortuo, ejectus est Viterbium, tanquam in exilium;
que inde antea revocatus, quam ejus vanitatis, qua
mo erat omnibus, memoria, in oblivionem diuturni-
o adducta esset. Prædixerant Genethliaci, ac Mathe-
tici, sive joco, sive serio, processurum eum honoribus
agius, ac minimum ad purpuram perventurum: sed
nes eorum prædictiones fuisse, ostendit eventus: nam,
rex, est Romæ, anno 1600, post diem septimum; quam
tubuerat, lethali morbo consumptus.

FVLVIUS VRSINVS.

Vlvius Vrsinus, nobili paterno genere natus, pro-
pinquis suis minus gratus exitit, quod minus justo
cubitu natus esset. Sed ab illis spretus, exceptus est
capiti Delphino Romano, Basilicæ Lateranensis Ca-
tico, & antiquitatis studioso, qui adolescentis inge-
ni aspexerat & probaverat. Itaque ab eo primum
scis ac Latinis literis institutus, tum in studium an-
ticitatis, in quo ille versabatur, compulsus, tantum
si profecit, ut non æqualium suorum modo, sed su-
orum etiam omnium, qui eundem lapidem volve-
re, laudem æquavit. Scripsit de familiis Romano-
elegantissime, eruditissimum de Triclinio Roma-
commentarium, cui Petrus Ciacconus, qui cum illi
pne usus amicitiaque, ut dicemus, intercedebat,
pauca addidit; neque liber ille sine hoc auctario
ur: emisit etiam diligenter elaboratas enucleatas
animadversiones in Festi Pompeji librum de ver-
um significationibus, & in Latinos historicos notas.

In eo, quod agendum suscipiebat, longam semper moram ac diligentiam adhibebat, quo ab omni parte perfectum evaderet. Neque solum in iis, quæ scribebat, summam dabat operam, ne quid collocaretur, nisi diu multumque excogitatum, nec populari tantum trutina, sed artifices statera examinatum, verum in ceteris etiam rebus eadem erat cura ac diligentia; adeo ut uno eodemque die pluribus se negotiis implicari non sineret, sed, ceteris omisis, unum eligeret, in quo versaretur, totusque in eo esset: ut non posset illi iure obijci, quod iis, qui in plura studia distracti, in singulis minus attento sunt animo, dicitur, Vnum age. Peractis codicibus, quorum multos in sua bibliotheca habebat, immania precia faciebat: atque illud accidit perdidicisse, quod cum, die quodam, Francisco Cardinali Toledo, Terentii comedias ostendisset, easque affirmasset ante annos mille fuisse conscriptas, ac revera essent antiquæ, sed mire depravatæ atque corruptæ, atque addidisset, nullam esse pecuniam, quæ antiquissimi illius codicis æstimationi par esset; proh Deus, Cardinalis inquit, quid audio? equidem mallei codicem unum, quantumvis recens impressum, sed castigatum emendatumque, quam decem alios mendosos & corruptos, quamvis Sybillæ manu exaratos: risus omnium, qui aderant, est factus, cum viderent, rerum earum precia, quæ ille in cælum efferebat, Cardinalis æstimatione, sic concidisse. Hunc postea librum moriens, Bibliothecæ Vaticanæ legavit, una cum Francisci Petrarchæ rhythmis, auctoris ipsius manu conscriptis. Farnesianam aulam, duorum Cardinalium, Alexandri & Odoardi, familiaris, ornavit; quorum postremum, bonorum suorum heredem reliquit; Delphinis, quorum domi fuerat istus educatusque, ac diem supremum obierat, sex aureorum millia legavit; quæ voluit esse grati sui erga illam familiam animi testimonium, unde tot in ipsum utilitates & commoda provenissent, atque illud idem, in Æde Constantiniana sacerdotum adeptus esset, quo Gentilis, qui in filii cum loco dilexerat, functus antea erat.

M. ANTONIVS MVRETVS.

M. Antonius Muretus Lemovix, magis scriptis suis, quam cujusquam oratione illustris. Cujus de virtutibus dubito, quemadmodum exponam. Nam tam multa, tanquam præclara laudum, in eum, genera conveniunt, ut sit difficile judicium excellentis maxime virtutis. Nam fuit primum Iurisconsultus, non unus e multis, sed inter multos propemodum singularis. Et enim Romæ, in publico Gymnasio, magna auditorum frequentia, interpretatus est Pandectas Iuris Civilis, non usitato vulgarium magistrorum more, sed novo, atque, ad eam diem, Romæ, in scholis inaudito, cum in docendo, Latini sermonis elegantiam, ab aliis neglectam, assumeret, multa ex Græcis scriptoribus depromeret, multa ex antiquitate repeteret, multa a Philosophorum disputationibus mutuaret. In Philosophia vero, non est facile dictu, quantum excelluerit; cujus notitiam, non ex cujuspian distantis commentariolis, tanquam ex seclusa aliqua aquula, hausit, sed ex Platone, atque Aristotele, quos, sua lingua loquentes, intelligebat, accepit, unde tanquam a fontibus, universum flumen erumpit. Itaque, & multos annos, Ethicorum Aristotelis libros Romæ explicavit, ingenti stipendio, & scripsit in ejusdem æconomiam, & topicam, in primum & secundum Platonis de Rep. librum, & in Cyropædiam Xenophontis, plenissimas doctrinæ & eruditionis notas. Iam vero, si recte loquendi ratio, si poetarum enarratio, si historicorum pertractatio, si de unoquoque auctore judicando facultas, si de rhythmis metrisque scientia, si Astrologiæ, Philosophiæque cognitio ad eos pertinet, qui Grammatici vocantur; adeo omnes ejus artis pene infinitam vim intelligentia complexus est; ut non videam, cui ex veteribus debeat cedere. Quem enim auctorem Latinum prætermisit, sive historicum, sive oratorem, sive poetam, quem ille suis, et commentariis, vel scholiis, vel notis, non explicaverit, emendaverit, suoque nitori non restituerit? Tentium, Tibullum, Catullum, Propertium, M. Tullium,

lium, Sallustium, Tacitum; & in primis, quantum vir hic eruditione præstaret, Variarum lectionum liber ostendit. Deinde, si Rhetoris sunt partes, dicendi præcepta tenere, eisque alios imbuere, quis Mureto sit dignior hoc nomine? qui tot annos, tum Venetiis, tum Romæ, juventutem ad dicendum instituit, qui suis præceptis institutisque, tot formavit oratores egregios, qui postea & ipsi dicendi magistri extiterunt, & in his Franciscum Bencium, qui in scholis Soc. Jesu, tanta cum laude, hanc artem exercuit, qui, quæcunque sunt, ab eloquentiæ præceptoribus sive Græcis, sive Latinis elata, in animo, tanquam in cera, vel potius tanquam in ære insculpta retinebat, quique Aristotelis de Rhetorica libros duos ita docte, ita eleganter, ita scienter in Latinum sermonem convertit, ut non desideres quidquam in eo genere melius, neque perfectius. At neque Poeticæ inanem operam dedit, sed utilem atque præstantem; nam & elegos, & odas, & epigrammata, & hymnos ad veterum Poetarum elegantiam scripsit. At mihi eloquentiæ in eo virtus, quæ merito omnium maxima habetur, ceteris ejus laudibus videtur antestare. Quid enim ejus orationibus inveniri perfectius potest? qui flos, quod lumen, quis naturalis, non autem fucatus, in eis uitor desideratur? quis humilia subtilius, anipla sublimius, mediocria temperatius, potuit dicere? quibus virtutibus, perfecti oratoris laus continetur. Quis, nostra ætate, sermonis genere usus est, adeo gravitatis, doctrinæ, prudentiæque referto, & in quo præterea omnes verborum, omnes sententiarum illigentur lepores, præter hunc? quis magis Latine, pure, dilucide, suaviterque locutus est unquam, &, quod refert, qui oris pressu, & suavitate appellandarum literarum se magis hujus civem Urbis, non peregrinum significaret? Quis unquam, actione, in qua fere sunt omnia, par illi extitit? quæ cum constet voce, motu, ac gestu; vox erat magna, canora, distincta; motus plenus artis, ac venustus; gestus, non verba exprimens, sed rem & sententiam significatione declarans. Quamobrem illud affectus videtur, ut non hujus modo seculi, sed multorum etiam superiorum, oratorum princeps habeatur. Atque equi-

equidem arbitror Antonium, qui in eo libello, quem unum edidit, disertos, inquit, se vidisse multos, eloquentem vero neminem, si hunc audire potuisset, mutata sententia, veri eidem eloquentis palmam delaturum fuisse. Sed tanto vir ingenio, atque facundia, Tolose, criminis, cujus insimulatus fuerat (injuria dicitur) paratum fere sibi supplicium evasit. Nam, fuga sibi consulens, ex illo periculo, Venetias evolavit; ubi cum in ejusdem suspicionem criminis, post aliquanto, venisset, literis, ad Dionysium Lambinum datis, eam est a se propulsare conatus. Verum illud ei Tolosanum incendium, ex quo evolaverat, sive verum, sive fictum, exprobravit Joseph Scaliger, cui ille verba dederat, atque epigramma recens, a se compositum, pro vetere obtruserat, hoc disticho:

*Qui flammis rigida visaverat ante Tolosa,
Muretus, fumos vendidit ille mibi.*

Sed crimen istud, illudque, quod in Gallia hominem occiderit, & interdum vino se ad ebrietatem oncrari, si vera forent, posset aliquis juventutis excusatione defendere. Fuit ingenio in jaciendis ridiculis & falsis alacri, promptoque, adeo ut ante facetum dictum emissum, quam excogitatum ab eo fuisse videretur, quo breviter arguteque dictorum acumine, tanquam armis, discipulorum, ipsi inter docendum obstrepentium, audaciam, insolentiamque compecebat; & cum unus ex eis tintinnabulum in schola pulsasset, ex eo genere, quod ad vervecum ac bucularum colla appenditur, ut earum ductum ceteræ sequantur; continuo ille, mirabar, inquit, ni pecudum acervus ductorem suum haberet. Fratris filium habuit, eodem, quo ille nomine M. Antonium, præstanti ingenio, qui, ipso docente, Græcæ ac Latinæ linguæ rudimenta posuerat: sed ante pubertatis annos e vita migravit; cui si longior vita contigisset, profecto (ut initia se dabant) extitisset, quem eloquentia, doctrina, & judicii acumine cum patre conferre possemus. Qui patruus, totis novem ante ejus e vita discessum annis, pietati ac religioni omne suum studium dedit, quinque antea, in pernoscendis veterum poetarum fabellis, in percipiendis, quæ ab Homero, Virgilio, Thucy-

Thucydide, Herodoto, Sallustio, Livio, aliisque, tum Græcis, tum Latinis scriptoribus, dicerentur, ocium suum tradiderat; illud postea conterebat in sacrarum literarum, earumque interpretum lectione; & sacris initiatus, quotidie, si per valetudinem licuisset, multis cum lacrymis divinam illam Hostiam D. O. M. sacrificabat. Mortuus est anno M D LXXXV, prid. Non. Iulii, cum sexagesimum ætatis suæ annum nondum expleisset, ac situs in sepulchro, quod in Æde, Deo trino & uno, in Colle Hortorum, dicata, sibi vivens extruxerat, cum inscriptione, quæ nihil veterum superstitionum, ut sit plerumque, oleat, sed quæ pium ac Christianum ejus animum in primis ostendat.

COMES GUIDOBALDVS BONA- RELLVS a RVERE.

MAgnum atque præclarum Comitis Guidobaldi Bonarelli Anconitani ingenium, plus aliquanto ex sese, in bonis artibus, dedit, quam quantum ab initio polliceri visus esset. Etenim laus poetica non admodum expectabatur ab eo, qui pueritiæ & adolescentiæ tempus, in perscrutandis naturalium rerum causis, & in comparanda sacrarum literarum scientia consumsisset. Nam pene puer, missus est in galliam a patre, qui multum apud Guidobaldum Urbini Ducem auctoritate & gratia pollebat, ut ibi Theologiæ studiis operam daret; quibus usque adeo diligentem operam navavit, ut annos natos undeviginti, Parisiis, in Philosophicis ac Theologicis disputationibus, summum ingenii sui specimen dederit; ut etiam oblatum ipsi ultro Philosophiæ docendæ munus a Doctoribus illis fuerit; at ipse revocatus in Italiam a parente, maluit eo honore dignus videri, quam illum accipere; reversusque in Italiam Mutinæ patrem amisit, virum clarissimum, ac Ferrariæ Duci, ob singulares ejus virtutes, acceptissimum; quæ fuit causa, ut Dux ille Ferrariam eum evocaverit, ut in suorum aulicorum numero haberet, ejusque opera atque consilio in rebus maximis uteretur. Atque utraque in re, tum in variis consultationibus, tum in sedecim lega-

gationibus ad Reges ac Principes, ipsius nomine, ob-
undis, fecit, ut Dux utilitatem cognosceret suam. Ad-
duc Guidobaldus, in consiliis, de Rep. dandis, acutus
et prudens, in Philosophorum ac Theologorum dispu-
tationibus exercitatus ac promptus existimabatur; sed
faciendi carminis artifex a nemine habebatur. Ita sui
in se opes ingenii, tanquam in aliqua arca, constructas
atque reconditas habebat; sed tandem, propositis illis,
ac propalam collocatis, antea poëta summus apparuit,
quam eum quisquam aliquid poëticis ex fontibus de-
gustasse suspicaretur. Nam, cum quisque qui in Al-
phonso Ferrariensium Ducis aula versaretur, quique
aliquod in literis nomen haberet, vel ingenii opinione
præstaret, scenicis spectaculis dandis, industriam suam
probare conaretur, Guidobaldus, ne cui in ea re esset
inferior, Phyllidem Scyram, pastoriciam fabulam com-
posuit, in eamque omnes poëticos flores, delicias, ve-
neresque coniecit. Quod vero ad stylum attinet, eam
scripsit dulcissime, nec, post Guarini Eclogam, quid-
quam invenitur, in eo genere suavius, neque venustius:
atque id tam aptum ac felix, repente in ipso ortum, ad
poësin ingenium idemmet admirans, non aliam, cum
quereret, invenire, ejus rei causam potuit, præter Cæli,
sub quo clarissima Estensium Principum aula constituta
esset, benignitatem, quo statu Cæli, atque Stellarum, qui
animam ducerent, una cum vitæ habitu, poëticum etiam
ab eo quasi spiritum, impetumque perciperent. Atque
eandem hanc Cæli vim & aspirationem, agebat conci-
tasse ac poëtas effecisse eos, quos omnium sæculorum
posteritas admirabitur Bojardos, Ariostos, Tassos, Gy-
rardos, Guarinos, Bombasios, Fontanellas, & ceteram
egregiorum poëtarum turbam; quorum singularia ac
divina propemodum carmina dum manebunt, mane-
bunt autem sæculis innumeralibus, Estensium aula
Ferrariæ non deerit. Atque, cum eos, quos diximus, ad
versus fundendos abstraxisse narrabat, impetum, vel, ut
Democrito placet, furorem, in eorum animos, a Cæli
impulsu concitationeque delapsum, prope vera dicere
videbatur, si eorum omnium exitus recordemur. Ne-
mo enim, propter eam causam, ne nummo quidem utro
factus

factus est ditior. Quod maximo argumento est, nullam eos spem utilitatis futuræ, nullam lucri cuiuspiam utilitatem, adscribendum adegisse, sed cæli tantum, si fas est ita loqui, vim concitationemque; & si quam ipsi propositam habuerint laborum suorum mercedem, ac premium, non aliud fuisse, nisi laudis & gloriæ. Verum hic nobilis, Comitis Guidobaldi partus, alium ex se peperit, non minus illustrem & clarum, atque haud scio, an doctrinæ varietate, eruditionis magnitudine, rerum plurimarum scientia, iudicii acumine, ingenii amœnitate, illo longe maiorem atque præstantiorem defensionem nimirum Eclogæ suæ. Introduxerat ille Nympham, Cæliam nomine, uno eodemque tempore, perque duorum hominum amore captam ardere ita misere, ut quo se ab ejus flammæ, ita contortæ implicatæque, quasi laqueis, expediret, cum nulla alia ratio occurreret, mortem oppetere non dubitaret; quæ omnia, cum pluribus incredibilia viderentur, illudque præsertim absurdum, & contra amoris leges occurreret, quod una, eodem tempore, duorum cupidine efflicti deperiret, quæ leges, non plus uno, uni concedunt, in quo amando diligendoque, omnes animi vires, omnesque industrie suæ nervos contendat; hæc illo, & rationibus, ex intima Philosophia depromptis, fieri posse, & exemplis, ex omnium sæculorum memoria repetitis, sæpius factum esse, defendit, tanta sententiarum rerumque copia, ut multis suspicandi locum aperuerit, antea defensionem peccato comparatam; quam peccatum, si tamen peccatum illud fuit, admissum, neque aliam illi fuisse rationem, cur illud potissimum argumentum in actus deduceret, nisi ut ingenium declararet, quantamque vim doctrinæ complexus esset, ostenderet. Sed, ut sese res habeat, perfectum est illud opus, plenumque literatæ venustatis, atque prudentiæ. Quod si eo quisque doctior existimatur, quo enucleatius, ac dilucidius aliis possit, quæ ipse didicerit, tradere; quam tam in homine, & quod est incredibile militari, atque perpetuo aulicis occupationibus distracto, intelligentiam fuisse oportet, qui de rebus subtilissimis obscurissimisque, ita aperte, perspicue, ac distincte locutus est.

ut eas planius ac melius dici non desideres? Quamobrem principibus viris magno fuit in honore & gratia, Cardinalibus præsertim, Federico Borromæo, Evangelistæ Pallottæ, ac Cynthio Aldobrandino; Alexandro vero Estensi tanta in admiratione, ut eum, quamvis infirmisima valetudine, ac propter dolorem artuum, ab omnium fere membrorum usu destitutum, Romam evocaverit, ut suo cubiculo, honoris scilicet causa, præficeret. Sed jam in itinere, cum podagræ dolores vehementius ingruissent, vim morbi ferre non potuit, cum quinque & quadraginta vixisset annos.

PAVLVS BOMBINVS.

PAulus Bombinus, Coscentiæ, veteri atque illustri Calabriæ oppido, nobili genere natus; domi, prima puerili institutione, ad humanitatem informatus; profectus est Romam, ut liberalibus disciplinis animum excoleret, quas omnes in collegio Soc. Jesu celeriter a magistris accepit, in eisq; perfectus evasit. Nam fuit poeta magnus, orator summus ac pene extemporarius; sententiæ in eo crebræ ac graves; sermo Latinus, elegans, dilucidus, florum omnium varietate conspersus, verum qui ab iis deliciis, quæ modo inventæ eloquentiam corruerunt, abhorrens, rerum gestarum scriptor, verax ac prudens, in Philosophicis ac Theologicis disputationibus acer ac vehemens, & in capiendo adversario, argumento breviter arguteque conclusio, acutus, divinarum rerum, ad populum, interpretis egregius, qui sententiarum copia, verborum splendore, oris ac vocis suavitate, auditores detineret. Hic adolescens, antequam potuerit existimare, quanto liberior vita sit eorum, qui nullis se Religiosi cuiuspiam ordinis legibus obstrinxerunt, Soc. Jesu, actum, quodque præcidit omnem licentiam libertatemque vivendi, vitæ genus amplexus est, illudque, nuncupatis, publica ac solemni religione, votis, processus est. Verum, cum multos jam annos, non solum communi voluntate virtutis atque officii, verum etiam ea, quam sibi indixerat, lege continentiz, omnium voluntates rerum, coercitas habu-

habuisset, tantum visus est aliquem illis aditum aperire &, quod mirum videatur, firmata jam ætate, quo tempore, qui a religione officii declinarunt, revocare se in viam solent. Quamobrem vocatus in iudicium, quod officium & obedientiam erga superiores exuisset, quorum imperiis præsto esse debueras, atque huius criminis, sua ipsius confessione convictus, suffragiis in comitiis ferendi, atque ad honores suffragiis aliorum ascendendi jure privatus est, tum in remotam quandam Italiæ insulam reiectus, decem annorum exilio multatus; at postquam decem annorum legitimam poenam perulit, cum ferret iniquissime, tantis clamoribus fuisse rem actam, quæ potuisset, nulla fere cum ipsius infamia, a paucis secreto decidi, cœpit cogitare, de commutanda colonia, & statuit ad aliam religiosi cuiuspiam ordinis familiam transire. Itaque fecit me per amicos certior, ut darem operam, quo in quandam reciperetur, nobilem illam quidem & locupletem. Verum spe illa dejectus, convertit animum, ad eum religiosorum hominum ordinem, cui Sommasco est nomen; ad quem facilis illi aditus paruit. Significavit mihi non obscure, sibi esse in animo, reverti in complexum matris suæ; sic enim societatem Iesu appellabat; verum non ante, quam e vita discessissent ii, qui fuissent in ipsum teterrimi. Sed accidit, ut ipsum antea mors ad se reciperet, quam quemquam eorum, quamvis capulares, & Acherunti jam diu debiti viderentur. Aggressus est, pene adolescens, in Collegio Ro. Philosophiam docere; sed quia, ingenii demonstrandi causa, a receptis Philosophorum sententiis, pluribus in rebus, prave discrepabat, & quia totam fere rationem docendi mutaverat, primo anno illud ei munus abrogatum est, atque alteri traditum. Sed aliquot post annis, cum maturior eum ætas expolivisset, hominemque reddidisset, rursus idem docendi curriculum ingressus, ab aliorum Philosophorum præceptis non aberravit, eamque docendi viam rectissimam duxit, quam superiores omnes magistri tritam reliquissent. Quamobrem totum illum triennalis laboris cursum rite consecit; &, quo tempore inobedientiæ reus damnatus fuit, sacras literas interpretabatur. Ver-

satus

satus est frequenter in Principum aulis, Mantuani præferti Ducis; in qua diem obiit supremum: quod etiam fuisse arbitror causæ, ut se vulgi obliniret erroribus, & quod adolescens non commiserat, ut muliebribus implicaretur amoribus, postea alieno tempore faceret tamen. Edidit laudationem funebrem Margaritæ Austriacæ, quam, me audiente, habuit, ad sodales B. V. Assumptæ, in Domo professæ Soc. Iesu; Vitam Edmundi Campani ejusdem Soc. in Anglia martyrio affecti; Hispanicarum historiarum Compendium,

BELMONTES CAGNOLVS.

CVM exprimere mores & consuetudinem vitæ suscepimus Belmontis Cagnoli, nullus erit finis, si necesse sit omnia exponere, quæ pertineant ad eam declarandam. Fecit multa ridicule, multa graviter, multa inepte, multa apte, multa stulte, multa sapienter, multa varie, multa constanter, multa imperite, multa docte; ut sit difficile paucos invenire, qui sint in tantæ vitæ dissimilitudine & varietate versati. Ac primum, toto vitæ tempore, valetudine usus est varia: nam puero infirma & incommoda fuit; ac nihil propius est factum, quam ut ex morbo oculorum aciem amitteret; sed postea grandiori robustissima ac validissima corporis firmitas accessit, adeo ut jam grandævus, nullum dentem, ac ne pilum quidem unum desideraret; at seniliter cepit esse corpus debile & invalidum, artuum doloribus, unde occidit, excruciato. Nunquam fere in eodem vitæ statu permansit, sed vicissim ad plures divertit. Elegit esse I. C. ac Cæsennæ jus didicit; voluit deinde aulicus fieri, ac Marco Cornelio, qui factus est Patavinus Episcopus, navavit operam cubicularius; apud quem, tantum auctoritate & gratia valuit, ut omnium ejus consiliorum particeps fieret, ab eoque in fratris germani loco diligeretur. Tum ab aula transiit ad Ecclesiam, & sacris initiatus, adlectus est inter sacerdotes Ariminensis Ecclesiæ; sed vix triennium intercessit ab hac ejus inductione animi, cum sacerdotium illud facietate dimisit, ac rursus, tanquam postliminio,

reversus est in domum Episcopi Patavini; nec factum est diu, postquam ad vetus illud præsepe se recepit, cum pinguius sacerdotium, sibi oblatum, arripuit; sed coactus est illud dimittere, Romamque confugere, non tam levitate animi, quam salutis tuendæ necessitate, quod ad necem peteretur a fratribus mulieris ejusdam nobilis, a qua insane amabatur, quæque (ut ipse gloriari solebat) tribus aureorum millibus conata esset expugnare, sed frustra, suum illud constans castitatis perpetuo servandæ propositum, vel saltem perficere, ut mutuum cum ipsa faceret in amore. Habuit tum Romæ in Academia Humoristarum, variis de rebus, disputationes, illam præsertim, quam ceteris omnibus anteferebat, de fretis, aut de marinis æstibus, cum videlicet eorum accessus & recessus Lunæ motu, an alia quadam magis necessaria ratione, gubernentur; Laudationem D. Gregorii Magni, Academix tutelaris Divi, aliaque. Verum urbis quoque, sicut ceterarum rerum, saties hominem cepit: ac die quodam, antequam potuisssem suspicari, cum Roma discesse; redditæ mihi sunt ab eo literæ, quibus exponebat, sibi Deipatæ sacerdotium, in monte Typhi obtigisse, omnium, quæ ad eam diem consecutus esset, optimum ac locupletissimum; nihil ibi desiderari, quod cæli terræque benignitas suppeditare hominum usibus possit; saluberrimas ibi auras afflare, liquores perlucidissimos amnium effluere, gelidas fontium perennitates emanare; ibi viridissimo, ac florum varietate distincto, camporum amœnitates, ornatu vestiri; ibi ædes, edito amœnoque in loco, sitas esse pulcerrimas, unde, circumjectos in agros, lepidissimus pateret prospectus; ibi aquas hauriri puras ac liquidas; ibi præstantissima plenis e doliis vina diffundi; quocirca jam sibi fixum ac deliberatum esse, perpetuum vitæ suæ domicilium collocare eo in loco, quo cum nulla maris pulcritudo, nulla oræ ac litoris cujusvis amœnitas, nullæ urbium quantumvis maximarum opes, conferri æquarique possent; ibi se vivere, ibi sepultum se velle esse; proinde, suas sibi haberent Pontifices tiaras, sua sibi regna Reges, suas sibi divitias divites, suos sibi ambiciosi homines honores; se nihil hæc illis invidere:

lere: postremo admonerat me amice, ut, si scirem, biestis omnibus opum, honorum, divitiarumque co-
itationibus, illam cœli salubritatem, illam agri pulchri-
tudinem, fertilitatem, amœnitatem, illas naturæ, quasi
dilascivientis, delicias, fumo, opibus, strepituque Ro-
mæ, mutarem; atque avibus ac ventis citius ad se con-
derem, quo me una secum hilaritati, amœnitati, at-
que ab angoribus omnibus vacuitati operam darem,
is literis lectis, nihilo tum commotior sum factus,
quod adhuc spe aliqua rerum urbanarum tenerer; sed
iquanto post de ea spe dejectus, ita exarsi cupiditate
us boni, quod monstrabatur, persequendi, ut jam in-
perem cogitare de itinere, num esset commodius, me
luc lectica, quam equo deferri; cum subito nuncius as-
ratur, hominem, repudiato sacerdotio, ac tot elatis in-
clum laudibus, deliciis, amœnissimo loci illius ses-
su, Ariminensem frequentiam, & inter vestitas flori-
is ripas, præterfluentibus rivis, pumiceas, parvi Ru-
conis undas anreposuisse. Nec Ariminensi domicilio
repetuo se tenuit, sed, novus Ulysses, Ithacam suam,
deest; montem Scutulum, postquam multorum mores
dit & urbes, sese recepit. Sed, quemadmodum ille
nelopem reperit a procis vexatam, ita etiam hic
m suam familiarem, vario litium genere a cognatis
pugnata invenit. Quod suum incommodum cum
rdinali a Balneo, cuius in imperio ac ditione erat,
r literas exposuisset, responsum ab eo accepit, ne se
modum animo demitteret; nam ipsi, a præliis o-
ribus destituto, domum suam semper portum ac persua-
am fore. Id ille, non responsum, gratiæ scilicet cau-
factum, sed invitationem, atque adeo vim esse puta-
; qua a Cardinali in suam familiam attraheretur,
æ moræ quidquam in ipso fuit; sed annos natus tres
septuaginta, se rursus aulæ, hoc est, jactato tempe-
tibus omnibus mari, fragili conscissaque rate, com-
sit; sed confectus senio, atque artuum doloribus, &
ia non satis ex sententia, eorum, quæ cogitaverat, e-
ntus sibi procedere animadvertēbat, reversus est in
triam; ubi anno post moriens, vitæ simul & incon-
intixæ finem fecit. De eo stulta ac ridicula multa nar-

rantur; quorum hic pauca referam. Primum in Herolico carmine, multis partibus, se superiorem Torquato Tasso fingeat; ac propterea multos, ex sua Aquileia capta soloque æquata, rhythmos, octonis inclusos versibus, selegerat, ac seorsim a ceteris, una cum totidem Tassi, ejusdem fere argumenti versibus, edendos curaverat; ut fieri judicium posset, quantum ipse illi præstaret. Deinde homo gloriarum plenissimus, sibi persuadebat, in toto orbe terrarum celebratum suum nomen esse; ac si literatus quispiam ipsi advenienti continuo non assurrexisset, elatus iracundia, hisce hominem verbis accipiebat: hanc? Abbas Cagnolus, eversa Aquileia, & tantorum carminum auctor, tuam potuit notitiam effugere? non sit verisimile. Et quo tempore, Cardinalis a Balneo aulae ludus erat, cum die quodam in Humoristarum coetum se intulisset, & amatoriam quædam carmina ab alio, ut ipse dicebat, confecta, qui in ejus disciplina educatus esset, senex candidissimus recitasset, omnium in se risus excitavit: quamobrem ille, inflammatus ira: Quid ridetis, inquit, infani? ego sum ille Abbas Cagnolus, omnium, qui sunt ex hoc numero, multo antiquissimus, quique ex diruta Aquileia poemate, tantam mihi gloriam famamque collegi, ut nullus in terra vivat, cujus nomen sit apud omnes illustrius & clarius. Quibus auditis omnes ita voces, ita palmarum intentus, ita sibilos, profuderunt, ut ad eos compefcendos, nihil Augustini Mascardi, qui tum Aca-
demiam Princeps regebat, iussus atque auctoritas plane valeret. Nec potest satis narrari, quos doli ludos Reate præbuerit, cum ad Cardinalis, de quo diximus, aula irrepisset. Nam eam amplissimorum honorum spera animo, ridicula ambitione, conceperat, ut ex pedissequis aliisque imi subsellii viris, qui omnia illi assensando, ceteris rectius, Gnathonis partes agebant, sibi familiam eligeret, atque illum domus suæ præfectum, illum sibi cubicularium, illum pincernam, illum convivii magistrum, constituerat. Ex quo apparet, eo stultitiae genere laborasse hominem inflatum ac tumidum, quo desipiunt ii, qui esse primos se omnium rerum volunt, nec sunt. Contra vero fecisse eum multa prudenter.

ac recte, argumento est vita, ab eo liberaliter honesteque traducta. Quamquam, arrogantibus sane verbis, gloriari solitus sit, nulla se unquam mortiferi sceleris labe animum commaculasse; cum cum constet, stulta quadam aliis detrahendi licentia, iniquissimorum, de moribus etiam Principum, sermonum suorum domicilium, non in audientium solum auribus, verum etiam literis, ac libellis, sine auctoris nomine, datis, in legentium oculis collocasse. Deinde probant ejusdem Ingenium & eruditionem multa docte ac pie versibus scripta; ut Iuliani Martyris, Laurentii Iustiniani, S. Alexii, vitæ, Mariæ Magdalenzæ luctus, & lacrymæ, Dispar Iustu & peccatoris interitus, Quinque Rosarii Mysteriora, Deipara scilicet, ab Angelo annunciata, eadem isti cælum assumpta, Christi Nativitas, Fuga in Ægyptum, ejusdemque inter legis magistros sedentis inventio, Aquileiz vastatio, Heroicis versibus luculenter expressa, bis edita, & in secunda editione, tribus millibus in locis, & eo amplius emendata, ac melior effecta. Verum ad hæc quoque, quamvis plena gravitatis & ingenii, aliquid etiam solitæ ejusdem vanitatis ac levitatis influxit. Nam, quo ostenderet, afflatu magis divino, quam aliqua alia humana ope atque labore, illam poeticæ facultatis vim in ipso exitisse; mihi persancte affirmabat, nunquam se Franciscum Petrarcham, vel alium quemquam Poetam Hetruscum, esse conatum attingere. Sed, ut de ceteris taceam, in Torquato Tasso, cujus se æmulum gloriæ profitetur, mendacii arguitur. Scripsit etiam soluta oratione complura, Semiramim, ab iniquorum calumniis vindicatam laudationem D. Gregorii Magni, sermones de Virginis Deiparæ doloribus, de avaritia, de maritimi æstus accessu atque recessu, multaque alia. Verum extremo vitæ suæ tempore testamentum condidit, ita prudens, ita ab omni parte perfectum, ut constans sit omnium opinio; non alias cum magis mente quam morti proximum, valuisse,

THOMAS DEMPSTER.

FVit hæc semper constans omnium fere hominum opinio, eum esse ad literarum studia aptissimum, qui sit quietissimus, & ab omnium certaminum contentione remotissimus; quod mitissima Musarum natio non audeat ad eum accedere, cui immane ac ferox ingenium a natura contigerit. Sed, nescio quo pacto, hac nostra ætate, mansuetissimæ illæ sorores, summa animi voluntate, complexæ sunt Thomam Dempsterum, Scotum, hominem factum ad bella & contentiones, quippe qui leviter, re, vel verbo laceratus, continuo ad arma rixasque decurreret; nullum ferme diem, a concertationibus vacuum, præterire sinebat, quin videlicet, cum aliquo, vel ferro decerneret, vel, si ferrum minus suppeteret, pugnis rem ageret; quo fiebat, ut esset prædagogis omnibus formidabilis. Sed tum in primis seivum & impavidum suum animum declaravit, cum a Grangerio, collegio Bellovassensi Præfecto, quem negotia domestica Parisiis discedere alioque proficisci cogebant, muneris sui vicarius constitutus est. Nam adolescenti, qui socium ad singulare certamen provocaverat, demissis ad caleas femoralibus, robustique hominis humeris elato, in omnium conspectu, multas plagas imposuit; quam ille contumeliam cum ferre non posset, ac propterea vindicare constituisset, die quodam tres viros nobiles, cognatos suos, ex Regis corporis custodibus, in collegii ædes introduxit, a quibus Dempster, cum vim sibi parari intellexisset, vocavit socios ad arma, omnesque collegii famulos iussit cum telis accurrere. Sed antea illorum equos, præ foribus ædium relictos, trucidaverat, at servorum multitudo armata ita illos, qui jam iræ furorisque pleni in peristylum irruerant, circumstetit, itaque formidine complevit, ut cogerentur salutem ac vitam in beneficii gratiaque loco deposcere; qua impetrata, nihilominus, obtorta gula, abrepti sunt in turrim campanariam, ibique aliquandiu in vinculis habiti; sed ex iis tandem exempti, de hominis vita & moribus, testes idoneos interrogandos, eorum-

eorumque dicta in publicas tabulas referenda curarunt. Quam exortam in se tempestatem ut evitaret, in Angliam, tanquam in portum, confugit. Vbi non modo turum ab insectatoribus suis perfugium, verum etiam mulierem nactus est, forma & vultu, adeo liberali, adeo venusto, ut nihil supra, quam in uxoris habuit loco. Quæ mulier, cum luce quadam, Parisiis, quo rursus Thomas cum ea se receperat, conspecta esset, & quia forma præstabat, ut diximus, & quia habitu erat dementissimo; nam & pectus & scapulas, nive ipsa candidiores, omnium oculis expositas habebat; tantus, visendi gratia, hominum concursus factus est, ut nisi se in domum cuiusdam, una cum viro, recepisset, nihil propius factum esset, quam ut ambo a multitudine opprimerentur. Verum mulier omnino, ut dicitur, mala merx est; non enim potest, ira arte subiecta custodiis omnibus, haberi, quin custodibus verba det, atque ad hostes tuto transfugiat. Nam Pisis, ubi elegantissimas literas, non tenui stipendio, docebat, dum e Gymnasio revertitur domum, introductos hostes, arcem captam, ac mulierem ab se abductam, discipulorum suorum infidiis, reperit; quam ille iacturam, sicut olim rei familiaris damnum, æquissimo animo tulit. Etenim, Catholicæ religionis causa, ut ajunt, fortunis omnibus, quæ satis amplæ erant, everlus, domoque profugus, Lutetiam Parisiorum venit, ibique, rerum omnium egen- tissimus, quamvis se nobili genere ortum prædicaret, rem, & multo magis gloriam, humanioribus discipli- nis, juventuti tradendis, invenit; quam illi gloriam mul- tiplex rerum scientia, reconditæ exquisitæque literæ, & incredibilis memoriæ magnitudo consecerat; ibique cum esset, commentarios in Rosinum, de antiquitati- bus Romanorum, qui eruditorum omnium manibus teruntur, alioque non minus eruditos, in Crispum poe- tam Africanum, & Claudianum, edidit; tum Pisas se contulit, ubi abductæ a se mulieris infortunio macta- tus, ut paulo ante memoravimus, fuit. Atque hanc Pi- sanam commorationem arbitror fuisse causam, cur se- ptem illos elegantissimos de Regali Hetruria libros scriptos reliquerit, qui nondum editi, summa Magni

Hetruriæ Ducis cura, asservantur. Multa præterea leguntur, ab eo, tum soluta oratione, tum versibus, docte eleganterque conscripta; quatuor epistolarum libri, Tragicæ, Tragico-comædiæ, & variorum carminum libri quatuordecim, Cosmographia, Mythologia, accuratum ac prudens de unoquoque ætatis cuiusvis historico iudicium; Sed feruntur in primis libri illi quinque & triginta, quibus accurate eruditeque res Scotiæ complexus est. Verum, illud ingenium, illa virtus, illa vis doctrinæ, in Italiæ luce, hoc est, in orbis terræ theatro, perspecta, atque cum plausu excepta, tantum commendationis habuit, ut publice ab omnibus expeteretur; sed Bononia, bonorum ingeniorum faultrix, ac perpetuum elegantissimarum artium domicilium, visa est illi, præ ceteris Italiæ civitatibus digna, quæ esset theatrum ipsius ingenii, ac voce erudita, & Romanis Græcisque auribus admirabili, frueretur; ubi tandem est artuum, ac nervorum doloribus, tum in manibus pedibusque, tum in capite, consumptus. Qui quidem, si ætatis ratio habeatur, celeriter, vita spoliatus, interit; si gloriæ, quam adeptus est, magnitudo spectetur, diutissime vixit; immo nunquam moriturus, per omnium virorum ora volitabit. Deslerus est ab omnibus, sed in primis a sodalibus Academiæ, cui nomen est, Nocti; atque in eo eruditissimo cœtu, ab Ovidio Montalbano, qui Roscidus appellatur, elegantissima laudatione publice exornatus.

IOSEPH TRULIERVS.

Quo tempore Ioannes Bonsius, a Paulo V, Pont. Max. in Cardinalium Collegium cooptatus, Romam venit ex Gallia, ut purpureo galero, præcipuo ejus dignitatis insigni, Pontificis manu tradito, caput infereret; bonis & honestis conditionibus Iosephum Trulierum Gallum, medicæ artis peritum, pellexit, ut secum in Italiam veniret, quo sibi suæque familiæ, in ægrotationibus, præsto esset. Hic Parisiis in Pietrei, medici clarissimi, cognomento Magni, domo, una cum ejus liberis educatus, medendi ab eo artem acceperat, atque

atque in celeberrimo Parisiorum gymnasio, artis ejusdem Baccalaureus fuerat pronunciatus; & cogitaverat etiam ad superiores gradus ascendere; sed hanc illi cogitationem profectio in Italiam eripuit. At, perductus Romam, celeriter in principum medicorum numerum venit. Nam præter usitatam & communem cum ceteris medendi normam & viam, interioribus quibusdam artis præceptis, quibus instructus a Pietreo fuerat, ac præsertim sanguinis largius mittendi ratione, ut mos est Parisiensibus medicis, complures, periculosissimis in morbis positos, ex ancipiti levavit. Itaque, ut de singulorum curationibus taceam, quæ tantum illi negocium exhibebant, ut suis non liceret dare operam rebus, Regis Galliæ oratorum, Pontificiæ familiæ, Nosocomii Lateranensis, Cœnobii Carthusianorum, Minimorum Fratrum, in Colle Hortorum, familiæ, medicus, secundis plurimarum curationum eventibus, satis ostendit, ea, quam ipse insisteret, via ægros ad sanitatem perducere. Quæ res in primis magnam illi urbanorum medicorum invidiam edocitavit, adeo ut certamen esset inter eos, quisnam pluribus ac majoribus eum injuriis oneraret; in quibus antesignanus erat quidam Alexius, qui una cum multis aliis medicis ægrotantes in S. Spiritus Nosocomio curabat; hic agitare insectarique ita eum cepit, ut die quodam, ex quotidianis, de hac nova liberalius mittendi sanguinis ratione, contentionibus, ad gravissimas verborum contumelias palam descenderit, ut etiam Trullerus Alexium sponcione lacerasset, ut qui nimirum plures, uno die, ægrotos, in suo Nosocomio, in sanitatem revocasset, is quingentos nummos aureos ab altero faceret lucri. Sed tandem Itali invidiam Galli virtus, quavis obtreptione major, obtulit, ac ratione, usuque, qui omnium magistrorum præcepta superat, complures ex Romanis medicis edocti, majore audacia cœperunt largiore sanguinis missione periculosos morbis occurrere, & sumpta hinc occasione, Sussii, medici Manuani, de sanguinis missione, librum; rursus Romæ typis mandandum curavit, longa atque illustri de suo præfatione auctum, cui præfationi Bernardinus Castellanus medicus, re-
 spon-

spondens, libris editis, est veterem curandi morem, unde jam plures descierant, tueri conatus; sed inutili plane labore; non enim potuit experientiae, quæ est optima rerum magistra, fidem derogare; quæ quidem experientia, in hoc curationis genere, gravi morbo laborantibus, planeque depositis, multum esse præsidii, declarat. Atque hanc, in morbis, mittendi sanguinis consuetudinem, jam per ipsum pene in mores inductam, Henrici Blacudoet comprobavit adventus. Hic unum ex clarissimis Parisiensis gymnasi luminibus sidus, doctrina ac medendi usu splendidissimum; hic, tum soluta oratione, tum versibus, scriptor eximius; cuius opera, propter egregiam artem, duum millium aureorum stipendio, a Duce Longavillæ conductæ erat, simul ac Romam venit, in multis proceribus Romanis curandis, hac medendi via usus est; quæ ita illi respondit, ut non tam medicinæ præceptis, quam magicis artibus imbutus existimaretur. Eo, Roma profecto, cuius auxilio Trulierus probe erat ultus inimicos suos, de eisque triumphum reportaverat, jam nihil reliquum erat, nisi ut ille, re placida, & bene gesta, quiesceret, essetque inter eos, tanquam magister ac dominus; sed adhuc certandum illi fuit cum quodam Gallo, qui nescio quibus impulsus inimicitiiis, vel qua privatim læsus injuria, vel quo præmio adductus, Alexii patrocinium arripens, ob eandem causam Trulierum in certamen contentionemque vocavit. Sed hujus quoque conatus vimque perfregit, causæ suæ defensione; quam apologiam vocant, docte eleganterque descripta, qua totam illius oppugnationem jugulavit. Duas habuit uxores; unam, cujus opera jam diu, ad omnia cubiculi culinæque munia, famulæ nomine, usus fuerat, cujusque, fortasse etiam corporis usuram, usurpaverat; non enim sit verisimile, florenti adhuc ætate hominem, suadente nocte, impellente vino, stimulante libidine, non cum ea muliere caput limasse, quam semper, in eadem domo, in eodem cubiculo, ac prope in eodem lecto, proximam habebat. Hac mortua, alteram duxit, Gaspari Murtulæ poetæ arctissima implicatam propinquitatē. Verum triennio antequam e vita discederet, totus est illi

cor.

corporis habitus immutatus, atque ex sano æger, ex valido infirmus effectus; id quod etiam indicabat color luteus, toto ore diffusus. Sed quid mirum est, in illam tabem delapsus fuisse eum, qui in acerrima attentissimaque abditarum, & morbos continentium, causarum investigatione defixus, & in ea præsertim adeo inter Philosophos agitata de immortalitate animorum disputatione inhærens, nullum sibi tempus, a studio sapientiæ, vacuum dabat? quod studium, ut animo præcipue omnium necessarium, sic corpori inimicum est. At acquisitissimo ille animo, atque, ut Philosophum decet, mortem obiit. Ejus vero bibliotheca, pluribus atque bonis referta libris, est, in urbis foris, venalis exposita, summa studiosorum cum voluptate; nam in prima unuscujusque voluminis pagella suum erat pretium inscriptum, idque vilissimum, a quo nefas erat emptori recedere. Qui vero libri, vel quoniam doctrinam in religione dubiam, vel a bonis moribus alienam, continent, ab hominum manibus eripiuntur; quorum magnus in ea bibliotheca numerus erat; hos ille seorsim amico cuidam suo testamento legavit: at ille, hos quoque, biennio post, Trulieri hæredibus restituit; ut ex iis, bibliopole cujuscumque ope divenditis, inopes illi ac rerum omnium egentes suppeditare ipsorum necessitatibus possent.

IO. BAPTISTA VGOLINVS.

IO. Baptista Vgolinus Montiscutoli, in Æmia, ex Vincentio Vgolino, & Diamante Pasina, honestis parentibus, ortus, Arimini didicit, quæ prima illa institutione tradi pueris solent, atque inde humanioribus literis satis instructus, annos natus non amplius quindecim, Bononiam demigravit, ut in eo gymnasio, cupidissimus literarum, gravioribus disciplinis operam daret; ubi paucis annis eos, in jure civili, profectus fecit, ut ab eo collegio, doctissimorum hominum, quibus constar, fama longe clarissimo, dignus judicatus fuerit, cui utriusque juris publice interpretandi facultas amplissima tribueretur; quo auctus honore, primum in patriam

patriam, tum Ariminum se contulit; ibique vitæ suæ domicilium collocatum habuit. Etenim adultam jam sapientiam suam in ea potissimum urbe statuendam arbitratu est esse, ubi orta primos, ut ita dicam, vitæ spiritus hausisset. Itaque magnum munus, de jure respondendi, suscepit, neque unquam civibus illis opera consilioque defuit. Ac complura etiam ab eo, tum iis, tum aliis, qui ad eum confugiebant, præbita, de rebus contortis implicatisque, recta & explicata consilia in lucem edita, cernuntur; unde, ad similia causarum laqueos solvendo, auxilia petantur. Sed quia proprium est sapientiæ, bona sua non in sinu clausa atque constructa habere, sed in alios etiam diffundere; ideo traditam, a communi illo, in suo Gymnasio, Iuris Civilis publice interpretandi provinciam obtinuit; quæque a magistris suis acceperat, ad communem omnium utilitatem in medium attulit; partem etiam aliquam publici muneris attigit, atque nonnullis oppidis, magna cum æquitatis prudentiæque commendatione, præfuit. Denique, in hac humanæ vitæ quasi fabula, transactis jam suis paribus, cum plausu in sua patria decessit.

VINCENTIVS VGOLINVS.

SI Vincentio Vgolino, Io. Baptistæ filio, Montiscutoli, diuturnior lucis usura contigisset, nec incitato cursu ad summam Iurisprudentiæ laudem properantem; in medio spatio, importuna mors evertisset ac profligasset; profecto nemo eorum, qui una ætate in eodem curriculo versati sunt, illi antecessisset. At primum a parente omnibus illis disciplinis, quibus puerilis ætas instrui debet, eruditus, ac pro amore, quo ipse eam facultatem prosequabatur, juris scientiæ initiatus, missus est Bononiam, ut ab iis, qui jus civile profitebantur, reliqua perdisceret; at, qua erat docilitate ingenii, tantum apud eos progressum fecit, ut vix biennium intercesserit ab eo die, quo audire illos cœpit; cum ab ejus Collegii Magistris, summa omnium voluntate, Iuris utriusque publice interpretandi facultatem accepit, ac profectus Ariminum, apud eos iudices, causas agere cœpit,

cœpit, ita accurate, ita diligenter, ita perite, ut jam non ulia esset causa, quæ non ejus digna patrocinio videretur. At cum ætate quadam, prolatis rebus, in patriam se contulisset, ut rursus, cum res rediissent, Ariminum reverteretur, cumque jam prope esset, ut quod in eo erat, esset perfectum, & haberet maturitatem quandam suam, quæque ille elucubraverat, in lucem emitteret, ejus omnem spem, & vitæ consilia, mors cita pervertit. Quæ autem editurus erat, hæc sunt: Magis-communes opiniones contra magis-communes, Additamenta ad Vantium, de nullitatibus, ac liber de justitia & jure. Eum sibi advocatum, in causis fiscalibus, adoptarunt, Marchio a Balneo, & Comes Malatesta, S. Ioannis in Galilæa Dominus; ut, diplomata fidem faciunt, quæ extant, & a suis, inter alia familiæ monumenta, servantur.

PAVLVS MANCINVS.

PAulus Lucius Mancinus, ex stirpe Romana, vere ac nobili prosapia creatus, puer, omnium ætatis suæ multo formosissimus, a Patribus Soc. Iesu, in Collegio Romano, Grammaticam, atque omnes eas artes didicit, quibus prima ætas informari ad humanitatem solet. Tum profectus Perussum, dedit operam Iuri civili ac Pontificio; ibique utriusque interpretandi facultatem obtinuit. Flagrabat per id tempus Italia Ferrariensis belli incendio, acri ac pertimescendo; itaque ex ingenita ejus stirpi virtute, quæ multos militiæ laudibus inclytos edidit, voluit navare operam miles Imperatori illi, atque unam equitum turmam, Petro Cardinali Aldobrandino, tuendi sui corporis gratia, traditam, Vicarii honore ac nomine, ducendam accepit, & equitando, milites exercendo, aliaque optimi ducis munia exequendo, multa fortis ac non infrenui animi signa dedit. Sed paulo post, sedatis discordiis, belloque composito, ducta in matrimonium Victoria Capotia, Vincentii filia, nobili ac probatissima scæmina, se ad pacis artes ac studia convertit; ac domi suæ, in celeberrima Urbis parte locata, Humoristarum Academiam insti-

instituit, præstantissimus hominum ingeniis refertam; cujus nominis fama, brevi totam Italiam pervasit, atque Alpes conscendens, & maria transmittens, apud omnes eas nationes permanavit, ubi aliquis bonis literis honor habetur; adeo ut hodie, apud doctos viros, nihil fere sit Academia ista celebrius. Vxore, communi hominum fato, amissa, sive ejus extinctæ desiderio, sive pietatis studio, sacris ordinibus initiari voluit, ac sacerdos effectus, fere quotidie sacrum faciebat, ac pene omnia Christianæ pietatis opera exercebat. Postremo urinæ morbo interceptus cessit e vita; cum duas filias, quas ex uxore susceperat, duobus primariis viris nuptas, & masculæ prolis alterum, in collegium Referendariorum coopratum, alterum Iulii Mazzarini, Antistitis clarissimi, & ad summos honores opesque properantis, sororem in matrimonio habentem aspexisset.

GASPAR SALVIANVS.

Gaspar Salvianus, Tifernas, patre medico doctissimo celeberrimoque natus est, ab eoque liberalibus disciplinis instructus. Huic ab ineunte ætate nihil fuit antiquius, quam universos notitia comprehendere, singulorum genus, patriam, opes, divitias, virtutes ac vitia nosse, quam plurimos usu amicitiaque sibi conjungere, quos ita junctos haberet, opera, consilio, labore juvare, cum eis communicare, quod habebat, adeo, ut, cum pro nonnullis eorum intercessisset, pene ad egestatem reductus sit; sed maxime eorum familiaritates appetebat, qui ingenii, eruditionis, doctrinæ, aut artificii cujuspiam fama præstarent; hos colere, diligere, tueri obsequio, horum studia, utilitates, & commoda, suis antepondere. Neque alterius cujusquam opera usus est Paulus Mancinus, ad Academiam Humoristarum congregandam, nisi illius. Nam, quo erat, apud omnes eruditos viros, amore & gratia, non fuit illi magnopere elaborandum, quo unumquemque eorum in illum cœtum attraheret; & quoties conventus ille honestissimus cogendus erat, solus ille, singulos adire, hortari.

hortari, rogare, ut venirent, quæque domi tanquam in umbra commentati essent, foras educerent, & in eam clarorum hominum lucem conspectumque proferrent; adeuntibus obviam ire, salutem impertiri, locum in subselliis tribuere. Et quoniam ex amicitiz, ad senectutem usque, imo ad exitum vitæ firmissimæ durant, quæ in scholis ineuntur, ita, eorundem occasione studiorum, Paulo Mancino, religiosæ necessitudinis nexu, sese obstrinxit, ut illud non modo vinculum nulla unquam dissidii cujuspiam calamitas distraherit, sed ne remiserit quidem; quam perpetuam suam in illum voluntatem, sicut & vivus multis ipse in rebus ostendit, & in morte sua testamento declaravit; nam, paulo ante suum e vita discessum, ampla propinqui sui, qui intestatus erat mortuus, hæreditate locupletatus, ejusliberos bonorum suorum hæredes instituit; denique, cum domum suam nullam haberet, in ejusdem Pauli ædibus, in quibus multos annos conjunctissime cum ipso vixerat, morbo confectus interiit.

GASPAR MVRTVLA.

Gaspar Murtula, Ligur, patre natus est negociatore, qui præsertim Romæ, apud argentarios, numeros pecuniarum permutandarum nomine, in scœnore collocantibus operas locabat suas. Hic, ob indolem ad poësim, Duci Sabaudiz conciliatus, tam diu apud eum in honore & gratia fuit, quam diu inde Eques Io. Baptista Marinus, cujus ille ingenio par esse non poterat, absuit. Sed ejus adventu, multum de parta existimatione amisit, ac minor haberi est coëptus; quamobrem coëpit illi obtrẽctare, atque omnium bonarum artium, Latinæ præsertim linguæ, inscitiam objicere; sed Marini versiculis, quibus respondendo parem gratiam referre non poterat, mirum in modum laceratus, iraque ad insaniam percitus, omillis verborum contumeliis, armis rem gerendam statuit; sumptoque sclopo, cum vellet Marinum occidere, in alterum, virum nobilem, qui lateri ejusdem hærebat, eum emisit; nec mora, a lictoribus captus, & in carcerem raptus, multos ibi menses,

in vinculis egit; sed tandem ejus Principis clementia, ab omni supplicio liberatus, & e carcere emissus Romam rediit; ibique, ad eorum, qui tum rerum potiebantur, amicitiam, sale facetiisque, quibus, tum in perpetua oratione, tum in brevibus dictis, multos mortales superabat, irrepsit, a quibus multa vicissim oppida regenda suscepit: in quibus administrandis, cum diligentem operam præstaret, est mortuus. Mundi totius opificium, sex diebus a Deo perfectum, prosecutus est versibus; nœnias edidit, odas, epigrammata, aliaque non parum multa poemata.

IO. BAPTISTA MARINVS.

IO. Baptiste Marino singulare ingenium, & incredibilis ad versus faciendos indoles ac celeritas, magnam illi apud posteros gloriam peperit. Sunt ejus carmina omnium florum varietate conspersa; sunt verbis ac sententiis referta, dulcibus, concinnis, acutis; mira inest in ejus oratione facundia, venustas, ac lepor. Utinam ingenio ille suo temperare, quam indulgere maluisset; profecto esset, quem cum veteribus poetis quodammodo conferremus. Innumera propemodum scripsit, tum soluta oratione, tum versibus; quorum argumenta, & numerum, refert Honoratus Clarettus, in proœmio tertie partis ejusdem Lyræ. Eorum, quæ edidit, laudatur in primis Lyra, quæ tres in partes distributa, Amores, Pastorum Piscatorumque cantilenas, Heroïum Encomia, funebres amicorum & illustrium virorum laudationes, lusus pios, & sacras Odas. Deinde celebrantur dictiones sacræ, Pauli V, Pont. Max. nomini dicatæ, Puerorum innocentium cædes, Ambulacrum, quod vocat, ubi illustrium, tum vitiiis, tum virtutibus virorum imagines, elegantissimis versibus, tanquam coloribus, depictæ cernuntur. Sed summam, in suo Attonide, laudem meruit; in quod poema omnes poetici flores, omnes numeri, omnes lepores, omnes Veneres, confluisse videntur: verum, ob insignem ejusdem, tum in sententiis obscœnitatem, tum in verbis lasciviam, ne moribus, adolescentium præsertim, exitium affe-

afferant, severissimis edictis e manibus omnium ereptum est illud, neque ejus legendi facultas a quoquam, nisi a Romano Pontifice, tribui potest. In aliquot virorum Principum aulis versatus est, summa cum ingenii laude ac nomine; sed inprimis magnifice ac liberaliter exceptus est, atque habitus, a Carolo Emanuele, Sabaudie Duce; a quo etiam Sanctorum Mauricii & Lazari militie insignibus cohonestatus, aliisque commodis beneficiisque auctus ornatusque discessit. Sed cum, libris editis, ac nonnullis aliis in rebus, optimi ac beneficentissimi Principis animum offendisset, repressa est hominis audacia atque coercita, diuturni carceris custodia; ac nisi mite Principis illius ingenium, & a cæde hominum abhorrens, obstitisset, supplicio affectus, poenas temeritatis debitas justasque solvisset. At dimissus, profectus est in Galliam, ibique, ingenii laude, opes ac divitias reperit: tum Roman veniens, summa omnium voluntate, Academicæ Humoritarum Princeps est factus, in cujus etiam mores, novas ingenii exercendi rationes induxit. Margarita Sartoehia, de ingenii acumine atque præstantia, cum eo habuit contentionem. Præstabat quidem ingenio, & poëticæ facultatis laude, Sartoehia; sed nihil ad Marinum. Postremo Neapoli, Stranguria, hoc est urinæ reddendæ difficultate confectus, in complexu patrum Theatinorum, quos etiam bonorum suorum hæredes instituit, extremum vitæ spiritum edidit.

IVLIVS CÆSAR STELLA.

Ivlivs Cæsar Stella, Romanus, fuit excellenti vir ingenio, & ad studia literarum in primis apto. In hoc natura, quid efficere posset, in puero videtur experta. Nam ita celere illi ingenium tribuit, ita lepidum, ita amœnum, ut in ipso pene ineuntis ætatis flore, in faciendis versibus, senum multorum gloriam antecesserit, ac prope, simul ac natus, maturitatem adeptus fuerit suam. Etenim nondum annos natus viginti, libros Columbeidos edidit duos, poëticis omnibus laudibus ita refertos, ut M. Antonii Mureti, Petri Victorii, Angeli

Bargzi, Petri Magni, aliorumque doctorum virorum, qui tum maxime florebant, testimonio, senius illud opus, quam non illa modo, sed longe etiam superior ætas ferret, iudicatum sit, & summis in cælum laudibus elatum; neque dubitat Franciscus Bencius, a quo ille eruditus fuerat, discipulum suum se magistro maiorem asserere. Sed tam secundus properantis naturæ favor, tanquam ventus, hominem cito defecit; qui cum consedisset, simul etiam festinantis vis illa ingenti quieuit, neque postea quidquam, quod magnopere dignum esset laude, perfecit. Quamquam sit verisimilius, ipsum naturæ potius, quam naturam ipsi defuisse. Nam, cum satis se adeptum laudis & gloriæ arbitraretur, summum illud studium remisit, quo a puero fuerat incensus; ac maluit in aulæ luce, honorum sectator, versari, quam in umbra domesticorum parietum delitescens, ad summam poëticæ facultatis laudem pervenire. Fuit, ob præstantiam ingenii, multis summis Pont. carus, sed Clementi VIII. etiam in amore ac deliciis, a quo etiam inter cubicularios intimos est adlectus; quem locum deinceps apud alios Pontifices tenuit. Sed demum cupidus liberorum, qui essent generi monumentum & sibi, senex iam duxit uxorem; at die quodam, dum vini cyathum cupidius haurit, subita morte correptus, excessit e vita.

SILVIUS ANTONIANVS.

IS omnibus exemplo debet esse, quantum in hac Urbe polleat, ab ineunte ætate, probitati ac literis operam dare. Nam Romæ humili loco, obscuris parentibus, & aliena ope indigentibus ortus, sola virtutis & ingenii commendatione, in locum honoris ac dignitatis, regali fastigio proximum venit; processurus honoribus longius, nili mors intercessisset. Puer in ludum missus, ea ingenii celeritate, quæ a magistris tradebatur, excipiebat, custodiebatque memoria, ut incitamentum suorum industriam, quadrigis, ut dicitur, albis, antecederet. Ita in versibus faciendis erat felix, ut annos natus non amplius decem, quavis propolita mate-

materia, eos versus ex tempore funderet, quos quivis vir doctus, vix multo tempore, multoque labore adhibito, composuisset; cujus rei periculum factum est maxime in prandio, quod Cardinalis Pisanus pluribus sui ordinis viris clarissimis dedit. Nam cum Alexander Cardinalis Farnesius, fasciculum florum Silvio tradidisset, quem illi ex Cardinalibus convivis redderet, qui Pontifex Max. futurus esset, puer Cardinali Mediceo obtulit, qui multo post ad Pontificatum Max. Pii Quarti nomine, ascendit, ejusque laudes, ad lyre cantum, elegantissimis prosecutus est versibus; quod Cardinalis de industria factum, neque carmen illud extemporarium, sed accurate cogitateque compositum domoque allatum, existimans, ut ipse ludibrio haberetur, non leve commoti animi signum dedit; sed a Cardinalibus, id persancte negantibus, rogatus, ut experiretur, & argumentum, quod magis sibi placere, in medium afferret; tum ipsum vere de pueri ingenio existimaturum; quod ab eo factum cum esset, ita puer eleganti carmine, ita verborum ac sententiarum luminibus illustri, rem sibi propositam explicavit, ut Cardinalis, sumnam in admirationem elatus, simul ac factus est Pontifex, conquisito illi, & invento, Pontificii in ædibus, honorificum locum, & quotidianum victum, magnifice præbuerit. Nam Hercules, Ferrarix Dux, qui Marcello II. Pontificatum Max. gratulatum advenerat, & pueri ingenio mirabiliter delectatus fuerat, maximis propositis premiis, eum Ferrariam attraxerat, & doctissimis viris, doctrinis omnibus excolendum formandumque tradiderat. At Pius Pontifex, primum illi humaniores has litteras in Gymnasio Rom. publice docendi munus attribuit, summa mortaliū omni approbatione; adeo ut, quo die inciperet explicare orationem pro M. Marcello, tanti ad eum concursus, audiendi gratia, ex tota Urbe fierent, ut quinque & viginti Cardinales, ob eandem causam, accederent; tum gymnasi ejusdem Rectorem, Camillo Perusco Alatriensium Episcopo, eum subrogavit. Hoc Pontifice vita functo, cum sanctioris vite studio incensus, totum se Philippo Nerio in disciplinam dedisset, ultro a Pio V. in demortui Pontificis lo-

cum suffecto, sacri Cardinalium collegii à secretis munus, ultro sibi delatum accepit; quem locum, quinque & viginti annos, summa integritatis prudentiæque cum laude tenuit. Papiensem Cathedralē a Gregorio XIV, sibi oblatam, constantissime repudiavit. Sed tantum ingenii, probitatis, sapientiæque lumen, quia majus erat, quam ut uni tantum Reip. Christianæ parti colluceret; dignum profecto erat, quod altiori in loco collocatum, in universam Ecclesiam lucis suæ radios effunderet. Itaque Clemens VIII, qui singularia hominis merita nosset, cubiculo Pontificio, & sanctioribus brevibus eum præfecit; postremo, in sacro purpuratorum Patrum Senatu commemoratis ejus virtutibus, S. R. E. Cardinalem renunciavit. Ajunt, Alexandro Cardinali Montalto, qui ob leves nescio quas offensivunculas, contumax in Silvium fuerat, sæpius has voces excidisse, se neminem posthac, qui talari tunica & pallio uteretur, quantumvis humilem & abjectum, contemptui habiturum: nam posse fieri, ut quem contemneret, ac pro nihilo duceret, non ipsi modo par honore ac dignitate, verum etiam superior evaderet. Sed tandem vir longe clarissimus, perpetuis curis laboribusque confectus, cumque noctes aliquas, scribendis brevibus, totas evigilasset, lethalem in morbum incidit, cujus vim sustinere non potuit. Mortuus est anno ætatis suæ tertio & sexagesimo; qui annus, scanfili annorum lege occidua, quam clinacteras appellant, quam plurimos aufert. Genus orationis habuit, ut ex orationibus ejus apparet, liquidum, fufum, profluens, & a sententiarum ineptiis abhorrens. Scribenti, ita verba omnia, atque sententiæ veniebant in mentem, ita quæ essent apta sub acumen styli subibant, ut nulla, ejus scripta, litura fœdaret. Tradunt, qui ejus vitæ acta memoriæ ac literis prodiderunt, nullam eum mulierum noticiam habuisse, sed corpus animumque ab omni labe purum conservasse.

DOMINICVS TVSCVS.

IN Dominico Tusco perspicuum & apertum magis apparuit, in Vrbe omnium princeps, non genere sed virtute certari; ac novorum hominum industriæ, ad summam amplitudinem aditum patere. Hic, ex Castro Arano tenui, atque humili Regiensi Diœcesis pago primum Romæ, ad sustentandam inopiam, parva mercede, tenuissimi cujusque negocia procuranda, tum pro aliis postulando, cum probitatem ac diligentiam suam omnibus probasset, paulatim ad majora negocia adhiberi cœptus est; adeo ut Clemens VIII, post gravissimas provincias illi commissas, Urbis regendæ munus demandarit; quo cum fide & integritate administrato, demum eum, summis laudibus ornatum, in augustissimum Patrum amplissimorum senatum adlegit: ac ne ad summum Pontificatus Max. verticem perveniret, sermonis libertas obstitit. Nam cum Leone XI, extincto, comitiis Pontificiis, de altero in ejus locum subrogando ageretur, & Cardinales complures suis suffragiis, ad eum eligendum, tanquam pedibus irent; intercessit Cæsar Baronius, ac magna voce clamans, non decere, in Petri solio conspici nisi eum, cujus ex ore verba accurata, gravia, ac summo Pontifice digna prodirent, eorum cursum retardavit; sed cum magnis clamoribus & contentionibus a suffragatoribus ipsius res ageretur, tandem ejus causa victa est, ac de summi Pontificatus spe in perpetuum dejectus; quam ille repulsam incredibili magnitudine animi tulit, vel ob id ipsum Pontificatu maximo dignus, quod ejusdem sibi e manibus elapsi desiderio non magnopere commoveri visus sit. Nam continuo, summa animi alacritate, ad opus illud ingens Communium conclusionum, quod inchoaverat, absolvendum typisque mandandum se contulit. Humiles & obscuros homines, ad se venientes, humaniter excipiebat, eisque erat auctor, ut labori, ac juris civilis studio, se naviter traderent; nam fore, ut eorum labores maximis præmiis compensarentur. Ac de me, agebat, exemplum, quod vobis sit utile, sumite. Ego,

ex vulgari caufidico, multis antea honoribus functus, Urbis Gubernator, Epifcopus & Cardinalis evafit, ac nihil propius eft factum, quam ut Summus Pont. fierem. Deceppita ætate, annos natus prope nonaginta, de ædificanda fibi domo cœpit cogitare; quam, in ea parte Urbis, quæ Mons Citorius vulgo appellatur, amœno, & ab arbitris remoto loco, multis privatis ædificiis emptis fubverfisq; faciendam ftatuendamq; curavit; credo, quod exiftimaret, fe femper efle victurum: fed accidit, ut antea hominem terra ad fe reciperet, quam domui ftigium eflet inopofitum.

AVGVSTINVS OREGIVS.

Pari felicitate ufus Auguftinus Oregius; ex S. Sophia, ignobili pago in Flaminia, generis obfcuritatem fui, morum præftantia & ingenii fplendore illustravit. Nam, qua erat animi celfitudine, fpretis humilioribus artibus, quibus facile ad victum neceffaria parantur, tanquam infra animi fui magnitudinem longiffimo intervallo locatis, admirabili liberalium difciplinarum amore, & in primis Philofophiæ & Theologiæ ftudio exarfit; quibus percipiendis excolendisq; ita fuam operam dedit, ut illæ, non fere alterum æque fui cupidum naçtæ, in fuorum arcanorum penetralia adducto, omnia ea capita patefecerint, unde flumina doctinarum erumpunt; ex quarum fontibus expletus, ab Urbano VIII, tum Cardinali, acri ingeniorum exiftimatore, accitus eft, ut quod de ejus pectore redundaret, in ipfum, fapientiæ item cupidum, refunderet; ejus doctriinæ abundantia ita fe expletum fenfit, ut poftquam purpureum capitis infigne, cum ex auro gemmisq; conflata pontificia tiara, permutaffet, non factis habuerit, eodem, quo antea, loco ac numero ipfum habere, fed tantam vim ingenii virtutisq; majori dignam theatro judicaverit. Itaque Bafilicæ Vaticanæ Canonicum Theologumq; conftituit, & pecuniis, quæ ex Pontificis Romani mifericordia in pauperes erogantur, præfecit; poftremo in cum amplitudinis gradum hominem evexit, quo, præter Pontificatum, mox nullus eft.

est in Ecclesia celsior, neque clarius; & quo Cardinalis eum locum, quo decet splendore ac magnificentia tueretur; Beneventanæ Archiepiscopalis cathedræ præposuit, unde magnam vim pecuniæ quotannis acciperet. Tantum sapientissimus Princeps virtuti, ab omnibus fere naturæ & fortunæ ornamentis nudæ, honorem habendum esse existimavit. Sed Beneventi, dum magis gregis sui commodis quam sibi consulit, vitam amisit; uno de sacra Theologia, atque altero tantum libro de immortalitate animæ ex Aristotelis sententiâ, editis.

FRATER THOMAS CAMPANELLA.

Inter egregia doctorum hominum ingenia, duo clarissima familiæ Dominicanæ lumina, longe lateque eruditionis & doctrinæ radios diffudisse conspeximus; F. nimirum Thomam Campanellam, & F. Nicolaum Riccardium; sed prior F. Thomæ splendor nostros in se oculos atque ora convertit. Hic Styli, quod est Calabriae oppidum, ortus, mature se intra Dominicanorum claustra conclusit; hoc est, annos natus non amplius tredecim; sed non minus celeriter eximii, ac supra humanæ conditionis vires ingenii, signa dedit. Nam cum Philosopho operam daret, quæ ab ipso accipiebat, continuo acumine eloquentiaque majore, aliis tradebat. Sed tanta vis ingenii non potuit diutius, angustis unius cœnobii finibus contineri; longe majorem campum, in quo excurreret, exposcebat; ac primum proximas regiones, tum remotiores, nominis sui fama complevit. Nam magister, unde prima doctrinæ rudimenta acceperat, a fratribus Franciscanis, Conventualibus, ad publicas disputationes Cosentiam invitatus, cum subito implicitus morbo venire non potuisset, subrogavit suum in locum Thomam; qui ita præclare, ita docte, traditas sibi partes exegit, ut esset omnibus miraculo, ac Telesii, cujus ille ne nomen quidem audierat, ingenium in eum immigrasse diceretur: quo ille audito, ejus Philosophi librum intra paucos dies devoravit, ejusque philosophandi rationem penitus perspexit, ac præbavit; nec mora, minus undecim mensibus, ad

Martz librum, undecim annorum labore studioque contra Tileſium exaratum, reſcripſit. Cujus poſtea imprimendi gratia Neapolim cum veniſſet, atque e navi egreſſus, præter Ædem S. Mariz Novæ Franciſcanorum, ligneo utentium focco, tranſiret, ex turba eun-
tium ac prætereuntium incenſus eſt cupiditate cognoſcendi, quid intus rei ageretur; atque diſputationibus operam dari cognovit, in quibus cuius contra diſſerendi facultas dabatur. Itaque ſeſe certamini, una cum aliis, objecit, cœpitque ea, quæ tanquam firma ac rata ponebantur, tot argumentis, tam validis, tam apte arguteque concluſis, labefactare atque convellere, ut ovanti ſimilis reductus ſit domum a fratribus ſui ordinis, ac poſtero die, & aliis deinceps multis, coactus ſit in eruditam illam aciem certamenque deſcendere, unde ſemper, magna cum laude, victor diſcedebat. Illud vero ſui nominis famam, ſupra quam dici poteſt, in immenſum auxit, quod, cum in illis diſputationibus, Theologorum quoddam placitum in contentionem certamenque deductum eſſet, ac multa doctè arguteque in utramque partem eſſent allata, nescio quod docti cujſdam, ex ſuo ordine, ſenis dictum, utpote verum, cum plaſu excepit, & in cælum laudibus extulit; at ſenex iratus: Tace ſis, inquit, nec te imiſce; de Theologicis hic rebus ambigitur, quas tu ne primoribus quidem labris attigiſti. Quo hominis in primis iracundi dicto exarſit ille, nec tulit; Ac vide, inquit, quam ego ſim harum rerum ignarus ac rudis, ut poſſim te decem annos in diſciplina habere, ac poſtea adigere, ut fatearis, te nihil ſcire vel intelligere. Ac reprehenſum ſenis illius argumentum, & ſanctorum Patrum ſacrarumque literarum teſtimoniis confirmatum, tanquam amen-
tatam haſtam, ita cœpit ingenii læcertis ac viribus intorquere, ut omnium conſeſſu fuerit judicatum, a Campanella ſemper omnes, illo autem die etiam ipſum a ſeſe ſuperatum. Quæ victoria magnos illi, in omnem vitam, bellorum tumultus excitavit. Primum, a ſeue illo, cujus contumaciam retuderat, apud Quæſitores fidei accuſatus, quod, tantam vim doctrinæ, cujus ne literam quidem didiciſſet, ex inferorum fontibus hau-

haustam ebibisset. Deinde Neapoli perduellionis reus factus, quod regnum istud hostibus prodere conatus esset. Cujus criminis suspicione conjectus in carcerem, quinque & viginti in eo annos, omnibus confectus miseriis exegit, & in primis ultimum vitæ discrimen adiit; cum quæstione de eo quinque & triginta horis, dire ac crudeliter habita, omnes, circa sedem, venæ arteriæque; tormentorum immanitate distractæ, eam vim sanguinis emisissent, ut sisti non posset; ad quæ tormenta eam animi fortitudinem attulit, ut ne vocem quidem unam emisisset, docti ac sapientis viri gravitate indignam. Sed demum, ex vinculis illis elapsus, cum novam sibi tempestatem commoveri animadverteret, fugit in Galliam, tanquam in portum, Regi illi ac regni proceribus, quoad vixit, acceptissimus. Scripsit ingens opus, de reformatione scientiarum, decem in codices divisum, quorum singuli, plures in partes distribuuntur; unde, nihil acutissimo ingenio homini tam fuisse propositum apparet, quam relictis veteribus viis, ad omnium scientiarum notitiam, novum atque directum iter aperire. Scripsit etiam alia permulta, partim edita, partim nondum impressa, quorum index a Iacobo Gaffarello recensetur.

F. NICOLAUS RICCARDIUS.

Quis unquam existimasset, in summa corporis pinguitudine, quæ, ne ad terram suo pondere rueret, bacillo sustentanda erat, qualis Nicolao Riccardio contigit, latitare sapientiam? Quis credidisset, in enormi capitis magnitudine, soliditate atque duritie, qua sæpe ille nuces, & quod est in malo Persico duri, uno ictu comminuebat, locum habere ingenii admirandum acumen? Fuit Nicolaus Riccardius, natione Italus, patria Ianuensis, nobili loco natus, quamvis, ab ineunte ætate in Hispania educatus, ac liberalibus disciplinis institutus, ita Hispanice loqueretur, ut pro Hispano haberi posset. Inerat in eo magnum ingenium, eloquentiæ summa vis, memoria, quæ res, ab eo perceptas, ita fideli custodia sepiret, ut nunquam eas elabi pateretur.

teretur. Cujus memoriz fiducia, de quacunque re proposita, diserte copioseque dicebat ex tempore, & in familiaribus colloquiis, ac præsertim in concionibus, quas ad populum habebat, ea rerum ac sententiarum copia redundabat, ut Philippus III, Rex Hispaniarum, qui ejus concionibus interfuerat, ob excellentis abundantiam doctrinæ, non hominem, sed monstrum potius hominis eum esse, palam multis audientibus, dixerit; quod illi cognomen ita adhæsit, ut nunquam exciderit, neque vulgo alio nisi monstri nomine appellabatur. Sed cum tot rebus floreret, judicii tamen laude caruit; in quo ita interdum claudicabat, ut quæ ab eo a re aliena dicerentur, omnem ingenii commendationem everterent. Venit in Italiam, Hispania pulsus, ut ajunt, quod constantem, apud omnes gentes, ac præsertim apud ejus nationis homines, de innoxio Deiparæ Virginis conceptu sententiam nimis acriter vehementerque oppugnaret. Denique Romam profectus, in urbe, vel potius in arce orbis terrarum, in luce omnium gentium, quo, quidquid est ubique præclarum ac laudabile, confluit, ingenii, eruditionis, eloquentiæ, doctrinæque suæ domicilium sedemque constituit, & statim animos hominum ad se, dicendi novitate, convertit; & simul, ac auditum erat eum esse dicturum, locus in subelliis occupabatur, templum complebatur; corona multiplex; ubi surgebat dicturus, continuo silentium; deinde crebræ assensiones, multæ admirationes; genus dicendi acre, incitatum, ac vehemens; sententiæ interdum magis acutæ quam graves, magis venustæ quam utiles, magis crebræ quam necessariæ; ea non parum sæpe amplificandi gratia afferebat, quæ impietati, quam catholicæ veritati, propiora viderentur esse; quæ aut arguta verborum interpretatione, aut alia aliqua ingenii machinatione ab erroris calumnia vindicare, & ad id, quod volebat, conabatur attrahere. Hæc ingeniosis hominibus, juventuti præsertim, admirationi erant, doctis & cordatis hominibus non probabantur. Verum, dicente ipso, hæc atque alia ejusmodi vitia, vocis magnitudo, orationis ubertas, dicentis alacritas, actionis splendor ac dignitas tegebat. At cum se
ad

ad scribendum conferret, hæc omnia, actionis præsidio nudata, sese iudicantium arbitrio offerebant; ut in commentario in Litauias, ab ipso edito, apparet; in quo non pauca, temere ac perperam scripta, F. Thomas Campanella, perpetuus illius obtrektor, collegit, & in unum codicem retulit, typisque mandandum curavit. Sed, omnium confessione, magnum existimationis suæ damnum fecit in eo libello, quem paucis ante mortem annis edidit. Nam cum assiduam multorum annorum operam studiumque collocasse diceretur in refellendis, quæ contra sacrum Concilium in celebri vulgatoque libro scripta essent, cumque eximium aliquod opus ab eo, singulari doctrina & eruditione refertum, expectaretur; ecce tibi, ex tanta hominum expectatione, quam de se concitaverat, tanquam ex parturientium montium alvo, vix paucæ chartulæ, veluti ridiculus mus, prodire. Magistri sacri Palatii munus administravit; denique in locum F. Francisci Nerii, ex cuculatorum familia concionatoris Pontificii; ab Urbano VIII, susceptus est. Referunt aliqui, esse hominem maxime fuisse; sed non minorem illa ingentem corporis molem, quam gerebat, poposcisse, quæ multo cibo esset alenda. Alii vero, ut cibi vique parcissimum, eum laudant; ut in prandio, unico sæpe ovo fuerit contentus; quod in homine tam pingui tamque obeso, mirum atque incredibile videatur. Sed quoniam id mihi non plane compertum est, in medio relinquo. Id quidem certum est, eum apoplexia interiisse.

HIERONYMVS ALEANDER IVNIOR.

Forum Iulii, optimorum semper ingeniorum, ad omnis eruditionis, ac præsertim ad poëticæ facultatis laudem efflorescentium, feracissimum extitit; atque, ut innumeros doceam, quos, ex superiorum sæculorum memoria, edidit, & in primis, ut Hieronymum, Io. Baptistam, & Cornelium fratres Amaltheos præteream, quorum carmina suauitate, cultu, ac nitore, veterum poëtarum gloriæ proxima, in laudem & admirationem

rationem sui ævi suspiciuntur; novissimo demum *seculo* ager ille fertilissimus Hieronymum Aleandrum juniorem extulit, Hieronymi Aleandri, Cardinalis Brundisini, omnis doctrinæ laude cumulatilimi, pronepotem, & Amaltheis, quos diximus, materna arctissima cognatione implicitum (fuit enim maternus illi avus Hieronymus.) Hic ingenio, eruditione, ac morum elegantia apprime præditus, non ita multis annis postquam Romam venit, in aulam Octavii Cardinalis Bandini exceptus, egregiam eidem, per viginti ferme annos, in scribendis epistolis operam navavit; & statim, quo erat in bonas litteras animo ac voluntate, Academix Humoristarum, tum primum nascenti, se totum addixit, in eaque perpetuis commentationibus sese exercuit, in ejusque *Impressam*, eruditissimum librum, vernacule scriptum, edidit. Adolescentulus antea in Caji Institutiones egregium commentarium typis mandandum curaverat, cum vix ex Jurisconsultorum disciplina prodisset; tum Romæ, de suburbicariis Regionibus, adversus Anonymum hæreticum, librum, doctissime scriptum, emisit; antiquæ tabulæ marmoreæ, solis effigie symbolisque excultæ, accuratam explicationem, atque ad Paulum Gualdum, Archipresbyterum Patavinum, expositionem argumentorum, in zona antiquæ tabulæ marmoreæ exculptorum attulit; præterea, edito optimorum carminum volumine, quid in ea facultate posset, ostendit; postremo, sumpto Adonidis Marini patrocinio, egregium illud poemata, adversus equitis Stilianæ censuram, contumeliis plenam, tueri conatus est. Scribendi ejusdem ratio, tum in soluta oratione, tum in versibus, adeo erat pura, adeo elegans, adeo perspicua, ut sæpe ex me audiret, tum demum me mihi met doctum eruditumque videri, cum sua legerem, cum autem in aliorum scripta, qui se eloquentes dici vellent, incurrerem, tum plane me indoctum, omniumque rerum rudem agnoscere, eo quod verbum prorsus in illis nullum intelligerem. Urbano VIII, ad Pontificatum Max. evecto, ipso adveniente Pontifice, ex Cardinalis Bandini domo, in aulam Barberinorum adductus, Francisco Cardinali Barberino, fratris Pontificis filio,

Alio, traditus est, ab epistolis Latinis scribendis; quem etiam secutus est in Galliam, Legati jure ac nomine ad Regem illum missum. Sed qui itineris, tam longi, labores fortiter constanterque subisset pertulissetque, vim morbi ferre non potuit, ex frequentibus concenationibus compositionibusque cum amicis & contubernalibus aliquot suis contracti, quos inter convenerat, ut, tertio quoque die, mutuis se invicem conviviiis exhilararent. Nam homini tenui & infirma valetudine, apud mensam plenam, necesse erat plus sumere, quam suus ferre stomachus posset. Mortuus, elatus est Academicorum Humoristarum humeris, atque, in ea Academia, de qua erat optime meritus, Francisci Cardinalis Barberini opera sumptuque, amplissimo funere cohonestatus.

HIERONYMVS PRÆTVS.

Franciscum Cardinalem Barberinum, quem modo meminimus, in Hispaniam, sedis Apostolicæ Legatum, proticiscentem, cum Hieronymus Aleander, adversa valetudine impeditus, non posset prosequi; scribendarum epistolarum partes demandatæ sunt Hieronymo Præto Bononiensi, ex nobili vetustaque familia; qui statim ab excessu Gregorii XV, Pontificis ejusdem fratris filio relicto, cujus lateri honorarius custos fuerat additus, ad id, unde spes nova utilitatis futuræ ostendebatur, vela dederat, hoc est, ad novos rerum dominos transierat. Verum, quasi prælagiret animo, illud sibi iter fore postremum, ante suum e vita discessum testamentum fecerat, & amicos ad unum omnes salutaverat, ac valere jusserat, quos nunquam postea se esse visurum affirmabat. Neque ejus prædictio vana evenit. Nam itineris labore molestiaque confectus, Barcinone diem obiit supremum. Erat homini ingenium satis acre, amicum, & ad humaniores literas mire propensum. Adolefcens juri civili operam dederat, ac magnam de se opinionem concitaverat. Nemo enim erat, qui eum nosset, qui non existimaret, magnum eum Jurisconsultum evasurum. Sed cum severiora hæc studia lenè ac mite

mite ejus ingenium respueret, humanissimas ac liberalissimas artes, ad quas natura ferebatur, toto pectore amplexus est, & in amore ac deliciis, usque ad extremum vitæ spiritum, habuit. Leguntur ejus rhythmî, sententiis ac translatis paulo audacioribus referti, sed adolescentium assensioquî accommodati; e quibus omnibus ipse suæ Salinaci palmam dabat. Multæ præterea Academicæ disputationes sunt ab eo erudite eleganterque compositæ, & in his Commentarius, quo Comitæ Rodulphi Campeggii poëma, de Virginis Deiparæ laorimis, illustravit.

POMPEIUS CAIMVS.

EGregia atque præclara Pompeji Caimi Vtinenfis, Medici atque Philosophi, omnium fere liberalium artium scientia majorem sibi apud omnes homines amorem & gratiam conciliaffet, si non eam nimius sui amor, & contemptor aliorum animus corrupisset. Erat Græcis & Latinis literis doctus, poëticæ facultatis studiosus, philosophus, non unus e multis, sed prope singularis; rei medicæ peritissimus; ad cujus scientiam longum usum & exercitationem adjunxerat. Romam profectus, Rogerii Abbatis Tritonii, popularis sui, commendatione, ab Alexandro Card. Montalto, qui per eos dies medicum amiserat, magnis præmiis domum suam est invitatus; quæ res magnam illi existimationem apud omnes peperit. Nam summorum ac locupletum hominum, ancipiti morbo laborantium, curationibus ceptus est adhiberi, unde magnam vim pecuniæ fecit; & in gymnasio Romano Philosophiam docendi munus magnis stipendiis obtinuit; quo in munere aliquanto felicior, quam in curandis ægrotantium morbis, habebatur. Etenim contingebat, ut, ipso curante, multi exstinguerentur; in quorum numerum venit Card. Montaltus, unde illi large vitæ alimenta suppeditabantur. Sed in hac arte, sicut in ceteris, fortuna dominatur; & vulgus, ubi bene curationem aliquam evenisse novit, continuo Medicum illum catum & doctum declarat; indoctum autem & rudem eum, cui vertit

vertit mala. Desiderabatur interdum in eo iudicium; quo deficiente aliquando, ad ineptias delabebatur: sed verum est, quod dicitur, nullam esse sapientiam sine aliqua mixtione levitatis. Cardinali Montalto e vivis sublato, conducta est ejus opera a Rep. Veneta, ut, in Patavino gymnasio, medicæ facultatis præcepta traderet. Sed ante suum ab Vrbe discessum, a Paulo V, Pont. Max. in equitum aureatorum militiam adlectus est; qui honor, nisi summorum Principum oratoribus, non habetur. Patavii, ex ingenii æmulatione, cum Cæsare Cremonino similtates, sicut antea Romæ cum Iulio Cæsare Lagalla fecerat, suscepit exercuitque. Docturus discipulos, lætica usque in scholam se deferri jubebat. Decessit, multis præclaris ingenii sui monumentis relictis, atque bibliotheca sua Reip. Venetæ, testamento, legata.

FABIVS LEONIDA.

Fabius Leonida, in oppido S. Floræ ortus, poëta summus ab ineunte ætate, poëticæ facultatis studium, ad quod natura ferebatur, coluit, in eoque diligentissime se exercuit. Multa scripsit, tum Etrusco, tum Latino sermone, cum esset utriusque linguæ peritissimus; sed accurate, magno studio, magnoque labore. Nam in ea, quæ scripserat, severe, inquirens, ex Horatii præceptis decies & plusquam decies castigabat emendabatque, quo videlicet ad summam elegantiam summa etiam perspicuitas ac nitor accederet; & facile utramque assecutus est laudem. In rhythmis, in quibus aliquot annos, ceteris fere studiis omisiss, multum operæ ac temporis posuit, cultu, nitore, elegantia, non video, cui suorum æqualium debeat cedere. Odæ, quibus plus operæ tribuit, proxime, neque admodum longi intervallo, proxime ad Horatii excellentiam accedunt; quas, cum in Academia Humoristarum, ex quorum numero erat, recitaret, magnam ingenii sui admirationem & plausum excitabat. Erat præterea ad omnes liberales artes a natura factus, ut quæcumque in partem ille se daret, in ea excelleret. Optime scienter-

D

que

que fidibus canere, eleganter psallere, in exarandis literis, elegantissimis characteribus uti; epistolas, sermonis elegantia, sententiarum gravitate, & convenienter eorum, ad quos mittebantur, dignitati, componere; in quibus scribendis, multis summis viris egregiam ac laudabilem operam navavit; in his Io. Baptistæ Raymundo, Cameræ Apost. Clerico, Benedicto Card. Iustiniano, Francisco Card. Boncompagno; a cuius se comitatu sejunxit, quia Neapolin cum illo, ad Archiepiscopalem illam cathedram traducto, ire noluit; seu pertæsus aulæ, seu ardentissimo poësis amore inflammatus; cui contraria est in primis aulæ occupatio, atque animus ambitionis labore districtus. Non tamen ejus meritis, ut plerisque aliis accidit, par fortuna respondit. Nam neque ad honores ascendit, neque ad mediocres saltem divitias opesque pervenit. Imo cum, relicto Cardinali Boncompagno, se posse putaret ex redditibus, quos ex aliquot sacerdotis pensionis nomine exigebat, & ex nummis, quos ex pecuniis in sœnore collocatis capiebat, vitæ necessitatibus suppeditare, nihil factum est propius, quam ut debitorum improbitate sœnus & sortem amitteret. Postremo ad convertendos in Latinum sermonem, vario carminum genere, Davidis Psalmos, operam, studium, & laborem contulit; quo in studio occupatum vita defecit apoplexia subreptum, cum de eo Florentiam ad Io. Carolum Medicum, magni Etruræ Ducis Ferdinandi fratrem mittendo ageretur, ut eum optimus ille Princeps, bonorum ingeniorum studiosus, scribæ loco ad manum haberet.

IO. ZARATINVS CASTELLINVS.

IO. Zaratinus Castellinus Io. Pauli Castellinii filius fuit, viri in Romani Pont. aula spectatissimi, quod omnium fere Germanorum Principum negotia, magna cum fidei & integritatis laude gerebat. Sed Io. Filius, statim a prima adolescentia, mire se ad humanitatis studia propensum ostendit; hinc omnes, quos norat, harum politissimarum artium cupidos adire, amicitia comprehendere, colere, tum, patre amisso, a quo ad jus civile

civile perdiscendum invitus compellebatur, a curis omnibus vacuus, illuc contendit, quo natura eum sua ferebat; ociumque in evolvendis veterum scriptorum libris omne consumpsit. Fuit vir acri iudicio, non mediocri ingenio, idemque eruditus Latinis literis, antiquitatisque Romanæ litterate peritus; veterum autem inscriptionum erat adeo studiosus, ut in eis perquirendis interpretandisque pene mori videretur. Hinc fiebat, ut quoad Romæ vixerit, nullus fere dies fuerit paulo senior, quin in aliquo prædio vel agro conspiceretur; ubi ex veterum villarum ruinis saxa vel lapides effoderentur; ut si quæ in eis tabulæ marmoreæ, Græcis vel Latinis notis inculptæ, inventæ essent, vel eas precio auferret, vel quod in eis scriptum esset, in sua pugillaria referret. Scripsit epigrammata, tum jocosa, tum gravia, multo sale leporeque conspersa, aliaque non parum multa plena eruditionis opuscula, quorum singula, ut tempus & occasio ferebat, impressoribus, typis excudenda, mandabantur; quæ si essent unum in corpus collecta, satis magnum volumen efficerent. Fuit maxima ex parte auctor Iconologix, quæ Cæsaris Ripæ nomine impressa, pictorum cælatorumque omnium manibus teritur. Vir nullus erat in Italia, eruditionis laude conspicuus, quicunq; illi aut amicitia non esset aut usus litterarum. Annum quintum supra trigésimum agentem evocavit ad se Faventia, natale parentis sui solum, post biennium remissurum; sed Urbis ocium & amœnitas haud magno negotio hominem, ab honorum ambitione atque aulæ strepitu abhorrentem, retinuit, suasitque locum illum, ubi propter ingenium & eruditionem erat in honore ac precio, patria sede mutare. Itaque, relicta cogitatione Romam redeundi, ibi se in litteris abdidit, ac demum annos natus unum & septuaginta, simul scribendi & vivendi finem fecit, urinæ vitio interceptus: cujus reddendæ difficultate cum premeretur, atque esset necesse eam sæpius manu moliri, nec calculus, qui intus se opponeret, pelli posset; accidit, ut urina, relicto naturali itinere, novam sibi ad exeundum viam muniret; quo in loco cum sua vi & acrimonia ulcera & inflammationes excitasset, demum homini interitum attulit.

IO. BAPTISTA FENSONIVS.

VRbis Faventiz mentio fecit, ut nobis veniret in mentem Io. Baptistæ Fensonii I. C. civis ejusdem clarissimi, quamquam ille se Barsichellæ ortum dicat, quod est Æmiliz oppidum non ignobile, quodque semper multos Romam misit in omni virtutum genere præstantes viros; & nos eodem tempore in augustissimo Cardinalium collegio duos ex eodem oppido vidimus, eo loco ac munere dignissimos. Sed Paventia civem etiam eum suum agnoscit, qui non comitate & hilaritate, ut alii, sed tristitia & severitate commendatus, omnibus iis honoribus functus est, qui uxores habentibus patent. Nam primum Octavio Paravicino Cardinali, Germaniz patrono, tum Scipioni Cardinali Burghesio, qui illo mortuo Germaniz ejusdem patrocini-um susceperat, a cognitionibus fuit; quo postea suffragante, ad urbanos magistratus ascendit, ac Princeps appellationum primo, nec ita multo post Urbis Senator fuit; quem magistratum magnificentissimo apparatu adiit, & pompa, tota fere civitate in ejus spectaculum effusa. Sed tam propensæ in eum voluntatis hanc illi gratiam retulit, quod leges ejusdem municipales doctissimis commentariis illustravit; quem librum nemo est advocatus, nemo causarum patronus, nemo legulejus, quin habeat, legat, quin in reorum defensionibus utatur. In quo illud mirum accidit, quod sumptibus, qui in eo opere imprimendo fiebant, suppeditandis, insignem bibliothecam optimorum librorum copia refertam, tot aunorum opera, studio, labore, sumptuque comparatam, quæque uni etiam oppido splendori ornamentoque posset esse, divendidit: tam multis libris, tamque præclaris, unicus illi liber constitit. Fuit homo tetricus, ambiciosus, honoris appetens, iracundus, magnus sui æstimator; quidquid dixerat, velut Apollinis oraculo profectum videri volebat. Sed homo catus, qui recte nosset aliis cavere, in suis negociis hebes actardus inveniebatur; quo factum est, ut extremo vitæ suæ tempore, arduis & contortis litibus, sua incuria & indiligentia

gentia excitatis, implicitus, ex ægritudine & articulari morbo decesserit.

HENRICVS FALCONIVS.

Dignus est Henricus Falconius Romanus, Academicus Humorista in primis, qui ob celeres ingenii alacris, prompti, & tanquam exultantis equuli, motus, posteritati tradatur. Hic mores adolescentis nunquam exuit; sed semper remansit idem. Nam quamvis annorum decursu ad summam senectutem pervenisset, neutiquam tamen extitit ingenio senex, neque ab iis studiis unquam exaruit, quibus ab adolescentia fuit imbutus: neque tamen quidquam ingenuo ac liberali homine indignum admisit; sed cum hominibus festivis & jucundis vivere, de amore ac rebus amœnis & voluptariis loqui, & quamvis esset lingua celeri & incitata, ac verborum non egens, suam tamen partem sermonis aliis relinquare, nemini oblocutor esse, sua aliis carmina recitare, aliorum audire, & si probabilia viderentur, verbis in cælum efferre, ediscere, aliisque ad cognoscendum proponere; sin autem minus probarentur, modice & caute reprehendere, & quidquid in eis desideraret exponere, amicis obsequi, adesse, opitulari; sed in primis (unde apud maledicos aliquos non belle audiebat) præclara juvenum ingenia, præsertim si essent cum formæ dignitate conjuncta, more Platonico adamare; ita tamen, ut nemo eum unquam cum ipsis ambulantiem aspexerit. Præter eas horas, quas cibo somnoque dabat, nunquam domi se continebat. Noctu vel in amicorum ædes, quæ semper illi patebant, se recipiebat, ibique ad mediam noctem sermones cum illis protrahebat, vel solus in vicis ac foris obambulabat. Nulla nox tam magna turbulentaque tempestate fuit, quæ retinere eum domi valuerit, quin exiret foras, & sub ædium suggrundis & protectionibus ociose incederet. Et si major esset vis aquæ, quam possent tecta defendere, in aliquam porticum confugiebat, ibique tantisper manebat, dum vis imbrum sese remisisset. Nocturnarum autem vagationum comitem laternam, in eaque Vulcanum inclusum, habebat.

habebat; cuius etiam usum amœno ac festivo carmine laudavit, quod hac sententia concludēbatur; illi nimirum laterum generi palman tribuendam esse, quod esset longum, manubrio crasso, latereque pertuso. Interdum vero semper habebat decretum aliquem locum, ubi amicis se daret, ubi si solus esset, vel aliquid legeres, vel commentaretur; ac, me puero, Ædes D. Mariz super Minervam totos eum dies habebat: ac senem, ætate ac stranguriz morbo confectum, quo periit, in tabernam aromatariam, in foro Rotundæ inter olitores & pomarios sitam, se recipiebat, nec duo & octuaginta annos natus, acerbissimisque stranguriz doloribus vexatus, si quis invitasset, recusabat in cauponam commensatum ire, ibique se hilarissimum convivam expromebat, acrisus, ludos, jocos, omnemque amœnitatem exercebat. Quæ puer a magistris didicerat, quæque a doctis viris in colloquiis acceperat, nunquam e memoria dimisit, sed constantissime retinuit, & cum res poscebat, in medium proferebat. Erat cavillator facetus, conviva commodus, in lacescendo respondendoque argutus; voce magna, canora, suavi, quæ suis versibus, cum eos recitabat, splendoris non parum arcesseret; multæ præterea in eo facetiæ, multi joci, magna exemplorum copia inerat. Iam inde ab ineunte ætate, omne suum studium atque omnem operam in scribendis rhythmis collocavit, & in eo præsertim rhythmorum genere se exercuit, quo venusta aliqua sententiola paucis versibus lepide arguteque concluditur; neque minimam in eo laudem meruit: & quoniam hoc genus carminis ductoribus gregum maxime aptum existimatur, unde etiam nomen accepit, ideo ipse se ex Falconio Falcum pastorem Viberinum fecerat; eoque se nomine vocari mirifice gaudebat.

IO. FRANCISCVS PAVLIVS.

TVLit etiam ætas hæc nostra alium, acuto, elegantî, facetoque ingenio, suavis moribus, & admirabili facundia virum, Io. Franciscum Paulum Pisaurensem; in quo magnum fuit Academiæ Humoristarum orna-

ornamentum ac decus. Nam quoties insignis ille eruditum coetus in unum conveniebat, non patiebatur desiderari a se præsentiam suam; sed aderat semper, ferens secum novum aliquem ingenii sui scetus; qui eo majore cum plausu excipiebatur, quod mira vocis suavitate, sono, & claritate commendatus veniebat ad aures; & quoniam semper illustrem aliquam sententiam non illepide conclusam continebat, ad extremum usque reservabatur, ut in animis audientium aculeos quasi quosdam relinqueret, quibus ad illuc redeundum incitarentur. Sed qualis fuerit ejus facultas, quæ scribendi ratio, perspicui potest ex rhythmis, quos edidit; in quibus, quantavis sit actionis, apparet. Nam vocis auxilio destituti, multum de plausu illo, quo fuerunt excepti, deperdunt. Tanta erat in homine humanitas, tantus in jocando lepos, ut, ubi ille adesset, omnis tolleretur ab animis moror atque tristitia. Principibus Sabellis, quoad vixit, perpetuam in scribendis epistolis operam præstitit: apud quos stranguria, ex scribendi labore & assiduitate contracta, interiit: eorundemque principum virorum, honoris & gratiæ causa, semel Triumvir conservandæ Urbis fuit electus; qui honor illi delatus tum est, cum Thadæus Barberinus, Urbani VIII fratris filius, declaratus Urbis Præfectus, maxima pompa ac triumphanti similis, magistratum illum amplissimum adiit. Itaque ille conspectus est in auro, Præfecto proximus adequitare. Semper inanibus mulierum amoribus implicitus, nullum tempus ab his curis vacuum habuit; credo ab molliciem animi, vel ob frequentem ejus argumenti tractationem: & aliquando admonitus a me, ut ab ejusmodi nugis animum avocaret, negavit id a se fieri posse; se enim ita a puero assuesactum, ut sine amore nullam esse vitam duceret; quam tamen innocenter sic transigere se affirmaret: at cum arbitror, acerbissimis vesicæ doloribus exercitatum, de alia re potius, quam de mulierum amoribus, cogitare cœpisse.

M. ANTONIVS DE PROSPERIS.

NOn immerito aliquam apud posteros memoriam sui postulare videtur M. Antonius de Prosperis, Pal-liani, Campaniæ oppido natus, ob insignem memoriam, qua præstitit cunctis, qui una essent ætate. Fuit hic studio & voluntate philosophus, atque fere in omni victu cultuque, ut qui maxime, Cynicus. Habitavit Romæ in Subura, modicis ædibus, inter fæcem & quisquilias Urbis, hoc est inter eos, quos Zingaros vocant; quos etiam in clientelam acceperat. Ædium earum forma hæc erat; Statim ab ostio aditus erat in cubiculum, ubi ipse prandebat, cenabat, cubabat, aliaque omnia ad vitæ usum necessaria exequebatur; cubiculo adjunctum erat impluvium, ubi gallinas plures alebat; sequebatur deinde crypta, in qua ligna ad faciendum ignem, & vini optimi cadum inclusum habebat. Nulla erat illi lauta supellex; culcitra humi strata lectum præbebat; quam culcitram undique pulveris omnisque immunditiæ acervus, tanquam vallus munibat, ut gallinæ, quibus interdum aditus in cubiculum patebat, haberent, quod possent unguibus scalpere. Pro bibliotheca erat fictile dolium, ubi libri nullo ordine dispositi jacebant; arcam, in qua vestes conderet, lignea gravicembali theca suppeditabat: nunquam ab ædibus sordes amovebat, nunquam parietibus dejiciebat operas aranearum, nunquam vasa ænea, rubigine obsita, in splendorem dabat, nullius ille famuli vel famulæ opellas conductas habebat, ipse sibi famulabatur, ipse sibi obsonabat, obsonia scindebat, ipse sibi cyathifabab, ipse sibi prandium coquebat, ipse ad ignem, qui in foculo cubiculi angulo hærenti lucebat, carnem vitulinam, pullos gallinaceos, turtures, aliasque aves veru infixas versabat. Nam hac una in re a Cynicorum disciplina, qui tenui ac parabili victu contenti erant, discedebat, & in Epicuri scholam transibat, quæ lepidis victibus corpus esse alendum docebat: neque erat quisquam, in quem melius Horatianum illud conveniret, *Epicuri de grege porcus*: nulla aderat mensa, quam torale insterneret, nulla mappa, qua os deter-

detergeret, sed coctos pullos, pugno comprehensos, tanquam accipiter, vorabat inambulans. Omnis aberat cyathus, quo potitaret; sed cyathi munus præstabat fistile poculum, eoque vinum, non unum e multis, sed vini florem, in sese invertebat. At si quando obsonium aliquod nitidiuscule curatum expetebat, emptum cauponi proximo tradebat, qui illud sibi in prandium cœnamve curaret. Erat optimorum piscium avidissimus: itaque cum primum advesperasceret, in forum piscarium cum linteolo sordidissimo, quod plenum auri, quasi puer crepundia, in collo pendens gerebat, properabat; ibique multos bilibres filuros, lupos, inter duos pontes captos, murzinas, flutas, aliosque pisces in primis nobiles, quovis precio destinabat. Vnde autem homo pauperculus tantam rem fecerit, qua posset suis sumptibus suppeditare, est operæ precium agnoscere. Liberioris vitæ, sed nulla re prorsus egentis, cupidus, hanc sibi munire ad id, cujus erat cupiens, viam instituit: cœpit in eruditorum conventibus versari, in amicorum colloquiis multa memoriter referre, jaciendisque ridiculis, dicacis memoriaque præstantis sibi viri nomen famamque conficere; qua fama impulsus Petrus Card. Aldobrandinus, qui tum Clemente VIII, ejus patruo, summo Pont. rerum potiebatyr, suam eum in aulam excepit, ut a negociis feriatyr, animi causa, vel insigne aliquod memoriz signum dantem, vel argutum aliquod dictum tanquam jaculum mittentem audiret. Quem hominem utraque in re ita probavit, ut sacerdotio locuplete donaverit, unde multa centena aureorum quotannis acciperet. At malus, ubi se locupletatum vidit, Cardinali manum adiit, & ab aulâ ejusdem excessit. Sed ut ad ejus vitæ mores, unde paululum digressi sumus, revertamur; noctu pileis pluribus caput insertum, cervicali commendabat; quos pileos, ut capiti melius hærent nec exlicerent, sordido lino multisque maculis sordo, mento alligabat. Audivi ex eo, cum diceret, ardentissimo se Chymicæ, quam vocant, artis amore, studioque flagrasse, sed contentum, auri conficiendi rationem, rem multis incredibilem, a se repertam, quamvis sumptu, qui non parvo intervallo lucrum excederet, studium

illud penitus abieciſſe. Hæc ille. Sed mors, quæ æque mundulos ac venustulos, ut horridulos sordidulosque aggreditur, in suis cum sordibus, fato maturum oppressit.

M. ANTONIVS DE COMITIS.

PER idem tempus Philosophus alter, M. Antonio de Comitibus nomine, ob vivendi rationem, a communī hominum consuetudine usuque abhorrentem, non minus quam superior, sermo erat omnibus. Fuit quidem superiori illi M. Antonio, ætate ac philosophiæ studio, par prope ac gemellus; sed, ut varix sunt hominum inter se voluntates, moribus longe dissimilis. Ille incomptus ac rudis, nihil æque ac sordes adamabat: hic comptus, elegans, nulla re ita gaudebat, ut mundiciis. Nullæ in laquearibus telæ aranearum conspiciebantur; nihil in pavimentis, quod oculos posset offendere; & si quam in eis paleam deprehendisset, sua manu collectam, in viam deiciebat; nihil pulveris patiebatur in pileis vel in vestibus hæzere; ac, si quid ad eas advolasset, statim excutia, cum ad usum facta, pellebat; ad hæc supellex elegans, vasa nitida, toralia, mappæque mundissimæ. Hac una in re cum illo Cynico congruebat, solitudinis nimirum amore: nullum enim virum, nullam mulierem, in famulatu habebat; ipse sibi erat imperator, ipse dominus, idem ipsemet sibi dicto audiens. Non tamen idcirco rem philosopho dignam existimabat, sordidis culinæ ministeriis manum admoveere; sed mulierem vicinam conductam in id opus habebat, quæ cœnam ac prandium ipsi coctum in canistris afferret. Ac ne mulieris expectantis, dum pranderet vel cœnaret, mora solitudini ipsius fraus aliqua fieret, simul ac illa advenerat prandium afferens, eam statim cum canistro, in quo hesternæ cœnæ patinæ erant, dimittebat; quem etiam morem, cum cœna daretur, retinebat. Nulla unquam conditione adduci potuisset, ut ovum unum gallinæ, quæ in triviis ac stabulis fimo aliisque sordibus impletur, suum in ventrem immitteret; sed gallinas aliquot domi Martiis panibus alebat; & cum amicus aliquis,
aut

aut hospes, salutandi gratia domum ad ipsum veniebat, par illi ovorum, quæ ex gallinis suis acceperat, domo dabat, referens, quo pabulo alerentur. Fuit astrologus & mathematicus in primis; quæ res pene illi exitio fuit: atque in his studiis ætate confectus interiit.

VIRGILIUS CÆSARINVS.

Virgilius Cæsarinus patrem habuit Iulianum, civitatis Lavinia Ducem, formæ dignitate atque præstantia in adolescentia cunctis sui ævi mortalibus superiorem. At Virgilii immaturo interitu damnum res Romanæ Latinæque literæ fecerunt. Nam si ille longius tempus ingenii augendi declarandique nactus esset, multa extarent in omni genere disciplinarum egregia ingenii ejusdem monimenta, quæ omnium sæculorum posteritas in honorem Romani nominis admiraretur. Sed in ipso ætatis flore e vivis sublatus, triste sui desiderium reliquit. Verum in ea ætate, qua alii studiorum curriculum ineunt, ille eorum spatium transcurrerat; adeo ut esset omnibus miraculo: & quod videri mirabilius debeat, non una tantum in re, sed in omnibus præstitit; nam Græce & Latine doctus, erat sagacissimus naturæ indagator, adeo ut nonnulla in philosophia invenisse diceretur, ab Aristotele ignorata; sacrarum divinarumque rerum scientissimus, cæli terræque dimensor certissimus, regionum terrestrium & maritimarum ex librorum lectione peritissimus, juris civilis & pontificii consultissimus, medicæ artis notitia, non mediocriter præditus, orator, poëta summus, denique nulla in re rudis, quæ quidem comprehendere scientia possit. Quæ res magno argumento sit, non deesse Romanis hominibus ingenium, sed studium & exercitationem; qua si uti vellent, facile cæteris nationibus præstarent. Robertus Card. Bellarminus, qui nihil temere affirmabat, non dubitabat eum cum Pico Mirandulano in comparatione conjungere; eique fuit auctor, ut quemadmodum ille adversus Mathematicos, qui dies natales hominum ad vim stellarum & Lunæ pertinere, quodque nobis adversi vel prosperi in vita contingit, ex cælo certo modo affecto,

affecto, compositisque sideribus provenire docent, doctissimum librum emiserat, in quo, nullam eorum mendacis fidem esse adjungendam, convincit; ita etiam ipse, in ejus æmulationem gloriæ, libro elegantissime scripto, eorum commenta refelleret, qui non magis impie quam vane conantur ostendere, animos hominum una cum corporibus interire. Cui operi jam munus admoverat, & tam falsam tamque perniciosam doctrinam cæperat sacrarum litterarum testimoniis validisque rationibus oppugnare atque subvertere: sed tantam mors illi gloriæ invidit, quæ non est passa, egregium illud opus, & plus uno mansurum sæculo, ad umbilicum perducere; cujus etiam injuria factum est, ut multa alia, egregie inchoata, non plane absoluta atque perfecta, ad posterum permanere potuerint. Æquum semper ad res adversas animum attulit; in ægrotationibus præsertim, quibus fere semper perpetuis atque gravissimis conflictatus est, se fortem exhibuit. Fuit duobus summis Pont. in primis carus, Gregorio XV, & Urbano VIII; qui cubuli Pontificii præfecto a se creato, purpuram destinaverat, idque tum ob excellens hominis ingenium singularemque doctrinam, tum ob castissimos ejus mores, rem omnibus sæculis admirabilem: nam summum ingenium, summamque eruditionem, sine aliqua admistione vitiorum vix reperiri contingit. Obiit florenti adhuc ætate: nondum enim trigessimum annum attigerat. Mortuum S. P. Q. R. tamquam civem optime de Rep. meritum, in Æde D. Mariæ Virg. Capitolinæ, justis exequiarum prosecutus est, cumque inter præstantes suæ civitatis viros immortalitati consecratum, docti oratoris voce celebrandum exornandumque curavit. Duo ejus poemata typis impressa circumferuntur; quorum uno Bohemicam Maximiliani Bojorum Ducis victoriam elegantissimis prosecutus est versibus; altero, quo alternis versibus longiusculis Isabellam Gesualdam, Nicolai Ludovicii sponsam, laudibus exornat.

OCTAVIUS RINUCCINVS.

VEterem ac multorum sæculorum spacio intermissum Comœdias & Tragœdias in scenis ad tibias vel fides decantandi morem, revocavit magna ex parte, Octavius Rinuccinus, nobilis poëta Florentinus: quamquam hanc sibi laudem vindicare videatur Æmilius Cavelerius, patricius Romanus, ac musicus elegantissimus; qui paucis ante annis dramatibus aliquot modos fecerat, perfeceratque, ut ab histrionibus musicis agerentur: verum tum dramatum argumentis, tum scenarum apparatu, tum actorum nobilitate, ita Octavii splendor, Æmilianæ laudis luminibus officit, ut solus ille hunc morem, jam diu intermissum, revocasse videatur. Etenim Iacobum Peram, aliosque præstantes modulatores, ex animi sui sententia nactus, quatuor nobilissimas fabulas, verborum ac sententiarum luminibus longe clarissimas, magno Italix totius plausu dedit, *Daphnim*, *Eurydicem*, *Arethusam*, *Ariadnam*: cujus a *Iasone* derelictæ querimoniam, ob summam ejus elegantiam, nemo fuit in tota Italia paulo præstantior modulator, quin suam in ea modulanda industriam experiri nollent: scenarum vero apparatus, Magnorum Etruriæ Ducum aliorumque Principum virorum sumptu & magnificentia, supra quam dici potest, eximius, omnem ex tota Italia nobilitatem ad se attraxit. Nam versis frontibus, scenæ, modo camporum viriditates, modo æquoris immensitatem, modo hortorum amœnitates, modo ex improvviso (cælo nubibus, etiam ad terrorem, obducto) imbres, ac tempestates, modo felices beatorum sedes, modo æterna inferorum supplicia referebant: cernebantur arbores, diductis sponte corticibus, pulcras ex se virgines, tanquam fœtus aliquos edere, tum sylvæ, quæ repente extiterant. Faunos, Satyros, Dryades, Napeas dare, flumina & fontes, Nymphas, atque alia longe his admirabiliora, nullius ante illud tempus oculis subiecta proferre. Luculente & polite rem, quam susceperat, versibus explicabat, dulcibus, atque perspicuis. Forma fuit eleganti, natura, quæ mediocrem aliquanto

quando excederet, sed decora, membrisque inter se apte cohercentibus, facie honesta, ore modesto, & quod dignitatis multum haberet, moribus elegantissimis, præstanti facundia: quibus corporis animique dotibus, & versuum suorum elegantia fretus, illustres genere & forma mulieres sectabatur, eorumque sibi voluntates allicere conabatur. Mariam Medicam, Galliz Reginam, non majori ambitione quam vanitate adamavit: quam etiam, honoris gratia, persecutus est euntem in Galliam. Sed postea reversus in Italiam, omisissis amatoriiis nugis, ad quas erat mire propensus, tandem ad se rediit; quæque ratione antea non perspexerat, satietate abiecit, experiendo contempsit, totumque ad pietatis amorem & studium animum contulit: in quo demum Florentiæ diem obiit extremum.

ANDREAS SALVADORVS.

FVit Andreas Salvadorus poetarum omnium sceni-
corum, Hetrusca lingua loquentium, quos quidem
noverim, maxime ad Musicorum ingenia, & ad un-
guem, ut dicitur, factus. Non enim scenica cujusquam
poëmata circumferuntur, in quorum versibus modu-
landis, melius possint, quid illi in suo artificio valeant,
expromere. Sunt illa tenerrima, dulcissima, lepidissima,
quæ voluptatem afferant: sunt variis & illustribus car-
minum generibus, tanquam coloribus, distincta, quæ
satietatem & fastidium abigant. Tria egregia in primis
dramata edidit, nimirum Medoram, Floram, & quod
ceteris præstat, D. Vrsulam; in quibus omnes lepores,
omnes Veneres, omnes poetici flores, omnes deliciae,
venustatesque cernuntur, & in quibus populo ad spe-
ctandum dandis, more suo, Magni Hetruriæ duces sum-
ptus, regali magnificentia dignos fecere. Sed in hoc
genere, summæ Andree felicitati adscribitur, quod eum
actorem fortitus sit, quo nemo, neque nostra neque pa-
trum memoria, toto orbe terrarum præstantior est audi-
tus; Equitem nimirum Lauretum Victorium Spoleti-
num; de cujus laudibus nulla unquam ætas conticescet:
ejus vox clara, dulcis, canora, non exprimens verba
putidius,

putidius, sed ad animi atque aurium voluptatem apte atque distincte proferens, suavitas in pronunciando, & canendi in primis artifex ratio, peculiarem ejus poematibus vim, & quandam quasi divinitatem addidit; adeo ut alio aëtoze, cum pene divina vis illa defecisset, vix eadem visa essent. Sed magno omnium poëticæ facultatis studiosorum hominum dolore, adhuc florenti ætate, in sua patria, immatura morte decessit.

GABRIEL CHIABRERA.

QUOD a nemine mortalium antehac creditum est, ut quisquam posset Pindaricæ laudis æmulator existere, id magna omnium literatorum cum admiratione, Gabrieli Chiabreræ, patritio Savonensi, contigisse conspicitur: adeo ut vel Pindari animus, Pythagoræ veluti cōmmento, in eum iminigrasse, vel Pindarus ipse Hetrusca lingua loquens, revixisse videatur. Verum tantæ laudis adeptæ famam longe copiosius ac melius egregia ac prope divina ejusdem carmina, in omnes terrarum oras, in omnis posteritatis memoriam, ad æternitatem nominis, quam cujusquam oratio, disfundunt. Forma fuit corporis ejusmodi, quæ ejus ingenij pulcritudini minime responderet. Quis enim, qui ejus faciem aspexisset, arbitratus esset, ex illius ore subnigro, tetrico, invenusto, tam candidula, tam vinula, tam venustula carmina posse prodire? Vixit usque ad extremam senectutem; ac demum Savonæ, in complexu suorum popularium & amicorum, est mortuus.

ANTONIUS QUÆRENGVS.

ANTONIUS Quærengus Patavinus, quoniam totum fere vitæ suæ tempus in populi Romani, hoc est, in totius orbis terræ conspectu, & in aulæ luce consumpsit, magnum & clarum; in poëtis & oratoribus sui ævi, nomen obtinuit. Etenim Rōma, elegans ingeniorum spectatrix, simul ac eum aspexit, ita sibi devinxit, ut fere nunquam a se divelli sit passa; admirabili hominis ingenio, humanissimis his litteris exculto, atque omni

omni digna homine nobili ab eo percepta doctrina, mirabiliter capta; cuius ingenii doctrinæque commendatione fuit summis, omnique dignitate Principibus viris, acutissimo egregie cujusdam consuetudinis nexu devinctus; iis præsertim, apud quos litterarum studia vigebant, ut Aquavivæ, Farnesio, Estensi, S. Sufannæ Cardinalibus. Vbi ipse aderat, nullus erat sermo, nisi de litteris. Nam homini, abundanti doctrina, admirabili ingenio, memoria summa, acerrimo iudicio, omnia veniebant in mentem, quæ propositi sermonis ratio deposecret; quo fiebat, ut nemo ab ejus colloquio, nisi doctior eruditiorque, discederet. Erat præterea comis, facundus, narrator facetus, conviva commodus, in jaciendo mittendoque ridiculo, non illo scurrili & inurbano, sed docto, gravi ingenuoque homine digno, jucundus. Incredibile memoratu est, quantum vim rerum, intelligentia comprehensam, habuerit, quæ, tanquam ad oraculum scientiarum omnium, omnes cupidos litterarum ad se trahebat; quos, qua erat humanitate atque sapientia, docendo instituendoque, præsertim extremo ætatis suæ tempore, infirmissimaque valetudine, domum suam a solitudine vindicabat. Clemens VIII, hominum æstimator acerrimus, collegii Cardinalium a secretis munus, tanquam ingenii illius viribus aptum, illi commisit; quæ provincia, cum augustissimi illius senatus acta, decreta, Latinis litteris sint tradenda, insuper ejus nomine ad Reges & Resp. epistolæ dandæ, non nisi doctis, eruditis, ac prudentibus viris, & eloquentiæ in primis laude clarissimis, demandari consuevit. At dum in eo munere summa cum laude versatur, insigne Patavinæ ecclesiæ sacerdotium, veteri rectore vita functo, possessore destituitur; cumque de successore mittendo ageretur, visum est Pont. summo, in demortui locum subrogare Quærengum, ut multis aureorum centenis, quæ ex eo quotannis capiebantur, una cum suis frueretur. Sed tam egregia optimi in ipsum Principis voluntas longe illi gratior accidisset, si non tantum in eo Urbis desiderium invenisset: quod cum ferre non posset, reversus Romam, totum potentioribus amicis colendis ornandisque se tradidit. Accepit a Farnesianis
Princi-

Principibus, Alexandri Ducis res gestas Latine scribendi provinciam. Sed quia magnæ operæ magnique laboris res erat, cuius erat impatiens, ea repudiata, hanc aliis laudem reliquit. Paulus V, in aulam accitum, Io. Baptistæ Victorio, sororis filio, quem honoribus destinaverat, tanquam Phœnicem alterum, de quo Homerus ait, a Pelio patre Achilli juveni datum, lateris comitem, morum censorem, ac vitæ magistrum ac dominum addidit. Neque in eo erudiendo operæ pepercit suæ; crebro illud admonens, eam esse rectam ad honores viam, quæ laboribus suscipiendis, ac prætermittendis voluptatibus, avunculi sui impressa vestigiis, extaret. Duo edidit præstantissimorum carminum volumina, quorum unum Hetruscos rhythmos complectitur, Latina poemata alterum; ex quibus existimari de hominis facultate in utroque carminum genere potest. Mihi quidem videtur, verborum splendore, sententiarum luminibus, poetiis floribus, posse cum veteribus poetis aliquem locum habere. Mortuus est Romæ, nonagenario major.

IACOBVS MAZONIUS.

SI Iacobo Mazonio Cæsenati par ingenio ætas contigisset, non fuisset ille quidem illustrior, sed pluribus egregiis doctissimi hominis ingenii monumentis, litterarum studia abundarent. Annos enim natus non amplius quinquaginta, vivendi finem fecit. Nullum fere est in Italia celebre gymnasium, ubi ille Aristotelis libros de moribus interpretatus non sit, vel aliud quidpiam ad philosophiam pertinens non docuerit, Maceratense, Cæsenaticum, Pisanum, Romanum; quod docendi munus, quæ ætate alii apud magistros exercentur, ipse persolvit. Nec mirum: nam cursim, non ut alii pedetentim, longum disciplinarum omnium spacium excurrerat. Annos natus tredecim, traditus est a patre Sebastiano Regulo, humaniorum litterarum magistro, qui Bononiæ ludum aperuerat, ab eoque celeriter, doctior quam ipse erat, dimissus, profectus est Patavium, tanquam ad mercatum omnium bonarum
E
artium,

artium, atque ad Pendasii & Paniorolæ, qui longe clarissimi, per id tempus, Philosophiæ & Legum antistites habebantur, se, auctoritatem ductumque applicuit; apud quos quantum profecerit, unicum Pendasii testimonium ostendit, qui oppugnatus ab Archangelo Philosopho, cum multi se ejus propugnatores futuros pollicerentur, non alteri quam Mazonio defensionem suam esse committendam statuit. Duodevigesimalum agens annum Patavio reversus est domum; ubi illud primum de se specimen edidit, in quo, qui illum nossent, exhorrescerent, qui vero suo ex ingenio ceteros æstimant, cachinnos efferrent. Nam centum & nonaginta septem, supra quinque millia, Platonis & Aristotelis placita, quorum ille libros diligentissime legerat, memoriæque mandaverat libello edito, in controversiam disceptationemque deduxerat, ut si quis vellet contra illa differe-re, in scholarum frequentiam, tanquam in pulverem & solem descenderet, secumque, ut pugnantium mos est, manum consereret, fortiterque dimicaret; fore enim, ut cujusvis argumentorum tela strenue exciperet repelleretque, ac Platonem & Aristotelem recte locutos esse defenderet. Ac primum Bononiam, studiorum matrem, locum certaminis esse voluit, doctoresque omnes in contentionem disceptationemque vocavit: sed cum responsum accepisset, fas esse nemini disciplinarum doctoribus litterarium bellum indicere, nisi cui Philosophorum Theologorumque libros publice interpretandi facultas tributa esset, dedit operam, ut in Doctorum earum facultatum numerum veniret; qui interrogatus a F. Cyrillo Servita, summo Theologo, qui tum studiis illis præerat, quot annos Theologiæ dedisset, respondit, menses non amplius sex in eo studio se contrivisse: sed cum gravissimis ab eo verbis, hominis audacia atque temeritas cohiberetur, quod sex mensium labore, eo speraret ascendere, quo alter, qui paucis diebus ante rejectus, ut indignus eo loco ac numero fuerat, septena annorum studio pervenire non potuisset: Fac, Mazonius inquit, periculum, & si minus idoneus tibi videbor, quiescam, ac cogitatione ista desistam; expertus est ille, atque omnibus cum in rebus, quæ quidem essent

in Theologiæ ac Philosophiæ artibus, eruditum ac doctum invenit: quamobrem continuo illi animum explevit: ac de ceterorum magistrorum sententia, doctoris locum ac nomen attribuit. Ad omnia, quæ ponerentur in percontando, homo abundanti doctrina, copiose respondebat ex tempore, Gorgiæ Leontini more, non eadem elatione animi, qua ille, qui princeps, ex omnibus, ut traditur, ausus est in conventu poscere, quæ de re quisque vellet audire, sed ingenio studioque majore. Nullam enim rem defendit, quam non probavit; nullam oppugnavit, quam non everterit. Vt etiam Torquatum Tassum, brevi argutaque argumentatione inclusum, fateri coegerit, poematis Ariostii argumentum, non multiplex & varium, sed esse simplex & unum. Neque id incredibile videri debet in eo, cui nihil uspiam consignatum est litteris, quod non legisset, nihil legisset, quod comprehensum memoria non contineret, unde tanquam ex promptuario aliquo, cum esset opus, singula proferret, & suo quæque loco collocaret. Quamobrem fiebat, ut in disputationibus, cum auctoritatibus decertandum esset, integras ex sanctorum Patrum, Platonis, Aristotelis, aliorumque doctorum hominum libris, paginas ita memoriter referret, ut ne unam quidem syllabam peccaret. Ea res in primis animos virorum principum incendit studio ejus visendi, cum eo amicitias conjungendi, ac domos suas, tanti viri ornameto, decorandi: sed Petrus Card. Aldobrandinus, qui tum potiebatur, tandem a Ferdinando magno Hetruriz Duce impetravit, ut Romam mitteretur. Dicitur verbis non potest, quam eum Cardinalis carum haberet, ut ejus ingenio delectatus sit, ut officiis beneficiisque eum omnibus ornaverit, sua illi consilia credere, in oculis eum habere, solum ex familiaribus sibi convivam abducere: nam tenui ac parabili cibo contentus erat; mille aureorum stipendio conducere, ut Aristotelis de Philosophia libros in Gymnasio Romano extra ordinem interpretaretur. Sed tanta Principis gratia fuit ejus saluti incommoda maxime. Nam jussus ab eo se Ferrariam sequi, quo ad bellum proficiscebatur; ibi deinum est lethali morbo, ex cruditate contracto, con-

sumptus. Ac simul ac nuncius de immaturo ejus interitu Romam pervenit, memini, mihi aulicum in primis nobilem, multis audientibus, dicere, Mazonium, ob perpetuos studiorum labores, qui multum stomacho detrahunt, parce admodum ac tenuiter usum esse cibo ac potione, atque hanc perpetuam ejus vitæ consuetudinem fuisse; verum Romam adductum, inter aulæ plausus, & crebras invitationes ad prandia opipara, & pollicibiles cœnas, largius se epulis vinoque onerare cœpisse, quatuor tenues imbecilli ejus stomachi vires ferrent, idque lethalis ejus morbi causam attulisse. Ajunt, etiam Magnum Hetruriz Ducem Ferdinandum, cum vehementissimis Card. Aldobrandini precibus expugnatus, permetteret eum Romam abire, his vocibus prosecutum fuisse abeuntem: I felix, sed vereor, ne tempestiva aulæ tibi blandientis convivia frugalissimum te mihi virum eripiant; ejusque audita morte exclamasse: Verum evenit, quod præfagebat mihi animus, importunos istos tui admiratores non antea quieturos, quam tibi vitam ademissent. Dantis poëtæ patrocinium, adversus Castravillam, a quo oppugnabatur, duobus editis voluminibus, doctè eruditeque suscepit: in quibus cum occasione oblata, Francisci Patritii viri doctissimi dictum quoddam ad reprehendendum arripuisset, non tulit ille, sed, edito in Mazonium libro, ab ejusdem reprehensionibus sententiam suam vindicare conatus est; quare sic Mazonius exarsit, ut novo volumine loca centum demonstraverit, in quæ ille delapsus, in insigni aliquo ad reprehendendum vitio reperiretur. Sed dum Patritius alio libro, se nunquam esse prolapsum, sed recto semper gradu stetisse, ostendit, alterius contra ipsum voluminis edendi Mazonio causam objecit; ac nisi Patritius scribendi finem fecisset, nullus inter ipsos, neque accusandi, neque respondendi modus extitisset. Postremo post multas orationes a se editas, anno ante quam excessit e vita, egregium volumen emisit, in quo doctissime eruditissimeque concludit, Platonis & Aristotelis inventa, ab uno eodemque sapientiz jugo, veluti plura ex uno capite flumina, derivari, atque defluere, ac propterea mire inter se convenire, congruereque.

POMPEIUS GARIGLIANVS.

MAzonii, de quo diximus, gloriam magna ex parte æmulari visus est Pompejus Gariglianus, Capuanæ Ecclesiæ Canonicus: huic enim idem propositum erat atque illi, nimirum ut omnia legeret, omnia sciret, omnia meminisset, neque minimam apud omnes adeptus est laudem. Nam, de quacunque re proposita, dicebat ex tempore, ita docte, ita erudite, ita subtiliter, ut omnes, vehementer delectati, admirarentur: verum fere semper omnia vernaculo sermone effundebat: etenim pure, dilucide, eleganterque Latine dicendi scribendique laude caruit. Memoria erat tanta, quantam in nemine, quem quidem noverim, me vidisse memini. Totum Platonem, Aristotelem, Hippocratem, Galenum, Themistium, D. Thomam, aliosque, penitus noverat, ut eorum, non modo sententias, sed verba ipsa, eum esset opus, admirabili laudē memoriæ referret. Sed tanta vis virtutis, atque ingenii, exiguis Capuanæ urbis finibus inclusa, diutius quam necesse fuerat peregrinata, absuit ab oculis aulæ Romanæ, quæ par ejus meritis theatrum. Itaque postremis Pontificatus Pauli V annis in Urbem se contulit; ubi hominis ingenium simul aspectum & probatum est. Dicebat sæpe in Academia Humanioristarum, more suo, ex tempore, summa Academicorum aliorumque frequentia: inde emanavit ejus nominis fama in totam civitatem. Nemo erat Cardinalis, nemo vir princeps, nemo paulo litterarum cupidior, quin eum videre cuperet, alloqui, audire, quin domum suam invitaret; sed ut eum in sua familia haberet, præter Andream Card. Perettum, contigit nemini, idque me præsertim operam dante, cujus ille ingenio mire delectabatur, tantoque alumno se jactabat efferebatque. Fuit etiam Franciscus Card. Barberino admirabilis, cui in gymnasio Romano publice Philosophiam docendi munus demandandum curaverat. A quo etiam, Card. Peretto vita functo, exceptus fuisset in suam familiam, & opibus & honoribus auctus; sed miser, die quodam, mane, in suo lecto inventus est mortuus, sub-

E 3

ita,

ita, ut creditur, morte correptus; cum vespere, hilaris ac bene conatus, cubitum isset: neque aliquem æternæ suæ salutis dubitandi locum reliquit, cum esset vir probus, ac pridie ejus diei in Æde sacra S. Spiritus in Saxia rem divinam fecisset. Innumera fere sunt quæ scripsit, quæque typis mandare decreverat; sed unum edidit de nobilitate libellum lingua vernacula, & alterum Latina, quo aliquot Platonis Dialogos interpretatione sua illustrare conatur; sed tanta rerum verborumque obscuritate, ut non tam lucem Platoni afferre, quam tenebras obducere voluisse videatur; cui, Card. Belarminum, qui ab eo librum acceperat, respondisse ferunt, se quidem Platonis, si minus omnia, aliquid saltem intelligentia arripere, cum vero ad sua commentaria se conferret, verbum prorsus nullum intelligere.

GABRIEL BOMBASIVS.

Gabriel Bombasius, Ludovici Areosti, poetæ clarissimi, consanguineus, patriam habuit Regium Lepidi; nobili in ea loco natus, forma, oratione, moribus, vitæ proposito erat ad omnia aulæ munia factus ad unguem; ita tamen, ut ab aulicorum vitiis animum semper vacuum ac purum conservaverit: nunquam enim induxit animum cuiquam palam assentari; sed simplici ac modesta oratione sententiam aperiebat suam: quod fuisse arbitror causæ, cur suis æqualibus multis inferior honoribus ac divitiis extiterit: nullam in quemquam tragulam injecit, neminem ex occulto ac de insidiis, honore vel commodo quopiam evertit; nullius unquam laudibus, tacendo vel maligne laudando, detraxit. Forma fuit egregia, statura mediocri, quamvis; proportionem membrorum, longioris speciem præberet; cultu corporis, etiam ad superstitionem eleganti; adeo ut sarcinatore non alium conducere, nisi qui esset optimus atque carissimus: sermone facundus, moribus suavis, jucundus, comis, ita tamen, ut ad comitatem semper aliquid influeret gravitatis: & quamvis ad summam fere senectutem pervenisset, ab omnibus tamen iis vitiis absuit, quibus odiosa esse senectus alteri solet: non

non erat adversus adolescentes iniquus, non difficilis, non querulus, non oblocutor alteri in sermonibus, minime sputator, screator, muccidus; nullum adulescentiæ vel juventutis tempus sibi vacuum ab amoribus dedit; nec nisi admodum sero exaruit ex amœnis rebus ac voluptariis; in quibus amoribus se felicem fuisse narrabat; si tamen felicitas ac non potius summa infelicitas est atque miseria, in his rebus esse felicem. Sed contra erat iracundus, elatus, impatiens injuriarum, nec vilis æstimator sui. In aula Octavii Farnesii, Pæruæ & Placentiæ Ducis, non postremum inter nobiles viros locum obtinuit, sed editum atque honestum: nam missus est ab eodem Duce, ad Remp. Venetani, maximis de rebus, Orator; atque Odoardi nepotis lateri, qui postea Cardinalis fuit; vitæ morumque custos honorarius additus. Erat scriptor tragiædarum præstans, ut judicare licet ex iis, quos reliquit, Lucretiam Romanam, & Alidorum; & in notandis animadvertentisque vitiis & instituendo docendoque prudentissimus; edidit laudationem Latinam, quam habuit in funere Octavii Farnesii, plenam prudentiæ. Denique Romæ, morbo renem, ex intemperantia fortasse adolescentiæ, vel ex itinerum labore contracto, quod frequentius urinam redderet, quam corporis necessitas polceret, neque illa pura, sed multo sanguine permista, proflueret. Itaque, die quodam, a prandio, cum rhedam poposcisset, qua per Urbem, animi gratia, vectiretur, jamque esset in eo, ut illam inscenderet, morte extinctus subita est.

SCIPIO COBELLIVTIVS.

Qui vitæ totius fructum in percipiendis voluptatibus ponunt, ac miseros & infelici astro natos eos vocant, qui ita vivunt, ut voluptates omnes aspernentur, quos non quies, non remissio animi, non æqualium studia, non convivia delectent; qui nihil expetendum ducunt, nisi quod est cum laude ac virtute conjunctum; ii profecto Scipionem Cobellutium, si quemquam alium, Deo suo irato, ortum esse fateantur necesse est; qui, ab ineunte ætate, spretis & contemptis iis, quæ sua-

via in vita putantur, directum ad laudem iter arripuit; quod quia cum labore percurritur, tanquam desertum, scruposum, ac vepribus obsitum, a plerisque defugitur. Natus est Viterbi, quo die, parente ad consulatum ejus urbis everso, tota ejusdem domus, redundabat hilaritate letitiaque. Inde prima illa pucrili institutione excultus, Romam se contulit, exceptusque in collegium Nardinum, in scholis Patrum Soc. Iesu, eloquentiæ ac Philosophiæ studiis operam dedit; quibus jam satis instructus, ad jus civile cognoscendum, laborem & industriam attulit; & post aliquot annorum studium in gymnasio Romano amplissimam Iuris utriusque interpretandi facultatem obtinuit; qua accepta, continuo, quod didicerat, ad utilitatem Reip. contulit; ac primum Alexandro Glorierio, annonæ præfecto, tum Card. Asculano: qui progeffurus honoribus longius putabatur, in causis cognoscendis operam navavit; nunquam cum plebeis & indoctis hominibus amicitias jungebat, sed illustrium doctorumque virorum familiaritates studiose consecrabatur, eos colere, iis se dedere, eosque tueri obsequio. Si latinam epistolam scripsisset, si cuiquam, consulenti de jure, consilium dedisset, laudis appetentissimus, illud continuo divulgandum, ac multorum manibus tradendum commendandumque curabat; quo, per hanc rationem, eloquentis doctique in primis viri famam nomenque collegit, omnia summa sperans. Habuit orationem ad Clementem VIII, primo Quadragesimalium jejuniorum die, luculentam illam quidem, sed quam minime actio commendaret, in qua fere sunt omnia. Etenim voce gestuque nihil omnino valebat; accedebat statura, pusillæ propior, corpus gracile, vultus non ita elegans ac venustus; in quo tamen oculi vivaciores inessent, unde nescio quod lumen emicaret, quod illi decus & auctoritatem adjungeret. In primis, egregiæ cujusdam probitatis doctrinæque opinione, arte sibi Pompejum Card. Arigonum obstrinxit, magnæ apud Paulum V, auctoritatis & gratiæ; cujus præsertim consilio, initio sui Pontificatus, Remp. administrabat. Itaque Marcello Vestrio, qui multis summis Pont. fuerat a Brevibus, mortuo, cum multi maximis oneribus

bus functi, optimeque de Rep. meriti, tanto muneri, ob honorem & utilitatem, quam habet adjunctam, imminere viderentur, persequit Cardinalis, ut ille ceteris competitoribus anteferretur. Ab hoc auditu januaque patefacta, non fuit illi difficile ad sacre honorem purpure pervenire. Nam cum ratione muneris, quod gerebat, esset fere quotidie Pontifex adeundus, qui in Cardinalibus eligendis vix e domi sue penetralibus exibat, ita ejus sibi voluntatem conciliavit, ut se in Cardinalium collegium, cunctis sane admirantibus, cooptatum aspererit. In id igitur fastigium evehctus, nihil habuit antiquius, quam ut illud vite sanctimoniam & in omni victu cultuque modestia tueretur; & in primis se doctis & honestis viris deditum ostendebat, in his preclara externorum hominum ingenia amplectebatur, eorum inopiam, suis sumptibus, suppeditabat. Itaque domum ejus, literatorum frequentia celebrari, nullis sermonibus percrepare, nisi qui vel de literis essent, vel de sacra, Ecclesie temporum, historia, qua mirifice delectari videbatur, vel de fide propaganda, vel de sublevandis catholicis, Turcarum & Hæreticorum immanitate oppressis, ut etiam Christianis in Hungaria, sævissima Turcarum dominatione, ad extremum omnium miserationum adductis, centenos quotannis aureos nummos, de suo mittendos portandosque curaverit. Fuit, magna ex parte, auctor constitutionis, de eligendo summo Pont. a Gregorio XV editæ. Cardinalis factus, ita diligens corporis sui curator evaserat, ut qui antea, hieme & æstate summa, in imbris, in sole, totam urbem pedibus perreptare solebat, postea æstate media, caloribus maximis, nullo, ne levis quidem auræ sibilo, obstrepente aëre, lectica ab omni parte tecta, inclusum se ferri juberet, ne videlicet damni quidquam a frigore ventisque contraheret. Narrabat mihi Andreas Card. Perrettus, Albani Episcopus, cum diocesim suam, ex Ecclesiasticarum legum præscripto, magna ventorum vi, agitato commotoque cælo, cum paucis, obiret inter illos salus ac nemora, occurrisset obviam Cardinali Sufannæ, (hoc enim nomine se appellari volebat) credo ut exproretur, num impetus furoresque ventorum, mentis æstu

animique tempestatibus, quibus tunc fortasse conflictabatur, sœviores existerent; idque paucis ante illius mortem mensibus contigisse narrabat; in extrema ejus valetudine, cum lethale ulcus, brachio innatum, rescandum curaret, neque id medicus, sine acerbissimo dolore contingere posse prædiceret: non minori animi fortitudine ac robore, brachium, ut ulcus cæderetur, tradidit, quam Marcus, ut varices secarentur, crus præbuit, ac medico: seca, inquit, ut lubet, nam Christi Martyres multo his sunt acerbiora atque graviora perpessi. Moriens, duobus se plurimum debere, multis audientibus, dixit, Paulo Quinto, qui cum purpuræ honore ipsum cohonestaret, ex reliquorum hominum numero exemerat, de euidam alteri, cujus artibus, de summi Pontificatus spe fuerat dejectus.

TORQUATUS TASSVS.

Quod olim ab Alexandro Macedone de Homeri versibus dictum fuisse narratur, nimirum grandiores eos esse, quam ut cani possint ad lyram; id non incommode ad Torquati Tassi, poetæ hujus sæculi multorumque aliorum facile principis, laudes posse transferri videtur: videlicet, eas esse majores angustioresque, quam ut oratoris dulcis ac suavis, tanquam fidium voce referri possint. Sed quemadmodum Homeri versus, ex maximi omnium Regis sententia, tubarum sonitum clangoremque poscebant: ita Torquati laudes summum, grandiloquum, ac tragicum plane scriptorem, tanquam tubæ cantum efflagitant, qui earum magnitudini amplitudinique respondeat. Vbi autem tanta vis eloquentiæ, quæ Torquati laudibus par sit, præterquam in ipso Torquato inveniri possit, non video; cujus vocis, etiam cum maledicit, ea est dignitas, majestas, ac prope divinitas, ut nemo sanus inveniatur, qui non malit esse in ejus poemate Therſites, quam in aliorum Achilles. Longe enim honoratior ab illo vituperatus, quam ab aliis laudatus, discederet. Quamobrem, cum omnis noster in eo laudando labor inanis sit futurus, contenti erimus ejus tantum nomen referre: eo enim audito conti-

continuo ingens innumerabilium pene laudum numerus, audientium animis se inferet. Atque eo magis id mihi ejus laudes reticendi consilium placet, quod præclara fere omnium hujus ævi hominum ingenia, in eo, tum soluta oratione, tum versibus, celebrando efferendoque, magna cum laude, versata esse dicantur.

PVBLIVS FONTANA.

Felix illa tellus, Bergomum videlicet, quæ gloriosissimam illam arborem edidit, unde germen, de quo diximus, prodiit, quod semper virens, semperque floridum, patulis diffusum ramis, totum terrarum orbem amplectitur; in cujus umbra festivissimus Musarum chorus, ad Phœbi testudinem, perpetuas in orbem choreas exercet. Illa, inquam, tellus aliud poëticæ facultatis decus eximium, admirabili fecunditatis laude, produxit, quod S. P. Q. Bergomatis nomen in omnis posteritatis memoriam propagavit; Publium nimirum Fontanam. Hic Palusci, quod est agri Bergomatis oppidum, natus, ad poësim & ad Virgilianum scribendi genus ferebatur; sed quod habuit a natura bonum, legendis poëtis, tum veteribus, tum novis, auxit, illudque arte studioque limavit. Grandis erat verbis, illustris sententiis, frequens translatis, compositione verborum sublimis ac magnus, in primis in Delphinide, quod opus præ aliis elaboratum emisit. Styli majestas amplitudoque ita vocem attollit, ita in altum se effert, ita classicum quodammodo canit, ut Virgiliana tuba, quasi hæreditario ad eum jure, pervenisse videatur, & si contingeret, ut cum iis, qui nostra patrumque memoria, poëtarum principes extiterunt, in contentionem de principatu veniret, profecto in inveniendis rebus, iisque verborum sententiarumque luminibus illustrandis, omnique apparatu poëtico instruendis, non Pontanos, non Vidas, non Fracastorios, non Sannazarios, non alium quemque metueret. Verum tanta vis ingenii, tanta virtus, domesticis contenta finibus, nunquam peregrinata absuit ab oculis suorum civium. Cur autem ejus nominis fama, præpetibus per æra pennis vecta, non

Romani

Romam contenderit, non Italiam peragravit, non Alpes transcendens, non maria transmittens, in exterarum nationum luce versata sit, incredibili hominis modestiæ fertur acceptum; quæ sibi scriptisque suis angustos Bergomi Brixianque terminos, quibus se clauderent tenerentque, præscripsit. Neque tamen omnino theatri Romani plausu caruit. Etenim elegans illud carmen, quo Torquati Tassi laudes in cælum extulerat, contra præscriptum, circumdatos sibi cancellos egrediens, & occultis, ut ita dicam, itineribus Romam veniens, multorum principum virorum, & in primis Cynthii Card, Aldobrandini, Clementis VIII, sororis filii, studia commovit, ut videre eum vellent, alloqui, ex eoque splendorem nomini atque ornamentum ipsorum aulae constituere. Sed homo natura quietissimus, ac libertatis amator, cui idem erat propositum ac Regibus, ut ne qua re egeret, ac ne cui obtemperaret, sicut Ithacam suam Vlysses immortalitati anteposuit, ita ipse patrii ocium soli amœnitatemque Urbis celebritati aulaeque opibus prætulit; ipse sui ipsius erat dominus; ipse libidinibus suis imperabat; quas ita semper intra rationis cancellos cohibitas habuit, ut nunquam in re aliqua turpi, vel vetita, eas labi permiserit. In perpetua oppidi sui animarum custodia vigiliaque manebat, quarum æternæ salutis sollicitudinem curamque, ex eo quo sumgebatur sacerdotio, susceperat. Quod vero a confessionibus excipiendis, a concionibus habendis, quibus hominum animos a vitiis avocare & ad virtutis amorem conabatur impellere, reliquum erat ocii, libenter vel in litterarum studiis collocabat, vel horti cujusdam sui cultioni tradebat; ubi quam plurimas salubres herbas, quarum erat studiosissimus, sua consererat manu. Sed non parum sæpe fiebat, ut ab honesto illo ocio publica Bergomatis Brixianque Reip. voce deductus, ad plura atque gravissima, pertinentia ad litterarum studia negotia procuranda, traduceretur; in quibus ita utilem, ita diligentem, ita fidelem navavit illis operam, ut publico earum civitatum testimonio, multis etiam grati in cum animi significationibus editis, laudatus ornatusque discesserit. Sed celerius, quam meruerat ea virtus, ea humanitas,

manitas, illudque dignum immortalitate ingenium, morte sublatum, perpetuam popularibus suis, eisque qui illum noverant, dolendi flendique materiam reliquit; cum duo & sexaginta compleisset annos, pluribus egregiis operibus, vario carminum genere, sed præsertim heroico, scriptis, quæ partim ipse ediderat, partim sua vel librarii manu scripta, domi continebat: sed hæc omnia, in unum corpus collecta, & pro temporum ratione disposita, M. Antonius Foppa Bergomas, de litteratis viris optime meritus, brevi typis impressa, ad Italici nominis gloriam, ad patriæ decus, & ad æternam popularis sui memoriam, exteris nationibus, ad quos nondum illius nominis fama pervenit, legenda ac penitus cognoscenda committet.

VINCENTIVS GRAMIGNA.

Dignus plane est, qui in omnium sæculorum memoria vigeat, Vincentius Gramigna, nulli sui ævi litteratorum, ingenio & eruditione, inferior. Hic Prati, nobili Etruriz oppido, natus, unde non exiguus optimorum ingeniorum numerus exiit, tum ad omnia summa, tum ad intelligentiam perceptionemque scientiarum, est a natura factus procreatusque. Neque inertia ac cessatione tantum illius in se munus, inane atque irritum passus est esse; sed studio & exercitatione jam inde a puero, quo ille ferebat, se impellendum perducendumque permisit. Quamobrem est assecutus, ut in Platonis atque Aristotelis Philosophia plane perfectus existeret. Illud de eo narratur, quod cum in prima fere adolescentia sermoni inter amicos de literis orto supervenisset, nec difficili & contorto argumento, in disserendo, satis ex sententia occurrisset, pudore ac verecundia (quod est ingenui nec instrenui animi signum) usque eo correptus est, ut perpetuo trium annorum silentio, inscitiam suam multaverit; quo tempore totus in literis abditus, Philosophorum libris evolvendis diligenterque legendis se tradidit, ac fidissimis eorundem interpretibus, tanquam ducibus ad intima atque arcana utriusque Philosophiæ, de natura scilicet, & de moribus,

ribus, penetralia pervenire contendit. Triennii igitur silentio, sibi in incertæ pœnam indicto, prorsus elapso, continuo id, quod didicerat ex domestica & umbratili illa exercitatione, in doctorum hominum conventus ac colloquia, tanquam in pulverem & solem, eduxit; ubi de unaquaque re argute subtiliterque differendo, nihil esse in omnium doctrinarum thesauris ita sepositum & ita reconditum, quod ejus notitiam elaberetur, ostendit. Deinde tanto rerum instrumento apparatuque, pluribus ex artibus studiisque collecto, instructus, ad scribendum se contulit, multaque tum soluta oratione, tum versibus edidit, patrio sermone composita, quæ in admirationem ejusdem ingenii doctrinæque suspiciuntur. Neque tanta hominis virtus in desidiola quadam literarum tractatione, tanquam in hortulis quievit suis: neque in eis recubans molliter ac delicate, avocavit se a Rep. & a rebus agendis; sed cum virtus præsertim in actione consistat, tum Neapoli, tum Romæ, multis Principibus viris, & Cardinalibus in primis, in maximis gravissimisque aulæ negociis procurandis, usque eo industriam, diligentiam, fidemque probavit suam, ut omnium judicio, non magis in tractandis literis, quam in negociis agendis, excellens haberetur: sed illis præcipue in scribendis epistolis operam navavit; neque unquam literarum studia intermisit, quamvis interdum epistolarum acervis, quibus respondendum esset, propemodum obrui videretur. Nam ita erat felix in scribendo, ut sententiæ ac verba, quibus illæ explicarentur, sponte sua atque incredibili celeritate sub acumen styli subirent; neque tot operis, aliorum voluntati & commodò traditis, neque perpetuis triginta annorum laboribus, neque intimis summorum Principum amicitis, asssecutus est tantum, ut ex eo posset vesperi suo sibi, ut dicitur, vivere. Causa ei paupertatis, sicut plerisque, probitas fuit, non enim poterat animum inducere, aut imperare ipsemet sibi quidquam cuiquam assentari: tum tristitia atque severitas, quam præ se ferebat in vultu, dabat iis, qui non essent experti, occasionem suspicandi, eum esse amicum minus suavem & commodum; sed expertis, nihil eo videbatur humanius. neque

neque jucundius: & amicitias, quas semel cum aliquo susceperat, quippe quas non lucrum, non ambitio, non vitiorum societas conciliaverat, sed virtutis amor studiumque conjunxerat, usque ad extremum spiritum integras illibatasque conservavit. Verum & operarum aulicarum, & potentiorum amicorum obsequii cultusque hanc demum mercedem retulit, ut lethalem in morbum incideret, qui cum, multis mensibus conflictatus, ejus vim superare non potuit. Et sane per eos, quos tanto studio, tanta diligentia, tanta fide coluerat, licuisset illi vel sub dio, vel in nosocomio aliquo, vitam finire, nisi M. Antonii Foppæ, omnis elegantia doctrinæ exculti, favor, tanquam secundus aliquis status, amicitiam, agitatum ac pene summerfam fluctibus, impulisset in portum. Hic regalis animi juvenis, litteratorum cupidissimus, bonorum studiosissimus, amicorum amicissimus, raro constantis amicitie exemplo, ægrum illum suam in domum deferendum, suo in lecto collocandum, atque omnibus in rebus honorifice liberaliterque habendum, curavit. Ut non alias clarius enituerit, verum esse, quod dicitur, desertam futuram hominis vitam, nullius cinctam amicitie præsidio. Hic igitur adversus Gramignæ casus tam humaniter a Foppa sublevatus, ejus memoriam nominis in posterorum animis acrius vehementiusque defiget: atque Vincentius Gramigna notior erit M. Antonio Foppa amico, quam tot suis quantumvis egregiis ac præclaris operibus. Ex quibus, quatuor sermonum volumina, unum orationum, atque alia non parum multa opuscula, impressa cernuntur: at rhythmici, in quibus mira Hetrusci sermonis puritas ac nitor elucet, nondum impressori sunt traditi.

IVLIVS CÆSAR BAGNIOLVS.

Ivlivs Cæsar Bagniolus, Bagnacabali in Æmilia natus, Michaelis Peretti Venafri Principis aulam, à quisquam alius, illustravit. Etenim ea erat præstantissimi illius ingenii claritas, ut non unius tantum Principis aulæ, sed universæ civitatæ posset lumen ac splendorem

rem afferre. Neque tantum suum bonum ignoravit vir ille Princeps, qui animi magnitudine, vitæ elegantia, splendore, liberalitate, munificentia, dum vixit, (si Alexandrum Cardinalem Montaltum ejus fratrem excipias) parem habuit neminem. Nam & in præcipua ædium suarum parte locum illi, ubi commode habitaret attribuit, atque ipsi suisque affatim quotidie, quod ederent, præbuit, tum locuples sacerdotium contulit, unde multa quotannis aureorum centena statim acciperet, eodemque mortuo, tanquam desperaret se posse invenire alterum, qui cum illo æquari conferrique posset in scribendis epistolis negociisque tractandis (nam utraque in re egregia ejus opera utebatur) neminem hoc honore ac titulo cohonestavit, sed tantum aliquos scribarum loco ad manum habuit, quibus litteras scribendas committeret. Fuit ob acumen judicii, quo plurimum præstabat, scriptorum aliorum existimator metuendus ac prudens; non enim erat tinctus literis, sed imbutus expletusque, adeo ut totus ex iis compositus conflatusque dici posse videretur. Platonis & Aristotelis doctrinam non a limine, ut plerique, salutaverat, sed ad intima ejus cubilia pervenerat, totamque accurate diligenterque lustraverat. Eam vero Aristotelis Philosophiæ partem, quæ est de moribus, de Rep. de Rhetorica, de Poëtica, ita noverat, ita de iis rebus accurate, diserte, docte, scienterque dicebat, ut cum eum audires, nihil Aristotelis vel cujusvis alterius Philosophi libros desiderares. Sed in primis præstantissimum ingenium contulit ad Poësim Hetruscam, in qua, ut leviter dicam, cuivis ætatis suæ par fuit, qui in eo studio elaboravit; nimium tamen inquirebat in se, atque ipse sese observans, nunquam, ut Polignotus alter, a tabula manum dimovebat. Multa scripsit egregia, sed Tragediam in primis, quam Aragonenses nuncupavit, & Iudicium Paridis. In quibus nihil est, quod quisquam possit reprehendere, præter nimis exactam exquisitamque in eis expoliendis excolendisque curam ac diligentiam, & quod nōrabilius videatur, præter nimiam eorum pulcritudinem & venustatem. Nam ita verborum sententiarumque luminibus illustrantur, ut nullus umbris

bris locus relinquatur. Mortuus est senex, cum aliquot ante ejus obitum diebus, non obscurum futuræ mortis signum dedisset. Nam nimia gracilitate attenuatus, & pallore candori simili suffusus, a succo & sanguine, quo vita sustentatur, se fuisse destitutum significabat.

FRANCISCVS PANICAROLA.

SInobis sit in animo, mandare huic libro omnes, qui operibus editis nomen suum posteritati commendarunt, ex singulis religiosorum ordinum familiis; tam multi se offerrent, ut iis referendis nullus unquam futurus sit finis. Quamobrem, eorum præconio, familiarum suarum scriptoribus relicto, paucos ex iis eligemus, quorum virtutis fama, effractis angustis unius privatz domus claustris, longelateque sese diffudit, jamque iisdem, quibus orbis terrarum, cæli regionibus continetur. Quos inter primum oculos in se convertit Franciscus Panicarola, Mediolanensis, nobili genere natus, qui præpetibus ingenii sui pennis in sublime se efferens, latiore per gloriæ campum gyro alas extendit. De quo si quis dixerit, tanto cum ingenio fuisse, ut quæcunque sunt in liberalibus disciplinis posita, intelligentia comprehenderit, si quis commemoraverit, tanta cum industria studioque extitisse, ut omnes omnium libros, quorum numerus iniri vix potest, quorumque indicibus legendis vel longa unius hominis vita sufficiat, diligenter evolverit, ac notis in eorum marginibus adscriptis illustraverit, si quis asseruerit, tantam in homine memoriam fuisse, ut quæcunque audivisset, legisset, vidisset, tanquam clavis, ne exciderent, in ea defixa reliquerit; si quis affirmaverit, ita eum dicendi gloria præ ceteris floruisse, ut cum auditum esset, eum esse dicturum (sicut de Demosthene, in judicio Ctesiphontis, proditum memoriæ est) audiendi gratia, ex tota Italia concursus fierent, si quis narraverit, tantam tanque præjudicatam in omnium animis de singulari & eximia hominis eloquentia opinionem hæsisse, ut publice a civitatibus ad Rom. Pontificem oratores ad eum postulandum mitterentur; hic, inquam, qui omnia

hæc illi vindicare non dubitaret, Latine, non oratorie loqueretur. Omnibus enim hæc in rebus admirationes & clamores efficiebat. Cur autem tanta vis ingenii eloquentiæque intra unius Franciscani, æstioris disciplinæ, ordinis septa sese concluderet, causæ afferuntur in primis dux. Narrabat mihi Card. Bellarminus, qui una secum in comitatu Henrici Cardinalis Cajetani profectus fuerat in Galliam, eum eloquentiæ suæ conscium, per hanc rationem voluisse omnes, qui tum in concionibus dominarentur, de adepta dicendi gloria deijcere, quod neminem futurum sibi parem arbitraretur. Alter vero, se a Paricarola ipso audisse affirmabat, immatram adolescentis cujusdam sibi carissimi mortem, humanæ vitæ statum, miserum atque caducum, sibi in oculis defixisse, ac vim attulisse, ut in sacrum cinerum sese conjiceret: hoc enim, cinericiam illam vestem, quam induerat, nomine, appellabat. Celerius multo, quam per ætatem liceret, coëptus est adhiberi ad conciones ad populum habendas. Tanta illi erat in voce suavitas, in motu venustas, in gestu ars, quæ omnia formæ etiam dignitas commendabat, ut sola hæc, sine aliis rebus, possent tenere hominum cœtus, mentes allicere, atque in sui amorem impellere. Genus orationis liquidum, fufum, profluens, nusquam insistens, sed, magna ex parte, calamistris inustum, ac quæsito colore illitum, tum prædulcium sententiarum flosculis aspersum, licentius se efferebat, quam divinarum rerum, quarum interpretes erat, sanctitas posceret. In præmiis vero, tanquam non modo liceret, verum etiam necesse esset, omnis oratoria supellex palam exponebatur. In eis paria paribus relata, & similiter conclusa, eodemque pacto cadentia, denique omnis elaborata concinnitas, manifesto ad aucupium aurium quæsitæ deprehendebatur; quæ omnia vulgi plausu & clamoribus excipiebantur, sed doctis & cordatis viris, non probabantur. Quoties ego puer parentem vidi meum, gravem virum & doctum, tum iridentem, tum etiam irascentem & stomachantem! Ac Muretus ipse in suis ad Senecz epistolas notis, se continere non potuit, quin, suppresso nomine, in illud ejus phaleratum, comptum, fucatum-

catumque dicendi genus, acri ac vehementi oratione inveheret. Verum illud cuivis hominum generi, summis, mediis, infimis placebat: & cum ille esset dicturus, antequam aurora illucesceret, loca in subselliis occupabantur, & quo tempore in *Æde* sacra *B. M. Virginis*, quæ est in *Capitolio*, concionabatur, vir quidam nobilis, qui ejus eloquentiam ad insaniam adamabat, cum serius, jam locis omnibus obsessis, advenisset, atque humilibus ac demissis precibus impetrasset ab eo, ut se in suggestum sequi pateretur, ibi ad ejus pedes accubans, usque a principio concionis ad finem non cessavit ejus fœtis oscula figere. Tres per id tempus, in concionibus, dicendi laude florebant, *Panicarola*, *Toletus*, & ex fratrum cucullatorum ordine, *Lupus*; cumque tria videantur esse, quæ orator efficere debeat, ut doceat, ut delectet, ut moveat, docendi laus, omnium concessu, *Toletus* tribuebatur; *Panicarolæ*, ut animos eorum, qui audirent, devinciret voluptate; *Lupo*, ut permoveret atque incitaret animos, & quocunque vellet, impelleret, neque quidquam frequentius in sermonibus vulgi versabatur, nisi illud, *Lupus* movet, *Toletus* docet, *Panicarola* delectat. Sed quamvis ejus oratio omni lepore atque deliciis afflueret, in illo tamen ornatu suberat incredibilis vis atque ordo rerum, plenus artis & industriz. Nam cum aliquem *Evangelii* locum explicandum suscepisset, in eo, quod proposuerat, hærebat; quæque a sacris divinarum rerum interpretibus in eam sententiam scripta essent, distincte, explicite, abundanter & illuminate, afferebat in medium; quam facultatem ei dabat incredibilis memoria, qua, tum natura, tum arte pollebat, & studiorum assiduitas. Nam ex omnibus singulorum dierum horis duodenas, literarum studiis, ternas nocturnis diurnisque horariis precibus recitandis, semihoram cibo dabat, reliquum tempus somno deberi arbitrabatur. *Ætate* provecus, & *Astensis* *Episcopus* factus, magna ex parte mutavit rationem dicendi; suæque ab oratione cincinnulis fœoque detractis, genus illud dicendi assumpsit, quod auctoritatis haberet magis, & muneri, quod gerebat, aptius esse videretur. Mortuus est *Asti*, sexto & quadragesimo ætatis

suz antio. Immaturæ ejus mortis causam sustinet, ut ex Card. Bellarmino audiui, frequens edulium, quo se largius implebat; quam naturalis calor, longa studiorum consuetudine, attenuatus imminutusque pateretur. Si singula sint enumeranda, quæ scripsit, jam codex unus esset implendus. Sed quæ frequentius teruntur hominum manibus, sunt plura ejus concionum volumina, liber in Calvinum scriptus, Demetrius Phaleræus.

ROBERTVS BELLARMINVS.

DVos, singulari ingenio, sanctissimis moribus, & incredibili eruditione viros hæc nostra ætas in amplissimo purpuratorum patrum collegio, in purpura ostroque conspexit; quorum utrumque plus ad purpuram splendoris attulisse, quam ab ea accepisse, est in confesso apud omnes; nimirum Robertum Bellarium Politianum, & Cæsarem Baronium Soranum. Ac prior, Marcelli II sororis filius, tum singulari parentum studio, a quibus Patavium mittebatur, ut idoneus quamprimum honoribus fieret, tum stirpis commendatione, utpote Marcelli Pont. Max. progenies, tum præclaræ ad virtutem indolis bono, quippe sanctissimus, tum singularis eruditionis merito, nempe doctissimus, tum incredibili in eum plurium summ. Pont. voluntate, qui Marcello Pont. ejus avunculo se plurimum debere profitebantur, & quod omnes omnium conatus superat, divinæ providentiæ decreto, ad honorem purpure vocatus, atque adeo attractus cum esset, incredibili, humana omnia despicientis animi magnitudine, relicto itinere, in quod compellebatur, eo cursum arripuit, unde nullus ad honores capeffendos, status ostenderetur. Namque annos undeviginti natus, Sodalitati Iesu nomen dedit, ubi omnes ad honores obstructi interclusique sunt aditus. Deinde Innocentium IX, qui auctoritate sua posset quasunque quantumvis septas oclusasque ad honores vias aperire ac patefacere, quique statuisset, primis Cardinalium comitiis, in amplissimum illum ordinem cum cooptare, eo multis precibus ac lacrimis impulit, ut fide data sponderet, se neque proximis

mis neque aliis deinceps comitiis aliquam ipsius rationem habiturum. Sed nulla fugæ ratio, adversus æterna persequentis Dei consilia; omnisque itineris cuiusque, quantumvis deserti, avii, alieni exitus, in id demum evadit, ad quod te ille vocaverit. Nam Clemens VIII Robertum, ex honorum fuga retractum, reluctantem, seque purpuræ subtrahentem, validis Pontificii imperii habenis repressit, & ad id fastigium attraxit, ad quod recusabat accedere. Venit in Societatem Iesu adolescens, ut diximus, omnium fere disciplinarum rudis; sed incredibilis quædam ingenii magnitudo non magnopere desideravit alterius in se erudiendo laborem atque industriam; sed prope a se ipso doctus eruditusque, antea magister aliorum extitit, quam cuiusquam discipulus fuerit. Atque, ut ceteras disciplinas præteream, Rhetoricam nimirum, quam Florentiæ docuit, concionandi artem quam celerrime, nullo monstrante, exercuit; nonne in vestibulum Theologiæ, doctrinarum omnium maximæ præstantissimæque, vix pedem intulit, cum alios coepit ad intima ejus penetralia perducere? Etenim unum præne annum ejus disciplinæ studio dederat, cum Lovanii, ad eam percipiendam, septem annis dux aliis fuit ac magister, & doctissimas disertissimasque de rebus divinis, Latino sermone, frequenter conciones ad populum habuit. Sed cum Lovanii sepiissime, vario morborum genere conflictatus, aërem minus sibi salubrem fuisset expertus, accitus Romam, in collegio suæ societatis doctor eximius auditores suos, quorum magnus ad eum numerus confluebat, per annos undecim ad Theologiæ sacrarumque literarum perceptionem instituit; ubi etiam nomen suum æternitatis memoriæ consecravit, editis adversus nostri temporis Hæreticos pluribus controversiarum libris, quibus misere eos percussit, prostravit, afflixit, unde tanquam ex perenni fonte infinita propemodum ejus laudandi materies, quasi flumen erumpit; ad quos oppugnandos tametsi, quotquot sunt ubique terrarum catholice Religionis hostes, contractis in unum copiis, aciem instruant, educant, impellant, nihil illis nocent, sed in illis confutandis ipsi suis se jaculis feriunt, confodiunt, perimunt; ut non tanta

cum libris illis, quanta secum, videatur esse contentio. Sed tantum sanctitatis doctrinæque lumen non decebat in unius domi angulo delitescere, sed excelsum editumque locum deposcebat, unde cæca vitiorum, errorumque nocte perfusus (pulsis ab eorum oculis tenebris) virtutis formam, quavis specie pulcriorem ostenderet. Quamobrem tantum bonum non posse diutius Reip. Christianæ deberi, existimavit Clemens VIII, & in proximo sibi dignitatis gradu, ut antea diximus, locoque constituit; ac deinceps, quo honestius locum illum dignitatis tueri posset, pinguem ac prædivitem Capuanam Ecclesiam aliis sacerdotiis addidit, quibus cum locupletaverat. At, si quærat, cur Bellarminus inter multos sacerdotes, quasi inter minora sidera, solis cuiusdam instar, habuisse existimetur; statim occurrat, quid respondeatur, si ad eos radios, ipsa solis luce clariores, quibus effulgit, mentis oculorum acies intendatur. Ad quænam, inquires, in Bellarmino, tanquam in sole aliquo ad radiorum similitudinem diriguntur? Ista nimirum, primum tanquam lethale aliquod piaculum existimasse, plus uno sacerdotio habere; ac propterea ex aureorum quatuordecim millibus, quæ quotannis ex pluribus sacerdotiis capiebat, sex tantum sibi retinuisse, quibus parce & modeste se & familiam suam aleret, reliqua millia octo, una cum sacerdotiis, unde prodibant, a sese, tanquam onus aliquod suis viribus impar, abjecisse, ne ejus pondere onustus, ac per abrupta viarum iter faciens, deorsum attraheretur, atque pessum iret, tum omnem, de consanguineis, cognatis, de fratris filiis, patruj animum ejecisse, deinde nihil de suis redditibus parasse, ut eos divites faceret, tum nullam cogitationem habuisse aut auri aut argenti avaritiam, aut amoenitatum ad delectationem; nam forum Rotundæ, domui suæ proximum, vineam suam appellare consueverat; aut suppellectilis ad luxuriam, aut ædificiorum ad magnificentiam; sed modesto ac parabili victu cultuque contentum, vitæ sanctimonia ac frugalitate sibi laudem, purpuræ splendorem, ordini ornamentum acceperisse; deinde recte subductis expensi & accepti rationibus, quidquid ex domesticis sumptibus superesset, in paupe-

res erogari mandasse; denique commissas sibi oves, sua præsentia destitutas, nunquam esse passum existere. Cum igitur hæc clariori, in ejus laudibus, luce præfulgeant, ex iisque nomini immortalitatem suo & gloriam comparaverit, jam cogimur fateri, quæ sint illis contraria, videlicet sacerdotia sacerdotiis coacervare, iusano suorum amore flagrare, nullum in eis locupletandis neque modum neque finem facere, domos in urbium modum ædificare; villas, signis, tabulis pictis, atque omni regali opulentia refertas, excitare; quodque ex quotidianis sumptibus superest, aut in sænore ponere, aut in novis fundis collocare, veram in se laudem non habere, ac propterea sermonibus iniquorum ansam præbere. Necessest Romæ nono ac septuagesimo ætatis suæ anno, ex gravi diutinoque morbo, cum proxima superiori ætate in ea ædium Vaticanarum parte habitasset, quæ pestilentibus austri flatibus opponitur. Statura fuit pusillæ proxima, collo brevi, nec sane nimis eleganti forma; quamvis ejus animi ingeniique probitas pulcritudine in ore emicaret. Magis quam quisquam alius, id quod volebat, pure, dilucide, propriis aptisque vocabulis explicabat; inventis rebus ita verba respondebant, ut nullam in ejus scriptis lituram deprehenderes; quamquam diligenter loquendi laude caruit. Reliquit libros controversiarum, quibus præsertim sibi purpuræ honorem & gloriam reperit, tum conciones, responsionem & apologiam ad Iacobum Angliæ Regem, deinde de scriptoribus Ecclesiasticis volumen, Davidici Psalterii interpretationem, ac postremis vitæ suæ annis, de gemitu columbæ, de arte bene moriendi, aliaque opuscula edidit, scripta dulcissime.

CÆSAR BARONIVS.

QUOD tanto Ecclesiæ Catholicæ utilitas, Rei literariæ decus, orbi Christiano lumen, ab Cæsaribus Baronii Ecclesiastica historia contigerit, S. Philippo Nerio, congregationis Oratorii fundatori referendum est acceptum. Eo enim auctore impulsoreque, tanto oneri humeros supposuit, cujus magnitudini gravitatique cu-

jusvis ingenii, quantumvis validissimū, vires succubuis-
 sent: verum semel illud strenue fortiterque susceptum,
 usque ad extremum vitæ spiritum, magnā æternaque
 cum nominis sui laude, sustinuit. Res a parvis initiis,
 ut magnæ plerunque res solent, orta, fere in immensum
 excrevit. Erat in eo, antequam opus aggrederetur, do-
 ctрина mediocris, eruditio vulgaris, Latine scribendi
 usus propemodum nullus: sed ab his tam exiguis sempi-
 nibus, in Ecclesiæ solum jactis, ac celestis gratiæ imbribus
 irrigatis, tantus truncus, tantique rami excitati pro-
 creatique sunt, ut nulli earum arborum, quibus celestis
 patris familias vinea se jactat, neque proceritate, neque
 viriditate, neque bonorum fructuum copia, cedere vi-
 deatur. Tantas, ingenium meditando, doctrina legen-
 do, stylus scribendo, vires accepit. Ac stylus non ille
 quidem elegantissimus, sed neque admodum inquinatus,
 verum gravis, ac sine cincinnulis fucoque puerili;
 qualis omnino Christianum scriptorem, ac de rebus
 maximis atque gravissimis loquentem decet. Tanti
 operis inchoandi perficiendique causa fuit provincia illi
 a S. P. Philippo tradita, de rebus gestis Ecclesiæ, jam
 inde usque ab ejusdem nascentis iuncunabulis, in Æde
 nova B. M. V. in Vallicella referendis. Etenim, inter
 egregia ejus Congregationis instituta, hic mos obtinuit,
 ut ex iis quatuor, qui quot diebus de rebus divinis ver-
 ba faciunt, unus Ecclesiasticam historiam, audientium
 frequentiæ, quæ nunquam deest, exponat. Itaque om-
 nibus legendis scriptoribus, tum Græcis tum Latinis,
 tum sacris tum prophanis, tum veteribus tum novis,
 tum typis impressis, tum nondum editis, omnium Ec-
 clesiæ temporum historiam complexus est animo, eam-
 que, Dei ope ac Philippi precibus adjutus, æternis lite-
 rarum monumentis consignare constituit. Atque, cum
 me in ejus scripta, mente & cogitatione conjicio, plane
 vehementer exhorreo, neque satis assequi intelligentia
 possum, unde homini, in excipiendis confessionibus, in
 sermonibus habendis, in sacrosancto Missæ sacrificio fa-
 ciendo, in horariis precibus recitandis, in rebus suis na-
 turæ ac necessitati tradendis occupato, tantum spaciū
 contigerit, ut infinitam vim rerum ac varietatem, per
 infinitos

infinitos pene libros dissipatam atque dispersam, colligeret, intelligentia comprehenderet, de unaquaque earum judicaret, ac denique literis docte accurateque mandarit. Equidem quocunque cogitatione me flecto, nihil aliud comperio, nisi opus Ecclesię inprimis necessarium, non potuisse nisi p̄cipuo divini Numinis instinctu, auxilio, atque adeo miraculo suscipi, expoliri, atque ad absolutionem, p̄fectionemque perducı. Multa, partim levia, partim nugatoria, partim a veritate prorsus aliena, sive hominum injuria, sive Ethnicorum perfidia, sive Hęreticorum fraude, in Ecclesiasticam historiam irreperant, magno Christianorum cum detrimento; quę ille omnia, sua illa mirifica ad refellendum consuetudine usus, inscitiz, fraudis, falsitatisque coarguit ac convincit: atque a Christo nato orsus usque ad Innocentii III tempora historiam perduxit. Sed id quoque ætatis nostrę lumen longe clarissimum, in primis dignum, quod editiore in loco fulgeret, Clemens VIII, invitum atque repugnantem, ad purpurę culmen attraxit, & Vaticanę Bibliothecę p̄fecit; ad quem gradum honoris tantam animi æquitatem & modestiam attulit, ut nunquam reliquerit neque abjecerit obedientiam, quam Rectori congregationis suę p̄stiterat, neque deposuerit clavem cubiculi sui, quo se in illud posset, si ita æternę salutis suę ratio deposceret, deposita purpura, rursus includere. Sed primo nihil fuit illi antiquius, quam ut Nerei & Acchilei sacram Ædem, quę sibi sorte contigerat, collapsam soloque æquatam restitueret, in eamque eorundem sanctorum & Flaviz Domitillę ossa, ex Æde D. Adriani, solemnı ritu maximisque cæremoniis deferenda curaret. Sedis autem Apostolicę dignitatis majestatisque tuendę, ita erat acer propugnator, ut contra ejus minuendę auctores nullam potentię, amicitię, gratięque rationem haberet, nihil, cujusquam periculi metu perterreretur; adeo ut diuturna Regum maximorum imperia adversus sedis Apostolicę decus, non dubitaverit scriptis suis labefactare atque convellere. Sed multo magis studium in eam sedem suam comitiis pontificiis declaravit: nam Leone XI extincto, tum Cardinalium multorum, qui

novi Pontificis eligendi causa conclavi tenebantur, voluntates in unum conspirarent, qui minus illi oneri idoneus habebatur, jamque pene in eo esset, ut in Petri solio collocatus, Pontifex salutaretur; restitit ille, & clara voce, se nunquam suffragio suo tantum illi honorem delaturum dixit, nec nisi coactum electioni illorum assensionem suam præbiturum; & quo testatior esset ejus rei memoria, non recusare quo minus in annales Ecclesiasticos referretur, se omnium postremum, quoniam aliter fieri non posset, suam cum ceteris patribus voluntatem conjunxisse. Neque his vocibus nihil est actum: nam continuo rerum commutatio facta est; illoque relicto, sua Patres studia in Cardinalem Burgesium contulerunt, eumque Pont. Max. Pauli V nomine, declararunt. At Baronii objurgationes eo majorem vim habebant, quod cum procero esset corpore, inerat in ejus vultu illepidus, inamœnus, tristis severitas; inter cujus quasi nubes, haud scio, an ullus unquam risus emicare visus sit. Obiit tunc, ex assiduo studiorum labore concepta; qua ita cibos omnes fastidiebat, ut nullum esset tam nitidum, tam delicatum, tam lepide suaviterque conditum obsonium, ut posset in ejus ætate morboque confecto stomacho, edendi appetitum excitare; immo cum ad cœnam vel prandium vocabatur, tanquam ad supplicium se rapi dicebat. Præter annales Ecclesiasticos, reliquit doctissimas ad Martyrologium Romanum notas, quibus illud mire illustravit.

GULIELMVS ALANVS.

DVobis superioribus Ecclesiæ luminibus jure adiciendus videtur Gulielmus Alanus, singulare in Angliæ Catholicæ religionis monumentum. Hic vir egregius generis splendore, morum probitate, doctrinæque præstantia, ad hæc, laboribus susceptis, periculisque pro catholica Religione aditis, meruit, ut a Sixto V solus, non observatis legitimis, ut solebat, comitiorum diebus, in collegium Cardinalium cooptaretur. Et enim ab ineunte ætate, cum esset præstanti corporis forma, quæ magnam esse solet ad libidines incitamentum,

tum, cumque Oxoniam ad excolendum optimis disciplinis animum missus, longe a parentum custodia, posset dare aliquod tempus ad ludum ætatis; eo robore animi, atque ea indole virtutis & continentie fuit, ut respueretur omnes voluptates, atque integrum ab omni labe animum conservaverit. Deinde cum impiis hæreticorum doctrinis, ac minacibus reginæ Elisabethæ edictis, quæ, in suo Regno, sacrorum principem se dici volebat, vehementissime in Anglia Catholica religio oppugnaretur, perterritis ceteris (quantum unius vocis & ingenii viribus potuit obfisti) solus in aciem prodiit, & furentium adversariorum impetus strenue fortiterque excepit, partim alios cohortando, ut in Rom. Pontificis fide manerent, partim eos, qui defecerant & ad Hæreticorum castra transierant, revocando, tum libris, de purgatorio igne, de sacerdotio, de indulgentiis, aliisque operibus editis, adversariorum errores refellendo: sed, miraculo audaciæ, primum obstupescit, tum inflammatus ira adversarii, quod unus ceteris exemplo, ad ineundum cum ipsis prælium, fuisset; undique in eum tela coniecerunt, quæ ille fugæ præsidio devitavit, & incolumis Lovanium ad suos, hoc est, ad Catholicos, se contulit. Neque tamen ibi quieti somnoque se dedit, sed tanquam miles animosus ac fortis, mutata veste ac nomine, veluti ex occulto ac de insidiis, ad stationes hostium, hoc est, in Angliam venit; ibique multa prælia præclara fecit, videlicet multos in catholicorum castra reduxit, ac quodam die minimum absuit, quin caperetur; sed illi, cum ejus capiendi partes erant traditæ, qui probe eum noverat, & cum eo etiam nocte illa convivium inierat, glaucoma ob oculos Deus objecit; eoque hominem adduxit, ut quem ante oculos haberet, tanquam ignotum præteriret. At Alanus, ab hoc aditu januaque divinitus patefacta, ex inimicorum manibus elapsus, variis temporibus, variisque in locis, nova collegia instituit, quo Angli, Religionis causa, patria domoque pulsæ, confugerent, atque unde omnia ad vitæ usum necessaria peterent, ac bonis artibus instituti complures, tanquam auxiliares copie, iis subsidio mitterentur, qui in Anglia pro avita fide certarent. Ac primum Duaci, ubi ejus opera

opera non vulgari mercede ad docendam Theologiam conducta fuerat, celebrem domum excitavit, in qua etiam doctissimos libros scripsit, de imaginibus, de prædestinatione, de sacramentis; tum Romæ. Postremo, Duaco, ab armata hæreticorum militum manu, una cum alumnis expulsum, Remos concedens, & Guisiorum Principum beneficentia adjutus, ad ducentos convocavit, quibus annos circiter quatuordecim præfuit; quorum unus, maximis ab eo beneficiis affectus, pessimo ingrati animi exemplo, venenum eidem, ac ceteris sodalibus suis, eorundem necandorum causa, paravit; ut scilicet collegium totum, cum ejus moderatore atque Rectore, una cœna, ea peste imbuta, deleret: ac nisi per eum ipsum, qui paraverat, pœnitentia ductum, res paruisset, pessimum facinus patratum foret: neque ita multo post, nihil propius est factum, quam ut sicarii cujusdam scelere opprimeretur, missi ad eum interficiendum ab Angliæ Magistratibus, crebris illius Romam itionibus, & collegiis tot locis excitatis, vehementer exterritis, & novæ Anglicanæ religioni exitium metuentibus. Itaque in catholicos, quos ceperant, questiones exercere, sœvire, omnia barbaræ crudelitatis exempla edere, in his clarissimum illud innocentiz, ingenii, doctrinæque lumen, extinctum jacuit, Edmundus nimirum Campianus, qui primus ex Patribus Soc. Iesu in Angliam ruentis Catholicæ Religionis, pro viribus, sustentandæ gratia transmiserat; qui equuleo primum tortus, tum suspensus sectusque fuit; quo scelere nullum ætas nostra tetrius vidit, neque dignius cujus a conspectu sol ipse recederet. Sed cum ob hanc immanissimam crudelitatem pessime illi apud omnes audirent, conati sunt religionis causa, læsæ Majestatis crimen obtendere, asserentes, jure in eos animadversum esse, quos Reginæ capiti pestem & exitium comparasse constaret: quod ab illis crimen Alanus novo volumine propulsavit, & veram impiorum hominum crudelitatis causam aperuit. At ille, tot laboribus periculisque defunctus, evocatus est Romam a Patribus Soc. Iesu, quos inter, & alumnos collegii Anglicani, ejus præsertim opera, in domo hospitali suæ nationis, Gregorii XIII auctoritate

tate fundati, maximæ discordiæ intercedeabant; ut eas videlicet oratione sua, atque adeo aspectu ipso, sedaret ac tolleret. Sed paulo post, quam ad Urbem venit, præter omnium expectationem, atque ipso ne suspicante quidem, a Sixto V Cardinalis declaratur; ut scilicet tanti viri claritate novum amplissimo illi ordini splendorem & decus acquireret: quæ electio magnam Romæ mercatorum rebus perturbationem attulit. Nam fiebant tum temporis a mercatoribus sponſiones, quæ postea summorum Pont. decretis sublatae sunt: mercator enim, accepta ab aliquo pecunia, majore vel minore, prout ille, de cujus honore sponſio fiebat, majore vel minore apud Pontificem Max. gratia valebat, suo chirographo spondebat, se centum aureos enumeraturum, si ille, cujus nomen in eo chirographo erat adscriptum, proximis futuris comitiis Cardinalis creatus esset. Quamobrem Alano, cujus ne nomen quidem in foro argentario auditum unquam esset, ex improviso, nec observata, ut diximus, temporum ratione, in Cardinalium collegium cooptato, qui sponſiones illas nundinati fuerant, quorum pene infinitus erat numerus, maximæ pecuniæ jacturam fecerunt. Sed magna profecto, Alani cooptatione, augustissimo illi ordini, decoris ornamentique facta est accessio; quippe cui ejus opera, doctrina, atque industria, maximo pluribus in rebus usui erat. Sed tantum illi bonum non licuit esse admodum diuturnum; nam aliquot post annis, interclusis urinæ meatibus, ea illi fluere desiit; ac XVII Kal. Octob. anni M D XCIV, ætatis suæ secundo & sexagesimo, magno patris suæ damno & bonorum omnium mœnore decessit.

THOMAS BOZIVS.

Thomas Bozius Eugubinus, Congregationis Oratorii, in scribenda historia non certis quibusdam finibus se continuit, ut Baronius; sed liberum & apertum sibi campum esse voluit, in quo posset excurrere. Etenim Baronius, ab initio rerum Ecclesiasticarum, res omnes singulorum annorum, literis mandavit; Thomas vero,

vero, longe majora amplexus animo, omnium monumenta temporum, hominum, locorum, gestarumque rerum, in historiam contulit, ut vel ex hoc uno existimare de hominis sapientia liceat. Quid enim illi novum, quid incognitum inauditumque potuit esse, qui ut de Trogo Pompejo Iustinus inquit, Herculeam audacia orbem terrarum aggressus, singula ex eo, quæ inde usque ab ejus incunabulis digna cognitione exiissent, excerpfit, ac divisâ temporibus, ac miro ordine collocata ad cognoscendum proposuit? Et quamvis non admodum senex sit mortuus, tamen processisse longius ætate videtur, quam Nestor, vel quivis alius eorum, qui longissime omnium vitæ terminos protulerunt. Nam si tantum unusquisque temporis ad vivendum habuisse videtur, quantum se in omnium seculorum memoriam mente studioque conjecerit, quid prohibet dicere, tot annos habuisse Bozium, quot anni a mundi ortu usque ad suam ætatem numerantur, cum ea, quæ in singulis ætatibus contigerint, in historiis, animo, tanquam oculis inspicendo, iis quodammodo interfuisse, & eum hominibus illis pariter vixisse videatur? Deinde cuinam, prope dixerim, magis Ecclesia se debere fateatur, quam illi, qui pro ejus incolumitate adversus hæreticorum factiones, eam delere cupientium, omnes ingenii sui vires, tanquam copias eduxit? Nam cum hostes Ecclesiæ, eam esse rem cæcam, & ab oculorum judicio remotam intra divinæ mentis arcana, includi, contendunt, quid aliud faciunt, nisi Ecclesiæ nomen retinent, rem ipsam ab oculis abigunt, ac prope in nihilum redigunt? At ille, edito doctissimo libro, signa & notas ostendit, quibus eam, qui vellent, aspicere, ac manu tenerent, docetque eandem, quamvis conspicuam, quamvis insigni pulcritudine præditam, sub eorum tantum aspectum non cadere, qui densissimis errorum tenebris circumfusi, sua nocte delectantur, & in veritatis lucem venire contemnunt. Sumpsit etiam pro Christiana Religione adversus Nicolaum Macchiavellum, aliosque politicos, quos vocant, bellum, quorum insana regnandi libido quasdam sibi leges finxit, quibus Deus e mundo tollatur; quas ille leges est infringere atque

atque abolere conatus, ac demonstrare, illud tantum regnum esse stabile atque perpetuum, quod caritate ac benevolentia civium septum atque munitum cum divinis iussis mandatisque conveniat. Pugnavit autem contra Macchiavellum duobus insignibus operibus, uno de ruinis Gentium & Regnorum, altero de antiquo & novo Italix statu. Scripsit de imperio virtutum, de robore bellico, de jure status: sed Annalium antiquitatum, ingens opus, in decem volumina divisum, duæ tantum partes impressæ cernuntur; reliquæ apud Franciscum fratrem, una cum aliis egregiis doctissimi viri scetibus asservantur; quibus (si facultas & vita supeditaverit) edendis, suam fratri benevolentiam, vel potius pietatem præstabit.

BAPTISTA GVARINVS.

Celebris, toto orbe terrarum, Ferrariensium Ducum aulae gloria, illustrium, generis divitiarumque splendore, virorum multitudine prædita, optimorum ingeniorum omniumque præstantissimarum artium facultate principum copia referta, scenarum magnificentia, ludicrorum equestrium certaminum gloria, sumptuosis frequentium conviviorum apparatus nobilis, nulla unquam in hominum animis oblivione delebitur. Sed eorum in primis Ducum nominibus, tubarum duarum, Areosti scilicet & Tassi, Homero Virgilioque non inferiorum, cantu in cælum elatis, omnis posteritatis aures personabunt. Verum ex illa aula, unde tanquam ex officina aliqua tubæ illæ prodierunt, pastoralis etiam Baptistæ Guarini fistula exiit, quæ suavitate, lepore, tenerorum amorum deliciis, atque omnibus ad capiendos animos illecebris, quarumvis tubarum famam exæquet. Hujus enim Eclogæ, Pastori fido nomine, ea est claritas, ea celebritas, ut nullæ sint manus, quibus illa non teratur, nulli sint oculi, quibus non legatur, nulla sit ætas, sive puerorum, sive adolescentium, sive juvenum, sive senum, nullus sexus, sive virorum, sive mulierum, in quorum sinu non gestetur, nullus hominum ordo, sive nobilium, sive tenuiorum, nul-

lum

lum genus, sive doctorum, sive rudium, in quorum domibus non inveniatur, nullæ impressorum officinæ, ubi illa fere quotannis typis non mandetur, nulla nationum, quantumvis barbararum diversitas, in quarum sermonem conversa, non legatur: morum fortasse integritati non utilis: etenim in ejus dulcedine suavitæque, tanquam in infesto Sirenis mari, in quo etiam Vlyses erravit, virgines nuptæque complures pudicitæ naufragium fecisse dicuntur; sed legentium e manibus extorqueri non potuit: nec defuerunt præstantia doctorum hominum ingenia, quæ stantem ejus gloriam suis censuris tanquam machinis conata sunt oppugnare atque subvertere; sed omnis eorum labor in irritum recidit, immo ejus splendor illorum clamoribus exagitatus, quasi vehementibus impulsâ statibus tæda, clarius enituit. Multum etiam, ut ex orationibus ejus apparet, dicendi laude præstitit, ob quam ab Alphonso II Ferraræ Duce, in multis ac nobilibus legationibus est adhibitus; ad Remp. Venetam, ubi cum patres illi amplissimi, in senatu suo verba facientem, magis quam alium quemquam Italica lingua loquentem, sunt admirati; ad Henricum Valesium tum Poloniæ Regem; ad Gregorium XIII, ut illi, de more, Alphonfi Ducis nomine, adeptum Pontificatum Max. gratularetur; & rursus, eadem de causa, post Alphonfi mortem, ad Paulum V, a patria missus; ad quod munus nonnisi nobilissimus & eloquentissimus quisque deligitur. Ejus etiam opera idem Alphonfus usus est in scribendis epistolis, in quo munere tantum valuit, ut etiam de eo elegantissimum librum, qui Secretarius inscribitur, ediderit. Nulla fuit in Italia paulo illustrior Academia, quæ non summa ambitione ab eo expetierit, ut nomen suum ad ipsius Academicorum numerum adscriberet. Sed Academiam Humoristarum dilexit ex omnibus plurimum; in qua semper princeps, sponsam eam suam appellabat, quæ non exiguam illius in se amoris gratiam retulit. Nam & in parentis eum loco dilexit, ejusque adhuc superstitis imaginem, magna in tabula, summi artificis manu depictam, & corona aurea ornatam, in loco Academicæ posuit; & mortuum maxima pompa, egregiis suorum

suorum ingeniorum carminibus, & funebri oratione laudavit. Semper cum adversa fortuna iniquorum odio conflictatus, (non enim malevoli tanto viro deesse poterant) demum cum Venetias, litium quarundam causa venisset, & ad cauponem divertisset, ibi senio curisque confectus, excessit e vita.

MARSILIUS CAGNATUS.

IN progignendis elegantissimis hominum ingeniis, ad præstantissimas omnes artes a natura factis, Veronæ civitas semper felix est habita. Itaque quæ olim Catullum, ac paulo supra nostram memoriam Fracastorium aliosque genuerat, hac ætate Marsilium Cagnatum, magni nominis medicum, edidit. Hic domi omnibus his literis, quibus ætas puerilis informari ad humanitatem solet, eruditus, Italicæ Athenas, hæc est, Patavium, petiit. Sed Deus illi propitius Iacobum Zabarellam objecit, præstantissimum tum temporis in eo gymnasio philosophum; quo doctore Philosophiam didicit, cujus rei causa Patavium sese contulerat: verum quia ejus omnis in philosophico illo spacio cursus & labor ad Medicinam, Philosophiæ quasi quadam cognitione proximam, festinabat, tanquam ad metam, Romam contendit, seque Alexandro Petronio in disciplinam tradidit, ad quem tum medicæ facultatis primæ, omnium concessu, deferebantur. In cujus schola quinquennium versatus, ita ab ejus doctissimis sermonibus exercitationibusque discessit, ut celeriter in principum medicorum numerum pervenerit, neque ullum esset morbi genus ita arduum, ita anceps, quod non ejus dignum cura videretur. Cujus industriæ ego maximum documentum hoc habeo, quod statim a Patribus Soc. Iesu, viris doctissimis, & in existimando de cujusque ingenio acutissimis, ejus opera conductæ est, neque alio, quoad ille vixit, medico sunt usi: deinde, quod ad docendam Philosophiam Medicinamque, in gymnasio Romano, inagnis præmiis evocatus est: quo in munere obeundo, mirum illud accidit, quod cum in communi hominum consuetudine usuque ea esset frontis severitate

tate tristitiaque, ea oris taciturnitate atque silentio, ut nullum ab eo hilaritatis signum, nullum pene verbum elici posset, ita tamen erat in docendo facundus, ita elegans, ut mirarentur omnes, locorum mutatione, tantam in homine dissimilitudinem morum existere. Sed dabat hanc illi facultatem magnitudo doctrinæ, qua pectus repletum habebat. Nam Græce Latineque doctus, omnium Philosophorum placita, omnium temporum historiam, complexus erat, unde, cum esset opus, plura proferret, quibus auditorum animos ab illius tristitia doctrinæ, quam docebat, paulisper ad hilaritatem voluptatemque traduceret. Sed in curandis aliorum morbis ita peritus ac sagax, non potuit unicum masculæ prolis filium, in gravem morbum ex incontinentia prolapsum, ex ancipiti eripere, sed ruentem ad interitum, sua etiam ope adjuvit, sive fato aliquo, sive adolescentis culpa, quem pudore deterritum, parenti veras morbi causas pudit aperire. Verum ea animi constantia, labentis familiæ suæ casum sustinuit, ut conceptum intus dolorem, non in lacrimas, non in voces effuderit, sed elegantissima elegia dolenter ostenderit, quanta, ex filii interitu, malorum moles in suam domum irruisset. Demum aliquanto post ipse quoque, annum agens novum supra sexagesimum, emigravit e vita. Objectum est illi, quod morbos in longum traheret: at hæc fortasse fuit ægri cuiuspiam querela, cui erat molestum, se diutius affixum lecto teneri. Scripsit de salubritate aëris Romani, de humano partu, de ratione curandi flores in urbe, de aqua Tiberina, & alia opuscula, quæ unico volumine continentur. Edidit libros de continentia in victu, & de exercitio, seorsim a ceteris opusculis impressos.

M. ANTONIVS BONCIARIVS.

Hic Perusii, a vulgaribus, ut ipse de se fatetur, opificibus ortus, cujus quippe avus coriariam, pater futoriam, in adolescentia fecerat, generis obscuritatem sui literarum splendore illustravit. Glorietur in suis ad amicos literis, se M. Antonii Mureti auditorem fuisse,
Sir.

Sirleti & Cornei Cardinalium commendatione eidem traditum; neque fallitur in gloriando: nam multo est gloriosius, se Mureto in disciplinam, quam multis ad docendum dedisse. Mureto extincto, duos clarissimos viros, qui tum humanissimis his studiis præerant, in primis coluit Franciscum Bencium, & Io. Petrum Masfejum, duo Soc. Jesu in hoc genere studiorum lumina longe clarissima; a quorum recta scribendi ratione utinam, qui postea secuti sunt, nunquam recessissent; etenim eloquentia sua in sede consisteret, nec tumidam, elatam, & insolentia ac constructione verborum excæcatam, tum ineptiis sententiarum deformatam orationem, suum in regnum irrupisse quereretur. Sed Bonciarius, a Mureti disciplina profectus, totum vite suæ tempus alios docendo instituendoque consumpsit. Primum in seminario Perusino admodum adolescens, & postquam robustior est factus, in gymnasio ejusdem civitatis, Rhetoricam, quæque ad bonas literas pertinent, docuit: postremo, in collegio, cui ad extremum usque spiritum præfuit, docendi munus exercuit, sed jam luminibus captus, ac debilibus articulari morbo membris omnibus, quorum pene usum amiserat; qui morbus illi tam tetros cruciatus ciebat, ut nocte quadam, ut ipse scribit, ea oculi tunica, quam medici corneam vocant, sponte diffracta sit, ac pupilla, ut grano similis, sua sede evulsa conciderit, ea doloris acerbitate, quæ verbis explicari non possit: verum ita sortis fuit in perferendo, ut cum maxime excrucietur, nullam vocem sapientis gravitate indignam emisit, nullum in vultu, minus æqui in calamitatibus animi signum ostenderit. Multa scripsit eleganter planeque Latine, tum soluta oratione, tum versibus. Extant epistolæ, ad plures tum literarum nobilitate tum generis splendore viros clarissimos datæ; in his ad Vbertum Vbaldinum, antea quam a Paulo V cooptatus, in Cardinalium numerum veniret; circumfertur de arte Grammatica liber. Refert in suis epistolis, susceptam a sese delatam de viris illustribus scribendi provinciam, qui per annos quadringentos Perusæ armorum vel litterarum gloria floruerunt. Ex iis quæ prosequutus est versibus, hæc sequuntur in primis,

Triumphus augustus, sive de Sanctis Perusii translatis lib. IV, Seraphidos libri III, multaque alia poemata tum jocosa, tum gravia. Multos docuit; in his parentem suum, Mariotto nomine, cum annos septem & quadraginta natus, uxore amissa, se Soc. Jesu vellet adungere, ab eaque repelleretur, quod literarum Latinarum ignarus, sacris initiari non posset.

CLAUDIUS ACHILLINUS.

Quod nunquam in stirpibus vel frugibus accidit, ut plus virium virtutisque concipiant, quam quantum in seminibus, unde emerferint, subest, id in hominum genere sepiissime usu venire videmus: cum nimirum parentibus filii, avis nepotes, magnitudine animi, ingenii, fortitudinis, longo intervallo præcurrant. Adfuit quidem in tota Achillina familia, tanquam in semine, amussitata ad virtutem indoles: non cessavit illa, aliquot abhine sæculis, clarissimos in omni virtutum genere viros efferre: vidit paulo hac nostra superior ætas Alexandrum Achillinum, Claudii avum, docentem Patavii Philosophiam, & admirata est hominis ingenium, eruditionem, doctrinam: viderunt alia alios tempora, virtutis stimulis incitados, celeri ad gloriam cursu contendere. Sed talis virtus, qualis in Claudio se extulit, nullius est oculis unquam accepta. Etenim natura, ad hujus nostri sæculi bonum, cupido, ut ita dicam, animo omnia sua in eum munera contulisse, aliis vero, quantumvis egregiis, parca tribuisse manu videtur. Nam Claudium, a primo natalis ejus die, suis cumulat bonis, usque ad extremum diem vitæ perduxit. Nam primum clarissimum illi natalis soli splendorem attribuit, Bononiam scilicet; tum antiquam generis nobilitatem, utpote in Achillina familia nato; ac præstantem corporis formam dedit, quæ nimirum ejus esset domicilium ingenii, cujus illa magnitudini non certos unius scientiæ terminos, quos intra suas vires exerceret, præscripsisset, sed cui omnium disciplinarum, omnium facultatum, omnium elegantissimarum artium campum aperuisset, in quo illa vagari, excurrere, atque illi sui ipsius

ipsius documenta posset edere, in quibus hæc ætas voces, plausus, clamores extolleret, omnisque posteritatis memoria admiraretur, exclamaret, horreret. Et sane non minus exigua ejus virtuti scena debebatur, quæ, non uni tantum civitati, non uni provincie, sed universo terrarum orbi, futura spectaculo esset. Itaque omnes in eum, tanquam unum in locum, rerum plurimarum scientiæ convenerunt. Nam philosophus fuit summus, Theologus maximus, Mathematicus excellens, Iurisconsultus eximius, orator eloquentissimus, Poëta prope modum singularis: grandis erat verbis, immensus translatis, nobilis sententiis, quæ acres vibrantesque, in audientium sensus invaderent, irrumperent, penetrarent, in eisque aculeos quasi quosdam relinquerent; quibus rebus fiebat, ut vix ab eo vel epistola aliqua, vel rhythmus, vel epigramma, vel quispiam alius illustris ingenii sui scetus exisset, cum ab iis, qui circa ipsum tanquam in insidiis erant, ex occulto interciperetur, describebatur, ac non parum sæpe typis impressum, pluribus exemplis, per totam Italiam atque alius etiam orbis terræ partes, divulgabatur: & interdum accidit, ut antea ille, partus suos in hominum manus venisse, in eisque tanquam adolevisse conspiceret, quam a se fuisse editos intelligeret. Et quo nihil eorum, quæ scripserat, felicitati deesset, benigna præ ceteris illi parens natura summam addidit canoræ vocis suavitatem, gratissimum in pronunciando sonum, plenum artis gestum, motum corporis cum summo lepore ac venustate conjunctum; multæ præterea erant in homine facetiæ, multus in jocando lepos, multa in laceffendo respondendoque argutia. Atque ne totum literarum studiis addictum, avocasse eum a negociis atque a Rep. videretur, hac quoque in re, sicut in ceteris benigna natura magnam illi in rebus agendis dexteritatem, solertiam, prudentiamque concessit, quæ Card. Ludovisio, postea Gregorio XV, magno usui fuit. Adeo ut illa, dona eidem sua, ut diximus, non modio, neque trimodio, sed ipso, ut ajunt, horreo demensa tradiderit, nec, si ipse fingere vellet, plura bona reminisci, vel majora posset consequi, quam quæ sibi natura tribuerat. Fortuna etiam ipsa (quam-

vis ejus meritis angustius) non illi parum indulgit; nam tantum opum ac divitiarum attribuit, non solum quantum esset Philosopho satis, qui parvo contentus, in re tenuissima vivit, sed etiam ut suis facultatibus posset familiaris splendorem, sui que ipsius dignitatem, sine cujusquam ope, tueri; tum villam magnificentissimam dedit, Saxo nomine, quæ passuum millibus non amplius decem Bononia abest, in quam, ubi Urbis odium ipsum ceperat, secederet, ubi secum, ut dicitur, viveret, ubi se literis abderet; postremo, quasi auctarium quoddam, singulis annis millena & quingentena aureorum addidit, quæ Iuris Civilis in Parmensi gymnasio, docendi gratia, Principis Farnesii liberalitate capiebat; qui honor in ea civitate habitus est ante ipsum nemini. Sed quod divitiis omnibus præstat, ad Principum virorum amicitiam, ita facilem illi aditum aperuit, ut cunctis Italix proceribus, nihil esset eo carius, nihil jucundius, & Vrbanus VIII in primis, qui dum Card. sedis Apostolicæ Legatæ nomine, Bononiam administrabat, suavissimis ejus moribus captus, in oculis eum semper habuerat, factus Pont. quoties usus venerat, officiis beneficiisque omnibus exornavit. Suos rhythmos edidit, unam ad Augustinum Mascardum epistolam Italice, plures Latinas ad Iacobum Gaufridum V. C. dedit. Scripsit etiam ad Urbanum VIII Vindicias, secundum fidem eorum, qui Andreæ Casalem mortuum asserabant, in cujus nomen quidam, qui Romæ in vinculis habebatur, ut ipsi dicebant, invaserat. Nobilissimum Epigramma Hetruscum Christianissimi Regis nomini inscriptum emisit, quo illi Casalis arcem ex prima illa obsidione liberatam gratulatur; quod Epigramma, a quodam Hispanarum partium non insulso poëta in ridiculum conversum, satis facete illuditur. Sed accidit, ut illud dignum immortalitate ingenium, quemadmodum hæc ætas coluit, dilexit, admirata est, ita etiam, quod minime volebat, desieret extinctum, sexto & sexagesimo ætatis ejusdem anno, lethali morbo sublatum.

F. ALEXANDER VBALDINVS.

Magnum apud omnes F. Alexandro Vbaldino, ex Carmelitarum discalceatorum familia, doctæ eruditæque sanctitatis nomen obtinuit Manualis pauperum liber; in quo signa & notas ostendit sex & triginta locorum, quibus cognitis ille sibi ipse, qui vellet, thesaurus ad locupletandum spiritualibus divitiis animum foderet, & id, quod vellet, parvulo labore, nullo errore inveniret. Sed eum, magis quam aliud quodvis præstantis ingenii opus, præclarum illud facinus in cælum evexit, quo edito æternam nominis sui memoriam reddidit; nam cum Leoni XI Pont. Max. arctissimo cognitionis nexu implicaretur, quod esset matri suæ avunculus, tamen eo ipso die, quo renunciatus est Pontifex, regali plane contumacia, a magnitudine, humana omnia despicientis animi ducta, calcatis honoribus, qui se ipsi ultro offerebant, fastigiumque submittebant, quos alii per ignes ferrumque petunt, intra Carmelitæ Discalceatorum fratrum familiz claustra se abdidit; ad quæ, quia cuncti opibus & honoribus obstructi sunt aditus, spernit illis omnem, ad se persequendum adimeret. Nec exigua a Deo, ex speritis atque contemptis ejus inanis gloriæ splendoribus, qui vix illuxerunt cum extincti sunt, mercedem accepit. Nam cum adeo tenui esset valetudine, stomachoque adeo imbecillo, ut ab eduliis fere omnibus perniciem damnumque metueret, corpore adeo delicato, ut quodvis illi stratum, quantumvis molle, duriusculum videretur, frigoris vero adeo impatiens, ut æstate media ternis tibialibus crura contegeret; tantum illi Deus robur, & firmitudinem valetudinis addidit, ut nullum cibi genus respueret, quo socii uterentur, & in culcitra stramentitia, tanquam in pluma cubaret, ac frigidissimo anni tempore nudis pedibus cruribusque incederet: &, quod videri mirabilius debeat, qui jam jam mori videbatur, in hoc tam duro vitæ genere quinque & viginti confecit annos; longius etiam processurus ætate, nisi pœnis ultro susceptis, nimium in se ipse asper ac sævius, cecidisset in cursu.

MARCELLVS MACEDONIVS.

Regia Neapolis civitas, inclitum Parthenopes Sirenis sepulcrum, optimos semper poëtas tanquam Sirenes edidit, suavissimo cantu aëra inulcentes, ut ab ea, quam inclusam visceribus continet, velut ex semine, tot suave canentium sætus prodiisse videantur. Atque, ut de Ioviano Pontano, de Actio Sincero, de Victoria Columna, de Bernardino Rota, Aloysio Transillo, Io. Baptista Marino, aliisque taceam; nuper Marcellum Macedonium, admirabili sæcunditatis laude produxit; qui suavissimo vocis suæ cantu, hominum aures mire detinuit. Ac primo, sicut nova Siren, hoc rerum humanarum mari navigantibus infesta, visus est illecebrosis mortaliū amorum carminibus velle eos perdere, & in profundum æternæ mortis abstrahere. Sed postea divina ope ab hujus procellosi, tumidi, & importuosi pelagi fluctibus abreptus, & tutum in locum adductus, pleniore plectro, ac suaviori voce, Superum laudibus referendis eos, quos antea instituerat perdere, in salutis portum est conatus arripere. Adolescens elegantissimis rhythmis, & omni lepore ac suavitate refertis, suos amores, sive veros sive fictos, cecinit; quos deinde rhythmos quidam vel cognatus vel amicus edidit, eodemque legendi potestatem omnibus fecit; deinde ab his inanissimis mortaliū & in cinerem abeuntium formarum cupiditatibus, ac veros rerum cælestium amores animum transferens, arctissimum Carmelitæ Discalceatorum familiæ institutum amplexus est; ibique D. Catharinæ, virginitatis ac martyrii laudibus insignis, res gestas, nobilissimo poëmate prosecutus est. Verum, cum in eo ordine aliquot annos magna sanctitatis cum laude vixisset, & concionator non in postremis, corruptos hominum mores ad sanitatem revocare, eloquenti & caritatis studio incensa oratione, non destitisset, nondum senex, Deo, cui dicaverat, animam reddidit; magna eruditus viris, & poëticæ facultatis studiosis, ejus poëmatis inspiciundi cupiditate relictæ; cui religiosorum suorum claustris, tanquam

quam tenebris clauso, nondum communis usuram lucis contigit capere.

F. ANGELVS ROCCA.

Sacrarium Apostolicum, abhinc trecentis & eo amplius annis, Augustinianæ Eremitarum familiæ custodiæ tutelæque commissum, multos præstantes viros habuit, qui eum locum splendore doctrinæ illustrarunt. Sed ex his ætate nostra F. Angelus Rocca Camers enituit clarius quam ceteri, vel saltem dignus est præ ceteris, cui sacrarium illud, ejusque recte administrandi ratio, immortales gratias agat: neminem enim video, cui illam plus debere sit æquum: solus enim omnia, quæ ad eam provinciam, cui tot annos magna cum laude præfuit, pertinent, Chronistoria sua doctè eleganterque prosequitur. Fuit antiqua plane probitate senex, & in tenui pusilloque corpore, salis plurimum inerat: nam multiplici rerum scientia pectus compleverat; Philosophiæ ac Theologiæ adeo erat peritus, ut anteaquam ad provinciam illam capeffendam accederet, a Priore generali sui ordinis, eas facultates docendi munus, magistri nomine, acceperit: tum Græcis & Latinis doctus, omnem tenebat Ecclesiasticæ antiquitatis eruditionem, humanioribus vero literis elegantius erat excultus, quam cucullati homines plerumque solent; a quibus, cum nullam fere huic studio operam tribuant, eloquentiæ laus non admodum expectatur. Nam & observationes in sex libros elegantiarum Laurentii Vallæ, & observationes Latinæ linguæ, de occultis ejusdem locis, ac de scribendis epistolis, libros edidit. Sed sua illi fortuna, in Æde Pontificia, habitationem Aldo Manutio proximam tribuit, qui cum, ea quæ vellet, jure vicinatis communicare, multumque ab eo auxilii referre posset. Ob quas virtutes a Clemente VIII Tagasensem episcopatum obtinuit; qui honor, præter nomen, nihil omnino administrationis ac sollicitudinis habet: ea enim civitas, D. Augustini natalibus inclita, a Turcarum Tyranno, dominatu regio premitur. Multa scripsit, quorum numerus, quoniam ab eo in ultima

sua Chronistoria recensetur, hunc nobis ea referendi laborem adimere voluisse videtur. Illud vero est, de quo, non unius tantum Urbis cives, sed omnium nationum populi, maximo se illi beneficio obstricti esse fateantur; ea nimirum insignis bibliotheca, quam omnium ejusvis professionis librorum copia refertissimam, cunctis, qui vellent adire, in cœnobio S. Augustini, Romæ, Angelica nomine appellatam, aperuit, in quo egregium suum erga bonas artes, erga cupidos literarum, studium & voluntatem expressit. Demum quoniam nihil est hic æternum, decurso ætatis suæ spacio, ex sacratio Pontificio, ad cælestem Ierusalem, ut ejus merita persuadent, evolavit.

PETRVS LA-SENA.

OMnia fere nobis, a transalpinis regionibus missa, bonorum ingeniorum semina, & in Italix quasi solo, nec inculto, nec derelicto, (ut est multorum opinio,) fata, non minus uberes ex se fructus extulerunt, quam fruges in optimam segetem datæ. Cujus rei testes locupletissimi plures possent adduci, qui ex Germania, vel ex Gallia, tum orti, tum oriundi, in fertilissimo Italix quasi agro, sub ejusque felicissimo cælo, benignis semper astris ad ingenii fructuum procreationem influenti, tanquam consiti, a stirpis suæ bono non degeneraverunt. Sed in primis ejus rei fidem facit Petrus A La-Sena; qui a patre ex Nortmannia profecto, Neapoli procreatus, in eam arboris proceritatem excrevit, ut semper viridantibus & fructuum ubertate incurvescentibus ramis, pulcerrimo Italix campo hilaritatem decusque maximum afferat. Hic, ad mitiores Musas a natura propensus, a Grammaticorum scholis, cum vix ex ephebis excessisset, compulsus est a parentibus in horridas Iurisconsultorum, barbære inquinatæque loquentium, regiones: sed quoniam feliciores plantæ, quovis eas transferas, ibi radices agunt, & uberes fructus reddunt, eos in jure civili profectus fecerat, ut omnium, qui essent Neapoli, consultissimus haberetur. Sed, quod est admirabile, singulari ingenii atque ab
omnis

omnis lucri cupiditate abhorrentis animi exemplo iis, qui, a litibus oppugnati, in patrocinii sui tutelam praesidiumque confugissent, non mercenariam, sed gratuitam operam dabat. Sed non parum saepe fiebat, ut a naturali sua inclinatione, ab illa studiorum horriditate & a strepitu fori abreptus, ad humanissimas & elegantissimas literas, tanquam in hortum aliquem abstraheretur. Itaque, ut aliquis suæ, in earum amœnitatem, tanquam secessionis, fructus constaret; doctissimum Homeri Nепenthis, seu de abluendo luctu, omnis politionis humanitatis reconditionisque doctrinæ copia refertum librum, composuit. Sed parentibus fato suo functis, liberius ac frequentius cepit in his politissimis studiis versari, ex eisque, una cum doctissimis Neapolitanorum, voluptatem suam explere: & quoniam Græcæ linguæ non plus attigerat, quam quantum prima illa puerili institutione potuisset, se Petro Arcudio in disciplinam dedit; a quo ad ejus sermonis capita fontesque perductus est, unde, quantum docto in primis homini satis esset, hauriret. Nullius pene sermonis fuit expertus: nam plurimum notitia linguarum, universæ eruditionis oram omnem lustrare cupienti, utilius nihil esse dignoscitur. Sed jam pene ab agendis causis defessus, infirma præsertim valetudine, ægre, ob amorem patriæ dulcemque amicorum consuetudinem, persuasus est a Io. Iacobo Buccardo Parisiensi, quem Neapoli commorantem, eorundem communionem studiorum, sibi devinxerat, ut a judiciis causisque discederet, & in Romanum ocium tranquillitatemque descenderet. At Romæ cum esset, & in Vaticanis ædibus, ab eodem Buccardo hospitio acceptus, habitaret, ita intemperanter se dare literis cepit, ut multa somno, ciboque, quem semel in die parce admodum tenuiterque capiebat, ac cæteris naturæ necessitatibus denegaret: quocirca brevi, semianni unius spatio, multa opera Neapoli, ab ipso egregie inchoata, & a Buccardo, qui ejus vitam scripsit, enumerata, absolvit perfecitque. Fuit autem in eo non solum ingenium, sed oratorium etiam ingenium, quod duobus orationibus ostendit, habitis ab eo in Academia Græca Basiliana; in quibus disputationem a Criticis de
lin-

lingua Hellenistica commotam, in utramque partem differendo, doctè copioseque tractavit. At quisnam ornatus, qui flos, quod lumen orationis, in suo Cleombroto desideratur? Verum infinitum scribendi cogitandique laborem, cui se subjecerat, cum ferre non posset, ejus magnitudine oppressus, interiit, in ipso adhuc ætatis flore: nondum enim quadragesimum sextum annum excefferat moriens. Singulis amicis suis singula Cleombroti a se compositi exempla testamento legavit, Francisco Card. Barberino, suas de lingua Hellenistica orationes, Francisco Mariz Brancatio Card. Historiam Gynicam nondum impressam.

HIERONYMVS MORICVCIVS.

IAnum fortunæ, quod est urbs in litore Adriatici maris posita, Hieronymi Moricucii patria fuit: verum illa, cui veterum superstitione, opes, honores, ac divitias, quibus vellet, dandi vel adimendi jus potestatemque concefferat; civem suum, quantumvis egregium, non hilari benignoque vultu respexit. Nam, cum ætatem, ambitionis labore districtam, in Romanæ aulae tanquam area, ad aucupium honorum divitiarumque, totam contrivisset, nihil adeptus est aliud, nisi ut Vlpiano Vlpio, Novocomensi Episcopo, magnis muneribus functo, ac postremo Gregorii XV Datario in scribendis epistolis operam navaret. Nec mirum vel novum videri hoc debeat: nam illa oculis, ut est in fabulis, capta, dignos præteriit, & indignos plerumque, bonorum præmiis & honoribus afficit. Sed Deus æquum & patientem illi animum tribuit, quem adversæ suæ fortunæ objiceret. Nam simile monstri videtur, quod Vlpiani, optimi quidem sanctissimique viri, sed impotentis, iracundi, & truculenti animi, mores, usque ad ejus excessum, pati potuerit. Fuit Hieronymus vir gravis, prudens, atque optimis disciplinis excultus, re ad bene dicendum scribendumque necessaria, quod scribendi rectè sapere est principium & fons: scribebat, in utraque lingua, tum soluta oratione, tum versibus, elegantissime. Neque quæcumque sibi oblatam ingenii augendi

gendi & declarandi occasionem non auide semper arripuit. Nam frequens in eruditorum & illustrium virorum cœtibus & in Academiis fuit; ac frequentior in iis, in quibus ingenii sui lumen clarius posset enitescere: ut apud Cardinalem Saubaudix, & apud Gregorium XV, qui novo sæculi nostri exemplo, Vaticanam Academiam instituerat; quo Pontifice audiente, magno Cardinalium, ac doctorum hominum concursu, una cum Nicolao Riccardio, cognomento Monstro, & Claudio Achillino, aliisque doctissimis viris, verba fecit, & rhythmos atque epigrammata, quæ scripserat, recitavit: neque tot suis lucubrationibus, quas, iis in arcibus ad opum honorumque aucupium tanquam cibum offuderat, quidquam capere potuit præter infirmissimam corporis valetudinem; cum qua in patriam cum se recepisset, acerbissimis podagræ doloribus excruciatu interit; nullis adhuc editis libris, quibus ingenii ejusdem memoria in posterum tempus propagetur.

BALTHASAR ANSIDEVS.

Quantam vim habeat virtus, & quantos amores sui excitare in hominum animis valeat, non multis abhinc annis in Balthasare Ansideo factum est palam. Hic Perusii nobili genere natus, ac, tum parentum diligentia, tum magis sua sponte, in omni genere honestarum artium, ac præsertim Græcis & Latinis literis institutus, non solum oratione, jucundissimæque suæ consuetudinis dulcedine, verum etiam aspectu ipso, ubi mire probitas elucebat, potuit cunctos adigere, ut se diligerent. Mira fuit in eo Latini sermonis puritas & elegantia, quæque, non longo intervallo, proxime ad eruditam Ciceronis ætatem accederet; quæ puritas, vitiosa atque corrupta sæculi nostri consuetudine, falsa atque inani altæ atque exaggeratæ orationis opinione, depravata, tanquam humilis & abjecta, negligitur. Multas ad amicos epistolas dedit, cultu atque nitore repletas, in his ad Robertum Vbaldinum, tunc adolescentem, summo ingenio summaque spe præditum, ac postea Cardinalem, & ad Vgonem ejus fratrem, doctrinæ

ac sanctitatis laude præclarum, nunc Vaticanæ Apostolorum principis Basilicæ Archidiaconum, & Canonicum. Causa conjungendæ cum eis amicitix fuit egregia in illis fratribus ad virtutem indoles, & nusquam voluptatum illecebris interruptus ad laudem cursus: hi tunc Perusii, una cum ipsorum parente, qui Quæstorium pro Camera Apostolica Vmbriz Provinciæ munus administrabat, commorabantur, quo tempore in Perusino gymnasio humaniores ille literas docebat; quo facilius potuit adolescentium, eloquentiæ studio flagrantium, benevolentiam ad se attrahere. Sed quoniam erudita vox ejus, erat frequentioris conventus auribus digna, ea Perusium Pisæ spoliarunt, ut gymnasium suum ornarent. Sed tantum illis bonum, diuturnum esse non licuit. Nam a Paulo V evocatus est Romam, ac bibliothecæ Vaticanæ custos datus; ad quod officium nemo solet admitti, nisi doctrina, fide, & industria cognita. Neque ultimum in Pontificis gratia locum tenuit, sed propemodum summum. Nam quoties Pontifex in senatu Cardinalium vel sententias rogaturus esset, vel verba factururus, quæ cogitaverat, familiarissime cum eo communicabat, atque, ob suavissimos ejus mores, elegantiamque doctrinæ, plures sæpe horas traducebat, neque in Cardinalium comitiis ejus rationem non habuisset, si longior illi vita suppeditasset; sed præproperus ejus exitus tantum illi honorem ademit.

MVTIVS RICERIVS.

Veram atque germanam Virgilii poetarum principis imitandi rationem affectus esse videtur Mutius Ricerius Camers, in suis omnibus poematibus, sed in illis duobus maxime, quorum uno Tusculanæ Aldobrandinorum villæ magnificentiam, & adjecta illi nemora, porticus, columnas, infinitamque propemodum vim aquæ, ad irrigandum eum locum, ex apertis montium visceribus ductam, decedentes vastis e fontibus imbres, vel amnes potius, aliaque ludentis ibidem artis miracula, docte eleganterque prosequitur; altero, quo Pauli V Pont. Max. sacellum, in Æde B. M. V. ad Nives
in

in Exquiliis positz, ædificatum, & intectos in eo preciosiorum marmorum crustis parietes, refertos extantibus ac prominentibus, auroque interlitis, figuris, fornices, signa, columnas, aurum, argentum, aliaque regalis opulentie ornamenta, elegantissimis versibus, tanquam coloribus depicta, penę oculis subijcit. Sed illi scribendi laborem diutius ferre non placuit. Quod si studio & exercitatione, quod erat in ipso naturale bonum, alere atque augere voluisset, profecto ad summam poëtice facultatis laudem pervenisset. Sed quantum detraxit ex studio, tantum amisit ex gloria. Omnia fere scripsit antea quam fortuna ipsi arridente, ad opes perveniret: sed postea collegii Cardinalium a secretis munus adeptus, ac divitiis locupletatus, omne poëtis studium & cogitationem abiecit, atque in rerum abundantia voluit beatius, ut ipse putabat, vivere, crebroque proverbii loco illud usurpabat, avem pinguem non solere canere. Magna ille, in omni sermone, libertate atque licentia uti; quę reprehensione digna essent, in odium vituperationemque vocare, nemini parcere, omnia sua consilia, omnes intimas animi cogitationes cuivis aperire; atque in propatulo habere; quę ab aulę ambitione, & ab his moribus, quibus nunc utimur, maxime aliena existimantur: nam falsos fieri, atque aliud clausum in pectore, aliud in lingua promptum habere, summa prudentia ducitur. Erat in primis facetus ac dicax; sed quoniam nulla temporis habita ratione, nulla dicacitatis moderatione ac temperantia adhibita, faceti ac dicacis hominis famam querebat, in scurrilitatis vitium non parum sæpe delabebatur. Cum his igitur moribus, nullum honoris gradum ascendit altiore eo, in quo primus ille fortunę favor eum collocaverat; in quo demum vita defecit.

AVGVSTINVS MASCARDVS.

NON minimum, sine dubio, Augustino Mascardo ornamentum, ac decus, vetus apud Ligures pro-
 sapia, ex qua ortus est, attulit: sed longe illi majus no-
 men atque splendorem, ingenii claritas & nobilitas pe-
 perit, qua non eam modo Ligustici maris oram, unde
 prodiit, sed Italiam, Romam, atque adeo sæculum no-
 strum nova luce complevit. Fuit egregie ad huma-
 niores literas natus atque etiam factus a natura; ad quas,
 statim a puero, suum omne studium, industriam, atque
 operam contulit, in eisque perfectus evasit. Neque ta-
 men alias graviore disciplinas non attigit, sed, quamdiu
 in Societate Jesu vixit, iis pectus explevit, ab eisque
 magnam sibi, ad dicendi copiam, suppellectilem compa-
 ravit: quo fit, ut ejus scripta non magis verborum quam
 rerum numero abundare videantur. Verum omnium
 in se oculos Hetrusci sermonis in primis novitate con-
 vertit, qui sermo ita ejus est proprius, ut, quemadmodum
 a Marco Tullio Tullianum, a Salustio Salustianum, di-
 cendi genus est ortum, ita etiam a peculiari ipsius di-
 cendi scribendique ratione, novum genus, Mascardio
 nomine, deducatur. Etenim in ejus orationem omnes
 virtutes conveniunt, quæ cadere in summam ac per-
 fectam eloquentiam possunt: est enim translatis fre-
 quens, sententiis celebris, verborum luminibus splendi-
 da, compositione suavis, majestate sublimis, sine arro-
 gantia gravis, sine vanitatis suspitione, elata, sine cin-
 cinnis, fugoque puerili, ornata atque composita. Hoc
 igitur, tot tantisque laudibus referto, orationis genere,
 doctissimos in Tabulam Cebetis commentarios edidit;
 orationes, sermonesque scripsit, quæ omnia unico vo-
 lumine comprehensa continentur; composuit librum de
 arte historica, ea eruditione ac rerum maximarum co-
 pia ac varietate completum redundantemque, ut omnes
 superiores, qui in hoc genere elaborarunt, superasse cen-
 seatur. Aloysii vero Flisci conjuratio, simul ut aspecta,
 eo clamore & plausu excepta est, ut statim in Gallicum
 Hispanicumque sermonem conversa, ad exterarum nationes
 com-

commearit, quo videlicet ii, qui nulla nobiscum lingue ejusdem societate continentur, in tam eruditi operis communionem partemque veniret. Atque utinam, sicut ingenii forma in ejus scriptis elucet, ita etiam actionis ejusdem dignitas exprimi potuisset: nihil profectio esset, quod majores sui amores excitaret; tantum in ea præstabat. Ita enim eam, motu corporis, gestu, vultu, vocis moderatione, ac varietate moderabatur, ut a Roscii vel Æsopi schola, non ab eorum disciplina profectus videretur, qui omnia, non tam agere, quam canere consueverunt. Quibus laudibus ita Urbano VIII Pont. Max. in probandis hominum ingeniis moroso atque difficili, satis fecit, ut inter cubicularios honorarios eum semper habuerit, atque annuo quingentorum aureorum stipendio donaverit, ut in gymnasio Rom. rectum illud ad eloquentiam iter, in quo ipse tanta cum laude versatus esset, aperiret. Atque utinam secundiore prudentiæ ac sanctitatis fama fuisset, nec in hac parte vitæ, ut fama est, claudicasset; profecto ad egregias ejus virtutes hæc quoque præstantissimā omnium laus accessisset. Sed homo in re familiari negligens, profusus, nulla pecuniz accessione suppeditare suis sumptibus poterat; in suis nummis nunquam, in xre alieno semper; &, quod miseris magis, nunquam certis ac conductis ædibus habitavit, sed incertis atque precariis. Postremo tabe confectus, sua in patria non ita longum vitæ suæ cursum confecit.

IO. ANTONIVS BOVIVS.

Sanctissimum amicitie vinculum, quo nullum in terris arctius inveniri potest, tunc inexplicabili nodo connectitur, cum illud non ambitio, non cupiditas, non quæstus, sed virtutis amor adstrinxit. Nullum enim gluten ad amicitias conglutinandas tenacius existit, quam eorundem voluntas societasque studiorum. Nihil est enim virtute pulcrius, nihil amabilius, nihil quod magis ad conjungendos animos valeat. Hæc autem cum in F. Io. Antonio Bovio, Carmelita, admirabilis existeret; ita Aloysii Card. Capponi ad se animum rapuit, ut

co amicitiz nexu se illi implicaret, quem, nisi mors, nemo dirimeret. Verum quantz in Jo. Antonio literz, quanta vis doctrinz, quanta disciplinarum omnium notitia inesset, ut cetera alia argumenta desiderarentur, illud solum, hæc prope infinita in eo extitisse, convinceret, quod in tanta doctorum hominum copia, atque ad omnium doctrinarum gloriam efflorescentium, Romæ præsertim, Card. Capponus, quem diximus, acerrimo vir iudicio, singulari prudentia, admirabili ingenio, & incredibili naturæ indole ad liberalissimarum artium studia propensus eum potissimum elegerit, ut ipso duce atque magistro ad ipsos Philosophiæ & Theologiæ fontes, quorum antea rivulos sectatus fuerat, perveniret, ibique discendi sitim, qua erat incensus, expleret: nec iis fontibus inventis, ab ejus consuetudine divelli, quoad vixit, potuit; tanquam si illa scientiarum flumina, non a magistris atque inventoribus earum, sed ab illius pectore, tanquam a capite fluere, ac proinde metueret, ne ab illo divulsus, neque doctissimis illius sermonibus irrigatus, quidquid in ipso facultatis esset, arefceret. Quo sapientissimi viri de ejus virtute iudicio magis quam aliqua alia doctrinz fama, clarus existit. Quantum autem illi Paulus V. tribueret, quantumque in ejus ingenii viribus, Christianæ Reip. præsidii constitutum esse arbitraretur, in dubiis illis ac difficillimis sedis Apostolicæ temporibus declaravit; cum videlicet a sceleratis hominibus, libris editis tanquam mucronibus Ecclesiasticæ libertatis auctoritatisque jugulum peteretur; cumque ab iis, qui quasi tutores fideles ac boni esse deberent, tanquam a nefariis prædonibus, ejus diriperetur patrimonium dignitatis. Nam cum propugnatores acres ac fortes multi non deessent, eo in primis defensore usus est, atque unum præsertim ex omnibus elegit, quem contra adversariorum conatus opponeret, quemque in armatas illorum acies immitteret, qui fortiter eorum tela exciperet, repelleret, retunderet. Neque tantam de se Pontificis spem & opinionem sefellit. Etenim duobus libris, magno studio magnoque labore confectis, tanquam armis instructus, singulare cum illo certamen inivit, qui eorum, qui Pontificiam auctorita-

tem

tem oppugnabant, infanz, non se comitem adjunxerat, sed ducem prębuerat, quique eorum, qui magno incendio excitato, cuncta delere cupiebant, tanquam faces prętulerat. Sed paulo ante, singulare fuz doctrinę specimen ediderat; tum nimirum, cum grave de divinę gratię auxiliũ, Dominicanos inter & Soc. Iesu patres, orta lis effet: nam cum Clementis VIII. voluntas propenso in Dominicanorum sententiam animo ferri videretur; magis quam quisquam alius, ejus properantis cursum retinuit, multisque rationibus inhibuit, ne pro Dominicanis sententiam diceret. Verum, tot inter doctrinarum radios, non minus probitatis ejusdem lumen enituit. Nam de Disciplina regulari librum, Hispanice compositum, in Italicum sermonem transtulit, summo animi dimissionis exemplo; quod cum in acri atque attenta rerum maximarum meditatione defixus haberet, ad hanc humilitatem descenderet, quo iis rem gratam faceret, qui arctioris vitę studio flagrarent. At tanta vis virtutis major erat, quam ut unius religiosę familię claustra tenerent: quocirca Paulus V. latiore illi campum, in quo excurrere posset, aperuit; hoc est, Molphetanz Ecclesię gubernacula tradidit; quę Card. Capponi, a cujus nutu pendebat, consilio & auctoritate accepit; atque in assidua ovium suarum vigilia manens, tanquam pastor bonus oecubuit.

BALDVS CATANEVS.

Baldus Cataneus, Aretinus, dignus plane fuit, qui Athenis, Socratis & Platonis ætate, nasceretur ac viveret. Nam Socratico pene more, adolescentes amabat, in quibus ingenii ac virtutis igniculi eniteret, eosque pręsertim, qui ad poesis Etruscę amorem ferrentur; eorum ille studia acrius inflammabat, & currentibus calcaria, ut dicitur, addebat. Erat ipse eleganti ingenio, & ad amœniora studia accommodato; in jaciendis vero ridiculis argutisque dictis ita prompto ac celeri, ut dictum, prius emissum, quam ut excogitari ab eo potuisset, intelligeres. Adolescens & juvenis, animi causa, & cum æqualibus suis, ingenuis ac liberis hominibus, in

agendis comædiis multum operæ posuit; ac bajuli Val-
lis Tellinæ partes fere illi semper demandabantur; quas
ita bajulis moribus, vultu, gestu, oratione imitandis
exquebatur, ut cachinnos spectantium commoveret:
accedebat, quod cum scapulis paulo extantibus ac pro-
minentibus esset, ad ferenda onera factus videbatur; &
quia testudinis formam referebant, festis Bacchanalibus,
cum per urbem personatus incederet, joci causâ inter-
rogatus a quodam, quanti testudo? crepitu magno
edito, vide, inquit, primum, num tibi placeat sonus.
Florebant tum temporis Romæ, ad poëticæ facultatis
laudem hi, atque una fere omnes ætate, Aurelius Vrsus,
Porphyrius Felicianus, eques, Alexander Guarnellus,
Antonius Ongarus, Nicolaus Angelius, Antonius De-
cius Hortinus, Christophorus Castellettus, atque idem
Baldu, qui arcto amicitiz vinculo inter se constrikti,
mutuam in suis negociis sibi invicem operam dabant.
Sed Baldo cum Christophoro Castelletto magis res er-
rat, quo cum, Bacchanalibus una cum opifice quodam
gladiatorum, humili quidem genere sed ingenio alto ge-
nerosoque, Stoppino cognomine, qui hominis Galli,
Gallico accentu male Italice loquentis, ad risum moven-
dum, partes agebat, personatus, ad fidium cantum ele-
gantes mulierum formas extemporariis versibus lauda-
bat. Sed cum ætatis calor defuerisset, omisissis nugis,
sacris initiatus est, & a Sixto V, Alexandro Card. Mon-
talto, neptis suæ filio, magister datus; a quo brevi, pin-
gui sacerdotio, in Basilica a Damaso Pont. D. Laurentio
dicata, locupletatus est. Habuit atque edidit Latini
Vrsini, celebris copiarum ducis, & Sixti V funebres
laudationes Latinas, & alteram ad Cardinales oratio-
nem, cum Urbano VII mortuo, novi Pont. eligendi
causa conclave ingrederentur. Inchoaverat Etrusco
carmine Argonauticam, ac se Torquatum Tassum car-
minis maiestate elegantiaque superaturum esse jactabat:
sed tam elegans poëma, quoniam non facile se labori
tradebat, morte interceptus, non potuit absolvere.

LATINVS DONIVS.

Latinus Donius, Romæ natus, sed ex Æmilia oriundus, aliquem, nec postremum in poëtis nostri sæculi locum ac numerum tenuit. Multa edidit, tum Latinis tum Etruscis versibus scripta pure, dilucide, docte eleganterque, nullisque sententiarum ineptiis claudicantia; quæ dispersa ac dissipata, vix inveniuntur: quod si, aruici vel eruditi cujuscumque opera, collecta, & in unum volumen illigata conspicerentur, unita atque composita quam sejuncta atque disjuncta validius atque robustius temporis injuriis obisterent, & longius in ævum, nominis illius famam propagarent. Verum majore, dum vixit, in admiratione & laude fuisset, si vita, si mores, si deformitas denique, non omnem commendationem ingenii evertisset. Etenim in pusillulum, turpiculum, distortulum illud corpus (nam erat insigni gibbo deformis) multas natura virtutes, vitiis admixtas, tanquam in enorme maleque tornatum vasculum infuderat. Ac bene cum eo actum fuisset, si non a vitiis virtutes superatæ discessissent. Fuit enim procax, obscænus; ac turpibus versiculis crebro scribendis divulgandisque, mores suos fateri videbatur; præterea dicax, argutus, mordax, nec in verbis tantum, verum etiam in scriptis. Sed dicacitatis suæ poenâ dedit: nam cum vir probus ex clara Religiosorum hominum familia ab eo, quem domi, cui ipse præerat, finibus, ob suspicionem, quod cujusdam pudicitiam tentaret, quantum posset, arceret, insigniter vulneratus fuisset in facie; tantum miseri hominis calamitatem libellis, domi ejusdem parietis affixis, est conatus illudere: quamobrem, hoc crimine comprehensus, in vincula ductus est, atque diuturni carceris squalore ac tenebris maceratus, vix ultimi supplicii poenam evasis; itaque custodia dimissus, dedit operam, ut in aliquem cucullatorum ordinem exciperetur, ex iis, qui in victu, vestitu, ac ceteris in rebus, largius liberaliusque se tractant: sed ab omnibus, quamvis egregius, ob insignem corporis turpitudinem exclusus est ac rejectus. Sed cum in ea calamitate, qua fuerat perfunctus, facultatibus

fere omnibus profusis, incertis sedibus vagaretur, ob ingenii præstantiam non tenui stipendio conductæ est ejus opera ad scribendas epistolas; ab Honuphrio Sanctæ crucis V.C. qui per eos dies celebrem domi suæ eruditorum hominum Academiam instituerat, eumque semper ad manum habuit: infelicibus sane auspiciis: nam eo, sive sua voluntate, sive coactò, arcana Domini sui providente, magna tanto incendio, quo ille miser conflavit, alimenta suppeditavisse narratur. Sed rursus vagum, ac suarum rerum incertum Janua excepit, perspectoque hominis ingenio, in honore habuit; & fato functum magnifico funere, corona, ex duabus virgulis lauri facta redimitum, qui honor poëtis deberi existimatur, extulit.

ALEXANDER GVARNELLVS.

IN hoc rursus manifeste apparet, Romani generis hominibus neque oratorium neque poëticum ingenium deesse, ab eisque omnia summa expectari, si tanquam ager fertilis, studio & exercitatione excolantur. Nam Alexander Guarnellus, a Duce Sabaudie, honorariz sanctorum Mauricii & Lazari militie insignibus decoratus, mirificam habuit, ad eloquentiam & ad poësim maxime, indolem; quod licet ex iis versibus intelligere, quos Etrusco sermone composuit; quibus ea inest elegantia cultusque, ut in suo genere proxime ad veterum Latinorum poëtarum laudem videantur accedere. Neque tam elegans hominis virtus Alexandrum Card. Farnesium, Pauli III Pont. Max. nepotem latuit; qui ejus semper in scribendis epistolis usus est opera; quod maximo omnibus argumento esse debet, quantum ille ingenii bonitate præstiterit. Etenim vir ille princeps, omnium ætatis suæ sapientissimus, qui in eo erat omni studio & cogitatione intentus, ut domi suæ delibatos ingeniorum flores haberet; munera illa, quæ industriz debentur, nunquam gratiz tribuit, neque propterea minus idoneos adhibebat, quod amicorum commendatione sibi traditi essent; sed semper optimos eligebat. Verum Alexander, cum aliquandiu prospera usus esset

valetudine, demum a calculis, in renibus abditis, urinæ meatibus interclusis, omnem ejus reddendæ facultatem amisit: quamobrem cum ejus salus a medicis conclamata esset, atque ipse, videns, prudens, sciensque ad interitum pergeret, non tradidit se angori ac desperationi, nèque quidquam nobili doctoque viro indignum edidit; sed incredibili magnitudine animi, suis ipse pedibus singulas amicorum ædes obivit, eisque omnia ea officia persolvit, quæ præstari consueverunt ab iis, quæ longum suscepturi sunt iter; tum Gregorii XIII pedibus advolutus, demisse humiliterque & intimo animi dolore, ex injuriis divinæ majestati illatis, concepto, plenam peccatorum suorum veniam sibi largiri poposcit. At Pontifex ea hominis constantia ac pietate commotus, non tenuisse lacrimas dicitur, eique humanissimis verbis animum explevit: nec mora, domum reversus, hilari ac imperturbato vultu, eo concessit, quo naturæ eum necessitas vocabat, & in Æde S. Spiritus in Saxia situs est, in sepulcro ab Octavio filio eleganter exstructo.

ALEXANDER BURGIVS.

Alexander Burgius, Modiliani, Anneliz oppido, natus est; ubi etiam insigne sacerdotium, Prioris auctoritate ac nomine obtinuit, unde vulgo, suppresso nomine & cognomine, Prior Modiliani nuncupabatur. Magnum, inter literatos sui temporis, docti eruditique viri nomen obtinuit; nec injuria: nam egregie omnibus liberalibus disciplinis instructus, tum Græce Latineque doctus fuit: præterea memoria tanta, ut quoties inter eruditos, quibus cum fere quotidie a prandio, rheda vectus, animi causa per urbem circumferebatur, ortus esset sermo de literis, omnia ex ea, quibus propositæ quæstioni satisfaceret, tanquam ex promptuaria cella, sine ulla mora depromeret. Id unum illi vitium objiciebatur, quod nimis eruditi famam affecaret: nam obvios in via amicos, sententia aliqua, aut verbis ex Ciceronis Epistolis desumptis, salvere jubebat: unde apud eos, qui cum non nossent, prædagogi

speciem non poterat effugere. Sed duo in primis magnam illi apud omnes existimationem & decus peperere: primum vitæ dignitas, & inveterata, sive potius præjudicata, de ejus probitate opinio, quod videlicet ita ab ineunte ætate rectum ad virtutem iter tenuisset, ut ulla unquam in re ab religione officii non declinasset: quamobrem magna danda est opera adolescentibus, ut virtutibus persequendis, contrariisque vitiis fugiendis, probi viri famam sibi tueantur ac firment: nam meminerint, ejus, in quo tum peccarint, æternam in eis, vel certe diuturnam, valituram opinionem improbitatis. Deinde multum illi ad probi doctique viri famam contulit perpetuus cum Gabriele Cardinali Palazotto usus consuetudoque; ea enim erat hominis claritas, tantus virtutum omnium splendor ac dignitas, ut nihil cuiquam ad existimationem honestius posset accidere, quam sciri, aliquam sibi cum eo amicitie necessitudinem intercedere. At Cardinalis, in illis doctissimis libris, quos edidit, Alexandri opera usus est utili, ejusque existimantis arbitrio cuncta, quæ scripserat, subiciebat. Sed a Cardinalis eum domo, ubi pene altus educatusque fuerat, non autem ab amicitia, distraxit atque sejunxit collegii Cardinalium a secretis munus, Antonii Quærengi ab Vrbe discessu, ipsi delatum. Nefas enim habetur, eum qui tali præditus sit honore, in cujusquam Cardinalis familia censeri. Verum ejus virtus, paulo editiore in loco posita, clarius cæpit elucescere; adeo ut majori provincia digna haberetur. Quamobrem a Petro Cardinali Aldobrandino, Clementis VIII fratris filio, quem penes totius Reip. summa tum erat, ad graviora negotia adhiberi cæptus est; tanta cum illius approbatione, ut multorum in se invidiam commoverit: erat enim omnium opinio, quoniam tantum apud illum auctoritate & gratia valeret, processurum eum esse honoribus longius; eoque magis, quod in pontificia Biturgæ, seu ut nunc vocant S. Sepulcri, cathedra collocatus fuerat. Sed nova initæ ab eodem cum viro quodam principe amicitie suspicio, in curriculo honorum versantem evertit. Nam tum primum mos ille inolevit, ut qui in alterius vel Cardinalis vel viri principis

amici-

amicitiæ suspicionem incidisset, continuo honoribus indignus haberetur. Itaque, quoad vixit Clemens VIII, a negociis aulæ feriatuſ, in Magni Etruriæ Ducis clientela quievit. Eo mortuo, a Leone XI, qui illi in Pontificatu Max. ſucceſſerat, datus eſt Octaviano Mediceo, fratris ipſius filio, vitæ morumque moderator ac magiſter: ſed provinciam tam duram, quam ceperat, non licuit illi diutius adminiſtrare. Nam ille immortalitate dignus Pontifex morte extinctuſ præpropera eſt, vix diebus viginti, & duobuſ poſt eum diem, quo in illud faſtigium pervenerat. Eoque vita functo, luculentam ad Cardinales habuit, de novo Pont. eligendo, orationem. Sed rorſuſ Paulo V. Pont. interruptum honorum curriculum viſuſ eſt repetere: ſed quem illi curſum olim Principum amicitiaſ interruperant, demum perpetuæ, mortis cum hominum genere, inimicitiaſ intercluſerunt. Calculuſ, urinaſ meatibuſ obiectuſ, mortis cauſam attulit: ac ſepultuſ eſt in Baſilica Conſtantiniana, Chriſto Salvatori in honorem B. Ioanniſ dicatæ; ubi ille Scipioniſ Cardinaliſ Burghieſii, ejuſdem Baſilicæ Archipreſbyteri, vicariaſ parteſ gerebat, annuſ natuſ treſ ſupra ſexaginta.

PAVLVS GVIDOTTVS BURGHESIVS.

IN omnibuſ iis artibuſ, quæ, quoniam ingenii non corporiſ viribuſ conſtant, liberalium nomine nuncupantur, treſ in primis ſe efferunt, Pictura, Statuaria, & literarum ſtudia, præſertim ea, quæ ab humanitate ſibi nomen aſciverunt. Et qui laudiſ gloriæque cupiduſ ingenii monumentiſ nomen ſuum proferre conatuſ eſt longiuſ, quam vitæ termini poſtulabant; ad earum aliquam animum appulit. At qui peræque in omnibuſ elaborarint, vix paucoſ poſſumuſ ex omnium ſæculorum memoria producere. Sed noſtra ætate unum vidimuſ, Paulo Burghieſio nomine, qui ſingula magnitudine animi tria illa complexuſ eſt, quorum aliquod ſe fuiſſe aggreſſoſ, ſatiſ ſibi alii ad immortalitatem nominis fore exiſtimarunt. At fortæſſe id, quod voluit, aſſe-

cutus non est, ut nimirum in omnibus illis excelleret; verum id conatum fuisse eum, magna ponendum in laude videtur; quamquam non minimam in eis laudem meruerit: nam in pictura, quamvis manus, quo eam ars dirigebat, sæpe non perveniret, attamen non longius aberrasse existimabatur: in fingendi vero arte, multis uno ex lapide inter se complicatis colligatisque signis ac figillis conficiendis, statuarius propemodum singularis est habitus: quorum operum pulcritudo, multorum studia cupiditatesque commovit. At quanto secisset melius, quanto rebus suis rectius consulisset, si ea opera suis precii vendere statuisset, nec ambitione lapsus, nimis cupide optasset, in potentiorum familiz nomen adoptari, nec inania militiz nescio cujus insignia, nec trimestrem in urbe consularem dignitatem, fere nomen sine re, tanta mercede coemisset! profecto ætate confectus, non habuisset necesse, fere quotidie, latibula mutando, creditorum manibus se fuga subducere. Sed homo, inanis gloriolæ honorisque præter æquum studiosus, anteposuit umbram rei, damnum utilitati, iacturam lucro. Quod vero ad poësim attinet, nemo inficias ibit, doctrinam illi atque artem, non naturam & celeritatem ad faciendos versus defuisse; qui ejus ab ingenio, tanquam a fonte flumina, uberi vena fluebant. Pene innumera scripsit, quæ non tam re quam proposito ac voluntate laudantur. In eo autem excelsum suum animum, ac promerendæ, æternæ nominis sui, famæ cupidum, significavit, quod tantum animi habuit ad audaciam, ut immortalis, neque omnium eruditorum præconio satis unquam laudato, Torquati Tassii poëmati, aliud a se factum opponere non dubitaverit. Nam quemadmodum ille Ierosolymam, ex hostium Christiani nominis servitute ereptam, & in libertatem vindicatam cecinit, ita enim hic eandem funditus dirutam, quoquomodo potuit, explicavit; & quod incredibile dictu videatur, totidem plane versibus, eodem metro rhythmoque conservato: vel hoc solo dignus, qui in poëtarum numerum veniat, ejusque nobilis audacia, posteritatis memoriz commendetur. Sed ne longum faciam, tot virtutum copia dives, pene in summa rerum omnium inopia, ani-

animam senex efflavit; & quod ridiculum est, cum identidem jactaret, se quatuordecim esse artibus præditum, quarum ex singulis panem aliaque ad vitæ usum necessaria posset expromere; quas inter artes ea etiam fortasse numerabatur, qua se rationem alteri, qua volaret, ostensurum pollicebatur: sed fames, qua propemodum eneectus est, nullum se ab illis auxilium tulisse ostendit.

MARCELLVS MARCHESIUS.

Marcellus Marchesius, ex Caroli Card. Borromæi, qui postea in Sanctorum numerum relatus est, disciplina prodiit. Sed parum ex ea hominis longe sanctissimi indole hausit. Nam fuit dicax, atque ita ad maledicendum pronus, ut ab omnibus metueretur; ab iis præsertim, qui ambitionis labore districti, ad honores dignitatesque contenderent; quibus maledici cujuspian criminatio atque calumniæ sæpe plurimum solet obesse: itaque, cum ad primatem aliquem venerat, prius quam ceteris, quamvis honore ac dignitate superioribus, omnes illi ad eum aditus patebant. Sed ubi Romanam venit, ex sponsonibus, (de quibus in Cardinali Alano diximus) quæ olim de Comitibus Cardinalium fiebant, & postea edicto sublatæ sunt, ad maximas pecunias pervenit. Sed quoniam vir erat catus ac prudens, ac bene totam Remp. noverat, in consilio de ea dando, ab Innocentio IX ad eorum numerum adscriptus est, quo intimos consiliis suis habebat, quorumque auctoritate Pontificatum Max. administrare constituerat: nam quamvis in reliquis virtutibus, multos fortasse superiores haberet, in hac tamen fidelitatis laude, nemini inferior inveniebatur. Verum cum Clementi VIII, qui Innocentio successerat, minus gratus esset, neque ab eo impetrare posset, ut Episcopatus cujuspian honore, cujus ingens eum cupiditas incefferat, exornaretur, in Germaniam ad Rudolphum imperatorem abiit, ab eoque, cum suis se ad eum artibus insinuasset, Pontificiam Signi civitatis in Illyrico sedem obtinuit; atque a tribus summis viris, a Cardinali videlicet Dietrichstainio, a sedis Apostolicæ Nuncio, & a Pragensi Epi-

sco.

scopo, Pragæ pontificalibus sacris initiatus est: cui etiam Imperatori præstantissimum illum librum, de Turcis bello superandis delendisque, a se Italice scriptum, artis, doctrinæ, prudentiæque plenissimum dedicavit. Atque me audiente gloriabatur, se Clemente VIII ac Card. Aldobrandino, fratris ejus filio, minime desiderantibus, ad dignitatem illam pervenisse. At hanc illi lætitiâ diuturnam esse non licuit: nam cum Signium iter faceret, in Turcarum potestatem venit, & quo se redimeret captum, fuit illi necesse totum illud argentum evomere, quod ex felici sponsonum eventu acceptum devoraverat. Ergo tanta pecunia everius, se rursus Romam recepit; ubi Episcopalem dignitatem, prout pauperis Episcopi opes ferebant, sustentabat. Illud vero ridiculum accidit, paucis, antequam e vita discederet, annis, quod cum die quodam trans Tyberim properaret, dum lintre Tyberim trajicit, quæsitivus a lintrario, numquidnam novi? ita, inquit ille; etenim, proxima superiore nocte, e turri campanaria Ædis D. Petri in Ianiculo, a nebulonibus tribus campanæ omnes sublatae sunt furto, & longe gentium delatae; quamobrem boni illi Franciscani Fratres in magno sunt luctu atque mœrore: statim ille hominis dicto fidem adhibuit, nihilque ipsi visum est longius, quam dum e lintre in fluminis ripam egressus curriculo, ad Fratres illos tenderet; evocatoque custode, cœpit illi amicissimis verbis consolari dolorem, quam ex campanarum infortunio, quo proxima nocte a tribus illis furibus mactatus fuerat, accepisset; ac debere eum, ajebat, incommodum illud æquo animo perpeti; nam fore, ut Deus, cujus ille providentia præ ceteris hominibus una cum suis Fratribus contineretur, damnum illud longe majori bonorum accessione sarciret, & surreptarum loco, majores ipsi campanas, ac præstantiori aëris temperatione confectas, substitueret: tum custos, Ludisne, inquit, nos? an tu ab aliis ludificaris? potuitne paucis noctis unius horis tanta campanarum moles surripi, e turri deponi, ac longe gentium avehi, ad quam loco movendam multis operis multisque opus est vectibus? At ita rem esse, mihi lintrarius dixit. At tu, inquit custos, tibi data esse verba

scias;

scias; nam est homo ille oppido facetus acridiculus, ac totus in eo est, ut quos vehit, hisce mendaciunculis, vel deliciis potius, in errorem inducat. Tum vero ille, supra quam dici potest, elatus est stomacho & iracundia; nec poterat ferre, se hominem senem, catum, doctum, sapientem, habitum fuisse ludibrior a sycophanta nequissimo, improbissimoque, quem ne in hominum quidem numero duceret; nec continere se potuit, quin injuriam sibi factam, cum Prætoris urbis conquereretur. Sed quamvis perfecit, ut joculator ille in carcerem conderetur, tamen his querimoniis re, quæ ceteroqui, si quiesceret, in silentio jacuisset, patefacta, illud affecutus est, ut multos dies per Urbem solus, sermo omnibus fieret. Ac paucos post eum ludum annos, lethali (defluente ad pulmones pituita) tabe confectus interiit.

NICOLAUS ALAMANNUS.

Nicolaus Alamannus, Græcis parentibus natus, a puero in collegium suæ nationis exceptus est; quod Gregorius XIII. pro sua patria in Christianos omnes caritate, in transmarinis regionibus naufragæ Catholicæ fidei, tanquam portum constituerat. Vbi a magistris Græcis & Latinis, optimis disciplinis eruditus, ingenii cum probitate conjuncti laude floruit. Dedit etiam cum aliis sociis, de more, militiæ Ecclesiasticæ nomen: & quoniam fortasse habebat in animo, in Græciam navigare, ibique vitæ suæ domicilium constituere, a Græco Episcopo in subdiaconorum ordinem ac numerum adscribi voluit: sed posteaquam a Latinis oris, opulentior illi spes effulgere visa est, ad id, unde secundus rebus suis status ostendebatur, vela dedit, & ad Latinorum castra transiit; ab eisque, reliquis sacris ordinibus initiatus est. Verum, confecto studiorum curriculo, cum esset in re tenui, & ad reliquum vitæ suæ statum constituendum, opes & amicitias sibi necessarias esse intelligeret, cepit honestos aliquot viros, generis vel honoris cujuscumque splendore conspicuos, Græcas literas docere, Deoque propitio ad Scipionis Cæciliæ amicitiam se contulit, qui tunc temporis Paulo V
a bre-

a brevibus erat, Græcæque Linguae addiscendæ studio flagrabat. Quæ res maximum illi aditum ad id munus aperuit, quo functus est postea. Nam cum aliquis quæreretur, qui Scipioni Card. Burghesio in scribendis Latinis Epistolis operam daret, ejusque perquirendi provincia, a Lanfranco Margorio Cardinali, Cobellutio demandata esset, ille, veteribus suis amicis, æque ad id munus aptis, prætermisissis, Alamannum elegit; qui quoniam, quod in scholis didicerat, nunquam ad usum contulerat, neque in verborum ac sententiarum gravitate in scribendo, neque ejus, qui scribebat, neque eorum, ad quos scribebatur, honoris ac dignitatis gradum conservabat, minus ad id munus idoneus habebatur. ac sæpe auditus est queri Lanfrancus, quod ille, in epistolis, Latinis verbis Græca misceret, quo nihil fieri potuit inceptius. Sed non ita multo post accidit, ut Balthasare Ansideo mortuo, cui Bibliothecæ Vaticanæ custodia demandata fuerat, novus custos esset deligendus, neque tum quisquam ad rem aliquam, in qua aut honos aliquis esset aut potestas aut procuratio, nisi ex Card. Burghesii domo, sumeretur; nemo visus est in tota familia eo honore dignior Alemanno; nec injuria: nam propter egregiam excellentemque Græcarum Latinarumque rerum cognitionem, jure omnes id illi munus deberi fatebantur. Et sane ea in illo eruditio erat, quæ desideratur in eo, qui tot libris Græcis Latinisque evolvendis, notandis, curandisque præficitur. Neque homo studiosus, in tanta librorum omnium copia, sibi defuit, sed historiam sane doctam Procopii, & de parietinis Lateranensibus duos eruditissimos libros, in vulgus emisit. Iam vero, qui omnem suam operam & studium ad Vaticanæ sedis utilitatem decusque contulerat, honestum sibi & gloriosum esse duxit, animam, quæ semel Deo reddenda est, in Apostolorum principis ejusdemque religiosissimæ Ædis obsequio profundere. Cum enim ejus templi ara maxima, æneis columnis, ingenti magnitudine summoque artificio elaboratis, ad umbellam eidem impositam sustinendam exornanda esset, quo paria tanto oneri fundamenta jacerentur, necesse fuerat, alte circa aram terram effodere; cui operæ ille custos est additus,

ut videlicet daret operam, ne quis sacrilegus, vel quisquam alius, nimis curiose religiosus, quidquam ex illa humo, tot Martyrum cruore imbuta, sacrisque eorundem ossibus admista surriperet: sed cum illi muneri diligentius, quam ejus salutis ratio pateretur, incumberet, neque totos dies se loco moveret; accidit, ut vaporibus, qui ex commota illa humo exhalabant, toto corpore conceptis, lethalem in tabem incurreret, ex eaque brevi moreretur.

LANFRANCUS MARGOTIVS.

Lanfrancus Margotius, magis ex sese quam ex majoribus suis cognitus, sine multis literis, in scribendis epistolis longe, doctissimorum hominum industrix anteivit. Etenim rem, de qua scribendum esset, videbat acute, explicabat dilucide, sententias adhibebat illustres, quæque non tam haberent venustatem, quam dignitatem ac pondus: verba erant, non illa quidem elegantissimo sermone, sed quæ rem maxime explicarent. Omnia scribendi genera noverat; eoque utebatur, quod cum ejus, qui scriberet, eorumque, ad quos scribebatur, personis congrueret. Ne multa; nulla in eo virtus considerabatur, illi necessaria, cui arcana summorum Principum negocia, per literas, tractanda mandantur; ut verum in eo apparuerit, quod dicitur, sæpius ad laudem atque virtutem, naturam sine doctrina, quam sine natura valuisse doctrinam. Magno fuit animo, ac pecuniarum superiori; tum etiam, cum una cum summis viris, genere, divitiis, ac dignitate præstantibus, ad aliquam animi remissionem ludumque descenderet: adeo ut ceteris largius sumptus faceret, eosdemque liberalius atque animosius provocaret in aleam. Quod, quamquam non sit magnopere per se laudandum, ejus tamen magnitudinem animi indicabat, perficiebatque, ut illi, quibus cum una erat, quamvis nobilissimi, præ eo, humili, abjecto, contemptoque orti loco, ipse longa cognatione stirpis cuiuspiam regis annexus videretur. Duobus summis Pont. Clementi VIII, & Paulo V, in scribendis epistolis egregiam navavit operam atque fidelem; ob quam, præsertim
a Paulo

a Paulo V, in amplissimum Cardinalium ordinem est cooptatus, summumque in ejus gratia tenuit locum; ac tum multo magis, cum ejus, qui illi obtrectabat, invidia atque malignitas facta est palam. Sed mortis celebritas, ne tanto Pontificis beneficio, ejusdemque egregia in se voluntate, diutius frueretur, obstitit. Nam paucis post annis, an mensibus? a lethali pustula, in dextero, ut ajunt, brachio oborta, penè subitum est ad interitum datus; neque quidquam moriens de solita magnitudine animi amisit. Nam rogatus a Pont. qui, ut eum in tam gravi casu consolaretur, adierat, nunquidnam vellet? nihil, inquit ille, nisi præteritæ mihi vitæ noxas, auctoritate tibi divinitus concessa, dimitti. Obiit, insigni epistolarum volumine edito.

IACOBVS MARCHISETTVS.

Sex fundamentis ædificii cujuspiam, in infinitam pene altitudinem jactis, ac si de ingenti ejusdem, jam e terra excitati, aditu vestibuloque existimare de magnitudine operis licet; ea in Iacobo Marchisetto Pisaurensi, a natura tanquam fundamentum aliquod posita ad sapientiam indoles reperietur, eaque in eo jam surgentis ac crescentis in immensum sapientiæ documenta deprehendentur, ut quivis vir prudens facile posset judicare, unum e summis viris evalurum illum, vel talem potius futurum, cujus similem vix ulla præteritorum sæculorum ætas tulisset. Nunquam fuit ille ingenio puer, sed statim a principio senex; ea, in arripiendis quæ a magistro monstrabantur, celeritate, ut eorum industriz præcurreret; tam incredibilis in eisdem retinendis memoria, quod præsertim singularis in puero ingenii signum habetur, ut esset omnibus miraculo; eloquentia vero tanta se in eo fundebat, quanta vix in iis reperiretur, qui in ea comparanda totum vitæ suæ cursum collocassent, judicii acumen ita magnum se extulit, ut orationes, quas puerulus scriptitavit, seniores, non modo, quam illi pueriles anni, sed etiam, quam longe grandior ac maturior ætas postulare, viderentur; nec cuiquam dubium esse debet, fuisse eas ab illo sine cujusquam ope compositas.

Tre-

Tredecim natus annos, Philosophiam Aristotelis, ad quam addiscendam vix unius ætas hominis satis esse potest, ita complexus est totam, ut in arenam descendere, seque Aristotelis doctrinæ propugnatorem acerrimum declarare, omnesque, qui contra sentirent, in certamen provocare sit ausus. Illud vero omnem propemodum fidem excedit, quodque ego, nisi oculis accepissem meis, narranti non crederem, quod biennio post, volumen positionum, duobus fere millibus theologicarum assertionum refertum, edidit, seseque omnium, qui oppugnare eas vellent, argumentationum tanquam tela per triduum fortiter excepturum ac propulsaturum edixit, ac certaminis locum, gymnasii Romani, Societatis Iesu, aulam elegit; qui honos contigit ante ipsum nemini, ut jure gloriatur in epistola, quam ad Evangelistam Pallottam Cardinalem scripsit; qui tum apud Sixtum V plurimum auctoritate & gratia pollebat, puerique ingenium, quod sibi monstri simile videretur, tuendum ornandumque susceperat. Verum tot tantisque initiis non satis visi sunt exitus respondere: expectabantur enim ab eo immensa, infinita, ac supra humani vires ingenii; sed tanquam si natura desperaret, posse se operi, quod inchoaverat, par fastigium & culmen imponere, hominem prope deseruit. Ut verum illud apparuerit, quod a viro sapientissimo traditur, non posse in eo esse succum diuturnum, quod nimis celeriter est maturitatem assecutum. Neque tamen sui dissimilis inventus est postea. Nam Clemente VIII Pont. a Petro Card. Aldobrandino, fratris ejusdem filio, ob præstantis ingenii famam exceptus, laudabilem illi, in scribendis Latinis epistolis, aliisque muneribus administrandis, operam tribuit; multisque habitis orationibus collectam eloquentiæ famam conservavit, atque auxit: ductus est etiam a Card. in Galliam legationis nomine missus, ut ortum Regem inter ac Ducem Sabaudix periculosissimum bellum componeret; ubi cum ad Regem verba faceret, & sicut Homerus Agamemnonem, ita eum ille, Regem Regum appellaret, adeo Rex hoc titulo delectatus est, ut quingentos illi aureos muneri miserit; quos quia contra Cardinalis edictionem acceperat, qui omnibus suis

edixerat, nequid a Rege delatum acciperent, sed cuncta a sua liberalitate sperarent, in gravem apud illum offensionem incurrit; atque in Italiam reversus, lucis usuram diuturnam non habuit.

IO. BAPTISTA LALLIVS.

IO. Baptista Lallius Nursinus, simul ac natus, Musarum gremio exceptus est, & quasi in nutritu eorum eductus; quo non facile hac nostra ætate quem dixerim plura habuisse a natura ad possim adjumenta. Nam mentis viribus excitatus, & tanquam, ut Plato voluit, quodam afflatu quasi furoris impulsus, adversus faciendos se prope rapi sentiebat. Atque etiam tum adolescentulus D. Eustachii res gestas, Etrusco carmine, & octonis prosecutus est versibus; ac postea accitus Parmam ab avunculo, qui Ranucio Farnesio, Parmæ ac Placentiæ Duci, erat a consiliis, eodem Duce audiente, heroicum Latinum carmen recitavit, quo Alexandri illius patris mortem docto eleganterque desileverat; atque eatenus adolescentis ingenio delectatus Dux est, ut quamprimum eum Perusium, Juris civilis addiscendi gratia, mittendum, eidemque centenos singulis annis, quoad ibi esset, aureos persolvendos, magno regis liberalitatis exemplo, curaverit. Sed cum ibi a versibus faciendis se continere non posset, qui sponte & injussi fluebant, monitus est ab avunculo, qui metuebat, ne eorum amœnitate studiorum delinitus, a gravioribus disciplinis abstraheretur, admonitus est, inquam, ut si se atque iracundiam suam vereretur, ne quidquam posthac versibus scriberet. At quantos in illo quinquennali studiorum curriculo (nam totidem in eo versatus est annis) in jure civili ac Pontificio profectus fecerit, testimonio sunt tria illa volumina, quæ, non ita eleganti vulgarium Juris Consultorum sermone, Viridarii prædicabiliū materiæ in utroque jure, ordine alphabetico concinnati, titulo inscripsit; qui labor magno deinde illi usui fuit, cum videlicet, juris utriusque interpretandi facultate adepta, pluribus in oppidis juri dicundo operam dedit; quod munus, usque ad extre-

inum

nam vite spiritum, magna cum justitiæ laude exercuit. Quibus in oppidis, edito excelsoque loco fere omnibus positis, cum camporum amœnitates, nemorum viriditates, avium concentus, perlucidi decurrentium amnium liquores, dulces lenis auræ susurri, denique saxa ac solitudines, voci respondentēs, satis sua sponte ad canendum propenso, aeres quasi stimulos adderent; multa tum graviter tum jocose composuit: in Ierosolymorum excidium, Virgilii Bucolica, & Æneidos libri, Etrusco carmine, miro lepore ac venustate, facietis amœnisque sententiis, in ridiculum conversi; quo in genere scribendi, sale facietisque omnes sui ævi superavit. Ab anno ætatis suæ quadragesimo cœpit audiendi facultate carere, eoque processit, ut necesse haberet, parva tuba, ex argento facta, auribus admota, loquentium voces excipere. Sed tantæ jacturæ dolorem eo solatio lenibat, quod ex scribendis ad amicos facietis jocosisque epistolis, aliisque in hoc genere poëmatiis capiebat; quæ referremus, nisi ea essent in manibus, & ad alios illustres in literis viros, quorum adhuc non parvus superest numerus, in hunc librum referendos, festinaret oratio. Verum, qui maria, terras, cælumque, suo cantu mulcebat, nescio quo pacto, pessimo ingrati animi exemplo, tria hæc semel sibi iniqua & infesta perceperit. Nam piratis infestissimis stravere se maria placida atque pacata, qui ad eum in servitutem redigendum, ventis atque avibus citius advolarunt; terra autem passa est immanissimos sicarios sustinere, qui displois in eum selopis invaserunt; cælum vero, diro fulmine misso, eum pariter est delere conatum. Sed Phœbi & Musarum alumnum ceruleæ a maritimis prædonibus Nymphæ, atque ipsa e mari orta dulcium mater amorum, ereptum conservarunt, Dryades atque Napeæ, quæ toties ad cytharæ ejusdem cantum festivissimas choreas, immistæ Faunis, duxerant, contra adversariorum tela atque arma texerunt; Phœbæa denique laurus, quæ sibi tempora cinxerat, ab injuriis cælestibus vindicavit. At quem nec maria, nec tellus, nec cælum, potuerunt perdere, sæva demum apoplexia, semel atque iterum oppugnatum, quarto ac sexagesimo ætatis suæ anno in

sua patria oppressit; nec ab ejus inimica viservare eum potuit Apollo.

GEORGIUS CONÆVS.

Georgius Conæus Scotus, nobili genere natus est; nam in eo regno Conæa familia numeratur in primis: fuit elegantissimis literis Græcis & Latinis, omnique, digna homine nobili, doctrina eruditus; sed præsertim catholicæ Religionis studiosus, Romam venit Paulo V Pont. atque in aulam Cardinalis Montalti, tutissimum, fortunæ naufragio ejectis, portum, aditumque sibi apertum invenit; cui etiam Cardinali, ob castos integrosque mores, probatissimus extitit; sicut & vivus, multis ipse in rebus ostendit, & in morte sua declaravit, cum perinde in eum benignitatem suam derivaverit, ut in ceteros, quos eximios habebat. Aliquot annis post, Urbano VIII ad Pontificatum Max. evecto, in Francisci Card. Barberini domo locum invenit, suæ virtuti convenientem; quam ille domum, pro suo erga probos ac literatos viros studio ac voluntate, non minus patens ac tutum, afflictæ, probitatis doctrinæque fortunæ, perfugium constitutum esse voluerat; ejusque adventus eo Cardinali gratior fuit, quo illum incredibilis cupido invaserat, transalpinos homines, aliosque a catholica Religione abhorrentes, ad eandem traducendi; ad quam rem, opportunam atque fidelem ejus operam sibi futuram, nec falso opinabatur; quod ille, cum eorum aliquibus, linguæ ejusdem societate contineretur. Cum igitur eo interprete atque auctore aliquandiu esset usus, atque hominis in rebus agendis sedulitatem atque prudentiam admiratus; placuit eum in Angliam, ad Reginam illam, maximis de rebus, ad Religionem pertinentibus, mittere. Quod munus ita doctè sapienterque administravit, ut mire sibi Reginæ voluntatem ac studium adjunxerit, & summam ab Urbano VIII & Card. Barberino gratiam inierit: quamobrem cum re bene gesta Romam reverteretur, non tam ad Urbem accedere, quam ad purpuram, cujus erat cupientissimus, propere dicebatur; quam prædictionem famamque præpro-

pe-

pera mors inanem atque irritam reddidit; quam exta-
be, sive ex itineris labore, sive ex mala corporis consti-
tutione, sive ex sollicitudinum curarumque mole con-
cepta, contraxit. Cardinalem Franciscum Barberinum
hæredem instituit; qui amplissimum illi funus, in Ba-
silicâ, a Damaso Pont. in honorem martyris Laurentiî
Deo dicata, faciendum curavit. Non alia ingenii sui
monumenta reliquit, nisi Mariæ Reginæ Scotiæ, ab
Elisabetha Angliæ Regina supplicio affectæ, vitam, ele-
gantissime scriptam; de educatione Principum, cum
esset in aula Mutinensis Ducis honorarius ephebus; de
statu utriusque religionis in Scotia; & Catholicæ reli-
gionis demonstrationem.

PORPHYRIUS FELICIANVS.

Mltum sane Fulgineum Porphyrio Feliciano de-
bere est æquum, cum tantum, ab ejus claritate
ingenii ac nominis, splendoris ac dignitatis acceperit;
neque alio cive suo, hac nostra ætate, gloriosius magni-
ficentiusque se jactat. Romani cum aulæ, ferme ado-
lescentem, tradidit; ejus illa indolem non modo non
est aspernata, sed cupide amplexata, maximasque illi, qui
miserat, gratias habuit. Sed Cardinali Antonio Mariæ
Salviato in primis, simul aspecta & probata est; nam in
eo excipiendo, suamque in domum adducendo, ceteris
felicior fuit. Quam rem tantum in se ornamentorum
ac laudis continere statuo, ut si non alia plura ad eum
exornandum capita se aperirent, ab hoc uno magna vis
laudationis & copia, ad immortale illius decus, dedu-
ceretur. Quid enim illi honestius, quid laudabilius po-
terat accidere, quam Cardinali Salviato, qui esset cu-
riæ splendor, aulæ ornamentum, Christianæ Reip. lu-
men, qui ob singularem prudentiam, summam integri-
tatem, longum rerum maximarum usum, a summis vi-
ris metueretur, eisque tanquam frenum injiceretur, ne
quopiam vel cupiditate, vel indiligentia, vel incogitan-
tia compulsi excurrerent, quo, merito, in ejus reprehensionem vituperationemque possent incurrere? quid, in-
quam, poterat ejus laudibus majus accedere, quam tanto

viro ita probatum extitisse, ut continuo consilia sua crederet, negocia committeret, rerum omnium fidem haberet, scribendarum epistolarum munus demandaret? Quæ omnia ita scienter, ita prudenter, ac præsertim ita fideliter administravit, ut cum Cardinalem inter & ipsum, ut sit, offensuunculæ quædam intercessissent, & Cardinalis erga ipsum officium a se desiderari quæreretur, nulla conditione, nullo artificio, nulla maioris commodi spe oblata, adduci potuit, ut arcana illius proderet. Sed tanto divini illius hominis prudentiæ, probitatis, justitiæque lumine, acerbæ ac luctuosa bonis omnibus morte, extincto, cognita atque probata ejus opera, a multis expetita est, & ab aliquibus etiam obtenta; sed eam cunctis Paulus V eripuit, & arcanis Principum virorum epistolis legendis, ad easque respondendi provincie præfecit. Quo in munere, clarius quam in aliis, prudentiæ, integritatis, industriæque suæ documentum exhibuit. Sed tot ab eo perfuncti labores deposcebant, ut editiore collocatus in loco, Fulgineo, quod cum Romæ commodaverat, prædesse plurimum posset. Itaque, quem illud oppidum privatum dederat, pontificiis ornatum insignibus recepit; ut ibi in perpetua suorum civium custodia vigiliaque moreretur Episcopus. In scribendis epistolis, post Lanfrancum, vicit fere omnes, qui una essent ætate: in faciendis vero Etruscis poematibus paucos habuit pares; e quibus longe illa multumque ceteris præstant, quæ exacta jam ætate, selecta, & ad septuaginta numero, in unum codicem redacta, Roberto Cardinali Vbaldino dicavit; in quibus scribendis principem poetarum omnium, Franciscum Petrarcham, sibi magistrum elegerat.

DANIEL MALLONIUS.

Daniel Mallonius, Brixianus, Brixie religioso cucullatorum ordini S. Hieronymi se voto obstrinxit; atque inde Romam ad comparandas bonas artes missus, Philosophicas ac Theologicas disciplinas a magistris accepit; in quibus adeo perfectus evasit, ut nemo eo acrior neque pugnacior, in disputando, inveni-

retur. Sed tanta elegantia ac venustate, sicut olim Samnites hastas vibrabant, ita ille argumentorum tanquam tela mittebat, ut qui cum eo pugnabant, se ab eorum acuminibus compungi, jucundum ducerent; immo summo se beneficio affectos existimarent, si in literariam aliquam palæstram possent cum ipso descendere, manum conferere, ejusque eruditos inipetus excipere, ictusque perferre; ac Miranda, ex Dominicana familia theologus ea tempestate in primis, magnum quid se esse adeptum arbitrabatur, si potuisset aliquem ex discipulis suis, in Philosophicis ac Theologicis concertationibus, cum illo componere. At quam multæ fuerint in eo literæ non vulgares, non extrinsecus tanquam adpersæ, sed interiores & reconditæ, quanta in scribendo verborum & gravitas & elegantia, testis est locuples primus scholasticæ suæ bibliothecæ liber, ab eo editus, & in senatus Bononiensis nomine emissus, cum vix trigessimæ ætatis suæ annum attigisset, aliudque doctissimum, de Christi stigmatibus, sacræ sindoni impressus, volumen, ubi non ejus modo singularis eruditio, sed mira etiam pietas ac religio, se effert. Sed cum a summæ religionis sui ordinis Præfecto, cujus ille vicarias partes gerebat, accitus esset, ut alienissimo ab itineribus tempore, ætate nimirum media, maximisque caloribus, cœnobis sibi subjecta secum obiret, nec detrectasset imperium; lethalem in morbum prope Brixiam illapsus, & ab eodem oppressus, interiit.

HIERONYMVS MARTINVS NARNIENSIS.

Magnum, hac nostra ætate, in oratoribus illis qui de divinis rebus ad populum verba faciunt, eloquentis viri nomen obtinuit F. Hieronymus Narniensis cucullatus. Hic cum multis Italix in oppidis optimi concionatoris partes expleisset, cœptus est primo Romæ audiri, in Æde D. Mariz, in Vallicella, magno omnium generum atque ordinum concursu, ac tantum probatus, ut non ita multos post annos ad conciones, ad summos Pontifices eorumque senatum, aliisque aulæ

proceribus, habendas sit adhibitus. Omnia aderant in eo, quæ in perfecto oratore desiderantur; orniæ dignitas, oris decor, orationis elegans copia, verborum delectus, quæ non magis suaviter in aures influerent, quam cum pondere in animos caderent; vitæ probitas & integritas, sine qua omnia, quæ sunt in oratore bona, vilescunt; vitiorum incusatio & querela ita acris ac vehementis, ut iis, qui eisdem adhærescerent, cum nollent extrahi, gravis & molesta accideret: quamobrem ille, cum intelligeret aliquando, se operam perdere, & surdis, ut dicitur, fabulam canere, valetudinis excusatione, eo se munere abdicandi & in solitudinem aliquam abeundi potestatem sibi fieri postulavit: qua impetrata, totum se ad historiam sui ordinis scribendam contulit: sed rursus, ad eandem provinciam revocatus, cum, non minore libertate, in corruptos eorum mores, apud quos diceret, inveheretur; ita ab aliquibus audiebatur, ut qui delectationem ex eo quærere, non autem vitiorum, quibus laborabant, medicinam aliquam petere, aut oblatam accipere velle, fixum ac deliberatum haberent. Itaque in perpetuum, (præsertim infirmia valetudine cum esset,) ejus vacationem muneris obtinuit; ac tanto erat, apud suos omnesque, sanctitatis eloquentiæque honore ac nomine, ut mortuus magnificentiore, quam quicumque alius sui ordinis, elatus sit funere. Liber ejus concionum, simul ac diem obiit, statim impressus apparuit; cui nihil tam obfuit, quam expectatio, quæ de ejus ingenio & eloquentia habebatur; quæ efficiebat, ut omnia, quantumvis magna, minora expectatione viderentur. In quo etiam factum est palam, quanta in actione vis insit, & quam jure primas illi Demosthenes, secundas, & tertias dederit, cum ea deficiente oratio eadem alia esse existimetur.

FRANCISCVS TOLETVS.

Eorum, qui de rebus divinis, & ad æternam salutem pertinentibus, ad summos Pont. & amplissimum purpuratorum patrum confessum verba fecere, Francisco Toletio Hispano, e Soc. Jesu, omnium præstantium

tium iudicio virorum concessu, palma tribuitur. Nemo enim inventus est adhuc eo theatro dignior; nemo, qui aptius ad eorum, quibus cum illi res erat, personas loqueretur; nemo, qui illi prudentia, doctrina, eloquentiaque antestaret, non hac elegantula, & in morem mulieris compta, ad aucupium aurium, imperitorum præsertim, accommodata, sed illa forti, ac virili. Plus annis viginti, functus est eo munere, atque eo tempore, quo non raro, sed sæpiissime, verba facienda ad summum Pont. erant. Nunquam procemiis usus est, sed, loco procemii, particulam illam Evangelii, quam explicandam susceperat, proponebat; tum orationem totam bifariam dividebat; ac pars altera, loci a se propositi interpretationem continebat, qui locus, quoniam multis sæpe difficultatibus obseptus erat, ita docte, ita accurate, ita scienter, eas omnes removebat, ut cuivis, quantumvis imperito ac rudi, obvium apertumque relinqueret; at pars altera acrem vehementemque vitiorum, quæ in eos, quibus cum ageret, convenirent, inculpationem & querelam habebat, ac præcepta, quibus ea sanarentur, ex eo, quod interpretabatur, Evangelio deprompta. Nemo ad eum audiendum accessit, quin doctior, quam venerat, abierit; ac, de tribus Oratoris officiis, docendi elegantia & laus illi tribuebatur, jamque res in proverbium abierat, ut Lupus movere, Panicarola delectare, Toletus docere diceretur: sed quoniam id, quod docebat, impetu magis animi, vultu, atque oculorum conjectu, quam oratione tradebat, non parvam etiam in auditorum animis permotionem moliebatur, obtinebatque, ut idem illi facerent, a Toletis docti, quod ab alio permoti. In reprehendendo, si quæ res reprehensione digna incideret, nemini parcebat, sed cuique præsentī audientique, sua in os peccata objiciebat. Ac fuit tempus, quo maxime homines metuerent, ne tanta hæc illi in dicendo libertas, ac licentia, in aliquod magnum malum erumperet; atque hinc perspicere facile potuit; quanta veritatis vis sit, quantaque illius auctoritas, cui hæc partes sunt traditæ, ut corrigat mores aliorum, ac peccata reprehendat, si præsertim hoc faciat, nulla re commotus alia, nisi utilitate communi, neque

aliqua in re ipse a religione officii declinasse inveniatur. Nam cum virum principem pergraviter olim reprehendisset, quod, in mandandis honoribus, homines aliquando minus ad eos aptos eligeret, atque ita vir ille princeps a concione surgens, manum manu diverberaret, quod erat signum, eum totum in tuore esse, magnoque iracundie æstu flagrare, expectabant omnes, quidnam acturus esset; at ille in quodam ambulacro, multis spaciis factis, prandium poposcit; affertur, accumbit; tum sumpto e mensa nitidiusculo quodam ferculo, Ferte isthic, inquit, Toletio, ac nostris verbis gratulamini doctam elegantemque concionem, quam habuit: itaque commotam ab iracundie æstu in illius viri principis animo tempestatem, tanquam liquidus veritatis flatus sedavit, in tranquilloque constituit. Neque tantum concionatoris partes, sed doctoris etiam ac magistri munus, & in Pontificum aula, gerebat; ac tam multe ad eum causæ deferebantur, difficiles atque contortæ, in quibus Theologi opera desiderabatur, ut nulla ipsi pars quietis relinqueretur, nec suo liceret dare operam negotio; quas ille causas, singulari doctrina, prudentia, ac mirifica illa sua, in animi sensibus explicandis, perspicuitate, ex incertis certas, ex dubiis exploratas, ex implicitis explicatas reddebat. Quamobrem ejus nomen factum est ita celebre, ita magnum, ut nulla tam difficilis res, tam ardua, tam consilii egens, in quaestionem deduceretur, quæ non ejus doctrinæ, prudentiæ, judicioque committenda esse videretur. Quod Clementem VIII impulit, ut primis Cardinalium comitiis, a se habitis, una cum Petro Card. Aldobrandino, fratris sui filio, & Cynthio, ex sorore item sua nato, Cardinalem renunciaret, atque intimum consiliis suis haberet, neque, eo vivo, in rebus maximis, & ad universam Christianam Remp. pertinentibus, ab ejus consilio auctoritateque discederet. Atque ejus in primis utili & opportuna usus est opera, in ea deliberatione, quæ omnes tunc temporis theologos, & juris Pontificii interpretes, sollicitos habuit, num Henricus IV, Rex Galliz, ad Catholicorum castra, unde semel atque iterum defecerat, confugiens, recipiendus esset. Mortuus est tertio & se-

sexagesimo ætatis suæ anno; ejusque mortis causam sustinuisse dicebatur Vaticanæ cæli gravitas, quod æstivis ejus anni, quo periit, mensibus, in Pontificiis ædibus habitasset; quæ res pluribus male vertit. Obiit, multis aureorum millibus relictis, ex fructibus, quos ex sacerdotiis suis capiebat, collectis; quos pluribus in prædiis collocari voluit, atque ex eorum redditibus duodecim sacerdotes ali, qui in Æde Deiparæ Virginis ad Nives, una cum aliis presbyteris, diurnis nocturnisque horariis precibus interessent; qua re magnum illi Basilicæ ornamentum ac decus accessit. Plures edidit libros, quos inter, præcipuum obtinent locum, doctissimi eruditissimique, in Ioannis & Lucæ Evangelia, Commentarii. Scripsit etiam in libros Aristotelis de physico auditu, egregium opus, & alia, ad Philosophiam & Dialecticam ejusdem pertinentia. Teritur etiam eorum, qui confessiones excipiunt, manibus Summa Casuum, qua in examinandis singulorum peccatorum ponderibus tanquam trutina quadam utuntur.

ANDREAS BACCIVS.

Andreas Baccius Elpidianus, civis Rom. erat professione medicus ac philosophus; sed dum accuratius diligentiusque ad ea, quorum perfugio medicina utitur, ut sunt herbæ, aliaque ad morbos levandos utilia, animum advertit, eorumque vim, naturam & potestatem, curiosius inquirat; sensit se a quodam quasi æstu ingenii absorberi, atque in perfectam absolutamque istarum rerum notitiam cognitionemque deferri. Quamobrem tantum profecit, ut non solum scripta sua multarum rerum eruditione & copia referferit, verum etiam elegantis sermonis suavitate resperferit. Ac primum in calidorum fontium, qui toto orbe terrarum celeberrimi feruntur, tractatione, ejus opera versata est, & calidas omnes aquas, sive sulphuratas, sive dulces, sive aluminatas, sive nitrosas, sive liquidas, sive cœnosas, eleganti complexus est libro; in quo etiam utilissimis disputationibus, singularum qualitates prosecutus est, quæ nimirum utilis sit stomacho, quæ nervis, quæ paralyticis,

ac

ac simili morbo solutis, quæ merfione, quæ potu, morborum, quibus apponuntur, causas abigant: tum ingenio, quasi pedibus, omnem ferè terrarum orbem peragravit, & quot unaquæque tellus vina ferat, invenit, quodque eorum ex cæli terræque, in qua nascuntur, regione salutis hominum sive utile sive sit noxium, aperuit; deinde de venenis, & antidotis, postea de Tiberi, libros tres vernacula lingua, ac de duodecim preciosis lapillis, qui in summi sacerdotis veste sacra nitebant, librum edidit: quæ ejus opera, cum ad transalpinas aliasque exteras nationes commcassent, immortalẽ Italiẽ nominis gloriam secum una attulerunt; nam ab eruditissimo quoque admirationes & plausus expresserunt. Docuit in gymnasio Rom. de varia rerum naturæ historia, sed non eadem auditorum frequentia, qua Cisalpinus & Cognatus. Verum illa vis ingenii, illud in scribendo acumen, illa eruditio, cum ad curanda ægrotorum corpora se conferebat, ita se ipsa minor inveniebatur, ut non eandem diceres. Quamobrem nemo ægrotus, qui eum nosset, ejus opera utebatur; nemo erat, qui filium, vel cognatum, vel amicum, vel propinquum, quovis laborantem morbo, illi committeret; quo fiebat, ut semper egeret, multoque ære alieno, unde se numquam expediret, obstrictus teneretur. Sed inventus est tandem Ascanius Cardinalis Columna, qui eum familiæ suæ medicum conduxit, sed, ut arbitror, magis id adeo, ut domum suam singularis eruditionis doctrinæque viro ornaret, quam ut egregium familiaribus suis medicum quæreret. Verum, dum hæc de Andrea Baccio commemoro, incurro in memoriam Bacciolæ ejusdam, formosissimæ mulieris, quæ me commonet, ut duorum senum conicorum imagines referam: neque erit ab re; nam hinc fiet perspicuum, quam senectuti sit fœda luxuries, præsertim si libidinum intemperantia accesserit. Vigeabant aliquot, post Andreæ Bacci mortem, in Vrbe, ex iis, quæ corpore quæstum facerent, famosæ mulieres tres, Baccilla, de qua diximus, Cenicola, & Rhedariola, a Rhedario quodam, ejus viro adumbrato, hoc nomine appellata. Harum trium singulæ adeo formæ amœnitate elegantiaque præstabant, ut difficile esset ju-
di-

dicium excellentis maxime pulcritudinis. Sed quid opus est verbis? Paris ipse, qui tam elegans spectator formarum fuisse perhibetur, quique fuerat a tribus illis divis, quas inter erat de formæ præstantia certamen, iudex captus, si judicandi inter has partes suscepisset, ignorasset, cuiam earum primas deferret, & incertus animi, sibi non liquere pronunciaisset. Atque earum prima, nimirum Baccilla, propterea ex stulto insanum fecerat virum, omni quidem doctrina & eruditione præstantem, sed superbia, & elatione animi, omnium facile principem; cuius præsertim insania, præjudicata quadam suæ formæ opinione constabat; qui, cum esset niger, breviculus, gibber, sœdus, enormis, ac pene alter Thersites, Nirei, omnium, qui ad bellum Trojanum profecti sunt, venustissimi, formæ præstare, sibi persuasum habebat. Hic igitur cum Baccillam perdigne deperiret, intimum se primum fecit apud matrem, tum insinuavit ad filiam, blanditiis, officiis, & quod caput est, ornamentis atque pecunia. Quamobrem perficiebat, ut domus ejus fores sibi paterent. Sed, qua erat animi elatione atque superbia, nunquam interdiu, sed noctu ad eam ibat, cum armatis, qui januæ tutelam gererent, observarentque prætereuntes, & si quem illuc ferentem gradum aspicerent, ne propius accederet, terrore armorum absterrent abigerentque; hi autem juvenes erant duo, unus arctissima illi cognatione devinctus, amicus alter, sed homo oppido facetus atque ridiculus, qui postea nobis narrando, quæ ille in amore stulte pueriliterque faciebat, non potest satis dici, quos ludos præberet: at propinquus, quem fortasse hominis stultitiæ pudebat, cuique non erat suave, hyeme perfrigida, tot horas ad nocturnum aërem, & ad boreæ flatum, obligescere, stomachabatur, ac, Te Iuppiter, ajebat, diique omnes perdant cum amoribus tuis, cumque tuis istis omnibus deliramentis; ac, qui te stultum, delirum, ac comicum senem appellant, sapiunt mea quidem sententia; nam quis, nisi stultus, ad has ineptias, exacta jam ætate, delaberetur? Sed ille postquam satis animo obsecutus fuerat suo, eodem armorum præsidio stipatus, recipiebat se domum, ad cœnam opiparam, ac pollucibilem; qua con-

confecta, jubebat propinquum illum suum, ire dormitum, seque cum amico, qui sibi ultro arridebat & assentabatur, in cubiculum abdebat, &, ad multam noctem, res sibi in amore tum secundas tum adversas, & dulcia & amara omnia illi enarrabat; sed sermo ejus omnis eodemum redibat, ut ingratus ac male sibi morigeræ mulieris injurias queretur; ac vide, agebat, rusticos, vel potius inimicos, ingratisimæ Baccillæ mores; ego parentes ac domesticos illius omnes magna cum cura curavi, ac ne teruucium quidem ab eorum aliquo accepi; ego illi aurum & vestem præbui; ego quotidie vino opiparisque obsoniis mensam instruxi; & cum posco, ut roseam illam suam ad oscula cervicem inflectat, & pangat mihi suavium, negat, & me, tanquam pestem aliquam, averfatur ac refugit; at quem virum? Dii boni, quo (si verum fateri velis) non facile quidquam dixeris te vidisse in vita venustius; quod si rerum commutatio fiat, atque illa amore meo ardeat, ut ego illius incendior, næ ego par pro pari referam, & cum maxime cupiat, vix a me unum vi, precibus, lacrimis, suavium auferet. Hactenus de seue philosopho amatore, quem satis, ut arbitror, expressimus: nunc senem alterum I. C. non rabulam, aut caufidicum aliquem, sed causarum patronum summum ac singularem, in amore pueriliter insanientem, describamus; qui non in una tantum illarum trium fornifarum, sed in singulis earum exarsit, & suis opibus ac facultatibus, quæ erant magnæ, uniuscujusque mire rem auxit. Sed quamquam, in earum trium formis, usque ad ineptias insaniret, diligebat tamen Baccillam & Rhedariolam, benevolentia impari: nam in Cenciolam multo majori amoris impetu ferebatur, adeo ut damnosus senex ac perditus, ob amoris magnitudinem, propemodum e re sua suppeditasse illius sumptibus diceretur, quibus magnificam domum, quam in celebri urbis loco habet, ædificaret. Hic igitur tam corruptus adolescens, prope octogenarius, qui sine mulierum consuetudine, vitam esse nullam duceret, quotidie, cum a prandio rhedam inscenderet, ut animi causa celebriores urbis vias obiret, interrogabatur a rhedario, quonam potissimum se deferri vel-

vellet; qui prope commotus, Quonam, rogas? aiebat, nonne tibi millies est dictum? ad Cenciolam, Baccillam, Rhedariolam. Earumque domos, quæ variis atque inter se distantibus urbis regionibus sitæ erant, rheda inuestus, circuibat, ut earum aspectu oculos pasceret, quæ in fenestris, ad miraculum exculte ornateque, tanquam in areis, palumbis, illac transeuntibus, lasci-vos obtutus, salutationes venustulas, mellita verbuscula, quasi cibos, quibus caperentur, offundebant; & si quos reti adolescentulos impedivissent, haud diu fiebat, cum ex illis apud se nentiam dicebant de bonis; nam brevi eorum nasfragium apud ipsas facturos eos esse, pro comperto habebant. At juris legumque peritus, postquam videndo, salutando, contemplandoque defessus, non tamen saturatus, extiterat, domum se, cum jam advesperasceret, ad negocia recipiebat. Sed deliris ac luxuriosis senibus omissis, ad frugales homines continentemque revertamur.

FRANCISCUS PENIA.

Franciscus Penia Hispanus, Sacre Rotæ Romanæ Auditor, & Decanus, ut vocant, multum apud omnes auctoritate, existimatione, & gratia valuit; sed longo in causis cognoscendis usu plus quam ipso ingenio præstitit: quanquam illi ingenium non defuit, sed non minimo intervallo ab eo, quod summum dicitur, absuit. Aliquot semper circa se juvenes habuit, a summis viris tanquam in disciplinam sibi traditos, quibus cum sua studia communicaret, recte judicandi rationem ostenderet, quorumque opera in evolvendis juris utriusque interpretum libris uteretur, reperiendisque, quæ a causarum patronis & advocatis ex eis in consiliis dandis suggererantur; quibus ex rebus non minimos illi profectus faciebant. Nam juris civilis usum obtinebant, qui omnium magistrorum præcepta, omnes domesticas exercitationes, & studia exsuperat. Hos ille juvenes patria caritate complectens, semper in filiorum loco ac numero habuit; & quantum opera, auctoritate, & gratia poterat, totum ad eos opibus & honoribus amplifi-

can-

candos conferebat. Itaque eorum aliquot in principibus patronis & advocatis, aliquot in pluribus dignitatum gradibus, & in eo ipso, in quo ille fuerat loco, collocatos aspeximus; ac non neminem etiam, ut Lucam Antonium Virilem, in purpura vidimus. Multa reliquit, unde existimare de hominis ingenio liceat; librum unum, de Christi Regno, de S. Didaci Apotheosi, hoc est, ut nunc loquimur, Canonizatione: plures Jurisconsultorum libri, suis notis illustrati, visuntur: suam etiam in causa Henrici IV, Galliarum Regis, sententiam, typis impressam, aperuit. Sed vir plane egregius multa opera atque industria in Romana aula cognitus, tot laboribus functus, tanta auctoritate & gratia præditus, non potuit Auditoris Rotæ gradum excedere, & ad majores ascendere; sed in eo Romæ decessit.

OLIVARIUS A BOSCO.

INter nostri sæculi Oratores non verebor adnumerare Ioannem a Bosco, Henrici IV Regis Galliz beneficio, ut ipse de se fatetur, nobili ac generosæ Olivariæ familiæ insertum, ejusque insignibus & cognomine donatum. Est enim ejus oratio pura, nitida, Latina, elegans, quæque nihil fere habeat ineptiarum. Hunc Paulus V Abbas Belliloci insignibus ac titulo decoravit, Cardinalis Seraphini Olivarii opera; quem postea luculenta oratione in Æde Sanctissimæ Trinitatis ad montem Pincium, laudavit extinctum; atque eum etiam, ob insignem eloquentiam, maximarumque doctrinarum notitiam, Rex Galliz elegerat, quem de rebus divinis verba facientem audiret: verum cum in concionibus, contra Religiosi ordinis existimationem & decus, asperre ac truculenter esset invectus, illius in se ordinis iram derivavit, & Cardinalis præsertim magni a se animum abalienavit. Legi ego complures Purpurati illius ad eum epistolas, in quibus inimicum eum suum appellat, pro cuius salute ad Deum preces effundat, seque tantisper inimicum illi futurum profitetur, quoad palinodiam cecinisset, hoc est, quoad qui in suum ordinem tam graviter in concionibus esset invectus, contraria oratione

COR-

correxisset: quamobrem Romæ, in molem Adriani, in arcem fortissimam S. Angeli nomine, redactam, compactus, multos ibi annos asservatus est vinctus; ac post mortem Cardinalis illius, cujus præsertim opera se in illum carcerem fuisse compulsam arbitrabatur, rogatus, ecquando e vinculis dimittendus esset, Modo, inquit: nam defuncti sunt, qui quærebant animam pueri. Sed fere antea e vita dimissus est, quam ex illa custodia. Traditur chymicæ in primis arti fuisse addictus, sed vanitatis suæ pœnas, rei familiaris damno, solvisse.

SERAPHINVS OLIVARIVS.

Seraphinus Olivarius, Lugdunensis, ita annis quadraginta in circulari illo iudicium Romanorum confessus, quem a subfelliis, ut arbitror, forma Rotam appellant, cognoscendis causis præfuit, ut ingenio, doctrina, prudentia, omnibus æqualibus suis longe multumque præstiterit: ac propter has causas, me puero atque etiam adolescente, tantopere efferebatur, ut Seraphini vox, non hominis certi nomen, sed jurisprudentiæ vocabulum esse videretur. Quam ille laudem non mediocribus atque vulgaribus, sed exquisitis atque reconditis affectus est literis. Puer, Turnoni, Iacobi Rafalii Bononiensis, ejus vitrici, diligentia, Græcis ac Latinis literis est institutus egregie, ab eoque, cum nondum ex ephebis excessisset, iussus venire Bononiam, ut ab ea fecunda studiorum matre, præstantissimo puer ingenio & flagranti studio, reliquas liberales disciplinas acciperet; quibus arripiendis ac penitus possidendis, tanta usus est celeritate, ut senum etiam industriæ doctrinæque antecesserit. Cujus rei periculum factum est in eo, quod cum juris civilis docendi muneri in demortui doctoris locum sufficiens esset alter, ac plures tum cives tum aliarum Italiæ civitatum docti viri, & ætate provecti, eum petitem locum accessissent, iste solus, externus, adolescens (vix enim, juvenilibus in genis, primæ lanuginis vestigia apparebant) competitores omnes superavit, non majorum commendatione, non gratia, non precio, sed ingenii, sed doctrinæ, sed eruditio-

tionis laude; in qua ceteris, multum ipsum ætate antecedentibus, superior habebatur. Sed non amplius bien-
 nio potuit illum Bononia in eo munere occupatum ha-
 bere, properantem ad Urbem, quo sua eum virtus, ad
 aulæ decus, ad orbis terræ negocia, atque adeo ad pur-
 puram ipsam evocabat; ubi unam in Romana Rota se-
 dem, veteris possessoris interitu inanem ac vacuum in-
 venit, quæ alicui ex Jurisconsultis Gallis debebatur;
 ejus honoris cum multi essent cupidi, atque eum peti-
 tum, summa contentione studioque contenderent, Pii
 IV Pont. Max. judicio, summaque Caroli IX Regis
 Galliæ voluntate, factum est, ut ceteris anteponeretur.
 Quem locum tanta cum dignitate, atque opinione do-
 cetrinæ per annos quadraginta tenuit, ut principatum
 jurisprudentiæ obtinere putaretur, & ad eum, tanquam
 ad Pythium Apollinem, cuncti consilium expetitum ac-
 currebant, essetque ejus domus, totius oraculum orbis
 terrarum; ac merito, non enim rudis omnium rerum,
 ac juris civilis in primis, ut non nemo, sed omnium di-
 sciplinarum instructu ornatuque ad eam provinciam
 capessendam accesserat. Quo fiebat, ut ejus ædes, non
 illustrium modo patronorum advocatorumque (ut ejus
 muneris ratio postulabat) multitudine celebrarentur,
 non modo philosophorum, ac humanissimis elegantissi-
 misque literis eruditorum frequentia redundarent; ve-
 rum ad eas etiam musicorum concursus fierent, quoties
 ille, prolatis rebus, a studiorum labore ad hanc huma-
 nissimam liberalissimamque animi remissionem descen-
 deret. Ter cum Clemens VIII, qui multos eidem an-
 nos collega in eodem munere fuerat, ad sacræ honorem
 purpuræ est conatus attrahere; sed totidem vicibus est
 persecutionibus quorundam inhibitus; quibus e medio
 sublati, nihil fuit illi prius, quam ut id, quod sæpius
 cogitaverat, perficeret, atque summa omnium homi-
 num gratulatione, annos natum unum & septuaginta,
 in Cardinalium ordinem cooptavit: ille vero mœ-
 ror ad communem lætitiā tacitus obrepebat, quod
 serius, quam ejus merita postularent, in eum lo-
 cum ac numerum pervenisset: quæ mœroris quasi
 nubes, post quinque ferme annos, ejus morte nun-
 ci-

ciata, in communis fletus imbrem soluta omnium ora
irrigavit.

ARNALDVS OSSATVS.

SI quisquam omnium mortalium ob generis ignobili-
tatem obscuritatemque affecutus videtur, ut, quod est
in proverbio, terræ filius appelletur, is profecto fuit
Arnaldus Ossatus; qui ita humili, ita tenui, ita obscuro
natus est loco, ut nullum posset, neque cognatum, ne-
que affinem demonstrare, nullam gentilitiam hæredita-
tem, lege ad se redeuntem, cernere. Neque id ad ho-
minis contumeliam referendum est, sed summæ ejus
laudi gloriæque tribuendum, quod sine ulla commenda-
tione majorum, sine aliqua familiz claritate, sine opi-
bus ac divitiis, sola virtutis suffragatione, in eum am-
plitudinis locum pervenerit, ad quem sæpenumero,
summo genere natis, ac longa cognatione Regum stir-
pi adnexis, aspirare vix licet. Neque tanto illi honori,
a Clemente VIII ob singularia ipsius merita accepto,
generis obscuritate tenebras aliquas attulit, sed splendo-
ri ornamentoque fuit, neque postremus inter Cardina-
les est habitus, sed propemodum summus existimatus,
eoque fastigio dignissimus judicatus, qui proxime ad
divinum accedit. Omnia in eo aderant ornamenta vir-
tutum, divinarum humanarumque rerum scientia, sum-
ma eloquentia, admirabilis juris civilis cognitio, quam
a Jacobo Cujacio, eo tempore in Bituricensi Academia
legum antistite, acceperat, ac postea in fori luce ad usum
transfulerat; neque ab earum virtutum concentu, ut
sæpe fit in multis, mores discrepabant, sed mire cum
eis congruebat integritas vitæ & innocentia, quam ab
ineunte ætate, tum naturali bono, tum respuendis volu-
ptatibus, nulla unquam turpitudinis labe fœdavit. Vt
mirum videatur, ex uno Cassanaberio, Auscorum Aqui-
taniz convenarum ignobili pago, ubi ortus est, tanquam
ex tenui fonte tam ingens flumen, hoc est, tantam vir-
tutis vim prodiisse, quæ usque a Gallia profluens, Ita-
liam, atque Urbem ipsam, quæ quidquid est ubique pul-
crum ac laudabile continet, irrigaret: quam ad Urbem,

a forensi strepitu & a causis agendis abductum, perduxit Paulus Foxius Archiepiscopus Tolosanus ac Regis Gallie ad Pont. orator, eumque, cuius jam fidei & industriam perspectam habebat, sibi a secretis elegit; in cuius Urbis lucem virtutes, quibus præstabat, eductæ, nimirum innocentia, doctrina, prudentia, & in rebus agendis dexteritas, tanquam semina in segetem secundam data, eos illi honores peperere, quibus postea floruit. Itaque his artibus, in ea civitate, in qua virtute certatur non genere, effecit, ut vere dictum videatur, suos cuique mores suam conciliare fortunam. Mortuo Foxio, ejus opera, quæ jam preciosa esse cœperat, usus est Card. Estensis, Gallie patronus; quam operam quanti ille faceret, ostendit in morte. Nam magnam illi pecuniz summam testamento legavit. Postulatus est etiam atque etiam ab Henrico Rege III, ejus nominis fama permoto; a quo Bajocensi Episcopatu donatus est, atque humanissimis literis invitatus ad sanctiores regni epistolas conscribendas; quam ille provinciam, ejus quoungebatur muneris excusatione, recusavit. Non enim decere eum, aiebat, qui sacris initiatus esset, aliis negotiis operam dare, quam religiosis ac sacris: sed hanc illius in Urbe mansionem alii aliter interpretabantur, nimirum adjectum fuisse oculum ad eum honorem, quem postea adeptus est. Interea Rege occiso, funesta illa ac misera toti Gallie subsecuta sunt tempora; tum vero, in tantis Reip. illius tenebris, hominis ingenii, virtutis, sapientiæque lumen clarius eluxit. Nam cum non esset hic Romæ alius, cui tanto oneri sustinendo animus viresque sufficerent, omnia ad illum regni negocia deferrebantur, illudque omnium maximum atque gravissimum, de Henrico IV, qui, armis Gallie potitus, auctoritate Romani Pont. a quo olim desciverat, sibi regnum confirmari stabiliri, summa ope nitebatur. Nam quamvis tam ardua tamque difficilis provincia, Principum Christianorum animis in varia studia distractis, Jacobo Perronio, Ebroicensi Episcopo, ac postea S. R. E. Cardinali, demandata esset, ea tamen provincia, non nisi ex Ossati auctoritate, qui consiliorum omnium particeps, Perronio fuerat additus, administrata est. Sed po-

postremo Galliz rebus ex Henrici sententia compositis, a Clemente VIII in Cardinalium ordinem cooptatus est, summa amplissimorum patrum voluntate, qui jam diu, eum virtuti illius honorem deberi, loquebantur. Quem ille locum non aliis artibus tutatus est, nisi iis, quarum erat princeps, quibusque ad eum honoris gradum ascenderit; nimirum innocentia, æquitate, justitia, animi moderatione ac temperantia, nulla cupiditatis avaritiæque suspicione. Denique, ut est rerum omnium humanarum conditio, functus vitæ munere, magnificentissimo elatus est funere, in Æde D. Ludovici, suæ nationis, ibique in sepulchro e marmore conditus.

HIERONYMVS MERCVRIALIS.

IAm vero, quænam tanta est vis ingenii, quod tantum orationis flumen, quæ tanta dicendi facultas & copia, quæ Hieronymi Mercurialis Foroliviensis, Medici ac Philosophi, laudibus ex æquo respondeat? Illud enim unicum ætatis nostræ lumen, illud eximium medicæ facultatis decus, illud maximum acumen ingenii, ad rerum causas investigandas, ad cæli conversionem ac motum, ad siderum ortus, occasus, ad spectus compositionesque notandas, ad intimam ac reconditam omnium disciplinarum notitiam percipiendam, rite a natura perfectum, illud summum eruditionis culmen atque fastigium, quis, non modo laudibus efferre, verum etiam dicendo assequi possit? quisnam illud, quod est omnibus ejus laudibus anteponendum, quodque omnibus sæculis difficillimum inventu fuit, illam ejus admirabilem, cum admirabili omnis generis eruditione conjunctam, vitæ integritatem & innocentiam verbis explicare valeat tantum, quam re ipsa erat? Non enim doctrinam, ac philosophorum placita, ita percepta habebat, ut iis ad ostentationem, non ad vitam, ut par est, agenda uteretur, non libidinum intemperantiam, ut quidam non magis flagitiose quam stulte fatentur, cum quavis virtute posse componi existimabat, sed luxuriam cum omni hominum generi turpem, tum eruditorum nationi scdissimam esse docebat; nam prætermitt-

tendis, non persequendis voluptatibus, veri philosophi famam comparari. Sed ut ceteri de ejus laudibus, earundem magnitudine deterriti, taceant, disertissimæ cujusdam vocis instar in eo laudando habebunt Patavinum, Bononiense, ac Pisanum gymnasium; quorum primum annos duodeviginti, alterum quinque, tertium quatuordecim, de suggestu, Philosophiæ ac Medicinæ præcepta tradentem audivit; & quorum primum octingentenis annuis aureis, alterum millenis ac ducentenis, tertium millenis & septingentenis atque etiam bis millenis, egregiam ejus operam, ad erudiendos, medicinæ præceptis, confluentes ad eum auditores conduxit: ac si magnitudo pecuniæ, ex artificio aliquo collectæ, artificis excellentiam perfectionemque declarat, centum ac viginti aureorum millia, quæ ad hæredes testamento transmisit, præter ea, quæ vivens in pauperum necessitates, in domesticos usus, in amicorum utilitates effudit, medendi cum arte ceteris præstitisse clamabunt. Ut autem nullæ de eo aliorum literæ loquantur, pulcherrimam ejus ingenii formam, magis quam aliqua eloquentissimi cujusquam oratio exprimet operam multorum prope divinitas, quorum exequias nulla posteritas sæculorum aspiciet, & gymnasticum in primis omnis antiquitatis notitia refertum, eruditionis thesaurus ac doctorum hominum delicia; quod opus Romæ compositum, editumque in Alexandri Cardinalis nomine, cujus in aula versabatur, apparuit; Galenus Græcolatinus, ad veterum librorum fidem restitutus, ac notis illustratus; Variarum lectionum volumen; De ponderibus antiquorum; Praxis medicinalis, opus ingens, qua videlicet ratione ac methodo omnibus morborum generibus occurratur; consilia ægrotantibus per literas data, ac tria in volumina distributa; aliaque plura, admirabili eruditione studioque confecta, quæ properantibus nobis non est ocium referre. Neque felicior in scribendo, quam in morbis tollendis, fuit. Neminem enim ægrotum curandum suscepit, quin amisam illi valetudinem recuperaverit; nisi si gravior esset morbus, quam ut eidem succurri humana ope atque arte posset. Cujus rei fama, in exterarum nationes divul-

gata, summorum Principum studia commovit, ut in suis longis morbis periculosisque ejus operam magna mercede conducere. In his Maximilianus Imperator fuit, quem, diutina atque lethali implicitum febris, facili atque explicita curatione ex ancipiti levavit. Atque ille, in cognoscendis morborum causis tam peritus atque acer, non fuit in eo, quo demum sublatus est, ignorando, hebes ac tardus. Nam calculos, in renibus latentes duos, mortis sibi causam afferre, medicis audientibus, dixit: jussitque, suum corpus, subsecuta morte, aperiri, ac renes incidi: quo facto, confestim calculi duo magni cum aliis minutis pluribus sese in conspectum dedere, sicut ille prædixerat: quos simul omnes, statera examinatos, ad drachmarum octingentarum pondus pervenisse, qui oculis exceperet, tradiderunt. Ille vero, tanta animi æquitate atque constantia mortem obivit, ut non e vita discedere, sed ex una domo in aliam migrare videretur. Quam illi fiduciam antea vitæ dignitas, & recte factorum conscientia dabat. Mortuo cives sui statuam faciendam locavere; qui honor habitus est ante ipsum nemini.

FABIVS LATINVS.

Fabius Latini filius, multis in rebus Alcibiadis Atheniensis fere similis extitit. Nam in ea potissimum Vrbe, summo genere natus est, in qua domicilium orbis terrarum esset imperii; ac formæ præstantia omnes suæ ætatis facile superavit: quæ illi, ut postea dicemus, præsertim fuit exitio: tum ingenii docilitate & acumine, non æqualibus modo suis præstitit, sed etiam majoribus natu anteivit: præterea tanta in eo suavitas erat sermonis ac vocis, tanta in communi consuetudine comitas, ac tam multe facetiæ, ut omnes, qui tum erant in civitate principes, sibi devinctos haberet, efficeretque, ut nemo illis carior existeret. Neque, cum tempus posceret, patiebatur, desiderari ad se operam & industriam suam, neque sese a negotiis, illecebris voluptatum, avelli sinebat; nam in Principis aula, a referendis supplicibus libellis erat, & Urbis tabulario præfectus.

Patrem habuit, copiarum ducem clarissimum fortissimumque, matrem, quæ formæ dignitate atque excellentia omnium in se oculos atque ora converteret: exquisitis a tota Vrbe magistris operam dedit, in his M. Antonio Mureto Græcis literis ac Latinis juxta atque doctissime erudito, ac temporibus illis omnium eloquentissimo. Vtebatur familiarissime omnibus, qui aliquod in literis nomen haberent, iisque præsertim, qui poetiæ facultatis studio flagrarent. Sed in primis admiratus est atque adamavit Torquatum Tassum, heroici Etrusci carminis principem; neque vero minus Torquatus delectatus est Basio, cujus etiam honoris gratia, rogatus ab eo, carmen illud elegantissimum composuit, quod Corinnox rogus inscribitur. Erat enim tum Basius in maximo animi dolore cruciatuque, ex improvsa fornosulinx mulieris morte suscepto, quam ad insaniam adamaverat; ac fuit suspicio, eam veneno fuisse sublata a viro, quod illa, ob nimis apertum hominis in ipsam amorem, esset omnibus sermo. Emanarat in vulgus, hominem in primis violentum ac fiducia nobilitatis ferocem, perfecisse precibus, auctoritate, ac precio, ut in cubiculum mulieris, cum vir ejus, venatum profectus, Vrbe domoque abesset, a familiaribus ejusdem introduceretur, ubi occultus mulieris adventum expectaret; quo cum mulier a cœna venisset, jamque in eo esset, ut rejectis vestibus se in lecto abjiceret, prodidisse eum, seque mulieri in conspectum dedisse, at illam, attonitam, ac re tam improvsa perterritam, clamores edidisse, sed neminem ex domesticis, tanti facinoris consciis, accutrisse; eum vero, blanditiis primum iis, quæ dictare libido solet, tum eloquentia, qua se plurimum posse intelligebat, conatum esse, recusantem oblitantemque sibi obnoxiam facere; sed cum nihil proficeret, educto pugione, quem attulerat, locutum esse in hæc verba: Quandoquidem obstinate das operam, atque in eo omnes ingenii industriæque tuæ nervos contendis, ut me miserum vita devolvas, faciam tibi satis, lethum mihi consciscam, hanc sævitix tuæ operam adimam; quod ubi prolatum fuerit, æternam nomini tuo infamix notam inuret; qua oratione habita, pugionem

in

in se convertisse, eoque leviter pectus pupugisse; sed cum, ex eo vulnere, rivi sanguinis effluerent, tum vero mulierem, & viri misericordia, & metu infamiz, quam minitabatur, commotam, passam esse expugnari a se pudicitiam suam. Sed hujus rei, ut dictum est antea, non alium habeo auctorem, præter Rumusculum. Verum utut sese res habeat, illud certum dicebatur, eos, quibus ministris & interpretibus usus fuerat, lucis usuram non diuturnam habuisse, sed intra triennium occubuisse: neque ipse impune id abstulit; nam aliquot post annos prope rei familiaris naufragio facto, Mantuz a rusticano ac nullius precii homine est interfectus; ac fuere nonnulli, qui existimarent, eam illi necem a viro potentissimo, in amore formosissimæ cujusdam mulieris rivali, fuisse constatam; sed suspicione magis, quam quod cuiquam id compertum esset, hæc eorum opinio valebat. Scripsit tragædiam; quam, qui tum erant intelligentes harum rerum æstimatores, aiebant ostendere, quantum vir hic ingenio doctrinaque præstaret; cujus tragædiæ sit mentio in epistola Antonii Decii: sed ea fortasse ad eundem scopulum, ad quem ille offenderat, navem affixit, ac magno cum illius gloriæ ac bonarum artium detrimento interiit.

IO. BAPTISTA STELLA.

IO. Baptista Stella, Romanus, Iulii Stellæ poëtæ, de quo diximus, frater germanus fuit; cum quo etiam a puero liberalibus disciplinis, ac Latinis præsertim literis, institutus est. Sed ille, poëticæ facultatis amore inflammatus, omisis ceteris in studiis, in eo studio se continuit, neque in plura distrahi passus est; hic vero præstantissimum ingenium contulit ad juris civilis scientiam, in qua adeo excelluit, ut celerius quam mos esset, honestissimum illum, in Romana aula, eorum ordinem tenuerit, qui, a referendis supplicibus libellis, Referendarii appellantur, in eoque ordine in duodecim illis primis fuerit, quorum sententiis causæ, in eum confectum delatæ, dijudicantur: verum non eatenus ab illis gravissimis occupationibus se detineri sinebat, ut non in-

terdum in ea amœnissima studia diverteret, quibus a puero deditus fuerat; multaque scribebat, tum soluta oratione, tum versibus. Habuit a natura summam ingenii docilitatem celeritatemque; qua ea, quæ a magistris traderentur, intelligentia comprehenderet, ac memoria sepiret. Forma illi corporis brevior contigit; sed in qua igniculi illi celeresque ingenii motus elucerent atque extarent, qui ejus in animo vigeat. Fuit ob humanitatis studia Ascanio Card. Columnæ carus in primis; qui cum adhibebat convivam sibi, intimum consiliis suis habebat, & summum rerum domesticarum administratorem. Scripsit elegos, proxime ad veterum elegantiam: & extremo vitæ suæ tempore, eodem carminis genere, ambulacrum Vaticanum mire descripsit. Mortuus est Romæ, Ecclesiæ Bituntinæ Antistes.

LÆLIVS PEREGRINVS.

Hic plures scripsit habuitque orationes, quam alius quisquam suæ ætatis orator, excepto M. Antonio Mureto: nam dixit sæpius in sacello Pontificio, ad tres Pont. Max. Gregorium XIII, Sixtum V, & Clementem VIII; & ad eundem, cum F. Vincentius Carafa, Vngariz Prior, Magni Equitum Rhodiensium magistri nomine, eidem obedientiam præstaret; & in Æde Sacra D. Eustachii, in studiorum instauratione, cum juventutem Romanam ad excolendum virtutibus animum, & ad literarum studia strenue capeffenda, de more hortaretur; sed sæpius in gymnasio Romano, ad auditores suos. Fuit orator, non solum disertus, verum etiam eloquens; cum multiplex rerum scientia, qua animum compleverat, uberem illi copiam daret ad dicendum. Erat enim philosophicis ac theologicis disciplinis in primis excultus, quas docendi facultatem acceperat. Sermo purus, nitens, excultus, nullaque in re rudis. Multos annos, in gymnasio Romano, Aristotelis de moribus libros, non tenui mercede, non parvo discipulorum numero, publice interpretatus est. Vixit usque ad senectutem perpetuo honestæ ac laudabilis vitæ tenore.

CAROLVS a SERVA.

Carolus a Serva, ortus est Romæ, parentibus Gallis, ex vetito concubitu; sed iis usus est diligentibus, qui omnibus doctrinis, quibus puerilis ætas impartiri debet, erudiendum eum curarunt. Ac profecto operam perdidissent, nisi naturale in eo bonum superasset. Erat enim ingenio adeo docili, adeo ad ea accipienda, quæ a magistris monstrabantur, celeri ac prompto, ut quasi per ludum jocumque didicerit. Numquam enim satis animum ad ea, quæ dicebantur, videbatur advertere, sed fiebat, ut hac indiligentia negligentiaque ceterorum discipulorum industriam diligentiamque præcurreret. Itaque poterat doctè scienterque canere, quæ a Græcis doctoribus Græcè traderentur intelligere, ac memoriæ mandare, versus tum Latinos tum Etruscos facere; sed in Latinis versibus ita tenebat artem numerorum atque modorum, ut in iis, si paulum modo offensum esset, ut aut contractione brevius fieret, aut productione longius, incredibili celeritate notaret atque animadvertet. Atqui majore in honore a bonis & honestis viris habitus esset, si domui suæ honestius consulisset: ferunt enim, cum uxorem Venetiis, Adriatico mari, Romam reduceret, cumque ex febris, quam in lembo contraxerat, fortasse uxoris fraude, quæ illum metueret, comparata ardentius siti æstuarer, vini ænophorum ori cupidius admovisse, eoque epoto, statim animam exhalasse.

HIERONYMVS HENRICVS.

Per idem tempus, sed ætate aliquanto major, Hieronymus Henricus Romanus, in gymnasio Romano, jus pontificium docuit; cujus plures extant orationes ab eo in sacello Pontificio, in Æde S. Eustachii, in gymnasio habitæ. Magnæ fuit industriz atque laboris: sed homo acer ac vehemens, iram in promptu habuit. Nam discipulorum in schola obstreptantium, exilantium, & faceta ac ridicula dicta funditantium ineptias, quæ devorandæ sunt, non ferebat, iracundiusque re-

respuebat: qua morositate iracundiaque, acrius vehementiusque, discipulorum studia ad ipsum illudendum irridendumque commovebat. Et in ea oratione, quam in Æde S. Eustachii ad gymnasiū moderatores & magistros & ad Romanam juventutem de literarum præstantia habuit, omnes fere eloquentiæ vires in eo contendit, ut projectam eorum audaciā in invidiam crimenque vocaret, qui doctorum suorum lucubrationibus, quas sacras, sanctas, divinas appellabant, obstreperent illuderentque: ac non admodum senex Romæ, nec ad-versa nec obscura probitatis fama, decessit.

PAVLVS TEGGIA.

Paulus Teggia, Mutinensis, eo ingenii, doctrinæ, iudicii acumine fuit, ut tanquam alter Lælius Decimus haberetur, neque quisquam esset sive orator sive poëta, qui in ejus æstimatoris arbitrium sua scripta venire vellet. Etenim perfectæ eloquentiæ ac poësis speciem mente & cogitatione inclusam habebat: omnesque contemnebat, quos non posset in illam formam includere. Navavit operam in scribendis epistolis, secretorum omnium particeps, Iacobo Boncompagno Soræ Duci, ac tum maxime, cum ille rerum potiebatur: quæ epistolæ tanto erant in honore ac precio, ut ad quos mittebantur, magnum quid se fuisse adeptos arbitrarentur, easque in rebus carissimis haberent. Sed cum Dux ille, utpote literarum cupidus, literatis viris deditus esset, narravit mihi magnæ vir auctoritatis atque prudentiæ, hunc Teggiam, ceteroquæ minime malum, tulisse inique, si quem doctum virum aspexisset, se in Ducis familiaritatem insinuare. Sed cum jam ad senectutem pervenisset, ac magna ex parte, aspiciendi facultate orbatus, pene aspectum amisisset; tanto ardore animi studioque, Christianæ pietatis opera amplexus est, ut esset omnibus admirationi, ut etiam obsequiis, quæ illi in prandium ac coenam apponerentur, vel cinerem, vel falem, vel aquam aspergeret, quo videlicet minus grata atque jucunda palato acciderent: atque, extremo vitæ suæ tempore, cum vario atque multiplici morborum

ge-

genere implicatus, atque acerbissimis corporis doloribus cruciatus, lecto detineretur, interrogatus, ut valeret, summa animi æquitate hilaritateque, se nunquam valuisset melius, responderet, quoniam se ita haberet, ut Deo videretur, cujus voluntatem anteponeret suæ.

ANTONIUS PACTIVS.

Antonius Pactius Florentinus, sacre olim Ierosolymitanæ, nunc Melitenfis equestris militiæ ordinis miles, tum patriæ in qua ortus est beneficio, tum legendis veteribus poetis & oratoribus, qui sunt præclare locuti, Etrusci, seu, ut ipse malebat, Florentini sermonis peritissimus extitit; &, quemadmodum ex nota, qua signantur, & ex sonitu, quem reddunt, adulterini nummi a legitimis dignoscuntur; ita etiam ille ex quodam urbanitatis quasi colore, atque ex sono ipso, germanas Florentinas voces ab æcitis discernebat; neque ejus linguæ studiosi, in ejusmodi controversiis libentius ad alium quam ad ipsum judicem ibant, ejusque existimantis arbitrio acquiescebant. Fuit vir in primis suæ civitatis nobilis, ad omnem humanitatem & elegantiam natus, ac præcipue ad omne genus facetiarum, sive quæ in re positæ sunt, sive quæ in dicto, mire a natura fictus formatusque, vultu etiam adjuvante & voce: dilexit mirifice poetam Etruscum, eosque qui eodem studio tenerentur; quos etiam usu amicitiaque sibi devinctos habebat; & cum audisset adolescentem quendam, in primis scitulum atque venustulum, magnam ad versus faciendos indolem habere, nec cum posset, cum sæpe fuisset expertus, quavis externa obsequentis animi significatione ad se allicere, hanc denique conciliandæ cum eo amicitie occasiunculam nactus, arripuit: constitit ille ad ursi cujusdam ludentis quasi spectaculum, quem ubi aspexit, accessit ipse quoque, atque, O pulcrum, inquit, leonem! ille, ut mos est adolescentium, qui se videri doctos ac sapientes volunt, Non, ait, est leo, sed ursus. Quid audio? excepit Pactius, at nos Florentiæ hoc genus ferarum non alio nisi leonis nomine appellamus; ac verum est, quod dicitur, Suus cuique genti
mos

mos est; atque audi, nisi tibi est negocium, elegans carmen in leonem. Quo recitato, ita adolescentem fecit suum, ut posthac usus sit eo familiarissime. Etiam tum juvenis, cum insimularetur, contra Franciscum Magum Etruriæ ducem conjurasse, omnium rerum egena, Mantuz ignotus equos viri cujusdam nobilis, mercede, curavit. Mathematicis addictus, die D. Lucæ sacro, sibi fatum instare prædixerat, ejus anni, quo mortuus est; sed cum irrideretur, ubi dies ille accessit, continuo despondit animum, eaque ægitudine moriens, verum se fuisse vatem ostendit.

BERNARDINVS STEPHONIVS.

Bernardinus Stephonius, Sabinus, generis humilitate obscurus, sed animi ingenique dotibus clarus, magno Sodalitati Jesu, in quam adolescens receptus est, ornamento ac decori fuit. Hic ab incunte ætate ea ingenii docilis nec instrenui signa dedit, ut Alexandro Card. Farnesio, cujus in imperio ac ditione erat, visus sit dignus, qui ex obscuri illius pagi, in quo ortus erat, tenebris, in Seminarii Romani lucem traduceretur, quo fertile pueri ingenium omnibus liberalibus disciplinis excoli posset: ubi inter illa ingeniorum quasi lumina ita brevi eluxit, ut solis instar habere inter minora sidera videretur, ejusque nomen in scholis celebrius, quam cujusquam alterius esset. Verum, qua erat indole virtutis & continentie, cum jam ad summam poëtice facultatis in primis laudem celeri cursu contenderet, statuit arctius vitæ genus amplecti, ac sanctissimis Ignatii Loyolæ legibus, sub alterius imperio, vivere. Atque ad id satis sua sponte incitatus, fortasse impulsus est etiam magistrorum cohortationibus, qui nimirum verébantur, ut tanta vis ingenii, in tot lubricis communis vitæ viis, sine casu aliquo aut prolapsione consisteret; sed ubi Societati Jesu nomen dedit, incredibili socios omnes voluptate lætitiæque perfudit, tanquam si, non infimæ pene sortis homo, sed regia stirpe procreatus, summisque opibus præditus, in eum ordinem ac numerum venisset. Quod magno argumento esse debet, apud eam

So-

Societatem, quæ paucis annis in hanc amplitudinem dignitatemque ob sanctimoniam ac bonas artes excrevit, non generi, neque opibus, sed virtuti ac probitati, honorem ac precium esse. Verum vix ex novitiis excessit, cum traditum sibi a moderatoribus suis Grammaticam & humaniores literas docendi munus accepit; quod tanta cum laude & auditorum suorum cum fructu administravit, ut ex ejus ludo, tanquam ex aliqua elegantis doctrinæ officina, complures, tum oratores, tum poëtæ, qui postea alios docuere, prodierint; ac mihi quoque, etiam tum puerulo, numerari in ejus auditoribus contigit; sed ob ingenii tarditatem mei, nihil fere ex tanti magistri disciplina sum assecutus, nisi ut possem gloriari, me Stephonii discipulum fuisse. Sed illud accidit admirabile, ut, quem ego in prima illa puerili institutione magistrum obtinuissem, eundem, postea in triennali Philosophiæ curriculo (nam totidem annis, illius doctrinæ quasi cursus expletur) condiscipulum habuerim. Ambo enim Mutio Vitellesco, philosopho præstantissimo, qui postea Societati Jesu Præpositus generalis præfuit, operam dedimus. At, non sine admiratione, videre licebat eum, quem ego puer metueram, ne, si unam peccavissem syllabam, haud mediocres a me pœnas exigeret, in illis philosophicis disputationibus, a me cavere, ne aliquo scite arguteque concluso argumento caperetur. Hoc interim spacio temporis, nobile illud drama S. Symphorosæ composuit, quod postea in collegio Rom. ad spectandum datum, tanta cum admiratione plausuque exceptum est, ut nunquam ab eorum qui interfuerunt animis, ejus dici memoria exciderit. Sed cum triduo ante, quam drama illud daretur, rogatu Stephonii eo venissem, ubi se actores exercebant, ac vehementer essem delectatus; seduxit me solum sibi Stephonius, atque, Quid tibi, ait, videtur isti Symphorosæ meæ actores? respondeo, Egregii atque præstantes; tum ille, At mihi probari non potest hic, qui Symphorosæ partes agit: non enim voce, gestu, ac forma corporis satis decet, immo propemodum mihi videtur abhorrere, & absurdus esse; quamobrem pergratum mihi feceris, si eas tute tibi partes sumpseris; sed

sed celeritate, opus est; nam necessario post tres dies agenda res est. Ego primo, brevitatem temporis deterreri, tum vix posse adduci, ut non sine gravi offensione eas illi partes adimerem, cui jam essent traditæ: sed cum ille, pro vetere nostra amicitia, me etiam atque etiam rogaret, ne sibi deessem, & insuper omni offensionis metu liberaret, tandem passus sum me exorari, atque ita ab eo animatus discessi, ut ea, quæ consecuta nox est, septingentos senarios ediscerem, & cum acta res est, adeo placerem, ut nomen commutarem, atque ex Iano Nicio Symphorosa fierem, neque deinceps alio nomine notior essem. Verum narrandi hæc causa, non gloriandi, scribo. Decurso igitur a Stephano Philosophiæ quasi curriculo, in quo non multum profecisse visus est; poëticum enim ingenium, quod toto mentis impetu ad versus faciendos ferebatur, inhiberi non poterat, quin aliquid commentaretur ac scriberet; immo non parum sæpe fiebat, ut quæ a magistro angustis & concisis disputationibus illigata traderentur, Latinis versibus explicaret; & spinosam illam ac difficillimam, tum ad intelligendum, tum ad explicandum, de ente rationis, quæstionem, in Philosophorum scholis agitari solitam, facetissime atque planissime, rhythmico Etrusco carmine complexus est: itaque confecto, ut dicere institueram, Philosophiæ quasi spacio, se ad docendum recepit, & aliquot annos in collegio Romano præcepta dicendi non exiguæ discipulorum frequentiæ tradidit. Scripsit etiam alias elegantissimas tragædias duas, videlicet Crispum & Flaviam, quæ etiam magno scenico apparatu sunt actæ; sed in Crispo, verborum ac sententiarum luminibus, omnes superasse videtur, qui post L. Anneium Senecam tragædias Latine scriptaverunt. Circumfertur etiam Macharonicum ejus carmen, quod Macharonis Forza inscribitur; quo nihil fieri potest in eo genere venustius. Neque melior fuit poëta, quam orator; nam quæ verborum copia, quis sententiarum splendor, quis eorum pigmentorum, quæ ornant ac distinguunt orationem, flos & color, orationibus ejus deest? quis duas illas insignes laudationes, qui legerit, unam qua B. Agnetem Politianam Virginem ex familia S. Domi-

minici, alteram, qua Flaminium Delphinum, Ferrariensem equitum magistrum, laudavit, desideret melius? Mortuus est Mutinæ; quo venerat, ut ejus Ducis liberos Græcis ac Latinis literis omnique humanitatis genere erudiret. Erat mediocri statura, colore subnigro, iisque oris lineamentis, quæ in antiquis Virgilii Maronis statuis videmus.

IO. FRANCISCUS CARETTONIVS.

Hic (quamvis longo intervallo) proximus, accessit Io. Franciscus Carettonius Romanus, non ultimo loco natus, Germanici Rastelli, medici non ignobilis, privignus. Fuit admirabili ingenii acumine, alacritate atque solertia. Ex principum virorum amicitii nobilitatem sibi quærebat & gloriam. Itaque quicumque in civitate, genere, honore, divitiis, opibusque pollebant, arcuissimò amicitie vinculo eos sibi devinctos habere studebat. Nam quæ habuit a natura in jocando leporem, in colloquendo venustatem, in cavillando acumen, præbebat illis cum multa conversatione magnaque hilaritate. Sed quoniam in ejusmodi amicitii occupatus, necesse habebat, fere semper domo abesse, & quia eorum, quos perpetuo colebat, potentia fretus, minus erat superioribus suis obsequens, fiebat sæpe, ut ab illis Vrbe pelleretur; ac semel etiam, inimicorum iniquitate, iussus est exulare; accusatus, quod ex animi sui libidine Cardinali a Monte, tum cum ille, annis morboque confectus, parum animo valebat, testamentum dictasset; quamvis paucis post annis, accusatorum malignitate detecta, revocatus sit in Urbem, ubi postea, annos natus duo & septuaginta decessit. Juvēnis, in collegio Romano, humaniores literas docuit. Summam eloquentiam sitam esse putabat non in verborum ac sententiarum magnitudine atque splendore, non in rerum atque argumentorum copia, nec in omni genere amplificationis, sed in sententiolis venustulis atque vibrantibus, breviter arguteque conclusis. Id quod, ut ipse taceret, illa ejus oratio docebat, ad Clementem VIII, in Parasceve habita, quam unicam edidit, quam-

que, ut Cicero consulatum suum, ita semper in ore habebat. Namque concisa, ac membris minutioribus capta, tot fere argutiis sententiarum referta erat, quot verbis; in scholastico pulvere peringeniosis adolescentibus illustris; sed nec Summ. Pont. auribus satis digna, nec augustissimo illi Patrum purpuratorum senatui apta. Verum utut ea sit (quamvis non defuerunt viri prudentes ac docti, qui per eam rationem a Ciceronis ac veterum imitatione recedi clamarent,) eam tamen homini apud suos eloquentis existimationem nomenque consecit, ut habitus sit idoneus, cui Societatis suæ annalium confectio demandaretur; quod statim homo, ceteroqui vir probus, gloriæ & ostentationis causa divulgavit, ac me nonnullisque aliis audientibus gloriatus est, perfecturum se, ut omnes intelligerent, neminem eorum, qui viverent, majore quam ipsum, eloquentiæ ceterarumque virtutum instructu apparatuque ornatum, ad scribendam historiam accessisse: sed tam magnificum dictum, utpote plenum vanitatis ac spiritus, tenues abiit in auras, nec adhuc annalia, quæ nemo unquam est inspecturus, apparent. Habuit etiam ad collegium Cardinalium, in Basilica Vaticana, funebrem Clementis VIII laudationem; quam etiam fuisse editam ajunt; sed nunquam ego, quod meminerim, vidi. Nullam a sua Societate majorem sibi provinciam commissam accepit, quam earum sodalitatum administrationes, quæ in ejus collegiis ac domibus, ex adolescentibus aliisque hominum ætatibus ac generibus constant. Itaque, tum Perusii, tum Romæ, tum alibi, ejusmodi sodalitiis diligentissime præfuit; sed illud in primis Romæ multos annos rexit, quod ex viris nobilibus in domo professa colligitur. Verum, quamcunque in sodalitatem venerat, continuo omnia subvertebat permiscebatque: nam & veteres mores abolebat, novosque inducebat, & longo usu receptas leges vel corrigebat, vel infirmabat, vel novas sanciebat, multa in ritibus ac cerimoniis quotidie excogitabat inveniebatque. Erat ore macilento atque invenusto, sed nigris oculis ac vegetibus; corpore sicco, sed sano, voce acuta, sed efficaci; verbis abundans, ita tamen, ut nemini esset oblocutor, sed suam cui-

que

que sermonis partem relinqueret; multæ in eo facietæ, magna exemplorum ac sententiarum copia, quæ illi suorumque loco veniebant in mentem, ubi vel risum movere, vel proficere aliquid possent. Nihil cuiquam nocuit, sed profuit plurimis; & qui intulerunt illi injurias; haud inultas eas abstulerunt; inprimis ille, qui de hæreditate Cardinalis a Monte tantam ei invidiam periculumque creaverat, vix diebus octo post eum diem, quo hæreditatem adierat, est lethalis morbi vi impetueque consumptus.

POMPEIUS VGONIUS.

Optimis atque sanctissimis Concilii Tridentini legibus sanctum est, ut in quavis diœcesi plures adulescentes clericali alantur, ex quibus, liberalibus disciplinis, sacris præsertim, institutis, Sacerdotes ad quævis Ecclesiastica munera, & ad curam animarum in primis, capiantur; quorum domus Seminaria appellantur. Itaque cum Romæ complurimum præstanti ingenio adolescentium delectus haberetur, venit in hunc numerum Pompejus Vgonius, qui in perdiscendo ita multorum cursum, ingenii celeritate, transcurrit, ut illi vix in eodem curriculo fuisse viderentur. Nam is, ut ita dicam, jam ad calces pervenerat, cum illi pene e carceribus prodissent. Sed præsertim eloquentia, tum in soluta oratione, tum in numeris adstricta, pluribus præstitit. Erat illi orationis genus purum, liquidum, enucleatum, ac profuens, sine cincinnis fucoque puerili: quod quia Jacobo Cardinali Sabello, cujus imperio Seminarium regebatur, in primis probabatur, tali ingenio, familiarium suorum numerum auxit; & quoniam res illi erant pauperculæ, adeo ut ferme ad necessarium usum omnia decessent, sacerdotium eidem, in Basilica D. Petri Vaticana, satis locuples impetravit, unde suppeditare suis sumptibus posset. Hinc coëptus est adhiberi ad funebres summorum Pont. Cardinalium, aliorumque clarissimorum virorum laudationes habendas, ac primum, Card. Sabellum, tum Urbanum VII, Leonem XI, ac sæpius Leonem X, Cardinalem ab Austria, Salviatum, aliosque

laudavit. Habuit etiam alias quoque orationes egregias, in sacello Pontificio, in gymnasio Romano, aliisque publicis in locis, quæ vagæ atque dispersæ, a religioso viro & Vgonii famæ studiofo, in unum volumen coguntur, ut in vulgus edantur. Verum sermonis elegantia, quam actionis etiam dignitas decorabat, eam sibi eruditi eloquentisque viri famam consecerat, ut ad humaniores literas in gymnasio Romano non levi stipendio, cui deinceps aliqua semper accessio facta est, iuventuti tradendas, evocatus sis; quem antea locum M. Antonius Muretus, eruditione eloquentiaque, omnium ætatis suæ facile princeps, obtinuerat: quod munus Vgonius, non sine laude, usque ad extremum spiritum vitæ sustinuit. Docuit etiam eodem tempore Rhetoricam in collegio Salviato. Instituerat per id tempus Ascanius Card. Columna, M. Antonii filius, insignem domi suæ bibliothecam, ejusque custodiam Vgonio mandaverat; quam ille occasionem nactus, cum abundaret copia librorum, vernacula lingua, insigni volumine, quod postea edidit, earum Ecclesiarum historiam complexus est, quæ per dies singulos Quadragesimæ, Pop. Rom. frequentia celebrantur. Verum cum ex iis muneribus, quæ diximus, octingentos fere quotannis aureos caperet, homo in re familiari tuenda indiligens, & vanis in rebus occupatus, semper egebat, & in magno ære alieno inveniebatur; adeo ut non esset, unde mortuo funus fieret, nisi Petri Card. Aldobrandini, qui eo tum ad bibliothecæ suæ custodiam utebatur, benignitas subvenisset; qui aliquot ad id aureos, cognatis illius deferendos numerandosque curavit. Reliquit historiam earum Ecclesiarum, quas diximus, & carinimum volumen.

AVRELIVS VRSVS.

OMnia fere Romanorum adolescentium ingenia, prima illa satiatione in eam, de qua diximus, domum, tanquam in aliquam segetem, data, magnos atque uberes ex se fructus dedere; ut Hieronymus Badesla, in quo magnum fuit Cardinalis ejusdem Sabelli aulæ ornamentum

tum & decus; & Septimius Cininus, qui eleganti ingenio, atque omni liberalium artium genere excultus, nunquam potuit, ex adverſe fortunæ egeſtatiſque ſordibus, ad aliquas opes & honores emergere; aliisque, quos domus illa, velut ager, extulit. Nec mirum. Nam tum locus ille non dabatur commendationi & gratiæ, ſed ſolum virtuti induſtriæque patebat; neque quisquam cum in numerum admittebatur, niſi cujus ingenii periculum factum eſſet in literis. Verum ex omnibus, qui in ſerili illo ſolo ſati, magnos ex ſe truncos ramosque procrearunt, Aurelius Virſus in eam altitudinem excevit, atque ita late ramos effudit, ut umbræ magnitudine multorum luminibus officeret, vel inter eos potius, tanquam inter virgulta, cypreſſi inſtar habere videretur. Qui quamvis, in omnibus iis artibus, quibus ſe dediſſet, nemini æqualium ſuorum cederet, tamen omiſſis ceteris ſtudiis, præſtantiffimum ingenium contulit ad epigrammatiſcribenda, in quibus adeo excelluit, ut ætas noſtra habeat, quem non modo cum veteribus illis, qui in hoc eodem carminis genere verſati ſunt, Latini ſermonis puritate, nitore, elegantiâ, ac ſententiarum acumine conferat, verum etiam eiſdem anteponat. Ut Urbanus VIII, poëtarum maximus, non alio magiſtro ſe jaceret, atque de extruendo eidem e marmore ſepulchro cogitaſſe dicatur. Ex huius quaſi luminis claritate, Alexander & Odoardus, Cardinales Farnęſii, avix ſuz ſplendorem quæſiere; in quorum domo heroico carmine Alexandri Ducis res geſtas complexus eſt, præclaro illo quidem, ſed nequaquam ejus laudibus anteponendo: nam in eo eſt inventus ſe ipſo inferior. Ea erat ingenii celeritate elegantiaque, ut in amicorum conventibus & in conviviiſ, ſi ſe daret occaſio, argutiſſima epigrammata funderet ex tempore; ut in ſeceſſu Caprarolæ acceſſiſſe narratur, ubi æſtivo tempore aulici omnes, qui in comitatu eorum Cardinalium erant, tum mane tum veſperi una convivium agitabant: nam cum ad eos, qui in prima atque ultima menſa ſedebant, utpote vel munere, quod gererent, vel generis nobilitate ceteris præſtantes, pulli, lepores, artocreata, placentz, aliaque ejusmodi delicata obſonia confluere, eorum

autem ventribus, qui mensæ medium tenerent, paucorum ac vulgarium ciborum commeatus properaret, in illorum, qui longe nitidius aliis curarentur, felicitatem lepido epigrammate, hoc hexametro carmine concluso, facetissime ludit: *Errant, qui dicunt, medium tenere beatum.* Mortuus est, non admodum ætate proventus, cum elegantissimum carminum suorum librum edidisset.

ANTONIUS ONGARUS.

Inclita Farnesianorum Principum aula, non solum rerum gestarum gloria, verum etiam optima quæque ingenia alendi fovendique laude floruit. Etenim jam inde usque ab ejus nascentis exordio, exquisitos, e toto orbe terrarum, liberalium artium antistites evocavit, ornavit opibus, & honoribus auxit. In iis numeratur Antonius Ongarus, poëta perfacetus ac dulcis, cui si longius tempus ingenii augendi & declarandi fuisset, poëticum illius ingenium ad summam poësis laudem pervenisset. Nam, ut illis rhythmis apparet, qui adolescentium ingeniosiorum manibus teruntur, multa ejus sunt egregie inchoata, nihil plane perfectum, quod celeri morte interceptus, extremam illis manum addere non potuerit. Edidit etiam insignem fabulam piscatoriam, Amaryllidi nomine; quæ quoniam eodem erat argumento, quo olim Torquatus Tassus Amyntam suam, pastoritiam Eclogam, fecerat, & quia per maritimos homines, & in aqua, more piscium, vitam agentes agebatur, sicut illa a terrestribus ac montanis; vulgo, joci causa, Amynta madidus appellabatur. Neque in illo lepido facetoque carminis genere minor est habitus, in quo Bernia princeps enituit. Nam Franciscum Panicarolam, concionatorem sui temporis longe eloquentissimum, per epistolam facetissimam adiit, rogans eum, ut novem speciosissimas virgines, summo loco natas, novem videlicet Musas, ad egestatis terminos prope redactas, populi misericordiz commendaret; ac meretricem in primis nobilem, quæ suas immani precio scortatoribus noctes elocabat, in hanc sententiam Etrusco facetoque allocutus est carmine:

*Si mihi nocte una contingant gaudia de te,
 Efficiam futuro nitidoque ex are capillos
 Ipse tibi, oraque mista rosis nrisque ligustris,
 Atque ebore ex Indo pectus collumque cornu scum;
 Et reddam roseis spectanda labella pyropis,
 Vnionumque simul, pro dentibus, agmina tradam.
 Quod tibi si nummi potius, quam munera tanta,
 Sunt cordi, jam lata vale; nil te moror ultra.*

Obiit florenti etiam tum ætate, magno iis, quibus erat
 unice carus, dolore ac luctu relicto.

IOSEPHVS CASTALIO.

SI egregia optimi cujusque in Rep. civis virtus atque præstantia ad ejus urbis, in qua natus atque altus est, laudem & gloriam pertinet, est profecto quod Ancona, Iosepho Castalione cive & alumno suo, se jactet atque gloriatur. Ita enim docte, ita eleganter, ita commode scripsit, tum soluta oratione, tum versibus, ut sit difficile judicare, utrum ille melior fuerit orator, quam poëta; ita artium elegantissimarum scientiam, antiquitatis notitiam, Græcæ Latinæque linguæ eruditionem, cum dicendi elegantia varietateque conjunxit, ut non posses statuere, utrum verborum magis, quam rerum copia, ejus redundaret oratio. Plura edidit opuscula, quam quisquam alius, qui una esset ætate: nam domi semper aliquod sive carmen, sive orationem, sive eruditam de re aliqua dubia disceptationem, sive de Jure civili controversiam (fuit enim I. C.) constructam habebat, quam foras, cum esset opus, emitteret. Scripsit Sylvii Card. Antoniani vitam, quem tum rationibus, tum publicarum tabularum testimoniis, ab eorum calumniis vindicare conatus est, qui illum a parente, minus justa uxore, genitum asserebant; variarum lectionum libellum, aliumque de antiquis puerorum prænominibus opusculum a se elucubratum edidit; eruditum item de columna triumphali Imp. Antonini commentarium, Sixti V Pont. nomini inscriptum emisit; aliaque plura frequenter typis excudenda curavit, quibus nominis sui famam posteritatis memo-

rix commendaret, ac propemodum extinctam apud transalpinos de Italorum eruditione laudem revocavit. Audivi de Meursio Batavo, se fuisse Lugduni Batavorum, cum illuc est allatus hujus variarum lectionum liber, atque fuisse eum omnium cum risu exceptum, quod existimaretur, luteum esse negotium, nec dignum quod lucem aspiceret, quoniam nullum jam diu eruditum opus ab Italia prodisset; sed simul inspectum, adeo probatum esse, ut sententiam mutaverint, statuerintque, esse Italici ingenium, dummodo adsit studium & exercitatio. Docuit humaniores literas Thomam primum de Avalos, tum Ducis Sorzæ filios. Vxorem forma egregia & florenti adhuc ætate, Corneti, quam urbem Prætoris nomine administrabat, amisit.

HIERONYMVS MAGAGNATVS.

QVoniam non est unum ac simplex scribendi carminis genus, sed varium ac multiplex, quæque in eo continentur, quamquam dissimilia inter se, consimili laude dignantur; ideo inventi sunt plures, qui in dispari carminum ratione parem sunt laudem consecuti. Sed quid ego vetera conquiram, cum mihi liceat recentibus uti exemplis? Hieronymus Magagnatus, non Ducum maximorum res gestas, epico atque sublimi complexus est carmine, non adversas Regum fortunas deducens in actus & populo spectandas proponens, tragica est in arte ampullatus; nec teneros puellarum amores lepidis versibus ac mollibus ludit, neque rura ac pascua cecinit; sed res ludricas incredibili venustate tractavit, sed in primis obscenas ac turpes, nec turpiter nec obscene, sed honestis vocabulis atque translatis pluribus inter se connexis, ut aliud dicatur, aliud intelligendum sit, ea hilaritate iisque facetiis exposuit, ut hac in re par ei laus, atque iis, qui in dissimili scribendi genere versati sunt, tribuenda esse videatur. Scripsit etiam faceti carmine Regum Romanorum vitas; quæ sunt quidem in hoc genere elegantissimæ, sed nihil ad ea, quæ sub honestis nominibus turpe argumentum includunt; in quibus ita præstitit, ut, mea sententia, omnibus, qui ad hanc

hanc diem idem sunt conati, palmam eripuerit. Diu commoratus est Romæ, ubi facetissima illa poemata, de quibus commemoravimus, fecit; sed cum ibi fortuna minus ex animi sententia uteretur, ea urbe relicta, Venetias se contulit, ubi fere perpetuo, quod reliquum vitz fuit, exegit.

DOMINICVS GYMNASIVS.

EST oppidum in Æmia, Castello Bononiensi nomine, quod semper Romam insignem aliquem, vel doctrina virum, vel Reip. bene gerendæ scientiæ præditum, misit. In his ætate nostra Dominicum Gymnasium, patre medico ea tempestate facile principe genitum, attulit; qui medicæ facultatis laudem una cum maximis divitiis a parente relictam neglexit, atque totum se, primum ad juris civilis rerumque divinarum scientiam, tum ad Remp. capeffendam contulit, ac virtutis via ad sacræ fastigium purpuræ per omnes honorum gradus ascendit. Quo in munere fuit purpuratis omnibus exemplo, quibus potissimum in studiis, quod vacui a negociis temporis datur, æquum sit contere eos, quorum præsidio res præsertim Christiana munitur. Nam duobus voluminibus editis, omnes Regiæ vatis psalmos, ex sanctorum Patrum sententia, interpretatus est. Vixit usque ad extremam senectutem; ac paternis in ædibus, quas ipse maximis sumptibus, regium plane in morem, auxerat, perpetuam sacrarum Deo virginum sedem domiciliumque constituit; atque aliquam earum partem studiosis adolescentibus popularibus suis attribuit, ubi victus illis quotidianus præbeatur, quoad a magistris liberalibus disciplinis instituuntur. Verum ille, anteaquam honorem purpuræ adipisceretur, Nuncius Apostolicus profectus est in Hispaniam; quod ibi munus ita Clementis VIII ex animi sententia gessit, ut honore illo dignus existimaretur.

AVGVSTINVS VALERIVS.

AVguſtinus Valerius Venetus, ab origine ultima ex patricia ſtirpe genitus, jam inde ab ineunte ætate bonis artibus, ac pietati ac religioni in primis deditus fuit; neque id commiſit, quod non parum multi committunt, ut elegantiam doctrinæ a vita probitate ſejunctam haberet: & cum primum a Patavino gymnaſio optimis diſciplinis inſtitutus, Venetias ſe recepit, moraliſ Philoſophiæ præcepta, quæ a magiſtris acceperat, publice ſuis civibus tradidit; ita tamen, ut non tam verborum ac ſententiarum copia, qua multis præerat, quam moribus, cum ea diſciplina, quam profitebatur, congruentibus, honeſtæ vitæ præcepta, auditorum animis propemodum inſigere videretur. Nunquam enim in eo, ſive privato, ſive Cardinali, ſive Epifcopo (cum ex paſtoris munere, quod gerebat, grex ſibi commiſſus, ad ſanctiſſimos mores & Chriſtianæ vitæ diſciplinam erudiendus erat) in eo, inquam, illud ita abſonum, ita abſurdum, ita diſcrepans exitit, quod tantopere reprehenditur, nimirum diſſidium cordis & linguæ. Etenim, ex Caroli Card. Barromzei, cujus res geſtas ſcripſit, exemplo, plus dabat, quam prædicabat, ex ſe pietatis, religionis, ſanctitatisque. Latinas literas a viris ea tempeſtate erudiſſimis, quique eloquentiæ principatum tenere exiſtimabantur, didicit. Loquebatur Latine expedite atque dilucide: itaque ejus oratio nitida, profluens, ac ſedato amni ſimilis erat; at cum vulgari ſermone erat dicendum, inveniēbatur ſui diſſimilis: nam hæſitabat, & in verbis inveniendis collocandiſque, cum ea ad voluntatem non ſequerentur, hærebat. Sed ſumma popularium ſuorum, nobilium præſertim, voluntate creatus Epifcopus, per multos annos, admirabili quadam laude, Veronenſi Eccleſiæ præfuit. Deinde abſens, a Gregorio XIII in Cardinalium numerum delectus, magno, tum ordini illi ampliſſimo, tum patriæ, cujus erat amantiſſimus, ſplendori ornamentoque fuit. Supra centum ac viginti opuſcula Latino ſermone ſcripſit, atque eadem lingua undeviginti dialogos, de æſtivo

canis ortu, quos in aula maxima *Ædium S. Marci* Romæ recitavit. Scripsit alia complura, tum Latine, tum vernacule, quorum argumentum nullum est aliud, nisi de rebus sacris, vel ad mores componendos pertinentibus. Verum annos natus quinque & septuaginta ac plus eo, cum a Paulo V. Venetiz sacris interdictæ essent, conjectus in morbum, ex ægritudine, Romæ decessit.

IO. IUVENALIS ANCINA.

NUllum, ex Christi domini sententia, ne excogitari quidem potest, neque certius, neque clarius egregii pastoris documentum, quam si ille nullos pro ovibus sibi traditis labores subterfugiat, nulla pericula reformidet; nullos corporis animique cruciatus doloresque deprecetur. Etenim, hac una præsertim in re, verus pastor a simulato, gratuitus a mercenario, dignoscitur. Verum hac nostra ætate, Io. Iuvenalis Ancina Salutarum Episcopus, si quisquam alius, perfecti functus est munere pastoris atque Pontificis; qui non modo innumeros pro Ecclesia sua labores suscepit, ac maxima pericula adiit, verum pro ea etiam mortem non recusavit oppetere. Nam cum improbum religiosæ cuiusdam familiz virum a sacrarum Deo virginum septis repelleret, qui circum loca illa, magna hominum cum offensione, obambulabat, ab eo creditur per summum nefas veneno fuisse sublatus. Ortus est Fossani, in Subalpina, patre honesto ac probò; qui docile pueri ingenium magistris tradidit, liberalibus disciplinis erudendum. De cuius profectu existimare licet ex versibus, quos adolescens scripsit elegantissime; ac præsertim ex eo poemate, quod de Academiz Subalpinæ laudibus edidit. Erat autem in puero, præter docilitatem ingenii, summa probitas, quam nec liberior vivendi potestas, nec ætatis fervor, nec lubricæ adolescentiæ viz, de statu dimovere potuerunt; sed semper recta omnem vitæ suæ cursum, sine casu ac prolapsione, confecit: quare constans erat omnium opinio, nullam eum unquam pudicitiz suæ vel alienæ labem intulisse, sed usque

ad

ad extremum vitæ spiritum se integrum incorruptum-
 que servasse. At posteaquam robustior est factus, medi-
 cæ artis, cui, post primam illam puerilem institutionem,
 studium suum dederat, docendæ exercendæque faculta-
 tem adeptus est; quo in munere ita se præbuit, ut brevi
 in cisalpinis regionibus celebratum suum nomen esset,
 eumque Federicus Madrutius, qui ducis Sabaudie pri-
 mum, tum Rodulphi Imperatoris Orator, Romam
 est profectus, medici loco secum adduxerit. Vbi viros
 longe doctissimos consuetudine sua sibi devinxit; vide-
 licet Franciscum Toletum, Martinum Navarrum, M.
 Antonium Muretum, Robertum Bellarminum, Syl-
 vium Antonianum, Franciscum Panigarolam, aliosque,
 qui inter doctos eruditosque principatum obtinebant.
 Verum cum illi pietatis igniculi, quos, cum illo ortos
 diximus, ita crevissent, idque illi in pectore & in corde
 incendium facerent, ut non posset obsisti; de tota vitæ
 ratione commutanda cœpit cogitare; ac primum Galeni
 medicorumque disciplina, a qua profectus fuerat, relicta,
 ad Thomæ Aquinatis Theologorumque scholam con-
 fugit: sed admirabilis vis ingenii non desideravit legiti-
 mum ejus doctrinæ, tanquam percurrendæ, tempus, sed
 brevi latissimos ejusdem quasi campos est mira celeri-
 tate emensus, ac sacris sacerdotalibus initiatus, deinde
 non istis sese terminis continuit, sed conatus est etiam
 intra cucullatorum fratrum septa se claudere: verum S.
 Philippi Nerci oratione, cujus arbitratu omnes vitæ
 suæ rationes administrabat, est a proposito deterritus,
 jussusque sacerdotum suorum numerum augere; in qui-
 bus quatenus omnium virtutum laude progressus sit,
 illud est argumento, quod jam diu de eo in sanctorum
 numerum referendo agatur. Multa ac pingua sacerdo-
 tia, ultro ipsi oblata, repudiavit: sed tandem non potuit
 effugere, quin gravissimo Episcopalis muneris oneri,
 Clementis VIII jussu, cervices subjiceret. In eo vero
 animi sui moderationem, atque animarum salutis non
 utilitatis suæ studium, declaravit, quod aliquot ipsi pro-
 positis Ecclesiis, rectoribus suis orbatis, ejus, quam
 vellet, eligendi optio data esset, eam amplexus est, quæ
 esset ceteris opibus inferior, sed laboribus periculisque
 su-

superior, Salutarum nimirum Cathédram, in cujus dice-
cesin Calvinianæ hæresis contagio pervaserat. Hujus
de vita & moribus plura persecuti sumus in eo libello,
quem separatim de eo scripsimus; ad quem, qui plura
scire expetunt, delegamus.

COMES FAVSTVS VERDELLVS.

Comes Faustus Vérdellus, Cremæ vetere ac nobili
profapia ortus, a puero patria relicta, omnem fere
ætatem procul ab ea habuit. Sed plurimum versatus est
Venetiis, ibique Ducum Bavariz aliorumque virorum
principum negociis, summa cum fidei ac probitatis
laude præfuit, non sine aliqua ejus senatus offensione;
cui solet esse molestum, vel suspectum potius, hominem
sibi subjectum exteriorum Principum dare operam ne-
gociis. Sed cum in hoc vitæ genere, atque in ea urbe,
multos alienis rebus annos tribuisset, quod reliquum
erat vitæ, sibi deberi statuit. Itaque Romam ad acqui-
rendas colendasque Cardinalium amicitias se contulit;
quorum plures, suavissimis suis moribus, ac libero in-
genuoque ingenio, adeo sibi devinxit, ut eis familiaris-
sime uteretur, ac domi suæ locum præberet, ubi ipsis
lepide esset, ubi convivium inirent, ubi ad omnem ani-
mi remissionem hilaritatemque cum illo descenderent.
Illud vero mire pium hominis animum religiosumque
declarat, quod cum nec sacris initiatus esset, nec talari
tunica pallioque uteretur, sed in sago brevique pallio
incederet, omnia Ecclesiæ tempora, tum secunda tum
adversa, inde ab ejus nascentis exordio usque ad nostram
ætatem, pluribus voluminibus persecutus est; quorum
primum, quod annorum mille res gestas amplectitur,
edidit; reliqua alia, præter unum, cognatorum negli-
gentia interierunt; quæ fortasse illi causa fuit Romam
veniendi, ut bibliothecæ Vaticanæ, in quam multas se
horas interdum abdebat, sibi fores paterent. Sed annos
jam nato octuaginta venit illi in mentem patriam invi-
sere, ibique paxillulum, quod reliquum erat, vitæ per-
agere; verum homo, ætate exacta, mitique Romanæ
aëris temperiei assuefactus, cœli, cui ab ineunte ætate se
sub-

subduxerat, vim varietatemque perferre non potuit: itaque paucos post menses, quam ab urbe discesserat, extremum ibi spiritum, ubi primum hauserat, edidit.

MVTIVS ODDVS.

Lætantio Oddo Vrbinati, cohortis militum Vrbinatium Duci, pridie idus Octobris anni MDLXIX natus est filius; cumque incertum esset, quo eum nomine appellaret, placuit rem totam semel atque iterum ad sortem rejicere, atque plures in urnam sortes, variis nominibus scriptas, iniecit, ut quod nomen exisset, id puer, tanquam cælitus datum, obtineret; atque bis fors educta est, in qua Mutii nomen erat inscriptum: itaque appellatus est Mutius, atque alendus nutrici traditus, quæ filiam utroque limine captam ediderat; quo factum creditur, ut ille vim longius aspiciendi amitteret. A prima adolescentia delineandi artem, a Federico Barovio, pictore eximio didicit; sed cum non posset, quia prospiceret parum, id, quod delineasset, coloribus vestire, se ad Mathematicarum artium studium transtulit, Barovio ipso hortatore, a quo monstrante, eam partem, quæ pertinet ad prospectum, acceperat; atque incredibili discendi studio inflammatus, impetravit a patre, ut proficeretur Pisaurum, quo Io. Baptistæ a Monte, Mathematico præstantissimo ac singulari doctrina prædito, operam daret; quo duce & magistro, ingenii docilitate, celeriter adeo ad intima reconditæ & multiplicis subtilisquæ ejus artis penetralia pervenit, ut in summa Io. Baptistæ laude ponatur, quod vir talis ac tantus ab ejus disciplina prodierit. Neque id Io. Baptista ipse non intellexit, qui in quodam opere, quod edidit, tanquam in publicis tabulis, Mutium sibi discipulum contigisse gloriatur. Verum ubi ex scholastico illo pulvere atque umbratili exercitatione excessit, statim id, quod didicerat, in aciem & solem eduxit. Nam profectus in Burgundiam ad bellum cum auxiliaribus copiis, a Duce Vrbini sub Alexandri Brunonis ductu imperioque missis, bellicis machinis instrumentisque ad expugnandas urbes inveniendis præfectus, quantum in ea arte didi-

uisset, ostendit. Tum Francisco Mariæ II Vrbinaturni Duci navavit operam architectus, quo tempore Clemens VIII Pont. Max. Ferrariam proficiscens, Vrbino iter fecit. Verum quia ii, qui in aulis Principum agunt, tanquam edito in loco positi, ab omnibus ventis invidiæ circumstantur, iique præsertim, qui sunt insignes ad laudem, ideo bis in magnum vitæ discrimen incidit; semel, cum in quodam Ducis negotio indigentia, ne dicam fraudis, insimulatus, necesse habuit adversus iniquorum calumnias se famamque suam armis existimationi hominum vindicare, atque exilium patria sede commutare; iterum, cum rebus suis compositis, in patriam revocatus, ex epistola, in perâ Ducissæ inventa, in qua Mutii nomen erat inscriptum, venit in suspicionem, egregie cuiusdam cum Hippolyto a Ruere, Ducissæ patre, familiaritatis, a quo Dux capitali odio dissidebat. Nam Pisauri conjectus in arcem, singulis fere diebus expectabat, dum secuti feriretur: id enim sibi fatum eo anno instare conjecerat ex affectione cæli, qua primum spiritum duxerat; id ipsi astruente Magino; qui ex vana atque inutili Mathematicorum disciplina simul adjecerat, si potuisset ejus anni calamitatem effugere, nullum ipsi posthac a securi periculum fore, sed multos annos lætos felicesque portendi. Eo igitur anno, unde tantus fuerat metus, elapso, cœpit ad se animum revocare; atque in emporia hibula charta (non enim melior suppetebat) carbone, in styli formam ædificato, instituit librum de horologiis conscribere, nullo librorum auxilio sublevatus; & quia erat periculum, ne literæ, male chartæ hærentes, exciderent, primum rationem invenit, qua bibulæ chartæ inter se plures cohærent; tum in nucis juglandis putamen, tanquam in atramentarium, gossypii loco, lanam et culcitra detractam intulit, & carbone aqua diluto imbut, in quam calammum ex arundine factum intingeret; postremo circum, ex duobus olivæ ramulis, lino compactis, extruxit; ac per hanc rationem eos omnes libros composuit, quæ Mediolani ac Venetiis impressi feruntur: videlicet, de Norma, de Fabrica usuque circini polymetri, de Horologiis solariis. Sed demum e custodia dimissus est, ac

Mediolanum relegatus, ubi de novo Mathematicarum disciplinarum doctore atque magistro in demortui locum subrogando agebatur; & quoniam locus ille a competitoribus multis expetebatur, statutum fuerat, ut literario certamini res tota committeretur, in quo, qui superior fuisset, illum obtineret: at non potuit se continere, quin ipse quoque una cum aliis in eam arenam descenderet; & factum est, ut pedem inde victor cum plausu referret, eamque docendi provinciā acciperet; quæ fuit causa coniungendæ cum Card. Trivultio aliisque summis Mediolanensibus viris amicitiae, quos perpetuo auditores habebat. Ducis etiam Feriz animum sibi devinxit, cum est missus ab eo, ad referendas urbium quarundam, situ manuque munitarum, descriptiones; a quo etiam torquem aureum pene trilibrem, muneris & honoris ergo accepit. Verum cum jam senex, aureorum aliquot millibus a Lucensi Rep. cui utilem ac fidem operam præstiterat, locupletatus, domum se recepisset, ut ibi in ocio patriæ prodesset; invitatus est a Card. Trivultio, mensuris centenis aureis Mediolanum, ut ibi unus omnibus militaribus machinis præficeret, suamque in cunctis de bello consiliis sententiam diceret. Sed has aliasque honorum ac divitiarum spes magnas mors importuna XVIII Kal. Januarii MDCXXXI diremit. Moriens opes, tanto a se labore partas, divino cultui amplificando attribuit: nam in præcipua Urbis ecclesia, ad veterum Canonicorum numerum alios ex eis duos addendos adscribendosque, testamento mandavit.

CHRISTOPHORVS CLAVIVS.

Quoniam in superiori capite facta mentio est de insigni ad mathematicas laudes viro, jam non potest sine piaculo præteriri Christophorus Clavius, Mathematicorum nostri ævi facile princeps; quamquam ea est hominis claritas, ea ex suis ipsius scriptis notitia, ut nihil cuiusquam laudationis officium efflagitet. Hic Bambergæ in Germania natus, statim a puero ad studium dimetiundi cæli ac terræ, ad quod fuerat a natura factus,

acu-

acutissimum perspicacissimumque ingenium suum contulit; atque adeo recondita illa in arte & multiplici subtilique versatus est, adeo in summa mathematicarum rerum obscuritate se gessit, ut, tanquam si in obscurissimas aliquas regiones venisset, ingenii, quo præstabat, lumine magnum illis splendorem & claritatem attulerit: & quo perspicacior ad eas res cognoscendas & illustrandas accederet, cum non esset nescius, nullas esse crassiores iis tenebras, quas animis peccatum offunderet, ut suum integrum ab omni labe fervaret, in Societatem Jesu, tanquam in munitissimam instructissimamque divinis præfidiis arcem se recepit, atque intra ejus claustra se contulit, ubi perpetuo, quoad vixit, clarissimum innocentie, demissionis animi, virtutumque omnium exemplum illinxit. Nullam ille Mathematicæ disciplinæ partem intactam reliquit, immo nullam emisit, quam non penitus intelligentia comprehenderit, dilucide explicateque docuerit, doctissimisque interpretationibus, tanquam nutrices omnia minima mansa infantibus in os inferunt, ita ille auditoribus suis, quo facilius perciperetur, quasi comminutam tradiderit. Cujus rei testem non alium, me ipso locupletiore, possum adducere; qui, cum sim ingenio non ita acuto ac perspicaci, immo ad ea, ad quæ percipienda acris hominum intelligentia postulatur, hebetæ actardo, omnia tamen, quæ ab ipso dicerentur, ita assequi mihi videbar, ut etiam ausus sim, ipso audiente, mathematicum problema publice explicare. Quæ quidem tanta, in rebus obscurissimis & ab hominum intelligentia remotissimis, aperte atque dilucide tradendis facultas intimam planeque perceptam rerum earum notitiam scientiamque declarat. Atqui, ex omnibus ejus lucubrationibus, quibus in lucem prolatis, nominis sui memoriam, omnium seculorum posteritati commendavit, Euclides, & sphaera Io. de Sacro Bosco, commentariis illustrata, est talis, ut in arce poni possit, quasi Minerva illa Phidie, in qua nihil est nisi absolutum atque perfectum. Verum in istud etiam tantum atque immortalitate dignum ingenium sæva mors, cui nihil est eximium, nihil intactum, nihil sanctum, vim & crudelitatem suam exercuit; sed

in eo sevitæ suæ modum adhibuit, quod non antea est illi ausa manus afferre, quam maturitatem suam adeptum eum esse vidisset: nam senex Romæ in collegio suæ Societatis est mortuus. Fuit corpore procero plenoque, facie hilari, quæ omnium sibi amorem ac reverentiam conciliaret.

ALOYSIVS LILIVS.

NVnquam Aloysii Lilii Calabri memoria ex hominum animis excidet. Hic, medicus ac philosophus doctissimus, solus perfecit, quod multi excogitarunt, pauci attigerunt, nemo persolvit. Nam cum ita essent fasti perturbati, ut vix temporum ratio congrueret; Romani Pont. de iisdem corrigendis, sedulo cœperunt excogitare, ad id præsertim, ut Paschatis festorumque dierum ex eo dependentium recursus, ex certa ratione competerent; sed cum usque ad Gregorii XIII. Pontificatus annum decimum, nemo ex cælestium motuum peritis (ob magnas ac fere inexplicabiles difficultates, quæ ab ejusmodi emendatione non poterant esse sejunctæ) constanti ratione, ac sæculis omnibus duratura, quæ in fastis collapsa esset, restitui posse ostenderet; delatus est Gregorio XIII ab Antonio Lilio, Aloysii germano fratre (nam ille decesserat) exiguus mole libellus, sed re maximus, qui rationem, qua fieri id posset, breviter ac dilucide complectebatur: nimirum, ut ex mense Octobri anni 1582 decem dies eximerentur, ut quo die, verbi causa, esse oporteret IV nonas Octobris, idus ejusdem proscriberetur; ita enim fore, ut deinceps anni tempora cum solis lunæque ratione congruerent, & quod caput est, æquinoctium vernum in eam sedem rediret, unde post concilium Nicenum, decem dierum spacio aberraverat. Itaque liber, pluribus exemplis descriptus, missus est in omnes orbis terræ Academiæ; præterea delecti hic Romæ complures doctissimi in hoc genere viri, in quibus Christophorus Clavius principem locum obtinebat, quorum ille censuræ subjiceretur; sed diligenter, quæ ille afferret, inspectis excussisque, summa omnium approbatione receptus est, affir-

matumque, nihil eo fieri potuisse perfectius. Quocirca Rom. Pontifex amplissima constitutione decrevit, ut, veteribus factis explosis ejectisque, deinceps, quæ essent ab Aloysio correctæ emendatque, ad Pascha, eosque dies festos, qui ab eo derivarentur, inveniendos celebrandosque adhiberentur. Quamobrem tantum hominis ingenium, unde tam ingens utilitas fructusque Ecclesiæ universæ emanavit, dignum est, ut nunquam ex hominum memoria labatur & cadat, sed in omnium sermone ac celebritate versetur.

CVRTIVS MARIGNOLLVS.

Quantum improbi atque corrupti hominum mores ad evertendam omnem ingenii commendationem valeant, in Curtio Marignollo, cive Florentino, perspicuum est maxime. Fuit hic ingenio elegantissimo acerrimoque, sed vitæ genere spurcissimo inquinatissimoque. Nam cum egregiam a natura ad poësim indolem hausisset, adeo ut nemo, qui una ætate esset, neque plures neque meliores versus efficeret, nullum unquam argumentum, nisi obscœnum ac turpe tractavit, & quondam objurgatus ab iis, qui ejus confessiones excipiebant, admonitusque, ut illam vim ingenii, a rebus obscœnis ac turpibus, ad serias honestasque transferret, palam respondit, non posse se aliter, etiam si maxime cuperet, scribere: verum cum illi instarent, urgerent, ut experiretur, fore enim ut a divini auxilii ope non destitueretur, factum est, ut ille sæpe eadem & graviter audiendo vinceretur, ac poëmatium faceret, quo præteritæ vitæ sordes detestari videbatur, cujus illud erat initium: *Ferte procul, &c.* ridicule; non potuit dicere, nihil sibi commercii cum iis flagitiis posthac fore, quibus adhuc affinis fuerat, nisi obscœnas ac turpes voces, quibus insanierat, meminisset, in eisque referendis, nihil circuitione uteretur, sed, tanquam ex Stoicorum schola profectus, qui nihil obscœnum, nihil dictu turpe putabant, suis eas nominibus appellaret. Vnde apparebat, naturale in eo bonum degenerasse vitio depravatæ consuetudinis. Quod si genio indulgere noluisse, nec omni

verborum turpitudine, sædisque amoribus, sua scripta inquinasset, magnum in poetis Etruscis nomen haberet. Nemo, ut diximus, qui una esset ætate, neque plures, neque meliores illo versus faciebat; sed quoniam fas non erat, flagitiosis carminibus peccandi libidinem excitari, audaciam ali, corroborari impudentiam, ideo edictis Principum, ea carmina crepta sunt adolescentium e manibus, eique, Florentini Antistitis decreto, sacris interdictum, qui esset ausus ea apud se habere vel legere. Bis, in iudicio capitis, vitæ discrimen adiit, semel in Hispania, cum improbus amator, manifesto in flagitio deprehensus, prope pœnas legibus dedit; deinde Florentiæ, cum apud fidei causarum quæsores accusatus, quod res divinas in ludum jocumque converteret, causam capitis dixit. Nulla erat tanta vis argenti, quam flagitiosæ ejus libidines non exorberent. Nam quis est fluvius, quem non excipiat mare? Ac pater absens, qui eo emungebatur argento, quæsitivæ sæpe per literas, quid sibi opus esset tot nummis, quibus nunquam exleretur? cui ille, ad sanitatem, inquit, tuendam; tanquam si voluptatibus amplectendis, non autem prætermittendis, optima corporis valetudo quæreretur. Quæ cum patri non satis iusta causa videretur, atque instaret quærere, quemnam ad usum tantam pecuniam conferret, ille, quasi commotus, Quid tibi vis dicam? respondit, id unum scio, me non eam perditum ire, sed cum Prudentia consumere; hæc erat meretrix, Prudentia nomine, qua cum rem habebat. At parens, cui ea sanitas & Prudentia non placeret, quæ tanto suo sumptu pararetur, suam in filium benignitatem clausit, ac pecuniam mittere desit: quamobrem ille est coactus ab amico mutuatam eam sumere. Scis, quanto sit facilius accipere pecuniam, quam reddere; idcirco fiebat, ut, qui mutaverat, cum eam sæpius repeteret, nihil nisi logos & nugas mæras referret; qui tandem iratus, postquam, inquit, me ita frustraris ac ducis, hæc relicta, alia insistam via, longe breviori: intelligebat enim, se apud judicem, quod sibi deberetur, repetiturum: at malus dissimulans se intelligere, quod intelligebat, age, inquit, ut lubet, si tu brevem inibis, ego longam persequar viam; atque

eadem opera equum poscit, ornat, inscendit, & recta in Galliam advolat. Corpore fuit pusillo, sed in armorum tractatione, levi expeditoque, & in certamine incundo, animo acri atque presenti.

ANTONIUS DECIVS.

L Ocuples & amœnum Antonii Decii Hortini ingenium, omnemque ab eo perceptam, dignam libero homine, disciplinam cum cetera ejus scripta, lyrico stylo confecta, declarant, tum maxime Arcipanda, nobilis ejusdem tragœdia demonstrat, quam, splendore verborum, multitudine sententiarum, majestate argumenti, non video, cui earum debeat cedere, quæ Etrusca lingua scriptæ leguntur. Hæc, simul ac typis impressa communem lucem aspexit, incredibili omnium plausu, summaque Fabii Vrsini, in cujus primum nomine apparuerat, excepta, visa est etiam admirabilis Torquato Tasso, non epici tantum carminis principi, sed scriptori tragœdiarum eximio, qui cum illi magnus amicitiae usus necessitudoque intercedebat: nam cum eo sæpe, qui, ob id, quod parum animo valeret, sermones hominum conventusque vitabat, in via incedentem, colloquentem, & in foro Agonali, Romæ, ambulantem, multaque ibi spacia facientem aspeximus; ut si Antonii laudibus cetera alia argumenta deessent, hæc tam egregia cum illo familiaritas, summum in eo ingenium, excellentem doctrinam, atque admirabilem poëticæ facultatis artem fuisse convinceret: cui enim ille placere non oporteat, qui tantopere Torquato Tasso probatus extiterit? Sed hunc quoque celerius mortalis conditionis tanquam æstus absorbit, quam bonæ literæ, amicorumque, quibus ille erat jucundissimus, studia deposcerent. Quod si longior illi vitæ hujus usura contigisset, multos, quos conceperat, partus edidisset. Verum, pauci erepti, ejus vitæ anni, ea quam adeptus est nominis immortalitate compensantur.

THOMAS GIANNINVS.

IN Thoma Giannino Ferrariensi verum esse apparuit, quod dicitur a plerisque, unumquemque ad singularum artium studia a natura fieri procrearique; nam adfuit in eo philosophicum plane ingenium: etenim puer, ab eo quo intus agitabatur impulsu, in philosophorum palæstram adactus, vix in ea pedem posuerat, cum involutas implicatasque philosophicas disputationes evolvebat explicabatque; magis naturali bono, quam aliqua adhuc adepta labore studioque doctrina: verum ipse animum suum, tanquam inceptum atque dolatum a natura opus, ita expolivit perfecitque, ut nihil eo videretur esse perfectius. Neque in una tantum Philosophiæ parte elaboravit, in eamque, ut nonnulli, tanquam in brevem aliquem gyrum, industriæ suæ conatus inclusit, sed universas complexus est, adeo ut quoties res aliqua ad unamquamque earum pertinens, in disputationem disceptionemque deduceretur, ita de ea differebat, ut si omissis ceteris, illam tantum sibi partem, in qua elaboraret, se posuisset. Nimirum amplissimum illud nec certis quibusdam terminis contentum hominis ingenium, maiorem latioreque requirebat campum, in quo posset excurrere. Puer nullum aliud fere iter noverat, nisi a domo ad gymnasium, & rursus a gymnasio ad domum; adeo discendi cupiditate flagrabat, ut non quies, non remissio, non æqualium studia, non ludi, incensum ejus studium extinxerint, vel minus fervens effecerint, nec celerem & incitatum ad sapientiam cursum retardarint; ita in veterum lectione librorum immorabatur, ut sæpius ex eo auditum sit, cum diceret, nullum esse in sua bibliotheca, librorum confertissima, volumen, quod non frequentissime evolvisset, tractasset, ex eoque quasi apis, quidquid succi & suavitatis haberet, non delibasset. Puer adhuc (nondum enim decimum ac septimum ætatis suæ annum expleverat) in publico Ferrariensium gymnasio, unanimi omnium magistrorum consensu, Philosophiæ Medicinæque Doctoris nomen & insignia percepit. Eo igitur hono-

re auctus, in suam se bibliothecam inclusit, in eaque quinquennium fere delituit. Sed quemadmodum arbores virentes atque frugiferæ, eo lætiores procerioresque proveniunt, quo altiores in terra radices defixerunt: ita etiam multiplex hominis, rerum maximarum, scientia, ideo in eam postea altitudinem se extulit, latitudinemque diffudit, quam admirati sunt omnes; quia ille in intimam earum rerum cognitionem atque notitiam, quasi in aliquod solum, domestica illa atque umbratili quinque annorum exercitatione, mentis aciem, tanquam radices immiserat. Verum cum jam id, quod tot annorum labore studioque perceperat, ex domesticis parietibus, quasi tenebris, in lucem eduxisset, ita cupidus literarum in sui admirationem attraxit, ut plerique adolescentes nobiles, disciplinæ ad eum causa concurrerent: in quibus instituendis exercendisque, gratuitam non mercenariam operam locabat, non aliam laborum suorum mercedem expetens, nisi laudis & gloriæ. Ac fiebat, ut discentes in quatuor vel quinque classes distribueret, eosque variis multumque inter se distantibus disciplinis imbueret: verum cum major ad eum auditorum turba conflueret, quam ut domus una posset capere, habuit necesse civitas Ferrariæ, ex parietum privatorum angustiis hominem, una cum sua schola deductum, in publici gymnasii amplitudine collocare atque statuere, ac novo exemplo, ob singularis virtutis meritum, eam illi docendi provinciam tradere, quæ publico decreto, externam civitatum alumnis debebatur. Verum istuc tam præclarum patriæ iudicii testimonium, ipsi delatum, tanti semper fecit, adeoque semper in memoria retinuit, ut a tribus celeberrimis Italiæ civitatibus, Bononia, Patavio, Pisique, inagno stipendio ad docendum evocatus, nunquam privatas utilitates & commoda, patriæ caritati anteponendas esse statuerit, nec putaverit sibi esse tanti, divitias, quantumvis maximas, vel levringrati animi nota comparare. Sed cum jam duos supra octuaginta annos expleffet, calculo, sive in renibus sive in vesica incluso, urinæ meatus intercludente, mejendi simul ac viveendi finem fecit. Qui, quamvis admodum senex sit mortuus, tamen, ob excellen-

lentem virtutem, videtur omnium mosi non debuiffe. Illud etiam de eo memorabile commemoratur, quod cum libro Theologicarum disputationum, quem extremo illo vitæ suæ tempore in manibus habebat, animam exhalaverit; quod inexplabilem in eo discendi situm ostendit.

Ety

ALDVS MANVTIVS.

Aldus, reliquum familiz Manutiz, Sixto Quinto Pont. Romam venit, adeo modicis facultatibus, ut illi necesse fuerit, aliquot centena aureorum sænori sumere, & quod est gravissimum, usura centesima, quæ pro vectura bibliothecz suæ solveret; quam Venetiis usque advehendam asportandamque curaverat. Quo ex ære alieno, tam justam ob causam factò, ut ipse in quadam sua ad Silvium Antonianum, tum Pontificii Clementis VII, cubiculi præfectum, epistola indicare videtur, vix unquam liberare se potuit. Ac primum mulierem, quam in matrimonio habebat, tanquam contra leges ductam, dimisit; idque maledici nulla alia ratione ab ipso factum divulgaverant, quam ut pingui aliquo sacerdotio sublevare eam, qua tum premebatur, inopiam posset. Tum advenienti hospitium & quotidianus cibus in ædibus Vaticanis est præbitus. Sed cum sæpius, studia sua jacere, ingenium languere, eas artes, quibus sponte sua, & patris diligentia, operam omnem dedisset, nullius utilitati & commodo cedere quereretur; humaniores literas in gymnasio Romano publice docendi provinciam, Thomæ Corzi morte, magistro destitutam ac vacuam, summa omnium voluntate studioque obtinuit, quæ esset quasi theatrum illius ingenii, ac vocis eruditæ ac Romanis auribus dignæ. Sed tum licuit admirari, vel potius deplorare abjectam depressamque bonarum artium conditionem; tum licuit, sed non sine fletu, aspicere humanarum literarum precia, quæ olim veteres ferebant in cælum, juventutis, quæ tum erat, æstimatione sic concidisse. Etenim cum illi olim eloquentiæ adipiscendæ gratia, maria transmitterent, longissimas peregrinationes susciperent, Græciæ Asi-

Afrique civitates obirent, ut exquisitos in eis dicendi magistros invenirent, audirent, salutarent, atque eorum ex ore, tanquam ex fonte, eloquentiæ præcepta haurirent; contra isti, quem sine itinerum molestia, sine sumptu, sine labore, habere poterant, Græcæ Latinæque eloquentiæ doctorem eximium ac singularem, contempserunt; neque eadem, utriusque linguæ copiam pollicenti, aures admovere voluerunt. Nam, qua hora, discipulorum multitudinē eloquentiæ præcepta tradenda erant, a corona derelictus, ante scholæ ostium cum uno aut altero obambulabat. Nulla Ciceronis operum pars est, quam ille commentariis vel notis non illustrarit. Scripsit de quæstis per Epistolam libros tres, Orthographiam, notas ad Censorinum de die natali, multaque præterea alia Etrusco sermone. Fuit pedibus præter modum enormibus, capite magno, facie oblonga, ore illepidō & invenusto, barba horrida, cujusmodi in statuis philosophorum antiquis & imaginibus cernimus.

ALEXANDER TASSONVS.

Alexander Tassonus Mutinensis, mihi probe notus, cui longus a prima fere juvenia cum illo usus consuetudoque intercessit, fuit ingenio magno, eleganti, atque amæno, sed turbulento superstitiosoque; quod clarorum virorum, poëticæ facultatis laude, omnium sæculorum suffragio, principum ad suæ censuræ rationem normamque redigeret; quamobrem non parvam sibi invidiam concitabat. Simul ac ad ejus amicitiam accessi, audiui de quodam juvene populari suo, Episcopi Carpentorastensis fratris filio, cum diceret, voluisse Alexandrum, adversus Academiam quandam in unius ex eo numero scripta, acriter vehementerque invehere; sed in responsione, a tota Academia edita, suis hominem rationibus, tanquam suo sibi gladio jugulatum, obtinuisse, nihilque propius esse factum, quam ut præ pudore atque iracundia ad insaniam redigeretur. Quocirca multos quievit annos, neque in quemquam est ausus inquirere: at cum longinquitas temporis, quæ omnia minuit ac delet, doloris illius memoriam, ejus

ab animo absterfisset, rediit ad ingenium, ac Januz, cum expectabat, dum ventus operam daret, (volebat enim mare ingredi,) Etrusca Francisci Petrarchæ poemata ad reprehendendum arripuit, quem unum, non modo lyricorum nostrorum, sed Græcorum etiam Latinorumque omnium principem ponimus; in quem quasdam edidit animadversiones; in quibus nihil fere ab eo dictum reliquit, quod non vel tanquam vitiosum reprehenderit, vel ut absurdum neglexerit, vel ut ineptum irriserit, nullam ejus laudem prætermiserit, quam non sit conatus convellere, labefactare, evertere. Sed quid miramur, tantum in Franciscum Petrarcham animi habuisse, cum nec ab Homero, ingenii sui vires, tanquam manus, abstinerit? at a quo viro? nempe ab eo; a cuius doctissimis versibus, tanquam a capite, omnium scientiarum fluente derivari, eruditissima illa Græcorum natio testatur, de quo septem præcipue civitates Græciæ pugnant inter se atque contendunt, cum singulæ civem suum esse confirmant, cui ob quandam quasi divinitatem ingenii, tantus honor est habitus, ut tanquam Deo, Smyrnæi delubrum, ejus in oppido dedicaverint. Etenim narravit mihi, se quingentas Homeri sententias, & eo amplius, in unum volumen collectas habere, quas editurus esset, stulte ridiculas. Scripsit ipse poema egregium, quod Situlam appellavit, bellum scilicet ob Situlam inter Mutinenses ac Bononienses exortum; in quo gravitas facetiis admiscetur; cuius generis carminis, a nemine antea excogitati, se fuisse inventorem, gloriatur; at ubi primum editum, in hominum luce, tanquam in aliquo theatro comparuit, tantos plausus tulit, ut omnium hominum studia ad illud inspiciendum incenderit: nam mire in eo quorundam notorum hominum mores expressi cernuntur. Versatus est aliquot annos in aula Ascanii Cardinalis Columnæ, cui suas ipse operas, tanquam vehiculum ad deferendas hac illac commendationes, aliaque arcana officia locaverat. Sed reversus ex Hispania, quod iter ex Cardinalis ejusdem auctoritate susceperat, ab ejus se familiaritate sejunxit, utrum sua voluntate an coactus, mihi compertum est parum; sicuti etiam illud, cur vocatus Taurinum a
Du-

Duce Sabaudiz, ut illi esset ad manum, nunquam munus illud obierit, sed in urbem se receperit. Dum fuit Romæ, (fuit autem fere semper) frequentavit Academiam Humoristarum, in qua semel etiam principatum obtinuit, ac sæpius eruditas de variis rebus disputationes habuit, sed in primis luculentam carnificis laudationem; quam, quia multis stomachum moverat, (quid enim tam potest horrendum auribus humanis accidere, quam nomen carnificis?) & quoniam propter eam in hominum urbanorum sermones incurrerat, impressam jam, a reliquis suis operibus segregandam, & quasi vinctam, perpetuis tenebris vinculisque mandandam curavit: sed eam audio, quorundam opera, cum illius decem libri cogitationum, quas vocat, in quos antea conjecta fuerat, rursus excudendi essent, ab iis vinculis solutam, in suam sedem, tanquam postliminio revertisse. Scripsit acutas concertationumque plenas disputationes adversus Josephum de Aromatariis, qui Francisci Petrarchæ patrociniū susceperat, & jacta in suis ab eo in animadversionibus, in poetam prope divinum, tela rejecerat, quas postea Mutinæ impressus edidit. Verum senex jam disjunxit se a mansuetioribus his Musis, atque ad graviora studia retulit: nam a Christi ortu ad annum MD Ecclesiasticam complexus est historiam, in qua pluribus in rebus a Baronio dissentit, veritatis, non contentionis, ut ipse agebat, studio adductus. At Baronio homini sapientissimo longeque clarissimo, molestum videri non debeat, in sua scripta imperum facere ausum fuisse eum, (jure ac injuria, non disputo) cui Homerus ac Petrarca, non solum reprehensione, sed contumelia atque irrisione digni visi sunt. Romæ, cum nemini operas suas habebat addictas, confugiebat in zede Bartholomæi Cardinalis Cæsii, Vaticano proximas; ex enim, principis illius, doctorum virorum cupidissimi, benignitate, semper illi patebant, & gratuitum præbebant hospitium. At istud in se beneficium, atque adeo quidquid usquam ab aula provenit, non pluris fecit, quam sicut unum, hoc est, nullius fere æstimationis loco duxit; quoque id elegantius exprimeret, & in oculis hominum prope dehgeret, se pingi cum sicu vo-

lc.

lebat; ut nimirum notum esset omnibus atque perspectum, sed tot annorum laboribus in aula defunctum, vix mercedis tantum accepisse, ut ad unius fici æstimationem accederet. Demum Ludovico Cardinali Ludovico, Gregorij XV fratris filio, vita functo, ad cuius amicitiam familiamque nobile illud carmen, & plus uno mansurum perenne sæculo, quod in Situlam cecinerat, aditum illi aperuerat, se in patriam recepit; ubi a Mutinensium Principe honorifice exceptus, in eorum numerum relatus est, qui ipsi sunt a consiliis. Fuit colore albo, facie honesta, capillo in iuventa flavo, hilari vultu: at qui curiosius oris ejusdem delineamenta scire expetit, Cassiani Putei V. C. nobilem Romæ bibliothecam adeat, quam honestis viris nunquam non apertam habet; ibi eum, inter alias illustrium virorum imagines, in tabula depictum aspiciet cum eo sicu, quem diximus. Sed egregia hominis virtus, & nunquam satis laudatum ingenium, poscere videbatur, ut honor ille, a suo sibi Principe delatus, diuturnior esse licuisset; sed paucos post annos eo decessit, quo iter est omnibus. At tum id jure queri possemus, si unicuique pro meritis brevior vel longior vita contingeret, ut, quibus præstantius datum est a natura ingenium, diuturniorem vitam incolerent, quibus tenue ac nullum, celerius e corporis domo migrarent: sed hac in re, sicut in ceteris, dominatur Deus, qui suo ex arbitrio suum unicuique, quod decurrat, spacium vitæ largitur, brevius uni, longius alteri.

NICOLAUS VILLANUS.

NON immerito quibusdam Nicolaus Villanus, Pistoriz, vetere ac nobili prosapia ortus, (nam suam, ad Io. Villanum celebrem historiarum scriptorem, originem refert,) cum Alexandro Tassono, de quo antea diximus, in comparatione conjungendus videtur; omnino similis illi, non solum ingenio, doctrina, & varietate rerum & copia, sed proposito ac voluntate; qui cum posset suis elegantissimis versibus, doctissimisque libris, magnum inter eruditos doctosque viros sibi nomen acquirere, maluit, sicut & illi, præstantissimum ingenium con-

conferre ad eripiendam veteribus summis poëtis partam jam laudem, hærentemque ipsorum capiti, magna cum gloria, coronam. Etenim in eo libello, cui Phasiano nomen indidit, in quo Io. Baptistæ Marini Adonidem, adversus Thomam Stiglianum, defensionem arripuit, parum ipsi visum est, affirmare, Marinum vicisse gloriam omnium superiorum, qui ad hanc usque diem in scribendis poematibus elaborassent, nisi etiam sigillatim in unumquemque eorum censura suæ tanquam gladium distringeret, multaque præterea in eos, non tam graviter diceret, quam facete. Itaque apud eum Dantes, Petrarcha, Areostus, Tassus, quorum gloriosis nominibus auditis, honoris gratia, totus Parnassi chorus assurgit, aliisque ex recentioribus, partim ut hebetes, tardi, ac rudes, partim ut humiles, inornati, abjecti, partim ut sine lepore, pondere & arte, exploduntur exhibilanturque. Studium in eo discendi acerrimum adfuit, qui cum Tiberii Cardinalis Mutii, Episcopi Viterbiensis cubiculi Præfectus esset, quo in munere ita magna solet esse occupatio, ut non multum ei, qui illi præest, ad studia, oculi relinquatur; attamen, etiam interdictum, cum Cardinalis in accipiendis, persolvendisque officiis occupatus non erat, rejiciebat se in angulum proætonis cum libro, ibique lectioni operam dabat. Postremo cum eo munere se abdicasset; totum in literis abdidit, ac docte eruditeque multa composuit. Ab ejus officina prodiisse dicuntur duæ illæ elegantissimæ satyræ, quarum una, *Dsi vestram fidem*, altera, *Nos canimus sardis*, inscribitur, in quibus non modo sale multo, ut olim Lucillius, urbem defricuit, verum etiam pluribus acuminibus compunxit atque transfixit corruptis homines moribus. Habuit, audiente me, in Academia Humoristarum eruditissimos de Poësi jocosa atque ridicula sermones, quos una cum suis facetissimis quibusdam rhythmis edidit. Emisit etiam Aucupium Vincentii Forezii, quod ideo hoc nomine appellavit, quasi aves in eo, quæ in Oculari Stigliani, Martini dicta mordent ac lacerant, lepide arguteque conclusis argumentis, tanquam retibus, capiuntur, enecanturque: tum animadversiones in alteram Stigliani Ocularis partem, Magistræ Pha-

Phasiani: postremo, admirabilem præstantissimi ejusdem ingenii fecunditatem, nobilis ille partus ostendit, quem immortalitati consecratum, nulla unquam temporis injuria vita devolvat; illud, inquam, poema egregium, quod propinqui post ejus mortem typis imprimendum edendumque curarunt, in quo Florentiam, ab hostium armis ereptam, & in libertatem vindicatam, grandiore pleæto, & dignis Homero versibus, cecinit; ex quo licet intelligere, ingenium illi contigisse adeo tenerum atque flexibile, ut tanquam cera, quocunque idille duceret, sequeretur, atque in eo mire præstaret. Et sane dignus fuit, cui firmior corporis constitutio a natura tribueretur, quæque infinitæ literarum cupiditati responderet, qua perpetuo flagrabat; sed ex laborum magnitudine, quibus par esse non poterat, tabe contracta, pene sublatus est antea quam in senectæ vestibulum pedem intro inferret.

PETRVS CIACCONVS.

Felix, atque, in omnia necessaria ad vitæ usum producenda, fertilis ac fecunda Hispaniæ ora, superioribus annis, non vini, mellis, oleique copiam, non lini spartique vim, cujus est ferax in primis, non aurum, vel quod nitidi ejus amnes vehunt, vel quod aratrum ex divite terra defodit, aliaque telluris laudanda bona, Italiæ urbiq; Romæ suffecit, sed plenum doctrinarum omnium thesaurum misit; cujus opibus, non Itali modo atque Romani, sed Galli, Germani, atque adeo gentes in ultimis terris positæ locupletarentur, vel potius perenne scientiarum omnium flumen dedit, cujus tanquam undis irrigata, non hujus modo ævi, sed sæculorum omnium ingenia, uberes ex se fructus efferrent; Petrum, inquam, Ciacconum Toletanum; quem me annos natum non amplius sex, sæpe pro foribus D. Jacobi, Hospitalis domus, nationis Hispaniæ, vidisse commemini: quod in templum fere quotidie nutricis manu ducebat, ut Missæ sacrificio præsens adessem; ejusque lineamenta oris adhuc animo comprehensa retineo; cum, quæ pueris nobis obijciuntur, altius imprimantur in animos, quam

quam quæ oculis natu grandiores acceperimus; nec signum e marmore, ejus sepulcro in eadem D. Iacobi æde impositum, vero longius aberrat: atque cum animadvertēbam, quantum puerulus sentire poteram, digito ab omnibus designari, summisque in cælum laudibus efferi; quæ fortasse fuit causa, ut acius in eum oculos intenderem. At tantum lumen ingenii, simul ac Romanam venit, quamvis summa esset in homine animi demissio, summusque mortalis gloriæ, rerumque omnium humanarum contemptus, ita latere non potuit, ut non continuo fulgeret ad oculos; ac Gregorio XIII, acutissimo homini ingenio, in jure præsertim civili ac pontificio, ita in primis illuxit, ut sacros illi canones, divinarum volumen literarum, quod Biblia vocant, atque æterna sanctorum Patrum monumenta, recognoscenda castigandaque commiserit: quas ille sibi traditas a sapientissimo Principe partes egregie absolvit. Qui Princeps, quo grata aliqua animi significatione tantum virum, optimeque de se meritum, prosequeretur; non rogatus, neque a quoquam admonitus, sed sponte sua, locuplete Hispalensi sacerdotio donavit. Tum ille conversus ad sanandos scriptorum veterum Latinorum locos, librariorum incuria inscitiaeque misere exulceratos, quem non eorum curandum exceperit? quod in eis vulnus, ita magnum, ita putridum, ita conclamatum invenit, quod, ut ita dicam, non obligarit, inunxerit, ad sanitatem perduxerit? quæ in eis maculae, ita sordidae, ita altæ hærebant, quas non absterferit penitusque deleverit? quæ lacunæ, quas non impleverit? quæ non eis tenebræ, vel ignorance antiquitatis exortæ, vel eruditionis inscitia excitatæ, animis tanquam oculis objiciebantur, quas, vel clarissimis commentariis suis non propulsavit, vel doctissimis notis antiquum illis splendorem lumenque non revocaverit? quem veterum invenias librum, in quo doctrinæ vel eruditionis aliquid insit, quem non legendum, examinandum castigandumque susceperit? Cæsarum, Salustium, Varronem, Plinium secundum, in quem illud ejus extat majorem vigiliarum opus, Tertullianum, Isidorum, quem non? Omnino habebat hoc, ut, in sanandis veterum librorum

tan-

tanquam plagis, nemo ipso melius medicinam faceret, adeo, ut auctorum eorundem animi, ut somniavit Pythagoras, immigrasse in ipsum, suamque eidem, de iis rebus, quæ erant in quæstione, sententiam quodammodo aperuisse viderentur. Sed cum eatenus sapientix omnisque eruditionis laude processisset, non tamen quemquam ludibrio habuit, nec ullam sibi arrogantiam ac spiritus sumpsit, sed semper eandem animi demissionem modestiamque retinuit; in quo illud assequebatur, ut quanto se minorem faceret, tanto ceteris major haberetur: nam, ut est apud virum sapientissimum, cui nihil ad augendum fastigium superest, hic uno modo crescere potest, si se submittat, securus magnitudinis suæ. Quo fiebat, ut minus æquus esset iis, qui in aliorum scripta curiosius inquirerent, cupidius inveherent, ac nodum in scirpo quærerent; quo videlicet ex aliorum dedecore, acuti ingeniosique viri gloriolam aucuparentur, vel ut ipse, ex Cicerone sumptum, dicere solitus erat, laureolam in mustaceo invenirent. Et sane, nullum est crimen ingrati animi, crudelitatis, invidixque, cujus non ii se alligent, qui adeo projecti sunt ad eorum, qui scribunt, laudes proterendas conculcandasque. Quid enim tam est ingratum, quam ei, qui bene promereri de literis studeat, non aliam a literatis hominibus mercedem, nisi irrisuonis contumelixque referri? quid tam crudele, tam inhumanum, quam hostilem in eum animum sumere, a quo nulla tibi sit orta injuria? quid tam plenum obtreccionis invidixque, quam prætermiis innumeris, æterna laude dignissimis, pauca quædam assumere, quæ, ut inquit Horatius, *aut incuria fudit, aut humana parum cavit natura*, in quibus exultare ac debachari possis, quo te aliis meliorem & doctiorem ostendas? At hoc, inquiunt, animo, aliorum vitia detegimus, ne, qui in ea incurunt, decipiantur, eisque imitandis, ad vitiositatem aliquam delabantur. At frustra hic ab eis labor atque opera sumitur, nam ita omnes facti a natura sumus, ut acutius in aliis vitia, quam virtutes, intueamur; a quibus, si sapimus, abstinebimus. Omnino paucos habuit usu amicitiaque sibi conjunctos ex Italia, Fulvium Ursinum Romanum, & Latinum Latinum,

Vi-

Viterbiensem; ex Hispanis Ludovicum Castellæ, ex purpuratis, quorum ille limina vitabat, illud Horatii, in ore identidem habens, *Dulcis inexpertis cultura poetis amici*, ex purpuratis, inquam, Antonium Carasfam, & Gulielmum Sirletum. Scripsit etiam de ponderibus & mensuris Romanorum & Atticorum, explicavitque doctissime columnæ rostratæ inscriptionem, a S. P. Q. R. C. Duilio positæ, qui primus Pœnos classe devicit, aliaque multa, (non enim est nobis consilium semper, quæ quisque edidit, omnia referre;) atque annos non amplius quinque & quinquaginta natus, anno MDLXXXI bonis omnibus, literatis præsertim viris, flebilis, occidit.

VINCENTIUS MONTECALVUS,

SI clarorum hominum atque omni dignitate principum res gestæ, splendoris multum ac luminis transfundunt in eos, quos procrearunt, præsertim si se illi majoribus suis dignos præstiterunt; non potest de Vincentii Montecalvi laudibus apte narrari, nisi antea de iis pauca dicantur, unde tanquam a radicibus quasi germen ortus, virtutis suæ ramos longe lateque diffudit: ut eum appareat, non modo a stirpis suæ bono non degenerasse, verum etiam ad veterem ejus pulcritudinem amplitudinemque plurimum dignitatis ac decoris addidisse. Et quoniam longum esset, ac prope infinitum, singulos persequi, qui domi militiæque, armorum ac literarum gloria, nobilissimam hanc vetustissimamque familiam in eum dignitatis locum, in quo nunc est, extulerunt; paucos ex iis enumerabimus, quorum nomina, luce ipsa clariora, sine piaculo præteriti non possunt. Ac primum Thomas Montecalvus se offert, qui, ut tum erant tempora, ditissimus, anno M CCC LX. Bononiæ diem obiit supremum, ac situs est in Æde D. Iacobi Augustinianorum Eremitarum, in sepulcro e marmore, ubi etiam inspicitur insculptus, extanti ac prominenti figura, cum ea veste, qua tum viri nobiles utebantur. Hic non semel suis facultatibus, mutuando, Reip. Bononiensis necessitatibus suppeditavit; cujus illa pietas, quod

quod summum habuit precium, persolvit: nam Antiani honorem bis detulit; qui honos tum maximus habebatur. Verum, quia ab hac indole nihil humile, nihil abjectum prodire poterat, natus ab eo est Jacobus Montecalvus: hic a patre acceptam gloriam multis auxit virtutibus: nam singulari ingenio, præstanti doctrina, ac magno rerum usu præditus, plus illi reddidit claritatis ac luminis, quam quantum ab eo accepisset; qui præstantissimum ingenium contulit ad Philosophiæ ac Medicinæ studia; in quibus tantum brevi profecit, ut earum facultatum magister sit renunciatus, & in collegium medicorum cooptatus: nec tantam hanc sapientiam ociosam desidemque domi continuit, sed foras ad communem hominum utilitatem eduxit, atque multos annos, tum in Bononiensi, tum in aliis celeberrimis tota Europa gymnasiis, publice docuit, atque ea quocunque venit, singularis suæ doctrinæ impressa vestigia reliquit, ut etiam nunc in Hispania, ubi nonnulla, doctissime a se scripta, edidit, celebre sit ejus nomen ac clarum; neque illud solum hominum linguis effertur, sed a scriptoribus etiam historiarum & orationum eximie collaudatur: nam a Leandro de Albertis Bononiensi, Dominicano, in suis Chronicis, summis laudibus afficitur; a Nicolao Burtio, in libro, qui Bononia illustrata inscribitur, clarissimum patriæ suæ decus appellatur, & in oratione ad Sixtum V, quam retulit in librum, quem scripsit de Bononiæ laudibus, dicitur inter alios Bononienses, lumine doctrinæ claros, tanquam inter minora sidera, solis instar habere, ejusque nomen tota Hispania celebre esse, ac pervulgatum, ut ob sagacissimum ingenii acumen, quo abditas rerum naturalium causas perscrutabatur, alter Aristoteles vocetur, & ob eximiam medicæ artis notitiam, non Hipocrates, non Galenus, sed Deus ipse medicorum Æsculapius habeatur. Neque minus civitatis regendæ peritus fuit, sed ad Remp. capeffendam accedens, in Consilium sapientium amplissimum venit, & Antiani functus est munere, & munitionibus urbis publice præfuit. Consuluit etiam patriæ, liberis procreandis: nam ex Lucretia Parisia, patris nobilitatis fœmina, quam habuit in matrimonio,

tres liberos suscepit; quos ita instituit atque erudit, ad majorum instituta, ad civitatis disciplinam, ad Christianæ religionis normam, ut appareret, non tam eos quæsisse, ut essent generi monumentum & sibi, quam ut Reip. cujus caritas patriam etiam caritatem superat, atque adeo orbi terrarum, utilitatem ac decus afferret; quorum Thomas, sive Mafius, natu major patri natura filius, consuetudine discipulus, voluntate similis, inter sedecimvirem senatum, qui tum Remp. administrabant, senatorium locum obtinuit, & Joanni XXII Pont. Max. in primis carus, urbem Romam, Prætoris honore ac nomine gubernavit, & ad Mediolanenses aliasque Resp. maximis de rebus legatus missus, fidem, industriam, ac diligentiam suam, omnibus probavit; alter vero, Philippo nomine, honoraria Sanctissimæ Trinitatis militia cohonestatus, ac Ronzani Prior decessit; tertius, natu minimus, vix ex ephebis excesserat, cum in rationem Libitinæ venit. Cum igitur Vincentio Montecalvo tot clarorum hominum, majorum suorum, imagines ob oculos obversarentur, & singularis eorum virtus, ipsius animo sæpe recurreret, numne eum potuit ab avorum gloria & a generis similitudine abducere vel inertia, vel desidia, vel virtutibus contraria vitiorum consuetudo? Immo usurpata frequenter ab eo tot tantorumque virorum memoria maximos sibi stimulos addi sentiebat, ut cum eisdem, doctrina, solertia, atque omni virtutum genere certaret. Quamobrem, Parentum diligentia, a puero doctus, atque omnibus elegantibus literis ac disciplinis eruditus, magistri jus ac nomen assecutus est, multosque annos, in Bononiensi gymnasio, cum admirabili ingenii doctrinæque laude Philosophiam docuit. Erat in homine, præter elegantiam doctrinæ rerumque plurimarum scientiam, incredibilis morum suavitas, eloquendi vis maxima, verborum sane bonorum cursus; accedebat vox dulcis & canora; quibus virtutibus assequebatur, ut magni ad se audiendum discipulorum concursus fierent, eorumque voluntates sibi mire conciliaret; quod videbantur, in illo sermonis actionisque ejusdem lepore atque dulcedine, minore cum molestia, vel potius cum voluptate, spinosa-

rum disputationum illarum insuavitatem haurire. Fuit ejus mors, patriæ mœrori, suis acerba, bonis luctuosa, literarum studiis incommoda; sed magnifico elatus funere, conditus est in sepulcro majorum suorum, ut cum iis mortuus acquiesceret, quorum virtutes imitando vivus expresserat. Cujus mortui memoria eo altius in suorum civium animis impressa insedit, quod a præcipuis Europæ gymnasiis amplissimis, ad docendum, præmiis invitatus, nunquam ille se passus est a patria divelli; sed quatuor & triginta in ea annos, studiosis adolescentibus, ad intima Philosophiæ penetralia adeunda ac perlustranda, dux fuit.

HIERONYMVS VECCHIETTUS.

Hieronymus Vecchiëttus ab Ægypto, Florentinus, qui ab Ægypto, Catholicæ religionis causa, bis peragrata, in qua etiam sæpius manifestum vitæ discrimen adierat, illud ipse sibi cognomen indiderat, fratrem habuit Io. Baptistam, peregrinationis ejusdem studiosum, atque etiam Alexandriam orator a Clemente VIII, de rebus ad Christianam Remp. pertinentibus missus; quem ego probe novi ac sæpius elegantissimos rhythmos concinne arguteque conclusos, a se factos, recitantem audiui. Fuit Hieronymus divinis & humanis literis doctus, ac præsertim versatus in historia, atque in ea arte, quam profitentur ii, qui mathematici vocantur; sed in omnibus fere rebus, nimium sui juris sententiæque. Edidit insignem librum, in charta, ut ajunt, regia, magnis sumptibus, Augustæ Vindelicorum impressum, sed censorum animadversione in multis ac maximis vitiis deprehensum, ac propterea superiorum decreto cautum, ne in manus hominum perveniret. Etenim contra sacrarum literarum fidem, contra Ecclesiæ universæ auctoritatem, contra sanctorum Patrum sententiam, conabatur ostendere, ex solis lunæque ratione, quam non bene, fortasse deceptus, inierat, Christum Dominum, pridie quam pro nobis mortem oppeteret, solemne illud Paschalis cœnæ convivium una cum suis non celebrasse, & cum posset temere dicta, vel corrigendo vel interpre-

sando, ex multis sese incommodis & ærumnis eximere; maluit severissimo Quæditorum fidei causæ judicio se committere, atque ultro in vincula conjicere; ubi multos annos, exacta jam ætate, in tenebris, in squalore, in fordibus jacuit; quam vel minima quidem ex parte de sententia decedere. Conatus est etiam versus facere, sed quoniam a vino semper abstinuit, ac *nulla placere diu nec vivere carmina possunt, quæ scribuntur aqua potoribus*, ea illi res non processit in numerum. Fuit proposito animoque plane philosophus: nam pecuniæ jacturam, quæ propemodum alii insaniunt, usque adeo æquo animo tulit, ut cum ducentos quotannis aureos; nec eo amplius ex fructibus bonorum suorum caperet, atque audisset virum nobilem, qui insignem Romæ argentariam faciebat, & apud quem septingenta aurea deposuerat, decoxisse, non solum clamoribus vel querimoniis nullum commoti animi signum dedit, sed ne frontem quidem contraxit; quod alteri, clarissimo longeque ditissimo nostri xvi poëtæ, non contigit, qui simili nuncio accepto, amisitæ pecuniæ dolore usque eo perculsus est, ut propemodum a vitali calore derelictus, expiranti similis, reductus sit domum, & ut in maximo metu sit, soluta eidem alvus in femoralia defluerit, ac coxendices totas infecerit. Sed cum esset cupiens liberorum, atque osor mulierum, adoptavit sibi pro filio adolescentem, quem domi alebat, quemque sibi fidum invenerat; eumque fecit hæredem. Erat moribus sanctissimis, & castitatem adeo coluerat, ut nulla eam unquam flagitii cujuspiam labe commaculasse diceretur. Ab omnibus iis vitis aberat, quibus senilis ætas solet esse affinis: non enim erat difficilis, querulus, non ad rem attentus, sed comis, hilaris, liberalis, ac pro re ipsius, quæ non erat ita ampla, ut diximus, convivor frequens ac commodus; neminem, qui domum ad se venisset, sine aliquo munusculo, vel saltem jejunum ac siccum abire patiebatur. Vixit, extremo ætatis suæ tempore, summo in ocio; nec minimam illi molestiarum contentionumque materiam præcidit operis, quod ediderat, interdictio; quæ contentiones suscipiendæ fuissent, si illud in vulgus exisset. Scripserat etiam in eo de Ludovico Imperatore

nonnulla, quæ Ducis Bavariz animum offenderant. Legi ego datam ad Hieronymum a Ludovico Cardinali Ludovisio, cum quo fortasse Dux ille questus fuerat, quique tum rerum potiebatur, epistolam, in qua ejus vicem dolet, qui ea ætate, quæ esset oculi in primis cupida, tantam in se negotii molem attraxisset. Victabat magna ex parte, melle, sapa, pomis; eisque penum in primis omnem instruebat. Tertio demum & octuagesimo ætatis suæ anno, in morbum implicitus, Romæ decessit; quem illi morbum consecerat conclavis, ventis obnoxii, amplitudo; in quod, ex hyemis tempestate frigidissima, ex altero angusto & adversus ventorum injurias probe munito, sese contulerat.

ABRAHAMVS BZOVIVS.

DE hoc illud posse affirmari videtur, quod per hyperbolem magis quam ex vero dictum existimatur, plures eum libros scripsisse, quam alii legerint. Et sane iis percurrendis, vix hominis unius ætas videtur posse sufficere; quorum omnium titulos non est consilium enumerare: qui si referendi sint, vix binæ eos paginæ caperent, præterea lectori fastidium & satietatem afferrent. Quare cognoscendi eos cupidum, ad illorum volumina delegamus, qui de viris illustribus nostri ævi scripserunt, atque edita ab ipsis opera, ad unum percensuerunt. At minime a commemoratione nostra deferenda videntur duodecim Annalium volumina, quorum quinque ultima adhuc typis mandata non sunt; quibus, post Cæsarem Cardinalem Baronium, Ecclesiæ res gestas, ab anno Christi nati MCXCVIII usque ad hæc tempora, persecutus est diligentissime. Ea enim, & operis mole, & argumenti gravitate, & rerum numero ac varietate, & laboris magnitudine, ceteris præstare dicenda sunt, quæ incredibile memoratu est, quanta animi alacritate susceperit, quantaque celeritate, ad absolutionem perfectionemque perduxerit; præsertim cum non parum multi, ab excessu Baronii, assiduo opere eandem incudem dies noctesque tutuderint, neque adhuc quidquam in hoc genere, quod magnopere probaret,

res, attulerint. Quamobrem Bzovii annales, quorum
 precia in æstimatione hominum diu jacuerunt, cum
 nondum quidquam, quod sit vendibilius, appareat, cœ-
 perunt caput attollere, seque altius efferre. Itaque merci,
 quæ prope invendibilis videbatur, jam precium accessit.
 Verum ille, in Ludovico Imperatore, ad eundem sco-
 pulum navem offendit, ad quem suam Vecchietus affli-
 xerat. Etenim, censoria quadam auctoritate, quam sibi
 ipse attribuerat, est conatus eundem (tanquam nec jure
 nec legibus creatum) Imperatorum quasi senatu move-
 re; sed postulante Bavariz Duce, ac tantam domui
 suæ injuriam factam querente, in judicium vocatus, ju-
 dicum sententiis est coactus abolere, quod scripserat, ac
 Ludovicum in ea, unde dejecerat, sede reponere. In-
 vectus est in eum acriter vehementerque Georgius
 Hervartus, qui Ludovici defensionem arripuerat, adeo
 ut, quantum in ipso fuerit, omnem ab eo ingenii, me-
 moriz, solertiz, acuminis, diligentiz, fidei, & integri-
 tatis commendationem everterit; qui Hervarti liber,
 Ludovici defensi titulo inscriptus, superiorum decreto
 veritus, statim depulsus est ab hominum manibus, pro-
 pterea quod ille cum Ludovici defensione conjunxerat
 multorum præterea dedecus. Sed quod Hervartus Bzo-
 vio ingenii, judicii, memoriz, eruditionis, eloquentiz-
 que patrimonium est conatus eripere, id illi Simon
 Starvolius, in scriptorum Polonicorum Hecatontade,
 tanquam tutor fidelis ac fortis, summa ope studuit con-
 servare; ac præter alias laudes, quibus eum exornat, vi-
 rum vocat ad laudem, ad gloriam, ad immortalitatem
 nominis, ad sæculi sui miraculum, ad posteritatis utili-
 tatem divinitus datum, atque concessum. Hic ex anti-
 qua sanctissimaque D. Dominiici disciplina, simul ac ex
 Polonia in Urbem venit, statim a Summo Pont. ob insi-
 gnem ingenii doctrinæque famam exceptus est in ædes
 Vaticanas, ibique, quoad vixit, hospitio victuque libe-
 raliter habitus; nisi quod, paucis ante ejus mortem
 annis, cœnobium fratrum sui ordinis, Ædi D. Mariz
 super Minervam adjunctum, Vaticana habitatione mu-
 tavit, nefaria famuli sui cæde deterritus, prædonis cujus-
 dam opera interfecti, qui, ut mulieris, qui consueverat,

sumptibus suppeditaret, cum accepisset, Bzovium auri vim magnam in arca constructam habere, die quodam, commodum, cum ille abesset, cubiculum ejus ingressus, custode occiso, auroque averso, se ad mulierem cum præda recepit. Sed antea multa ac nefaria flagitia perpetraverat: primum familiæ Benedictinæ, cui se voti religione obstrinxerat, claustra deseruerat, tum a Catholicæ religionis veritate desciverat, & Spalatensem Archiepiscopum M. Antonium de Dominis, ejusdem religionis transfugam, sectatus erat in Angliam: deinde, cum Archiepiscopo, qui, ex hac defectione, auri montes sibi somniaverat, res aliter cecidisset atque opinatus fuerat, una cum eo palinodiam cecinerat, ac Romam profectus, impuri Antistitis, & adhuc mente animoque a vera ac germana fide alieni, domum, præfecti nomine, administraverat: postea, captus amore vicinæ mulieris, honesto viro nuptæ, multos menses continuos ejus usuram corporis ceperat, priusquam id viro suboleret; sed cum palam facta res esset, quod, ex improvviso domum rediens, in lecto recens impressa adulteri vestigia deprehendisset, verens ille, ne sibi perpetuo cædendum esset domo mulieris, tollere eum de medio constituerat, quem suis cupiditatibus inimicum fore arbitrabatur; itaque usus armorum impunitate atque licentia, quod Gregorio XV Pontifice extincto, neque etiam tum altero in ejus locum subrogato, Urbs prope erat sine jure ac legibus, muliere conscia, die quodam, bene mane, exeuntem illum domo una cum uxore, eadem inspectante, neque aliquod commoti animi signum dante, vita devolvit; quod facinus cum nemo, neque cognatus neque amicus, in judicium deduceret, latuit in illa caligine temporum ac tenebris: postremo mulierem adolescenti, Spalatensis Archiepiscopi cubiculario, conlocaverat, ut eadem una cum illo uteretur, frueretur: sed cum domestici omnes sumptus in ipsum incumberent; nec esset unde faceret, ad rapinas cædesque confugerat; nec impune: nam accusatus a viro communis mulieris, cui minus erat carus, quod minus largiri poterat, ac suspensio necatus, perpetrati in Bzovium & Bzovii famulum facinoris pœnas dedit. Qui Bzovius, paucos post annos,

assiduo scribendi labore confectus, tandem scribendi simul & vivendi finem fecit.

BARTHOLOMÆVS VGOLINVS.

PLurimum sane Monti Scutulo, exiguo Æmiliz oppido, tota illa provincia debet: ab eo enim plures præstanti sapientia viros accepit, quos ad sui ornamentum ac decus possit ostendere. Sed ex Vgolina in primis familia provenire illi præclara ingenia, quæ, literarum gloria, illustrius ejus nomen reddiderunt. Sed Bartholomæus, ut ex doctissimis ejus scriptis apparet, majori eam lumine illustravit. Hic non ante duodecimum annum in ludum venit, ut Grammaticæ præceptis erudiretur; quæ Arimini ita celeriter, ingenii docilitate, arripuit, ut eorum industriæ longo intervallo, præcurreret, qui multo maturius se ad id studium contulissent, ac facile intelligi posset, pari modo superaturum omnes in ceteris artibus: nec opinionem de se hominum fefellerit; nam cum Bononia, ubi Juri Cæsareo ac Pontificio operam dederat, atque juris utriusque interpretandi facultatem adeptus erat, in patriam revenisset, Misane plebis sacerdotium, literario certamine superior ceteris, qui in eam arenam descendissent, obtinuit; quo tempore quia Bononiz literas Græcas didicerat, atque eatenus in Philosophia processerat, ut reliquum iter posset per se ipse, sine alicujus magistri ductu, conficere, ac sine cortice, ut dicitur, nare; doctissimum illum, de Sacramentis novæ legis, scriptum librum edidit, & Romam ad Sixtum V detulit; quo munere adeo delectatus est Pont. ut officiis beneficiisque eum maximis fuerit complexus, eoque magis in ejus amorem impulsus, quod ille per eos dies ex altero literario certamine, de Barbianæ plebis nobili sacerdotio, Romæ proposito, victor pedem extulisset. Itaque omnis ejus pecuniæ, quæ in diplomate conficiendo fuisset enumeranda, idem Pont. illi gratiam fecit, nec minore liberalitate largitus est etiam eam, quæ danda erat, pro diplomate superioris sacerdotii, in Io. Matthæum fratrem a se translati. Sed tam pinguis Ecclesiæ fructibus locupletatus, non tradidit

se inertix atque desidix, non faciendx pecunix operam dedit, sed pauperum inopiam sublevando, & cum aliis quæ didicerat communicando, optimi patris & pastoris partes exquebatur. Nam omnibus se ad docendum dabat, qui disciplinx gratia ad ipsum convenissent, quorum magnus erat numerus; neque aliam ab eis mercedem exigebat, nisi amoris ac benevolentix, atque ut darent operam studio ac diligentia, ne apud ipsum operam perdidisse dicerentur; quæ illi pulcre ab eis relata est gratia; complures enim, qui Lugo, Cotignola, Imola, Faventia, atque ex aliis propinquis urbibus profecti, se illi in disciplinam tradiderant, magno civitatibus suis usui ornamentoque extitere. Verum hæc tassa in eo doctrinx vis eo erat omnibus admirabilior & gravior, quod eam ornabat mira vitæ dignitas, morumque integritas; quarum virtutum fama impulsus Clemens VIII, in cujus & Petri Card. Aldobrandini nomine aliquot egregia opera ediderat, ultro dedit illi optionem, ut de duabus Ecclesiis, Corindæ & Tilefiz, utram vellet, eligeret, cui Episcopi nomine & honore præesset: sed neutram placuit accipere, quod a patriæ suæ finibus longo essent intervallo disjunctæ. Sed Paulus V, in cujus tutela præsidioque latebat, aliam eidem commodiorem aptioremque decrevit Ecclesiam, nimirum Bertinorensem, tum Federici Cardinalis Borromæi honoris gratia, tum etiam, quia in iis controversiis, quæ tum agitabantur, suis scriptis acerrimum se Ecclesiasticæ libertatis propugnatorem ostenderat. Sed lethali morbo interceptus est antea, quam Episcopalibus sacris initiaretur. Latini sermonis elegantiam omnino contempsit; ut apparet ex indicibus librorum, quos edidit de Censuris Ecclesiasticis, nempe, de Excommunicatione, Suspensione & Interdicto, de Irregularitate, de Censuris reservatis Rom. Pont. in Bulla Cænæ Domini; de Iustitia & validitate Monitorii Rom. Pont. contra Venetos, nec non responsiones ad septem Theologos, & ad doctores gymnasii Patavini; atque ex aliis multis operibus, quæ partim extant, partim suo tempore in publicum venient. Sed istuc inquinati sermonis vitium, soliditate doctrinx, vitæ innocentia atque

eandore, multisque præterea aliis virtutibus, compenfatur.

FRANCISCUS PATRITIVS.

IAm vero prodeat in medium Franciscus Patritius Venetus, non hujus modo sed longo superioris ævi Italorum fere omnium multo doctissimus, in omni præstantissimarum artium genere; qui occupatissima in vita ac summorum virorum negotiis pene omnibus, ac fere perpetuo itinerum labore districtus, nunquam literarum studia intermisit, & egregia multa composuit, quæ summis literatorum omnium laudibus efferuntur. De cujus Parallelis militaribus præsertim, notissimum judicium est Josephi Scaligeri, hujus generis acerrimi æstimatoris, qui in suis ad amicos epistolis scripsit his verbis: *Franciscus Patricius solus mihi videtur digitum ad fontes intendisse; quem ad verbum alii, qui hoc studium tractarunt, cum sequantur, tamen ejus nomen ne semel quidem memorarunt.* Multa hujus sunt præclare ac prope divinitus scripta, quæ longum esset omnia enumerare; sed hæc maxime illustria, Paralleli militares, in quibus veterum Imperatorum militaris disciplina cum ea comparatur atque confertur, quæ nostris nunc viget in moribus; qui liber est mole quidem amplius ac magnus, sed rerum, quæ in eo continentur, æstimatione ac pondere longe maximus atque gravissimus. Librum hunc alii duo sequuntur, item mole ac doctrinæ præstantia inter se genuini atque simillimi, quorum unus, nova, de universis Philosophiæ, inscribitur; ubi ad intima & arcana Philosophiæ penetralia ingenii sui acumine, sibi iter faciens, ab aliis posita ejus tradendæ principia, & tanquam fundamenta convellere ac labefactare conatur, & alia ab illis diversa statuere atque desigere, quibus, utpote cum vera fide congruentibus, Christiana adolescentium ingenia in scholis erudiantur: alterum vero volumen egregium, Peripateticarum discussionum nomine appellat, in quo, admirabili ingenii diligentiaque laude, Aristotelis inventa ad exactam judicii sui normam erigit, examinat, ac sua illa mirifica ad refellendum

dum consuetudine usus, explodit & ejicit; quibus transactis, aliam a se excogitatam scribendi rationem affert, &, quod suum sit de Aristotelicis libris judicium, exponit; atque eos ait esse suppositicios, & falso Aristoteli adscriptos; ac si sint veri ejusdem libri, nihil eos ab ipsius Marte depromptum continere, sed omnia ab aliis Philosophis crepta complecti; idque pluribus veterum dictis, quæ ab Aristotelis sententia non aberrarent, conatur ostendere: denique totus in eo est, ut Aristotelicæ philosophiæ fabricam funditus evertat ac diruat, jactisque novis fundamentis, suæ fastigium ac culmen imponat; prope inutili ac supervacuo labore: quid enim tam inutile est, quam si convellere adoriaris ea, quæ commoveri non possunt? quid tam supervacaneum, quam si velis novam & angustam ad id semitam facere, ad quod latissima multorumque trita itineribus via cernatur? Altius Aristotelis auctoritas radices egit, quam ut cuiusquam vim impetumque pertimescat: viget, semperque vigebit, hominis disciplina; tantumque quis existimabitur scire, quantum ex doctrinæ ejusdem fontibus haustum, intelligentia comprehensum habuerit; ac nemo, cui cur sapiat, non satius esse ducet in iis, quæ ad Philosophiam pertinent, cum deo, ut ita dicam, philosophorum errare, quam cum aliis recte sapere, minorum gentium magistris. Itaque ille, omnibus in gymnasiis, ad sapientiam properantibus, dux semper habebitur, ille Theologorum quasi militiæ, adversus religionis nostræ hostes, definitiones, argumentorum copiam, & alia preclare dicta multa, tanquam amentatas hastas elargietur, quas illa theologicis lacertis ac viribus, de cælo suppeditatis, torqueat ac vibret: nova vero Patritii Philosophia, quantumvis egregia, vix locum in eruditorum bibliothecis inveniet, quam illi, animi causa, cum est ocium, legant, & in admirationem ipsius ingenii suscipiant; quemadmodum etiam novam ejusdem Geometriam, novamque Rhetoricam; qui libri, in commendationem Euclidis, Ciceronis, Quintiani, aliorumque, qui, hos secuti, de arte Rhetorica libros scripserunt, extabunt. Edidit de scribenda historia tres dialogos, & de arte poetica totidem decadas, quibus precium sta-

statui pro illorum æstimatione vix potest; & commentarium in Polybium; de Militia Romanorum, multorumque aliorum ex insula Cypri: protulit etiam in lucem, ex antiquitatis tenebris, tanquam e ruderibus, erutum, Commentarium Græcum Philoponi in Metaphysicam Aristotelis, quem etiam, in Latinum a se conversum, emisit: Mercurii Trifinegisti operum (ut est opinio) fragmenta, tanquam disiecta membra, in unum corpus collegit. Perpetuas habuit cum Theodoro Angelutio, philosopho ac medico Patavino, de naturali philosophia, & cum Jacobo Mazzono de ea, quæ est de moribus, controversias, ut ex libris apparet, quibus, tanquam armis, inter se decertarunt. Hujus si virtuti par data esset corporis statura, proceritate infra se ceteros reliquisset; sed brevis, neque ita venusta, a natura contigit; neque tamen minus fuit illustris & honoratus; quod magnos homines virtute metimur, non corporis mole. Docuit Philosophiam in duobus clarissimis Italix gymnasiis, Romano ac Patavino.

CLAUDIUS BELVRGERIVS.

Claudius Belurgerius Gallus, jam inde a puero, incredibili Græcarum literarum amore flagravit; in quibus perdiscendis, ita assiduam ac diligentem operam posuit, ut Parisiis, in quam civitatem se contulerat, habitus sit omnium, qui professionis ejusdem essent, longe doctissimus: sed collegii Navarræ moderatoris in primis studia commovit, evocatusque ab eo est, ut humaniores ibi literas doceret; in quo munere versatus est diu, ac complures ita Græcis literis eruditos ad graviora studia dimisit, ut in publicis philosophicis disputationibus, tum in lacessendo, tum in respondendo, non alia uterentur lingua nisi Græca; cum etiam capita questionum, quæ in certamen contentionemque vocabantur, Græce edita essent. Et hoc magistro, ita Græcæ eloquentiæ studia viguerunt, ut non alias major illi honor sit habitus, neque vehementius eidem plures inservierint. Moribus fuit subagrestibus ac rudibus, neque in victu, vestitu, sermone, quidquam habuit ele-

elegans, concinnum, aut compositum, sed æque omnibus in rebus incultus ac dissipatus apparuit; nullus apud eum liber, quantumvis carissimus, egregie præter ceteros custoditus, aut in loculamenti suo loco positus, cernebatur, sed unumquemque, ut casus tulerat, projectum, dispersum, squalidum, rudis mensa, vel solum excipiebat. Erat illi, præ ceteris, in deliciis Homerus; hunc habebat semper in manibus, hunc totum edidicerat, hunc secum in templa deferebat, & sacrarum precum loco recitabat. Hinc insolita cupidine actus, dedit operam, quantum potuit, ut Thersitæ imago, quemadmodum in secunda Iliade versibus ab Homero describitur, ita celebris cujuspian pictoris manu in tabula coloribus depicta exprimeretur, nihilque, quantumvis minimum, prætermitteretur ex iis, quæ ille in eo deformando persequitur; quæ res illi ita contigit ex sententia, ut nihil esset ea pictura illustrius, nec quidquam existeret, quod magis visendum censeretur. Demum ille, in Homero diligendo, eo insaniz processit, ut incredibili cupiditate exarserit, suis sibi oculis subjiciendi campos, ubi Troja fuit, atque omnia ea late loca conspiciendi, quorum ille memoriam ac nomen usurpat. Qua de causa Carthusianis fratribus certam pecuniz summam, quam morte ipsius lucrifacerent, sænori dedit ea lege, ut, quoad viveret, centenos ac quingenos sibi aureos, ubicunque locorum esset, transmitterent. Quibus actis, annos natus quinquaginta, ea Parisiis mente discessit, ut non antea ad munus docendi, quod relinqueret, reverteretur, quam totam gratiæ oram oculis perlustrasset, ejusque descriptionem, diligentissime in tabulis exaratam, reportasset. Ergo in hac peregrinatione, majore vi animi & ardore suscepta, quam si in Palestinam ad sacra Christi nutrimentorum & supplicii loca properaret, Romam venit; ubi a Regis Galliz oratore perhumaniter exceptus est, & ab eruditis viris in honore habitus; & quia, quacunque iter faceret, plura virtutum suarum, quam adventus sui, vestigia relinquebat, elegantissimo carmine, Græce scripto, quod etiam in Latinum sermonem convertit, M. Antonii Burghesii, Pauli V fratris filii, & Camillæ Vrsinz, Virgilii filiz, nuptias, quæ

quæ in eos dies incurrerant, quibus ipse ad urbem accesserat, cecinit. Tum Roma Venetias se contulit, ubi continuo, ventis operam dantibus, tempus navigandi commodum nactus, navem conscendit, quæ in Orientem solvebat; quæ tandem hominem, cui, præ cupiditate agri Trojani visendi, nulli neque venti, neque remi satis facerent, Alexandriam incolumem detulit. At qui Neptunum sibi æquum, cohibitis tempestatibus, navem vœtus invenerat, quem potius iniquum habuisse par fuerat, quod tam incenso studio ab ejus urbis vestigia propemodum adoranda ferretur, quam, sibi perjuram, tridente subvertisset soloque æquasset, Alexandrinum solum, ad cujus contumeliam nihil illa profectio pertinebat, adversarium reperit: nam lethali eum morbo implicitum, & tanquam catenis devinctum Orco tradidit, ut ad Homeri, quem tanta pietate coluerat, manes adduceret, ab eoque perdisceret, cujusnam potissimum ex illis septem Græciæ civitatibus esset, quæ suum esse asserunt, deque ea re acriter apud judicem, qui nondum sententiam tulit, pugnant inter se atque contendunt. Ejus morte, magna pars librorum ejusdem deperit; atque inter eos insignis commentarius in Homerum; quem infinito multorum annorum labore confecerat.

ANTONIUS GYRONVS.

Antonius Gyronus Tarraconensis, adolescens Romanam venit; qui urbis amore captus, perpetuum in ea vite suæ domicilium collocare constituit. Erat rum modicis facultatibus præditus, sed postea eas auxit usuris centesimis pecuniarum, quas in societatibus officiorum, ut vocant, collocaverat. Jamque tantum divitiarum sibi coëgerat, ut ex earum fructibus posset suo, ut dicitur, vespere vivere, neque necesse haberet, suas alicui operas locando, vel se indignum aliquod opus faciendo, sibi victum quærere. Sed quia non licebat illi esse ocioso, & quia bonis erat artibus à puero institutus, contulit se ad cunctarum urbis Ecclesiarum notitiam, quibus videlicet initiis earum unaquæque orta sit,

fit, quibus beneficiis ac muneribus exornata, quibus sanctorum Martyrum reliquiis locupletata, quibus clarorum virorum sepulcris cohonestata, atque ad alia id genus multa, curiose investiganda; quibus in rebus ejus operæ magnum sibi fuisse usum, testatur Cæsar Baroni-
 nius, in suis ad Martyrologium Romanum notis, qui cum illi magnus intercedebat usus consuetudoque. Sed in primis sanctimonix se deditum esse, præ se ferebat, tonsa barba capilloque; pallio, tunica, sago, tibialibus, ac femoralibus laneis, male aptis ad corporis membra; collare simplici, neque, ut tum erat usus, lactucato; Bre-
 viarium, multis Christi Domini Deiparæ Virginis, ac sanctorum imaginibus refertum, quocunque incederet, ferebat sub alas; atque opinioni hominum, hac sanctita-
 tis specie, blanda conciliatricula, commendatus (nam omnes, non solum boni, verum etiam mali fere semper probitati favent) cepit primum se in nobilium virorum amicitias insinuare, tum ab hac rimula adaper-
 ta, ad mulierum quoque familiaritates obrepere, earum præser-
 tim, quæ vel nobilitatis splendore aliquo vel formæ bo-
 no præstarent; in quo adeo fuit felix, ut nulla esset Ro-
 mæ nova nupta, nulla paulo celebris matrona, nulla nu-
 bilis virgo, quam non amicitia comprehenderet, obse-
 quio tueretur, ac non omnibus sibi modis adjungeret, & si quam in via conspiceret, cum ea consistere, colloqui, summaque ambitione contendere, ut qui adessent, in-
 telligerent, se esse mulieri in amore & gratia. Cumque religiosissima Dei immortalis & sanctorum templa, ma-
 gna populi frequentia, celebrabantur; & cum dies, divo cuiusdam sacer ac festus, advenerat, eo die ejus in Ædem magnus virorum ac mulierum numerus conveniebat; ideo mulieribus, se tergendis, ornandi, poliendi; expo-
 liendi, pingendi, nulla satis satietas erat, ne, ubi exem-
 pla conferrentur, mulierum aliarum sui ætas ornatus præ-
 niteret, cum alias ornatas melius conspexissent: tum licebat videre hominem, nunc ad hanc, nunc ad illam rhedam accedere, aliam salutare, cum alia caput con-
 ferre, alteri aliquid in aurem dicere, in templo vero in-
 ter eas versari, demonstrare illis, quid unumquodque sacellum vel ara sacri aut religiosi contineret, ad detra-
 ctas

Etas ex breviario suo imagunculas partiri: neque offende-
bantur in eo homines; ac minus commodos de illo
sermone habebant, sed tantum, joci gratia (ut verbis
eorum utar) amatorem spiritualem cum appellabant;
cum illius amor intra externas illas significationes con-
sisteret, nec ad rem abiret. Sed tandem miser, turpiter
decoctis iis; quibus cum eas officiorum societates, de
quibus diximus, inierat, tabe confectus interiit; non si-
ne Baronii jam Cardinalis admiratione, qui nunquam su-
spicatus fuerat, tantam vim illi pecuniæ fuisse, quem, ut-
pote Evangelicæ paupertatis studiosum, adamaverat.

RV.TILIVS GRACCHVS.

SI illustrium totoque terrarum orbe nobilium Pinaco-
thecarum parietes, non hominum formosorum mo-
do, sed deformium quoque imaginibus referti vestiun-
tur, quæ imagines, non minus quam illæ formoso-
rum, tum pictorum artificio, tum formarum commemo-
ratione delectent; cur non liceat etiam nobis, do-
ctrinæ sapientiæque forma præstantibus viris non nul-
los inferere, quorum insignis stultitiæ deformitas cum
aliquo ingenii acumine juncta videatur? Horum enim
tanquam aspectus inhonestus ac sœdus ita nos capiet,
ita oculorum animi sensus voluptate mulcebit, ut egre-
gia & facta ad amissum ora, atque ingenia. Quis non
etque in Therfite teneatur, quem suo in carmine, tan-
quam in aliqua tabula, ab imis unguibus usque ad ver-
ticem summum, omnibus corporis vitiis cumulatam,
descripsit poetarum princeps Homerus; atque in Nireo,
quem nigris oculis nigroque capillo fuisse, quoque ne-
minem, neque pulcriorem, neque venustatibus omni-
bus pleniorē, ad evertendam Trojam accessisse, idem
affirmat? quis non simili, in dissimili specie, capi volu-
ptate se sentiat, ex Vetustinæ descriptione, cui Martia-
lis tres tantum dentes, ac tres capillos, pectus cicadæ,
crus formicæ, rugosam frontem, mammas aranearum
cassibus pares, os rictibus crocodili simile, nocturnos
oculos, atque alia monstrosi corporis portenta, elegan-
ti carmine tribuit; ut in Lesbia Catulli, in qua deformi-

manda, totam esse foruosam, pulcerrimam totam, tum omnibus unam, omnes furrupuisse Veneres ait? Referam igitur duorum hujus nostræ ætatis hominum, insignium adridendum, imagines, quibus cognoscendis animus reficiatur, & ad alios, summa gravitate elegantique doctrina viros, de quibus dicturi deinceps sumus, intelligentiæ oculis intuendos, integer revocetur; ac primum a Rutilio Graccho ordiamur. Hic Romæ nobili domestico genere natus, a parente inops est relictus, ac fere semper cum adversa fortuna conflavit; sed tamen ita in re tenui vixit, (in qua tutanda non erat stultus) ut nunquam, se liberalius alendi gratia, data opera, alienis escis studuerit, quamvis invitatus ire non recusabat, neque ad aliquam artem, genere indignam suo, transierit. A puero dedit operam literis, & quia erat ei ingenium docile, quidquid traditum fuerat, didicit. Eludo egregius, ac robustior factus, quoad illi mens constitit, egregios complures rhythmos composuit, cum aliorum sui ævi poetarum optimis comparandos; qui fratris mei indigentia, a quo erant collecti, interiere: sed postquam mente destitutus est, scripsit non minus multa ridicule, iussit quæ splendida bilis; ita tamen, ut in illa stultitiæ quasi caligine, quoddam quasi lumen ingenii emitteret; e quibus majorem & risum & admirationem commovebant conciones, Etruscis rhythmorum lege solutis versibus comprehensæ, quibus Evangelia, singulis quadragesimæ diebus attributa interpretabatur, & in his proœmia, in quibus populo audientiam faciebat: ea enim non extrinsecus aliunde quærebat, sed ex ipso Evangelio sumebat. Verbi causa; de puero centurionis ægro verba facturus, mulieres admonebat, ut si quæ pueros infantes minutulos illuc attulissent, foras efferrent, ne quasi hædi obvagirent, tum ut tacitæ sederent, neque canora sua voce tinnirent; denique concionem totam jubebat silere & tacere; nam ægrotum esse ibi vicinæ, ac modo, ex perpetua nocturna vigilia, aliquid quietis capere cœpisse, proinde incivile, immo sævum & immane esse, strepsu atque clamore, ejus ab oculis somnum abigere. Item, Christi ab inferis excitati historiam enarraturus, quæ concio, quoniam a prandio habetur, mul-

tos invenit, qui se a somno obsideri obtinerique patiuntur; ut ab eo auditores abduceret, Cavete, ajebat, ne vos somnus obrepat; nam hodie nemo inventus est illi operam dare, nisi lictores atque carnifices; itaque quicumque ex vobis somno indulerit, non erit alius, nisi lictor & carnifex, ex eis, qui Christi sepulcri custodiendi partes acceperant. Leve esset ac frigidum, omnia referre, quæ ille per insaniam scripsit. Sed cum primum a se ipso discessit, in varias rerum formas, quasi Proteus, abiit; ante omnia in Antichristi personam transiit, atque ab omnibus pro Antichristo haberi volebat; quem non fœvum, non immanem, non impium, non scelерum caput, non Christi inimicum, ut origo verbi significat, futurum ajebat, sed mitem, humanum, pium, sed virtutum omnium principem, ac maxime cum Christo conjunctum; se quidem res miras ac supra humanæ naturæ vires editurum esse affirmabat, æque aliis pollicebatur opes, aliis honores, aliis divitias; quod cum ad quæsitores fidei delatum esset, statim compactus est in carcerem, sed, causâ diligenter cognita, fit ab illis decretum, deliramenta eum loqui, nec tam a fide, quam a mente discessisse, ideoque in nosocomium dementium detrudendum esse, ut ibi potaret helleborum aliquot dies: in quod exceptus, cum non admodum pro infano se gereret, nullius fere custodiis asservabatur: quamobrem die quodam, cum pedem e culina cocus extulisset, in eam ipse ingressus, tanquam cloaca vel gurgis totum in se illud immisit, quod fuerat amentibus omnibus coctum: tum domi moderatores jusserunt eum egredi ex ea foras, ac noluerunt alere stultum tam edacem; præsertim cum intra verba tantum desiperet, neque manu aliquid moliretur. Tum Proteus ille in aliam formam se inclusit, atque esse literatum, qui paucos menses ante e vita migraverat, ad solita pietatis munia ab orco remissum, asseruit; ac complures egenos pueros, quemadmodum ille faciebat, tota ex Vrbe coactos, cruce præeunte, binos ire jubebat, sequebatur ipse, tunica indutus cinericia cucullata, stipem quærens: sed die quodam, cum apricanti sibi, una cum mendicabulis illis hominum pro Æde D. Augustini, ædituus molestus in-

tervenisset, erepta e pueri manibus cruce, caput illi comminuit. Dissoluto igitur mendicorum cœtu, cum non succurreret alia persona, in quam immigraret, in se manere, ac suam gerere statuit; ac ne stultitia ociosa jaceret, voluit dare operam Philosopho illi, quem tum ego audiebam. Non potest satis narrari, quantos ludos præbuerit, quam multa jocosa dixerit, quam infanis argumentis, sed oppido ridiculis, iis, quæ a magistro traderentur, obstiterit; quorum unius in præsentia memini. Sumunt Physici pro comperto, non posse eandem rem duobus eodem tempore motibus, inter se diversis, impelli agitarique, videlicet non posse idem caloris simul & frigoris impulsu moveri; id ille hac ratione conabatur infringere. Fige palum, ajebat, in pariete, nonne illum eadem opera aperias & claudas; patefacias & obstruas? at quænam duæ res ita inter se pugnant, ut aperire & claudere, patefacere & obstruere? non jure igitur, unam & eandem rem duobus motibus contrariis, simul junctis, subjici posse negatur; quæ postea versibus comprehensa recitabat. Convertit se deinde ad civitatem pulcris moribus exornandam; & quia nullum fere in honoribus habendis discrimen adhiberi querebatur, atque eodem salutationis genere, privatos amicos, ac summos viros advenientes excipi; tres sibi pileos, apte inter se coherentes, ita ut unus, seorsim ab altero, extrahi posset, concinnavit, inque eos caput inseruit; atque inferioris ordinis amicis unum, superioris duos, summo vero loco positos tres sibi e capite detrahebat, hoc ordine, ut dextera manu unum, sinistra alterum apprehenderet, tertium in collum rejiceret. Ob quod inventum a S. P. Q. R. per epistolam petiit, ut ei victus quotidianus in Capitolio præberetur. At fiebat interdum, ut eidem non nemo molestiam, tanquam stulto, exhiberet; cui ille occillabatos probe: & si quis referre illi gratiam pugnis auderet, continuo sibi tunicam e pectore, ubi cereus pendebat orbis, diloricabat, atque, En tibi, ajebat, agnum Dei, feri, contunde pugnis, interfice: quæ ita loquebatur, ut compositas in pugnos manus haberet, ut (qua erat athletica ac prope gladiatoria corporis firmitate) si se commoveret, os illi exoffaret:

ret: quamobrem ii, majoris infortunii metu, taciti discebant: neque ita facile inveniebatur, qui esset illi molestus. Sed homo stultus, & magis aliud quidpiam quam se ipsum esse cupiens, non potuit diu limitibus se suis tenere, sed immigravit in Herculem; ac feriis Bacchanalibus, cum magna vis nivis e cælo decideret, vestus equo, nudus, ita ut ex utero matris excesserat, nisi quod paululum leonis pelle tegebatur, uno die sæpius totam Urbem circumvixit: atque effundebantur in risum omnes, cum cernerent, tempestate illa perfrigida, nivis homini floccos ex capillis cruribusque nudis pendere. Sed nullus erit scribendi finis, si sit consilium, omnia exponere, quæ ille stulte ac ridicule in vita fecit ac dixit. Ad senectutis terminos cum jam pervenisset, tabe confectus interiit, vel tanquam sol potius, sed quem postea nemo exorientem visurus esset, occubuit: etenim, quo tempore mortem obiit, appositis capiti suo radiis, ex aurichalei bracteis factis, se solem esse simulabat.

POMPEIUS GIARDINUS.

EAdem tempestate, Pompejus Giardinus Romanus, nobili item genere natus, sed parum mente validus, multos annos, non civibus Romanis solum, verum etiam advenis, magnam de se voluptatem atque animi remissionem attulit. Ejus stultitia versabatur in eo, ut, quotquot in principibus concionatoribus numerarentur, eos diligenter audiret, atque imitando exprimeret; quos gestu, motu corporis, vultu, & voce, & ipso genere sermonis, ita repræsentabat, ut omnes admirarentur; sed in primis Toletum, Panicarolam, Lupum, Marcellinum, & alium nescio quem, sive verum, sive ab eo excogitatum & fictum concionatorem, imitabatur, qui maledictis ac precibus magis, quam rationibus & exemplis, improbos a vitiis abducere, & ad virtutem traducere conabatur. Ut vos, aiebat, Deus divique omnes perdant, pessimi, ut vitam ferro, suspendio, ruina, vel præcipitio finiat, improbi, scelerati, sacrilegi, cur de via deceditis? cur castimonia, pudicitia, continentiaque relicta, ad omne genus turpitudinis nequitiaque, libi-

dines vestras effunditis? At non possumus, dicitis, tam lubricis vitæ humanæ viis, sine casu aut prolapsione, consistere. Malum, quod vobis Deus det, magnum & maturum: cur, cum parvisti diu voluptatibus, cum dedistis multum temporis ad ludum ætatis & ad inanes hæc corporis voluptates, non revocatis vos aliquando in viam, atque animum ad virtutis studia traducitis? exemplum de me sumite; ego quod feci flagitii, populo uni potuit vitium dispertiri, & tamen ad frugem reddi, & nunc, qui eram antea potator, scortator, aleator, ex hoc suggestu vobis, hoc est, surdis fabulam narro; sed ite hinc in maximam malam crucem; tum sera vos penitentia subibit, cum cælum me, orcus vos in æternas damnatorum sedes, exceperit. Dixi. Solitus etiam erat, sub velo aliquo latitans, lepida atque iucunda imitatione, referre primo partu mulieris laborantis ex uteri doloribus voces; inducebat enim eam, non solum usitatis illis parturientium precibus postulantiem, dari sibi facultatem pariendi, nimirum, Margarita fave, fer opem, serva me obsecro, sed diris etiam diem illum devotentem, quo data nuptui esset; ac, me miseram, agebat, si mihi suspicione saltem oboluisse, quantum doloris inesset in pariendo, conclusissem me ante in aliquam sacrarum Deo Virginum domum, quam cuipiam nuptui daret: quod si tanto emitur dolore voluptas, quæ ex viro percipitur, valeat illa, atque eam sibi habeat, quæcunque illius est cupida. Tum, mutata voce, obstetricis partes agebat, quæ, bono parturientem animo esse, juberet; nam mox futurum, ut scitulum ex se puerum daret, qui omnem sibi ab animo doloris illius molestiam abstergeret. Interea, o filia, agebat, manibus, pedibus, totoque corpore enixe contende, ut propere partus in lucem exeat, præsto etiam vir tuus aderit, qui suo aspectu non minimum tibi solatium afferret. Quid? illa agebat, mihi virum memoras? male illi ac maritis omnibus fit, qui tantum nobis dolorem creant; quæso, odium illud, si sapiet, nunquam mihi posthac in conspectum prodibit. His atque aliis ejusmodi nugis studebat in hilaritatem animos dare; ideo sæpe vocabatur, ac sæpius etiam invocatus, ultro se offerebat illo, ubi con-

vi-

vivium agitari perceperat, ut, concionculis recitandis, nummum unum aureum, vel saltem argenteum auferret; & quia erat præter modum avidus pecuniæ (nam id unum illi vitium inerat maxime) fere quotidie ad portam Flaminiam ibat, percunctatum a custodibus, num vir princeps aliquis, aut domi suæ nobilis, urbem esset ingressus; ac si quemquam venisse compererat, generis sui oblitus, evolabat ad tabernam æstutum diversoriam, in quam ille se receperat, ut aliquid ab eo, sua illa faceta concionatorum imitatione, abraderet: ac si nulli adnarent thunni, quos expiscaretur, pro pisciculis capiebantur illi, qui in Ædem Deiparæ Virginis, Dominicanorum fratrum, cujus fores totos dies patent, ingrederentur; nam ad singulos accedebat, iisque, si vellet emere, binas binis obolis conciones venditabat, sed non ante, (ut sibi fucus fieret) recitabat, quam obolos in crumenam condidisset: ac fiebat interdum, ut viro- rum principum liberalitate large donatus discederet; ut a Menapiorum Principe, cui Jacobus Boncompagnus Soræ Dux, cœnam dederat; ac nisi Fabricius Carosius, tunc temporis saltator insignis, ac potator maximus, qui temulentus ab eadem cœna revertebatur, homini succurrisset, a circumpedibus ejusdem Ducis, vita ac pecunia, quam referebat, everfus fuisset. Venerat Fabricius in illud convivium, evocatus a Duce Soræ, ut, proposito præmio, pugnam cantharis cum Germano quodam committeret, quem Menapiorum Princeps Novellio Torquato, Lucio Pisoni, M. Antonio Triumviro, ac Ciceronis filio, quos vinosissimos fuisse constat, bibendi gloria anteferebat; quem simul ut Fabricius aspexit, Hic ne, inquit, est ille nebulo, qui cum mihi futurum est certamen? qui mecum se conferre audet? jam illi ostendam, qui vir sim; illud dolet mihi, quod cœnatus huc venio; verum animo non deficiam, sed vino opus est exquisitissimo; jam Germanus, Gregorii XIII nomine invocato, heminale poculum, vini plenum, Fabricio propinaverat, cui ille, Ludis ne, inquit, tu me? hoc pocillum avibus, cavea inclusis, ut bibant, appone; arreptoque congiali vase, vino ad summum implevit, tum uno haustu ita totum exhaustit, ut nihil in eo, ad

clidendum in pavementis sonum, villi reliquerit. Exhortuit Germanus, ac facile certaminis illius palmam Fabricio detulisset, sed pudore ac domini sui metu deteritus, vase accepto, vix, sæpius in hauriendo respirans, ex eo ductum in se vinum inverfit. At rursus eundem Fabricius ludum, Menapiorum Principis honoris gratia, alio hautu commisit, nec licitum fuit illi misero recusare. Postremo Fabricius, ad illum conversus, cui jam ebrietas os pallidum, pendulas genas, rubidos oculos, tremitulas manus, effecerat, Ne te, ait, functum omnibus periculis credas, nam quanta Duci nostro Sorano fieret injuria, si nemo bene illi ex nobis sua ad pocula diceret! tum vas cumulatus quam antea implevit, ac prius sanitatem Duci precatus, spectantibus, miraculi gratia, convivis, illud intrepidus exinanivit. Jussus est ille, quamvis pene sine mente ac sine sensu jaceret, invitationi respondere; sed vix plenum illud vas labris admovit, cum exanimatus ad terram corruit, atque illinc elatus est mortuus. Sed Fabricius, id quod ebriosus raro contingit, nonaginta & eo amplius consecit annos; Pompejus vero noster, cum jam nemo sustineret eum amplius audire, senio confectus interiit. Fuit ingenio eleganti, nec adversa probitatis fama: nunquam enim dici eum memini, sicut de aliis, præter avaritiam, turpium libidinum vitio laborasse; præsertim cum juveni ad omnium fere domos aditus patuisset, & honesta facies & firma corporis valetudo contigisset. Hujus avaritiæ mentio cogit me, ut Dichæi Dichæani, prodigiosæ avaritiæ hominis, imaginem subiciam.

DICHÆVS DICHÆANVS.

Dichæus Dichæanus, puer e Græcia a parente, qui in præcipuis Europæ urbibus argentariam non ignobilem fecerat, perductus est Romam; ac sicut ceteros ejus æquales impositentia atque elatione animi vicit, ita etiam multos mortales, vitæ parsimonia, antecessit: nam fuit cerebroforum cerebrofissimus, & parcorum parcissimus. Adolescens, studiis humanitatis, ac juri civili in primis, operam dedit; de quo nonnulla, ab eo doctore

elegantissime scripta narrantur, sed ea nondum, quod sciam, typis impressa apparuerunt. Omnibus in rebus, gravitatem dignitatemque sectari se profitebatur; sed in incessu præsertim, & in omni corporis motu, nihil non ad artem dirigebat. Nam quemadmodum Spartanorum militia dicitur processisse ad numerum, neque ulla adhibita esse, sine anapestis pedibus, hortatio; ita etiam omnis hujus vitæ actus, erat numeris, ut ita dicam, adstrictus, atque in omnibus illis septem motibus, quibus corpus agitari solitum est, summa ab eo cautio ac diligentia adhibebatur, ne quid committeret, quod esset ab hominis gravitate, vel potius a regia maiestate alienum. Itaque sive ad lævam sive ad dexteram se flecteret, sive sursum, sive deorsum moveret, sive in orbem rotaret, sive aliquo accederet, sive inde recederet, semper sui similis inveniebatur. Hinc locum festivo urbanorum hominum dicto fecit; quippe illum, aiebant, secum hominem ducere, qui occulte post ipsum plauderet, ut ad plausus mensuram, quemadmodum solent musici vocem in cantibus, ita ille gressus moderaretur suos. Nullum ejus ab ore dictum exibat, nisi prægrande, rotundum ac magnificum. Græcus plane erat; quid opus est verbis? nam Græcis, ut Horatius ait, *dedit ore rotundo Musa loqui*. Nullus erat apud eum ridiculis hominibus quæstus: poterant illi quidem dictum, quantumvis ridiculum, dicere, sed nemo suis ridiculis potuit eum adigere, saltem, si non arrideret, ut dentes adstringeret, ac multo minus ut ipsi cœnam ac prandium daret; quod nihil a regali maiestate debere longius abesse existimaret, quam risum, atque adeo risus ipsius suspensionem: nam jactabat, se longa serie stirpi Græcorum Imperatorum adnexum. Sed tandem ad Remp. capeffendam accessit, curavitque, ut ejus sibi administrandæ pars aliqua tradere-tur; qua impetrata, tum, ut cum maxime, gravitatî operam dedit: nam tum præsertim illi studendum esse existimabat, cum per compita, per fora, per Principum virorum aulas caudam trahebat. Itaque a nemine coram, sed per epistolam, adiri volebat: verum quia ex eo ordine, in quem venerat, in privatorum negociis judices dantur, non poterat effugere, quin patronis ac clientibus,

bus, de re sua volentibus eum docere, se daret; sed quia erat in primis cerebrosus, ac sui juris sententiæque, fiebat interdum, ut dum patronus, vel ille cui res erat, paulo vehementius causæ suæ defensionem adversus animi illius sententiam prosequeretur, ad elamores & convicia, nonnunquam etiam res ad manus & ad pugnam veniret: ac die quodam, ejusmodi res accidit, quæ in vulgus prolata, viros, de homine ridicule iracundo, toti urbi sermones ludosque præbuerit. Venerat patronus ad eum quidam, non indoctus nec indifertus, ut clientis sui causam, de qua iudex erat ille captus, exponeret, eumque rogaret, ut sententiam quamprimum diceret; cumque in differendo, validissimis rationibus, quæ ab illo objiciebantur, labefactaret atque convelle-
ret, homo impotenti animo atque elato, qui ferret ini-
que, se rabulæ (ita enim contumeliæ eum causa appella-
bat) in disputando parem esse non posse, ad id accurrit, in quo superiorem se esse non dubitabat, nimirum ad vi-
um; impetuque facto, pugnis & calcibus, ad terram eum affixit, & continuo in cubiculum ibi proximum abiit; sed vix pedem intro in illud intulerat, cum alter, ex eodem quo ille erat ordine, iudex salutatum ad eum venit, quem ille, qui humi jacebat, intuens, existimavit eum esse, a quo fuerat pugnis male multatus, ac surgens, iraque ubi esset ignorans, in os illi involavit, & plusquam quingentos colaphos impegit, antequam ille, re improvisa percussus, posset se colligere percontarique, quamobrem tanta ab eo injuria afficeretur. Verum de incredibile hominis parsimonia, cujus gratia in illius memoriam incurrimus, sexcenta possunt enumerari; sed paucis contenti erimus, unde appareat, voluisse eum duas res inter se maxime diversas copulare atque connectere, summam videlicet in omni victu tenuitatem, & admirabilem vitæ cultum atque splendorem. Erat illi elegans suppellex, a parente relicta, serica vestis stragula, plura peripetasmata, multum argentum, tum cælatum tum purum, conopei, lecti, sellæ, mensæ cum scriniis, ex eboræ atque hebeno scite eleganterque contextis, atque alia ejusmodi non parum multa regalis propemodum opulentæ ornamenta: itaque jubebat sibi quo-

quotidie exornari ample magnificeque prandium ac cœnam, videlicet exponi ea, quibus abundabat, plurima ac pulcherrima vasa argentea, quivis ut cum aspexisset, non se paratum homini privato prandium, sed instructum Regi maximo convivium, videre arbitraretur, ac pro certo existimaret, deferendum in illud esse, quidquid eo die apud omnes lanios, apud omnes aucupes, denique quidquid omentorum fuisset in foro: procedebant famuli, utraque ferentes manu patinas, alias aliis impositas, atque invicem tectas, quasi depellendi ab epulis, quas continebant, frigoris vel sordium causa; sed intus nihil habebant, sed plenæ erant inaniis; paucæ vero, vel pulcem, vel frustulum agninz, vel suillæ, vel bubulæ, pro temporum varietate, claudabant; vespere vero cenabat olus, ovum, vel paucas oleas, cum frustulo panis, quod sibi reliquum fecerat in prandio, & ad vappæ heuinam sitim extinguebat: in prandiis vel cœnis summam dabat operam, ne qua panis, quem edebat, mica sibi in barba adhæresceret, vel in sinum, atque inde ad pedes, delaberetur, & si quæ forte decidisset, magno clamore, tollendam eam reponendamque una cum aliis in mensa, imperabat: itaque nulla unquam neque catella, neque pullus gallinaceus, neque formica, facta est ex earum aliqua pinguior. Postquam e mensa surrexerat, jubebat placide accurateque inde mappam amoliri, omnesque panis micas, quanta maxima poterat diligentia, in unum contrahi, colligi, asservarique, in proximum diem dominicum, ut ex eis, ex jure coctis, puls sibi conficeretur. Coco quotidie ligna ad exiguam mensuræ rationem præbebat, simulque hanc illi edictionem habebat, ne vicino cuiquam ignem petenti daret, vel cultrum, vel pistillum, vel mortarium, vel quidquam ejusmodi utendum traderet; quod si edicta non servasset sua, diario ejus diei eum multabat. Neque ceteris in rebus minus erat parcus, minusque in speciem magnificus, sed quotidie antequam ad vesperasceret, candelabra sex argentea disponebat in mensa, quæ erat in cubiculo, ubi ad se venientes excipiebat, ut qui adirent, se esse copiose ornatum, atque ad ejusdem cultus rationem reliquam suam esse vitam arbitrarentur: sed pro-

de.

debat ipse sese; nam cum terras nox opacaverat, si erat, qui conveniendi aditum posceret, unam ex candelis, candelabris illis affixis, sua manu inflammabat; tum in ambulatione cum illo veniebat, sed octo vel decem spaciis factis, candelam alteram, illi proximam, accendebat, & primam exstinguebat; deinde, aliis decem spaciis confectis, tertiæ eodem modo lumen adiuovebat, ac secundæ adimebat; quem deinceps ordinem, in aliis accendendis exstinguendisque servabat; qua re assequeretur, ut omnes simul ad eandem mensuræ rationem decrescerent: sed ubi ad sextam candelam redacta res erat, continuo missos faciebat omnes, neque quicquam se ad eundi potestatem dabat, sed, candela sua luce orbata, abdebat se in cubiculum, ibique, ad tenue lucernæ unius lumen, quod reliquum erat temporis, antequam cœnatum vel cubitum iret, legendo vel aliquid aliud agendo conterebat; at mos hic tam illiberalis ac sordidus irrisioni jocisque facetorum hominum patuit. Nam cum venisset ad eum nocte quadam vir in primis nobilis, & ad jocandum aptissimus, atque solemne & antiquum illud suum de candelis, ut diximus, obtinentem cum aspexisset, irrisit stultam hominis sordide parci sedulitatem, qui & sibi voluptatem, & aliis, qui essent illud audituri, risum querens, ad sextam candelam accessit, cui, ceteris jam suo functis munere, cubiculi illuminandi partes incumbabant, ac micantem in ea flammam spiritu oris impellens extinxit; atque illico consecutæ sunt tenebræ; quare ille vehementer commotus, Cur hoc, ait, tibi venit in mentem conari? Quia, inquit, volui te hunc laborem lucrifacere, & quia duxi, pro nostra veteri amicitia, unam saltem candelam, domituz, lucis expertem efficere mihi licere, quod tibi in aliis quinque facere libuisset; quod si tantopere candelam unam extinctam quereris, in quo nihil est damni, sed lucri potius aliquid inest, quos clamores ederes, si illi Vulcanum admovissem, si ardere coëgissem? Neque in tota domo repertum est aliquod vel lucernæ vel candelæ lumen lucere, quod illuc inferretur, sed necesse fuit, mutuum illud foris accipere. Aurigæ, ac circumpedibus, vestes consimiles dabat, quibus induti sequerentur ipsum, quan-

quando incede-
bat per vias; sed simul ac se domum rece-
perat, jubebat illos eas deponere, ac proprias accipere,
ne videlicet, ab se datæ, frequenti usu attererentur ac
sordescerent, sed semper integræ ac recentes venirent ad
oculos, & quia semel rhedarius complicatum sibi pal-
lium pro pulvino subjecerat, simul atque animadvertit,
illico, prope ad insaniam redactus, voces in cælum tol-
lere, Dei atque hominum fidem implorare, suam rem
perdi, seque eradicari clamare; ac parum absuit, quin
eum collo abreptum, atque e curru dejectum, ad terram
affligeret, pedibusque protereret. Quoties illi exeun-
dum erat domo, quo honestius comitatus incederet, eo
die duos quosdam serica talari veste indutos, qui se co-
mites sequerentur, mercede conductos habebat, quos
deinde reveniens, ab ostio missus faciebat. Hybernis
vero mensibus nefas erat grande apud eum, si uspiam,
præterquam in culina, conspectus esset ignis lucere; &
quoniam interdum famuli, pene frigore obrigebant,
auctor illis erat, ut in ambularent in sole, vel, si cælum
esset nubilum, ut currentes se invicem peterent, ac suis
palliis verberarent, vel aquam e summo puteo ad dome-
sticos usus haurirent: ita enim fore, ut brachia, manus,
pedes, latera, sine ulla ignis ope concalescerent; sibi
vero in interiori cubiculo igniculum ex tigillis compa-
rabat, quem excitabat ex pagellis, quibus, postquam
ventrem exoneraverat, reliquias sordium, sedi hærentes,
abstergebat: non enim earum aliquam perire patieba-
tur, sed singulas arculæ cuidam commendabat, unde
eas postea, cum esset opus, depromeret. Postremo infi-
tum sibi a natura, rei per vitæ sordes augendæ studium,
multo magis in morte ostendit. Nam cum testamentum
facturus deliberaret, quemnam potissimum ex iis, qui
bulo illi, tanquam esurientes lupi inhiabant, omnium
bonorum suorum hæredem institueret, redditæ sunt ei
literæ a gentili quodam suo, in dimidio chartæ unius,
ut vocant, folio scriptæ; cumque debuisset homini ira-
sci, quod ejus, ad quem scribebat, dignitatis rationem
non habuisset, multo inde alacrior ad hæreditatem illam
illi mandandam est factus, quod tuto eam in loco se col-
locaturum existimaret; non enim esse metuendum, ne,
a se

a se atque a maioribus suis bene parta, male disperirent, si tam parce parco juveni committerentur. Itaque regalis ejus majestas, fordidae atque inexplicabili cupiditati, rei suæ etiam post mortem tuendæ augendæque, fastigium fascesque summisit. Sed pergamus ad reliquos.

IVLIUS CÆSAR LAGALLA.

Iulius Cæsar Lagalla Licterensis, Neapolitanus, philosophus ac medicus, medicinæ præcepta, quæ in gymnasiis a magistris acceperat, primum transtulit ad usum in triremibus pontificiis, a quarum ducibus, ejus opera conductæ fuerat; ibique ferme prima ejus artis exercendæ rudimenta posuit, & inde, longo jam usu & exercitatione satis edoctus, traductus est in aulam Cardinalis S. Severinæ, vocatus ab eodem, ut sibi familiarique suæ, in adversæ valetudinis incommodis, saluti præsidioque esset; ibique, quoad vixit Cardinalis, maxima cum industriæ doctrinæque suæ laude permansit. Sed amator mulierum, inimicitias graves capitalesque suscepit; primum cum N, qui zelotypia coactus, sclopum in eum emisit, per angustum quendam aditum ac tenebris obsitum in procetonem domini se conferentem; sed sclopus displosus, ipso incolumi relicto, parietem feriit: deinde cum Pompejo Caimo contendit, quinquana priores, apud eas, partes habiturus esset: itaque obtreclarunt inter se; cum Caimus se illi præferendum diceret, quod nimis pulcher homo esset, atque ultro expetendus: in quibus inimiciis, si, quæ ab utrisque odiosa, ridicule & stulte facta sint, velim referre, longius ab incepto trahar. Sed quamvis, cum se remisserat, nonnihil dissolute intemperanterque committeret, tamen, cum tempus posceret, laboriosus, gravis, ac studiis obsequens reperiebatur. Nam librum de immortalitate animorum scripsit, & Philosophica alia multa, quorum magna pars ab eodemmet ipso commissæ est Leonis Allatii, singularis ingenii, doctrinæ, & eruditionis viri, fidei, ac diligentiz; quo nihil ab eo factum est rectius: neminem enim invenire potuisset, cujus fides clarius eni-

enitescat, quique amico sit magis amicus; quod ostendit eventus; ejus enim vitam elegantissimo sermone conscripsit; quam, simul ac occasio se dederit, in lucem emittet. Neque solum scribendo, verum etiam docendo, industriam probavit suam. Etenim tres & triginta annos in gymnasio Romano philosophiam & medicinam docuit, magna auditorum frequentia; quam frequentiam conciliabat illi doctrina singularis; cum eloquentia & Latini sermonis pura & incorrupta ratione conjuncta. Urinæ reddendæ difficultate laboravit; quam dum manumolitur, fistula cerea, in iter urinæ demissa, comminuta est, quam ipse sibi ferreis unciis, ejus causa factis, ea vi ac festinatione extraxit, ut postea humoris semper aliquid ad pudenda deflueret, quod tumorem inflationemque ibidem excitaret; ad quem humorem alio derivandum, ubi noceret minus, opus fuit cauterio, bifariam aperto, quod chirurgis inspectantibus admirantibusque, ipsemet sibi inflixit. Fuit excelsa statura, membrisque, quæ crassitudine ejus celsitudini responderent. Sed jam grandis natu, dum impensius liberalibus disciplinis operam tribuit, conjicitur in morbum, ex quo diem obiit, ac sepultura affectus est in Æde, Deiparæ Virgini sacra, Carthusianorum fratrum, in sepulcro, quod annum ante suum obitum, cum inscriptione a se composita, sibi extruxerat.

IO. MATTHÆVS CARIOPHILVS.

IO. Matthæus, Cariophilus, Cretensis, puer, relicta Græcia, quondam omnium bonarum artium magistra, nunc omnis plane eruditionis experte, in externum solum, hoc est Romam, tanquam ad mercatum venit, ut in collegio Græcorum, exactam atque perfectam Græci sermonis notitiam, studio, labore, ac diligentia cœmeret. Neque precium, operam videlicet, perdidit; nam fecit lucri: etenim, præter Græcam, Latinam etiam mercatus est linguam, ac multarum præterea doctrinarum divitiis auctus locupletatusque, reversionem fecit in patriam. Vbi cum populares suos, qui eodem ritu uterentur, inimicum & infestum adversus se ani-

ma

nam gerere animadvertisset, propterea, quod eos ab avita religione ac sanctissimis ejusdem cærimonii discessisse argueret, coactus est Romam rursus regredi, ac sine mora homo, per se cognitus, receptus est in collegium Græcorum, ut, quo in ludo ipse didicerat, aliis dux esset ac magister, qui ad eandem Græcæ eloquentiæ laudem properarent. At ejus opera, multiplici rerum scientia doctrinæque præstantia, tanti æstimata est, ut non vulgari eam stipendio Petrus Card. Aldobrandinus, elegantium ingeniorum amator, conducere, ut esset utilis suis, honesta sibi, suæque honestior domui; eoque mortuo, pluris etiam facta est a Ludovico Card. Ludovisio; a quo dignus est habitus, qui editiore in loco positus, ingenii, eruditionis, doctrinæque suæ lumen longe lateque diffunderet: nam dedit operam, ut Archiepiscopus Iconiensis crearetur. Erat maxime ad iracundiam propensus: etenim, sicut in præcipiti stans, vel quovis levi tactu, in eam impellebatur: erat in communi vitæ consuetudine ingenio feroci, neque iis, quibus cum versabatur, apto, nec commodo. Quam diu ulcus, coxendici hærens, unde, tanquam e fistula, noxii corporis humores defluebant, adaperit patuit, tandiu licuit illi lucis hujus usura frui; sed simul ac ulcus idem clausum, nullum defluenti puri ad exeuendum, aditum præbuit, statim vitæ est illi usus ademptus. Cum in aula Francisci Card. Barberini versaretur, ubi post Ludovisii obitum honorifice in omni victu habebatur, edidit volumen, Græcis Latinisque versibus confectum, quod Noctes Tusculanæ inscribitur. Multa præterea scripsit, quibus theologicas res plures, concisis & contortis disputationibus illigatas, resolvere atque explicare conatus est; tum veterum auctorum Græcos libros, in his Themistoclis epistolas, non ante id tempus editas, imprimendas evulgandasque curavit.

PETRVS ARCVDIVS.

EXiis, qui tota e Græcia, jam dñi lumine litterarum orbata, ad Urbem discendi gratia venerunt, Petrus Arcudius, Corcyræ ortus, incredibili ingenii doctrinæque laude floruit. De hoc, & de Cariophilo, Balthasar Ansides, vir æque Græcis ac Latinis literis doctus, dicere solitus erat, nec Athenas ita fuisse Atticas, ut erat illorum oratio; cuius tanta erat suavitas, ut appareret, in eo nativum quendam leporem esse, non ascitum. Institutus est Romæ, in collegio suæ nationis; unde omnibus bonis artibus ita discessit ornatus, ut ad publica negocia atque gravissima sit adhibitus. Nam semel atque iterum missus est a Clemente VIII Pont. Max. maximis de rebus ad Ruthenos, ut videlicet inter ipsos ortas de fidei veritate controversias dirimeret atque componeret; qua in re magni ejus opera æstimata est: nam semper re bene gesta discessit. Quamobrem impetravit a summis Pont. ut Latinorum more sacrosanctum Missæ sacrificium faceret, cum antea Græco fuisset ritu initiatus; tum habitus est benigne ac liberaliter a Scipione Card. Burghesio, Pauli V sororis filio; in cujus aula versatus est aliquandiu; sed tandem litterarum, quam honorum vel alterius cujuspiam rei, cupidior, secessit in ædes collegii Græcorum; ubi triennium atque eo amplius ante suum obitum ita vixit, ut se loco movere non posset, quod valido equi, vini cadis onusti, impulsu fuisset ad terram afflictus: ea enim est Romæ mulionum istorum insolentia, is pessimus eorum mos urget, ut ipsi, equis hærentes, citato cursu suum per vias iter habentes impellant, & magnum quid se fecisse putent, si quem obvium in cursu, vel equorum capitibus, vel vini cado quem ferunt, offendant, evertant, ac subdant eorum sub solum, vel cum hyeme corruptæ sunt imbris vix, si quempiam aqua conspergant, vel cæno inficiant, equorum pedibus pulso dissipatoque. Verum ille suis pedibus ingrediendi facultate amissa, se quotidie mane in ejus collegii bibliothecam deferendum curabat; neque inde, nisi post solem occasum, in

cubiculum referebatur. Plures edidit libros, tum a se compositos, tum a veteribus Græcis relictos. Sed ex iis, qui ab ipso prodierunt, magnus in primis honor illi habetur, qui, de Concordia Ecclesie occidentalis & orientalis in septem sacramentorum administratione, inscribitur, anno MDC XIX Parisiis impressus. Statura fuit alta, ore rubicundo.

IO. DEMICIANVS.

Cariophilo, & Arcudio, quos ceteris, qui e Græcorum collegio prodierunt, Græci sermonis elegantia & maximarum rerum scientia antecessisse narravimus, Io. Demicianus proximus accedebat; sed longo intervallo proximus. Hic ex transmarinis regionibus (erat enim in insula Cephalenia natus) navigavit in Italiam, Romanique venit, ut transmarinam doctrinam, quæ, naufragio in Græcia factò, tempestatibus delata ad nos est, consecraretur. Hujus præsertim laus est in summa facultate memoriæ, qua ita præstabat, ut in conventibus familiarium aliorumque, ad sermonem, quem quis de literis intulisset, vel quem tacentibus aliis ipse læcessisset, tam multa proferret, ex Athenæo, Julio Pollice, Suida, Hesychio, Plinio, aliisque hujus notæ scriptoribus, quos semper in manibus habebat, accepta, ut & linguarum varietate & abundantia doctrinæ & eruditionis copia, qui audirent, ad incredibilem admirationem efferret: verum in iis, quæ recondita aliqua in arte exquisitaque doctrina continentur, aliis, qui in intima ejus artis cubilia penetraissent, cogebatur cedere. Nam, si quando in philosophicis concertationibus, molesto aliquo ac difficili argumento vehementius premebatur, jamque victus captusque tenceretur, anguilla erat, elabebatur; sed ita fugiebat, ut quandam, in fuga, pompæ ac pugnæ similem speciem adhiberet, & die quodam in procerone aulae Octavii Card. Bandini, in cujus familiaribus numerabatur, cum inter ipsum & Augustinianum quendam, virum doctum, orta esset ea de re quaestio, toties in philosophorum scholis agitata, nunc in sensu oculorum, nobis visus proveniat ex eo, quod

ab oculis aliquid foras proficiscatur ad id, quod volumus videre, an potius ex eo, quod simulacra rerum ultro in oculos tomineant, cumque Demicianus inhzreret illi, ut diceret, imagines e rebus in oculis advolare, nec Augustiniano in disputando par esset, qui validissimis argumentis eam opinionem labefactabat evertebatque, nec jam haberet, quid diceret, minus Latinum verbum, quod casu, ut sæpe contingit, Augustiniano illi exciderat, ad reprehendendum arripuit, magnaue verborum contumelia eum interrogans, num Grammaticam didicisset, totam illam argumentationem disputationemque elusit. Erat quidem propensus a natura ad poësim, tum Latinam tum Græcam; sed ejus carmina pingue quiddam sonabant & asperum; sicut & ejusdem soluta numeris oratio, quamvis erudita & docta, utpote inflata ac turgida, non longe a vitiosa ac corrupta dicendi consuetudine aberat. Neque tamen id illi quidquam de existimatione detraxit, qua in hominum opinione vigeat, virorum principum præsertim, quorum mandatis plures, tota fere Europa, magnis de rebus legationes obivit, & a Ducibus Mantuæ missus est Lutiæ Parisiorum; ubi continuo omnium in se literatorum studia convertit, qui doctrinæ magnitudine & morum ejusdem impotentia commoti, & cerebrosi hominis novitate delectati, monstri ac prodigii cujusdam similem eum existimabant. Nam, præter egregiam venustatem oris & vestitus elegantiam, dicebat ex tempore, de qua quisque re vellet audire, nec sine summa doctrinæ, eloquentiæque laude. Suis erat in rebus nimis accuratus ac diligens, planeque superstitiosus; omnem se terrarum orbem peragrassè, præ se ferebat; Istros, Hispanos, Illyricos, mare superum omne, orasque Italicas omnes; nationum cunctarum mores norat; erat in consiliis de Rep. dandis excellens, suamque de illa, non rogatus, sententiam explicabat: unde a compluribus unus ex sodalium Rosæ Crucis numero existimabatur, qui tum in Germania versari dicebantur, quos fama erat omnes linguas scire, nihil ignorare, ac puncto temporis, quacunque velint in urbe, se sistere, aurum argentumque conficere, eaque de re complures jam li-

bro editos esse. Sed vix annus intercefferat ab eo die, quo est Parisios ingressus, cum, sublatus e vivis, summo literatos omnes dolore affecit. Sed in primis iniquiore animo ejus interitum tulerunt duo præstantissimi viri; Servinus advocatus Regius, & Janus Cæcilius Frey, qui primas in Academia Philosophiæ docendæ partes agebat, quique etiam amicissimi hominis funus & lacrimis & elegantissimo decoravit epitaphio.

GASPAR CÆLIVS.

SI quisquam inventus est usquam, qui novo modo homo esset, hoc est, qui secus, quam alii vivunt, vitam degeret, is profecto Gaspari Cælio Romano non antecessit. Nam perceptas quasdam ac præjudicatas opiniones animo retinebat, ad quas totas vitæ suæ rationes dirigeret. Præstabat ingenio; historias omnium temporum legerat, memoria custodiebat; mathematicis disciplinis animum exornaverat, sed in primis Astrologia, cui, ut mox dicemus, præter æquum, fidem adhibebat. Erat pictor, non unus e multis, sed inter multos propemodum singularis, atque artificio delineandi superabat omnes, qui una essent ætate, quod a puero, in describendis Sancti ac Bonarotæ prope divinis operibus, multum temporis studiique consumpserat; quo fiebat, ut ejus opera conductoretur a pluribus, atque in Hispania, Italia, ac Romæ præsertim, ubi multa ejus egregia opera perfecta cernuntur. Neque statuebat avare precium artis suæ, sed ex operibus, ad quæ conductus fuerat, diligenter & ex fide absolutis, tantum accipiebat, quantum ejus, qui conduxerat, voluntas ac benignitas ferret; at non eo minus, lucri plurimum fecit; nam in tabulis rationum domesticarum, quas confecit, inventum est, pecuniam, suo ab ipso labore partam, ad quadraginta & eo amplius aureorum millia pervenisse; cujus pecuniæ ut nummum quidem unum vel in feno-re, vel in prædiis, rusticis aut urbanis, collocavit; verum ex ea, in arcam conjecta, tantum quotidie fume-bat, quantum esset sumptibus ejus diei satis: sed contingit, ut idem homini dies finem attulerit vitæ atque pe-

muniz; ac rogantibus amicis, ne ita pecuniam perderet, sed agrum ex ea vel quid ejusmodi emeret, cujus ex fructibus in senectâ se ac familiam suam sustentaret, respondebat, nolle se ocio suo, cui in primis consultum esse vellet, facere injuriam, quod a se ocium statim exulatum abiret, si sibi esset de sœnore exigendò, de agro colendo, de domo locanda vel sarcienda cogitandum; tum nolle se cognitorum, advocatorum, tabellionum, viatorum, judicum avaritiæ suppeditare, ad quos necessario sit eundum, si qua in ipsum rei male conciliatæ causa lis sit illata, vel si ille, cui ipse pecuniam vel domum locasset, sœnus ac mercedem non reddat. Atque adeo omnem animi ægritudinem procul a suis ædibus remotam esse cupiebat, ut nunquam aves, canes, aut feles aluerit, ne quisquam ex eorum morte (quod hujusmodi bestiolæ in deliciis habeantur) ad ipsum dolor perveniret: uxorem vero adeo amplius quadraginta annos, quibus cum ea vixit, custodiis suis domi subjectam habuit, ut mortalium nemini fas fuerit aspicere; &, si quando aliquem in morbum delabi contingeret, eam ipse, cibi detractiōe, vel herbis, quarum fere omnium vim noverat, aliisve simplicibus medicamentis recte curabat. At parochos, quibus mos est quotannis, Paschalibus feriis, suis in parœciis capita hominum recensere, ac singulorum domos aqua lustrali conspergere, verborum contumeliis, ac metu etiam fustis, si ausi essent accedere, domi suæ foribus abigebat; quod diceret, Pontificem Max. cum illac iter faceret, bene domui suæ dicere, proinde nihil opus esse cujusquam ad eam rem opera. Atque ipsemet adfui, cum in sacrario S. Spiritus in Saxia Parochus, neganti, non aliter se uxori ejus potestatem facturum vescendi carnibus in quadragesima, nisi suis ipse oculis, quo morbo affecta esset, aspexisset, palam, multis audientibus, dixit, uxori meæ morbus in matrice inhzret, placetne morbi locum aspicere? Astrologiæ autem eatenus erat addictus, ut non dubitaret, omnes omnium fortunas, mores, status, vitæ rationes atque exitus, ad vim stellarum & lunæ referre, neque quidquam tam ad nos pertinere affirmabat quam cæli affectionem, qua primum spiritum duxerimus:

quam illi opinionem longissima epistola sum conatus evellere, & ostendere, nihil jam Mathematicis esse credendum, quorum prædicta quotidie videamus re & eventis refelli; sed operam lusi. In sermonibus familiaribus non minimam suspicionem iniiciebat, se iis, quæ in fide Christiana traderentur, non plane assensionem suam adhibere; nam videbatur revocare ad naturales causas, quæ in sacris literis de mari rubro, de mundi ortu, aliisque viris ac supra naturæ viris editis, narrantur: nam sibi compertum fuisse narrabat, eam maris rubri naturam esse, ut interdum in duas partes scissum atque divisum, latam, volentibus transire, viam aperiat; idque magno Alexandro contigisse. Tum, quæ, de cæli constitutione, de orbis terræ natali die, de hominis procreatione, sacris literis traduntur, ea Moysen ab Arabibus, a quibus institutus fuerat, accepisse; atque alias multas ejusmodi nugæ, a veritate alienas, declaterabat. Sed admonitus, videret quid ageret, quo progredere-tur, sed perituum hoc uno crimine, si ad Quæsitores causarum fidei permanisset; tum ille, sive vere sive quod iudicium pœnamque metueret, respondebat, se ita locutum, ut aliorum dicta referret, non quæ sententiam suam aperiret. Curiose in aliorum vitas & mores inquirebat, & quemlibet vel levem rumusculum, præsertim si pertineret ad lacerandam mulierum etiam nobilium famam, pro re comperta & explorata habebat. Illud mirum, quod cum ex vicinia, in qua habitabat, vix pedem efferret (quod illi renes, quibus laborabat, nimia corporis agitatione inflammarentur) attamen nihil ab ejus notitia aberat, non eorum modo, quæ in Vrbe, sed etiam, quæ apud Scythas, apud Gallos, apud Hispanos fierent, quid illi molirentur, quæ de pace vel de bello consilia haberent, denique, quid Rex Regina in aurem dixisset. Fere, quoad vixit, eodem genere vestium usus est, nimirum tunica ad genua usque demissa, & pallio ad eandem longitudinem producto, ex serico triplo; emergebatque illi per tunicam e pectore parva ex auro crux, in qua, altera ex encaustica, rubra figura descripta, inhærebat, quæ crux honorariæ est Christi militiæ insignis, cui a Philippo III Hispaniarum Rege fuerat ad-

adscriptus; ad quem locum honoris olim non nisi maximo genere ortis adspirare licebat, nunc aliis etiam, ac præsertim pictoribus, statuariis, sculptoribus, & cautoribus, modica gratia ad eum pervenire fas est. Color rubeus, qui ejus in ore tanquam flamma ignis perpetuo enitebat, hepatico eum morbo agitari significabat, simulque erat indicio, si quis illi quasi quasdam vel levis injuriæ faces admovisset, quod exardesceret ira & stomacho vehementius: itaque laceffitus injuria, non ferebat, ac, dum vires suppeditarunt, arinis eam vindicabat, sed postquam ægritudinis ac senectutis incommodo, minus viribus valere cœpit, linguæ acumine, quo pollebat, ac famoso carmine, ad quod erat a natura propensus, persequabatur; in quo progeniem ejus, a quo injuriam acceperat, usque ab avo atque abavo proferebat, singulos, qui insigni aliqua infamie nota laborassent, enumerabat, illudebat, contumeliarum aculeis verberabat. At si quisquam unquam fide optima fuit, profecto ille erat: nam neminem pecunia tangere, injuria lædere, insidiis circumvenire, terrore litium concutere, sed contra, a litibus abhorreere, nemini creditum abjurare, suum unicuique reddere, promissa facere, fidem servare. Scripsit duo poemata, unum, quo, heroico carmine, sed impolito ac rudi, Romam a Gothis obsessam cecinit; sed inventionem ac rerum & sententiarum copia admirabile; alterum, quo illustrium poetarum vitæ complexus est; aliaque prope innumera poemata, quæ videntur ostendere, ingenium homini adfuisse, solum nitorem ac summum illi in excolendis versibus laborem & studium defuisse. Scripsit etiam comœdias complures, in quarum una, quæ mihi videtur ceteris elegantia, artificioque præstare, quorundam notorum hominum mores, ad miraculum, expressit. Retulit etiam in compendium pictorum vitas, a Georgio Vasaro pluribus voluminibus comprehensas, in quo compendio pictores præterea multi iis, qui a Georgio enumerantur, accedunt. Sed annos circiter septuaginta natus obiit diem, ac situs est in Æde Virginis Deiparæ ad portam Flaminiam, in sepulchro, quod Paulus Jordanus Canonicus D. Mariæ in via lata, ex testamento hæres, faciendum curavit.

IACOBVS BOSIVS.

Iacobus Bosius Mediolanensis, honoratiorum S. Io. Ierosolymitani militum, quorum numero erat frater, negocia Romæ procuravit; quam ille provinciam multos annos, summa cum diligentia, virtutis, probitatis, ac fidei laude, administravit: quod, arbitror, fuit causæ, ut ad præclaras militum eorum res gestas literis mandandas animum appelleret; quæ res cum esset magni laboris, ociique multum ac temporis posceret, advocavit se a rebus agendis, in eisque operæ suæ Antonii Bosii, fratris filii, vicariam fidem diligentiamque supposuit, ipse totum pene se contulit ad historiam scribendam, quam Italico sermone doctè eruditeque tribus voluminibus comprehensam, absolvit. Sed non raro interrompebat illud opus, ambitionis labor, & studium, quo vix quisquam invenitur in hac Vrbe, qui non districtus teneatur, quique, si status aliquis ad honores ostendatur, non ad eos vela det. Adoptaverat Sixtus V in collegium Cardinalium F. Gregorium Patrochinum, summum universæ Augustinianæ familiæ Antistitem. Huic quia se, statu incessuque quasi basilico, ac longa & decora barba commendabat, & quam sæpius demulcebat, vulgus hominum, ac nonnulli etiam Chaldaicis literis eruditi, post Sixti mortem, Pontificatum Max. demandabant: quod ille non ab hominibus, stulta ac vana opinione imbutis, profectum, sed Delphis responsum existimans, summa ambitione se in ejus familiaritatem, obsequio atque muneribus, insinuavit; atque homo doctus, qui afflueret opibus ac divitiis, qui ædes amplissimas incoleret, instructas rebus omnibus, quibus abundant hi qui beati putantur, qui servorum multitudinem, ipsi ad nutum dicto audientium, aleret, se illi in servitutem dicavit, ac præfecti ejusdem cubiculi nomine assiduam, diligentem, ac gratuitam servem, quoad ille vixit, operam tribuit: ac licebat videre, senem perpussillum, purpureum Cardinalis vel biretum vel pileum manu gestantem, ab ejus latere nunquam discedere, submovert alios, ne accederent, metueret, ne quispiam vali-

di-

diore, quam ipse erat, ambitionis æstu exagitatus, ipsum arriperet, atque ad se totum abstraheret; denique, ore, oculis, vultu, motu corporis, ita se illi dare, utin eo munere, quod susceperat, persequendo, non agere sed satagere diceretur. Sed posteaquam in aliquot Pontificiis comitiis ne mentionem quidem hominis factam, ne dum illum Cardinalium suffragiis ad Pontificatum maximum vocatum comperisset, cumque eum cerneret ad Acheruntem magis quam ad honoris cursum arripere, seque jam viatico ad illum instruere, non solum spe sua debilitatus est, sed de ea penitus excidit. Itaque cupiditate honorum abjecta, tradidit se totum pietatis ac religionis operibus, atque templa, summa & antiqua religione prædita, adire, liberalitatem in pauperes suam exercere, fere quotidie sacrosancta Christi corporis mysteria percipere, atque præsertim, in qua ille sublatus est, crucem præcipuo quodam cultu ac reverentia venerari, adeo ut ejus inventæ recuperatæque historiam insigni volumine sit complexus, & nullus unquam dies, tam magna turbulentaque tempestate fuerit, quin ad Ædem celeberrimam in agro Sessoriano Cruci dicatam, & longo intervallo ab ædibus suis disjunctam, se deferri juberet; postremo religiosissimum D. Blasii templum instaurandum, ejusque interiores parietes eleganti pictura ornandos curaverit, qua crucis inventio, quam ipse elegantius in suis libris, quam pictoris cujusquam manus in tabulis, expresserat, oculis subjiceretur.

ANTONIUS BOSIUS.

ANtonius Bosius, Iacobi fratris ex ancilla Afra filius, paternum genus corporis brevitatem, maternum fusco oris colore referebat. Habuit ingenium a natura docile, acutum, acre: nam accipiebat celeriter, quæ tradebantur, ac memoria fideliter custodiebat; in lacescendo respondendoque peracutus ac brevis, & in omni genere sermonis festivus atque facetus. Humaniores literas didicit Romæ a patribus Soc. Jesu; Jus civile in gymnasio Romano, ibique ejusdem interpretandi facultatem accepit. Ejus non solum adolescentia, sed corro-

horata etiam ætas, fuit liberior. Amicis utebatur dissolutis, impuris; & simul optimis viris deditus erat: in nocturnis bacchationibus & vigiliis, in commensationibus ac conviviiis, nemo erat, qui eum jocis, hilaritate amœnitæque antecederet; deinde cum tempus, res & negocia poscerent, nemo illo gravior, nemo prudentior; nemo consilio, diligentia, ac sedulitate superior inveniebatur; libidine sic accensus, ut eam, ubi facultas daretur, expleret, unde ancipites conjectus in morbos, vitæ periculum subiret. Cœpit ab initio, consulentibus, de jure respondere; & aliquandiu diligentis eruditique advocati partes sustinuit, plurimorumque causis, jus suggerendo, satisfecit; sed negotiorum multitudine districtus, in quorum procuratione successerat ipse vicarius patris sui muneri, coactus est hanc advocati laudem & honorem aliis relinquere, se vero, omiſſis ceteris, in ea tantum concludere, quæ suæ fidei diligentique commissa ac tradita fuissent. Sed quoniam interdum ipsi a negociis vacui ac liberi temporis aliquid relinquebatur, cœpit excogitare, qua illud in re posset collocare, in qua nemo adhuc elaborasset. Intercedebat ille vetus usus consuetudoque cum fratre meo, homine mire ad ejus mores facto, a quo, cum maxime in ea cogitatione versaretur, perductus est in cryptas, seu arenas, quarum Romæ magnus est numerus, contortis, ac labyrinthicis inter se flexibus implicatas atque connexas: in has, veteres Christiani, primis Ecclesiæ recens natæ annis, minacissimis Imperatorum edictis perterriti, ad collectas, ut agebant, celebrandas, ad Christi corporis & sanguinis mysteria percipiendâ; & ad sermones de divinis rebus audiendos, conveniebant: quorum ille locorum situm, immensitatem, rerumque in eis contentarum varietatem admirans, voluit illuc sæpius reverti, ac singula diligentius investigare atque perquirere; & cum magis magisque admiraretur, statuit, rem fore dignam, in qua omnes nervos ingenii industrique suæ contenderet, si videlicet cryptarum earum superficiem, aditus, aulas, aras, imagines describeret: itaque fratre meo, qui erat earum regionum peritissimus, ac pluribus aliis adhibitis, multorum annorum stu-

Audio, incredibili labore, magnisque sumptibus, perfecit illud opus, cui titulus est Roma subterranea. Cujus operis elaborandi gratia, aliqua in speluncis illis sanctissimis non religiose facta narrantur ab hominibus minime religiosis. Ibant illuc cum eo semper capita hominum quinque vel sex, & cum ignariis, unde cereos, si eos contigisset extingui, rursus accenderent. Et quia nunquam fere eo se conferebat, ut paucas ibi horas consumeret, sed ut minimum triduum vel quatrimum contereret, opiparis obsoniis, ac præstantissimi vini amphoris instructus, sese illuc inferebat; adducebatur etiam cocus, qui prandium ac cornam coqueret, cum suis omnibus instrumentis, videlicet cum ollis, mortario ac pistillo, sartagine, ahenis, patinis, aliisque ejusmodi vasibus: ac postquam multum temporis ei rei, propter quam venerant, datum erat, Cæteri jam & Libero, ac solitis bacchationibus, reliquum tempus deberi omnium vocibus significabatur: nec mora, exornatum ibi convivium inibant, quod, non silentio, neque ea modestia, quam loci illius sanctitas poscere videbatur, sed cum clamore, jocis, facetiisque pluribus, atque effusissimo omnium cum risu celebrabatur; bacchabatur in eo patera bilibris, hoc est, bacchantis more, hac illac volitabat, ac plena & inanis, sine ulla intermissione fiebat; personabant species illi convivarum vocibus madebant pavimenta vino, redolebant fornices nidore culinæ, quivis ut severior, cum ex aliquo aditu, quorum aliquot in circumjunctis ibi campis vinetisque cernuntur, venientem ex cavernis illis, debacchantium strepitum accepisset, non illic versari homines, sed bacchari dzmones, non opus religiosum elaborari, sed Baccho sacra fieri, vel evocari ab inferis manes, declamasset. Ac per hanc rationem confectus est liber ille eruditissimus atque doctissimus; quem ne vivens ille ederet, fecit fundus, quem coemerat urbi propinquus, extra portam Flaminiam; ad quem omnes ferme cogitationes suas, ab aliis rebus abductas, traduxerat, & in quo excolendo exornandoque, ex maximis divitiis, a patruo sibi relictis, se ad inopiam egestatemque redegerat; ut vere posset dicere, se non tam fundum, quam profundum emisit, quod tam mul-

tas res, tamque præclaras absorbuisset: nam cum preciosa ad eum suppellex ex patruī hereditate venisset, aurum & argentum celatum, stragula vestis, Attalica peristromata, conopea auro sericoque contexta, signa ex ære & ex marmore antiqua non pauca, tabulæ pictæ; hæc ille, quo se ac vineam aleret, partim vendiderat, partim oppignoraverat. Sed cum nulli, neque cognati neque affines, essent, quibus, se mortuo ut bona sua inter se partirentur, diceret, cumque ex veterum amicorum numero occurreret nemo, quem heredem faceret, cum ipse obiret diem, quod ex amicitia ad senectutem usque perdurare non soleant, quas non virtutis species atque amor recti, sed voluptatum societas studiumque conjunxerit, jamque mors in foribus esset, nec intestatus vellet decedere; testamento raptim facto, instituit heredem eum, cujus operas non ita multo ante conduxerat, ut ipsi serviret; sed condito testamento, cum prope jam animam exhalaret, conducti sunt medici civitatis primi, ut facerent eum sanum; qui omnes in hanc sententiam ierunt, nempe satius fuisse, sacerdotem illi aliquem, quam medicum, adducere. Solus Trulierus sanguinem illi mittendum censuit; cujus consilii rationem cum satis ceteri mirari non possent, ac quærerent, quemnam sanguinis missio locum haberet in eo, quem jam vires ac vita deficerent, respondit, saltem ut dulcius moreretur. Sed hoc ad mortem facilius obeundam auxilio non eguit, nam ipso præsentē illud ingressus est iter, quod suscipiendum est omnibus; utinam ita bene viaticatus, ut tum erat, cum ad cryptas proficiscebatur.

LVCAS VALERIVS.

SI quis hujus viri doctissimi clarissimique laudum volumen impleret, non tantum illi ornamentum decusque conficeret, quantum paucis verbis Galilæus Galilæus comparavit, qui hoc brevi quidem, sed raro ac singulari, in eo exornando, est usus elogio: nempe Lucam Valerium, ob admirabilem Mathematicarum rerum scientiam, esse adeptum, ut sui xvi Archimedes dici meritissimo possit. Quod si Nævius ille Hector
tan-

tantum in ea laude ponendum esse duxit, quæ a laudato viro proficiscitur, quodnam illi par precium invenietur, quæ Lucæ Valerio tributa est ab homine non quavis laude ornato, sed summa atque incredibili prædito; qui non sive tantum patriæ, decus, splendorem, & claritatem, peperit, sed orbi terræ ornamentum attulit, totumque sua luce lustravit atque complevit. Verum Lucæ Valerii commendatio, non tam ex illustrium virorum atque omni virtutum laude principum testimonio, quam ex ejusdem operum præstantia atque æstimatione colligitur: ea enim scripsit ediditque, quibus in tota Geometria neque acutius neque doctius neque præclarius quidquam invenitur. Primum anno MDC Hl librum emisit, de centro gravitatis solidorum, & anno MDC VI alium, non minus eruditum & acuminis plenum, de quadratura parabolæ per simplex falsum. Docuit multos annos, in gymnasio Romano, Mathematicas disciplinas, ac Geometriam in primis; quo toto fere tempore, Margaritæ Sarrocchiæ, poëtrix, cujus ille ingenio delectabatur, contubernalis perpetuus extitit; cujusque etiam domi mortuus est, fecitque hæredem Joannem quendam Latinum, eidem Sarrocchiæ in primis carum, & contubernii ejusdem necessitudine sibi conjunctum.

ANGELVS GRILLVS.

Angelus Grillus, Januensis, ex D. Benedicti nobili ac locuplete Montis Cassini familia, ad philosophiæ ac sacrarum literarum scientiam, humanitatis etiam & Etruscæ in primis linguæ, cujus erat cupidissimus, studium adjunxit; qua in re tantum profecit, ut celeriter in numerum nobilium poëtarum venerit, atque omnium, quos nostra admiratur ætas, ut Torquati Tassi, Baptistæ Guarini, Jo. Baptistæ Marini, aliorumque, sibi mire animos conciliaverit, ac nulli in Italia extiterint, paulo his literis dediti, quibus cum illi amicitia non fuerit, aut usus literarum; & Academix in primis omnes, ejus nominis fama compulsæ, honestum sibi & gloriosum fore putabant, si cum sibi possent adjungere.

Ita-

Itaque earum unaquæque in beneficio & gratia numerabat, cum, ad ipsius cœtum, suum ille nomen adscribendum curaret. Romana vero Humoristarum Academia tantum homini tribuendum esse statuit, ut principem cum sibi delegerit, & mortuo funus fecerit, atque ejus imaginem formæ, in tabula egregii artificis manu depictam, & corona aurea redimitam, una cum aliis Guarini ac Marini, in sua aula, collocaverit. Duo epistolarum volumina edidit, ac varii generis rhythmos quamplures, in quorum multis egregia hominis pictas atque in Christum amor elucet. Multa suæ familiæ cœnobîa, Abbatis honore ac nomine, summa cum prudentiæ & probitatis laude, administravit; & cum diem obiit supremum, Parmensi S. Ioannis cœnobio præerat. Nihil fere ambitione districtus tenebatur: nam præter eos honores, quos suus illi ordo demandaverat, noluit ad superiores, cum posset, ascendere; ac sacerdotium Aleriz in Corsica, & Albingæ in Liguria, sibi oblatum, recusavit accipere; quod aperte fateretur, majus illud onus esse, quam ut ejus vires ferre possent.

PROSPER FARINACCIVS.

QUæ Prosper Farinaccius, in adolescentia atque in firmata jam ætate, fecerit errata, non parum multa nominantur; verum ea, singularis virtus ingenii ac summa juris civilis prudentia, ejus præsertim partis, qua vitia hominum atque peccata in judicium pœnamque vocantur, vel obtexit, vel ætatis humanæque imbecillitatis, quæ vix potest sine casu & prolapsione consistere, excusatione defendit. Illud vero, qui cum novit, satis mirari non poterit, quod cum omnes æquiores adversus eos judices simus, qui criminum eorundem societate nobiscum conjuncti teneantur, attamen ea ille severissime in aliis peccata vindicabat, in quibus ipse princeps habebatur: ac Paulo V Pont. cum esset fisci procurator, sive Reip. causa, quo cives ab ea improbos removeret, sive utilitate privata vel odio adductus, sive animi sævitia compulsi, acerrimam sed justissimam adversus eos tempestatem concitavit, qui turpi flagitiosoque concubitu

subitu se contaminarent; ac passim ea de re quæstiones apud omnes iudices habebantur & exercebantur in eos, quorum delata essent a quadruplicatoribus nomina; ita, ut multi, qui ejus criminis conscientia constructi tenerentur, fugæ præsidio ex eo periculo incendioque evolerent: & eorum quidam, qui postea publicatis bonis omnibus, absens eodem crimine damnatus est, dum suggeret, interrogatus a quodam, cui iter erat Romam, qui ibi ageretur, atque ut cives, eo anni tempore servidissimo, se haberent (erat enim ætas summa) non iustificete, male, inquit, nam ibi homines uruntur: alter vero, amicus summus meus, eleganti sane ingenio, ac poëta non in postremis, quem fortasse conscius animus, quo nihil est miserius, exagitabat, totos dies, ubi quemque invenerat, continuo interrogabat, quærebat, investigabat, quid afferrent novi? num cujusquam alterius nomen ad magistratus recens delatum esset? tum quousque venerat, querebatur, dolebat, vociferabatur, decipi homines fide publica, fidem in eo quod leges promitterent non servari, cum, delatorum indicio, raperentur homines in carcerem, supplicioque afficerentur, ob id crimen, cujus leges illæ eos tantum damnari præciperent, qui essent manifesto in eo deprehensi, ceteros absolverent: & amicis omnibus edixerat, sibi alio transcurso opus esse, proinde, si quid mandare vellent, vel curari, imperarent. Verum ubi Pontificis prudentia, (cui placuit, sermonibus hominum, qui toto terrarum orbe fiebant, ansam præcidere) judicia illa, paucorum dolore, extincta sunt: tum ille securus esse, ad ingenium redire, neque ullam amplius de protectione mentionem facere. Sed quemadmodum Farinaccius multis negotium faceffit, ita etiam non nemo malam illi rem periculumque procurare conatus est; atque olim, malorum criminum convictus, penas legibus dedisset, nisi Antonii Mariz Salviati Cardinalis opera servatus, ex eo iudicio elapsus esset; cui Cardinali, pro illo deprecanti, Clemens VIII, cui ejus flagitia nota erant, Farina, inquit, ista bona est; vel pollis est potius; sed non saccus, cui ille includitur, bonus est, sed fœdus ac turpis. Seinel cibum sumebat in die, illumque sub vespere laute; ac

fix-

sæpe fidicina adhibebatur. Fuit olim summis quibusdam viris ludibrio, qui eum noctu, ob meretricem abductam, pipulo ante ædes deferebant. Scripsit de testibus, de falsitate & simulatione, de Reo confesso, de immunitate ecclesiastica, de delictis carnis, consilia & Decisiones criminales, ita docte, ita erudite, ita feliciter, ut ex remotissimis orbis terræ partibus plures, non tam urbis visendæ, quam ejus cognoscendi gratia, Romam venirent; neque quisquam est rerum capitalium judex, neque reorum patronus neque advocatus, quin libros ab eo editos habeat, quin legat, quin inde ad persequendos vel tuendos reos arma depromat. Edidit etiam Rotæ Romanæ decisionum volumina ad duodecim, & alia. Mortuus est senex, filio ex concubina relicto.

ZOILVS ARDELIO.

QVo hujus imago oris, penitus oculis hominum subjiçiat, primum detrahenda est illi persona, quam sibi ipse imposuerat. Cum antea alio appellaretur nomine, mutandi ejus causam, malevoli dicunt, fuisse inhonestum fratris vitæ exitum, qui, in vinculis, laqueo sibi gulam fregerat: nam cum a Quæstitoribus fidei, violatæ religionis crimine, damnatus esset, ac de more Triumviris rerum capitalium traditus, ut supplicio afficeretur, quo se illius acerbitati subduceret, occupaverat liberum mortis arbitrium. Ut igitur fratris infamiam, ad se redundantem, effugeret, vetus ab ipso nomen repudiatum ajunt, ac novum ascitum; sed falso: nam antea, quam frater se interimeret, vocabatur hoc nomine. Hic, ex matris utero, animi vitia, quibus laborabat, attraxit: perpetuam videlicet arrogantiam, atque elationem animi non ferendam; & quamvis ingenii acumine & celeritate valeret, quamvis, cum Patavii Pendasio Philosopho operam dedisset assiduam ac diligentem, eruditione doctrinaque præstaret, quamvis, ut de quacunque re proposita docte eleganterque disserteret, multis rebus cognitis, penitusque in mediis iis artibus, de quibus sermo esset, reclusis atque abditis, summoque studio ac diligentia esset consecutus; attamen nemo exi-

stima-

stimabat, esse tanti ulla merita, quanta insolentia hominis, quantumque fastidium. Omnes præ se contemnebat, neminem quidquam scire aut didicisse arbitrabatur; atque interrogatus, cur in Academiam Cardinalis a Sabaudia non veniret, arrogantibus sane verbis respondit, nunquam se venturum in eum conventum, in eoque verba facturum, ubi neminem sui similem ingenio, doctrina, & eruditione conspiceret. Neque erat Academix cuiquam magnopere optandum, immo minime ejus intererat in suorum eum numerum venire: nam homo factiosus, elatus, insolens, aut eam dissolvebat, aut simultatibus discordiisque ferendis perturbabat omnia, atque miscebat; ac minimum abfuit, quin Academiam Humoristarum, cum maxime ingenius hominum floreret, exitium ac pestem afferret. Cum de singulis, detrahendi gratia, maledice contumelioseque loqueretur, Gasparem vero Scioppium, qui in literaria Rep. in primis ordinibus numeratur, imi subsellii virum, atque inter literatos proletarios, ut ita dicam, referendum esse aiebat; quem ille Scioppium, quoniam in quodam libello sua tempora, quasi literatis viris non amica, modeste reprehenderat, cœpit contumeliis omnibus lacerare, atque palam eum infantem, rudem, & omnino omnis eruditionis expertem atque ignarum asserere, minitarique, se libro edito ejus incitiam palam omnibus facturum. At Scioppius misit illi, qui diceret, si sibi amplius molestus esset, non se pugnaturum cum eo eloquentiæ doctrinæque armis, sed dictis testium, ac sententiis judicum, in publicas tabulas relatis, quibus Bononiæ, malorum facinorum argutus, evictus, ac condemnatus fuisset; his se armis curaturum, ut ejus projecta ad detrahendum bonis viris audacia infringere-
retur, ac retunderetur. His auditis, a scribendi contra illum sententia destitit, seque tantum intra verba continuit. Neque solum sibi principatum in literis arrogabat, sed capeßendæ recteque administrandæ Reip. artem a se peti debere affirmabat, ac Regum & Rerump. omnium oratores noctu ad se domum, capite aperto, varia indutos veste, & Vulcanum in cornu conclusum gerentes, venire jactabat, ut suorum Regum mandata defer-

Q

rent,

rent, ut ad ipsum de pace, de bello, de summa imperiâ referrent, & quod ipse de Rep. consilium daret, acciperent; se vero jubere illos in cubiculum ibi proximum tantisper secedere, dum ipse scriptum, vel philosophicum, vel politicum, quod præ inanibus haberet, absolveret; eos autem ipsi dicto audientes esse: narrabat etiam, sibi a Rege Poloniæ viros, primorum principes, legatos, qui arcana quædam regni cum ipso communicarent, Regisque verbis salutem ipsi propitiam nunciarent, ejusdemque opes, gratiam potentiamque deferrent: ne multa, nullum esse tota in Europa Strategum, nullum Dynastam, nullum Tyrannum, quantumvis magno a nobis locorum intervallo disjunctum, quin lætis suis, ut ipse agebat, foliis, non continuo suam per literas amicitiam expeteret, ejus prudentiæ gratularetur, seque totum ipsi habendum possidendumque permetteret; & quosdam etiam Reges ab ipso edoctos, totam Reip. administrandæ rationem commutasse, gloriabatur: quin Regem ipsum Sueciæ, si Romanum, ut minitabatur, venire potuisset, multo sapientius facturum fuisse agebat, quam olim M. Marcellus fecerat, qui, Syracusis captis, tum requisivisse dicitur Archimedem illum, summo ingenio hominem & disciplina, cum plurimorum se civium cæde commaculasset; unde, cum audisset eum interfectum, frustra condoluisse: at Ducem illum, fortiorem etiam quam M. Marcellum, capta urbe, nihil gravius de ea constituturum fuisse, nisi prius ipsum requisivisset, invenisset, amplexibus implicasset, osculatus esset & consiliorum suorum conscium fecisset; itaque magno se Vrbi auxilio, vel potius salutis futurum fuisse. Illud vero incredibile, quod, cum paucis ante annis vir quidam princeps Romanus venisset, qui cum graves illi officii ac necessitudinis causæ intercedebant, rogatus, num ad eum domum salutandi ejus gratia esset iturus, respondit, non alias hoc se illi officium homini perfoluturum, nisi sibi antea ei essent honores decreti, quibus olim a principis ejusdem parente fuerat exceptus; qui parens, cum accepisset, ad se eum a Cardinali, cui tum inserviebat, missum venire, vehiculum ipsi primum, equis sejugibus tractum, simul ac ditionis suæ

sux fines attingit, obviam misit, tum ad suæ urbis portas rhedam, qua ipse vehebatur, una cum honorariis ephebis præsto esse iussit, qui cum exciperent, ad seque perducerent, postremo scabellum genicularium, serica contratum veste, suo in sacello parari mandavit, quo, dum sacrum fieret, niteretur, præterea, lecto a Sacerdote Evangelio, librum exosculandum tradi voluit, quæ honos summis tantum viris habetur. Ac multa, his similia, non magis gloriose quam insulse loquebatur, quæ, ne lectorem fatigemus, omittimus. Neque solum literatorum, quotquot ubique essent, se esse longo intervallo primum volebat, sed aliarum quoque ad se rerum arbitrium revocabat; neque ulla tabula picta, ullum signum, ulla fabrica, ullum vas cælatum, ex ebore, ex auro, ex gemma, aliquod precium habebat, nisi quod ipse probasset; ac sæpe vidi, præstantissimorum operum precia, quæ alii in cælum efferebant, illius æstimatione sic concidere, ut non esset quidquam abjectius, neque depressius. Atque erat optandum maxime, ut ejus maledicta & contumeliaz, ad ea tantum opera, quæ ille ad vituperandum arripuisset, revolverentur; sed artifices etiam ipsos multo magis comprehendebant; ac bene cum iis actum esse existimabatur, quos solum minimi homines precii, vel nihili potius, appellasset: nam quos ille oderat, longe acerbioribus plagis seriebat dilacerabatque. Vnum tantum pictorem eximium habebat, popularem suum; hunc Zeuxidi, Parrhasio, Protogeni, Apelli, anteferebat; hunc Amphioni in dispositione, Asclepiodoro in symmetria, quibus Apelles ipse cedebat, præstare affirmabat; quem propterea in tantum honorem venisse ajebat, quod præceptis suis formatus & institutus fuisset; ceteros, qui eadem essent ætate, non pictores sed pictorum esse umbras, ac vix dignos, qui ad arcas, ad subsellia, ad aqualia, ad vasa vinaria, ad patinas coloribus maculandas adhiberentur; hæc cum in foris, in triviis, in plateis, in officinis, incensis & aculeatis verbis effunderet, fiebat, ut odissent cum homines odio plusquam Vatiniano. Quod suspicioni locum aperuisset, fuisse eum non tam pituitæ copia peremptum, quam veneni vi, malevoli cujusquam scelere parati, sublatum;

idque, ut medici agebant, persuadere videbatur odoris
 fœditas, ventris tumor, livores toto corpore fusi: verum
 id, quod parum nobis constat, in medio relinquimus, &
 ad alia transimus. Erat illi Pinacotheca, præ qua cete-
 ras scenum esse dicebat, tabulis pictis referta, quarum
 singulas ad auctorem, qui maxime sibi placeret, refere-
 bat, atque hanc Bonarotæ, illam Raphaelis, illam Ti-
 tiani, illam Corrighii esse commemorabat: sed paucos
 post menses, quorum illis pictorum nomen primum ac-
 commodasset, oblitus, novo modo loquebatur, & quam,
 verbi causa, Raphaelis esse dixerat, Corrighio assigna-
 bat; quam ad Bonarotam retulerat, Titiano tribuebat.
 In spectandis laudandisque virorum formis græcissa-
 bat: nam ut quemque egregia forma aspiciebat, conti-
 nuo consistebat, & admotis naso ocularibus, devorabat
 eum oculis, ejus manum apprehendebat, diu detinebat,
 ægre dimittebat; sed non alio eos amore prosequabatur,
 quam quo Socrates Alcibiadem, Epaminondas Michy-
 tum, Catulus Roscium: sed hoc inter hunc atque illos
 intererat, quod honestius illorum amor unico tantum
 adolescente definiebat, hujus vero castæ benevolentie
 fines sese latius diffundebant, & quicumque corporis
 forma præstabant, omnes ei erant Alcibiades, omnes
 Michyti, omnes Roscii, quod in eorum pulchritudine,
 veniens ab animo virtutis lumen, & honesti formam
 aspiceret. Sed admonitus, ne hac tam vulgari consue-
 tudine suspicionem aliquam turpitudinis, Philosopho
 indignam, injiceret, respondebat, ne id posset continge-
 re, a se fuisse prospectum, qui sibi infanti in cunis pu-
 denda abstraxisset, & in ventrem abstulisset. Sed re ve-
 ra damnum bonæ literæ, ejus interitu, fecere: nam erat
 ingenio peracri, & studio flagranti; rem videbat acute,
 explicabat dilucide, scribebat ornatè, & judicasset etiam
 prudenter, nisi, elatione animi & vana sui opinione, in-
 flatus & corruptus, ornatissimos homines spoliare co-
 natus esset omni commendatione ingenii atque virtutis.
 Erat liberalis, splendidus, hospitalis; & in prandiis vel
 cœnis (quas non parum sæpe amicis dabat) accipiebat
 hominem nemo neque largius neque prolixius: deni-
 que nullius erat rei, præter laudem, avarus. Nihil fere
 edi-

edidit, præter paucas orationes; sed multa edenda reliquit, quæ, nisi Deus respexerit, quantumvis egregia æ luce digna, vel ad cetarios, cupedinarios, fartores, pomarios ibunt, vel, ut magnus illis honor habeatur, mittentur in vicum, vendentem piper, thus & odores, vel in bibliotheca aliqua concludentur, pulvere, situ, blattisque perdenda. Quorum operum hæc numerantur in primis, Templum Vaticanum, tribus voluminibus explicatum, Breviarium Actorum Pauli V, Bibliothecæ Vaticanæ descriptio, Breviarium Actorum Pauli V contra Venetos, orationes quinque supra centum, Variarum Questionum in Aristotelem libri decem, explicationes difficultium locorum Aristotelis, Epistolarum liber unus, varia poemata, tum Latino, tum Etrusco sermone scripta. Statura fuit mediocri, facie oblonga, mento, quod cum in orbem deberet exire, desinebat in quadrum, ubi tanquam in inculto, ac derelicto solo, paucorum seges pilorum vix foras emerferat: oculi parvi, ac palpebris, sæpe conniventibus, muniti; nec mirum, si omnia naso suspenderet, quippe cui talis ac tantus a natura nasus contigerat, ut posset cuivis oneri sustinendo sufficere. Vestitus ejus erat, qui magis ad Philosophorum frugalitatem, quam ad aulicorum elegantiam accederet; præsertim cum ipse gloriaretur, pro sua excellenti doctrina atque sapientia, non aliis se principibus viris in servitutem dicasse, nisi qui summos archissima cognatione attigissent; qui omnino fuerant duo, & cum meminerat prioris, gloriosæ, cum secundi, sanctæ eum esse memoriz, agebat: & hunc dictitabat scivisse multum, sed voluisse existimari se nihil scire, illum scivisse multum, sed voluisse etiam sciri, se multum scire. De ejus morte varie a variis narratur: alii enim pituita, largius ad os defluente, suffocatum, alii veneno, ut diximus, interceptum, alii vomitione puris & sanguinis, ex apostemate in interioribus corporis partibus concepta, exhalasse animam tradunt.

IO. ANDREAS RVETTVS.

SI Io. Andreæ Ruetti virtuti par data esset fortuna, floruisse opibus ac divitiis, nec eum; quem sortitus est, vitæ exitum invenisset: nam & magna Geometricæ facultatis intelligentia, qua præditus erat, & omnis fere, digna homine liberali, ab eo percepta doctrina, secundiores illi res, vel saltem non ita scædas atque adversas, polliceri videbatur. Erat in primis, ut diximus, Geometricæ peritus, quod libri ab eo de Arithmetica & Algebra editi declarant. Flagrabant studia Etruscæ poësis apud eum; in qua quantum præstaret, argumento sunt versus plurimi, quos in unum volumen collectos emit; cui libro Murmuri Heliconis nomen est inditum; tum nonnulla etiam opuscula alia testantur, & in his elegans oda, locuspletissimis amici cujusdam sui commentariis illustrata, quæ fere omnia scripta sunt ab eo, cum Ducis de Candal, qui Venetæ Reip. exercitibus præfuit, domum, præfecti munere ac nomine administravit. Verum, si, quam ille operam ac diligentiam ad Geometriam perdiscendam contulit, eandem ad cavendum sibi adhibuisset, longius illi tempus ingenii augendi ac declarandi contigisset: si, quod studium colligendis in Parnassi aut Pindi vertice floribus collocabat, in delectu familiarium, quibus vitam suam tuto committeret, posuisset, non in eas insidias devenisset, quibus postea circumventus interiit: sed, dum in studio dimetiundi cæli & terræ est omni mente & cogitatione intentus, exitium ac pestem, capiti suo paratam, non vidit; dum ociose per juga Pindi se infert, opportunam inimicis suis necis sibi parandæ occasionem obtulit: etenim domi Marii Frangipani, cujus erat consiliorum omnium particeps, ab adolescentulo, nocte quadam, somno sopitus, est interfectus, atque omni auro argentoque spoliatus. Hunc adolescentem, ajunt, Romam Venetiis ab ipso perductum, famuli nomine, & animi gratia; nec ignorasse illum hunc esse impurum ac furacem, quod equos militi cuidam deprædatus esset, atque alia furta fecisset; sed nescio quo impetu, de mente ac cogitatione de-

deductum, non existimasse, idem ad se infortunium posse recidere. Addunt etiam, adolescentem, cum sæpius a domino objurgaretur, quod alio excurreret, neque id illum esse passurum audiret, tum omnes domo exeundi aditus obseptos aspiceret, non tulisse illum, sed, re cum amicis suis, sceleratis hominibus, supplicioque dignis, communicata, cepisse illud plenum sceleris consilium, plenumque audacitæ. Sed ut sese res habeat, illud certum est, miserum illum octavo ab ejus interitu die, cum non appareret, ac teter, ex rimulis cubiculi ejusdem ostii, odor afflaret, jussu magistratum, effracto ostio, in lecto, multis confossum vulneribus fuisse inventum, adolescentem vero nusquam repertum.

IVLIVS CÆSAR CRUCIVS.

GRavis atque atrox, in bello, ob Helenam Agamemnoni raptam, a Græcis toti Asiæ illatæ, quo bello Trojanorum opes concidere, Apollinem inter atque Vulcanum est orta contentio, cum alter stantem adhuc ac florentem Trojæ fortunam tutela patrociniique suo defenderet, alter ad eandem evertendam sua cum Græcis præsidia conjungeret; cujus discordiæ adhuc memores, alter alteri, cum usus venit, incommodare, & quod ægre sit, facere studet. Atque hac nostra memoria deformis ille faber, fumo ac fuligine oblitus Julium Cæsarem Crucium, Bononiensem, in nutritu Musarum eductum, ut esset qui carmina dictaret, quæ tunicatus popellus caneret, Apollini Musisque surripuit, & ab amœnis Pindi & Heliconis jugis ad nigras atque depressas fabrorum officinas, & a faciendis versibus ad clavos, clatra ferrea, atque ejusmodi alia fabrilia opera confluenda traduxit. Quam injuriam Apollo non tulit, sed Pegaso invecus, alumnus suum, cum maxime, Vulcano cogente & urgente, operi esset intentus, excepit, ac post se equitem, Pegaso impositum, liberum foras eduxit, cum fumido illi fabro animum ad persequendum tardaret infirmitas ac debilitas cruris, quod in illo præcipiti de cælo in terram casu ac ruina perfregerat, lxx officinæ igitur ferrariæ caligine a tenebris in libe-

ram cæli lucem expositus, abluit primum corpus, illuvie ac sordibus squalidum; tum scorteam castullam pallio mutavit, ac pro malleo calamum, pro chalybe chartam, pro aquæ aheno atramentariam thecam accepit; ac totum se ad scribendos versus contulit; quorum tam magnum numerum effudit, ut tonsoribus, circulatoribus, pedibus ac luminibus captis, affatim præbuerit, quod in tonsistrinis, in viis, in plateis, cantaretur. Nulla sunt fere impressorum præla, quæ in ejus operibus imprimendis non exerceantur; nullum flabellum circumfertur, in quo aliquod ejus carmen non legatur; nullæ sorsiorum tabernæ, nullæ eorundem in foris mensæ conspiciuntur, ubi non plura ejus prostent opuscula; nulla virgo, nulla paulo hilaris nupta, aliquo in gynæceo concluditur, quæ in suis cistellis non hujus aliquid habeat. Neque tamen ita sunt abjecti ejus versus, ut ab eruditis auribus respuantur; neque scurrilibus jocis repleti, ut pudicas aures offendant; immo ab omnibus, qui pudicitie esse volunt præmium, mirifice laudantur.

NICOLAVS NIGER.

HVnc quoque Apollo, quem sibi poëtam delegerat, a mercatura, in qua vertebatur, ad faciendos versus attraxit, quos vulgus hominum legeret. Hic natione Italus, patria Venetus, simul ac ex ephebis ætate exiit, navigavit in Syriam, ac Hieropoli commutandis mercibus studuit lucro; a quo nunquam abstractus fuisset, nisi a Mercurio, qui mercatoribus præest, impetrasset Apollo, ne in mercimoniis emendis vendendisque eum adjuteret, ac lætum lucris afficeret; ille enim, malevoli cujusdam opera, magnam rheubarbari lectissimi vim in navim impositam, aqua injecta, corripuit; quare ille, ex maximis divitiis pene ad egestatem reductus, animum a mercatura abduxit, eoque appulit, quo eum Apollo vocabat. Sed multo majori ex parte, ejus ad se operam attrahebant Cupido ac Venus, quam Apollo chortusque Musarum. Non potest effari tantum dictis, quantum factis esset profusus in Venerem. Mitto, quod fecit flagitii in Syria, quod Venetiis, unde virginem, ho-

honesto loco natam, abduxit; a cujus postea cognatis, multis vulneribus confossus, sublatus est pro mortuo: mitto, inquam, hæc omnia. Romæ cum esset, ubi diem obiit, omnia ejus negocia illuc denique revolvebantur, ut, postquam aurora illuxisset, aliquam urbis regionem obiret; & si quam in ea mulierem meretricem offenderat, quæ se nuper populo prostituisset, ære dato, ejus emebat noctem, vel eam statim inibat: itaque nulla erat meretrix (nisi si quæ esset diabolæ pædagogus polluta, nam istas non ducitabat) nulla, inquam, erat, quam ille, tanquam mercem aliquam, suam, ut agebat, nota non ob-signasset; & si qua nova mulieris merx alicunde advecta esset, curtebat statim, ut suo eam annulo obsignaret: quamobrem, magis in complexu mulierum, quam in aliqua tectitudine literaria, Homericæ more, octonis rhythmicis versibus bellum inter muscas, cimices, & formicas gestum, cecinit, eodemque metri genere, D. Nicolai res gestas, comædiam Candidam, & aliud Drama, Anima felici nomine, edidit. Erat adeo pinguis, ut geminos in ventre habere liberos videretur; qui venter adeo illi ex adipe extare ac prominere cœperat, ut omnem cum mulieribus concumbendi facultatem adimeret; ex quo in eam ægritudinem conjectus est, ut mortem in beneficio posceret. Quid enim, agebat, opus est vita illi, cui voluptas ea desit, propter quam vita sit expetenda? Atque votis affuit Deus: nam repentina morte correptus, abiit ad Acheruntem, sine viatico.

LAURENTIA STROZZA.

Nostro huic sæculo, quod, quamvis reclamante non nemine, & hanc potissimum laudem Leonis X ætati tribuente, doctorum hominum atque omnium literarum fama illustrium uberrimos edidit sæctus, sua quoque Sappho non defuit, quæ eodem carminis genere, non amores luderet, sed divinas laudes caneret, non eadem ingenii, elegantiz, & eruditionis magnitudine, qua illa (quis enim, ne virorum quidem, cum ea, quæ non ætati modo suæ, sed aliis etiam multis præstitit, conferre se audeat?) sed religione, pietate, sanctimonia,

& carminis argumento, infinitis partibus majore. Si quidem fuit illa vere experta religionis, hæc Christianis sacris imbuta; illa impurissimorum amorum flamma exarsit, quæ, sua etiam confessione, Tribas fuisse convincitur; hæc purissimo sanctissimoque divini amoris igne succensa flagravit: illa nupta unicuique esset, vetiti cum Phaono, quem deperibat, concubitus infamia notatur; hæc Deo immortali dicata, summa virginitatis laude, quam perpetuo coluit, in omnium sæculorum memoria vigeat: in illa, poëtice facultatis ornamentum, quamvis supra omnem æstimationem, non ita magnam laudis materiam habet, quod illud minus sit aptum mulieribus, quæ ex virorum consuetudine, quibus cum sua carmina communicare coguntur, non parum sæpe pudicitie jacturam faciunt, vel, ut eam maxime incolumem præstent, se & famam suam existimationi hominum vindicare vix possunt; in hac, quæ mancipatarum Deo virginum septis se clauserat, ad quæ nec mulieribus, ne dum viris, aditus patet, quæque, hac præsertim ratione, exoneraret animum labore, quo, ex divini amoris æstu fatigabatur hæc eadem facultas, eximie laudis honore dignatur. Devota Deo virgo vixit sub legibus D. Dominici, in Monasterio S. Nicolai, Patri in Etruria, ubi scripsit hymnos in singulos totius anni dies festos, vario carminum genere; sed in primis Sapphico, quo maxime delectabatur, eosque in Lactantii de Lactantiis, Pistoriensis Antistitis, nomine edidit. Fratrem habuit Kyriacum Strozzam, nobilem Peripateticum, qui utrum sorori, an soror ipsi, majus lumen ac decus attulerit, incertum est adhuc; ita in vario laudis genere uterque pari inter se gloria certant.

ANTONIUS BRUNVS.

ANtonius Brunus natus est Manduræ, Regni Neapolitani oppido, quamvis ille Astræ in Insubria stirpem antiquissimam suam, originem ducere, affirmaret, ibi familiæ sacra, ibi generis nomen, ibi majorum multa vestigia conspici. Erat corpore obeso ac pingui, sed ingenio neque hebeti neque tardo: nam, & philosophicis
ac

ac Theologicis disciplinis instructus, a prima adolescentia, totum se Etruscæ linguæ studio tradiderat; ac multa, tum soluta oratione, tum versibus, doctè eleganterque conscripsit; ut licet agnoscere ex tribus epistolarum voluminibus, ex rhythmis, quibus, unico volumine comprehensis, trium Gratiarum nomen est inditum, ex epistolis, quas Heroidas vocat, in tres libros distributis, ex libro Metamorphoseon, octonis rhythmicis versibus explicato, alioque variis ex poematiis confecto, qui Mosæus inscribitur, & ex Rhadamisto Tragedia; quæ omnia & magnam ejus indolem ostendunt, & in primis declarant, quantum vir ille præstare potuerit; si ingenio suo obtemperare quam genio indulgere, maluisset. Etenim in hilaritatem mire propensus, plus operæ dabat amicis ac voluptatibus, quam operibus perpoliendis perficiendisque, quæ dolaverat: tum erat homo esse maxime, ac delicatorum eduliorum studiosus in primis; nam quo securaret nitidiuscule, æs alienum conflaverat, atque ætate, cum a cœna bene potus surrexisset, & urbem frigoris captandi gratia circuiret, si quod in aliqua popina delicatum obsonium offendisset, non dubitabat cœnam repetere, ac celocem rursus faburrare; nec deest, qui dicat, ægritudinem illam, ex qua decessit, ex cibi intemperantia ortam, cum bene cœnatus, pulcreque appotus, ficedularum (nisi memoria me fugit, vel qui narravit, ludos fecit) magnum numerum vorasset; proinde eum, paucis diebus post, lethalem in morbum coniectum, diem obiisse. Sed hæc levia in eo vitia, si vera sunt, plurimis ac maximis virtutibus obteruntur; quibus magno erat apud omnes in honore ac nomine, ac plurimi æstimata est ejus opera a summis viris; nam magnis stipendiis conductæ primum est a Francisco Maria Feltrio a Ruere, Urbinaturn Duce, cujus capiti nobile illud sertum, omnibus verborum sententiarumque floribus ornatum intexuit, de cujus virtutibus ac laudibus extat in epistola ad ipsum Brunum scripta ornatissimum Jo. Baptistæ Marini elogium; tum Berlingherius Cardinalis Gypsius habuit eum ad manum, consiliorum omnium participem, cujus postea domi, omnia summa sperans, est mortuus. At vir ille,

cmmun-

emunctissimæ naris princeps, maximum se aulæ suæ decus & ornamentum constituturum putavit, si tali ingenio hominem atque prudentia, ad id officium admississet. At ille fide, assiduitate, industriaque perfecit, ut virum illum principem, consilii sui non pœniteret. Nullus fuit in Italia celebris & illustris Academicorum conventus, qui non eum sibi socium adoptarit, ut Ocioforum Neapoli, Philomatum Senis, Caliginosorum Anconæ, Insensatorum Perusii, Humoristarum Romæ, in qua etiam sæpius Censoris, atque a Secretis, partes obtinuit, recteque administravit.

FRANCISCUS VALLENSIS.

QVoniam Academiz Humoristarum facta mentio est, sine piaculo præteriri non potest Franciscus Vallensis Cosentinus, qui tot annos, quot Romæ vixit, honestissimum illum conventum, qui erat quasi theatrum illius ingenii, & suo frequenti ad eum accessu cohonestavit, & voce erudita ac Romanis auribus digna illustrem ac nobilem reddidit. Nullum enim patiebatur esse diem, quo die cœtus ille cogeretur, quin plures rhythmos recitaret; quod erat illi factu facillimum. Nam & ingenio & exercitatione affectus erat, ut nemo ipso celerius scriberet, neque maiorem numerum versuum, fere sine labore, perficeret. Neque dicendi genus afferebat humile atque vulgare, sed elatum ac splendidum. Laudavit multos, tum virtutis tum nobilitatis claritate præstantes viros; sed eleganti in primis carmine, meritis in cœlum laudibus extulit Robertum Vbalatinum, comitiis a Paulo V nuper habitis, in collegium Cardinalium cooptatum. Atque tanta hæc in eo, in faciendis versibus, ubertas ingenii atque fecunditas eo videri admirabilior debet, quod non ea illi in ocio atque in omnium rerum abundantia contigit, sed tum maxime, cum variis adversæ fortunæ fluctibus agigaretur; cum videlicet, ut in epistola ad Ferdinandum Gonzagam Mantuæ Ducem, cuius nomini anno MDCXVIII suos rhythmos dedicaverat, ipsemet scribit, exilio multatus, patria careret, cum inimicorum insectationibus pre-

premeretur, cum, rebus ad necessarium usum deftitutus, cum inopia conflictaretur. Sed illa vis ingenii, cum ad poëticæ facultatis laudem in primis effloresceret, morte extincta est, ipsi immatura, (in ipso enim ætatis flore decessit) suis acerba, & ætatis ejusdem poëtis luctuosa.

THOMAS CHOREA.

Thomas Chorea, Græce Latineque vir longe doctissimus, natione Lusitanus, floruit eadem ætate, qua M. Antonius Muretus. Nam obrestarunt inter se, cum uterque humaniores litteras doceret, sed majore Muretus theatro; ac cum essem admodum puer, (ea enim præfextim sunt ad diuturnitatem memoriæ stabilia, quæ prima audivimus) dici memini; non parum ejus laudibus detraxisse, quod Societatem Jesu, in quam receptus fuerat, deseruisset, quodque in eam non recte loqueretur, & quo eidem, qua posset ratione, incommodaret, atque eruditissimis viris, qui in collegio Rom. ejusdem Soc. eloquentiæ præcepta tradebat, & elegantissimos Latinæ linguæ scriptores interpretabantur, discipulos abduceret: etenim in gymnasio Fratrum Dominicorum, in via, qua iter est ad collegium Romanum, tunc recens excitato, cœpit, eodem tempore, quo illi docebant, de rebus curiosissimis, quæque latissimos ad egrediendum exitus haberent, majore verborum elegantia & sententiarum concinnitate, quam esset utile discipulis, differere. Atque ejus ego vocem sæpissime, illac iter faciens, accepi; ac memini, pædagogum, qui lateri meo custos erat additus, quique, ubi me in ludum deduxisset, ad eum audiendum accurrebat, dicere, modo ornatissima oratione, tanquam penicillo aliquo, formosissimæ venustissimæque mulieris speciem ornatumque describere, modo damnosæ & amatoris adolescentuli profusam liberalitatem, modo illecebrosas meretricum blanditias, modo lenonum turpissimorum artes ac mores exprimere, atque alia ejusmodi efferre, quæ ociosas aures, ac voluptatis quam utilitatis cupidiore, detinerent: verum ita jocabatur, cum a docendi munere in gymnasio Romano stans diebus feriretetur. Nam in duo-

duobus clarissimis Italix gymnasiis, Romano ac Bononiensi, magnis stipendiis, extitit dicendi recteque scribendi magister. Scripsit de ea arte, quam docuit, videlicet de Eloquentia libros; de Epigrammate librum unum, & de Elegia alterum: edidit orationes varias, in quibus ea legitur, quam Romæ habuit, in funere Martini Navarri, in Æde D. Antonii Olyssipponensis, nationis Lusitanorum.

IO. BAPTISTA LAURVS.

Quantum in Io. Baptista Lauro, Perusino, eloquentiæ, eruditionis, doctrinæque extiterit, quantumque in eo omnium laudandarum artium studia flagerint, ut egregia elegantis sui ingenii monumenta taceant, singulare, de ejusdem præstantia, Vrbanus VIII judicium disertè testatur; qui statim ut ad summum illud divinoque proximum dignitatis fastigium euectus est, nihil fere habuit prius, quam ut a Marcello Card. Lanti, cui serviebat ille, prope in beneficio & gratia posceret, ne ferret moleste, eo ornamento domum suam spoliari, ac pontificiam augeri: at Cardinalis, qui Io. Baptiste propter ejus morum suavitatem sanctitatemque, omnia cuperet, non summa solum voluntate Pontifici eum tradidit, verum etiam aureis ducentis donavit, quibus se vestibus iisque rebus instrueret, quæ aulici pontificii dignitas ac decor exposceret; tum cum Pontifex ad numerum eorum cubiculariorum adscripsit, quos intimos appellant, ut ejus consilio uteretur in iis studiis, quorum erat princeps. Atque hunc locum tenuit honoris ac familiaritatis apud Urbanum, ac processisset etiam honoribus longius, nisi mors, quæ fallaces spes nostras, & inanes contentiones, in medio sæpe spatio infringit atque subvertit, intercessisset: nam, viridi adhuc ætate sublatus, Pontifici, qui eum diligebat, triste sui desiderium reliquit. Puer educatus est in seminario Perusino, atque a Bonciario humanissimis literis institutus, quarum studium, cum maximos in eis progressus fecisset, nunquam dimisit, sed usque ad ultimum vitæ diem retinuit, semperque novum aliquod atque præclarum inge-

ingenii sui monumentum edidit; quorum ea numerantur in primis, de annulo pronubo B. Virginis liber, Epistolarum centuriz dux, Theatri Rom. orchestra, de viris illustribus, de fabricatione Calcis poema. Sacris initiatus, in Marcelli Card. Lantis familiam venit; apud quem Caudatarii gradu fuit semper; atque inde in Pontificiam aulam, ab Urbano VIII Pontif. vocatus, ut diximus, transiit.

VALENTINVS PASCHALIS.

Valentinus Paschalis, Vtinæ honesto loco natus, atque a magistris optimis, liberalibus disciplinis atque humanioribus præsertim literis, eruditus, insigne Aquilejæ sacerdotium obtinuit; unde, ut ab amicis ac popularibus suis audiui, ob eædem sacerdotis alterius factam, dejectus, Romam confugit; ubi Rogerii Abbat̃is Trionii, Cardinali Montalto a secretis, cujus tum magna erat in Romana aula auctoritas, ope & gratia, contulit se ad aliorum negocia procuranda, atque ad ea fidem ac diligentiam suam adhibuit; quamobrem, quoad vixit, vixit autem usque ad summam senectutem, honesti, diligentis, atque optimæ fidei hominis nomen obtinuit. Neque tamen literarum studia intermisit, sed usque ad extremum spiritum coluit, Musas præsertim, quibus, ob ingenitam sibi a natura ad versus faciendos materiem atque indolem fuerat ab ineunte ætate addictus; atque varia edidit poemata, in his, Currum, illudque quod inscribitur, Cometis nulla fides, scriptum ab eo, ut Paulo V adularetur, qui, ut ceterorum vota sunt hominum, nunquam mori voluisset, cum nova in cælo stella visa esset, quam Græci cometen, Latini crinitam appellant, quam ii, quos præsentis status odium ceperat, & novarum rerum erant cupidi, principi illi mortem portendi vaticinabantur. Edidit etiam librum de rebus Moschicis, ac de Italiz fluminibus.

SCIPIO PASCHALIS.

SCipio Paschalis, Consentinus, erat genere & forma honesta, neque tam magno corpore, quam figura venusta, sed infirma valetudine. Nondum enim senex est mortuus, sed atra præsertim bile, pectori pertinaciter hærente, premebatur, quam ille nonnunquam vomitu extrahere & excutere nitebatur. At cum adhuc egregia forma & ætate integra Romam venisset, non tamen inanibus adolescentiæ cupiditatibus, quas natura ipsa profundit, (quod quidem in vulgus emanarit) adstringendum se tradidit, sed in labore studioque versatus est; non homines improbos sœdere amicitiaque sibi conjunxit, sed optimis viris deditus fuit; nam cum ingenii probitate ac judicii præsertim acumine longe multumque præstaret, in Academiis, in eruditorum domibus, in conventibus amicorum, ubi nullus fere sermo erat nisi de literis, frequens aderat, suosque rhythmos, non tam sententiarum venustate prædulces, quam rerum pondere graves, una cum aliis recitabat; quos ego a Porphyrio Feliciano eximie laudari audiebam, cui tum, omnium fere consensu, poëticæ facultatis primæ dabantur: nondum enim Jo. Baptistæ Marini virtus, quæ omnibus suæ ætatis palmam eripuit, qualis & quanta esset, se satis ostenderat; probabantur etiam Margaritæ Sarrochiz, in cujus domum omnes, qui literas nossent, tanquam si novum aliquod se in cælo sidus aperuisset, ejus visendi audiendique gratia concurrebant. Sed mirum est, eam, quæ, vana sui ipsius opinione inflata, omnes præ se contemnebat, in illius carminibus obstupuisse, nisi si adolescentis ætas ac forma eam a muliere elatissima admirationem eripuerat. Quos ego rhythmos laudatissimorum virorum commendatione probatos, nondum editos vidi; quod si adhuc communi hominum luce carent, est quod vehementer admirer, hominem, laudis gloriæque in primis cupidum, non dedisse operam, ut typis excuderentur. Atque cum memini, de vitæ statu eligendo, secum deliberanti, mihi respondere, cum vitæ statum potissimum amplectendum, qui posset aliquando con-

conditionem hominis mutare, hoc est, ad honores aditum aperire; neque vero hoc solum mihi dixit, sed ipse & sensit & fecit. Nam cum Ferdinandus Card. Gonzaga publice Urbem ingrederetur, ut a Paulo V, a quo fuerat renunciatus Cardinalis, purpureum capitis integumentum, quod galerum vocant, acciperet, inpetrauit, ut in ejus aulicis esset, atque ab hoc aditu januaque patefacta, brevi tempore in ejus intimam pervenit familiaritatem, & cum jam posse videretur, ex fructibus, quos ex paternis prædiis capiebat, & ex suo demenso, quod, ut aulicus Cardinalis, consequeretur, Antistitis locum recte tueri, Cardinalis ejusdem auctoritate & gratia affectus est, ut inter eos numeraretur, qui a referendis supplicibus libellis Referendarii nuncupantur; neque hoc dignitatis gradu se continuit, sed cum, Casalensis Ecclesiæ vetere sacerdote mortuo, novus esset constituendus Episcopus, ejusque nominandi potestas penes Ferdinandum esset, ad quem Mantuæ dominatus, fratris morte, reciderat, de amicorum consilio, qui Romæ ipsi favebant, perfecit, ut cum Dux plures esset nominaturus, quo ex iis Pont. quem vellet, eligeret, ad aliorum numerum, suum quoque nomen adscriberetur. Ita Casalensis Ecclesiæ sacerdotium illud amplissimum, per hanc rationem, obtinuit: atque ex eo tempore, cum grandior jam ætas, & illa Episcopalis auctoritas, gravius quiddam requireret, studium suum omne, ab Etruscæ linguæ venustate, ad Latini sermonis maiestatem transtulit; quo in studio, ut tradit Gaspar Scioppius, magno sibi usui adjumentoque fuisse testatur novam Sanci Grammaticam; ea enim perlecta, multum sibi additum alacritatis atque fiduciæ, cum antea titubanti ac perplexo ad scribendum animo solitus esset accedere, quod fere unaquaque in re dubitanter hæreret: ac, ne styli exercendi materia deesset, Carolus Emanuel, Dux Sabaudie, per id tempus Montisferrati urbes occupare conabatur, quod eas ad se pertinere arbitraretur; id bellum luculente diligenterque perscripsit: ejus belli historię, serme jam moriens, tria exemplaria confici jussit, quorum unum Bibliothecæ Vaticanæ servandum mandaretur, alte-

rum Duci Mantuæ, tertium uescio cui alteri tradetur.

ANDREAS BAIANVS.

ANdreas Bajanus regionem & patriam, in qua ortus erat, repudiavit, barbaro superboque fastidio, atque ex Indo Lusitanum, ex Goano Conimbricensem se dici volebat; quasi puderet se, in ea regione ortum, quæ est margaritarum piscatu insignis, quæ ebur atque aurum mittit, quæ solem quotidie, tanquam a se ortum, ad illustrandum mundum, toto cælo luce diffusa, mortalibus tribuit. Se Grammaticum professus, in aliquot Italix urbibus, sed Romæ præsertim, grammaticam docuit, neque ita magna fama, neque sane nimis pingui emolumento, quod non in luce hominum, neque edito atque illustri in loco, pulpitum inscenderit, sed in tenebris, atque Urbis in angulis, vili plebeculæ, grammaticæ præcepta dictarit. Nam & parvula mercede conductus est ab ejus domus moderatoribus, quæ pueros parentibus orbos alit, ut paucos ex iis, ingenio præstantiore, selectos grammaticis disciplinis erudiret; quibus oratiunculas scripsit, quas in Æde D. Eustachii die eidem sacro, ut est mos illorum adolescentium, haberent; quæ ineptam ac ridiculam prædagogi sedulitatem & industriam declarant; cujusmodi fuit illa, in qua ita verba coagmentantur componunturque, ut ipsa, per sese, se teneant ac sustentent, nec aliquo verborum adminiculo innitantur. Ibi etiam inani labore, plebeis sane versibus, Doctrinæ Christianæ rudimenta exposuit, quæ typis etiam cudenta ac divulganda curavit. Scripsit etiam alia ejusmodi non pauca, tum soluta oratione, tum versibus, quæ piget referre; ac postremo vitæ suæ tempore hanc eandem Grammaticæ artem professus est apud eos, ad quos puerorum Urbis fœx atque quisquilix, tanquam in cloacam aliquam, confluunt, ut literulis imbuantur; in quorum postea complexu animam exhalavit; quibus, cum audissem, id onus incumbere, ut omnia ejus scripta in unum vel plura volumina coacta imprimerentur, quibus ille edendis, aliquot aureorum cente-

u2, moriens nescio cui attribuerat, conveni die quodam duos eorum in via, nam bini solent incedere; salvere jussi, ac demissis & humilibus verbis rogavi, ut operum imprimendorum titulos exponerent; qui vix mihi responsum dederunt, ac statim terga obverterunt. At nulum ille majus ad docendum theatrum est nactus quam collegium Græcorum, ubi præter Grammaticam, veterum Grammaticorum more, Rhetoricam docuit, ac feriis Bacchanalibus fabulam illam Maccaroneam docuit, Carnevalo nomine, quam edidit. Longo Panegyrico res gestas a Jo. Zannoscio, magno Cancellario regni Poloniæ, & copiarum Imperatore perpetuo, laudibus extulit, suasu Jacobi cujusdam Lauri, mendici hominis, qui panegyricum illum impressum, Thomæ Zannoscio, Io. Filio, dicavit. At hic Laurus, novo quæstu, aucupii simillimo, imagunculis, epigrammatibus, atque aliis ejusmodi nugis, transalpinis, fortunatis hominibus ac nobilibus, dicandis, aureos nummulos, tanquam rete jaculo, capiebat; quod si illi aucupium contigit ex sententia, (quod haud scio, non enim in earum regionum divitibus tam liberalem animum expertus sum esse, ac raro eorum quenquam video, hoc cibi genere captum, rem aucupi solvere,) si, inquam, id illi bene successit, certe ex compacto partitus est cum Bajano lucellum. Verum nos, quidquid dici de Bajani virtutibus potest, hac una laude, quæ magna est, concludemus ac perorabimus, nimirum ita Musis usum cum esse amicis, ut admirabili animi motu celeritateque ingenii, magnum numerum versuum, de quacunque revellet, effunderet.

MARGARITA SARROCCHIA.

NVllam ego mulierem, quod quidem meminerim, legi vel audivi, vel ex veteribus vel ex recentibus, quæ ausa sit heroico carmini manus admoveere, illudque perficere; nisi, si quis ex veteribus Græcis Erinnam Teiam, ex Latinis Probam Valeriam, objiciat: at illa quidem, proxime ad Homeri majestatem, carmen egregium scripsit, trecentis tantum versibus, neque eo am-

plius conclusum atque perfectum, Proba vero, quamvis longum opus ac nobile, de Christi gestis ac morte, condiderit, illud tamen Virgilii versibus contextuit, ac nihil de suo propemodum addidit. Nostra vero Sarroechia, virili plane audacia, Etrusco heroico carmine, rhythmis adstricto, Scanderbegi Epirotarum longe fortissimi res gestas, Phœbo Musisque faventibus, multis libris profecuta est; nec sicut quidam, qui maligne eam laudabant, soliti erant dicere, fuit inter mulieres vir, & inter viros mulier, sed multiplici variaque doctrina, & carminis elegantia, assequebatur, ut multi nec imperiti nec indocti viri, cum ipsa comparati, mulierum instar habere viderentur. Vt non immerito dici illa possit Etrusca Siren, præsertim cum Parthenope, suam esse civem, asserat. Neque Etrusci tantum, sed Latini etiam carminis faciendi artifex erat. Nam sæpe ego eam vidi, elegantissima argutissimeque conclusa epigrammata, summa eorum, qui aderant, approbatione, recitare. Sed longe meritis major illi inerat vanitas atque superbia; omnibus se antepondere, neminem ferre, injuriam sibi factam queri, si a laudatoribus suis audiret, se mulieribus tantum, ac non viris etiam, quot sunt quotque fuissent, præstare; immortales cum eo inimicitias suscipere, qui in disputando, non continuo iis, quæ ab ipsa dicerentur, assensionem suam præbuisset, aut eisdem adversari ausus esset; ac multos & literatos viros ea causa adversos habebat; in his Io. Baptistam Marinum, quem illa, ut fama erat, alio amore dilexerat, atque Platónico: sed plus in ea poterat amor sui, quam cujusvis alterius, quantumvis elegantis, ac ceteris in rebus sibi obnoxii. Verum ne mortales omnes ab ea odio & iracundia inflati discederent, Lucæ Valerii contubernalis sui opera fiebat, qui, quoties de re aliqua literaria inter ipsam atque alterum orta lis esset, se interponebat, & intolerabilem mulieris contumaciam sua humanitate lenibat, & utriusque dicta, interpretatione aliqua, conciliando, sedare lites eorum conabatur: ac parum habuit, singulorum a se hominum animos abalienare; cum Academicis etiam publice odia inimicitiasque exercebat; ab Academia Humoristarum, capitali odio, dissidebat, quod

quod adolescens quidam, qui in ejus erat contubernio, quoque tum illa utebatur perquam familiariter, in sermone, quem in illo honestissimo doctorum hominum cœtu habuisset, dictum quoddam suum, Sarrocchiæ auctoritate confirmare conatus esset, quod per leges Academicæ nimine licebat, quibus cautum erat, ne quis viventis cujuscumque, quantumvis doctrinæ virtutumque omnium principis, auctoritate uteretur; cumque illud esset opus censorium, leviter, modestis objurgationibus, animadversum est in adolescentem illum, magnisque clamoribus actum, ne quis deinceps tale aliquid faceret: quod ubi ejus ad aures pervenit, queri, irasci, minitari omnibus, qui acclamassent, vociferari palam, lacrimas non tenere, propemodum insanire, furere, ac dicere. Ergo ego, supra mulierum, immo supra mortalium omnium, conditionem constituta, paucorum, nescio quorum hominum, placitis subjicior? ergo quisquam audebit dicere, jura mihi esse nata, quæ aliis literatis imponerentur? ergo ego, quæ non una e multis, sed inter omnes, ingenio, rerum maximarum scientia, ac poëticæ facultatis laude, plane singularis existimor, inter gregarios adnumeror? mori me malim, quam tantam injuriam impunitam dimittere, ac nihil propius est factum, quam ut cædes aliqua fieret; atque adolescens ille deinceps perpetuo Academia abstinuit. Domum suam, non solum harum politissimarum artium, sed Philosophiæ, Theologiæ, omnium bonarum disciplinarum, denique virtutum omnium oraculum, haberi volebat. Itaque omnium, qui in aliqua liberali disciplina principes haberentur, concursus ad eam fiebat: illa eorum disputationibus aderat, illa eorum controversias dirimebat, illa quidquid loquebatur, non Sarrocciam sed Socratem dixisse, non ab ea profectum quæ posset errare, sed Delphis responsum existimari poscebat. Ea pudicitix fama fuit, qua solent esse poëtix, fidicines, cantrices, cæque quas pingendi fingendique ars a laia & colu abduxit; qua fama verene an falso laboraverit, incertum est mihi, cui non fuit ocium neque consilium, usque a stirpe, auctoritatem, unde illa emanavit, exquirere.

HIERONYMVS BVCCAFERRVS.

Civitas Bononiæ, mater studiorum, Italix decus, summum ditionis Ecclesiasticæ ornamentum, nunquam ingeniis hominum caruit, quibus æternam, apud omnes nationes, sui sibi nominis famam gloriamque conficeret: verum nostra memoria in Hieronymo Buccaferro, Francisci filio, multum adepta est claritatis & laudis. Hic, patris diligentia, qui & ipse literas amabat, omnibus doctrinis eruditus est, quibus ætas puerilis impartitur; Jo. Paulo Muzzolo Philosopho, consobрино suo, operam dedit, doctori eximio; qui, cum multos annos Bononiæ docuisset, evocatus est Papiam, ut ex præcipuo gymnasii illius suggestu adolescentibus studiosis Philosophiæ præciperet. Sed Hieronymi satis sua sponte propensum ad utriusque juris scientiam animum, acrius etiam ad id studium impulit Julii Scarlatini Regiensis, amicitæ suæ viri, ac celebris L. C. a Philippo Decio laudati, hortatio; quem ille in parentis loco diligebat. Sed quantum brevi profecisset, primum factum est ejus rei periculum in concertationibus de jure civili, quibus Cardinalis Gabrielis Palæoti auspiciis publice se commisit; tum apparuit ex eo, quod dignus habitus sit, cui ab Antonio Gypsi, Berlingherii Card. Gypsi patruo, juris utriusque publice interpretandi facultas tribueretur, atque eodem anno institutiones juris civilis explicandi, in eo gymnasio, munus mandaretur. Postremo quantum sibi Bononienses, in ejus doctrina atque sapientia, præsidii constitutum esse arbitrarentur, illud ostendit, quod decies ac sexies, omnium suffragiis, cooptatus est inter Antianos; qui honos apud illos amplissimus putatur. Erat ad agendas causas aptus; erat civitatis regendæ peritus; sed docendi in primis munere delectabatur, quod nullum ab eo, sicut a ceteris, æternæ animorum salutis damnum metui diceret. At duos & quadraginta annos, quibus jux civile docuit, tanti ad eum concursus fiebant, ut non modo locus in subselliis mature occuparetur, verum etiam schola, atque adeo ambulacrum scholæ adjunctum, auditorum frequentia com-

compleretur; tantum a corona silentium fiebat, ut nemo ne mutire quidem auderet; tam multæ assensiones, tam crebræ admirationes oriebantur, ut, qui procul aspexisset, summum esse in schola magistrum & tanquam in scena Roscium intelligeret. Erat in eo Latine loquendi diligens elegantia, erat suavitas vocis, ac lenis appellatio literarum, adeo ut Dominicus Cæsarius, Rhetor insignis, non ferrea sed aurea eum esse bucca præditum, prædicaret; erat, in differendo, mira explicatio, argumentorum copia, in interpretando definiendoque acumen, ita, ut Hieronymus Manfredus juris consultissimus, juris civilis subtilitates plane ac dilucide explicandi laudem tribuerit. Verum ex hoc per annos quadraginta & eo amplius ad eum audiendum concursu ex tota Europa facto, ex hac ejus scholæ celebritate, & tanquam officina Jurisprudentiæ, tam multi prodire, quos Cardinales, Episcopos, Rotæ Auditores, Referendarios, Advocatos, Consistoriales, aliisque præcipuis muneribus functos, ætas hæc vidit, quos terrarum orbis in omnibus celeberrimis Italiæ gymnasiis jus civile docentes admiratus est, ut, si cui sit in animo, in singulorum enumeratione versari, dies unus non sit futurus satis. Patriam usque eo dilexit, ut sæpe luculentis conditionibus evocatus Firmum, Salernum, Parnam, Papiam, Pisas, Patavium, ut ibi doceret, nullum unquam lucrum, patriæ caritati anteponendum esse putaverit: quamobrem universus gymnasiū totius consensus duas illi tabulas, quibus nomen suum & familiæ insignia cum suis elogiis insculpta essent, defigendas curavit ad memoriam posteritatemque prodendam; atque Henrico Card. Cajetano, Bononiæ Legato, visus est idoneus in primis, cui fratris filiorum, Bonifacii & Antonii, qui postea Cardinales fuere, institutionem committeret. Omnes sere ad eum causæ deferebantur, neque ulla erat ita magna, ita gravis, quæ non ejus digna patrocinio videretur, nulla in tota Italia controversia oriebatur inter summos Principes, inter Resp. inter privatos, de qua (si de jure civili esset quæstio) aut solis, aut cum paucis arbiter non caperetur, aut quæ sua advocacy consilioque non dirimeretur. Itaque ejus semper domus hominum

frequentia redundabat, neque unius tantum erat perfugium civitatis, sed totius oraculum Italiz, unde omnes, qui in suis rebus dubiis maximeque perplexis, ex incertis certi, compotesque consilii discederent. At cum jam annos quatuor & quadraginta docuisset, jamque eum, confectum annis, vires deficere cœpissent, Ao. MDCXXII postulavit, ab Administratoribus Reip. Bononiensis, vacationem a docendi munere, qua ad eum usque diem, cum multo ante potuisset, uti noluerat; quam cum illi gravate concederent, peterentque ab eo, ut gymnasii illius honoris gratia, non nunquam, cum ipsi commodum esset, saltem suggestum ascenderet, negavit ille, se commissurum, ut collectam tot annis existimationem uno die amitteret. Quamobrem cum nihil proficerent, permiserunt illi, quid vellet ut faceret; ac suffectus est in ejus locum Franciscus Maria filius, qui jam annos sex in eodem gymnasio extra ordinem jus civile docuerat. Postremo, amissa primum uxore, sœmina lectissima sanctissimaque, ipse quoque, impositæ a natura hominum generi moriendi necessitati obtemperavit, cum jam inde ab anno MDCI testamentum fecisset, in quo quatuor virilis sexus liberos hæredes instituerat, eique ex illis bibliothecam legaverat, qui juris utriusque interpretandi facultatem adeptus esset. Quorum tres, qui patri superstites fuerunt, Franciscus Maria, Alexander, & Hyacinthus, omnibus patriæ suæ magistratibus, aliisque gravissimis muneribus functi, relictam a parente dignitatem, vitæ splendore, ac bonis artibus conservaverunt.

FEDERICVS CARD. BORROMÆVS.

Carolo Cardinali Borromæo vita functo, sive potius in cælum recepto, Federicus Borromæus, fratris ejus filius, sive publicis sive privatis de rebus, Romam venit; atque generis ejusdem claritas, virtutum, quæ in eo elucebant, splendor, & patrui, clarissimi sanctissimi que viri, nuper extincti memoria, Sixti V Pont. Maximi studium incendit, ad Cardinalatus dignitatem illi mandandam. Atqui ea erat hominis gravitas, ea
oris

oris dignitas, ea vultus modestia, ea inorum sanctitas, ut, quacunque incederet, tanquam patrui virtutum hæres, prætereuntium digito monstraretur. Cardinalis creatus non tradidit se languori atque desidie, nec, si paululum in aliqua cura negotioque versatus esset, quod reliquum erat temporis in amore ac voluptatibus collocabat, aut ludis aut conviviis tradebat, aut in aucupii ac venationibus conterebat, sed totum in literarum studiis exercitationibusque ponebat. Vigebat in ejus domo mos ecclesiasticus ac disciplina: nullus erat in ea locus ridiculis hominibus, aleatoribus, ac parasitis; sed honestis ac doctis viris semper ea patebat; nullæ ad eam libidines, nullæ voluptates commeabant, sed pudor, probitas, continentia, omniumque virtutum studia properabant; non interiores ejus aulae parietes sericis atque aureis vestibus tegebantur, non Attalicis peristromatis, non auleis, insanissimis preciiis emptis, induebantur, sed stragulis coriaceis, rubrica depictis, vestiebantur; non atria, non cubicula, non domus tota signis ac tabulis pictis, summorum artificum manu elaboratis, in quibus comparandis nullum libido hominum finem precio facit, exornabatur, sed probitate, sed honestate, sed gloria decorabatur; non omnes erant ad eum allegationes difficiles, non omnes ad eum aditus ardui ac pene interclusi, sed omnibus fere horis cuivis, adire volenti, obvii atque aperti. Quicumque sanctitatis doctrinæque laude præstarent, eorum amicitias appetebat, iis se dabat, cum eis familiarissime conjunctissimeque vivebat. Fuit illi familiaris ac proximus, literatus, ex rerum omnium humanarum ac sui ipsius contemptu, sanctitatis notissimæ vir, qui etiam domi suæ est mortuus; sed arctissimo in primis familiaritatis vinculo sibi devinctum habuit Philippum Nerium, qui postea in Sanctorum numerum relatus est; a cujus latere, quoad Romæ fuit, nunquam discedebat. Diligebat etiam plurimum, ex eadem sancti ejusdem patris familia, Juvenalem Ancinam, qui postea Salutarum Episcopus moriens, magnam, in opinione hominum, sanctitatis suæ famam reliquit, magnamque ex illius sermonibus, summa pietate doctrinaque repletis, delectationem voluptatemque percipiebat. Sed cum

Mediolanensis Ecclesiæ quasi navis, veteris Antistitis morte, suo gubernatore ac moderatore destituta alium exposceret, qui in ea tanquam in puppi sedens, clavum teneret; non fuit Clementi VIII magnopere laborandum, quemnam potissimum ex iis, quos tantæ spei imminere cernebat, eligeret. Namque erat in propatulo Federici Cardinalis virtus longe clarissima, quæ, suo fulgore, ceterorum lumen lucemque præstingeret. At homo sacrarum literarum peritus, qui non esset nescius, quantam in se negotii vim attrahant, quibus animarum cura impendeat, invitus ac recusans, ejus Ecclesiæ gubernaculis manum admoveere coactus est. Legi ego adolescentulus Augustini Valerii Cardinalis Veronæ longam ad eum orationem scriptam, qua gravissimis rationibus eidem persuadere conabatur, ut Pontifici imperanti manus daret, suumque ab eo propositum, quantumvis laudabile, expugnari vinctumque pateretur. Simul atque Episcopatum iniit, nihil ab eo factum est prius, quam ut corruptos clericorum mores emendaret atque corrigeret. Itaque multa sanxit, de vestibus, quibus uterentur, de coma ac barba, quam, ad certam rationem, resectam haberent, de conviviis, quæ nullo modo iniirent, de mulieribus, quarum consuetudinem usumque refugerent, aliisque de rebus necessariis ad recte honesteque vivendum. Ac tanta cum severitate Remp. administrabat, ut nemini delicti cuiuspiam, quantumvis levissimi, gratiam faceret, sed illud, ex legum præscripto, coerceret atque constringeret. Quam arbitror fuisse causam, cur ille non processerit honoribus longius. Metuebant jam illum omnes, ac verebantur ei, qui omnia sibi licere arbitrantur, ne si talem sibi dominum inposuissent, minus liberas omnium voluntates rerum essent habituri. Sed de viro clarissimo sæpius audiui, cum diceret, in primis obfuisse illi eam, quam habebat, ad omnes Religiosorum ordinum familias, offensionem atque fastidium, sive, quod ab eorum moribus abhorreret, sive quod ferre non posset, suæ eos jurisdictioni imperioque eripi. Itaque semper erat auctor, ut Pontificum Max. constitutionibus, illorum jura ac privilegia intra angustiorem fines concluderentur, suæque in eos

au-

auctoritas latiore campo extenderetur. Quod si rerum potius esset, nihil erat tam verendum, quam ne illos spoliaret tam ampla dignitate, ac victos Episcopis traderet; quæ res maximam in Remp. Christianam confusionem perturbationemque induxisset. Hinc fiebat, ut ad nulla eos munia adhiberet, sed eorum tantum sacerdotum opera uteretur, qui nullius religiosæ familiæ claustris continerentur; iis præsertim, quos vocant Oblatos, qui suam Episcopo Mediolanensi voluntatem, ad omnia ejus imperia exequenda, jurejurando habent adstrictam; hos ille diligebat, hos in oculis ferebat, hos officiis beneficiisque omnibus exornabat. Tunc insignem Bibliothecam, magnifico opere excitatam, erexit ac dicavit, omnibus cujusvis professionis libris, undique magno sumptu conquisitis, refertam, Ambrosianam ex D. Ambrosii nomine, Ecclesiæ illius tutelaris Divi, nuncupatam, quam duodecim sacerdotibus, omnium doctissimis, commisit; quos etiam collegii Ambrosiani doctores appellavit. Fuit ingenio præstanti, eruditione magna, eloquentia majore; & a summis suis occupationibus feriatum, non aliam animi remissionem habebat, præter hanc literarum humanissimam ac liberalissimam. Neque nulla ejus ocii ratio extitit; immo plura atque majora ab ejus animi remissione, quam ab aliorum negociis, hominum generi commoda provenire: ejus ocii fructus egregia illa opera numerantur, quæ ad communem attulit utilitatem, atque in conspectu luceque proposuit. Hæc sunt, sacra colloquia, Principum favor, divinæ laudes, sermones synodales, de Episcopo concionante, Meditantia literaria, de Christianæ mentis jucunditate, de sacris nostrorum temporum oratoribus; quæ non sine summa illius ingenii, doctrinæ, eloquentiæque admiratione leguntur. Sed demum, innumeris, pro Ecclesia sibi commissâ & tradita, tanta tamque longe lateque diffusa, laboribus egregie perfunctus, sanctissime moriens, ad optatissimos B. Caroli patrui sui complexus, ut ejus vita laudabiliter acta persuadet, excessit.

GVILELMVS SIRLETVS.

Quanta doctrinæ magnitudo, quantaque virtutum omnium exsuperantia, in Guilelmo Sirleto extiterit, ut cetera alia argumenta desint, ex eo manifeste perspicitur, quod sacer purpuratorum Patrum senatus, magnum ordini suo splendorem ac decus accessurum existimavit, si illud ingenium, illa humanitas, illa virtus, in ipsorum numerum venisset. Quamobrem universi a Pio IV Pont. Max. in beneficio & gratia postularunt, ut cum quamprimum cooptaret, nec diutius tantum bonum collegio suo deberi pateretur. Ortus est Stili in Calabria, non summo ille quidem loco sed honesto, atque a parvo, parentis diligentia, qui & ipse quoque erat cupidus literarum, omnibus ingenuis ac liberalibus doctrinis eruditus. Verum, qua erat ingenii docilitate atque præstantia, ita exquisitam, ita perfectam, trium linguarum, quæ ceteris præstare putantur, intelligentiam affecutus est, ut nihil in eis sciri discere possit, quod ejus notitiam effugeret. Itaque sic Hebraice, sic Græce, sic Latine loquebatur, ut in unaquaque earum linguarum natus videretur, sic in pronunciando proprium suæ cuique linguæ adhibebat sonum, ut appareret, in ejus oratione nativum quandam colorem esse, non ascitum. Deinde assidua sanctorum Patrum lectione, longa sacrarum literarum observatione, tanta divinarum rerum scientia pectus compleverat, ut non modo omnium facile princeps haberetur, qui in eodem studii genere totos se collocassent, sed tanquam ærarium esse diceretur, ubi divinarum disciplinarum opes omnes divitiæque, tanquam uno in loco, constructæ essent atque reconditæ. Illud autem mirabilius fatendum est, quod summam rerum, de quibus diximus, scientiam cum incredibili morum sanctitate vitæque innocentia conjunxit; ut non satis constaret, utrum ille doctior an melior vir esset: quæ res eo majorem in illo laudem habet, quod omnibus sæculis inventi sunt admodum pauci, in quibus vita impura, ac flagitiis omnibus inquinata, non omnem ingenii commendationem ever-

everteret. Atque adeo omnibus Christianis virtutibus floruit, ut nihil ferme illo fuerit in eis excellentius: ac primum de ejus in pauperes amore plura testimonia possemus referre; sed duobus erimus contenti, ex quibus facile conjici potest, quantus, ad eorum necessitates sublevandas, apud illum ardor studiumque flagaverit. Etenim cum ex nimia in eos liberalitate omnia profudisset, neque quidquam sibi reliqui fecisset, præter vestes, quibus induebatur, pauperum uni, qui nuda brachia proferebat, detractam sibi subuculam tradidit, ut se illa contegeret; alteri, quem nudis item pedibus ingredientem aspexerat, calceos, quibus tum utebatur, detulit; atque suis edixerat, ut si, in erogandis elemosynis, nummi defecissent, bibliothecam suam, carissimo emptam, divenderent. Obedientiæ vero, quam nunquam reliquerat nec abjecerat, tum divinis imperiis obtemperando, tum superiorum voluntati obsequendo, adeo erat diligens, ut, si quam in aliis aspexerat, in ea chamorea & admirationes efferret. Nam cum S. Philippus Nerius die quodam, una cum octo e suis domum salutatum ad eum venisset, Sirletus sellas poposcit, quibus illi se commendarent; vetuit sanctus pater eas asserri, ac nihil sellis esse opus ait; atque eadem opera jussit omnes circa humi sedere; quæ res cum ad nutum & voluntatem ejus facta fuisset, admirans Sirletus, exclamavit, o sanctam obedientiam, quantam vim habes in hominibus probis ac rectis, præsertim si accessit studium & disciplina? At, demissione animi quanta fuerit, quamque, cum tot virtutum laudibus abundaret, nihil de se elate ac magnifice senserit, ex hoc uno intelligi potest, quod cum Pius IV, Amplissimorum Patrum senatus, honoris gratia, a quo enixe postulabatur, ut diximus, eidem, de eo Cardinali eligendo, perspicua sua consilia fecisset, restitit quantum potuit, ac, ne eligeretur, elaboravit: novo animi demissioris exemplo; id, ultro sibi oblatum, recusavit accipere, quod aliqui per ignem ferumque petunt. Sapiens videlicet homo solus intelligebat, quanto majus esset, summos honores fastidire, quam accipere. Sed non aliam decebat urbem quasi theatrum esse illius ingenii, præter urbem Romanam, ut

non

non unius modo oppidi civibus, sed omnibus nationibus ac populis spectaculo esset. Et sane, Deo ipsi favente, accidit, ut Romam veniens, in eam domum reciperetur, non quæ virtutem depressam vellet, sed quæ, eandem in altum efferri percuperet, non quæ pessimis exemplis, ejus nitore tenebras offunderet, sed quæ optima disciplina ac sanctissimis moribus eidem lucem afferret. Etenim exceptus est in aulam Cardinalis Cervini Politiani, qui postea creatus est Pontifex, Marcelli II nomine; a quo, si vita suppeditasset, exornatus fuisset ex suis virtutibus; sed breve tempus ejus augendi exornandique fuit: nam summus ille Pont. morte extinctus celeri est, vix diebus undecim post eum diem, quo fuerat ad id fastigium evectus. Nec postremum tenuit locum amicitiae & gratiae apud Paulum IV, qui Marcello successerat; a quo & ad interiora ejus consilia admittebatur, & in recitandis horariis precibus socius adhibebatur. Sed denum Pius IV, multis cumulatam honoribus, ad eam amplitudinem perduxit, quæ summæ est proxima. Nam & Protonotarii munere decoravit, & S. Marci primum, deinde Scillaciensi Ecclesiæ, Episcopi jure præfecit; postremo in amplissimum Cardinalium collegium adlegit; inmo eum, ut diximus, augustissimo illi senatui, sedulo postulanti, concessit. Laudatur eximie a tribus summis viris, a Mureto, Rescio, & Lipomano. Carolus vero Card. Borromæus tanti hominem fecit, ut post avunculi mortem, summam dederit operam, quo in ejus demortui locum subrogaretur. At quis est, qui non putet, cuivis illum homini placere oportere, qui tantopere Borromæo probatus sit? At quo erat in pauperes amore, nunquam S. Laurentii in pane & perna Ecclesiam deseruit, quæ ipsi, cum Cardinalis crearetur, obtigerat cum ad honestiores pinguioresque transeundi facultas daretur, quod inclytus ille Martyr, in sublevandis Christi pauperum necessitatibus, eodem quo ipse studio flagrasset. Multa ex Metaphrasæ in Latinum sermonem convertit, plura etiam alia doctissime scripsit, quæ, cognatorum negligentia bibliothecæ Vaticanæ custodiis inclusa, nondum communem lucem aspexerunt. Obiit unum ac septuaginta annos

annos natus, ac sepultura affectus est in ea S. Laurentii
Æde, quam diximus, anno MD LXXXI.

TRAIANVS BOCCALINVS.

TRajanus Bocalinus, Romanus, novam se invenisse
viam gloriatur, quam Philosophiæ cupidi sequan-
tur, non salebrosam, scruposam, & sentibus obsitam ut
antea, sed placidam, voluptuosam, amœnam, floribus
herbisque depictam, vel potius philosophicarum se
rerum acorem, insuavem ac molestum, lepidis ac præ-
dulcibus inventis, tanquam saccharo, condiisse, ac bolum
conflasse dulcem simul acidumque, qui satietati fastidio-
que medeatur, ac, gustatui præter modum jucundus,
impura & immunda secernat ac depellat. Sed re verà
homo inflatus ac tumidus, hac in re plus aliquanto sibi
tribuit, quam veritas & ratio patiatur: nam aliquanto
ante Nicolaus Francus, homo natura maledicus (quod
illi infelicitè cessit) & Caporalis poëta facetus, hanc
primum philosophandi viam aperuerunt; sed Boccali-
nus, omillis ceteris, hanc unam persecutus est, ac novam
in Parnassi vertice civitatem instituit, cui præesset Apol-
lo; poëtarum Deus, apud quem judicem, tum literati
omnes de suo inter se jure contenderent, tum de Princi-
pum ac privatorum negotiis referretur; cujus ad arbi-
trium judiciumque summum omnium rerum rediisse
narrabat; quorum ille hominum res gestas, vel laudibus
efferebat, vel infamia notabat, prout laude vel vitupe-
ratione digna viderentur; quæ res a famosis libellis non
ita longo intervallo disjungitur. Atque acta ibi omnia,
ad nos perlata, tanquam divulganda curabat. Quæ
scribendi ratio, adeo illi elegans, adeo expetenda visa
est, ut ad eam, si diis placet, amplectendam quicumque
ingenio & eruditione præstent, hortetur. Sed nemini id
fano persuadebit, nisi cui vel scapulæ pruriant, vel quos
vivendi fastidium, vel satietas capiat. Namque nimia
hæc in principes viros, qui propter imperium metui ex-
petunt, atque in privatos honestos viros, invehendi li-
centia, denique vel in fustem, vel in nervum, vel in
crucem erumpit. Equidem sapientiam istam, quæ con-
jun-

juncta est cum existimationis vitæque periculo, nihil moror: malò enim tutam inscitiam, quam periculosam doctrinam. At quem ille, ex hac sua præclara docendi ratione, Venetiis exitum vitæ iuenerit, dicant ii, quibus id notum est magis, quam mihi, qui non interfui. Verum elegans admodum atque amœnum a natura ingenium obtinuit; quod etiam multarum rerum eruditione ac scientia expolivit atque auxit. At in ea præsertim arte fuit excellens, quæ in Rebus publ. in civitatibus rectè administrandis tota versatur: & in quadam ad Scipionem Card. Burgesium scripta epistola, se commentarios in Cornelium Tacitum editurum, spondet, qui nondum apparuerunt; quos ego commentarios, pro singulari hominis ingenio, omni elegantia doctrinaque refertissimos esse, non ambigo. At qui se aliis Reip. bene gerendæ ducem ac magistrum profitetur ac præstat, in iis oppidis, quorum illi administratio commissa fuerat, regendis, suis ipse præceptis non paruit, sed multa, ut ajunt, commisit, quæ ab illorum rationibus essent aliena. Quamobrem fiebat, ut Romam crebrè de ipsius injuriis quarimonix deferrentur, ac locus proverbio fieret, quo dicitur, tria esse hominum genera, qui nihil fere legibus, quas ipsi aliis imponunt, utantur, nimirum Juris consultos, medicos, atque theologos: nulli enim magis in negociis ab jure, ab æquitate, discedunt quam I. C. nulli tuendæ valetudinis rationem minus servant quam medici, nulli conscientix aculeos minus metuunt quam theologo. Itaque qui justitiam, valetudinem & conscientiam amittere satagunt, Juris doctorum, medicorum, theologorumque amicitias colat: quod tamen de iis tantum intelligendum, qui ea studia non serio ac sedulo, verum in speciem, & dicis causa, profitentur.

NICOLAUS MASINVS.

PAUCOS, ac vix paucos proferre ex omnibus possumus, qui, nostra memoria, literarum studia coluerint, in quos plura virtutum omnium ornamenta conuenerint, quam quæ in Nicolao Masino Cæsenate exte-

serunt; quibus ille, non patriæ solum suæ, Æmilieque, sed Italicæ etiam universæ, dignitatis ac splendoris plurimum attulit. Etenim tum hæc politissimæ in eo literæ eminebant, quæ ab humanitate nomen invenerunt, tum illæ, quæ recondita in arte summaque rerum in obscuritate versantur, mathematicæ nimirum philosophicæque disciplinæ, se efferebant; ac medendi præsertim arte, in qua excellebat, complurium, tum æqualium tum superiorum, qui magnum in ea nomen habuerunt, famam & gloriam æquavit. Quorum studiorum cupidissimus fere ab ineunte ætate, Patavium se contulit atque præstantissimis magistris in disciplinam tradidit, a quibus, omnium bonarum rerum instructu ornatuque refertus, est dimissus in patriam, ut, quæ in medicina didicerat, ad usum utilitatemque suorum civium aliorumque transfertet; in quo adeo erat felix, ut fere innumerales, periculosissimis implicitos morbis, ex ancipiti levaret. Quo fiebat, ut non solum sui cives, sed alii etiam, ac viri præsertim principes, ad quos ejus virtutis fama emanarat, in dubiis suis ægitudinibus, ab eo opem atque auxilium expeterent. Quamobrem in omnibus fere consultationibus medicis, una cum Mercuriali, Cardano, aliisque summis ætatis suæ medicis, in consilium adhibitus, suam de re proposita sententiam dicebat. Sed in nemine magis quam in illo id verum esse apparuit, quod dicitur, nullam esse sapientiæ vim tantam, in quam non aliquis stultitiæ rivulus influat, cum eaque permisceatur. Nam fuit varius, singularis, &, quibusdam in rebus, propior stulto, quam sapienti. Cujus rei plura possunt argumenta proferri; sed illud numeratur in primis, quod cum Clemens VIII, ejus virtutis fama compulsus, dandas ad eum literas curasset, ut, quod ejus comodo fieret, Romam veniret; capere enim se ejus opera in tuenda valitudine uti; ille, sumpto spacio ad deliberandum, rem ad famulam, Sanctam nomine, detulit, cui ille magnam rerum suarum fidem habebat, & omnem rem domesticam, omnia consilia credebat, & quod illa dixisset, non semellam nescio quam, sed Delphis Apollinem locutum esse, arbitrabatur; cujus ea fuit sententia, ut se loco non moveret, atque ubi juventutem ha-

habuisset, ibi senectutem ageret. Itaque, de famula sententia, rescripsit Pontifici, se maximas illi gratias agere; sed ea esse jam ætate, quæ cupidior esset quietis quam laboris, oculi quam gloriæ; eam ob stare, quo minus ultro delatum sibi beneficium acciperet. Quod cum fecisset, non irridicule urbani quidam homines dixerunt, apud Masinum plus auctoritatis ac ponderis habuisse Sanctam, quam Sanctitatem. In eo vero miros de se ludos dabat, quod, si quando iter aliquod suscipiendum esset, simul ut in tabernam diversoriam veniebat, continuo sua manu accuratissimum conficiebat indicem, non rerum modo quas secum ferebat, etiam vilissimarum, ut acus, ligulæ adstrictoriz, & his similibus, sed equorum quoque, canum, hominumque, qui erant in comitatu, quorum ipse erat princeps; deinde cum profectionis tempus instabat, sumpto in manus indice primum recensabat hominum capita, unumquemque magna voce appellans, atque initium faciens a se ipso, clamabat, Nicolaus; qui sibi respondebat, Adsum; & deinceps idem faciebant alii, ab ipso vocati: & quoniam equis canibusque nulla erat vox, qua responderent, Adsumus, alius, cui hæc provincia demandata erat, illorum partes gerebat, suamque illis ad respondendum vocem accommodabat; tum ab animantibus veniebat ad sarcinas, ac multo maiore diligentia sigillatim unamquamque rem suo ordine repetebat, cavebatque, ne quid desideraretur. Risus etiam omnium excitatus est in eo, quod Cæsenæ, quo anno Consul fuit, omnibus audientibus dixit. Venerat ad eum, questum, cætarius quidam tenuis ac miser homunculus, quod vectigalium ejus civitatis redemptor stateram ab ipso abstulisset, eoque nomine multam peteret, quod eam diceret obsignatam non esse, cum esset perspicuum, illius in ea signum hæzere; Masinus miseratus hominis inopiam, accessit ad se iussit redemptorem illum, rogavitque, cur stateram illam damnaret, quam suo obsignatam esse signum videret? Cui redemptor, non satis fuisse, respondit, semel imprimendam eam curasse, sed id quoque faciendum fuisse singulis annis; idque in suis privilegiis expressum contineri. Quæsit ille rursus, quisnam is

cum

eum privilegijs exornasset; Pontifex, ait ille; tum Masinus, Bene inquis, ego quoque nihil ab eo rectius factum esse dico; tum conversus ad eos, qui ipsi assidebant, Ne istuc quidem, ait, apud Orcum a diabolo committeretur. Nihil æque horrebat, ut aquæ vinique nivati haustum, atque in ejus odium, librum edidit, quem inscripsit, de gelidi potus abusu: in quo multis rationibus conatur ostendere, quam sit incommoda valetudini ejusmodi consuetudo. Complura etiam alia docte eleganterque conscripsit; sed eorundem edendorum spacium illi non fuit; quæ una cum magno veterum numismatum numero, in ejus bibliotheca, quæ apud hæredes ipsius etiam nunc visitur, jacent in tenebris, muribus blattisque ludibrium.

FEDERICVS BONAVENTVRA.

EA est in studiis literarum jucunditas, ea delectatio atque suavitas, ut earum cupidos, a corporis voluptatibus, ab ambitionis labore, a pecuniæ studio avocet, totosque individuo quodam amoris nexu sibi constringat atque connectat. Verum suam vim, si in quoquam alio, nostro seculó, in Federico Bonaventura declarant; quem non quies, non remissio animi, non infinitus aulicarum rerum labor, non domesticarum sollicitudo, non susceptæ, ut fit, in adolescentia cum fortibus viris inimicitiz, retardare potuerunt, quo minus duodecim singulis diebus horas, amœnissimæ liberalissimæque studiorum occupationi tribueret. Hic Urbini, nobili in primis genere ortus, patre amisso, strenuo copiarum duce, exceptus est in domum Cardinalis Urbini, qui patrem unice dilexerat, admodum puer, atque una cum Marchione a Ruere æquali suo institutus liberaliter educatione doctrinaque puerili, tum in aulam Francisci Mariæ, Urbinatum ducis tractatus, in equitandi arte, in ludicra armorum tractatione, & in aliis militariis studiis, se exercuit, quæ in viro nobili requiruntur. Sed in primis ita discendi cupiditate flagavit, ita Philosophiz, qua Dux ille, cui serviebat, plurimum delectabatur, amore exarsit, ut sponte sua, ac nemine mon-

strante, ad intima ejus cubilia penetrarit, seque cum ea conjunxerit, ac fecit idem in Græcis literis, quas cum maximo adjumento ad Philosophiam & ad ceteras bonas artes fore animadverteret, qua erat ingenii docilitate, celeriter arripuit, atque in eis perfectus evasit; quo lumine, ad multa Aristotelis loca, densissimis obsita tenebris, & a nemine adhuc percepta, illustranda accessit; ejusque poëticam non esse inchoatam & mancam, sed absolutam atque perfectam, si unicus tantum locus excipiat, ostendit. Quæ res, apud doctissimum & sapientissimum Ducem, magnum ei amorem & gratiam conciliabat: nam suis eum consiliis intimum habebat, in maximis rebus adesse jubebat, multumque ejus auctoritate movebatur: at quanto eum sibi ornamento esse existimaret, tum præsertim declarabat, cum legationes omnes, quæ essent illustriores, videlicet ad Gregorium XIV, ad Margaritam Austriacam, ad Ducem Sabaudia, aliosque summos viros, per ipsum administrabat; quas ille diligenter obeundo, fideliterque administrando, quantum consilio, doctrina, eloquentiaque valeret, ostendit. Tantus enim, ut in Pericle, ejus in labris lepos aderat, tanta in ejus sermone, ad capiendos detinendosque hominum animos vis erat, ut in eis, quibus cum loqueretur, quasi aculeos quosdam relinqueret, qui in sui amorem eos impellerent. Sed cum videret, fere omne suum tempus aulam cripere, in qua ita magnæ de rebus levibus esse occupationes solent, ut non multum aulico, ab officiis, ocii ad celebranda literarum studia relinquatur; summa ope petiit, a Duce, ut se missum faceret, ac suo more vivere siceret; quo impetrato, rursus se totum in literis abdidit, ibique librum, qui circumfertur, de Ventis, cum aliis opusculis eidem adjunctis, composuit. Sed tantum Ducis beneficium non licuit illi esse diuturnum; nam revocatus est ab eo rursus in aulam; qui postea Dux cum animadverteret, quantum damni bonæ literæ facerent, si tale ingenium, seriatum a studiis, hebescere & languere cogeretur, honorifico attributo stipendio, permisit illi, ut domi suæ, quanto majore studio posset, in omnium doctrinarum meditatione versaretur. Ex hac igitur tanta ocii abundantia,

il-

illa etiam tanta librorum copia profluxit, quæ in lucem edita, per eruditorum manus volitat; illud nempe opus de octomestri partu, summa eruditione refertum, de Hippocratici anni partitione, de monstris, de æstu maris, de calore cæli, de via lactea, de cane rabido, in Themistii paraphrasim, de jure regni liber; cui ne postremam adderet manum, intempestiva mors, qua, annos septem super quadraginta nec eo amplius natus, surreptus est, obstitit. Ac ne fecundior ingenii, quam corporis viribus videretur, ex uxore Penthesilea Carpegna duodecim liberos suscepit, cui, propagandæ sobolis causa, nupserat, ne tam nobilis familiæ opes, quæ se uno nitebantur, conciderent.

SEBASTIANVS MACCIVS.

NEmini, quem quidem noverim, tanta, tum soluta oratione, tum versibus, Latine scribendi facilitas & celeritas contigit, quanta in Sebastiano Maccio extitisse narratur. Hic castri Durantis, quod nunc Urbania appellatur, ortus, puer humaniores literas ac Rhetoricam didicit a Livio Vitali Orosio Spoletino, quem longo intervallo superavit; tum ad Philosophiæ, Theologiæ, ac juris utriusque studia se contulit: quibus disciplinis cum egregiam & assiduam operam dedisset, quinto & vigesimo ætatis suæ anno, earum unamquamque publice interpretandi docendique facultatem, ut mos est, Maceratæ accepit. At quantum in earum singulis notitia intelligentiæque processerit, declarant in primis libri, quos de iis rebus omnibus scripsit. Sed cum elegantissimis ac politissimis literis sibi rem magis esse existimabat, ad quæ majora a natura adjumenta ac propensionem acceperat. Itaque, omisis ceteris studiis, in hoc uno dies noctesque urgebatur, ac multas res quotidie, tum soluta oratione, tum versibus, diligenter elaboratas afferebat. Solutæ orationis illa feruntur in primis, de Historia scribenda liber, de Bello Asdrubalis, de Historia Liviana volumen satis amplum, aliudque non minus magnum in Virgilium, quo conatur ostendere, quantum vir ille, poetarum facile princeps, præ-

præter poëticæ facultatis laudem, ad quam adspirare nemini licet, in omni doctrinæ & eruditionis genere, præstitit; Varie lectiones, in duo volumina distinctæ; de portu Pisaurensi, quem Urbini Dux, Pisauri, operis sumptuosissimis fecit; tum mirum hominis laborem & industriam declarant inscriptiones antiquæ, tota ex Italia collectæ, atque uno volumine comprehensæ: cujus laboris suscipiendi occasionem & facultatem obtulit illi docendi humaniores literas munus, quod in omnibus fere illustrioribus Italix gymnasiis sibi traditum implevit. Latinorum autem versuum, ad quos consiciendos majora etiam quam, in soluta oratione, habuit instrumenta naturæ, tam magnū numerum fudit, ut vix proximum vero videatur, potuisse illum ab uno, etiam si ejus ætas supra centum annos exisset, exarari. Quod enim ille poësis genus non attigit? quod non graviter eleganterque tractavit? Pastoriciæ primum fistulæ labra admovit, & elegantibus eclogis rura ac pascua cecinit, e quibus volumen justum confecit. Tum grandiori ac pleniori voce, iminaturum Curtii Michalori, adolescentis optimi, in quo magnatum spem majores natu dignitatis suæ collocarant, interitum deploravit eleganti carmine, cui nomen est Curtius; in quo, multa cum venustate atque lepore, audita illius morte, omnium fere fluminum concursum ad Metaurum esse factum, exponit, ut consolando atque æque dolendo ægrum & afflictum, tali cive alumnoque amisso illius animum sublevarent: deinde longo carmine, artis ac venustatis pleno, Christi Salvatoris nostri vitam, id quod antea Vidas, sed multo paucioribus versibus, fecerat, texuit; illudque carmen Soteridi nomine appellavit; ne videlicet, sicut argumentum, ita etiam & nomen a Vida mutuassee videretur. Quid verbis opus est? tam multa in scribendo opera fecit, ut in dexteræ manus pollice atque indice, qua ab eis parte calamus adstringitur, ex assidua illius tractatione, duo quasi sulci alte impressi conspicerentur. Verum, id quod raro contingit, tantam virtutis indolem, tantamque ad optimas artes propensionem, transmisit in filios, quos ex uxore sua suscepit; quorum ille, qui virilis erat sexus, exceptum paternæ virtutis semen ita alu-

aluerat, ut tanquam herbescentem ex eo viriditatem eliceret, quam etiam adultam, ad frugem perduxisset, sed mors immaturo eam funere messuit: nam annos natus duodeviginti, Doctoris & Magistri insignitus honore, ac nomine, obiit: ex duobus autem feminis, ejus, quæ monasticam amplexa est disciplinam, epistolæ aliquot Latine leguntur. Atque earum utinam parens, diuturnioris usuram vitæ habuisset; (nam annum agens septimum supra quinquagesimum, desistit vivere;) nam ille, quæ egregie inchoaverat multa, ad absolutionem perfectionemque perduxit. Laudatur ab omnibus hujus ætatis, qui in aliquo literatorum numero fuerunt, ut a Justo Lipsio, Bonciario, aliisque.

GALILÆVS GALILÆVS.

Inter eos, qui bene atque præclare, virtute ingenii, maximarumque rerum scientia, nostra memoria, de Florentinæ civitatis nomine ac dignitate meruerunt, primum sine dubio locum ac numerum obtinet Galilæus Galilæus, Florentiæ nobili ac vetere prosapia, non tamen legitimo toro, natus. Etenim quisiam est in toto orbe terrarum locus ita remotus, ita a nobis locorum intervallo disjunctus, quæ natio tam efferrata, tam barbara, ubi aliquis sit bonis literis honor, in qua Galilæi nomen, omnium sermonibus ac literis, summa civis ejus patriæ, quæ talem virum genuit, honore ac laude non usurpetur? Sed quid miramur, tantam hominis virtutem orbem omnium peragrasse terrarum, cum tubæ se inventæ præsidio, tanquam curru invehens, atque in sublime elatus, per immensas cæli regiones evagaverit, clarissimum solis jubar adierit, atque umbris similes in eo maculas deprehenderit, intra Lunæ, aliena micantis luce, spheram penetraverit, & latos in ea campos & colles & valles inspexerit, æthereos omnium siderum orbes obierit, ac novas in eis stellas, quas Mediceas, ex Principum suorum cognomine, appellavit, invenerit? Atque utinam, cum res tantas, tantoque intervallo ab adspæctus judicio remotas contempleretur, imbecillitatem oculorum, qui in rebus propinquis atque perspi-

cuius sexpenumero hallucinantur, in consilium adhibere voluisset; nunquam profecto, se vidisse ea, quæ non vidisset, affirmasset, neque ea, quæ sacrarum literarum testimoniis, sanctorum Patrum consensu, ac fidei catholicæ veritate nituntur, libris editis convellere ac labefactare conatus esset; præterea non habuisset necesse, a Quæsitore fidei, Romam evocatus, palinodiam canere, ac cælum moveri, terram autem stare, contra id, quod docuerat multis audientibus, palam asserere: quamquam non id tum primum ab eo excogitatum & inventum sit; nam alii multo ante, fortasse ingenii acutiendi declarandique causa, se in hæresi esse assimularunt. Verum, quamvis singulare hominis ingenium, ob ejus venustatem formæ amœnitatemque, simul, ut aspectum, adamatum sit etiam, tamen ubi suum illud admirabile oculare in medium attulit, ejus ope longissime oculorum acies intenderetur; ita ejus nomen celebrari omnium sermonibus cœpit, jam ut nihil sit eo illustrius, neque celebrius. Nam cum olim Patavio, ubi octingentorum aureorum stipendio mathematicas disciplinas juventuti tradebat, venisset Venetias, admonitus est a quodam patricii ordinis viro, in Germania inventum esse oculare, quod oculis admotam, res quantumvis remotissimas, ea qua essent magnitudine, aspicienti subiceret, ille, qui fortasse jam diu hoc saxumolvebat, simul ac domum se recepit, fistulæ plumbeæ, ex organo detractæ, vitreos varii generis orbes ad certum intervallum accommodavit, unde eventum sibi ex sententia processisse cognovit; itaque alacris ad nobilem illum virum accurrit, a quo primum, tum ab aliis deinceps multis sui ordinis, summa eorum cum admiratione & Galilæi laude, factum est ejus ocularis periculum in turri campanaria S. Marci; qui omnes uno ore fuerunt illi auctores, ut Senatui adiret, deque suo illo tam admirabili invento ipse doceret; fore enim, ut patribus illis amplissimis rem gratissimam faceret; neque prædictionem fefellit eventus: nam adeo illo delectati sunt munere, ut ex S.C. veteri singulorum annorum stipendio ducentenos aureos nummos alios addiderint. Atreversus Patavium, totum, ad opus suum expoliendum,

dum, se contulit. Jam in omnes Italix, Hispanix, Gal-
 liz, atque adeo Europæ totius oras, Galilæi nomen ema-
 narat; jam notum erat omnibus, ocularis a se inventi
 ope, novas in cælo stellas orbesque, omnibus ante sæcu-
 lis obstruças ac reconditas, esse detectas, palamque pro-
 latas; jam elegantissimus ille Nuncii Syderii titulo in-
 scriptus ab eo liber exierat; cum hac fama compulsus
 Magnus Etruriæ Dux accersivit eum Pisas, ut mathe-
 maticarum artium Doctoris ac Magistri nomine, cen-
 tenos singulis mensibus nummos argenteos magnos,
 quos liminas vocant, acciperet, alterum vero, quem
 vellet, muneris sui vicarium, & tanquam hypodidasca-
 lum sibi sufficeret: quam ipse tam luculentam condition-
 nem, bona Senatus Veneti cum venia, libens accepit;
 quæ tam insignis liberalissimi in eum Principis benigni-
 tas, nunquam, quoad vixit, clausa est; ejusque benefi-
 cio, nullius rei egens, patrio sermone, complures per-
 tinentes ad Mathematicam libros composuit; in his,
 Dialogum de systemate mundi, in quo execrandam il-
 lam suam de terræ, circa cæli orbes, nullo agitados mo-
 tu, conversione sententiam aperuit. Quatuor ferme &
 octuaginta complevit annos, quorum postremos, lumi-
 nibus orbatus, in tenebris vixit. Obiit in villa agri Flo-
 rentini; cujus fines ne excederet, Quæstorum fidei sen-
 tentia cautum fuerat, in pœnam, quod Sapientia ipsa, a
 qua a principio mundus constitutus est, sapientior esse
 affectasset.

MARCELLVS IOANNETTVS.

Multi profecto atque præstantes in omni fere lite-
 rarum genere fructus ex Marcello Joannetto A-
 sculano percepti fuissent, si, quemadmodum in eo osten-
 debantur, ita pervenire ad maturitatem suam potuissent.
 Magnum hominis ingenium, multæ in eo literæ nec
 vulgares, egregia ad poësim indoles; sed sicut in agro
 pingui ac fertili segetes, cum maximam uberrimæ mes-
 sis spem afferunt, si subita de cælo calamitate seriantur,
 tanquam decoquunt, & quasi debitores, qui rem frege-
 rint, neque sœnus neque sortem reddunt; ita etiam, quæ

in eo studiorum sese spes dabant, cum maxime ad summam laudem efflorescerent, imminuta morte fractæ convulsæque interciderunt. Gregorio XV Pont. Romam venit, quo tempore nobilissima illa Academia, ex optimorum ingeniorum floræ collecta, advocavit ad se omnes ex Italia, qui magnum in literis nomen haberent; cumque ille egregium ingenii in ea sui specimen dedisset, ab invidis & obrectatoribus, qui se esse rerum omnium primos cupiunt, livido nigroque inspectus est oculo; ac memini, tum elegantissimos ab eo elegos, clarissimis illustrium sententiarum luminibus splendidos, fuisse emissos, qui ne pervenirent in eorum manus, ad quos rerum summa redierat, quique amœnissimis hominum ingeniis delectabantur, magna data est opera ab iis, qui ingenii apud eos fama pollebant; quod nimirum vererentur, ne ipsorum splendor, carminum illorum fulgore, præstingueretur, vel minores imposterum haberentur. Edidit interea lepidissimos, ac plenos sententiosis vibrantibus rhythmos, qui extant. Sed tandem a mansuetioribus Musis, quæ neque ad opes neque ad honores perducunt eos, a quibus coluntur, transtulit sese ad juris civilis studia, in quibus fertilis esse cultura existimatur; ac Jo. Baptistæ Covino, Rotæ Romanæ Auditori atque Decano, fuit a studiis; quo in labore, morbo sublatus, interiit.

FRANCISCUS DIOTALLEVIVS.

Nobilis totaque Italia celebris Ariminensium civitas, nullique Æmilie urbium, splendore & claritate, inferior, familie Diotalleviæ plurimum debet; quæ præter nominis antiquitatem, nobilemque progeniem, multos semper domi militiæque præstantes armis belli ac doctriinæ gloria viros edidit, quorum singuli singulis civitatibus ornamentum & decus possent afferre; in quorum commemoratione versari si velim, longius ab incepto distraherer. Quamobrem in præsentia in uno Francisco hærebo, quem nostra ætas omnibus insignem laudibus vidit. Atque, ut primum illum ætæ sanctissimum honestissimumque prætermittamus,

mus, pueritiam videlicet, quo tempore, quæ a magistris prima illa puerili institutione traduntur, arripuit, adolescens Romam invenit, ut in gymnasio Rom. Soc. Jesu, iis primum studiis, quibus homines informari ad humanitatem solent, tum Philosophiæ ac Theologiæ artibus erudiretur. At quantos in humanioribus studiis profectus fecerit, ex poematis quibusdam suis licet conijcere; quæ quia a mediocritatis terminis, intra quos non licet poetæ consistere, longissime absunt, summo pere laudantur. Ab horum amœnitate studiorum ad latissimos fructuosissimosque Philosophiæ ac Theologiæ campos excessit; in quarum facultatum sphaeris ita versatus est, ut nullum reliqueris in iis locum ita amplum ac magnum, quem non peragravit, ita abditum atque reconditum, quem non perlustraverit, ita arduum atque difficilem, quem non superaverit. Cujus rei, præter quotidianas disputationes, easque, quæ pompæ & ostentationis magis quam pugnæ ac certaminis rationem habent, quæ universo pene amplissimorum Cardinalium collegio præsentate celebratæ sunt; periculum factum est in triduanis illis Philosophicis concertationibus, cum sine magistris cujusquam ope patrocinioque, solus in arenam descendit, & omnibus, qui vellent secum cominus rationibus, tanquam hastis, pugnare, disputandi potestatem fecit: in quod certamen cum ex omnium Religiosorum aliorumque ordinum hominibus doctissimi & acutissimi quique venirent, & totis in eum viribus, fortissimorum argumentorum tela torquerent, ita fortiter animoseque eorum vim impetumque excepit ac rejecit, ut omnium, qui aderant, sententia, sit judicatum, neminem eorum, qui tum collegii Romani, Soc. Jesu, scholas frequentarent, homini in primis studioso, & ad perdiscendum acerrimo, ingenii judicii acuminis anteire. De cujus facultate judicare plenius licet ex libro, quem unicum edidit, de auxiliis, qui inscribitur, Opusculum de concursu Dei ad actus liberos voluntatis creatæ; in quo ita receptam a Theologis Patrum Soc. Jesu, de divinis ad salutem hominum auxiliis, sententiam tuetur ac firmat, ut F. Nicolaus Riccardius, cognomento Monstrum, Sac. Palatii Apostolici Magister,

ster, fateri sit coactus, neminem adhuc extitisse, qui gravioribus argumentis contrariam opinionem, in quam cuncti omnes, qui in D. Thomæ verba jurarunt, convellere ac labefactare sit conatus. Dolavit insigne aliud opus, de usuris, sed non perfecit; quod ne ad absolutiorem perfectionemque perveniret, primum fecit ejusdem occupatissima, & publicis ac privatis amicorum distracta negotiis vita: nam S. Angeli, quæ est urbs regni Neapolitani, sacerdotalem cathedram, Episcopi honore ac nomine tenuit, & in regno Poloniæ, sedis Apostolicæ functus est munere; qui honos iis tantum demandari solitus est, qui insignis prudentiæ, rerum usus, & nobilitatis laude præstent; quod ex res in remotissimis illis urbis terræ partibus, ad tutandam amplificandamque sedis Apostolicæ auctoritatem dignitatemque, præsertim adversus Catholicæ religionis hostes, in primis valere semper a Summis Pontificibus cooptari in amplissimum Cardinalium collegium soleant: in amicorum vero, quibus plurimum deditus erat, negotiis procurandis ita fidelem, assiduam, ac diligentem operam dabat, ut suarum fere rerum oblitus, nulli neque labori, neque incommodo, neque sumptui parceret. Deinde non potuit recte inchoata perficere, quod, a cogitandi scribendique labore, magna cum ex parte avocaverat adversa valetudo, qua cum consistebatur, tum ex acerrima attentissimaque studiorum, quibus affixus fuerat, meditatione contracta, tum ex Poloniæ cæli inclementia, comparata: atque aëris illius diritas, quem annis septem hauserat, (totidem enim annos eam ibi provinciam administravit) & vivendi ratio, a nostra longe diversa, cui assuescere non potuit, celerem illi vitæ exitum properavit. Nam cum, re bene gesta, Romam ad novos majoresque honores, qui decreti illi erant ab iis, qui tum rerum potiebantur, capeffendos accurreret, in itinere, tabe confectus, interiit, annos circiter unum & quadraginta natus.

LAVRENTIVS AZOLINVS.

L Laurentius Azolinus Firmantus, nobili loco natus, Episcopus Narniensis, ingenii præstantia morumque suauitate & elegantia in primis floruit. Nam Theologiæ, Juris civilis, ac multarum maximarumque rerum scientia præstitit; & fuit concinnus atque aptus amicis; nec minorem ex vite sanctitate & innocentia laudem meruit, cum multos annos Ecclesiam, cui præfuit, admirabili probitatis & Episcopalis vigilantie exemplo rexit. Poëticæ etiam facultatis nomine clauit; multa enim scripsit, atque præclara; elegantissimas in primis Satyras Etrusco carmine, illud scribendi genus secutus, quod pluribus hac ætate, adolescentibus præsertim, probatur, inflatum, elatum, ac sententiis venustis ac vibrantibus frequens. Evocatus est ab Urbano VIII Pont. Max. ut sibi a secretioribus epistolis, & consiliorum omnium particeps esset; quibus in rebus fidem illi suam, studium ac diligentiam præstitit; ac si *principibus placuisse viris non ultima laus est*, hanc ille suo sibi jure vendicat. Etenim ita Urbanus Pont. elegantissimis ejus moribus delectatus est, ut carissimum eum semper habuerit, & amplissimis honoribus destinaverit; sed ille infirma ac tenui valetudine cum esset, nec laborem, quorum occupationibus districtus tenebatur, ferre posset, eorum oneri succubuit, atque in ipso honorum cursu antea corruit quam portum conspiciere potuit. Namque erat opinio, si vita contigisset, ad summam eum amplitudinem perventurum; ac si inter purpuratos patres, ut fama erat, fuisset adlectus, non primus honorem illum in suam familiam intulisset: nam alter, Decius nomine, hujus patruus, forma egregia, nec minus elegantibus moribus, sed non eodem ingenio & eruditione, qua iste, fuerat a Sixto V in eum honoris locum euectus, ac celeriter mortuus, conditus in Æde D. M. Majoris, in sepulcro, eleganter constructo marmore.

IACOBVS MICHALORVS.

Optima ac præstantissima Vrbinatis cœli temperatio moderatioque, tum superioribus sæculis, tum nostra memoria, complures singulari acutissimoque homines ingenio peperit, qui, doctrinæ elegantia ac maximarum rerum scientia, nullis cuiusvis populi atque nationis hominibus cedant; quorum multos jam antea enumeravimus: sed in eorum numero, jure optimo, respondendus esse videtur Jacobus Michalorus, Canonicus Vrbinas. Hic enim, ab ineunte ætate, maxima atque clarissima virtutum, quibus est nobilitatus, indicia præbuit. Nam quemadmodum ab exorientis auroræ lumine atque nitore licet nobis de totius dici serenitate amœnitateque conjicere; ita etiam ex celeritate arripiendi, memoriaque retinendi ea, quæ illi, vix e nutricia lacte depulso, a magistris tradebantur, sui cum civis matura ætate summum virum, ac multarum virtutum laudibus excellentem fore augurabantur. Sed, ne ante secundum & vigesimum ætatis suæ annum, adolescens discendi cupidus, & ad rerum naturalium causas indagandas a natura factus, in aliquo celebri Italix gymnasio, philosopho operam daret, sed domi se contineret, fuit in primis causæ immatura Curtii fratris sui I. C. mors, quæ omnes domesticas suas rationes & vitæ consilia conturbavit atque pervertit. Neque interea inertix desidiique se tradidit, sed elegantium artium studiis assiduam ac diligentem operam dedit; in quibus quantum profecerit, declarant ea, quæ tum Latine tum Italiane, tum soluta oratione tum versibus scripsit: in quibus accurata ac diligens observatio ac labor inspicitur. Non enim solitus erat continuo sua aliorumque omnia probare, sed notandis animadvertendisque eorum vitis, existimator doctus & intelligens inveniebatur. Sed præsertim irridebat eos, qui Etrusca scribentes lingua, de industria, Florentina verba exoleta ac rancida confectarentur, quod illud, quod scriberent, tum elegans visum iri existimarent, si putidis vocabulis, & ab usu remotis explicatum, Florentinitatem oleret; & quo eos homi-

nes populo irridendos ludendosque præberet, fabulam fecit, cui, Nuptiis fictis, nomen indidit, Lucianum in Lexiphane imitatus, in quam, personam induxit, veteri Florentinorum Aboriginum lingua loquentem; quæ fabula, aliquot post annos, ob sermonis elegantiam multitudinemque jocorum, data est a Comuni Urbinatum, in nuptiis Federici, eorum Principis, & Claudie Mediceæ, magno apparatu sumptuque, ac typis impressa. Annum igitur agens secundum supra vigesimum, Bononiam profectus, suum illud fertile & amœnum ingenium, tanquam agrum, elegantioribus literis aratum, novatum, & iteratum, gravioribus disciplinis ferendum exhibuit: sed annonæ eum caritas, vel fames potius, quæ eo anno, qui fuit a Christo nato M D XC, Italiam totam afflixit, & gravis morbus, qui diu eum lecto implicitum habuit, sationem illam interrupit; & anno post, quam illuc venerat, coactus est in patriam redire; ubi biennium commoratus, disputationem de Sphæra mundiali, quam Bononiæ seriis studiorum absolverat, non inquinato atque corrupto, ut vulgarium philosophorum turba, sed eleganti Latinoque sermone conscriptam relegit, emendavit, auxit, ornavit & anno M D CXXVI edidit. Post illud biennium, quo eum patria habuerat, contulit se Romam; ubi in gymnasio Patrum Soc. Iesu, non modo Philosophicis disputationibus, ut ceceperat, pectus iniecit, verum etiam Theologicis disciplinis excoluit: jam pridem enim sacerdotalis muneris dignitatem animo conceptam habebat; ideo majore theologiæ studio exarserat. Sed cum jam earum doctrinarum tanquam fluentis ita se impleisset, ut redundaret atque diffunderet; quo ea communicare cum aliis posset, Urbini Philosophiæ ac Theologiæ, publice aliis tradendæ, facultatem accepit: in eisque disputationibus, quæ periclitandi ejus vires ingenii causa præcesserant, ita omnes argumentationum impetus fortiter excepit ac rejectit, ut omnium consensu sit judicatum, vicisse eum expectationem, quæ de ipso erat. Accidit per id tempus, ut in oppido Castellî Durantium, quod nunc Urbana civitas appellatur, insignis cujusdam sacerdotis Præpositus moreretur; cumque in demortui locum, subro-

subrogandus esset alter, qui ceteris doctrina præstaret, atque ob eam causam, multorum concursus ad Fori Sempronii Episcopum fierent, qui erat futurus certaminis arbiter, coactus est ab amicis, una cum aliis competitoribus nomen suum profiteri; ac factum est, ut ille ceteris longe superior discederet, ac per hanc rationem sacerdotium illud auferret: quod cum oppidani ferrent indignissime, ac quererentur, tam pinguem bolum, suorum civium e faucibus ereptum, & alterius civitatis homini traditum, summum Pont. appellarunt, perfecruntque, ut res iterum in contentionem certamenque deduceretur. Nec mora, ille, æstate summa maximisque caloribus, cum duobus aliis Romam venit, qui ne ejus quidem aspectum ferre potuerunt, & in certamen vocati, venire recusarunt; itaque habitus est rursus honore illo ac loco dignissimus. Sed cum intelligeret, nunquam sibi cum hominibus illis conventurum, quibus invitis ac repugnantibus in eum locum venisset, resignavit eum alteri, bonis conditionibus; & cum indicta esset pugna literaria, in qua pro sacerdotio alio, in præcipua Urbini ecclesia adipiscendo, certandum esset, se quoque una cum competitoribus aliis in aciem eduxit, ac pedem inde victor reflexit. Itaque illud itineris Romam incommodum, quod anni tam adverso tempore susceperat, sibi in bonum conversum fuisse intellexit, ac reversus est in patriam Canonicus, ubi ob insignem doctrinam, summa cum probitate conjunctam, traditam sibi munerum gravissimorum provinciam, usque ad extremum vitæ spiritum, magna cum laude administravit. Etenim fuit Archiepiscopo a consiliis in causis fidei, sacrarum Deo virginum domibus præfuit, interrogando eorum industriæ periculum fecit, qui saceris initiari, vel ad aliquod sacerdotium promoveri, poscerent. Postulatus est a Francisco Cardinali a Balneo, ut suam de Erycii Puteani Cyclo Vrbano, sententiam judiciumque proferret; qui libro illud edito palam exposuit; cui Puteanus alio libro, quem Vindicias, seu Apocrisiu inscripsit, luculente respondit; refutavit ille rursus Puteani responsionem, alio volumine, Antipocrisin nomine, quem etiam Romæ edidit; ubi cyclum illum

illum vanitatis arguit, atque erroribus ad septuaginta refertum ostendit. Alia ipsius opera, variis de rebus tum Latino tum patrio sermone scripta, singulari quadam animi magnitudine, a rerum omnium humanarum despicientia ducta, typis mandare neglexit, cum senex jam ex naturali oculorum imbecillitate, prope cernendi facultate amissa, totum se ad mortis, ac celestium rerum contemplationem contulisset; & amicis postulantibus ac persuadentibus, ne tam egregia ingenii sui monumenta interire pateretur, respondebat, cum non una amplius nocte sibi vivendum esset (cecitatem nimirum intelligens suam) nihil se de humanis laudibus laborare, neque memoriam imposterum ingenii sui aliquam poscere.

ANGELVS ANGELOTIVS.

Angelus Angelotius Camers, fuit in omni fere disciplinarum genere excultus. Jus civile, ac Pontificium noverat; Philosophiam non a limine, ut dicitur, salutaverat, sed ad intima ejusdem cubilia penetraverat, & unamquamque ejus partem accurate diligenterque lustraverat, tum eam, quæ est de moribus, tum illam, quæ in disserendi subtilitate, & in naturæ obscuritate versatur; mathematicas omnes disciplinas complexus fuerat; neque eas literas, quæ ab humanitate nomen invenerunt, contempserat, quippe qui poëtas, oratores, & historicos omnes perlegerat, nominabat, scientes ac proprie de unoquoque dicebat. Memoria erat summa, adeo ut quidquid legisset, vidisset, audisset, cogitasset, animo comprehensum haberet, ab eoque unumquodque, cum esset opus, tanquam ab armario proferret. Verum ita erat loquax, ut iis, quibus cum una esset, nullam sermonis partem relinqueret, sed solus orationis aliorum munus persequeretur. Neque ejus sermones erant de rebus ludicris ac levibus, sed de literarum studiis fere omnes, quibus erat mirifice deditus, ac bonam diei ac noctis partem tradebat; sed quia videbatur velle esse omnium sapientissimus, & tanquam magister ac dominus, sæpenumero fiebat, ut odiosus interveniret.

T

Ini-

Imitabatur homo Camers veteres Græculos ; nam quocunque in loco , quoscunque inter homines sive cum uno sive cum pluribus versaretur , sciscitabatur ab eis , qua de re vellent audire ; neque fas erat illis recusare , quin rem aliquam in pereunctando ponerent , de qua argutissime disputaret : & ubi quempiam in via convenerat , quem inter & ipsum vel levis saltem aliqua notitia intercederet , se illi invito atque aliud agenti comitem addebat , ac vim prope imponebat , ut aliquid ab ipso percontaretur , de quo maxime vellet audire ; neque antea divelli ejus a latere poterat , quam inchoatam disputationem perorasset conclusissetque : atque olim , me admodum adolescentem , quem semel cum amico colloquentem suo viderat , atque eadem opera , ut mos est urbanorum , salutaverat , cum feriis Bacchanalibus solum euntem aspexisset , est audacter aggressus , atque , o te , inquit , volebam , ut vales ? quid agis ? quo is ? Ego , neque quid agam , respondi , nec , quo me conferam , scio : nam cum pigeret ociosum domi manere , eeci me foras , ut saltem oculos hominibus personatis , tota debacchantibus urbe , delectarem , ac molestas ab animo cogitationes ejicerem ; neque decretum aliquem locum habeo , quo me præsertim ire expediat . O te felicem , inquit ille , auspicato domo foras pedem extulisti ; non poteras , si totam urbem perreptasses , oportuniorem hominem invenire , qui suavibus alloquiis , atque eruditis disputationibus , omnem tuo ab animo molestiam abstergeret . Sed quoniam advenienti mihi ad sinistram fors eum obtulerat , id quod ego non animadverteram , advolvit illico ad dexteram , atque , Demus primum , ait , operam , ne merito in sermones hominum , vituperationemque veniamus ; nam quos de nobis sermones dabimus , quos populo risus præbebimus , si me ; te tanto ætate majorem , & , quod refert , tanto literis doctrinæque superiorem , tecum in via ad levam incedentem aspexerit ? age vero , mihi quæstiunculam , de qua tuo arbitratu loquar , impone ; sed illud quære , quod sit amœnum , lepidum , jucundum , Bacchoque dignum , cui sunt hodie Dionysia . Ego , qui in eas me tricas devenisse conspicerem , unde quænamadmodum expediret , non in-

veniebam, demitto auriculas, & quo aliquid responderem, Dic, ajo, de Amore, ex Platone præsertim, quem tibi, præ ceteris Philosophis, audio esse in amore atque deliciis. O sapiens, inquit ille, postulatam, & ætatula ista, quam obtines, dignum: nam sit verisimile, tibi, ut ceteris adolescentibus, anorem in corde versari, tuumque animum apud aliquam lepidam, venustam, tuique similem adolescentulam, cupidinis clavo defixum hæere: age dum, Amor sit nostri materia sermonis, sed ille purus, defæcatus, nobilis, mellisque sæcundissimus, ad quam faciem cupio esse eum, quo ardes, non ille impurus, inhonestus, quique amarum ad satietatem usque aggerit. Ac cœpit primum definitionibus explicare, quid esset amor; tum causas enumeravit; unde Amor ortum haberet, quas vel conferebat in astrum, cujus imperio, ut Plato voluit, duo subjicerentur, vel ad statum cæli siderumque revocabat, in quò illi natæ essent, vel similitudini geniorum assignabat, vel ad eandem temperationem corporum aut morum convenientiam, aut ad formarum simile in utrisque exemplar referebat; deinde alia non parum multa subiciebat, plena illa quidem doctrina, & quadam prope admirabili varietate rerum ac copia, sed quæ mihi, tum in variis nugis occupato, odium & fastidium crearent. Invitabat sæpe aliquem, ex amicorum numero, ad prandium, his fere verbis, Veni mecum, sodes, non tibi dubium aut milvinum dabitur prandium, sed quod philosophum maxime deceat. Nam primum frustulum pernz erit, mihi Camerino missæ, quo non quidquam dixeris te gustasse in vita suavius, tum vitulina apponetur madida, cum pulte; quam caseus ac sceniculum sequetur; postremo liber unus, & alter in manibus erit, cujus epulis animum pascas. Postquam venit Romam, habitavit primo in vico, qui Classis vocatur a navali cum Turcis pugna, ibi depicta, tunc temporis infami, quod a diabolariis pistorum, cetariorum, servorumque sordidorum scortis frequentissime habitaretur, ibique inferiorem modicarum ædium partem, vix contiguam, parva mercede conduxerat: sed non ita multos post menses, conductæ est ejus opera a viro nobili, ut ipsi ad

juris civilis scientiam aditum aperiret; postea fere semper usus est amicorum ædibus, in quas primum immigrabat precario, videlicet ut tantisper sibi ibidem esset liceret, quoad domuncule cujuspiam occasio se daret; tum vi & ingratius, ac reclamantibus dominis, earundem ædium usum arrogabat; ut de quodam honesto viro, literarum ac philosophiæ in primis cupido, Cæsare Pontano nomine, narratur: hic cum per paucos tantum dies ab ipso rogatus, tecto hominem recepisset, & in præcipua ædium suarum parte, honoris cum gratia collocasset, vix tandem potuit post longam litis concertationem, judicis sententia, foras ejicere. Nam cum unus, alter, ac tertius annus præterisset, nec ille, tanquam si in suo esset, abeundi mentionem faceret, modeste rogatus est a domino, ut aliud hospitium, aliam domum quæreret, eamque ædium suarum partem, qua in primis egeret, liberam traderet. Tum ille, Quid audio? inquit, nondum me Orcus ad se recepit, & partem domus repetis, cujus mihi usum, quod vita suppeteret, sponte donasti? Obstupuit homo quietissimus hominis dicto, quem ex aliorum calamitatibus, in primis litigiosum, & concitum ad rixam noverat; sed cum paulum se collegisset, Quibus, inquit, hoc testibus, quibus literis, hoc planum facis? quos testes, quas literas, prædicas? respondit ille, tanquam si, ut cetera alia argumenta defint, non id satis testetur patientia, qua me tot annos passus es domi tuæ esse, ac docti illi sermones, quibus rudem tuum in philosophia animum expolivi? Ne multa, in jus ad Prætores itur, controversia deferatur, lis contestatur, in qua, non ob obscuram dubiamque juris rationem, sed ob judicantis moram, & adversarii calliditatem, tantos sumptus miser dominus fecit, ut vix tanti domus, de cujus parte ambigebatur, esset. Sed tandem judicii sententia exire coactus, se suaque ille omnia in Capranicense collegium transtulit, & in cubiculum amici cujusdam sui contulit, ætate nieunte, quo tempore cum res prolatae sint, simul prolatae res sunt alumnorum illorum dentibus; itaque, quo ad res redeant, se domum illi suam conferunt, ibique suo sibi succo, ut cohelez, vivunt. Sed cum circiter instauratio-

nem

nem studiorum ille redisset, cubiculum etiam tum ab homine occupatum invenit, ac commotus, Itane, ait, a te mihi verba data sunt? nonne ea tibi lege hoc cubiculum patuit, ut post paucos inde dies excederes? quamobrem ejice te hinc foras, quantum potes. At ille ad id confugit, quo se plurimum posse intelligebat, nimirum ad litium terrores, ac quoddam juris Pontificii caput objecit, quo interpretatione sua probabat, sibi, semel in cubiculum illud admissio, jus perpetuo in eo permanendi fuisse quæsitum: sperabat enim, si res in quæstionem vocata fuisset, se occasionem & moram inventurum, quæ se diutius in eo contineretur. At verba illa homini cerebroso (sicuti sunt discipulorum fere omnium ingenia) tanquam quædam faces fuerunt, quibus inflammatus, Quid leges Pontificias blateras? quid jus tibi ab illis quæsitum crepas? at scin, quomodo? nisi hinc propere properas fugere, jam ego te obtorto collo traham in viam. Sed cum ille cunctaretur, ac nescio quid adderet, adolescens, convocatis aliquot ejus collegii alumnis, valentissimis hominibus, res illius omnes foras exportavit. Dicitur reversus in patriam, ibi diem obiisse supremum; neque aliud reliquit, quod sciam, unde judicare de singulari hominis ingenio liceat.

OCTAVIANVS CASTELLVS.

Multorum ego hominum, mea ætate, ingenia vidi, ad omnia summa nata, qui homines, quamcumque in partem vel per jocos ludumque se darent, facile multorum in ea re diligentæ studioque præcurrerent: verum me novisse neminem fateor, qui Octaviano Castello Spoletino anteiret; cujus ingenium ita ad plures res aptum, ita versatile fuit, ut non rota, non turbo; ita versetur, ut illud: ad omnia ea studia, quamvis varia, quamvis diversa, convertebatur, in quæ mente & cogitatione sese conjiceret; neque ad illa solum; quæ sunt gravissima ac severissima, ut ad Philosophiam, Medicinam, Geometriam, Astrologiam, verum ad ea etiam leviora celeri quodam animi motu ferebatur, ut ad Poësim, Musicam, picturam, recte saltandi artem, atque

ad alia id genus multa, prope ut alter Heletus Hyppias posse dici videatur; quamquam ille progressus est longius, atque in plures res abiit, quam sapientiz studioso conveniat; nam cum Olympiam venisset, ut traditur, tota bene audiente Græcia, gloriatus est, annulum, quem haberet, pallium, quo amictus, soccos, quibus indutus esset, se sua manu confecisse. At nondum mihi perspectum fuit, novum hunc nostrum Hyppiam ad has quoque humiliores artes, ut veterem illum, descendisse; sed non est dubium, si eas etiam voluisset attingere, quiti semper sui similis inventus fuisset; quamvis in omnibus illis laudibus, de quibus diximus, conatus in eo magis atque adumbratio, quam perfectio cernitur: etenim ille multa, majore animo quam viribus amplexus est; sed nulla in re fuit excellens; nec mirum. Nam ingenii nostri vis non est infinita, sed exiguis quibusdam finibus continetur; quamobrem, cum in plura studia distrahitur, debilitatur, ac se ipsa fit minor, nec singulis satisfacit. Verum laudari in eo propositum debet; non enim aliunde, quam a magnitudine animi & ingenii, ducebatur, atque in iis scholis, quas, simul ac medendi artem publice tradendi facultatem adeptus est, in gymnasio Rom. extra ordinem habuit, satis signi dedit, quantum præstare potuisset, si, omisis ceteris studiis, totum in uno aliquo animum collocasset. Audivi, de medico in primis nobili, qui tum cum docentem audierat, ita sibi probatam ejus orationem fuisse, ut nihil in ea neque doctrinæ neque eruditionis neque eloquentiæ desideraret. Sed felicius docendi, quam corporis medendi, artem aggressus est: nani ægrotanti amico, ejusmodi medicatam potionem diluit, qua pene ad interitum hominem dedit: parum enim absuit, quin disrumperetur medius, cum ejus vi, tanquam turbulenti cujusdam tribuni plebis concione, lien, pulmões, jecur, & cor, atque intestina omnia, seditione facta, conarentur foras erumpere; & quod conata erant, perfecissent, nisi alterius, longe illo experientioris medici ope auxilioque, quasi sedati consulis & gravis oratione, seditio fuisset cohibita, imperatumque, ne intestina se loco moverent, sed eorum unumquodque in sua sede quiesceret. Deinde

con-

convertit se ad amicorum causas agendas; sed, sive strepitum fori perosus, sive iudicio, ad inanisfuctiores Musas animum transtulit, ad Poësim in primis, ac Musicam; ac singulis fere annis, singulas, & interdum binas, populo fabulas dedit; quarum postremis modos etiam fecit. At cum vir princeps, ab ipso invitatus, laudavisset ejus versus & modos, dixissetque, nihil ipsi deesse præter pingendi artem; tum enim eum fore ab omni parte perfectum; ejus fabulæ, quam proximo anno docuit, scenam sua manu affabre sciteque depinxit; quam viro illi principi ostendens, Vide, ait, neque ea a me perfectio absolutioque, quam desideras, abest. Ex cœnædiis omnibus, quas spectandas præbuit, suo iudicio, primas deferebat illi, cujus in ædibus Regis Galliarum oratoris, inspiciundi fecit copiam, quam etiam edidit; fortasse, quia majore sumptu, magnificentiore apparatu, ac præstantioribus musicis æta est: verum quia nihil est in ea primum neque postremum, sed omnia confusa atque permista, & quia ob longitudinem fastidiis hominum adhærescit, non inurbane a quibusdam, Tædii, & Confusionis Nuptiæ, appellatur: optima omnium stylo, argumento, atque sententiis existimatur ea, quæ Appollinis intemperies vocitatur. Multæ erant in eo facetiæ, iustus in jocando lepos; cavillator facetus, conviva commodus, in imitandis hominum quorundam ridiculorum moribus, vultu, voce, & ipso genere sermonis, admirabilis. Postremo, ne quam artem intentatam reliquisset videretur, paucis ante mortem mensibus Tabellariorum Galliæ Præfecturam tribus aureorum milibus comparavit, ac mense Majo, anni M DC XLIII, cum menses aliquot pituita, ex intemperantia vitæ concepta, vehementer laborasset, est mortuus.

RAPHAEL MENICVCCIUS.

Cum præsertim, ut autea dictum, a nobis hæc Pinacotheca instituta sit, ut hominum ingenuorum animos oblectemus; cum videlicet a negociis, vel ab honesto aliquo opere feriat, tradere se voluptati voluerint; ideo data est opera, ut illorum in ea imagines collocarentur, quæ commemoratione hominum, & cognitione formarum, sine fastidio & societate eam illis possent, quam quærerent, voluptatem asserre. Verum quia perspicuum est, non minorem ea ora voluptatem obicere, quæ insigni aliqua notantur turpitudine, in qua sedes & quasi regio ridiculi continetur, quam egregia atque venusta; propterea inter elegantium formarum quasi tabulas, quorundam etiam imagines interjecimus, qui ob præcipuam nec vulgarem animi deformitatem notissimi, deridiculo omnibus fuere. Ita enim fastidio & societati, quæ ex similium rerum continuatione oritur, facilius occurrî posse existimavimus. Sed jam pridem Raphael Menicuccius, Romæ totaque in Etruria celebris, ad Pinacothecam nostram adspirat, suamque, in eam, imaginem inferri, ad obtinendam nominis immortalitatem, cujus semper fuit avidissimus, postulat. Ortus est in oppido Montis S. Sabini, celebri atque illustri, quod summos Pontifices, S. R. E. Cardinales, clarissimos maximorum exercituum Imperatores, honorariæ Jerusalemitanæ militiæ equitum magistros, Archiepiscopos, Episcopos, aliosque non parum multos viros, domi militiæque nobiles, tulerit. Fuit statura, quæ magis ad mediocrem, quam ad longam accederet, paulo habitiori corpore, magno capite, pleno ore, sædis oculis, colore subnigro, sed ingenio plane ridiculo, verum non prorsus absurdo. Possè ex tempore versus fundere, bona dicta dicere, risum movere, parasitum non illepidum agere; in re vero familiari sive actu sive industria tuenda augendaque, longe suæ ætatis plures, artificio & acumine, superavit. Sunt, qui illum existiment non vitio mentis aliquo ad stultitiam fuisse delapsum, nec, quo aliis deridiculus esset, parasiticam artem exercuisse, sed in-

infantiam simulasse, & parasiti personam suscepisse, quod se per hanc rationem in principum virorum familiaritatem insinuaret atque intruderet, ut rem faceret, & patriæ suæ honori commodoque serviret; neque illi parum sæpe nec mediocriter commodavit, sed frequenter ac plurimum; ut in magna quadam hæreditate accidit; quam, nisi suis consiliis retinuisset, e patriæ sinibus expulsa, alio exulatum abiisset. Oppidanus quidam, in primis locuples, testamentum fecerat; hæres Ædem sacram, & domum illi adjunctam, jussus erat ædificare, ubi virgines aliquot Deo dicatæ alerentur; nisi ædificasset, ac virginibus victum præbuisset, hæreditas Vaticanæ templi ædificio committebatur; quod cum esset prætermissum, jamque venissent, qui Vaticanæ Ædis ædificio hæreditatem illam peterent, (erat enim pergrandis pecunia) neque esset admodum dubium, quin ea deberetur, ipse Magnum Etruriæ ducem adiit, ad quem nulli unquam aditus ipsi, utpote homini ridiculo, erant oclusi; ac tota de re hominem docet; tum pluribus verbis ostendit, quam foret patriæ suæ perniciosum, si ea utilitate & commodo spoliaretur, ipsi vero indecorum, si pateretur, tot aureorum millia ditioris suæ fines egredi & coloniam commutare: quæ obrem tundendo, ac molestis denique precibus effecit, ut vir ille princeps negotium susceperet, commendaret, ac rem cum ædificii procuratoribus parva pecunia decideret. Hujus præsertim infania (si infania appellanda est, quæ emolumenti sui gratia simulatur) famæ, nominisque sui, toto terrarum orbe propagandi studio continebatur; idque jam sibi perfectum esse jactabat: nihil enim tam sciri volebat, nihil tam crebris usurpare sermonibus solitus erat, quam nominis sui famam iisdem, quibus terra definitur, cæli regionibus contineri. Itaque nullam esse, toto orbe terrarum, gentem, sive humanitate ac literis præditam, sive morum feritate immanem & barbaram, sive linguæ nobiscum societate conjunctam, sive ejusdem a nobis varietate dissidentem, quæ esset expers ipsius notitiæ, nullum esse in terris locum, sive propinquum sive remotum, sive celebrem sive solum, quo nominis sui fama non permanasset, nul-

lum esse Regem, nullum Imperatorem, nullum Dynastam, qui non incredibili sui videndi cognoscendique cupiditate flagraret; & Idalianem nescio quem in primis nominabat, quem Regem Maurorum longe potentissimum esse aiebat: sed neminem frequentius habebat in ore, quam magnum Mogorem, quo nullus esset in toto Japone Rex clarior, neque cujus regni fines latius extenderentur; iis adjungebat Sinarum Imperatorem, aliosque non parum multos, quos sigillatim enumerabat. Hos igitur, nominis sui fama permotos, certos ad se homines mittere, discubabat, qui suis ipsi verbis salutem plurimam dicerent, munera traderent, ac suorum regnorum opes viresque deferrent, atque ipsos quoque venturos fuisse, neque itineris longitudinem, difficultates, pericula, & incommoda recusaturos, si per bella liquisset, quæ perpetuo cum aliis regibus, sibi finitimis, agunt: tanti nimirum aestimabant, se posse vel semel ipsius intuitu frui, ac tanta oculis bona concipere. At, quo aliquo titulo ea fama niteretur, spretis ac repudiatis ceteris, Comitis cognomen accepit, seque ab omnibus Comitem Menicuccium appellari volebat. Cum omnibus erat illi de loco contentio: nam, ob tam insignem partem gloriam, omnibus anteferri præponique postulabat. Itaque adveniēti sibi omnes assurgere, de via decedere, ingredienti ad lævam incedere, in amicorum cœtibus, in conviviis, primam ante ceteros sellam apponi jubebat; qua in re, multa jocose, multa inepte, multa ridicule ab eo dicta & facta narrantur; sed unum referre sat erit. Florentiæ, in celebri quodam convivio, cum post honorarios magni illius Ducis ephebos locus illi esset attributus, negavit, se unquam commisitutum, ut tam insignem celebritati nominis sui contumeliam imponeret; si postremus inter illos adolescentes, quantumvis nobiles, quantumvis opulentos, quantumvis honestos, convivium iniret; adeo enim non esse imi subsellii virum, ut neminem videre se diceret, cui ipse deberet cedere. Erat in eo conclavi, ubi convivium dabatur, armarium, ita grande atque præaltum, ut pene ad laquearium usque pertingeret; quod ubi suspexit, *Hic*, inquit, tam perspicuus, tamque editus in altum locus,

cur,

cus, dignus est, ubi ille prandeat, famam qui terminet astris: atque scalas afferri, quibus in ejus culmen satis latum ascenderet, ibique sellam cum mensa collocaret, imperavit; tum bonum sibi anteponi prandium jussit, atque, ut tubicines solent, cum tuba canunt, ambas coepit malas, lepidis bolis fartas, inflare, ac cibum merumque in se avide ingurgitare: quod ubi ab ephebis illis animadversum est, factus est omnium risus & admurmuratio; coepitque unusquisque in corde senatum cogitationum suarum habere, ut inveniret, quemadmodum ea homini cautio in damnum malumque converteretur; atque in id simul omnes conveniunt, primum ut clanculum scalam subducant, quo omnis illi fugæ ratio eriperetur, tum ut circa eum, ignem, ex paleis aqua madidis, excitent; quod ubi factum est, miserum tanta vis fumi invasit, ut in os & in oculos irrumpens, pene illum, ne quidquam Dei atque hominum fidem implorantem, respirandi aspiciendique facultate privaret; quod ubi factum est palam, accurrit ad spectaculum Magnus ipse Dux, accurrunt alii, quibus non potest satis narrari, quos ludos de se ille præbuerit; sed postquam satis fuit omnibus deridiculo, fumo excruciatum ac vix vivus inde detractus est. Sed, ne tanti claritas nominis gratis sibi obtigisse existimaretur, narrabat, ideo se venisse in tantum honorem, quod percerebuisset, fore, ut aliquando universus terrarum orbis ab ipso, dominatu regio premeretur: idque explicare conabatur annulo, quo epistolas obsignabat; ubi impressum erat astrum, Soli Lunæque incumbens: se enim esse illud astrum, quod Lunam, hoc est, Turcarum imperium, & Solem, ceterorum nimirum regna, sibi subjecta faceret. Erat sæpenumero inepte insanus: nam de tabano sive cestro nimium multa blaterabat, quemadmodum videlicet a vespa, a fuce distingueretur; quænam esset illius vis, forma, natura, calor; atque alia id genus, oppido insulsa. Ibat sæpe, vocatus & invocatus, ad cænas ac prandia, ne videlicet parasiticæ arti renunciassè videretur. Neque malos quorundam mores imitabatur, qui invitati, ceteris convivis sunt in expectatione, & diem morantur, ac nocti nocent; quod jure ac merito a Plan-

tino Curculione, tanquam indecorum & incivile, damnatur; sed eo, ubi prandium vel cœna dabatur, antea veniebat, quam res parata esset, atque adeo antea quam obsonator obsonatu rediisset. Interea iis, qui aderant, solitas illas nœniis decantabat de sua apud omnes gentes, & in primis apud Japonios, fama; quam etiam volebat in proverbium abire, ut quemadmodum ingens cuiuspiam labor, ab Hercule, qui septem summos exantlavit labores, labor Herculeus dicitur, ita etiam celebris cuiusque fama, a se, qui ea erat præ ceteris inclytus, fama Menicuccia appellaretur; ac præsertim insignem illam gratiam commemorabat, qua apud magnum Magorem pollebat; atque, ubi res frigcret, molestum illum de tabanis sermonem inferebat. Verum ille, qui, dum viveret, expectabat esse non unus e pluribus, sed fama ac nomine singularis, demum, domi suæ moriens, penetravit ad plures; non inter senatores, vel equites, vel assiduos, sed inter plebejos, aut proletarios, aut capite censos, adversus animi sui sententiam numerandus.



**PINACOTHECA
ALTERA.**

IOANNI BAPTISTÆ
GRATIOLIO RINALDINIO

IANVS NICIVS ERYTHRÆVS

S. P. D.

Superioribus annis, quod non te fugit, cum mihi essent domi complures clarorum virorum imagines a me quoquo modo descriptæ, quæ mea ætate, cum aliqua doctrinæ vel ingenii laude, e vita migrarunt, a multis, qui cupidi erant eas videndi, sæpe rogabar, ut spectatum ipsos admitterem. Quamobrem, ut omnibus satisfacerem, Pinacothecam quasi quandam, in qua omnes illæ imagines exponerentur, institui. Sed ea fuit angustior, quam ut cunctas posset excipere: nam plures reliquæ hominum quorundam erant, quæ illorum commemoratione, & formarum animi cognitione, delectationem asferre non minimam possent. Itaque a multis & in primis a te, cohortatus sum, ut eas, perinde ac superiores, eorum, qui videre vellent, oculis animoque subjicerem. Parui, obtemperavi; tibi quæ, cni, ob tua singularia in me beneficia, nihil denegare audeo, dicto audiens fui; atque Pinacothecam alteram, in qua eas collocarem, extruxi. Neque mihi fuit magnopere querendum, cuius eam nomini inscriptam, is, qui tanquam ingredi in eam vellent, aperirem. Nam tu statim occurristi, qui ejus condenda, tam sæpe auctor, impulsor, adjutorque fuisti. Sed, cuiusnam tutius eam fidei custodiaque mandarem, quam illius, qui faceret eam plurimi? Tu enim, (nisi sit magis benevolentia, quam iudicii, testimonium,) soles

les mearian rerum omnium pretia nimis exaggerare, quaque ego nihili facio, in calum efferre. Quamobrem cum saepe fiat, ut, quo aliquid carius aestimetur, eo etiam diligentius asservetur; quem patronum, prater te, adscribere illi alium potui? Ac potest etiam contingere, ut, te conciliatore, & indicatore, idem apud multos pretium, quo a te aestimatus, inveniatur; qui, quemadmodum in omni reliqua vita, ita etiam ingenio iudicioque excultissimus, omnium, qui te norunt, consensu, existimaris. Nam primum, in amplissima civitate, nobili genere natus, omnibus, a puero, dignis homine nobili artibus ac disciplinis eruditus, ita in hac luce orbis terrarum, Roma videlicet, in re opulenta ac laeta vivis, ut nemo propemodum, te melius & honestius, divitiis uti videatur. Domus ampla, pretiosa supellex, ita tamen, ut non domus domino, sed dominus domui sit ornamento: circumpedes plures, varia ac decora veste induti; cubicularii, corporis forma cultuque praestantes; mensa liberalis ac splendida; rheda magnifica; equi, rheda magnificentia pares. Sed, his omnibus in rebus, ea a te cautio adhibetur, ut ne sumtus rei familiaris modum excedat; neque committis, id quod pleraque pars hominum facit, qui splendidum vitam consecantur genus, ut ii, quibus a te aliquid debetur, usque a mane ad vespertum, flagitatores astant ad ostium, affidui atque molesti, suum repetentes; sed statim argentum, quillum debes, resolvis. Verum, haec exteriora & corporis. Illa autem interiora & animi, primum, mens, in rebus arduis, multoque magis in rebus ad voluntatem fluentibus, aquabilis ac recta: quippe, ut ait ille, secunda res sapientum animos fatigant. Nam, cum apud magnos Principes plurimum

num auctoritate & gratia valeres, nemo te intol-
erantius jactantem, nemo aquabilitatem communis
juris, magnitudine gratia atque potentia, transeun-
tem, aspexit; immo, quidquid poteras, quidquid
magno tuo labore, magnisque periculis, tibi pepereras,
non tam ad tuum commodum, quam ad aliorum uti-
litatem & fructum, conferebas. Id quod tibi prin-
cipium maximæ calamitatis fuit: cum nimirum pes-
sime relata est gratia ab eo, quem inopem, & alienæ
opis indigentem, perfeceras, ut ad opes divitiasque
perveniret. In eos enim, per illum, calamitatum
fluctus conjectus es, qui sine lacrimis commemorari
non possunt. Tu vero, qua magnitudine animi, qua
constantia, utpote qui omnia in te posita esse duceres,
multitudinem illam malorum sustinuisti! quam tibi
non alia culpa, nisi tua nimia in alios humanitas be-
nignitasque constaverat; carceres, exilia, fugam,
rei familiaris damna, aliaque incommoda, quæ non
est enumerare necesse, tibi præsertim, qui, cum fue-
rint gravia, aspera, ac difficilia perpassu, semper ca-
memineris. Quid dicam de literarum studiis, quæ, ab
ineunte adolescentia, a te, primum exulta, tum,
maximis aula occupationibus, longo intervallo inter-
missa, deinde, post gravissimum tuum casum, revoca-
ta sunt? Quos & quantos in illis progressus fecisti!
primum, in jure civili; cujus docendi interpretandi-
que facultatem, in Gynasio Romano, tibi delatam,
accepisti: tum, in humanioribus literis, quibus præ-
sertim studium tuum dedisti. Quis enim est orator,
historicus, poëta, qui Latine loquatur, quem tu non
legeris, penitusque cognoveris, de quo non docte
scienterque loquaris, & judices, ut etiam eorum non
neminem, ex Latino, in Etruscum sermonem, lepide

eleganterque converteris? neque eorundem lectione studioque unquam expleris, sed totum illud tempus, quod tibi ab officiis, & negotiis domesticis, superest, non aleæ aut levioribus aliis occupationibus tribuis, sed in hac liberalissima honestissimaque animi remissione consumis, teque inde ad amicorum, tui similium, consuetudinem transfers, eisque plurimum tuæ suavitatis impertis. Nam semper comis, semper commodus, omnem humanitatem, hilaritatem, ac venustatem exerces. Huic igitur patrono, tam erudito, tam eleganti, tam nobili, non putem Pinacothecam meam ita posse committi, ut plurimum ab eo splendoris & æstimationis accipiat? Quamobrem, ad tua alia in me beneficia, hoc etiam adde, ut tua eam custodia tuearis, ac munias; neque grave videatur tibi, vel non ferendum, quo tempore me oporteret, de referenda tuis maximis in me meritis gratia, cogitare, tunc poscere, ut novo me beneficio cumules, atque augeas. Vale. Roma, Kalend. Januar. ch l^o CXLV.

I A N I N I C I I
E R Y T H R Æ I

P I N A C O T H E C A
A L T E R A .

I. G E O R G I V S D E V A L E N T I A .



Voniam superior Pinacotheca fuit angustior, quam ut tot clarorum hominum imagines, quos, vivis nobis, vita defecit, capere posset; ideo fuit necesse, alteram illi proximam addere, in qua eorum, qui prætermissi fuissent, depictæ nostra oratione, quasi coloribus, formæ proponerentur. Verum, quoniam in ædificiis novis, ad voluptatem amœnitatemque excitandis, præsertim requiritur, ut sint illustria, ac speculo ipso clariora, quo signa, aut tabulæ pictæ, si quæ ibi locentur, in bono lumine collocatæ, gratiores jucundioresque spectantium veniant ad oculos; ideo data est opera a me, tum, ut totum hoc ædificium luculentum esset, tum, ut ejus in primis aditus vestibuluinque clariori luce eniteret. Sed unde poteram majus illi lumen arcessere, quam ab eo, cujus nomen, non solum Societati Jesu, in qua numerabatur, ob singularem doctrinam, præstantemque rerum maximarum scientiam, ornamento est, verum etiam, solis instar; orbem omnium terrarum, sua luce, lustrat ac complet? Hic est Gregorius de Valentia; qui, ortus Metimnæ, quod est oppidum provinciæ Castellæ, in Hispania, plus patriæ reddidit, quam ab illa accepit; jamque Metimna Gregorio, quam Gregorius Metimna, apud omnes est notior. Huic, ab adolescentia, non pecunia, non voluptas, non ambitio, quæ, quasi materies omnium malorum, mortalium plerosque subvertunt, grata fuisse; sed, Dei metus, mores optimi, literarum studia,

longe potiora extiterunt; in eisque iuventutem, ac reli-
 quas vite sue partes, exercuit. Quibus in studiis quo,
 rerum humanarum omnium curis omillis, totum se col-
 locaret, Societati Jesu nomen dedit: in qua, dici vix po-
 test, quantum in omnibus iis virtutibus brevi excellue-
 rit, quibus perfecti religiosi forma continetur: neque
 minores in liberalibus disciplinis profectus fecit; in iis
 præsertim, quæ in acri ac vehementi rerum subtilissi-
 marum investigatione meditationeque versantur, quib-
 us studium suum dederat. Quamobrem celeriter est
 adeptus, ut nemo illi, ingenii acumine, intelligendi
 præstantia, disserendi subtilitate, antequam putaretur. At,
 cujusmodi esset hominum de illius excellentia iudicium,
 illud in primis ostendit, quod, cum nondum sacris ini-
 tiatus esset, cum vix ex studiorum curricula pedem ex-
 tulisset, inventus est ceteris aptior, qui in Germaniam
 mitteretur, ut Dilingæ, in Gymnasio, ab Othone Card.
 Augustano, cujus ditioni oppidum illud suberat, fun-
 dato, sacram Theologiam doceret. Non sefellit homi-
 num de se expectationem, sed superavit: nam incredi-
 bile est memoratu, quantum sibi, optimi præstantissimi-
 que Theologi, quantum, singularis eruditionis, famam
 consecerit. Quæ fama, unius civitatis terminis non con-
 tenta, quasi extra ripas diffuens amnis, longe lateque
 sese diffudit, ac Germaniam primum, tum Europam u-
 niversam, excurtens, omnium virorum Principum ani-
 mos, omnium Academiarum studia commovit: unus-
 quisque enim vir princeps, unusquisque locus, ubi lite-
 rarum domicilium esset, inflammato studio, tantum sibi
 doctorem expetebat, a quo, in ipsorum Gymnasiis, ju-
 ventus, ad omnem divinarum humanarumque rerum
 scientiam, institueretur. Sed vicit tandem, eximium
 Gulielmi V, Bavarorum Ducis invictissimi, studium;
 cui, ad Ingolstadiensis Gymnasii ornamentum ac decus
 illum deposcenti, non potuit obsisti. At, quænam tan-
 ta est vis ingenii, quæ tanta orationis ubertas, quæ ho-
 nores summi que significationes officii, a præstantissimo
 illo omnium fere sue ætatis Principe, Gregorio exhibi-
 tas, possit explicare dicendo? Non enim sapientissimum
 illum Ducein fugiebat, quantum ornamenti ac nominis,

Gymnasio illi, tam eximii omnium doctrinarum genere hominis adventu, quæreretur, qui præsertim; doctissimis suis disputationibus, infestissimus hæreticarum partium hostis haberetur. Quemnam enim, ad incredibilem admirationem non efferret illa ejus, de omni re, quæcunque in disceptationem questionemque vocaretur, copiosa ac sapiens oratio? quis in illo ejusdem, in argumentando, & argumentis respondendo, acumine ac prompta subtilitate non exhortesceret? quis, non stupefactus hominem, de rebus horridis nitide, de obscuris perspicue, de jejunis copiose loquentem, intueretur? quis altissimis defixam radicibus, ac firmiter hærentem, vim varietatemque doctrinæ, non summis in cælum laudibus efferret? Quid verbis opus est? si quæ ab eo responsa darentur, iis, non ut ab homine acceptis, sed ut a Deo cælitus immisissis, honor habebatur. Neque in oppugnandis hæreticorum castris, aut in eorum conatibus repellendis, tum publicis disputationibus, tum libris editis, se ipso inventus est minor, nemo enim hæreticus cum illo congressus est, quin ab eo certamine, aut ipsius argumentorum quasi telis confossus, aut sua ipsius confellione victus superatusque, discesserit. At, quænam tanta vis esset, quæ rationum, quæ ab ipso afferebantur, firmitatem soliditatemque infringere ac labefactare conaretur? Quid mirum, si, communi omnium voce, eodem quo D. olim Augustinus, Mallei hæreticorum, decoreretur elogio? Circumscribuntur, in unum collecta volumina, variis temporibus variisque de causis pugnata, cum hæreticis certamina, hoc titulo inscriptum, *De rebus fides, hoc tempore controversis, libri, qui hactenus extant, omnes, & alii, nondum antea editi, ad Serenissimum Bavariae utriusque Ducem Gulielmum V.* Reliquit etiam, ad D. Thomæ Aquinatis summam, commentarios, quatuor voluminibus explicatos; quibus, incredibili subtilitate, brevitate, ac perspicuitate, quæcunque ad sacram Theologiam pertinent, traduntur, exponuntur, firmitur: qui commentarii, a cupidis, ejus facultatis, vehementissimo studio postulati, ac tandem in lucem editi, cum ob ingentem emtorum numerum, quem invenerant, exempla eorum omnia fuissent distracta, nec-

cesse fuit eas iterum ac sæpius prælo committere. Quamobrem unus ex bibliopolis Urbis, cum, die quodam, ante tabernam suam, prætereuntem Gregorium aspexisset, Hic, inquit, est ille, qui suis libris, sæpius impressis, bibliopolas plures, magnas ad divitias opesque perduxit. Nihil illi facilius fuerat, quam suos hos commentarios, longissimis disputationibus, acutissimisque meditationibus, quemadmodum a pluribus præstanti ingenio ac doctrina viris faciitatum esse videmus, auctiores ac locupletiores efficere; quod ea omnia, longo studio diligentiaque collecta atque disposita, in sua literaria suppellectile numerarentur: sed, dedita opera id a se prætermisum aiebat, quod spes sibi esset, fore, ut melius de sacræ Theologiæ studiosis mereretur, si omnia rerum capita, quæ in ea facultate continentur, ex immenso prope spacio, in exiguum sane gyrum compellerentur, ac brevi, facili, perspicuaque via ac methodo traderentur. Id quod est egregie ab ipso perfectum. Quæ res magni argumenti loco esse debet, summam illum atque perfectam ejus scientiæ notitiam egregie animo comprehensam habuisse. Per annos sedecim Gregorius Ingolstadiense oppidum Gymnasiumque, doctrinæ suæ lumine, apud omnes gentes nobile atque illustre reddiderat: sed, utpote optime de hominibus illis meritis, octo alios annos superioribus addidit; quos ibidem, a maximis gloriosissimisque laboribus feriatu, exegit: cum interea summis esset viris honori, literatis venerationi, hostibus catholicæ fidei terrori atque formidini. Verum, non solum oportebat, sed necesse erat, ut tam clarum sidus non uni tantum eidemque remotissimæ orbis terræ parti luceret, sed in Urbem, omnium terrarum arcem, translatum, radios inde suos latius longiusque diffunderet. Romam cum evocandi causa fuit inopinatus & immaturus P. Mutii de Angelis, summi Theologiæ doctoris, interitus, in cujus locum alter erat subrogandus. De quo Mutio nihil dicam amplius, nisi, illud Angeli in eo cognomen apte dignoque in loco fuisse collocatum; tum, ob insignem ingenii celeritatem perspicacitatemque, tum etiam, ob suavissimos mitissimosque ejus mores, nulla amaritudinis labe conspersos. Sed quid mi-

rum est, tantam in eo vim suavitatis fuisse, cum fel, amaritudinis receptaculum, in ejus, post mortem insecti, extis, non apparuerit? Quæ res, prodigio similis, poëticæ facultatis in Collegio Rom. studiosis materiam attulit, qua, vario carminum genere, argute eleganterque, in ejus pene prodigiosam lenitudinem animi, luderent. At Gregorius, ubi Romam attigit, quæ Vrbis futura erat theatrum illius ingenii, & voce erudita dignum, simul auditus & probatus est, ac singularis propemodum doctor existimatus. Sed vix Theologiæ docendæ munus exequi cœperat, cum traditam sibi præfati studiorum provinciam accepit, summaque eorum cum laude administravit, qui dabant operam literis, quique, in eo studiorum, quibus ille præerat, genere, principes habebantur. Sed nulla adhuc illi, Clementi VIII, qui tum Petri cathedram obtinebat, ejusdemque aulæ, facultas obtigerat declarandi, quis esset, quantumque ingenio ac doctrina valeret; cum fuit ante ipsum Pont. gravissimis acutissimisque disputationibus, P. Ludovicus Molinæ suscipienda defensio, de eo, quod attinet ad societatem consensionemque divinæ gratiæ cum libero hominis arbitrio. Quæ controversia, quia illustre ejus nomen reddidit, eumque in maxima apud omnes estimatione & gratia posuit, cogeret me, ut quædam, quæ in ea causa ventilanda excutiendaque contigerunt, paucis exponerem, nisi & loci, ubi disputatum fuit, reverentia, & negotii ipsius indoles tenerrima, mihi silentium imponeret. Accedit, quod summus Pontifex gravissimo edicto caverit, ne quidquam eorum, quæ tunc gerebantur illic, vulgaretur. Vnde ergo solidi quid constaret mihi, quem nec suspicione nec incerto partis alterius relatu niti oportet? Hoc interim notum omnibus est, quod Clemens Pont. cum summa ipsius, erga Gregorium, voluntatis significatione, eos illi honores habuerit, qui vix præstari cuipiam solent; ut mense Martio, in ea disputatione, quæ ceteris finem attulit, cum Gregorius ita vehementer ex stomacho laboraret, ut stare non posset, atque Pont. ejus esset audiendi in primis cupidus, sedentem, disputationi operam dare permiserit. In quo ille declarare visus est, quanti hominem faceret, cui id concesserit,

rit, quod ipsis etiam Episcopis denegatur. Interea, cum morbus illi fieret amplior, adeo, ut medicamentorum via aliqua reprimi vincique non posset, de medicorum sententia experiri placuit, num Neapolitani situs amoenitas, ac saluberrimi suavis aeris, aliquam laboranti opem afferret, & amissam valetudinem recuperaret. Nulla vox est, quæ honores, atque omnia officiorum genera, ab humanissima illa civitate, ac præsertim a primis ejus proceribus, in illum exhibita, possit exprimere: nam, quidquid dixerit, minus erit. Dabat operam unusquisque, ut tantum virum, tantorumque meritorum fama notissimum, morbi injuria afflictum, sublevaret, & in veterem amissæ valetudinis locum revocaret. Sed frustra hæc ab illis opera suscepta est: nam, cum jam morbus ita invaluisset, ut ejus viribus obsisti non posset, coactus est Gregorius illi cedere. Itaque, multis editis pietatis egregiæ signis, magno bonorum literaturumque omnium cum lætu, in villa Tiberii Carassæ, Bisiniani Principis, diem obiit supremum, annos natus quatuor supra quinquaginta. At, simulac Ingolstadtum fuit de Gregorii morte allatum, in qua ille urbe tot annos, tanta cum gloria, vixerat, Gymnasium illud, debere à se tanto hominis ingenio ac virtuti existimavit, ut elogium, quod subjicitur, marmoreis incidendum tabulis locaret, quod esset & perpetui sui erga illum animi testimonium, & vivam illius apud posteros memoriam conservaret, atque immortalem, si fas esset, efficeret.

Gregorius de Valentia, Metimnensis, Hispanus, Sacra Theologia Doctor, inter Theologos sui temporis nulli secundus, Parisiis vehementer expetitus, a Stephano, Polonia Rege, diu postulatus, præclarum hujus Academia decus, in qua annos XXIV commoratus, cum Sac. Theologiam, sexdecim annis continuè, magno auditorum plausu & fructu, sacundissimaque eruditionis propagatione, docuisset, atque interim, in omni controversiarum genere, contra hæreticos quam multos, compluribus libris editis, nunquam non victor, egregie demonstrasset, universamque Scholasticam Theologiam, qua-

tuor Commentariorum tomis, commemorabili opere illustrasset, immortalem nominis gloriam adeptus, anno cld l XCVIII, supersorum suorum voluntate, Romam advocatus est, cum illic, partim Sac. Theologia Professor, partim supremus in Collegio Soc. Jesu studiorum moderator, aliquando clarissimus vixisset, demum, assiduus laboribus fractus, & in veterata agetudine consumtus Neapoli, quo, valetudinis causa, ager concesserat, e vivis, semper victurus, excessit, XXV Aprilis, anno cld l CIII, aetatis LIV.

II.

IO. BAPTISTA
STROZZA.

SI quisquam Relp. in qua natus est, utilem operam praestitisse perhibetur, in his non postremum obtinet locum Jo. Baptista Strozza Florentinus. Nam, dum vixit, assiduam dedit operam, quod in ipso fuit, ut magno civibus suis usui esset. Atque, si melius de Rep. mereri dicendi sunt ii, qui probos illi cives, atque, optimis moratos moribus, praestant, quam qui urbes, sua pecunia, mœnibus cingunt, ædificiis exornant, opibus augment, quam alia in re Jo. Baptista studium suum posuit, nisi ut civium suorum animis, detractis vitiis, virtutes infereret? In quo magnam meruisse laudem exillimatur, ac merito: nam, ut urbium incolæ, opibus ac divitiis abundant, ut ædificiis amplis & illustribus habitent, ut pulcre muniti sint muris, si tamen in illis avaritia, luxuria, scelus, perfidia, & inscitia versetur, divitiz sunt civibus suis oneri atque miseriæ, quod sint fomenta vitiorum; tum, elegans urbis species dedecori, quod honestius corpora, quam animi, habitare dicantur; munitionum moles nulli fere usui, quod, nisi vitia ab oppidis exulent, centuplex murus rebus servandis sit parum. Summa igitur cum laude, omnes ille ætatis industrizque suæ nervos in eo contendit, ut patria iis rebus pollens existeret, quibus veræ Rerump. fortunæ continentur. Etenim præclara adolescentium ingenia, quæ natura, ad omnes egregias artes, tanquam inchoaverat atque dolaverat, excipiebat, ut expoliret atque perficeret,

ret. Erat ille Philosophicis ac Theologicis doctrinis instructus, Græcis ac Latinis literis doctus, poëticæ facultatis ita peritus, ut non cum æqualibus suis solum, sed cum majoribus etiam natu poëtis, compararetur. Has ille disciplinas, in instituendo docendoque prudentissimus, juventutem edocebat, & quotidianis, domi suæ, disputationibus exercebat, ac sæpius, quod umbratili illa institutione didicerat, in pulverem & solem cogebat educere: cujus rei magnam illi facultatem dabat insignis academia, quæ suis in ædibus, magno literatorum omnium, qui essent Florentiæ, concursu, celebrabatur. Quæ vero ingenia, fortunæ culpa, ne emergent, oppressa cernebat, suis ipse opibus ac facultatibus, quibus erat affluens, sublevabat; libros, vestem, cibos, habitationem, omniaque ad necessarium usum illis præbendo. Utinam eorum non nemo, si non rem, parem tamen voluntatem ac studium, eidem emetitus esset, neque odium pro amore, injuriam pro beneficio, rependisset. Erat oculis, pituita e capite defluente, captus; quæ calamitas multos ejus familiæ viros invasit; sed ingenii acie perspicaci, judicii acumine acerrimo. Mortuus in patria; triste omnibus sui desiderium reliquit: sed ejus obitus iis luctuosus fuit in primis, qui multum ingenio, parum vero a fortunæ muneribus instructi, duces, magistrum, patronum, ac regem, sibi creptum esse, querebantur.

III. IVLIVS ROSCIVS HORTIVS.

Horti, urbs, nulli earum, quæ in Faliscis numerantur, antiquitate ac nobilitate inferior, Phœbi Musarumque delictæ, fere semper præclara hominum ingenia, ad omnia elegantissimarum artium studia, & ad poësin in primis apta, produxit; quæ, tanquam flores eximii, odore & amœnitate, non uni tantum civitati, sed omnibus, apud quos Græcæ Romanæque literæ vigent, essent voluptati, admirationi, ac laudi. Mitto eos, quos Philosophiæ ac Jurisprudentiæ laus nobilitavit, ex iis, qui, cum aliarum etiam laudandarum facultatum gloria

ria florere, poësin etiam sunt amplexi. Ita Horti Julii Roscio, nobili apud suos genere nato, delectantur, ut non alio magis cive & alumno glorientur, neque magis se jactent. Hic admirabili quodam naturæ ipsius habitu, ac prope divino, præditus, cum eximiam hanc illustremque naturam ad omnium rerum magnarum atque artium scientiam contulisset, quid mirum, si orator, si poëta, omni laude cumulatus, existerit? Etenim, nisi oratorum ac poëtarum, ex rerum cognitione, efflorescat ac redundet oratio, tanquam cassa nuce inanior, negligatur ac repudietur necesse est. Itaque tanta vis ingenii, ab omnibus, qui tunc temporis magnum in literatis viris nomen habebant, primum cognita, (non enim insignis flammæ cujuscumque splendor latere diutius potest, quin suo se lumine prodatur,) tum adamata, deinde expetita, postremo exulta omni officiorum genere est; sed in primis, ab Aldo Manutio, arcuissimum sibi amicitie vinculo constricta, ac ita illum placuisse Manutio, tantum in ejus laudibus pondus mea sententia habet, propemodum ut ceteris anteponendum esse videatur: nisi enim summa ac prope singularis, in ejus ingenio atque doctrina, vis boni fuisset, nunquam ita a tali viro coli diligique potuisset, ut vix quidquam in amore fuerit ardentius: cujus viri eruditio, a majoribus ipsi suis quadam quasi hereditate relicta, ita deinde, perpetuo labore studioque, suis est opibus aucta, ut parenti etiam ipsi Paulo, quo tum in his literis humanissimis nil habebat orbis terrarum præstantius, esset admirabilis. Quanta autem inter Aldum & Julium necessitas amicitieque usus intercesserit, declarant epistolæ, quæ extant impressæ, & eruditorum manibus teruntur, tum Manutii ad ipsum, tum ipsius ad Manutium, scriptæ. Sed, quid tam eorum, qui se literis abdiderunt, ostendit industriam, quam quæ potuerunt ad communem afferre fructum, atque in conspectum lucemque proferre? Sunt in medio complures ejus orationes, ab ipso editæ, in quibus & orationis copia, & sententiarum gravitas, & elegans verborum comprehensio, atque artifex etiam stylus, apparet. Summa omnium cum voluptate leguntur epigrammata, elegix, odæ, & sacrorum carminum liber: quo
omnia,

omnia admirabilem ejusdem ad poësin indolem, ac divinum illum spiritum, quo poëtæ dicuntur afflari, mire testantur, exstant elogja militaria, tanta cum fide, industria, ac sermonis majestate conscripta, ut ejus ingenii magnitudinem, candorem animi, ac magnificum orationis genus, ante oculos ponant. Attigit etiam Remp. ac, pluribus & maximis muneribus functus, in gravi atque difficili provinciz cujusdam administratione, vitam reliquit.

IV. FRANCISCVS BALDVCCIUS.

Franciscus Balduccius, Panormitanus, Siculus, fuit ingenio magno; quippe qui, naturæ bono, sine multis literis, quibus vix tinctus erat, eo mihi pervenisse videtur, quo alii ejusdem ætatis, omnibus liberalibus disciplinis instructi, Græcis ac Latinis literis docti, multo præterea labore multaque industria, adspirare non potuerunt; non quia illis ingenium, sed poëticum ingenium defuerit. Erat illi genus dicendi elegans, sublime, magnificum, succi plenum, perspicuum, dilucidum; sententiz graves, concinnæ, acutæ, venustæ. Dictabant, venisse eum Romam, quod non liceret illi esse in patria, eo quod hominem occidisset, & mulierculam secum adduxisset, ex qua liberos, tum virilis tum feminei secus, susceperat. Erat in suis carminibus oda, quæ filiulam, Clementia nomine, quæ infans in cunis excesserat, Etruscis elegantissimis versibus desiet. Sed mas, inopia cogente, se insinuaverat in domum meretricis cujusdam locupletis ac nobilis, ex qua pauculos interdum nummos, stipis gratia, referebat: at, cum die quodam, ab ea ære gravior domum se recepisset, Balduccius, ex temporaneo carmine, manum, quæ tam large munera, præbuisset, in cælum extulit, illudque per eundem puerum ad meretricem misit. Aderat ibi forte vir doctus, poëta summus, amicissimus meus, qui aliquot ante annos est mortuus: huic meretrix carmen legendum dedie, quod simulac legit, admiratus est divitem hominis pauperuli venam. Florebat, per id tempus, Romæ, Academia Humoristarum, magnoque erat apud omnes gen-

tes honore ac nomine. In hanc Balduccius ab Henrico Falconio, acerrimo optimorum ingeniorum æstimatore, introductus est: in qua simul auditus, & probatus est. Cæpit tum, viros nobiles ac divites, suis carminibus spe mercedis ac præmii, laudare; nec sua spes illum sefellit: nam a pluribus magnam interdum vim auri & argenti capiebat; qua facile inopiam tolerare potuisset, si nummis uti scivisset, neque homo, suavia in præsentia quæ essent, prima ducens, neque parum consulens in longitudinem, totum, quod esset datum, statim dissipasset. Quamobrem, cum, præter poeticam facultatem, qua nemo unquam factus est dives, nullum aliud esset illi artificium, quo se tueretur, nisi librarii art, quam aliquandiu exercuit; cogeatur, mutuam ab amicis pecuniam, quam nunquam redderet, petere. Atque ipsi etiam creditores ita dabant, ut qui se nunquam quidquam ab eo recuperaturos existimarent; sed, cum sæpius eundem piscis ad hamum recurreret, neque mutuandi finem faceret, eorum non nemo, Ecquando, ajebat, expleberis? modo tibi dono dedi, decem videlicet aureos nummos, & nunc alios decem petiitum advenis. Cui ille, iracundia, supra quam dici potest, elatus, respondebat: Quid sonuiss de pecuniis, a te mihi dono datis? egone tuis nummis ego? ac mox potero te pecunia obruere, mox tibi auri argentique fiscos ob os objicere, si expectandi copia erit. Sed, cum inanis semper incederet, nec dicta sonarent, cogeatur, nisi inedia confici mallet, invocatus, amicorum mensas obire; quamquam satis sua sponte alienis escis studebat. Ac tandem invenerat tonsorem quendam, qui, siue misericordia motus, siue animi magnitudine ductus, cum mane tum vespere communicabat eum mensa sua. Verum ille, ut erat plane contumax gloriarumque plenissimus, illum sibi cibum non gratis præberi, sed tanquam debitum, ac longe infra meritum suum, persolvi, existimabat: adeo ut, die quodam, cum magna esset piscium caritas, in naticello, pisciculos minutulos aliquot in prandium coerneret. Tum Balduccius, tanquam si insigni aliqua injuria affectus esset, minaci ore, irata voce, ardentibus oculis, Itane, inquit, accipis poetarum hujus ævi facile prin-

principem? itane tibi dignus videor, quem illudas? tunc hos mihi pisciculos ausus apponere, tanquam si essem homuncio unus de multis, ac non, inter omnes, plane singularis? vel hæc puls, quam insulsa, quam contra animi mei sententiam! at te decet facete animadvertere animum tuum ad animum meum, cūramque adhibere, ut prævolet, quo ego velim. Ac multis præterea aliis gravioribus verbis hominem verberavit, tantum quod non fustem in manus sumpsit, domoque præcipitem illum eiecit. Ac tonsor, qui multos jam menses admirabili patientia toleraverat incredibilem hominis contumaciam, atque fastidium, tandem victus, Itane, inquit, agis? Surgensque, obtorto eum collo e mensa surripuit, atque extrusit hominem foras: qui, ut erat mappa ad collum alligata, amenti similis, per viam excurrens, exclamabat, Vestram opem, populares; hic Bulsiris, hic Lycaon, violavit hospitium, violavit hospitium. Locavit deinde operas suas, in scribendis epistolis, Jo. Antonio Vrsino, S. Gemini Duci: cui cum ejus oratio nimis putida, nec, quæ satis eos deceret, ad quos scribebatur, videretur, ad manum eum potius quam ab epistolis habuit. Illud vero homini iracundo, & magna sui ipsius opinione inflato, quasdam quasi faces admovebat, quod Dux, ad corrigenda atque emendanda ipsius carmina, cocum accersiri juberet, qui, domi suæ, universæ familiæ, cœnas & prandia coqueret: ferebat enim indigne, sua scripta, quæ ceteris anteferebat, in coci existimantis arbitrium vocari: itaque se domo illa, quantum potest, eripuit. Neque ita multos post annos, exceptus est domo, a Duce Brachiani; verum, ob morum importunitatem, quibus ferri tolerarique non poterat, coactus est brevi, alium dominum, alios Lares, aliam urbem, aliam civitatem exquirere. At Neapoli, ubi principi cuidam viro in servitutem se dicaverat, cujus uxore mulier alia nulla erat pulchrior, duo contigerunt, primum, per viam publicam iter facienti, nescio quid superne e fenestris dejectum, in oculos incidit, quod statim ab eis lumen exulare coëgit; quamvis illud redux factum sit postea, egregia medici cujusdam excellentis opera: deinde, captus amore dominæ, eo insanix evasit,

ut,

ut, cum xger in lecto decumberet, in culcitra, ita, ut erat lintheis involutus, eo deferri se iusserit, qua erat mulieri transeundum: quam ut venientem aspexit, cepit clamare, ut sibi, ex amore ipsius laboranti, suppetias ferret, neque se tam misera affici ærumna sineret. Ac non potest satis narrari, quam lepidos de se ludos jucundosque præbuerit. Reversus Romam, cum non esset unde viveret, cogebatur quotidianum victum a caupone, credita pecunia, coëmere: sed cum solvendo non esset, nec quidquam cauponi præter verba præberet, iudicis decreto sibi addictum, a lictoribus in carcerem rapicurabat: sed celeriter aderat vir aliquis dives, qui percontatus, quanti esset addictus, tantundem pro illo solvebat. Quod sæpenumero erat faciendum: nam identidem ad eodem inopix fluctus revolvebatur; quibus fluctibus ut se eriperet, & tanquam ad littus scapham adverteret, sæpius ab eisdem abreptus est, & tanquam in profundum abstractus; hoc est, nihil propius est factum, quam ut ille, dum se ab inopia studet exinere, sub suste vitam finiret. Venerat Romam a Cæsare ad Urbani VIII missus orator, ita dives, ut Picos divitiis superare diceretur: in hunc, solito suo aucupio, Balduccius carmen scripsit, illudque, in membrana elegantibus sane literis exscriptum, & coriaceo tegmine, multo auro interlito, septum, illi tradidit: ac primum orator ita delectatus est munere, ut iusserit, trecentos poëtæ, a quo ornabatur, nummos aureos numerari: sed, cum postea legisset, scriptum in eo, se, oratorem, a Cæsare, ad præstandam Urbano obedientiam missum, iratus, revocavit decretum de trecentis aureis nummis, ac pro illis trecentas plagas eidem infligi mandavit. Nam Cæsares, non obedientiam, sed cultum & honorem, Rom. Pontificibus a se deferri debere contendunt: qua de re, per eos dies, tantis viribus tantisque contentionibus actum fuerat, ut nihil magis: neque tantulum moræ intercessisset, quin imperata perficerentur, nisi orator a quibusdam bonis viris fuisset inhibitus, qui persancte affirmabant, id ab homine imperito, non astu neque dolo, sed inscitia vel incuria, fuisse admissum. Neque mentiebantur, in defendendo: nam quibusdam in rebus, non plus

plus erat illi cordis, quàm lapidi. Fuerat, hyeme quadam, a viro principe, tunica serica pingui, & malaco calido pallio Hispano; ne algeret, donatus; sed postea ætate urgente, cum sub illis vestibus sudaret, nec leviores haberet, forte transiit per forum Hebræorum; quorum fere singuli, ut illorum mos est, cœperunt hominem ad se attrahere, ac dicere, vestes, quibus uteretur, esse graviores, quam ut anni tempus servidissimum posceret; se alias illi, magis ad id tempus accommodatas, exhibituros. Homo, qui interdum non plus saperet, quam sus occisa, hereditatem sibi obvenisse arbitratus est, ac se totum nebulonibus illis permisit, vestesque detritas ac pene laceras, iis, quas habebat, longe optimis mutavit: ac postea, ut quemque amicum offenderat, Hebræorum in se caritatem ac benevolentiam commemorabat, ex semine Abrahæ prognatos esse, qui ita hospitalis fuisset, assererat, ac, posthac pueris se inimicum futurum, qui eos lapidibus insectarentur, ajebat. At cuculus non intelligebat, vestes, quas dimiserat, longe pluris esse, quam eas, quas suscepisset, & a vasis illis sibi manum aditam fuisse. Voluit postremo sacris initiari, ut, re divina facienda, tantum lucraretur, quantum esset ad sustentandam vitam satis: ac primum, Xenodochio S. Xisti navavit operam cappellanus; tum Paulo Sfortiæ gratus fuit, ac demum Principi Gallicani acceptus; cujus domi cum in morbum incidisset, ac Principis illius munificentia, omnibus in rebus, liberalissime tractaretur, maluit ad nosocomium Basilicæ Lateranensis; quo æger sæpe confugerat, deferri, ubi, paucos post dies, vi morbi sublatus interiit. Reliquit volumen egregium; carminum Lyricorum; quod opus multas superstes ætates erit, nec una cum auctore, ut in plerisque usui venit, mortem obibit. Neque id non intellexit ille: nam, quoties amicula cum eo altercabatur, quo illam ex fera mansuetam faceret, Vide, ajebat; si pergis odiosa esse, ego tibi immortalitatem adinam, quam parere meis versibus possum.

v. MARIUS ALTERIVS.

Quemadmodum a vicinis malis boni nihil expectari potest, unde verbum illud vetus, *Aliquid mali esse propter vicinum malum*; ita etiam, a vicinis bonis, multarum sæpe utilitatum fructus emanant. Familia Alteria est cum primis Romæ vetus ac nobilis; nam & platea, celeberrima parte Urbis, jam pridem Alteria vocatur, multosque domi militiæque claros viros Reip. genuit; ac nostra memoria quatuor præstanti pietate fratres, ex optimo patre, edidit, Marium, Rutilium, Laurentium, & Horatium, non tam in sinu parentum, quam in disciplina patrum Soc. Jesu educatos, ex vicinitate domus professæ Soc. Jesu, illorum ædibus proxima: quæ Societas florebat, ut cum maxime, illustribus doctrina & sanctitate viris; & in his, generis auctore, Ignatio, tum cum isti puerili essent ætate; e quibus haurire Christianæ vitæ præcepta poterant, quæ ipsis in omni ætate usui essent: tum, templi vicinitate, excitabantur ad frequentem Pœnitentiæ & Eucharistiæ Sacramentorum usum, & ad conciones audiendas; quæ ab optimis sapientissimisque Patribus habebantur, quibus nondum consilium erat, ea, quæ dicebantur, inanibus verborum coloribus pingere, nec venustarum magis quam utilium sententiarum flosculis spargere, (etenim, haud ita multo ante, nonnullos, qui ab ipsis prodierunt, ætus consuetudinis hujusce absorbuit, & ad sermonis morem ornati abstraxit;) sed eorum omnis vehemens, incitata, plena sanctimonie & gravitatis, erat oratio, quæque nervorum vel plurimum, suavitatis autem vel minimum haberet. At, ex quatuor his fratribus, Rutilius, omnibus iis disciplinis instructus, quibus ætas puerilis informari ad humanitatem solet, ad percipiendum jus civile se contulit, atque ex clarissimorum, per id tempus, legum doctorum scholis egressus, ac dignus habitus, cui juris utriusque interpretandi facultas tribueretur, primum civibus suis, in dubiis ipsorum rebus, a se consilium expetentibus, ingenii, prudentiæ, & eruditionis suæ lumen exhibuit: tum, quod I. C. honorificum est

maxime, cooptatus est in collegium sacre consistorialis
 aule Advocatorum, idemque electus, qui, ingenii le-
 gumque præsidio, pauperum innocentiam, ab iniquo-
 rum calumniis iudiciorumque pœna, defenderet. In quo
 præsertim munere, ad extremum usque vitæ spiritum,
 non sine magna caritatis laude, versatus est. Tanta enim
 vi, eorum, quibus egestas imperabat, patrocinium acce-
 perat, ut pro cuiusque illorum salute non minus labora-
 ret, quam si arcta sibi esset cognatione propinquus. Cu-
 jus tam insignem in pauperes misericordiam, tum ille,
 quo mortuus est, annus declarasse videtur. Annus eni-
 m cōlō vitæ illi initium fecit, annus vero cōlō C
 vitæ ejusdem exitum attulit; qui omnes piaculares anni
 fuerunt. Ut quodammodo divini numinis providentia
 factum fuisse videatur, ut eum, qui futurus esset ex mise-
 ricordia in pauperes clarus ac nobilis, eo tempore &
 nasci & mori contingeret, quo tempore divinæ in omnes
 homines misericordiæ lumen claresceret. At
 Horatius & Laurentius, pari probitatis innocentiaque
 laude posteris commendati traduntur; uterque omnes
 populi magistratus obtinuit, summaque cum prudentia
 atque justitia administravit; uterque ædilis, uterque
 consul sæpius fuit. Sed Laurentius in primis, plures, ex
 uxore quam duxerat, sanctissima ac præstantissima fœ-
 mina, liberos suscepit: qui ad unum omnes, ad majo-
 rum instituta, atque civitatis disciplinam, instituti eru-
 ditique, magno Reip. usui fuerunt. De quibus sigillatim
 dicere non est necesse; unusquisque enim longam ora-
 tionem desiderat. Sed silentio præteriri non potest Jo.
 Baptista, S. R. E. Cardinalis, & Episcopus Tuderinus; de
 quo nihil aliud dicam, nisi quod communis bonorum
 omnium opinio prædicat; nempe, non illum semper in
 hoc eodem dignitatis gradu, in quo nunc est, perman-
 surum, sed processurum, honoribus, longius. Verum,
 ut tandem ad Marium, a quo latius, quam voluntas fue-
 rat, evagata est, deducatur oratio; fuit ille quidem o-
 mnibus fere iis laudibus ornatus, quibus reliqui fratres;
 sed ad eas divinarum rerum scientiam (fuit enim Theo-
 logus) ac summum honorum contentum adjunxit. Nam
 cum, ob insignem probitatem atque doctrinam, locu-
 ple-

pletes ipsi Episcopatus ultro deferrentur, nunquam animum induxit, illorum quenquam accipere: ac propemodum unus; ex omnibus, intelligens, quanto satius sit, onus omnium maximum fastidire, quam illi cervices subicere; nunquam passus est sibi persuaderi, ut in illud fastidium se reciperet, sed, homo natura mitissimus ac quietissimus, contentus canonicatu, quem in *Aede* principis Apostolorum obtinuerat, summa animi tranquillitate, in literarum studiis ævum agitabat, quorum studiorum fructus non avarè intra se continebat; sed cum aliis etiam large liberaliterque communicabat; cum canonicatui illi, quoungebatur, id etiam oneris esset adjunctum, ut moralem Theologiam Parochis traderet, qui ecclesiasticæ, ejus Basilicæ, ditioni subjiçiantur, quomunere functus est egregie; neque solum doctrinæ suæ fontes in eos, qui præsentès essent, atque ab ejus ore pendebant, aperuit, sed, posteritati etiam consulens, in eos, qui futuri essent, effudit. Nam librum de Censuris, in primis utilem ac doctum, emisit.

VI. FRANCISCUS VENTURA,

SI Principibus probis, doctis, atque sapientibus, placuisse, in minima laude ponendum non est, cur non hoc præsertim nomine celebretur Franciscus Ventura Florentinus, cujus ingenio, eruditione, ac moribus, delectabatur in primis Scipio Cardinalis S. Susannæ, qui summæ sapientiæ doctrinæque opinione, quam de se conceperat, fretus, fastidiebat & contemnebat omnes, in quibus mediocris earum doctrinarum facultas inesset, in quibus se principem ac ceteris superiorem esse opinabatur. Multum igitur ingenii, eruditionis, doctrinæ, omniumque bonarum artium, in Francisco extitisse oportet, qui tantopere homini sapienti probatus sit. Sed, quod ad elegantes has literas attinet, omnis ejus facultas perspicui potest ex vita S. Andreæ Corsini, quam Latino sermone scriptam emisit. Quamobrem merito Card. illi fuit eximius, cui omne illud erat odiosum ac putidum, quod non esset in suo genere summum atque perfectum. A quo etiam, domi suæ, in suorum familia-

rium numero habitus est, educatus, & quibuscunque honoribus posset, ornatus. Nam primum, perfecit, ut in Referendariorum ordinem cooptaretur, tum, ut S. Severi Episcopus fieret. Creditur, illius opera Cardinalis usus, in constitutione illa literis mandanda, qua Gregorius XV, Pont. Max. Patrum Amplissimorum Collegio, eligendi Rom. Pontificis leges & jura præscribit. Episcopatus autem honorem, ita sibi creditum & commissum accepit, ut se omnium officiorum obstringi religione arbitretur, itaque in eo administrando, non nomen amicitie, non alterius cujusvis necessitudinis vinculum, non hominum potentiorum gratia, non utilitatis private ratio, plus apud eum valuit, quam mos majorum, quam leges, quam veritas, ac ratio, atque, ut esset sui juris & mancipii Ecclesia, cui non nemo conabatur libertatem eripere. Non dubitavit igitur hominum potentissimorum inimicitias suscipere, multorum in se odia convertere, laboris plurimum capere, vitæ pericula, pro suarum ovium incolumitate, tanquam pastor bonus, adire: nam nefarios juris Ecclesiæ prædones, cum, sæpius admoniti, non resipiscerent, palam sacrificiis interdixit, statuitque, ut numero sceleratorum atque impiorum haberentur, neque quisquam aliquid cum iis sermonis conferret, vel negotii contraheret, nisi ex eorum contagione infici, atque in ejusdem execrationis laqueos vellent incidere. Quo tempore, mira quædam & horribilia divinæ animadversionis exempla edita sunt, in improbos & contumaces: nam, cum nulla eos sceleris, quod patrarant, poenitentia subiret, nec darent operam, ut ab eo, qui ipsos devovisset, resacrarentur, atque ex devotis eximerentur, factum est, ut tanti repente terræ motus existerent, ut oppidum corrueret, multis ejus agri locis labes facta sit, terra defederit, & tanquam apertis faucibus, villas, homines, greges, & armenta, in se ingurgitaret, & in ventrem abderet, ipse vero Episcopus, tanquam Lot alter, vix vivus evaderet. Venit igitur Romam, amissis rebus omnibus, ubi cum, afflictis suis rebus ac perditis, auxilii nihil inveniret, Florentiam, hoc est, in patriam, ad suos, petiit auxilium, se contulit, neque piissimus ille Princeps, de spe sua

sua decipi passus est eum : nam, cum per eos dies, Archidiaconus, Deiparæ Virginis Desfore, excessisset e vita, in ejus locum illum subrogavit ; ut tantisper, dum ejuspiam Episcopatus occasio se daret, ejus fructibus vitam sustentaret. Sed hominem antea ad se cælum attulit, quam aliqua ejus rei sese offerret occasio. Verum magnus Etruriæ Dux, ut propensam suam erga Franciscum voluntatem ostenderet, in ejus demortui locum fratrem subrogavit.

VII.

IO. BAPTISTA RAIMVNDVS.

CUM doctus ac peringeniosus vir aliquis properat, quæ olim recte cogitaverit inveneritque, literis consignata, omnium seculorum posteritati mandare, quidnam aliud studet, nisi ea omnium, quot sunt, quotque futuri sunt, hominum arbitrio judicioque subicere ? Quæ judicia hominum cum sint varia, incerta, ac sæpenumero absurda atque iniqua, ut apparet in iis, qui, canino dente, divina Ciceronis Virgiliique, ingenii monumenta lacerare sunt ausi ; inventi sunt plures, qui maluerint, nihil omnino scripti relinquere, quam aliis invidiæ ac maledicentiæ exercendæ facultatem ac materiem dare ; tunc, arbitrati sunt, se satis magnam adeptos esse ingenii gloriam, eamque etiam majorem, ut inquit Cicero, visum iri, si in existimantium arbitrium sua scripta non venissent. Atque, ex eorum numero, qui memoriam in posterum ingenii sui non desiderarunt, fuit Jo. Baptista Raimundus. Erat in hoc homine ingenium peracere, acutum, amœnum, urbanum, facetumque ; magnum in primis studium linguarum, pene omnium : nam literis Græcis, Latinis, Chaldaïcis, Arabicis, multisque præterea aliis, egregie doctus, multos in sui admirationem & amorem attraxerat : in his Cynthium Card. Aldobrandinum, Clementis VIII, Pontificis Max. fororis filium : qui, non usitato a reliquis viris principibus more, quotquot erant in Vrbe, atque etiam foris, præstantes ingenio & eruditione viri, domum suam invitabat,

in clientelam recipiebat, quibus poterat rebus ornabat. Hic igitur Cynthius Jo. Baptistam, quoad vixit, in suorum familiarium numero habuit, dilexit; eique quotidianis sumptibus suppeditando, ne quid decisset, curabat. Cardinali mortuo, quandam in domum se contulit, eamque usque ad vitæ exitum habuit, ameno sane ac remoto ab arbitris loco, non procul a porta Collina; ubi se literis abdidit. Atque etiam erat fama, chymicæ eum arti nonnihil operæ studiique tribuere; quod arbitrator fuisse causæ, cur non multum reliquerit: nam qui sunt ejusmodi, parum heredem adjuvant. Sed quoniam, ut diximus, plurimum in eo erat leporis ac facetiarum, in apologis inveniendis scribendisque non minimum operæ solitus erat ponere, quorum quasi involucris & integumentis aliquid contineretur, quod postea philosophica interpretatione, ex illis integumentis evolutum, non minimæ, vitæ hominum, utilitati atque usui esset. Quos deinde apologos cum doctis & eruditis viris, amicis suis, communicabat. Quorum unus Julio Antonio Rodulphio pene exitium ac pestem capitis attulit. Apologus autem, sicut ab ipso Julio Antonio audiui, hic erat. Fumus, ventus, ac Dæmon, olim inter se sedus societatemque coierant; ac simul signa quædam dederant, quibus, si dispersos errare contingeret, nullo fere negotio invenirentur; atque, Ego, inquit fumus, in vaporariis, ex quibus ignis erumpit, adeo: Me autem, ait ventus, erimulis ostiorum flantem, invenietis. Ego vero, subdidit Dæmon, nusquam nisi in gibbum gibberi, sedem ac domicilium meum collocatum habeo. Quam fabulam cum Julius vetulæ cuidam famulæ suæ narrasset, quæ hoc corporis vitio laborabat, Ergo, inquit, Dæmonem inclusum in scapulis gero? Quid ni? respondit Julius, si gibbera es? Tum illa, furore percita, hastili, quod ibi erat, arrepto, ibat, ut eum medium transverberaret; neque, quod conata erat, non perfecisset, nisi ille icum, celeri ac docta corporis declinatione, vitasset. At, si ferrum eo, quo illud vis inimica direxerat, pervenire potuisset, nulla est tam disertæ docti, cujusquam oratio, quæ possit explicare verbis dampnum, quod Græcæ Romanæque literæ, talis viri interitu, fecit.

cif-

eissent. Qui vir qualis sit & quantus, quamvis ex scriptis cognosceri ipse suis potest. quæ scripta, eruditorum manibus contrita, non plus redolent doctrinæ, quam suavitatis; adeo ut non quisquam ab eis fastidio ac satietate abalienetur: quamvis, inquam, satis suo sit ipse ingenio clarus, tamen deberi hoc a me tanti hominis virtutibus putavi, ut aliquas ex eis breviter ac strictim attingam. Nulla est in arte earum, quibus liberales doctrinæ continentur, quod ipse nesciat; nullus est orator vel poëta Græcus, Latinus, Italus, quem non penitus ille cognoverit; nullus est de Theologia vel Philosophia liber, quem non attente diligenterque percurrerit, de qua scienter prudenterque non judicaverit; nullum sapiens cuiusquam dictum vel factum auditit aut legit, quod memoria septum custoditumque non teneat; unde eorum unumquodque, cum opus est, tanquam ex penu, depromit; nulla quæstio, nulla dubitatio, in immensis illis D. Thomæ Aquinatis voluminibus continetur, de qua, ex tempore, & ad cuiusvis arbitrium, non possit longas disputationes intexere. Græce autem sic loquitur, ut Athenas ipsas ejus sermo redolere videatur; quem si vetula illa posset audire, eni Theophrastus hospitis speciem visus est habere, nullam illi peregrinitatem objiceret. Ita ejus est oratio pura, suavis, atque Athenarum urbis propria. Quam suavitatem in illam suam Tragico-comædiam, quam Ulyssis tubam inscripsit, est transferre conatus. Quod illi contigit ex sententia. Sed magnam summis illius virtutibus injuriam facere videor, dum eas ex latissimo, in quo vagantur, campo in exiguum sane gyrum conor includere. Quamobrem, fatius esse arbitror, tanquam Agamemnonis caput, involutas silentio relinquere, quam non ex vero eas exprimere. Sed ut ad Jo. Baptistam, unde paululum digressa est, revertatur oratio; postquam multos in literarum studiis annos expleisset, tandem evocatus est eo, quo necessario eundem est omnibus. Nec propterea noluit mors eum ad se recipere, quod literatus esset, sed eodem, quo indoctos ac rudes, jure comprehendit; ac pejore etiam habuisset conditione, si a doctrina, quam profitebatur, mores discrepassent.

VIII. ATILIVS AMALTHEVS.

HVic, si non divinarum humanarumque rerum scientia, si non vita laudabiliter acta, si non mores ex vetere illa atque sanctissima disciplina, si directum illud ad virtutem iter, quod semper tenuit, non propriam ac peculiarem laudem, non æternam nominis famam confecissent, magno honori ac decori dandum existimem, quod ab Amaltheorum familia genus & originem duxerit. Nam parentem habuit Hieronymum Amaltheum, Jo. Baptistæ fratrem: quos, ex iis, qui, nostro ac paulo superiore ætate, ad scribendos versus se contulerunt, quibus & sententiarum gravitate, verborum splendore, suavitatem, elegantiamque cedere debeant, plane non video. Verum Attilius, hanc poëtice facultatis laudem patri ac patruo remittens, eorum, qui ex eadem familia, gravioribus disciplinis, quos enumerare non est necesse, floruerunt, æmulatus est gloriam: ac Juri civili & Pontificio primum, tum sacrarum literarum studiis, egregiam operam dedit. Et, quamvis arcanum earum notarum, quibus aliud scribitur, aliud intelligitur, sibi commissum a summo Pont. esset, P. Mutio de Angelis, ac Gregorio de Valentia, qui illi successerat, ita erat tamen deditus, ut in illis occupationibus, quemadmodum ipse sum testis, qui etiam tum adolescens summis illis doctoribus operam dabam, nullum fere diem, ab illis audiendis, intermitteret: totum se deinde Reip. tradens, coëptus est adhiberi ad referendas summo Pont. causas, ab eoque in illum ordinem cooptatus. Post aliquot annos a Paulo V, Athenarum Archiepiscopus creatus, missus est Coloniam, Sedis Apostolicæ Nuncius: quam provinciam ita gessit, ut ingenium agnoscerent omnes, animi integritatem susciperent, abstinentiam admiratione prosequerentur. Nullum beneficium, nullum decretum vendebat, gratis fere omnia dabat: nullum appetentis animi signum præbebat. Quamobrem cum omnes, tanquam a cælo delapsum, intuebantur. Incredibili erat erga pauperes beneficentia, & in eos præsertim, qui ex hæreticorum castris in nostra præsidia confugissent, de qui-

qui-

quibus, in quadam ad Cardinalem Bellarminum epistola, a quo rogatus fuerat, ut cuiuspiam illorum necessitatibus subveniret, Si mihi, inquit, centum annua aureorum millia contingerent, nonaginta quinque istorum usibus assignarentur. Romam reversus, totum se Deo, ac pietatis operibus tradidit, Sodalitatem B. V. Assumptæ, in Domo professa Soc. Jesu, frequentabat, Nosocomia adibat, ægrotantium cubilia circuibat, iisque sua manu lectos sternebat, cibum præbebat, atque alia, quantumvis sordida, pietatis officia præstabat: in quibus operibus senex est mortuus, atque in Æde Nominis Jesu sepultura affectus.

IX. ALEXANDER CARD. VRSINVS.

Sunt quidam, quibus regalis purpuræ dignitas, splendoris ornamentique plurimum afferat; nempe ii, in quorum vita nihil invenias, quod multum reprehendas, nec quod magnopere laudes. Itaque isti, quod celebrentur, quod niteant, non semper virtutis suæ merito, sed fortunæ quasi beneficio, debent. Sunt alii, qui plus ex dignitatibus dedecoris & damni, quam honoris & commodi contrahunt; quemadmodum ii, qui insignis cuiuspiam vitii infamia notati, in editum atque illustrem aliquem dignitatis locum invaserunt. Minus enim, sermonibus hominum vituperationibusque essent obnoxii, si vitia, quibus laborant, in privatæ vitæ tenebris jacerent, neque ea clarissimi illius honoris lumen accenderet. Postremo, sunt alii, qui multo plura ornamenta ac decora ad honores afferunt, quam ipsi ab iisdem accipiant; videlicet illi, quos non ambitio, non hominum favor, non magnitudo pecuniæ, non vitiorum eorundem societas & conjunctio, sed multorum magnorumque in Remp. meritorum ratio, ac perfecta atque absoluta virtutum omnium laus, ad culmen illud attraxit. Cui generi hominum tertio si aditus soli pateret ad honorum fastigia, atque interclusus ceteris esset, quænam esset ejus ordinis, in quem illi venissent, majestas! quod

decus? qui splendor? quanta, ex eo, generi hominum, utilitas fructusque maneret? Hæreticorum hominum factiones; quorum præsertim improbitas; stultitia, audacia, ex illius ordinis vitio, ubi incurrat in oculos, corroboratur ac nititur, dilaberentur atque diffunderent, malarum artium, quibus improbi ad honores nituntur, vastitas, pernicies; exitiumque contingeret; optimi in Repub. mores dominarentur, pessimi exularent; semper uni cuipiam Reip. Christianæ navis regende clavus illi committeretur, qui, non imperitia vel cupiditate aliqua adductus, eam in scopulos ac syrtes impelleret, sed qui feliciter in portum adveheret, cui non bellâ, non odiâ, cordi essent, sed inter Christianos principes, pax, amor, atque concordia. Ad id exemplum, de quo loquimur, tres viri clarissimi nostra ætate extiterunt, ex quorum virtutum hominibus, maximus est Cardinalium Collegio splendor accersitus. Primum, Alexander Ursinus, Virgili Ducis Brachiani filius, & Pauli Jordani nepos; qui eximie a Sfortia Pallavicino collaudatus est in dialogo, quem scripsit de honore ubi de hoc homine certamen fuisse narratur inter naturam, fortunam, atque virtutem, quænam illarum; pluribus eum ornamentis ac donis instrueret. Nam, in amplissima civitate summo genere ortus, cognatione & affinitate summis etiam Regibus implicatus, maximis honoribus amplificatus, nihil fere eorum desideravit, quæ a fortuna tribui solent. Tum, nactus est a natura ingenium perspicax, acutum, docile, nobile, incredibilem morum suavitatem elegantiamque. Nam liberalis, splendidus, & in omni vita victuque affabilis, tantaque oris atque orationis commendatione præditus, ut nemo esset, quem non ipse in sui amorem impelleret: præterea, memoria tanta, quantam in iis fuisse legimus, qui tanto hoc naturæ bono excelluisse narrantur, neque ea tantum, quæ signum est ingenii præcipuum, cujus est virtus, facile percipere & percepta fideliter continere, verum etiam ea, quæ, præter sententias rerum, verba etiam, quibus sententiæ explicantur, defixa in animo atque inculpta tenemus. Educatus est in domo Ferdinandi Medicei, Magni Ducis Etruriæ, avi sui materni; ubi, quod habuit a natura boni, non solum

lum

lum alere, verum augere etiam posset. Nihil enim haurire, ab ea indole, poterat, nisi altum, regale, magnificum. Inde illa ejus, sine molestia diligens affabilitas; qua, cum quadam celsitudine animi, ad aliorum conditionem, cum erat opus, se submittebat: ut non alias magis videretur esse vir princeps, quam cum, ut se parem infimis faceret, principis personam conaretur exuere. Incredibili erat vigilantia, qua, ut matutinas horas literis daret, multo surgebat maturius, quam ii, quibus opera vita erat. Ut non, quemadmodum olim Demosthenem, ipsum puderet, suam in surgendo celeritatem ab artificum solertia vinci; immo potius artifices ipsi pudore corripì possent, quod ipsoꝝ sollicitudo ac diligentia ab illius vigilantia superaretur, cui, ob præstantiam dignitatis atque fortunæ, concessum esset, ut nitidius, quam ceteri, se curaret, somnumque ad multam diem produceret. Scripsit, tum soluta oratione, tum versibus, elegantissime nitidissimeque, adeo, ut odam ejus quandam Urbanus VIII, qui summus ejus generis carminum artifex erat, cum inspexisset, non solum maximam illi laudem tribuerit, verum etiam, modulatori in prima optimo, modos eidem faciendos mandaverit, ut in templis caneretur. Erat autem de Christi Domini cruciatibus & morte, scripta dulcissime. Quorum cruciatuum memoriam perpetuo in animo infixam habebat; ut etiam de eodem argumento, nocturnas diurnasque quasdam composuerit typisque mandaverit horas, quas ipse alique, qui vellent, recitarent. Præterea, e collo ad nudum pectus, Christi crucifixi imaginem, ex argento vel ære, sibi demiserat, hamis acubusque acutis probe refertam; quam identidem pectori adstringebat, ut aliquam ex eo sanguinis guttam eliceret. Et usque adeo pietatis Deoque placendi studio flagrabat, ut tentaverit, e purpuræ celsitudine ad Soc. Jesu humilitatem demissionemque descendere. Sed ab hoc conatu depulsus est a summo Pont. cui non æquum visum est, Patrum purpuratorum Senatui tanto ornamento spoliari. Multa inchoata egregie, sed nihil plane absolutum, reliquit. Quorum princeps illud erat opus, in quo præcepta sapientis Regis exposuit, ex quatuor illorum

Re-

Regum rebus gestis excerpta, qui primi Régnum Hierosolymorum obtinuerunt; Saule, qui illud fundavit; Davide, qui stabilivit & auxit; Salomone, qui conservavit; postremo Roboam, qui perdidit. Verum, ad has laudes illud vitium irrepsit, quo omnes fere principes viri laborant, ut semper eximium aliquem habeant, cui ipsi obediant. Nam juveni cuidam, qui sibi erat a cubiculo, vehementer fuit addictus; cuius studiis ut obsequeretur, multis illum aureorum millibus donaverat. Sed, quæ ejus erat in Deum pietas ac religio, cum, pœnis ultrò susceptis, in se nimium sævus ac ferus extitisset, mortem, quæ longius aberat, accersivit, ac maturius multo, quam per ætatem liceret, properare coëgit.

X. GUIDO BENTIVOLVS.

MAjus quoque decus ornamentumque ad purpuram attulit, quam ab eadem mutuatus sit, Guido Bentivolus, Ferrariensis. Nam in eo etiam natura, fortuna, ac virtus, fuisse videntur expertæ, quid possent efficere. Primum, id illi a natura genus obtigit, quod est, non solum in Italia, ubi radices positas habet, verum etiam toto orbe terrarum, ex historia notissimum. Parentes etiam ac majores ejusmodi evenerunt, ut, si illi data esset optio, eos eligendi, neque meliores neque præstantiores consequi potuisset. Nam patrem habuit Cornelium Bentivolum; cuius opera Herculi & Alphonso, Ferrariæ Ducibus, in consiliis dandis, in Ferraria munienda, in militaribus spectaculis edendis, magni fuit: avum vero Joannem est consecutus; qui quamquam Remp. Bononiensem dominatu regio tenuerit, tamen, magnitudine animi, consilii rerumque gestarum gloria, nihil fuit illo excellentius. Ab hac igitur tam generosa stirpe profectus Guido, statim ab ineunte ætate dedit earum, quæ postea in ipso extiterunt, non adumbrata sed expressa signa virtutum. Non enim, tritas omnium fere adolescentium itineribus, fallaces ac lubricas secutus est vias, in quibus consistere sine casu ac prolapsione non licet; sed rectum illud ad virtutem iter tenuit, arduum, difficile, salebrosum, frontibus spinisque oblitum. Itaque non

Non ille amare, potare, animo obsequi, non aliquid temporis ad ludum ætatis, atque ad inanes adolescentiæ cupiditates & studia, conferre, sed totum se literis tradere: nullis uti hominibus, nisi literatis ac probis; nihil æque studere, quam, prima illa initia ætatis, integra atque inviolata præstare. Quid mirum, si, ab his seminibus factis, tam eximie in eo virtutes, firmata jam ætate, extiterint? Quibus tantum fretus, non autem pecunia, ut aliqui, qua infortiam & ignaviam suam tegunt & bonorum præmia mercatum adveniunt, Romam ad Remp. capeffendam accessit. Aspexit indolem Clemens VIII. ac probavit; ac primum, honorarii cubicularii sui eum loco ac numero habuit: tum, a Paulo V. in Referendariorum, quos vocant, ordinem adscitum, aula, cui omnis exsuperantia virtutis suspecta esse solet, iisque eam, qui diversa ad honores via nitantur, oppugnam tradit, invidia longe superiorem existimavit, nullumque in ejus vita locum, quem ferire illa posset, apertum immunitumque patere, statuit. Quamobrem, quas perperam ad eum insectandum vires adhibuisset, ad eundem ornandum augendumque convertit: nec quodvis illi munus decrevit, sed arduum gravissimumque, Belgicam nimirum provinciam. Quam quemadmodum Sedis Apostolicæ Nuncius administraverit, multarum in ea maximarumque impressa virtutum vestigia declarant. Nullam de se ibi luxuriæ atque libidinis suspitioni locum aperuit, nullum avidi atque appetentis animi signum ostendit; quo vitio nullum, in his qui Remp. gerunt, est tetrius, nullumque, quod acerbius hæreticorum in Catholicos odium struat; sed semper continens, laboriosus, liberalis, splendidus; nihil ad suam utilitatem, sed omnia ad aliorum commoda, referens, miros, in eorum etiam animis, qui Catholicæ religioni bellum habent indictum, amores excitabat sui. Cujus administrationem muneris arbitror fuisse causam, cur ille ad scribendam Belgicam historiam animum appulerit: quod opus, nihil habens ineptiarum, nihil cincinnulis fucoque puerili conspersum, sed contra, gravitatis prudentiæque plenissimum, neminem eorum metu-
tum.

sumferunt in historia. Verum, ita ille se in potestatibus gerebat, ut majore semper provincie dignus haberetur. Itaque, transactis jam in Belgio suis partibus, a Paulo V missus est statim Nuncius in Galliam. Vbi quemadmodum Sedis Apostolicæ negotia tractaverit, declaravit idem Pontifex, qui Cardinalem eum creavit antea, quame Gallia discederet: quemadmodum vero Regis, Reginæ, Regnique procerum sibi amorem ac benevolentiam conciliaverit, perpetua illorum in eum voluntas ostendit, quæ non solum officiis beneficiisque eum semper prosecuti sunt omnibus, verum etiam vicarias Regni illius apud Romanum Pont. Protectoris partes agere voluerunt. In illo autem augustissimo orbis terræ senatu, in consiliis de Rep. dandis, in senatoria sententia dicenda, nihil erat illo prudentius, nihil gravius, nihil copiosius. Quod pondus in rebus! qui splendor in verbis! quæ venustas in gestu! in officiis vero persequendis quæ urbanitas! qui decor! quæ oris majestas! quanta ejus, sine arrogantis suspicione, in dictis auctoritas! quam accurata Etrusce loquendi scribendique, ac sine molestia diligens, elegantia! quantus urbanitatis & facetiarum, intra viri principis gravitatem, non scurrilis lepos! ut nunquam ad Urbanum VIII accesserit, quin ejus animum a mœnore ad hilaritatem lætitiâque traduxerit. Quæ in eo mens, nihil nisi honestum, nihil nisi altum & magnum, excogitans! quæ morum suavitas, amœnitas, sanctitas! Quæ mens spirare etiam videtur in epistolis, quas edidit, in eis que rerum ecclesiasticarum commentariis, quos, a Clementis VIII Pontificatu inchoatos, ad hæc usque tempora perduxerat. Verum, tanta hominis virtus, tantum ingenium, tantum aulæ, vel potius orbis terræ, lumen, quo tempore æquum erat opibus affluere, & in summa rerum omnium abundantia vivere, caruit fere omnino rebus omnibus, non solum ad tuendum illum dignitatis locum, in quo sua eum virtus collocaverat, verum etiam ad vitæ usum necessariis. Quamobrem, ne ære alieno trucidaretur, coactus est, ædes in Colle Quirinali amplissimas magnificentissimasque, & hortos, illis adjunctos, inscribere, & precium, quod coegerat, creditoribus solvere, ac fidem suam

PINACOTHECA ALTERA.

939

suam liberare, atque inde in alias ædes, modica mercede conductas, sese conferre, numerum aulicorum minuere, sunitus, ad rei familiaris angustias modumque, contrahere. At, ejus hæc tam afflictæ tamque prostratæ virtus, quæ aliis erat miserabilis, rigidos eorum animos, ad ferendam illi opem, flectere non potuit, ex quorum superfluis & extraordinariis divitiis redundabat in alios, nescio equidem an dignos. At ille, qui totus erat aptus ex sese, atque in sola virtute beatam vitam positam esse statuerat, æquissimo hæc animo omnia ferebat, nec quidquam, a generis sui nobilitate, & a sapientis dignitate alienum, admisit. Interea Urbanus VIII vitæ functus est munere; neque cuiquam dubium videbatur, quin, si sola candidatis merita, ad Pontificatum maximum, suffragarentur, is illi in primis honor deberetur. Sed, conclave ingressurus, qui optime suæ sibi infirmissimæ valetudinis erat conscius, palam omnibus dixerat, vitæ sibi finem adesse; non enim suffecturas sibi vires, ad ea incommoda perferenda, quæ sustinere loci angustia cogunt. Atque hæc vaticinationis suæ dicta sunt brevi confecta: nam, tum inter cetera mala, quibus ille conflictatus est, ob altissimum cujusdam, ejus cellulae proximi, somnum, qui totas noctes, quantum poterat, naso stertebat, undecim noctes continuas somnus, ejus ab oculis absuit. Quo factum est, ut lethalis eum febris corripere, ac curationis causa in finitima conclavi cubicula deferretur: ubi est paucorum dierum morbo consumptus: sæpe, ut dicebatur, querens, quod non posset, ob inopiam, aliqua grati animi significatione, suam in familiares benevolentiam testatam facere. Atque, sine ullo funeris honore, quemadmodum ipse præceperat, noctu elatus est in Ædem D. Silvestri, Patrum Theatinorum in Colle Quirinali, ibique sepultura affectus.

XI.

SCIPIO CONZAGA.

SI quando fit, id quod non ita sæpe contingit, ut exi-
 nia corporis pulcritudo præstantem forma nata
 fit animam, tum homine illo, in quem hæc duo conve-
 niunt, nihil fieri elegantius, nihil excellentius, nihil ad-
 mirabilius potest. Hinc Socrates, doctior ille singularis,
 qui philosophiam, ut dicitur, evocavit è cælo, & in ho-
 minum cœtus induxit, adolescentes illos, qui ad ipsum
 in disciplinam convenerant, sæpenumero hortari sole-
 bat, ut in speculo formam suam contemplarentur, ac, si
 eam lepidam atque elegantem esse animadverterent, da-
 rent operam, quantum possent, ut ad ejus similitudinem
 animum ingeniumque formarent. Non enim eadem est,
 animi & corporis, conditio: etenim non possumus cor-
 poris formam nostrum ad arbitrium effingere, sed animi
 ingeniique possumus. Quæ cum ita sint, quid mirum,
 si Scipio Conzaga, Marchio, & S. R. I. Princeps, tan-
 tas, dum viveret, de se admirationes excitaverit, ac,
 mortuus, tam diuturnam tamque jucundam sui memo-
 riam reliquerit, cum duo illa, quæ diximus, ita in eum
 convenirent atque concurrerent, ut essent omnibus ad-
 mirationi atque spectaculo? Primum, oris ac corporis
 totius dignitas; quæ tanta erat, ut nemo esset moribus
 tam agrestibus, tam immanibus, tam feris, quin ejus,
 non solum ad se oculos, verum etiam amorem ac studium
 alliceret. Tum, animi ingeniique forma ea illi a na-
 tura contigit, qua forma, nulla alia esset elegantior nec
 pulchrior. Etenim præclarum illud ingenium, quod tan-
 quam fertile ac pingue solum acceperat, non, ut plerique
 faciunt, quibus vivere in summa rerum omnium abun-
 dantia licet, ociosum & a cultura desertum reliquerat,
 sed pulcherrimus omnibus studiis, gravissimisque disci-
 plinis, excoluerat, atque ex cultum exornatumque reddi-
 derat. Primum, Græcæ Latinæque linguæ intelligentia,
 tum optimarum artium notitia, omnisque liberalis &
 digna homine nobili ab eo percepta doctrina est: sed
 præsertim Theologiz, quæ erat illi in amoribus ac de-
 licis, plus operæ tribuit. Tam elegans, tamque venu-
 sta

ita hominis ingenii forma, adornata est ab omnibus, qui sua ætate studii cujuscumque principes habebantur, a M. Antonio Mureto; qui etiam disertissimas elegantissimasque orationes suas, ejus nomini inscriptas, emisit: a Torquato Tasso, non suæ solum ætatis, sed multarum etiam, poëta longe maximus atque clarissimus, ætiori quodam amoris & observantiæ vinculo comprehensus est; nullum enim versum scribebat, quem non ille ejus existimantis arbitrio judicioque submitteret: a Baptista Guerrino; qui, cum ceterorum scripta suum ad arbitrium vocaret, se tamen suæque omnia illi subiciebat, atque, ab ipso emendari ac corrigi, honestum sibi ac præclarum esse ducebat. Ex hoc hominum genere, Patavii, illustrem illam, totoque terrarum orbe celeberrimam, Ætheriorum Academiam instituit, &, quoad ibi fuit, Principis nomine gubernavit ac rexit: sed postea, cum Ecclesiasticæ vitæ rationem, jam inde ab incunte ætate, propositam habuisset, sacris ordinibus initiatus creatusque Patriarcha Hierosolymitanus. Verum, cum ad summam amplitudinem remigio, utajunt, veloque contenderet, paululum ad saxum navem offendit. Venerat ea tempestate Romam, religionis & officii erga Gregorium XIII, Pontificem Max. gratia, Gulielmus Conzaga, Dux Mantuæ, quicum illi, de quibusdam castris, lites erant graves & magnæ. Perfecit Scipio, auctoritate & gratia, ut Duci, ex templo Xenodochii Teutonum ad circum agonalem exeunti, dica per viatorem deferretur: quamobrem Dux, quanta maxima dici potest ira inflammatus, tantam injuriam questus est apud Pontificem: qui Pont. quo satis Duci fieret, jussit Scipionem in carcerem condi. Sed a Sixto V, qui Gregorio successerat, primis fere comitiis, Cardinalis est declaratus: neque ille, ad eum cooptanduni, segnior est factus ideo, quod in Collegio Cardinalium esset alter eo nomine, Vincentius nimirum Conzaga. Sed purpura illa visa est quidam quasi canalis fuisse, unde intolerabilis in eum vis morbi influeret; vel potius tunica illius similis, quam Hercules, sanguine Centauri tinctam, induerat: nam podagra, nescio an ex Orco prodiens, tam tetros tamque acerbos illi ciere dolores cepit, ut

primum egregiam illam oris venustatem ac speciem, tuam vitam, ademerint; cum, nescio quo, ad aquas, recuperandæ valetudinis causa, venisset. Etrusca aliquot carmina, elegantissime scripta, reliquit, in eo libro, quem Academia Ætheriorum, ex carminibus suorum Academicorum collectis, conficiendum typisque mandandum curaverat.

XII. IOANNES RENAL- DINVS.

ANcona, urbs Piceni celeberrima, semper optimorum ingeniorum, domi forisque præstantium, fecunda genitrix extitit. Quæ urbs ideo Adriatici maris littus occupasse videtur, ut, quos ad communem omnium utilitatem genuit, ad transmarinas regiones, si sit illis opus, maris opportunitate transmittat; qua vero terrestres aditus habet, ut in mediterraneos populos, quod ab ipsa defluxit boni, transfundat. Sed nostra ætate, ex iis, quos suo ex sinu prodiiſſe gloriatur, haud postremum locum obtinet Joannes Renaldinius, nobili loco natus. Hic, simul ac ætas rerum gerendarum patiens fuit, a fratribus, majoribus ætate, qui cum non uni tantum oppido natum videbant, missus est in eam Urbem, quæ est tanquam compendium orbis terrarum, videlicet Romam; & in eam aulam, quæ tunc omnium gentium erat oraculum; nimirum in domum Card. Alexandrini, Pii V, qui tum rerum potiebatur, fratris filij. Sed, quamvis, quidquid est ubique præclarum ac laudabile, Romanam, tanquam amnis in mare, confluat, ejus tamen virtus in unius urbis, quantumvis maximæ, gyrum non se compelli sustinuit, sed totum sibi orbem terrarum, quasi campum, aperuit, in quo latius excurreret. Neque quidquam ad id, quod animo conceptum habebat, opportunius in præsentia se illi obtulit, quam Ferraris Conzagæ, Molphettæ Principis, favor ac domus; cui suas, pro pincerna, cæteras ea conditione addixit, si se muniendarum urbium castrorumque artem docendum curasset. Quod summa fide a viro illo principe perfectum est. Nam statim traditus est in disciplinam Mar-
chi-

ationi Germanico Savorgnano, ejus artis longe peritissimo. Ex cujus doctrinæ fontibus cum tantum hauisset, quantum satis est sitim explere cupienti, continuo, tanquam equus exultans ac nobilis, qui vix tubæ signum expectat, se dedit in cursum. Ac prima ejus excursio in Burgundiam & in Flandriam fuit, quæ tum maximis bel-
 lorum ardebant incendiis; ubi ad belli munia adhibitus, statim ejus, quod didicisset, periculum fecit. Atque, ut pulcre se illi studio navasse operam, quæque aggressus es-
 set, recte sub manus succedere vidit, viam illam ingenii atque virtutis in Italiam ac Neapolin transtulit, atque ab eo, qui tunc Regnum illud pro Rege administrabat, Hidruntinis in Calabria munitionibus præfectus est, atque inde Mediolanum missus ad exercitum, cui Co-
 mestabilis Castellæ imperabat, Mediolani ipsius Gubernator, ut, quam ipsi laudabilem operam dedisset, eandem Gubernatori illi præstaret. Verum, in omni munitionum genere, atque adeo in omni belli apparatu, ita se gessit, ut Gubernator, cum diligentiam admiraretur, ingenium agnosceret, duxerit eum secum in Galliam; quo ibat, ut fœderis Catholici exercitibus suas copias adjungeret; neque solum veterem illi provinciam confirmavit, sed novam addidit, qua iis, quibus expugnandarum urbium onus, ac militarium tormentorum cura incumberebat, tanquam magister ac dominus præesset. Sed tum licuit aspicere, quanta in virtute vis inest; ejus ea est species ac forma, ut omnium in se oculos attrahat, omnium in se ora convertat, omnium ad se amorem ac benevolentiam alliciat. Hac primum delectatus Dux Humenæ, qui omnibus fœderatorum Principum copiis præerat, postulavit ejus a Gubernatore in beneficio ac gratia, impetratumque omnibus Regni Galliæ munitionibus arcibusque præfecit. Tum ea pulcritudine impulsus, Henricus IV, simul ac Regni fastigium attigit, dedit operam, ut sibi eum haberet; ac Laurentius Bargagna, Card. Giojose cubieuli præfectus, sæpius se vidisse testatur, Regem, dextera in ejus humeros reiecta, familiarissime cum illo deambulare. Hac deinde virtutis pulcritudine, quæ etiam efficit, ut eos, quos nunquam vidimus, diligamus, Hierosolymitanæ militiæ Magister

arreptus, Melitam eum, illius insulæ; ac Gozzæ in primis, muniendæ gratia, attraxit. Hac delinquit Comes de Lemos, Prorex Neapoli, aliquandiu secum illum habuit, ut in munitionibus quibusdam, ejus consilio atque opera uteretur; & Abellini Principi comitem addidit, qui cum peditum centuriis quinquaginta se Mediolanum conferebat, ob Saluciarum Marchionatum, de quo certamen erat inter Regem Galliæ & Duce[m] Sabaudia. Quibus controversiis compositis, non minore studio (cum, Leonarda Gratiolia, pari nobilitate femina, uxore ducta, Romæ commoraretur,) Comit[is] Beneventi, Proregis Neapoli, inissis ad Regis Catholici oratorem literis, Neapolin evocatus est, ubique a Comite de Lemos, qui Beneventano successerat, diploma Regium abtulit; quo cunctis præsticiebatur, quibus munitionum atque arcium cura commissæ esset; stipendiis, dignis eo loco ac nomine. Tumultu interim exoriente in Monte ferrato, missus ad bellum gerendum Petrus Toletanus; qui, quasi ex eo bello aut nunquam aut cum Jo. Renaldinio victoriam esset reportaturus, eum accersivit. Itaque Renaldinius, facta a Duce Ossunæ, tum Regni prorege, potestate, habuit necesse, Mediolanum venire; sed antea illi Romam transcurso opus fuit, quo Paulum V, Pont. Max. Ossunæ verbis rogaret, ut equitatum Neapolitanum per suos fines transire pateretur: quod impetravit, ut voluit. Bello autem confecto, Neapolin ad suam provinciam se recepit. Sed homini strenuo, ac nunquam cessanti, negotium non deerat: nam, Sipunto a barbaris expugnato atque direpto, missus est a Card. Borgia, ad illud oppidum instaurandum reparandumque: quo dum, Cardinalis mandata executurus, pergit, in itinere, graviori morbo ex labore curisque implicitus, Neapolin deferri se iussit, ut ibi curaretur. Sed accidit, cum morbus in dies amplior vehementiorque efficeretur, ut tandem ejus vini ferre non posset: itaque illi succubuit. At virtutum ejusdem fama, & in primis abstinentiæ laus, in qua vicit omnes, nullis unquam casibus subiecta, nulla cujusquam vi perculsa, jacebit, sed inter temporum injurias, inter mortis necessitates, incolumis vivet. Rem plane admirandam: tot operibus,

tot molibus, tam magnis, tam ingentibus, extruendis instaurandisque, præfuerat, tot annos; Regum omnium orbis terræ maximorum pecuniam innumerabilem tractaverat; poterat impune non minimam ejus partem domum suam avertere, & ex fisco transferre in eistam: & tamen filio, quæ ipsi unicuique erat, nihil nisi rerum a se gestarum famam, & domesticæ virtutis imitandæ necessitatem, reliquit; ut, divini Numinis providentia, tantam in uno abstinentiæ viam extitisse existimem, ut ministrorum avaritiæ, in posterum tam abstinentis hominis provideret exemplo. Non est tamen eundem inficias, fuisse eum voluptati obsequentem, ac magnum mulierum amatorem, dum vixit. Etenim, *quis scit sunt*, ut est apud poetam nescio quem, *haud multum heredem adjuvant*. At id, hominum improbitate, quam suo pte ingenio, factum est magis: nam vix ad urbem aliquam accedebat, cum præsto erant lenones, qui homini voluptuario, luculentas mulierum conditiones offerebant: quæ mulieres eo se illi lubentius applicabant agglutinabantque, quod forma esset non mala, ore non ineleganti, vegetis oculis, ac statura, etsi non ita excelsa, at tamen in qua, singula membra toti corpori, per æqua proportionem, responderent. Verum, quamvis, homo militaris, belli artibus, ab ineunte ætate, addictus esset, scribendi exercitationem non omittebat: nam plura scripsit de urbibus arcibusque muniendis volumina, prout munerum, ad quæ adhibebatur, occasio se daret: sed ex iis illud tantum typis mandandum curavit, quo sapientissimis rationibus edocet, quam non sit tutum, infinitas plateas artium, lateribus sternere. At, quamvis tanta rei militaris esse occupatio soleat, ut non multum ei, qui bella persequitur, sub pellibus otii relinquatur; pulcherrimos tamen bellorum, quibus ipse interfuit, commentarios scribere non dubitavit. Et quamvis, militaribus præceptis addiscendis, & rationibus, quibus aggeres & fossæ dicerentur, percipiendis, operam suam dedisset, sæpe tamen ad hæc elegantissimarum artium studia transibat, quanta autem cum utilitate, argumento est liber, quem de colorum significatione composuit. Quid multa? quis poeticam laudem expectasset ab eo, qui ætatem, vel in

bellis, vel in iis, quæ ad bellorum apparatus pertinent, consumsisset? At Apollo non sibi molestum duxit, Pindo atque Helicone relicto, in castrorum munimenta se demittere, ut eidem, carmina scribenti, adesset. Ipse quoque delicatissimus Musarum chorus, qui, in hortulis quiescens suis, nihil tam abhorret, quam instructas militum acies, quique in pratorum viriditatibus, liquore perlucido annuum irriguis, vel molliter recubans, vel choræas duceus, nos a curis, & a bellorum præsertim tumultibus, avocat, ausus est Martis vultum non pertimescere, armorum strepitus, tormentorum militarium tonitrua, tympanorum tubarumque sonitus non exhorrescere, ut lepidissimam illi Eclogam, aliaque digna immortalitate, carmina dictaret. Obiit, annos natos tres & sexaginta, anno Clb la CXX.

XIII.

M. ANTONIVS
PETOLIVS.

SI natio nostra, quemadmodum in ponderandis, expendendis, æstimandis hominum ingeniis esse solet sagax ac prudens, ita etiam intribuendis præmiis, quæ virtuti, quam laudat, debentur, se iustam æquantque semper præberet, nemini melius esset, quam probis ac literatis hominibus. In summa enim rerum omnium affluentia viverent; ipsi opes, ipsi honores, possiderent; illi priores, apud principes viros, partes haberent. Verum, cum de duabus rebus, quas virtus suo sibi jure vendicat, hoc est, laudem ac præmia, primum, nimirum laudem, facile illi remittat, alterum vero, scilicet præmia, indignis sæpe distribuat, sit, ut interdum nihil sit homine literato miserius, nihil magis contemtilabile, nihil, quod minus esse desideres. Id ita usu receptum fere est, ut minus jam quis miretur, si videat, doctos aliquos honestosque viros egere, impuros ignavosque divitiis affluere. Quod quamvis sit verus, tamen non potuimus non vehementer commoveri, non exhorrescere, in eo, quod, non ab altero narratum, (quis enim illi fidem habuisset?) sed oculis nostris accepimus, homines nihili, tanquam e cælo delapsos, omnibus nonnunquam

quam amoris officiique significationibus exceptos, primum locum tenere; victu, vestitu, ceterisque in rebus, perquam sumtuose ac liberaliter haberi; contra, pios, religiosos, atque omnibus instructos disciplinis homines, quos in oculis ferre debebamus, pernoctare sub dio, obfisos panis incedere, fame, siti, ac frigore confici. Ex hoc eodem numero erat M. Antonius Petolius Montecorvinas, I. C. in primis, sed admodum pauper, ac fere mendicus. Cujus ingenium, semel ut aspeximus, admirati sumus, atque extulimus laudibus; sed nihil de eo ab egestate, cujus dominatu premebatur, extrahendo excogitavimus, verum, in ejusdem illius potestate reliquimus. Quamobrem, miser, ne, fame atque inopia rerum omnium confectus, e medio excederet, cogebatur suam impressoribus librorum operam, ad menda, quæ irrepunt, corrigenda locare; unde vix lucri tantum faciebat, quod esset, ad vitam parce ac duriter agendam, satis. Sed, quamvis ita enim rerum omnium inopia consisteretur, tamen, cum erat domo exeundum, & in conspectum hominum prodeundum, ita eleganti vestitu utebatur, ut, qui eum non nossent, quingenta quotannis ex suis vestigalibus scuta capere, jurasset. At hic erat vestitus exterior, nam interior longissimo, ab hoc, intervallo, distabat. Illo, divitibus par similisque videbatur hoc, infra omnes mendicos ac miseros inveniebatur. Nihil ille thorace, nihil femoralibus, nihil tibialibus, nihil udonibus utebatur; sed horum omnium munitus, varii generis panni, animalium pelles, fangebantur, quibus pectus, erura, pedes, coxasque obvolutas, postea fasciis devinciebat. Verum, quo pretiosa illa vestimenta diutius ipsi darent, neque, ex frequenti usu, attererentur, simul ac domum se receperat, eas exuebat, a sordibus, si quas contraxerant, expurgabat, tum, diligentissime complicatas, in arcula quadam construebat, recondebaturque: quo facto, lectulo se commendabat, ibique prandeat, coenabat, lectioni scriptique operam dabat. Ibi egregia illius opera, ac prope divina, sunt orta, ut, simul collata ac colligata, si sint attollenda, valentissimi cojusque bajuli vires excedant. Atque hæcenus de corporis ornatu. Ad victum vero quod attinet, erat ejusmodi, ut

paululum a pecudum ritu differret: amicis quibusdam suis persancte affirmabat, totis sex annis continuis nihil cocti obsonii suum in ventrem immigrasse, sed asperam se veterum Anachoretarum vivendi rationem in se revocasse, atque ex desertis Thebaidis regionibus mediam in Urbem transtulisse, (nam ad Rotundæ habitabat, qui locus, illius est umbilicus,) hoc est, panem tantum atque olera in cœnas ac prandia adhibuisse: ira enim ejus lucelli, quod tum faceret, rationem tulisse: si enim se nitidius curare voluisset, sumtus lucrum superasset. Ædes vero, quas incolebat, nihil a victu reliquoque ejus cultu distabant, sed mire cum illis congruebant: hæ erant, vetusta ac parva quædam cubicula, turri campanarum ædis Pantheon, tanquam niduli, affixæ, quo olim mures ejus regionis confluebant, ibique senatum contra seles, capitales ipsorum hostes, habebant; ad quæ longis lignicis scalis, nulla sponda munitis, perveniebatur; quibus, qui paululum vertigini esset obnoxius, vel largius in prandio se invitasset, non ausus fuisset sese committere. Quæ cubicula Urbanus VIII, Pont. Max. tum diruenda curavit, cum e porticus, ædi illi adjunctæ, tecto trabes ac tegulas æneas, quas in tormenta muralia converteret, detrahebat, & earum loco fictiles subrogabat. Depulsus igitur ex ea loci celsitudine, in quam fortunæ eum iniquitas, fortasse perdendi illius causa, evexerat, e qua ne præcipiti lapsu devolutus occideret, illa horribilis ejus abstinencia fecerat, qui vix tantum vini adhibebat, quod esset ad tuendam valetudinem satis; ejus vini si paululum studiosus fuisset, nulla eum salus servare potuisset: ex illo, inquam, hirundinum nido, vel murium potius, ut diximus, curia, deturbatus, in domum amici cujusdam sui, prope Ædem D. Caroli ad Catinarios, quam vocant, se contulit, in cujus vinea senta quadringenta collocaverat, quorum ex fructibus magna anni parte se aleret, librosque coëmeret: quæ senta, non Romæ lucrifecerat, sed Romam ex patria deportaverat, ubi, auctione facta, fundum, ædes, suppellectilem & bona omnia vendiderat. Sed visa est tandem Roma eum respicere, ac velle ex iis rei familiaris angustiis, quibus premebatur, eripere: nam cum Congregatio-

tionem Cardinalium, quibus librorum indicis cura impenditur, sapientiam, doctrinam, industriam, ac diligentiam suam probasset, illi, sponte sua, a nemine admoniti, dederunt Maphæo Card. Barberino negotium, ut Pontificem Paulum V adiret, atque ipsorum omnium nomine rogaret, ut daret operam, ne docti ingeniosique hominum virtus, semper haberet necesse, cum rerum omnium inopia conficiatur, sed, adversus illam, aliqua eam ope muniret. Qui cum partes suas impleisset, ac diligenter cum Paulo sermocinatus esset, nescio tamen quid intercesserit, ut tota illa commendatio postulatumque neglectum sit. At Paulo mortuo, Barberinoque in id fastigium erecto, Petolius sibi ipse non defuit, sed, ad osculum pedum admissus, revocavit illi in memoriam, quanto studio suam Cardinalis apud Pontificem Paulum causam egisset; aitque, magnam sibi spem esse, ut, quod vitæ auxilium a Paulo impetrare non potuisset, id sibi ab Urbano (hoc enim nomine appellatus est Barberinus,) large copioseque suppeditaretur. Respondit Urbanus non inhumane, se curaturum, ut sibi prospectum aliquid esset; eademque opera mandavit Francisco Cardinali, fratris filio, ut rem suscipere perliceretque, ne quid illi deesset. Sed, cum diem ex die duci, ac verba fieri mortuo, intelligeret, sapienter Urbanum adeundo rogando instandoque, demum tundendo, atque odio, non scio ejus intercessu calamitatis, vix diaria ab illo, hoc est, quotidianas panis vini que portiones, expressit: quibus divenditis, ex mercede, quam collegerat, libros mercabatur, & bibliothecam suam locupletabat, adeo, ut, postea aliquot centenis aureis nummis sit æstimata. Verum, cum, in quodam morbo, sive a diuturnis vitæ incommodis ac laboribus orto, sive ex prolapsione, qua gravi ad terram datus est casu, necesse habuit, plures annos scipionibus, aliis suppositis, innixus ingredi: quo tempore, Cardinalis Biseix liberalitate sustentatus, quamvis usum pedum amisisset, non tamen mentis celeritate, quæ nullo casu potest retardari, caruerat. Itaque nullum sibi tempus, vacuum a commentationibus vel a seripcionibus, dabat. Sed, cum ex eo morbo convaluisset, ac pedum usum, magna ex parte, recepisset, cepit agere

cum Cœnobiarcha quodam, ut sua in domo cubiculum sibi aliquod præberetur, ea lege, ut, tum quadringenta illa scuta, quæ diximus, tum bibliotheca, quæ eodēdem, atque eo amplius, apreis nummis æstimabatur sua ad cœnobiū illud morte redirent. At multum ipsi fuit cum illo laborandum, multis difficultatibus occurrendum; sed tandem in leges, quas ipse scripserat, quod postulabat, obstinuit; atque ibat, ut cubiculum, sibi destinatum, aspiceret, alacritate propemodum gestiens, quod putabat, se intraturum cubiculum lucidum, latum, amœnum, pulcherrime laqueatum, præclarosque prospectus habens in urbis domicilia, & in adiectas urbi villas camposque: cum, ecce tibi, deducitur angustum in tugurium, fumidum, sub regulis habitandum, incertum nescio quod lumen e tecto accipiens, &, quia latrinæ, quo omnes ejus familiæ ventrem exoneratum ibant, fines attingebat, intolerabili odoris fœditate refectum. At ille, ex improvviso sua de spe & opinione dejectus, Cœnobiarcham, qui se illuc deduxerat, intuens, Quodnam meum, inquit, ob meritum tam tetro, tibi, dignus carcere videor? nullus antehac carcer me habuit; at nunc, tanquam insanus furensque, comprehendendus colligandusque essem, si in istum compingi concludique me pateret. Tum, quantum potest, se inde proripuit, & in veterem habitationem recepit; neque inde antea discessit, quam, vita excedens, communem est profectus in locum. Innumera sunt fere, quæ scripsit: sed majora & illustria referam. Primum, de exarchia, hoc est, de exterioris Principis munere; quod opus, P. Brevii opera, fuit Coloniz Agrippinz impressum: de quo opere sæpius querebatur, se ab impressore pessime fuisse tractatum expilatumque; qui, quidquid libitum fuisset animo suo, typis mandasset, reliqua ex eo, quæ sibi placita non essent, removisset. Tum scripsit aliud opus decem in libros digestum, Exarchon, sive de sanctioris Principis munere, nuncupatum: deinde, Commentaria politica, aliis decem libris exposita: præterea, epitomen constitutionum Pontificalium, in tredecim libros redactam. Quibus operibus duo alia accesserunt; unum, de Jure ex arte digerendo, &

alterum de Paradisi terrestri inopia quasi notitia: Arcifissima Nardum Antonium Reccium cognatione attingebat: nepos enim suus fuisse dicitur. Qui Nardus, medicus singularis, cum multos annos in nova Hispania egisset, ingens volumen, de rebus, quas tellus illa fert, quibusque illæ morbis sint usui, scripsit; quod Romæ impressum, cum imaginibus earum rerum, quas tradit; additis etiam illustrium virorum animadversionibus annotationibusque; sed nondum publici juris est factum.

XIV. IO. PETRVS MAFFE-

JVS.

Bergomates, illustres Italix transpadanæ populos, ex Orbiorum, hoc est, ex interpretatione nominis, hominum, in montibus vitam degentium, stirpe procreatos, olim fuisse questos accipimus; elatius se, quam fortunatus, sitos fuisse. Quod si præsens illorum status atque condicio ante oculos statuatur, nullam unquam iniquius querelam comparatam fuisse constabit. Nam, si felix ac fortunata ea dicenda urbs est; ubi plures, summo genere orti, ubi non parum multi fortunæ bonis omnibus affluentes, ubi minime pauci bellicæ virtutis fama inclyti, quod caput est, ingenii literarumque gloria præclari, versentur ac vigeant; profecto, Bergomatum urbs adeo rerum harum laudibus florēt, ut, conversa oratione, multo eam fortunatius, quam elatius, statui collocarique, dicendum esse videatur. Ibi Gymnasia, ubi juvenus hasta, cursu, pila, saliendo, & ludicra armorum tractatione, exerceatur; ibi hippodromus, ubi ephebi equos scite eleganterque agitare, frenis compescere, angustumque in gyrum compellere ad belli usum, assuescant. Sed, his omissis, præclaris hominum præstantissimorum ingeniis, quæ dedit ex sese & de quibus nobis est sermo, nostra definietur oratio; quorum plura, uno fere tempore, nobilis illa urbs edidit, quam prope reliqua simul Italix oppida, quantumvis maxima ac celeberrima. E quibus oculos ad se primum nostros attrahunt duo Zanchii, Basilius, & Jo. Chrysostomus; in qui-

quibus nulla sententiarum gravitas, nulla verborum majesticitas, nullus orationis ornatus, nullum poëticæ facultatis lumen desideratur: tum, Publius Fontana, poëta item gravissimus, in quem, Pythagoræorum commento, Virgilio animum immigrasse, posse dici videtur. Accedunt, Bernardus Tassus, qui, omnes concinnitates sententiarum, omnes lepores, omnes veneres Græcorum Latinorumque poëtarum, Etruscam in poësin est transferre conatus: sequitur Torquatus filius, non tam in ejus sinu, quam in ejusdem disciplina educatus, suis Virgilium, poëtarum principem, vestigiis persequens, pari cum illo ingenii laude; unde ad summum heroici carminis culmen fastigiumque pervenit. Quod si non constaret inter omnes, quod patente Bergomate natus esset, omnes Italiæ civitates, quod de Homero traditur, pugnarent inter se, atque suum esse contenderent: nunc autem, cum id non possint, ab hac clarissima Bergomatum luce, tanquam alia à sole sidera, aliquod sibi lumen ac splendorem arcessunt; atque, ob linguæ ejusdem societatem ex illius laude Etrusci aliquod etiam in se decus redundare gloriantur. Verum, ne videretur tellus illa felicior in procreandis iis, qui adstricta pedem legibus oratione, quam qui soluta, scripserunt, alterum, hujus ævi, Latinæ linguæ lumen edidit, qui sermonis puritate, nitore, elegantia, non video, cuinam ex veteribus historicis debeat cedere: nimirum, Jo. Petrum Maffejum, honesto genere progerminatum. Is ad eas artes percipiendas, quibus ætas puerilis informari ad humanitatem solet, non habuit necesse, foras proficisci: nam domi optimos habuit magistros, Basilium & Jo. Chrysostomum, Zanchios, Canonicos regulares; de quibus antea mentionem fecimus: ab iis enim est Tuscia, Latinis, & Græcisliteris eruditus. Quem cum, ingenio peracri, & studio flagranti, non progredi, sed evolare, ad summam eloquentiæ laudem, cernerent, non illi decrant, sed ingenii acuendi exercendique, aliquam semper occasionem ac materiam suppeditabant. Itaque ternas ab eo singulis diebus serptiones, tanquam pensum, efflagitabant, Græcam unam, Latinam alteram, Etruscam tertiam: quod ille pensum, magna cum illorum admiratio-

tionem, solvebat. Sed cum jam nihil magistris egeret, ac sine cortice, ut dicitur, naret, stylum illum, optimum dicendi scribebique effectorem atque magistrum, quem exercuerat, ex domestica atque umbratili exercitatione in pulverem & solem eduxit; Romam venit; ubi ille Romanæ aulae notitiam habuit, aula stidem ipsius: ubi cum honoraria ejus opera a multis expeteretur, tandem a Rep. Ianuensi magnis illa stipendiis conductæ est, ut urbis illius nobilitati præcepta Rhetoricæ traderet. Quo munere, tanta cum eloquentiæ & eruditionis functus est laude, adeoque omnium in se studia benevolentiamque convertit, ut Resp. illa majori eum provinciæ dignum existimaverit, atque arcanorum suorum omnium conscium atque participem fecerit: quam provinciam ita gessit, ut fidem admirarentur omnes; diligentiam agnoscerent. Properabat in dies magis, ad summam hominis eloquentissimi existimationem & famam; & quod est consequens, ampliorum sibi ad principum virorum gratiam, latioresque ad honores aditus, aperiebat: cum, divini numinis afflatu impulsus, secum ipse reputans, quam fluxæ, caducæ, & inanes, omnes humanæ res essent, arctioris vitæ cupiditate exarsit, ac Societati Iesu nomen dare constituit, annos triginta natus; quæ Societas florebat, ut cum maxime, hominum; sanctitatis doctrinæque opinionem illustrum, numero, tum, cum ille eam est ingressus; neque ita multo post professionem emisit. Licebat enim celerius, Pii V Pont. Max. lege, quæ jubebat Soc. novitios, elapso probationis anno, publico ac soleinni ritu, ejus instituti rationem profiteri; quæ lex deinde à Gregorio XIII sublata est, decretumque, ut superiorum arbitrii ea res esset. Sed Societatem ingressus, nihil habuit antiquius, quam ut vitam S. Ignatii Loyolæ, Soc. Iesu fundatoris, scriberet. Tum Vlyssipponem profectus est, ut rerum ejus Indiæ, quæ ad orientem pertinet, historiam contexeret. Qua occasione ad Philippum II, Hispaniarum Regem, illi aditus patuit; qui operis consilium laudavit, ac fuit auctor, ut illud strenue prosequeretur; cujus absoluti precium tulit: nam Rex, ejus fratrem, Senatus Mediolanensis a secretis elegit. Rever-

sus

sus in Italiam, vitam S. Ignatii, & rerum Indicarum
 historiam, edidit: quibus operibus principem, inter sui
 ævi historias Latina lingua loquentes, obtinuit lo-
 cum: Jussus deinde a Gregorio XIII historiam ecclesi-
 asticam sui Pontificatus intexere, ille, tredecim libris
 comprehensam, Etrusco sermone explicavit. Habuit
 eam in animo in Latinum sermonem convertere; sed,
 delectatus opere, de sententia decessit, atque ad aliud
 studium animum appulit. Hoc opus, nondum editum,
 heredum Jacobi Boncompagni, Sorensis Ducis, custo-
 diis asservatur. Ajunt etiam, ejusdem exemplum, in li-
 bris manuscriptis bibliothecæ Barberinæ numerari. Etru-
 scis etiam his literis, duodecim illustrium Confessorum
 vitas mandavit. Accersitus deinde est a Clemente VIII
 Pont. Max. in ædes Vaticanas, ut inchoatam historiam
 ecclesiasticam, & usque ad Gregorii mortem perductam,
 prosequeretur, & ad sua tempora protenderet. Manum il-
 le operi admovit, ac tres libros confecit; sed, ne progredi
 longius posset, mors, quæ omnia nostra consilia atque
 conatus, in medio cursu, sæpe pervertit, causam susti-
 nuit: ea enim illi, ad calcem operis feliciter properanti,
 iter perripuit, atque diremit. Mortem obiit Tibure, an-
 nos natus quatuor ac sexaginta, in Collegio suæ Societa-
 tis. Fuit statura procera, forma neque liberali neque ho-
 nestâ, ore macilento, atque oculis paulum transverse tu-
 entibus; sine ulla venere, sine lepore; nulla in familiari
 sermone facundia; neque cavillator facetus, neque con-
 viva commodus; verum ita tractundus, ut interdum se
 continere non posset. Sed habebat hoc, ut vespere, cum,
 more Societatis Jesu, in cubiculo clausus, introspiceret in
 mentem suam, eamque omni cogitatione pertractans,
 percontaretur ipse se, quid eo die egisset vel dixisset, si
 occurreret, aliquem vehementioribus a se verbis fuisse
 appellatum, ex pœnitentia, magno animi dolore corre-
 ptus, exsurgens, atque ad illum, quantum potest, accur-
 rens, ad ejus se pedes abjiceret, & humilibus ac demis-
 sis cum precibus, ut sibi ignosceret, exoraret. Tenui &
 infirma erat valetudine, adeo ut sæpe superiores nonni-
 hil quasi offenderentur in eo, quod nimis nitide quodam
 modo delicateque in victu vellet haberi; asserens, nisi lau-

lautiuscule curaretur, se scribendi laborem ferre non posse; ut etiam, tuendæ valetudinis causa, regiones ac loca mutaret, neque diutius uno se oppido contineret. Summum, ad scribendum, laborem studiumque adhibebat. Omnia Latina verba collegerat, ac proratione temporum, quibus inventa vel usu recepta essent, distribuerat; tum, quæ verba historicis, quæ poetis, quæque oratoribus essent aptiora, notaverat. Illud enim vero in eo ferendum non erat, quod Sallustium Crispum, Romanæ decus historię, ad sui iudicii calculum revocare ac dampnare audebat; idem fortasse, quod divinam illius prudentiam, illustremque brevitatē, quæ nihil est in historia dulcius, se imitari posse diffideret. Nam tantum quisque laudat, quantum se imitari posse, non desperat. Ceteroqui tanto accuratè, enucleatè, absolutèque dictionis studio torquebatur, ut denas, vel summum quindenas, singulis diebus lineas amanuensi, easque jacens in lecto, dictaret: iisque, qui tantam in ipso tarditatem ac moram admirarentur, respondebat, cum ea, in quibus tantum operæ solitus erat ponere, in hominum manus, atque in existimantium arbitrium, pervenissent, non, quæ ea velociter, sed quæ bene, scripta essent, quæsituros. Illud quoque non esse præternittendum videtur; nimirum quo tempore Torquatus Tassus divinis suis carminibus æternum patriæ splendorem afferebat, eodem, Jo. Petrum Maffejum, soluta oratione, par eodem ornamentum ac decus peperisse, ut, quæ felicitate unus, patriæ illi Virgilius obtigerat, eadem Tullius alter accederet.

xv. PETRVS STROZZA.

Sed jam ex Obiorum montibus, & ab oppido Barra, cujus ruinis, Bergomatum opes crevisse narrantur, in apertam Florentini soli planiciem descendamus; ubi, præter eos, de quorum memoria commemoravimus, plures alii se offerent, quorum imaginibus Pinacothecam hanc nostram, pulcre instructam ornatamque reddamus. Ac primus occurret Petrus Strozza, domesticæ summo genere ortus; qui præter generosam stirpem,

quam

quam ego in præcipua cujusdam laude ponendam esse non ducō, quod eam non nostro ingenio pariamus, sed a natura, atque a majoribus traditam, accipiamus; præter, inquam, nobile genus, erat in omni genere honestarum artium peritus ac doctus, quæ in virum nobilem conveniunt. Ac primum, Aristotelicam omnem Philosophiam, Lazaro Bonamico monstrante, cognoverat; quam ille, acriori mentis acie quam plerique solent, inspexerat: nam multi, quamvis optimo ingenio præditi, a Græcis literis nudi atque inermes, ad ea percipienda, quæ ab Aristotele traduntur, accedunt; ideo sæpenumero fit, ut, hoc lumine destituti, clarissimis apertissimisque in rebus caligent. At illæ, ad eorum intelligentiam, Græcam linguam, in qua non mediocriter erat eruditus, attulerat. Quam ob causam, domi suæ semper exquisitum aliquem e Græciæ magistrum habuit: & ad hanc Græci sermonis notitiam, aliquot etiam aliarum linguarum cognitio accesserat, ut Chaldaicæ: nam librum edidit, de dogmatibus Chaldæorum. Tum, in omnibus Mathematicis disciplinis, erat plane perfectus; nec aliarum artium præclarissimarum funditus expertus ac rudis. Vt ejus ingenium, plurium atque inter se dissimilium doctrinarum, quibus fuerat imbutum, fortibus uber atque fecundum, arbori cuiuspiam simile videretur, in quam insiti aliarum arborum calami, pro illorum varietate varios etiam fructus educunt. Neque alias inferiores artes contempsit, præsertim picturam & architecturam; sed in eis se exercuit; non tamen eatenus progressus est, ut ad levissimas humilimasque descenderet, ut Eleus olim Hippias; qui, cum existimaret, Philosopho nihil esse ignorandum, quod in aliqua arte esset, annulum quem haberet, pallium quo amictus, soccos quibus indutus esset, se sua manu confecisse gloriabatur. Verum, in architectura ita excelluit, ut paucos haberet pares, superiorem neminem. Quæ res magnam illi apud eos, qui eam artem profiterentur, invidiam concitavit; qui serebant indigne, se, in suo artificio, ab homine nobilissimo, & multarum præterea præstantissimarum artium principe, superari. Leone XI Pont. creato, Romam venit; a quo humanissime exceptus est, atque ab epistolis sanctioribus ad suum-

summos principes viros dandis, habitus ad manum: cuius ille muneris, summa ambitione, se cupidum fuisse, mihi narrabat; quod, præter existimationem ac decus, quod habebat adjunctum, magnam prudentiæ ostendendæ, ingenique declarandi, facultatem ac materiam afferret. Quam illi provinciam, Leone extincto, qui quinque & viginti, non amplius, dies in Pontificatu consecit, Paulus V, qui Leoni successerat, non solum non abrogavit, verum etiam stabilivit atque firmavit; & quoniam eam egregie, atque ex animi ipsius sententia, gerebat, insigne in Æde Vaticana, Apostolorum principi sacra, sacerdotium, quod Canonicatum appellat, attribuit. Sed, quamquam eo titulo cohonestaretur, nunquam tamen initiari sacris ecclesiasticis voluit; eo fortasse animo, ut, si, quæ cogitabat, non recte procederent, illud consilium caperet, quod postea cepit. Neque dubium est, quin ab jure, ab æquitate, a sacrorum canonum præscripto discesserit, quibus præcipitur, uti ante certam diem ii, quibus ejusmodi munera conferuntur, sacris iniciantur. Sed, cum in magna apud Pontificem Paulum gratia esset, eorum, qui illi obtrectabant, calumnia paulum est ab ea depulsus. Ædificabat Pont. in Basilica Liberiana S. Mariæ Majoris, regali sane cultu magnificentiaque, sacellum, eidem Virgini sacrum, cujus ædificandi exornandique Pont. Max. non postremas Petro partes dederat; sed, cum adversi in eo aliquid accidisset, id illi ab inimicis tributum est. Quam ob rem cum propterea Pontifici minus esset gratus; abdicavit se sacerdotio, ac Florentiam abiit: ubi humanissime, a Cosmo, magno Etruriæ Duce, exceptus, magno stipendio conductus est, ut, in Gymnasio Pisano, Philosophiam doceret. At consilio, quod postea iniit, indicio de se ipse fuit, cur initiari se noluisse. Nam puellam elegantissimam in matrimonium duxit: quo etiam tempore Jo. Cosmus Geroldinus Amerinus, Cosmi, magni Etruriæ Ducis, architriclinus, de septem viduarum sententiâ, quibus negotium dederat, ut uxorem sibi, usque ab unguiculo ad capillum suum festivissimam, quærent, deformem domum adduxerat. Itaque magnus Dux Cosmus, in jaciendo mittendoque ridiculo, sane perurbanus,

dixisse fertur, in uxore diligenda, plus vidisse Petrum, cum perspicillis suis, (nam parum longe videbat) quam Jo. Cosmum cum septem viduarum oculis. Primum, quem ex uxore sua filium suscepit, tanquam Samuelem alterum, Ecclesiæ ministerio, adhuc infantem, addixit; mandavitque, ut pueris illis adscriberetur, qui in Æde, Apostolorum principi dicata, privatis quotidianis sacris deserviunt.

XVI. GERARDVS SARACENVS.

Nihil homine, nobili loco nato, si sit militibus disciplinis & liberalibus artibus institutus, fieri posse præstantius, perspicuum est magis, quam ut explicari eloquentis cuiuspiam oratique possit. Quod si elegans corporis forma, & suauitas morum, accedat, tum fit illud summum atque perfectum. Quod in iis maxime desideratur, quos in principum virorum aulis versari contingit. Omnibus his laudibus cumulatus extitit Gerardus Saracenus, Senis, ex vetere ac nobili prosapia ortus, honorarius S. Stephani miles. Magna erat in eo dignitas formæ; quam mores optimi honestissimique mire commendabant. Nunquam præponere se aliis, neminem contemnere, sed omnes vereri, atque diligere; nemini in amicorum conventibus oblocutor, nemini orationem præripere, ac velle solus omnia dicere, sed justam partem orationis exequi, suam itidem partem aliis relinquere. Quibus rebus assequebatur, ut omnes ejus amicitiam expeterent, semper cum eo esse cuperent, nunquam expleri liberalissima ac jucundissima ejus consuetudine possent. Eruditus est, a Patribus Soc. Jesu, omnibus doctrinis, quibus puerilis ætas informari ad humanitatem solet. Neque apud eos operam perdidit. Nam erat in puero, & ingenii docilitas, & mira, in accipientibus iis quæ traderentur a magistro, celeritas; in iis autem literis, quæ ab humanitate sibi nomen asciverunt, ad quæ a natura factus videbatur, addiscendis, tantus ardor ac studium, ut brevi, tum Latina, tum Etru-

Etrusca lingua, versus quam elegantissimos faceret, & cum dicendum esset, pura, dilucida, nitida, & copiosa oratione, uteretur; quæ eo gratius hominum ad aures veniebat, quo summa cum oris vocisque suavitate præ adjuncta. Et quo ea, quæ doctæ, erudite, ingeniosæque excogitaverat, in medium posset asferre, & quæ ab aliis afferebantur, accipere, Academiæ Humoristarum frequentissime aderat. Sed magna plerumque ingenia, intra unius facultatis terminos, tanquam seclusa aliqua aqua, teneri non postulant; per varia etiam studia pervagari seque diffundere properant, præsertim, si dulces amicorum consuetudines, si amena cum illis convivia, si honestas nobilium mulierum amicitias, si regales principum virorum aulas meditentur; quibus omnibus in locis iis, quorum ad venustatem mores valent, plurimum possunt, ubi in primis Venus, amor, & amœnitas exerceatur. Igitur humanissimas illas elegantissimasque literas, quibus, tanquam Jovis poculo, pectus aiebat, cum aliarum pulcerrimarum liberalissimarumque artium studiis copulavit atque conjunxit. Nam, scite fidibus cavere, eleganter saltare, & psallere, doctius etiam animi gratia pingere, quam plures, quibus artificium illud vita erat. Prima aulicæ vitæ rudimenta posuit, in casta Alexandri Cardinalis Ursini, optimi sanctissimi que Principis, aula: fuit enim cubiculi illius præfectus: sed ad breve tempus: nam celerius, quam opus fuerat, rebus humanis virum illum principem sua ingentia in cælum merita evocarunt. Inciderat illius mors in initia alterius Pontificatus, a quo, ob veterem amicitiam, omnia summa sperabat, & quoniam, literatos homines, non levis omnium fere mortalium opinio in spem maximam induxerat, fore, ut, eo Pontifice, summus ipsis honor haberetur, atque omnia virtutis præmia deberentur. Sed hæc illi spes, una cum aliis doctis viris, decollavit. Etenim nullum fere unquam fuit tempus, quo magis literarum studia vluerint, nec, quo majore viri, doctrina & eruditione clarissimi, ludibrio sint habiti, ac virtutis præmia largius, imperitis hominibus reddita. Quamquam hæc non tam est virorum Principum culpa, quam semper adversæ, literatorum na-

tioni, fortunæ. Sed tandem (adversus animi sui sententiam, arbitror, cum mitioribus esset Musis addictus,) Ravennam missus est iudex, ubi aliquot annos, causis cognoscendis dijudicandisque, summa cum æquitatis justitiæque laude, præfuit. Verum, transactis jam suis partibus, Romam reversus, cum aliquandiu fortunæ suæ periculum fecisset, caderentque omnia teterrime, ad Principum Mediceorum benignitatem, & erga bonas literas studium, spei suæ navim, mutata velificatione, dirigere statuit; quod memoria teneret, complurium, clarissimorum doctrina virorum, spes naufragas atque afflictas, quæ illuc appulissent, tutissimum in eo perfugium portumque invenisse. Eo igitur, unde tam secundus status ostendebatur, vela pandens, non solum inde, quo aggrediebatur, non est repulsus, neque in altum rejectus, sed humanissime exceptus, ac Gymnasii Pisani Gymnasiarcha, hoc est, ut nunc loquimur, Præfidentis, est factus: quod munus, honestatis & utilitatis plurimum habet adjunctum. Tantus honor, Principis liberalissimi, rem illius familiarem labantem ruentemque præfulsisset præmunissetque, si diuturnum esse licuisset; sed, Pisani insalubris aëris gravitatem cum ferre non posset, annos sexaginta natus, est mortuus.

XVII. IULIVS CÆSAR BOT- TIFANGA.

SI Julius Cæsar Bottifanga, Urbevitanus, Lusitanæ Christi militiæ miles honorarius, quemadmodum poëtiæ facultati operam dederat, in eaque se exercuerat, ita se Philosophum professus esset, fauve haberemus, quem cum vetere illo Eleo Hippiæ, cujus antea meminimus, non solum compararemus, verum illi etiam merito anteferrems. Ille enim industriæ suæ modum, cum a Philosophiæ studiis discessisset, iis tantum rebus terminasse legitur, quæ sunt in unaquaque earum artium, quæ ad usum & ornatum corporis attinent; ut, in palliis fardendis, calceis suendis, annulis, quibus digiti ornantur, conficiendis, fardinatoris, sutoris, & aurificis munus impletet: nunquam tamen me legisse
vel

vel audivisse memini, in iis laudibus eum esse versatum, quod tibiis ac fidibus optime caneret; quamquam verisimile sit, hanc ab eo laudem non abfuisse, quod summam eruditionem Græci sitam esse censerent in nervorum vocumque cantibus; ut etiam Socrates, jam senex, musicam didicisse narretur. Sed, ut demus, eam laudem in illo fuisse, ut citharizare, & cantare ad chordarum sonum, non ignoraret, eam certe gloriam usurpare sibi non potuisse crediderim, quod citharas, tibiās, aliaque musica instrumenta, sua manu elaborasset perfectissetque. Tum, gloriatum eum esse non legimus, quod penicillo vel acu pingeret, aliaque multa ex se daret, in quibus hic noster longe multumque præstabat. Etenim, non solum femoralia, thoraces, sagas, qui essent apti atque habiles ad ea corporis membra, quibus parabantur, sibi ipse describebat, formabat, suebatque; verum etiam vestes, unde hæc sibi concinnaret, sua manu texebat: non solum fidibus præclare canebat, atque ad earum sonum vocem accommodabat, verum etiam versibus, quos cantabat, modos faciebat; tum, quod incredibile dictu videatur, una manu tibiis, altera clavicymbalo, docte scienterque canebat; præterea, fides, testudines, clavicymbala, melius quam quivis alius artifex, conficiebat: atque unum ex his, quod cantus suavitate ferebatur in primis, Sodalitati B. V. Assumptæ, in domo professæ Societatis Jesu, testamento legavit. Ad pingendi vero artem quod attinet, ita ejus erat peritus, ut se ipse, suam formam in speculo aspiciens, coloribus ad vivum expresserit: acu vero non minus graphice sciteque pingebat, ea præsertim collaria, quæ tunc usus frequentabat, pinnis, eleganti opere, acu formatis, obducta; in quibus elaborandis, Arachnen, atque adeo Palladem ipsam, in contentionem certamenque vocare potuisset. Credo equidem, si quis ejus lateri colum, & in ea linum apposuisset, ut subtegmen tenue neret, pro copîa ac sapientia id eum fuisse facturum. Quid multa? adeo virtutibus omnibus abundabat, ut vulgo flos virtutum appellaretur. At forma, in qua venustatis ac dignitatis plurimum inesset, suis æqualibus antecessit, quam, arbitror, fuisse causæ, ut ejus adulescentia aliquanto fuerit

intemperantior: nuni a mulieribus, ultro expetitus, sibi temperare non poterat. Sed hoc adolescentiæ vitium maximis est emendatum virtutibus. Nam ad eam, quam diximus, Sodalitatem adscriptus, insignia pietatis opera amplexus est, ac frequentem pœnitentiæ & Eucharistiæ usum obtinuit; seque in eo, ad extremum usque spiritum vitæ, continuit. Dyobus S. R. E. Cardinalibus navavit operam, ab epistolis Card. Cornelio, & Card. Ausculi, e Dominicana familia; cuius morte tantum ad eum bonorum pervenit, quantum esset, ad vitam honeste traducendaut, satis, neque esset ipsi necesse, inopiæ causa, suas alteri operas locare. Denique, ex diuturno scribendi labore, in renum morbum implicitus, decessit. Scripsit librum de elephante, Romæ viso: ac convertit ex Hispano in Italicum sermonem vitam B. Aloyfii Bertrandi Dominici. Edidit poëma, de admirabili Corporali, quod Urbeveteri, summa ab omnibus religione, colitur, quod mira quædam, tota Italia, privatim ac publice, religio sit Corporalis Urbeveterani. Quamquam, dolasse se illud opus, non autem perfecisse, fateatur.

XVIII. AVGVSTINVS BARBOSA.

QVantus, in Lusitania, bonis artibus semper honor sit habitus, declarant primum, florentissimæ in nobilissimis ejus Regni urbibus Academiæ a suis Regibus excitatæ, declarant plura Patrum Soc. Jesu Collegia ad erudiendam in omnibus liberalibus disciplinis juventutem instituta, Olyssipponense, Conimbricense, atque alia non parum multa; ac Collegio Conimbricensi, Joannes Rex, hoc nomine tertius, uno fere eodemque tempore, regali sane magnificentia, vestigialium annuorum, quod satis esset ad socios ducentos alendos, attribuit: ostendit deinde inaguis illorum numerus, qui ex Academiis illis, maximarum rerum omnium scientia eruditi, ad illustranda atque exornanda, doctrinæ ipsorum lumine, præstantissimarum disciplinarum studia, prodierunt. Neque solum singulos, qui summa ingenii doctrinæque laude præstarent, singulæ ejus Regni urbes extulerunt, sed ex uno oppido Vimaransenfi,

Bra-

Bracarenſis diœceſis, atque adeo ex una Barboſarum familia, plures extiterunt, qui, multarum præterea præclariffimarum artium ornamentis inſtructi, ſummum juris privati ac publici ſciẽtiæ culmen attigerint; ut, quemadmodum in unam arborem plura genera videas, ſic in iſtam domum, multorum inſitam & illuminatam ſapientiam, aſpicias. Ex hac tam generoſa ſtirpe, clariffimum illud, atque optimis ac præſantiſſimis reſertum fructibus, germen enituit, Emanuel Barboſa, Advocatus regiſ, qui commentarios edidit in ordinationes regias Luſitanorum. Ex hac eadem, quaſi planta, emergens, patulos longè lateque ramos effudit Petrus Barboſa, ſummus Regis Luſitani Cancellarius, qui, doctiſſimis ſuis interpretationibus, complures Juris civilis legum nodos, multis atque arcanis inter ſe nexibus implicatos ac confertos, explicatos ac liberos reddidit. Tertius ab iſtis numeratur Auguſtinus Barboſa, Emanuelis filius; qui, quamvis generoſus, multos Romæ annos (quæ miſera eſt conditio eorum, qui dant operam literis,) in pannis & inopia vitam exegit. Habitavit in taberna diverſoria, anguſto humilique cubiculo, ad Divi Andreæ ad ſepes. Non bis, ſed ſemel tantum, in die, cibum capiebat. Ac, ſi eum ex libris, quos edidit, ſpectaſſes, quorum tam magnus eſt numerus, inſignem domi bibliothecam habuiſſe juraſſes, at ne unum quidem ibi librum inveniſſes. Memoria erat ſumma, ſingulari, incredibili; hæc erat illi pro bibliotheca; immo hæc omnes omniũ bibliothecas ſuperabat. Quidquid eſt in Urbe bibliopolarum, arcta ſibi familiaritate devinxerat, non alio vinculo, niſi vitæ probitate atque innocentia, morumque ſuavitate; quibus facile ſe in hominum gratiam inſinuabat. Itaque quotidie, modo in hac, modo in illa, bibliopolæ cujuſpiam taberna, a manè uſque ad vesp̄ram, ſedens, totum ſe librorum, quibus ſibi maxime eſſet opus, lectioni tradebat, quæque legebat, memoriæ cuſtodienda mandabat: cujuſ tanta erat viſ, ut, domum rediens, non ſolum eorum, quæ legiſſet, fixas in animo ſententias, verum etiam verſuum ordinem numerumque referret, literisque mandaret. Hinc illa ſunt orta volumina, quibus editis, immortalẽ ſui nominis me-

moriam reddidit. Ac primum, prodit in lucem, opus
 illud egregium, de officio Episcopi, duobus volumini-
 bus comprehensum: quod tantum habuit commendationis,
 ut multorum beneficentiam, ad illius inopiam
 sublevandam, illexerit. Alterum opus, quod non mino-
 rem illi famam ac benevolentiam hominum peperit,
 fuit illud insigne, de jure ecclesiastico universo, volu-
 men. Quod opus, magno alieno labore partum, in se il-
 lum transtulisse, ajunt, hoc modo. Die quodam ejus fa-
 mulus, falsa quædam muriatica in prandium coëmerat,
 quæ, ne manus digitosque inficerent, tetroque odore
 imbuerent, cetarius chartis quibusdam, ut moris est,
 amiciebat: quem postea amictum famulus, domum
 reversus, cum, præsentem domino ac vidente, muriatica
 illa exuisset, quo in aquam injecta macerarentur, & in
 terram abjecisset, dominus, curiosus inspiciendi, quid
 chartis illis contineretur, eas sustulit, ac lustrare oculis
 cœpit: viditque, elegantissimi doctissimique cujusdam
 operis initium esse; statimque suspicatus est id, quod
 erat, auctore, antequam potuisset illud impressum ty-
 pis emittere, e vivis erepto, heredes, ignaros, quan-
 tum in eo boni inesset, tanquam ineptas, nescio quas,
 chartas, & inutiles, cetario vendidisse; & statim magnam
 in spem venit, auctore e medio sublato, si librum illum,
 quoquo modo nactus esset, pro suo edendo, maximam
 sibi ex eo gloriam posse contingere: ac percontari dili-
 genter e famulo cœpit, in quonam macello, & a quo
 cetario, muriatica illa coëmisset. Qui aperuit illi omnia,
 & simul signa & notas ostendit, quibus ad cetarii illius
 tabernam, sine ullo errore, perveniret. Abiit ille curri-
 culo, quo mittebatur; librum invenit, cui pauca quæ-
 dam chartæ fuerunt detractæ; ac civili cum precio rede-
 mit; tum, subrogatis iis, quæ decrant, ac pluribus et-
 iam aliis adjectis, imprimendum, pro suo, curavit.
 Quod debet esse exemplo omnibus, qui scribunt, ut dent
 operam, quantum potest, quo vivis ipsis, sua scripta lu-
 cem aspiciant. Hæc ab homine, Barbosæ amicissimo, ejus-
 que arcanorum omnium conscio, accepimus. Edidit de-
 inceptis alia plura, de officio Parochi, de Canonici dignita-
 te, Collectanea super Jus canonicum; quæ in volumina

quinque distribuit; Collectanea Concilii Tridentini, aliorumque Conciliorum; disputationes varias; praxin exigendæ pensionis, Collectaneorum ex Codice Justiniano tria volumina; denique Vota decisiva. Sed, cum postrema ejus opera, superioribus, nec doctrina, nec methodo, nec sermonis elegantia, responderent, suspicionibus locum aperuisse videtur, illa vel a parente, vel ab altero, gentili suo, emanasse, hæc deteriora ab ejus ingenio esse profecta. Denique, insignem Canonica-tum adeptus, reversionem fecit in patriam.

XIX. IOANNES CIAMPOLVS.

IO. Baptista Strozza, cujus modo meminimus, revo-cavit mihi in memoriam Jo. Ciampolum Florenti-num, alumnum ac discipulum suum, quem ille ex-imium habuit, & in quo alendo erudiendoque, plus quam in ceteris sumptus fecit, plus operæ sumsit; nec, ut dicitur, oleum, atque operam perdidit. Nam inge-nium nactus amœnum ac docile, quasi solum fertile at-que copiosum, quæ in illud doctrinarum semina dabat, statim, magno cum sænore, recipiebat. Eum igitur, Theologia, Philosophia, atque omnibus liberalibus di-sciplinis instructum, Paulo V. Pont. Max. etiam tum adolescentem, Romam perduxit, suæque commendatio-ne multis principibus viris in clientelam & amicitiam tradidit; dedit etiam operam, ut in Academiis, quæ tum celebrabantur, in ea præsertim, quæ Humoristarum ap-pellatur, audiretur: unde, tum Jo. Baptistæ gratia, tum rerum, quæ ab eo tradebantur, apparatu, tum ætatis formæque bono, quod, cum virtute conjunctum, ad conciliandos sibi hominum animos, magnam vim habet, ab omnibus laudatus probatusque discessit. Cum, omnia scientiarum ac disciplinarum genera in sua supellectili numerabat, tum Philosophiæ ac poëticæ facultatis do-minus ac magister haberi volebat. Etenim multa in Phi-losophiæ se reperisse affirmabat, Aristoteli etiam ipsi in-cognita, cujus methodum atque doctrinarum, una cum Virgilio Cæsario aliisque doctis atque illustribus viris, illudebat, ac propemodum nihil eum scisse affirmabat.

In versibus autem faciendis tantum sibi tribuebat, ut omnes, qui ante ipsum scripsissent, tum Etrusco tum Latino sermone, (nescio an Claudianum exciperet,) rudes, agrestes, sine arte, sine viribus, sine nervis, sine verborum ac sententiarum robore, aiebat, serpere humi, nec audere se altius attollere. Virgilium vero, ac Franciscum Petrarcham, eo nomine felices appellabat, quod tot seculis principes poetarum habiti essent, cum nihil in eis nisi humile atque vulgare inveniretur, nec comparandi quidem essent ad eos, qui, sua ætate, omnium eruditissima, florerent; puta, ad ipsum paucosque alios ejusdem sententia. Tantum se ab ætatis ingeniique æstu abripi, & in hæc tam absurda dicta abstrahi, sinebat. Quamquam audiui, paulo ante suum e vita discessum, totam suæ sententiæ rationem mutasse, eosque poetas in veterem dignitatis locum, unde opinione sua deturbati fuerant, reposuisse. Sed, antequam ætas illum expoliret, atque hominem redderet, die quodam cum per Urbem rheda veheretur una cum Gaudenzio Paganino, viro docto, qui tum in gymnasio Rom. literas Græcas docebat, aliisque eruditis hominibus; occasione arrepta, cepit ita in Virgilium & Horatium invehere, ut diceret, nemini unquam iniquius Poetæ nomen fuisse comparatum, quam illis; etenim nullo esse homines ingenio, nulla eruditione, nullis literis, & quod rem continet, nulla inventione, sed puerorum similes, qui tum primum in scholis versus facere discant; contra, se, divino quodam munere, omnes summi poetæ numeros fuisse adeptum, in quo omnes ex virtutes conspicerentur, quarum alii fuissent expertes. Quod cum Paganinus ferre non posset, stomachans, e rheda se eiecit, sermonem segregavit, auresque diris illis, ut ipse aiebat, maledictis, ne contaminarentur, eripuit, neque deinceps ausus est, non modo cum eo de ejusmodi rebus sermones instituere, sed ne eo quidem, ubi ipse esset, accedere. Et sane, quod vere dicere possumus, inerat natura poetica in ejus viri mente, quædam: magno animo, ac majore confidentia, ad scribendum accedebat: crebræ in eo sententiæ, inaudita, quæque venerunt in mentem ante ipsum nemini; translata ingentia,

im-

immania, & unde unquam existimasses, petita; genus orationis altum, exaggeratum, tumidum, & tanquam si alas habebat, se nubibus inferens: verborum comprehensio subobscura, implicata, ac difficilis ad intelligendum. In quo ipse se decipiebat: nam existimabat, posse suis carminibus elegantissimos modos fieri, eosque, summa cum audientium voluptate, tanquam intelligentiæ cuiusvis obvios, cani. Sed ipsum fallebat eventus: nec injuria: nam, cum leguntur, nisi admodum attendas, atque eos oculis iterum sæpiusque subjicias, vix intelligas; nedum, modorum nexibus illigatos, ac variis vocum flexionibus obscuratos, intelligentia devores. Interfui ego, cum in æde, D. Francisci Stigmatibus sacra, quædam ejus cantio concineretur. Modos fecerat modulorum optimus: cantores erant, non modo Urbis, sed orbis terræ principes; magna adhibebatur ab illis cura, ne quid titubarent. Ille tum maxima erat apud Urbanum Pontificem gratia; aderant fratris ejusdem Pontificis filii: & tamen tanta auditorum admurmuratio, tanti tumultus facti sunt, cum singuli capita inter se conferrent, ac variis de rebus fabularentur, ut me illius, cui sorte assidebam, puderet, ac libenter aliqua evolassem, si potuisssem, idque non alia de causa, nisi quia illi versus erant obscuri, & a vulgi auribus abhorrebant. Quamobrem jure poterat a Jo. Baptista, si forte hanc ab eo indolem hauiserat, audire, quod olim tibicen Antigenidas discipulo, sane frigenti ad populum, dixisse narratur, Mihi cane & Musis; mihi cane, & iis, quibus hoc dicendi genus probari intelligi. Omnino, jam inde ab ineunte ætate, inerat in Joanne magnus æstimator sui ipsius, & contemtor aliorum, animus, inerat elatio animi, inerat ambitio. Cujus rei magno illud argumento est, quod, etiam tum puer, coram Christiana Lotharingia, magna Etruriæ Ducissa, ausus sit caput pileo tegere. Nam cum a Joan. Baptista ad eum mitteretur, cum versibus, quos ipse fecisset, ut vicaria Ciampoli voce in aures magnæ Ducissæ infunderentur, die quodam Ciampolus, quo fortasse in circulis & in conventibus amicorum gloriari posset, eos sibi honores habitos, quæ nemini, quantumvis summo genere nato, concederentur, dicitur commen-

tus fuisse, nescio quas distillationes atque gravedines, ob quas diutius sine magno valetudinis incommodo, aperto capite, esse non posset; quam ob causam, non solum pileum, sed pilcolum etiam, cogeretur afferre. At Christianam, ajunt, utpote humanissimam, tam cari capitis misericordia captam, fecisse homini potestatem, ut illud, qua maxime fas esset ratione, ab aëris injuria defenderet; qua potestate facta, confestim ille capiti pileum admovit. At mulier correxit illico, quod ille se intellexisse minus assimulabat; atque, de pilcolo, inquit, intelligebam, non de pileo; proinde remove illud a capite, quantum potest. Magua igitur ingenii doctrinaque suæ opinione imbutus, cum tota illi Florentia angustior, quam ut animo conceptas spes caperet, videretur, Romam, unde major ad id status ostendebatur, vela dedit. Arcem enim orbis omnium terrarum, angustius ingenii doctrinaque suæ theatrum futurum arbitratus est, atque inde ea sibi præmia proventura, quæ aliunde evenire non possent. Placuit Jo Baptistæ ratio, & multos annos, sua pecunia, illius sumptibus suppeditavit. Exceptus in primis est humanissime a Virgilio Caesarino, ob voluntatum studiorumque similitudinem, adeo ut sua illum domo ac mensa communicaret: insinuavit se præterea in aliorum principum virorum consuetudinem & gratiam. In his Maphæum Cardin. Barberinum, qui postea, Gregorio XV extincto, Pontificiam D. Petri cathedram obtinuit, literarum elegantia sibi promeruit; sed Aldobrandinos Principes, arctiori benevolentia nexu, habuit obstrictos; quorum auctoritate & gratia, a Gregorio XV, cui arctissima se familiaritate implicaverant, obtinuit, ut Gaspari Pallonio, in scribendis Pontificiis Latinis epistolis, quas brevia vocant, sufficeretur. Quæ res magnam sibi omnium admirationem excitavit; non enim Latine scribendi laus admodum ab eo expectabatur, qui omnem fere ætatem in Etrusca poësi consumserat, nullum autem tempus Latine eloquentiæ dederat. Sed singularis magnitudo ingenii non desideravit longum, ad se perficiendum, in ea quoque scribendi consuetudine, spacium. Nam brevi, tantam verborum copiam, tamque eximiam scribendi vim

est adeptus, ut frenis potius, quam calcaribus, indigeret; nam sæpenumero, ab æstu ingenii se abripi, ac longius abstrahi sinebat, quam brevium ratio deponceret. In cominere factus est Basilicæ Vaticanæ Canonicus. Sed non potuit effugere ingrati erga Jo. Baptistam hominis speciem. Nam, cum divitiis afflueret, neque quoquam indigeret, Jo. Baptista, quod illi erogabat, aliorum adolescentum ingenuorum usibus destinaverat: quod ille ferens indigne, tanquam sibi debitum, non autem alterius benignitate traditum, persecutus est litibus. Sed, post Gregorii mortem, Urbanus VIII non solum illi, commissam a Gregorio provinciam conservavit, sed etiam intimi ejus cubicularis honorem addidit, atque adeo intimum eum habuit; ut omnia fere illi consilia crederet, & sibi, cum societas hominum aut negotiorum odium ceperat, amicum ac socium adhiberet, in cujus sermonis suavitate, omnes animi sollicitudines curasque deponeret. Verum, nullum est cuiquam proprium bonum, nulla perpetua felicitas. Nam, cum in tanto esset honore & gratia, ac prioris vitæ oblitus, ita veteres amicos despiceret, ut salutantes non resalutaret, repente de tanto gratiæ fastigio corruit; neque solum ab aula est, verum etiam ab Urbe, honoris specie, summotus. Nam plures illi urbes, administrandæ, sunt traditæ, ac demum Aësis prætor est mortuus. Quam autem intoleranter Urbis desiderium ferret, satis dici verbis non potest; sed nullis amicorum precibus, nulla valetudinis, qua maxime adversa utebatur, excusatione impetrare potuit, ut Romiam reverteretur. Causæ, quæ tantam illi invidiam conflagrant, multæ afferuntur, sed ex in primis, nimia loquendi libertas, intimæ atque apertæ cum iis amicitie, quorum voluntates ab iis, quorum ipse tempori inservire debebat, alienæ existimabantur; ac demum, quod mores vultusque nonnullorum, mimica prope scurrilitate, imitaretur exprimeretque, quos æquum erat illum vereri atque metueri. In illis provinciis administrandis, multum illi ocio ad scribendum commentandumque suppeditatum est, quo ocio diffuens, complura egregie, tum soluta oratione, tum versibus, scripsit; quæ, nondum edita, Regi Poloniæ, testamento legavit.

xx.

Eques THEODORVS
PORTA.

Eques Theodorus Porta natus est Sebastiano Porta, Veneto, pictore eximio, ex eorum numero, qui Pontificiis diplomatibus bullas plumbeas, quæ ex illis dependent, affigendas curabant; quem ordinem Xistus Quintus sustulit. Fratrem habuit Phidiam Portam, sed alia matre, uno patre; qui magna vi ingenii præditus, potissimis literis excultus, in agendo, in comædiis, deliro atque amatore sene Veneto, admirabilis, cum sacram Pont. Max. pecuniam furripuisset, ac Venetias persequeretur, ex fuga retractus, supplicio affectus fuerat, una cum aliis novem, amicissimis suis, haud obscuro loco natis, non modicis opibus, doctis præterea viris, quorum alii erant jurisconsulti, alii medici, alii philosophi ac poëtæ. Hi primum, animi causa, cœperant, noctu carnes, e fenestris appensas, ut hædos, pullos gallinaceos, meleagrides, phasianos, furripere, ex eis deinde convivium instruere, ac magno cum risu celebrare: sed paulatim, ab hoc aditu januæque patefacta, progressi sunt longius, ac maximis sese furtis implicaverunt; quibus evicti, magno cum suarum familiarum dedecore, in ipso ætatis flore, pœnas legibus dederunt. Quod, adolescentibus præsertim, debet esse exemplo, ne, ex sapientis consilio, minima contemnant; quod ex iis ad majora aditus fiat. At Theodorus, sive ex fratris supplicio, Urbis pertæsus; nam vix sibi honestum putabat, in ea urbe conspici, ubi recens ille tanta fuerat ignominia affectus; sive alia de causa, profectus est in Germaniam, ubi plures, nobilium præsertim, sibi amicos, putavit, ac fecit suos; tum, paululum extantium ac prominentium signorum artificio, quo ille præstabat, quorum signorum nonnulla, ut ipsum postea Romæ dicere audivi, obsceno turpique argumento elaborata, mire eorum animos ceperant. Tum eleganter saltandi arte, in qua Romæ & in Italia, apud peritissimos saltatores, se exercuerat, atque ibi fortasse militaris Germani hominis par-

partes in comœdiis agere didicerat ; quas , tanta cum venustate , tamque ad similitudinem veri , persequēbatur , ut in eo genere ne excogitari quidem perfectius posset . Sed , non ita multos post annos , reversus in patriam , nobilium virorum ac doctorum hominum familiaritatibus se dedit easque , & ea qua præstabat arte , & linguæ volubilitate & elegantia , tutabatur . Cum autem , a Clemente VIII. , Henricus Card. Cajetanus , ad Regem Poloniæ mitteretur , legationis jure ac nomine , dedit operam , ut in ejus comitatu esset ; atque impetravit . Ac postea nulla erat voluptas major , quam audire ex eo , quæ , in ea legatione , mira contigissent ; concursus populi , equitatus , ac pompam , qua legatus exceptus fuerat , ejusdem congressus cum Rege , colloquia inter ipsos habita , conviviæ apparatus , cœnarum magnificentiam , vinorum , quæ ille ex Italia advexerat , varietatem & copiam ; ut non alia in iis epulis vina biberentur ; quæ Poloni illi , quibus haud sæpè tales hereditates obvenirent , in sese avariter insurgitabant ; adeo ut monstri illis simile videretur tantam vini exotici pretiosissimi vim , in singulis cœnis ac prandiis , ac tam large diffundi . Atque ejusmodi alia commemorabat ; quæ etiam majora , verbis , faciebat ; quibus ita erat abundans , ut , ubi ipse esset confestim silentium , tanquam si in aliquo manifesto scelere deprehensus esset , exultum abiret , atque solus , quasi in possessionem suam venisset , omnium aliorum partes orationis exequeretur . At fiebat interdum , ut nos , animi relaxandi gratia , in iis ædibus , quo Academia Humoristarum convocabatur , tres , omnium fere mortalium loquacissimos , simul componeremus , & tanquam in aliquod contentionis certamen deduceremus ; hunc , Henricum Falconium , & Gismundum Boldonum . Erasmus enim vehementer cupidi , cognoscendi , quisnam certaminis victor discederet . Atque erat ridiculum , videre , quemadmodum alius alii obloqueretur , ut , incipientem unum dicere , interpellaret alter , nec loqui sineret , ille contra obssisteret , & institutam orationem perorare contenderet . Denique finis fuit ejusmodi , ut nemo arma summisserit , nemo aliis , ne tantulum quidem , de sermonis celeritate , & dicendi glo-

gloria, concesserit, nos vero incertos animi dimiserit, cuinam ejus certaminis palma deferenda esset. Decoratus est postea a Paulo V honorariis Lusitanæ Christi militum insignibus, ideo, quod sua eloquentia allaudabilem operam dedisset, ut cognatus quidam suus signa pulcherrima, quæ habebat, Burghesio Principi venderet. Tum cernebatur novus hic miles, cincturus, per Urbem incedere, iisque, qui obliquis ipsum oculis ausi essent aspicere, formidinem ac terrorem inficere. Sed, quantum illi, ejusmodi honoris gradus, immiserit in ventrem, confidentiam, quantum animi ad præliandum dederit, ostendit die quodam, Romæ in Ianio, ad forum Panici; a quo cum vitulinam carnem emeret, eamque ad pondus non respondere diceret, contra Ianius, falsum cum esse, nec vera loqui, assereret, ille iratus, animo, quem sibi Mars, nuper ad militiam illam adscripto, immiserat, gladium eduxit, atque ibat, ut Ianium transverberaret, vel in terrorem fugamque conjiceret. At Ianius, qui probe hominem nosset, sumpta hasta, qua carnem ex carnario detrahebat, plures in partes gladium eidem comminuit; ille autem capulum, & vaginam gladio vacuam, domum retulit. Recitavit, in Academia Humoristarum, versus a se facetissime scriptos, ac sermonem habuit luculentum, de rebus, nisi memoria me fugit, ad pingendi celandique artem pertinentibus. Sed demum, paucorum dierum morbo, est sublatus & vivis.

XXI. BELISARIUS BULGARINVS.

PRæclare atque sapienter, a viro docto atque prudenti, dictum cuidam fuisse narratur, qui, magna vi animi ac vocis, nescio quem, summis in cælum laudibus efferebat; Quæso, inquit, parce voci, cedo, quibusnam ille amicis utatur; ita enim & tu laborem, hunc laudandi, lucri feceris, & ego, quo loco ac numero ille sit habendus, ostendam. Quod si vir hic, tam scitus ac prudens, Belisarii Bulgarini amicorum nomina sibi edi

edi postulasset, quibuscum ille conjunctissime vixit, ut conjecturam ex eis de illius virtutibus faceret, continuo omnes hujus ætatis præstantes sapientia viri enumerarentur, quorum clarissimas, in omni genere literarum, laudes nulla unquam obscurabit oblivio. Ac primum, ex sua ipsius patria nominarentur illa bonarum artium lumina, patriæ decus, Italiæ ornamentum, Franciscus Piccolomineus, Angelus Spannocchius, Diomedes Burghefius, Celsus Cittadinus, qui etiam dialogum suum, de origine usus, quo, plurali numero, singularis persona cæpta est appellari, ex illius nomine, Bulgarinum inscripsit; eques Bargaglia, qui in illis suis nunquam satis laudatis dialogis, de Impresis, interlocutorem cum adhibuit; Hieronymus item Bargaglia, Horatius Lombardellus, alique, qui aliquod in literis nomen habuerunt. Extra illam urbem alii etiam se offerent, & in Belisarii amicorum numero se fuisse, gloriabuntur, ii, de quorum virtutibus nullæ unquam literæ silebunt, nulla ætas conticescet; Torquatus nimirum Tassus, Eques Baptista Guerrinus, Robertus Titius, Jo. Baptista Strozza, Antonius Riccobonus, alique illustres viri, in illius amicitia societatem venisse ostendent. Sed eximia quædam virtutis vis, modicis Italiæ regionibus circumscribi non postulat, sed, foras egrediens, maria transmittit, Alpes transcendit, ac longe lateque sese diffundit. Ideo Bulgarinus transalpinos etiam in sui amorem & admirationem attraxit; in his, Saturninum Simonium, Galum, Jurisconsultum præstantissimum; qui etiam librum illum suum, de literis pereuntibus, anno clæ l. CI, typis impressum, apparere in Belisarii nomine voluit. Et ex hoc cum exteris nationibus, ob communium studiorum societatem, usu amicitiaque, plures eorum linguas apprehenderat: itaque, ad sermonem Etruscum, quem profitebatur, & Latinum, cujus erat intelligentissimus, Græcum, Gallicum, & Hispanum adjunxerat. Neque quisquam erat liber, quovis fere sermone conscriptus, quin legisset, ex eoque unumquodque, quod esset notatione dignum, excerpisset, & in sua adversaria transtulisset. Præter hæc humanissima politissimarum artium studia, omnibus erat disciplinis instructus, Theologia,

logia, Philosophia; neque aberat Medicinæ notitia. Quantum vero in poetica facultate, & in excogitando inveniendoque, æqualibus suis præstaret, primum, plura ejus carmina declarant, omnium earum linguarum, quas notas illi fuisse diximus, genere scripta, & in Academiis, quas partim ipse instituerat, ut Accensorum, partim, extinctas, in lucem revocaverat, ut Inthronatorum, cum plausu recitaverat; tum, comœdiæ, & in his ea, quæ Permutationum nomine vocatur, ostendunt; quas ille festis Bacchanalibus, ut a disciplinis Gymnasii Senensis ederentur, scribebat. Deinde, nullum nobiles, suæ civitatis, viri ludicum armorum certamen dabant, quin illis libellos, quibus decertantes, simulatis inter ipsos inimicitias, se invicem ad pugnam provocabant, effingeret. Præterea, in diurnis nocturnisque virorum mulierumque nobilium conventibus, nemo erat, qui illum ingenio anteciret, in reperiendis novis ludorum generibus, quibus horæ illæ honeste hilariterque traducerentur. Coactus est mandare typis animadversiones suas in illud Jacobi Mazzoni Cæsenatis opus, quo Dantis, divini ut ipse vocat, hominis comœdiam, ab iniquorum calumniis vindicare conatur, quas animadversiones, Horatii Capponi, Carpentoracti Episcopi, rogatu conscripserat; in quas furtim alius invaserat, suoque nomine, hoc titulo inscriptas, ediderat, nimirum, *Brevis atque ingeniosa, contra Dantis opus, disputatio*. At liber ille, multorum deinceps operum, quæ a Bellisario prodierunt, quasi sementes ac materies extitit. Nam is, qui literarii illius se furti obstrinxerat, cum manifesto teneretur, cecinit palinodiam, eamque, una cum apologia, adversus ea quæ Bellisarius Danti objecerat, edidit. Secutus est Hieronymus Zobbius Bononiensis, qui, lectis iis quæ circumferebantur, suam voluit de illis sententiam interponere; atque anno c 15 15 LXXXIII, librum in vulgus emisit, cujus erat titulus, *Dantes & Petrarca, ab Hieronymo Zobbio defensi*. At Bulgarinus, hac nova Dantis defensione a Zobbio suscepta, quo magis ejus, a quo expilatus fuerat, furtum illustraretur, alterum Senis librum imprimendum curavit, quo ea continebantur, quæ Horatii Capponi responsionibus, ad quatuor primas sua-

rum

rum in Mazzonum animadversionum particulas, replicaverat. Nam deinceps, ut eas componebat, nec partes Cappono mittebat; quibus ille, multa pro Dante afferens, respondebat; contra Bellisarius Capponi dicta confutabat, & a Dantis defensione repellebat. Tertio opere, scripsit contra prædictam Hieronymi Zobbii disputationem, de Dantis comædiis, atque alteram illius eorum, quæ dixerat, defensionem. Quarto libro, respondit palinodix; & apologiæ illius, qui honorario eum furto, suis in Dante animadversionibus, spoliaverat, seque illis exornaverat. Huic operi successit quintum, quo, Particulis poëticis, pro Dantis defensione a Zobbio disputatis, patrio sermone rescripsit. Cum autem Jacobus Mazzonus, primam ejus voluminis partem in hominum conspectum lucemque protulisset, in quo pro Dantis Comædia acriter vehementerque propugnat, factus est sexto operi locus, hoc titulo, *Bellisaris Bulgarini, Aperti, Academici Inthronati, nota ad primam Dantis defensi partem Jacobi Mazzoni*. Postremo, tota hæc de Dante concertatio septimo conclusa est libro, adversus manuscriptum, ad Dantis defensionem pertinens, falso Speronis Speroni nomine prolatum. Ne multis morer, finis fuit ejusmodi, ut Bulgarinus certaminis victor discederet, cum, certissimis validissimisque rationibus, adversariorum copias, pro Dante propugnantes, profligasset, obtinissetque, illius comædiam, veram poëmatis cujuspiam rationem non habere, quod ab Aristotelis præceptis longissime aberraret. Idque eo fuit mirabilius, quod ab eo docti eruditique viri laus non admodum expectabatur, qui in occupatissimo vitæ genere erat, atque perpetua magnæ splendidæque familiz, in qua, præter feminas, duodecim mares filii numerarentur, cura continebatur. Ex quibus nullum se unquam religiosæ cujuspiam familiz numerum auxisse gloriabatur; quod pusilli atque humilis esse animi diceret, liberos intra religiosorum hominum claustra compellere, quo quis se eorum alendorum instituendorumque solitudine ac sumtu levaret: sed feminas locupletissimis viris collocaverat, ex maribus autem unumquemque, pro cujusque libidine, animum

ad aliquod honestum studium passus erat adungere, alios ad literas, quorum sumptibus Patavii, Bononiæ, Romæque, prout ejus facultates ferebant, suppeditabat, alios ad militiæ studia, alios ad summorum Principum, nempe Sabaudicæ, Parmæ, aliorumque Ducum, aulas: deinde, privatorum negociis pene omnibus, quorum lites dirimebat, discordias sedabat, inimicitias componebat, affinitates conciliabat, districtus, ac Reip. suæ procuracione, in qua sæpius omnes magistratus gesserat, implicitus tenebatur. Itaque, propemodum miraculo adscribendum videtur, quod, in tantis occupationibus, tantam vim rerum cognitionemque fuerit complexus. At, præter ea, quæ diximus, multa etiam alia, ex uberrimi illius ingenii fonte manarunt; sed in tenebris abdita, non adhuc in communem hominum lucem prodierunt; præter pauca quædam poemata, tum edita, cum Cosmus, magnus Dux Etruriæ, una cum Maria Magdalena Autriaca, ejus uxore, Senas venissent. Omnino ad studium Impresarum, quas vocant, a natura se ferri sentiebat; quarum plures & illustres referreimus, nisi alio properare cogeremur. Demum, cum ad locum, quo res omnes ortæ tendunt, iter arripuit, plenus annis, ac laudibus: quod eleganti symbolo est exprimere conatus Academicus quidam, Lucarino nomine; qui onerariam navem, preciosis refertam mercibus, e portu vela dantem, effinxit, cum hoc dicto, *Soluit onusta,*

XXII. IO. BAPTISTA BARTOLVS.

NUnquam, ex corporis ornatu, aut ex aliqua alia re externa, existimare de hominum ingeniis vel facultatibus licet. Quam multos sæpe videas, purpura auroque fulgentes, in quibus, si introrsum eos aspicias, omnia sint pecudis forte similia, quam hominis! contra, quam multos sæpe pannis annisque obsitos cernas, in quorum pectora si oculorum aciem posses intendere, omnia in eis præclarissimarum maximarumque artium ornamenta intuereris! Ut vere, a viro docto atque prudenti, sit dictum, sæpe sub sordido palliolo latitare sapientiam. Neque itidem, si se tibi quispiam sordidatus, vel

vel alter pretiosis indutus vestibus, offerat, continuo, illum Irum, hunc Cræsum affirmes. Sæpe enim incidi in quosdam, qui elegantem ac divitem corporis cultum contemnerent, intus exultantes animo, quod domi arcas, multo auro argentoque refertas, haberent. Novi item alios non parum multos, qui foris portabant, quid rerum? aurum, vestem sericam, gemmas annulis inclusas, in eorum autem ædibus, nihil quæsti erat furibus; ita erant inaniis oppletæ. Quod si, ut diximus, ex iis, quæ sub aspectum cadunt, fas est affirmare de iis, quæ sunt ab aspectus judicio remota, quemadmodum vulgus imperitorum facit, qui non ex re, sed ex eo quod oculis concipit, metiri homines solet, profecto, Jo. Baptista Bartolus, inter rerum omnium ignaros, atque ad mendicitatem redactos, referatur oportet: qui vestitu adeo obtrito, adeo lacero, adeo obsoleto, utebatur, ut propemodum nihil differre videretur ab iis, quos ante sacrarum ædium fores, vel per Urbem, ire ad saccum, necessitas jubet. Sed longe aliter res sese habebat. Nam primum, ad inscitiam quod attinet, adeo nullius fere rei erat rudis, ut maximarum præstantissimarumque artium scientia pectus refertum completumque gestaret. Nam & Theologiæ & Philosophiæ præceptis animum exornaverat; ac medendi arte ita præstabat, ut paucos haberet pares, superiorem fortasse neminem: quod in eo declaravit, cum virum nobilissimum, & summum in Urbe magistratum gerentem, ex acerbissimis podagræ doloribus, quibus excruciabatur, eripuit, atque adeo ad sanitatis terminos, unde eum vis morbi abstraxerat, revocavit, ut nulla deinceps morbi ejusdem violentia inde abripi, & ad veterum cruciatuum scopulos abstrahi impellique potuerit. Quod factum, ita novum, ita supra naturæ vires est visum, ut reus necromantiæ, apud Quæsitores fidei, coactus sit causam dicere; sed non ita multo post exemptus est e reis, viri illius nobilis opera, quem nodosæ vinculis podagræ exsolverat; a quo rogatus est, ut Roma discederet, atque aliam urbem persequeretur; quoniam videbat, fore, ut, eadem de causa, in jus sæpius vocaretur. Chemicæ arti assiduam ac diligentem operam dedit. Sed quæ ars alios,

sui studiosos, detrudere ad mendicitatem solet, hæc illum, ut declaravit eventus, ad ingentes divitias perduxit. Nunquam tamen propterea, ex pannosis illis lacerisque vestibus, quibus obvolvebatur, emerfit: ut, cum, die quodam, chemicæ artis utilitates fructusque in celum verbis efferret, & innumerabilem ex ea pecuniam confici posse contenderet, quidam, qui sermoni aderat, in risum effusus, Si res, diceret, est ita ut blateras, cur hic tibi ornatus est? cur hi panni? cur hæc sordes? cur illis in malam rem, quantum potest, abjectis, non earum loco preciosissimas, ac perquam optimas, fumis? Cui ille, Næ tu, ait, homo es ridiculus, qui iis, quæ tibi oculi persuadent, fidem habes; si multis tibi aureorum millibus sit opus, neque habeas unde fumas, ab istis pannis ac laceris vestibus, quas vides, ea sunt tibi petenda: nam continuo nummi illi, tanquam lymphatici, ex illis eruptionem facient, & curriculo ad te pervenient. At ille irrisor, quia erat in primis dives ac nobilis, noluit ejus rei periculum facere. Sed, utut res sese haberet, illud est certum, magnam liberis pecuniam testamento reliquisse, ab eoque, lethali morbo correpto, jam profectionem ad orcum adornante, intermortuas has voces fuisse exceptas, se in æternas inferorum sedes, perpetuis excrucium ignibus, dari, quod nimis ad rem attentus fuisset, quo, contra jus fasque, magnas liberis divitias relinqueret. Summus erat astrologus; & in primis, Chaldaicis literis eruditus, ex affectione cæli, qua primum spiritum duxerat, quo die moriturus esset, sibi prædixerat, multa etiam arcana didicerat, quæ tacita tenebat, neque cum quoquam communicebat.

XXIII. FRANCISCUS ARCVDIVS.

Magnam in ea cæli, in quo quisque primum vitæ spiritum hausit, parte vim esse, ad præclara hominum ingenia procreanda, non solum verisimile, sed certum atque exploratum videtur. Cui non est notum, uno in loco, ex aëris gravitate, homines pingues, hebetes, tardos, in alio, ex ejusdem aëris temperatione
acu-

acutos, perspicaces, celeri ingenio, nasci? Quod etiam animadvertere licet in plantis, quæ, in quibusdam terræ regionibus satæ, ex cæli solique illius natura, præstantiores succique melioris fructus ferunt, in aliis, deteriores insulsioreque producant. Quæ cum ita sint, quid mirum est, si ea Græcia, quæ olim magna vocitata est, & adjunctæ illi regiones, egregios homines, quique essent omnibus admirationi, fere semper extulerint? Nonne fatendum est, eos, ex cæli illius præstantia, non nihil arripuisse, quo tanquam semine imbuti, illos ex sese tam admirabiles fructus efferrent? Ac, si quis temporum memoriam, jam inde usque a Pythagora, repetat, qui eam partem Italiæ tenuit, & ad quem Plato, discendi cupidissimus, venisse dicitur, omnemque Pythagoræorum disciplinam penitus cognovisse, omnibus fere sæculis multos, tum ad Remp. administrandam, tum ad bella gerenda, tum ad literarum studia, id quod in præsentia quærimus, aptos, atque a natura factos, inveniet. Atque, ex pluribus, quos nostra vidit ætas, se in primis offerrent, Vincentius Laurus Cardinalis Montis regalis, Coriolanus Martiranus S. Marci Episcopus, Antonius Lilius, Paulus Bombinus; qui ingenio, eruditione, doctrina singulares, Cardinalium Collegium, Pontificiam dignitatem, Italiam, atque adeo totum terrarum orbem, non fluxis atque caducis, sed solidis, & cum æternitatis spacio duratione certaturis, ingenii ornamentis condecoraverunt. In hunc numerum ac cætum, jure se infert Franciscus Arcudius, Soliti natus, satis ex se ipse notus ac celebris; sed, quia parentum virtutis claritas redundat etiam in liberos, ac non nihil eisdem splendoris arcessit, Antonii Arcudii, docti hominis, & Soliti Archipresbyteri, filius; quod non debet nos commovere, neque cogere, nihil rectum, nisi quod nostris moribus convenit, putare; nam Græcis sacerdotibus licet, uxores habere, atque ex eis liberos procreare; at, nostris moribus, nefas habetur. Qui Antonius librum composuit, novi florilegii nomine inscriptum, quo preces horarias, satis effusas, ad usum sacerdotum Græcorum, ambitu angustiore conclusit. Qui liber ab orientis ecclesiis exploditur

ac rejicitur; solum eo utuntur monachi S. Basilii, cœnobii Cryptæ ferratæ, cum faciunt iter, vel absunt a cœnobio. Dedit operam literis, tum Græcis, tum Latinis, Romæ in Collegio Græco, una cum Leone Alatio: Rhetoricæ magistros habuit Alemannum, & Jasonem Sozomenum; quibus doctoribus tantum profecit, ut Græcæ Latineque optime loqueretur & scriberet, & in utraque lingua, elegantissimos versus efficeret. Philosophicas vero Theologicasque disciplinas, a Patribus Dominicanis accepit, ac, decurso eorundem studiorum curriculo, sacris initiari, Latinorum ritu ac moribus, voluit; statimque, sacerdos factus memor patriæ, memor parentum, suos ad penates se recepit, ubi, docendo instituendoque, magnæ popularibus suis utilitati atque usui fuit; quibus etiam Sacramentis frequenter administrandis, non minimum profuit. Verum habet hoc eximia virtus, ut exiguis loci unius terminis includi non postulet, sed latum campum, in quo excurrat, efflagitet. Sed nullus ita late patens est campus, nullum majus, ingenii declarandi virtutisque demonstrandæ gratia, theatrum ea Urbe, quæ merito arx orbis terrarum, rerum omnium, quæ ubique sunt in admiratione, compendium, omnium nationum perfugium, communis patria, semper est dicta; videlicet Roma. Illa exquisitos, in omni genere artium maximarum, magistros advocat, amplectitur, detinet; mediocres, ne dignatur quidem aspicere: illa, clarissima virtutum lumina, suo in gremio, tanquam in aliquo cælo, ad orbem terrarum illustrandum complendumque constituit. Ea igitur Francisci doctrina, ea virtus, ea probitas, tanquam divini vi numinis, impulsæ est Romam. Advenientem Franciscus Cardinalis Barberinus, tum rerum dominus, benigne atque humaniter excepit, ad numerum suorum familiarum adscripsit, in postremis non habuit; sed, quia majore eum provincia dignum existimavit, quam ut aulici solum munus impleret, episcopatum Nusci, quod est oppidum in Regno Neapolitano, deferendum illi curavit. Ubi omnes optimi Pontificis partes exequens, celerius quam ejus ætas poscere videbatur, est mortuus.

XXIV. IVLIVS MANCINVS.

Ivlivs Mancinus, Senensis, honesto quidem sed humili loco natus, cum, etiam tum juvenis, rixatus cum quopiam esset, ac propterea compactus in carcerem, simul ac dimissus est; patria sede relicta, Romam commigravit, commodum, cum, in nosocomio S. Spiritus in Saxia, de novo medico in demortui locum subrogando deliberabatur; &, quia locus ille ab omnibus fere medicis, qui erant in Urbe, summa ambitione expetebatur, decretum fuerat, ut res in certamen deduceretur, eique munus illud decerneretur, qui, interrogatus de quæstionibus, ad rem medicam pertinentibus, aptius ceteris respondisset. Quamobrem Patritius Patritius, vir, & generis nobilitate & vitæ splendore, tota Urbe, clarus ac nobilis, ad quem literas commendaticias ab amicis acceperat, Si maturius, inquit, ad Urbem venisses, ac longius spatium, at te comparandum, nactus esses, facile poteras, una cum aliis, in illud ingenij doctrinæque discrimen contentionemque venire. At ille, irridens, Quid mihi, ait, opus est spacio ad me comparandum? hem, nunc, si libeat, possum. Nec mora; ita ut erat ocreatus, certamini se objecit; factumque est, ut victor inde discederet, statimque decretas medico, ad habitandum, ædes ingrederetur. Quod fuisse arbitror causæ, ut ad mulierem, quæ habitabat ibi vicinæ, se insinuaret, seque intimum apud eam faceret; quæ bibliopolæ cuidam nupta erat, ac tres habebat liberos, scelerum omnium principes, quos plus millies, auctoritate & gratia, qua pollebat, suspendio eripuerat. Hanc ille mulierem, formæ dignitate atque præstantia, Europæis mulieribus omnibus anteponebat: verum, in qua, præter corporis proceritatem, nihil unquam elegans spectator formarum laudavit; sed, quemadmodum Catullus de Quintia dixit, *nulla erat in tanto corpore, mica salis*. At, quamvis tam mirificis eam laudibus in cælum efferret, quamvis ejus amicitiam usque ad extremum vitæ spiritum conservarit, quamvis opibus ac divitiis afflueret, nihil ille in morte reliquit, quo vitam parce ac

duriter ageret, ut, in morbum paulo post ejus mortem conjecta, necesse habuerit, in valetudinarium S. Ruchi confugere: ubi diem obiens supremum, suis amicis ac laudatorem suum vestigiis, quo ille antecesserat, est profecuta. Verum, illuc redeo, unde abii. Magnam ejus certaminis, de quo diximus, victoria apud alios medicos invidiam illi conflaverat. Itaque, ex pacto, id unum omnes agebant, ut invenirent aliquid, quo de eo illum loco deicerent, quem sua fuerat virtute adeptus: atque, apud hospitalis ejus domus Præceptorem, cœperunt eum accusare, quod celerius, quam alii medici, ægros, ac raptim, inviseret, ut, cura illa expeditus, posset attentius suis dare operam negociis. Quamobrem, in quoddam multorum ejus familiæ concilium a Præceptore vocatus, reprehensus est acriter, quod negligenter, & cum ægrotantium perniciæ, susceptum a se munus obiret. At ipse interritus, memoriter ægros omnes, fidei suæ commissos, a primo ad ultimum proferens, narravit, unde domo unusquisque, qua ætate, quo genere vitæ esset, quo morbo, & a quo die, laboraret, quam curationis rationem adhibuisset, quamque adhibiturus deinceps esset singulorum morbis, præensiones, aliaque, unicuique eorum magis propria atque præcipua; quibus, magna eorum, qui audierant, cum admiratione prolatis, malevolorum obtrivit invidiam. Deportaverat Romam scuta bis mille; quæ statim, usuris centesimis, sænori dedit, eo contractus genere, quod officii societatem appellant. Atque ex his fructibus, eaque pecunia, quam ipse labores per suos invenerat, eoque, quod comparferat, miser, suum defraudans genium, nam sordido vitam pane oblectabat in pannis, sexaginta & eo amplius aureorum millia consecerat: ex quorum fructibus, post illius mortem, Senis, tot adulescentes ex ea civitate, qui dent operam Juri civili, Medicinæ, vel Philosophiæ, aluntur, quod possint ex eis singuli quina, vel summum septena, scuta, quot mensibus capere. Neque fuit illi consilium, in Collegiis eos formam redigere, quod se nolle agebat, Rectoribus, Subrektoribus, conditis, promissis, ac procuratoribus peni, cibum suppeditare. In prædictionibus longe multum-

tumque præstabat; ac, simul ac ægrum inviserat, statim, quem exitum morbus ille esset habiturus, divinabat. Sed nulla verborum humanitate ægrum sublevabat. Nam vix tria illi vel quatuor verba eloquebatur, pulsus tentabat, num æqualiter in eo venæ micarent, linguæ digitum, stomacho manum admovebat; tum, quid illi in cenam vel in prandium dandum esset, imperabat: sed in primis oculos per cubiculum circumferebat, & si quam ibi egregie pictam tabulam aspexisset, continuo adamabat: nam erat rerum istarum intelligentissimus; dabatque operam, ut in suam potestatem perveniret. Neque id sibi erat difficile impetrare ab eo, qui suam ipsi salutem vitamque commiserat: ab aliis eas tabulas quam minimo emebat, ut carissime venderet: atque, in hoc genere mercimonii, magno cum lucro vortebatur. Philosophiæ in primis studium suum dederat: neque erat Philosophus ex eorum numero, qui in scholis, spinosis contortisque disputationibus, id agunt, ut adversarium, breviter arguteque concluso argumento, decipiant; sed ex iis, qui, ex vi verborum ac sententiarum, quid potissimum senserit Aristoteles, conantur exsculpere. Atque ita acriter, ita obfirmate, defendebat, voluisse Aristotelem, una cum corpore animum interire, ut non tam Aristotelis sententiam tueri, quam suam aperire videretur. Et sane nunquam eximius pietatis ac religionis cultor est habitus. Feriis Quadragesimalibus ultro non neminem amicum adibat, cui oppleto saturoque salus fuisset inedia multorum dierum; rogabatque, num carnis vesceretur. Neganti illi, Nz tu, aiebat, homo es ridicule insanus; cedo paginam, atramentum, & calamus. Ac statim, disertis verbis, testimonio suo, quod ob præstantiam artis, quæ in eo erat, fidem faciebat, affirmabat, non esse illum, ob ægritudinem, ad olera atque legumina vescenda idoneum. Habitus est etiam Chaldaicis literis apprimè doctus: sed revera totam illam disciplinam contempsit, ac deridiculo habuit. Interrogatus, cur ab ejusmodi sermonibus non abhorreret, sed multa doctè copioseque disliceret, ideo a se fieri respondebat, ut communibus hominum studiis satisfaceret, ac mercedi suæ, quo pluri eam venderet, flosculos quasi quosdam

dam inspergeret. Ac merito Urbanus VIII fecit eum semper plurimi; & tum majorem habere eum cœpit, cum, initio Pontificatus sui, ejus consilio, ex anticipi illo morbo ereptus est, a quo fuerat pene oppressus. Nam, cum inter ceteros medicos, de alvo, quæ constiterat, medicata potione illi danda conveniret, solus restitit, quantum potuit; quod diceret, fore ut, mediam circiter noctem, id in eo a natura fieret, quod a medicata potione requirerent. Quæ, seu vaticinatio, seu prædictio, vera est, ea ipsa nocte, confecta. Itaque eum medicum sibi solum adduxit, & opiparo, in Æde D. Petri in Vaticano, sacerdotio, hoc est, canonicatu, donavit; ex cujus fructibus, majorem opibus, quibus pollebat, cumulum addidit: nunquam tamen initiari sacris ordinibus, ut leges illius ecclesiæ sunt, voluit. Denique, confectus senio, paucorum dierum morbo, surreptus e vivis, splendido elatus est funere; in Ædem S. Spiritus in Saxia.

xxv. FRANCISCUS ACCARISIVS.

NON eadem omnino ac par est ratio ingeniorum atque plantarum: quod non omnibus in locis omnes plantæ nascuntur, nec eadem magnitudine, forma ac suavitate, ex se fructus educunt, sed, pro soli calique varietate, aliæ in Italia plantæ, aliæ in India, aliæ in Africa, aliæ in Sarmatia gignuntur: at ingenia, ubicunque ea severis, sive mala sive bona, & ad literarum studia in primis apta, semper bene feliciterque proveniunt. Atque res hæc ita est aperta atque perspicua, ut eorum exemplis illustrari non postulet, qui vel in remotissimis terræ regionibus, vel in barbaris nationibus, & ab omni prorsus humanitate sejunctis, vel in oppidulis, in asperissimis saxis defixis, exorti, clarissimas urbes, ac civium frequentia celeberrimas, atque adeo totum terrarum orbem, sua luce lustrarunt atque complerunt. Quamobrem non erat, quod Camillus Accarisius queri posset, quod Franciscum filium, Anconæ, ubi honeste

ne-

negotiabatur, non autem Senis, edidisset; metuens fortasse, ne ex cælo, unde primum vitæ spiritum hausisset, segnior vel tardior in disciplinarum curriculo fieret, neve ad summam Juris civilis laudem, ad quam, tanquam ad metam, illius vitæ cursum destinaverat, properans, æqualium suorum industriæ non præcurreret. Sed errabat. Nam, ubicumque locorum communis ille usurarius lucis arripuisset, nullum ab aëris contagione damnum contraxisset, sed similis semper sui fuisset. Ille saltem metus aliquam ad perterrendum vim potuisset habere, ne videlicet, magistrorum penuria, optima illa ac fertilis arbor, a cultura deserta, sylvesceret, aut egregia illa vis ingenii, exercitationis consuetudine usuque remoto, exaresceret. Ad, id ne accideret, fuit egregie a parente provisum. Nam, simul ac primum accrescere puer, & exire de gremio cepit, est missus in patriam. Non potest dici, quam avide tenera illa arbor, a fecundissimo illo literatorum hominum solo, in quod translata fuerat, sit excepta, & quam multæ, ut ita dicam, ad eam irrigandam, aquarum inductiones sint factæ. Primum ille, a doctissimis grammaticis, omnibus illis artibus institutus est, quibus informari ea ætas, qua tum ille erat, solet. Sed postea, a studiis amotus puerilibus, cum ad severiora studia, & in primis ad jurisprudentiam, accessisset, in ipso ejus aditu vestibuloque acceptus est a duobus ejus ævi præstantissimis ingeniis. Quibus, omnium concessu, in Senensi Gymnasio, legum interpretandarum primæ deferebantur; nimirum, a Celso Bargalio, & Hieronymo Benevolente; ab eisque ad intima ejus facultatis penetralia perductus. Hos ille ambos unice dilexit; sed in Hieronymo benevolentia impari. Hoc magis erat Celso deditus, quod primum ab illo factus fuerat omnium suorum studiorum particeps, tum utriusque juris interpretandi facultate donatus, & luculenta oratione, quæ extat, summis in cælum laudibus evectus; qua in oratione, & Francisci ipsius, tam familiæ Accarisæ totius, merita, disertissime enumerantur; postremo, quod moriens idem Celsus, suæ fidei diligentique, doctissimam & elegantissimam illam disputationem, de dolo, quam nitidissime imprimendam edendamque mandasset. At

Fran-

Franciscus, Doctoris facultatem & nomen adeptus, non habuit locum illum honoris, materiam ostentationis & ocii, sed laboris & operæ. Etenim sex annos continuos, in eodem Senensi Gymnasio amplissimo celeberrimoque, Institutiones juris civilis est, summa cum industriæ doctrinæque laude, interpretatus. Atque, ab hoc docendi munere, ad alia majora illi tanquam gradus factus est: nam primum, Pandectas extra ordinem explicandi partes sunt traditæ; deinde, cum magnus transalpinorum hominum concursus Senas, disciplinæ causa, fieret, atque, honoris eorum gratia, Ferdinandus primus, magnus Etruriæ Dux, fecisset potestatem, ut aliquis, magno ingenio præditus, deligeretur, qui in eo Gymnasio jus civile, ea ratione ac via traderet, qua in Gallia, in Germania, in Belgio, Connanus, Duarenus, Cujacius, illud docuissent; hæc provincia Accarisio tradita est. In quo summum ac singulare, de hominis eruditione, doctrina, atque ingenio, judicium fuisse factum videtur; quod in eo, qui tali muneri dignus judicaretur, non solum exacta atque perfecta juris scientia insit oportet, verum etiam excellens antiquitatis notitia, & Græcæ Latinæque linguæ cognitio reperiatur, sit plane necesse. Neque contigit, ut, qui ita honorifice de ipso judicassent, sui eos iudicii poeniteret. Nam differendo, interpretando, docendoque, perfecit, ut omnibus iis laudibus, de quibus commemoravimus, cumulatissimus haberetur, quique, e Germania profecti, literarum cupiditate, tam longum essent iter emensi, faterentur, se navasse operam, quod illuc venissent. Interea Celsus Bargalio, senio studiisque confectus, vitam, quam a natura mutuaverat, naturæ eidem, repetenti, persolvit. Cujus morte, ordinaria in eo Gymnasio juris docendi provincia suo magistro, ita bene de se merito, caruit. Non fuit diutius deliberandum, quisnam potissimum illi subrogaretur. Nam, omnium consensu, honestissimus illi docendi locus quin Accarisio deberetur, nemini dubium fuit. Itaque illi delatum, viginti cum annos tenuit. Unde, tanquam a capite, doctrinæ suæ flumine rivisque, discipulorum suorum animos irrigavit; qui, quasi plantæ, secundo humore inbutæ, maturo deinde tempore fructus ex se maximos

extu-

extulerunt. Atque muneris illius functio eo erat omnibus gratior, quod magnum etiam onus de jure respondendi sustinebat; quamobrem ejus domus, non unius civis domicilium, sed Jovis Hammonis vel Apollinis Delphici templum, quo omnes, qui in Italia controversias haberent, responsi petendi causa, confluerent, videbatur. Qua fama compulsæ omnes Italice Academice, tantam vim doctrinæ atque prudentiæ, magnis unaquæque earum ad se præmiis, advocabat. Sed nullam spem lucri, quamvis magnam, putavit esse tanti, ut eam patriæ caritati, suavisimis amicorum colloquiis, jucundissimæ ætæ finium cognatorumque consuetudini, anteponeret. Sed, quemadmodum nullum est propugnaculum ita validum, ita alte munitum, quin longa obsidione non expugnetur: etiam illud stabile ac fixum Accarissii, longius a patria non abeundi, propositum, assiduus Rainucii Farnesii, Patris ac Placentiæ Ducis, invitationibus, precibus ac pollicitationibus, demum est labefactatum atque convulsum; quamvis non tam pollicitationibus ac præmiis, ad consilium mutandum, sit impulsus, quam quod Sfortis Oddo, ac Philippo Marino, talibus viris, esset succedendum. Id enim sibi in primis decorum & honestum existimabat esse. At Rainucius, quo majorem honorem haberet, illum ad eorum, qui sibi a consiliis essent, numerum aggregavit. Sed magni Etruriæ Principes non sunt passi, diutius, tantum lumen, tamque illustribus radiis effulgens, aliis regionibus collucere, iisque, unde ortum esset, suo recessu tenebras gignere. Itaque, revocarunt illud, suum in regnum, tanquam proprium in cælum; ut nimirum Pisis, primas Juris civilis interpretandi partes agens, tanquam circa aliquod cælum, perpetuo & æquabili cursu se volveret, atque omnia, sua luce, lustraret. Quod cum, per annos quatuor, solis cujusdam instar, fecisset, tandem, IV Non. Octobris cl. b. CXXII, Senis, quo se contulerat, obiit; ut eodem nimirum horizonte, seu, ut a Latinis nominatur, finiente, unde astrum istud ad illustrandum orbem terræ prodierat, sub terras se abderet, vel potius ad cælum, una cum aliis beatorum luminibus, exhilarandum accenderet. Quantum sui desiderium tali viri mors, patriæ,

triz, auditoribus suis, ac bonis omnibus, reliquerit, is facile, cogitatione assequetur, qui sapientis illius dicti meminert, *cum denique nostra nos intelligere bona, cum, qua in potestate habuimus, ea amisimus.*

XXVI. LÆLIUS MARETTA.

Lælius Maretta, Senensis, nobili, sed non admodum antiquo, genere natus, Romæ, quoad vixit, magnam apud omnes habuit viri prudentis, ac totius Reip. periti, opinionem ac famam. Quamobrem viro, & oratione gravi, & auctoritate, tota semper ab aula magnus honor est habitus; atque ibi simul rem & gloriam reperit. Neque ab ejus aspectu, cujus dignitas reverentiam sibi quandam arrogabat, aberat elegantia, quæ amorem conciliabat: neque a vitæ ac sermonis gravitate recesserat comitas, qua sese omnibus dabat. Nam, ut ego, etiam tum pene puer, qui sæpe cum ipso eram, sum expertus, ejus interdum benignitas oppido, ut adolescentuli, erat: atque, nisi ea in illo indoles extitisset, nunquam ita me illi dedissem; quod illi ætutulæ, qua tunc erant, odiosa est senum gravitas atque severitas. Itaque ille consecutus, omnibus videbatur, difficillimam illam societatem, gravitatis cum humanitate. Quoad vixit, ætatem egit in aula Sfortiarum; quæ familia, tum temporis, opibus, divitiis, & honoribus, in primis effloreat. Nam cum ea Gregorius XIII affinitate sese devinxerat; quod Jacobus Boncompagnus, suus filius, Constantiam Sfortiam, foeminam præstantissimam, haberet in matrimonio. Quamobrem Pont. Alexandrum Cardinalem, totius Ecclesiasticæ ditioni præfecerat, ut ad eum rerum omnium summa rediret. Quo fiebat, ut apud omnes, tum Italos tum externos, Principes viros, maximo esset in honore, atque ejus amicitiam omnes expeterent. Huic primum Lælius navavit operam aulicus, non unus e multis, sed inter omnes prope singularis, consiliorum omnium particeps. Nihil enim ille, quod ad Remp. magnopere pertineret, nisi ex ejus auctoritate atque consilio, gerebat. Neque facti cum pœnitebat, cum utilem atque allaudabilem sibi ab illo operam dari intelligeret. Eo mor-

mortuo, eodem gradu fuit apud Franciscum, Cardinalem ab eodem Gregorio XIII creatum, cum adhuc in Belgio honorarius miles esset, in contubernio Alexandri Farnesii, Regis Catholici copiarum imperatoris. Hic, cum ex injuria accepta, magno cuidam principi vehementer esset insensus, suspenso ac sollicito erat animo, num honorem illum, sibi delatum, acciperet, an, castra persequens, gloriam armis belli sibi perquireret. Persuasus est a Ezlio, ut nulla ratione, tam pulcram occasionem amitteret, qua par dignitate iis esse posset, a quibus se spretum ac contentum fuisse, quereretur. Causæ discordiarum hæc ferebantur. Cum Alexandro Cardinali Sfortia a Gregorio XIII, ut diximus, tota Reip. fuisset tradita, ut ejus auctoritate consilioque regeretur, vir quidam princeps in Italia magnus existimavit, si se affinitate cum illo implicuisset, posse illius opibus suam potentiam augere; atque Francisco cognatam suam desponderat; at, Cardinalis Alexandri morte, de spe illa dejectus, sententiam mutaverat, & causam quaesierat, cur eam illi non daret: in quo Franciscus se fuisse despectum opinabatur. Nihil omnino edidit, sed multa, manu scripta, foras emisit, ad optimum Reip. statum pertinentia: quæ, cum essent plenissima prudentiæ, atque ab Aristotelis inventis minime aberrarent, a multis laudari audiebam. In pluribus Romanorum Pont. comitiis, Cardinalem suum, conclave ingredientem, sectatus fuerat, ibique cum eo manserat. Itaque omnes, de novo Pont. eligendo, rationes, omnia consilia, quibus ambientium dolis atque insidiis posset occurri, pulcere callebat: omnes aulae mores noverat, atque in instituendo aliquo, qui vellet ad illam accedere, quemadmodum facete advertere animum suum ad aliorum animum posset, ut uniuscujusque voluntates & studia teneret, eoque prævolaret quo ille vellet, parem habuit neminem. Sed, qui auctor atque adjutor capiendæ Reip. multis extiterat, ipse nullam ejus partem, sive quia noluit, sive quia non potuit, attingit; qui civitatum regendarum præcepta aliis dare consueverat, nulli oppido, Prætoris jure ac nomine, præfuit.

XXVII. IO. DOMINICVS
PERVS.

Legimus sæpenumero in historiis, non neminem ab agro & ab aratro, summa totius populi Rom. voluntate atque consensu, accersitum in Urbem, qui Consulari imperio rem gereret, vel Dictatoris auctoritate ac nomine, aut hostibus bellum inferret, aut eorum vim conatumque repelleret, aut in rebus dubiis, consilii que egenis, daret operam, ne quid Resp. detrimenti caperet. Verum nunquam, quod quidem me legisse vel audivisse meminerim, traditum memoriæ ac literis est, ab Apolline ac Musis rusticanos homines atque pastores iussos fuisse, depositis rastris atque ligonibus, plectrum ac lyram, & tubam etiam, sungere, summorumque virorum laudes, ac bellorum tumultus, non solum sylvis, verum etiam urbibus ipsis admirantibus, canere. Ne multa; ex omni tum vetere tum recenti memoria, non posse proferri alterum, arbitror, Jo. Dominico Pero similem, qui, a nemine doctus, nullisque poetice facultatis præceptis eruditus, inter montium asperitates sylvarumque recessus, vel inter ovium greges, incredibili quodam motu celeritateque ingenii, tam magnum numerum optimorum versuum, vel dixerit ex tempore, vel, literis consignatum, posteritati mandaverit. Hic ortus est Arcidosii, quod est oppidum nec obscurum nec humile, in montibus, Senarum ditioni imperioque subiectis, honestis parentibus; quorum quamquam res essent paupercula, ac, ruri opus faciendo, vitam parce ac duriter agerent; non cessabant tamen, filium ad magistrum in oppidum mittere, ut literas disceret. A quo magistro, die quodam, acriter vehementerque objuratus est, atque etiam verberatus, quod neglexisset, imperata memoriæ mandare. Sed, cum condiscipulum quendam vidisset, ob eandem causam, alterius humeris, tanquam equo, impositum, sævius verberibus affici, pœnæ ejusdem metu perterritus, quam magister eidem minitabatur, nisi posthac diligentius, dictata, memoriter

retulisset, suum in prædiolum reversus est; unde cum parens uterque, qui exierant in opus, abesset, modicum illud atri ac duri panis, qui in arca asservabatur, extraxit, atque, ita viaticatus, se fugæ mandavit, ac triennium totum, in locis solis atque desertis, hominum societatem fugiens, vitam, ferarum more, traduxit. Solum, iis mensibus, paulum se opilionibus & caprariis in conspectum dabat, quibus castaneæ, quarum ea regio est fertilissima, nusquam inveniebantur. Atque eorum etiam aliquos amicitia sibi devinxerat. Quorum unus, cum, fervidissimo anni tempore, qua hora oves & capellæ, reducta in valle, vel sub arborum umbra, nimios solis, vitant ardores, Orlandum furem Ludovici Ariosti, omnibus audientibus, legeret, quæque alii intelligerent minus, utpote in illius poëmatis lectione diu multumque versatus, sua interpretatione planum atque peripicuum redderet, ille sensit, se admirabili voluptate perfundi. Sed, cum ille idem pastor, Torquati Tassii, Hierosolymæ a Gotfrido liberatæ poëma perlegeret, non solum Jo. Dominicus, una cum ceteris, ejus carminis majestate & elegantia, ad incredibilem admirationem elatus est, verum etiam plane vehementer exhorruit. Interea est inventus a patre, cujus quærendi nullum modum fecerat, & suum in prædiolum multis blanditiis reductus. Quem postea ille non amplius in ludum misit, sed docuit bubulcitari, & quotidie in opus mercede mittebat. Iuerat puero illi ingenium, non solum elegans, verum etiam poëticum, quo se, ad versus faciendos, acriter incitari impellique sentiebat; præsertim auditis Ariosti Tassique carminibus; quorum carminum rationem, numeros, modos, elegantiamque, animo comprehensam habebat. Quamobrem, cum non posset se continere, nactus est ab iis, quibus operas suas locabat, paulum atramenti; quod in frustulum arundinis, a se in vasculi formam reducti, indiderat; calamus & chartam; quæque, inter arandum, cogitaverat, cum boves, labore defessi, constitissent, scripto mandabat; tum sociis amicisque recitabat; qui eum laudabant, atque hortabantur, ut in eo studio se contineret. Sunt enim homines ejus regionis, quamvis in locis asperis, atque

montosis oriantur, quamvis agrestem vitam agant, quamvis aspero victu utantur, sunt, inquam, ingenio, neque illiberali neque hebeti neque tardo, sed celeri & acuto; neque quisquam fere eorum est, qui literas nesciat, sed omnes ferme, saltem scribere ac legere, discunt: quo fit, ut plures apud eos libri, vernaculo sermone conscripti, reperiantur; quorum lectione, cum est otium, ac præsertim iis diebus, quibus opus facere non licet, se aliosque oblectant. At Jo. Dominicus, postea quam robustior est factus, captus est amore cuiusdam puellæ, sui loci atque ordinis, quæ nihilo plus erat ditior, quam ipse. Et, qui paululum citharizare, & cantare ad chordarum sonum, didicerat, diebus festis, (nam profectis haud licebat,) exigua cum testudine, ad eam, formæ ejusdem contemplandæ causâ, se conferebat; sed, tanquam ipsum puderet, sordido obtritoque palliolo faciem obtegebat. Verum, quoniam illius amor intra fines honesti continebatur, neque aliud quidquam spectabat nisi conjugium, dedit operam, ut uxorem eam haberet; ex qua postea duas filias suscepit; quarum alteri, Drusillæ nomine, non minor fere quam patri, ad poësin indoles inerat. At ille iis rei familiaris angustiis præmebatur, ut, si vellet se ac familiam alere, necesse haberet, agris aliorum colendis victum quæritare. Verum, ex mercede, quam colligebat, præter id, quod quotidianis sumptibus suppeditabat, singulis diebus singulos sibi Julios parcebat; quos, ad necessarios extraordinarios usus, sepositos habebat. Hæc tam accurata tamque diligens hominis providentia, magistratus oppidi impulit, ut hospitalis cuiusdam domus, D. Lazaro nomine, custodiam eidem demandarent; ex qua scuta quinque & viginti, & eo amplius, annua capiebat; neque eo minus suas iis, qui vellent conducere, operas locabat. Itaque interdum agrorum cultioni, noctu carminum scriptioni, operam dabat; sed præsertim fabulas pastoritias, seu Eclogas, scribebat, quas actoribus amicis edendas dabat, seque in eorum gregem includebat, neque alias partes, nisi aratoris fossorisque, sumebat: & quamvis honesta facie esset, ita sibi os, scapulas, crura, distorquebat, ut omnium risus commoveret: accedebat

vox absona, gravis, agrestis. Neque erant, in pulpitis extruendis, scenisque comparandis, sumtus faciendi. Nam locus, ad sclopi ictum, prope ab oppido, ad fonticulos dictus, inter castanearum umbras, amœnus ac frigidus, ubi theatrum ac pulpitum a natura factum inerat, ea illi omnia suppeditabat. Cum igitur ad naturam, a quo tot adjumenta ad poësin habuerat, accessisset studium & exercitatio, eam facultatem consecutus est, ut ejus, in dictandis versibus, celeritatem, amœnuensis, qui eos excipiebat, assequi non posset, ac tantum animi habuerit, ut ad poëmata conficienda sit progressus, atque bellum angelicum, quod Angeleidas inscripserat, fecerit, illudque a pueris, popularibus suis, coram Serenissimo magno Etruriæ Duce, qui anno c15 15 C XIII illac iter habebat, recitandum curaverit. Sed illud oppidum erat angustius, quam ut tantam vim ingenii capere posset. Itaque Lactantius Tartaglia, ex eodem oppido, qui Senensium nobilissimorum plurium necessitatibus implicatus tenebatur, quique Senensis Gymnasii Rectoris munus, tanta cum laude, administraverat, virtuti eidem aditum ad egrediendum, seque latius diffundendam, aperire conatus sit. Nam Jo. Baptistam Strozzam certiore fecit de admirabili hominis facultate ingenioque, illiusque, ejus videndi audiendique, studium inflammavit. Non potest dici, quantum fuerit Lactantio laborandum, ut, qui nunquam e sylvis, suoque ex prædiolo, pedem extulerat, Florentiam ire compelleretur. Sed cum tandem vicisset, bene viaticatum ad Strozzam misit: a quo humanissime exceptus est, ac diebus octo domi suæ habitus. Quibus elapsis, cum abeundi potestatem peteret, nec obtineret, graviter questus est, simulque ostendit, quantum, ex sua absentia, incommodi detrimentique suam in familiam redundaret; propterea se non posse diutius domo carere. Ac, postridie mane, est ad magnum Ducem a Strozza perductus; quo homines nobilissimi doctissimique, ejus audiendi causa, sese contulerunt. Quem ut vir ille princeps, agresti pelliceaque indutum tunica, ac subucula, ex rudi crassoque filo contexta, quam etiam, ut rusticorum mos est, a pectore diloricaverat, aspexit, risum

tendere non potuit : tum interrogavit, num poëta ille esset, quem oppidum Arcidosii civem suum esse jaceret : qui cum se esse affirmavit. Deinde quæsit, num quod carmen in promptu, a se factum, haberet : qui, multa, inquit, &c, admotâ ad peram pastoritiâ manu, aliquot inde extraxit ; jussusque, cœpit Fesuleiden legere. Cumque princeps ac ceteri, qui illum audierant, vehementer essent delectati, parasitus, unus ex iis, qui cibi gratia aliis se parant, ut rideant, cœpit illi in ore sementem facere, pugnosque obferre, ac, Fur, inquit, manifestarie, tunc audes, labore alieno partam gloriam, in te transferre ? Ille, nihil perterritus, neque Principis conspectum veritus, fecit cum illo mutuum, pugnosque pro pugnis referre non dubitavit. Sed, inhibitis, jussisque quiescere, Dic bona fide, magnus Dux inquit, tu ne es hujus carminis auctor ? Qui conceptis verbis, Putasne, ait, me tam perfrieta fronte futurum fuisse, ut auderem, tanto Principi aliena pro meis obtrudere ? At nunc, excepit ille, experiar, num sit tibi præditum hæc sapientia pectus nec ne : audesne, me præsentem, aliquid ex tempore scribere ? Quidui ? ait ille ; cedo paginam & calamum. Nullaque interposita mora, in contumacem parasitum illum, qui pugnis eum invaserat, lepidum carmen exaravit. Obstupuit vir ille princeps ; atque, A me, inquit, opta, quod lubet ; nam impetrabis. Ad quod dictum, simul illi vox atque animus excidit ; nec ullum verbum proloqui potuit. Sed, ab iis, qui aderant, sublevato incitatoque, & vox & animus rediit ; atque, Da, inquit, panem, quo familiam meam alam. Interrogatusque, quot capita in sua familia numerarentur ; Quatuor, respondit ; ego, uxor, ac liberi duo. Bene agis, magnus Dux ait ; da mihi supplicem de hac re libellum ; & ego perficiam, ut tibi quotannis, die D. Joannis Baptistæ natali, tantum frumenti demensum detur, quod satis familiæ omni sit tux. Hoc ille promisso, præter modum exhilaratus, ex tempore fudit hos versus :

En tibi, quem casus fecit, Dux magne, poëtam,

Qui nec Pegaseo conspersit labraliquore,

Ardua nec tetigit Parvassi compita montis.

Tum liberalissimus Princeps, non solum beneficium,
ver-

verbis dudum initum, ratum ac firmum esse voluit, verum etiam scuta illi quingenta numerari iussit, ac Fesuleiden suam typis mandari; in cuius fronte, ejusdem, tunica illa pellicea induti, in qua primo conspectus erat, imago impressa cerneretur; quam, coronæ ejusmodi instar, ligones, rastra, aratra, & reliqua instrumenta ruris, ambirent. Fuit etiam a magna Ducissa humaniter exceptus, ac largiter donatus. Ac, ne pede domum redire cogeretur, mulæ fuit impositus; quæ, præter alia vitia quibus abundabat, erat etiam retrahens, neque ingredi, nisi diu multumque coacta, volebat. In quam ille facetissimam scripsit satyram, in qua magno Duci narrabat, credere se, quadrupedem illam ex Hispano genere ortam, quod succussaret, quod calcibus feriret, quod cerebrosa, quod obstinato obfirmatoque animo esset. Addebat etiam, quod, in patriam rediens, cum non ita multo post, quam e Florentiæ urbis porta exisset, magno se vesicæ exhauriendæ desiderio percussum, voluisse a mula descendere, ut necessitati illi operam daret, sed nunquam id sibi fuisse in potestate; nam importunum ac perfidiosum illud animal, modo se in pedes erigere, modo se hac illac versare, modo recalcitrare, ac, nisi tandem viatores quidam auxilio venissent, quorum alii mulam retinerent, ne se conuolveret, alii ipsum deorsum ab ea dejicerent, nunquam ejus furentis impetum potuisset effugere; sed, post damnum suppetias ut dicitur; cum urinæ, jam gestientis erumpere, vini cohibere non posset, prius quam ipsorum opera equo decidisset, coactum fuisse, ingratis, agebat, illi aditum dare, atque ita subuculam, ac femoralia intus omnia, turpiter comminxisse: ut propterea millies mulæ illi, iisque, a quibus eam acceperat, mala omnia precaretur. Reversus in patriam, longum esset enarrare, quibus eum lætitiis, quibus amplexibus, uxor ac filix, tanquam ex remotissimis orbis terræ partibus redeuntem, exceperint; præsertim, cum argento onustum aspicerent, atque æternum sibi familiæque suæ cibum reperisse intelligerent. Sed, vix patriam tetigit, cum in oppidum S. Floræ, ad Ducem Onnani se contulit, ac lepido facetoque carmine, quod suppli-

cis libelli formam haberet, petiit ab eo, ut, quoniam magnus Etruriæ Dux panem ipsi præbuisset, nec haberet, unde vinum sumeret, daret operam, ne siti conficeretur, neve eam haberet necesse aqua ire sedatum. Qui lubens annuit, atque, ut tot vini cadis, quot annis illi convenirent, mandavit, quot possent uno anno quatuor, quamvis multibibi ac merobibi, bibere. Atque, tum triticum, tum vinum, ad illum quotannis, sine ullo suo sumtu descerebatur. Neque est prætereundum, quomodo magnus Dux conatus sit eum a rustica & agresti illa vita abducere, & ad civilem & aulicam traducere, & in prinis Ducis magni mater & uxor, magnis pollicitationibus, ab eo contenderit, ut conjugem ac filias ad se traderet; nam effecturas, ut, opibus ac divitiis auctæ, nemini eorum concederent, quæ beatæ putantur; præterea, si virgines vellent nubere, curaturas, ut tuto ab asinis ad boves, id quod negant fieri posse, transirent. Audacter respondit, non esse e re uxoris filiarumque, nec sua, homines, in silvis natos, & ad vitam parce ac duriter agendam assuefactos, repente, a summis laboribus, gradum facere ad regalis aulæ mundicies, mollicies, deliciasque, corporaque, illuvie æternisque sordibus squalida, pulcras vestes & ornatus accipere; sibi autem esse deliberatum, in sua se pelle tenere; neque ulla conditione se posse adduci, ut patrium nidum Florentia aulæ permutet. Sed multo fecit elegantius Romæ cum Jo. Ciampolo, quo tempore apud Urbanum VIII auctoritate & gratia valebat; cuius Ciampoli acutis naribus, quibus unguenta exotica ita sordebant, ut eorum odorem ferre non possent, iste aptissimus acceptissimusque inveniebatur. Itaque erat illi in amoribus ac deliciis, &, quoad Romæ fuit, nusquam eum, nisi ad se, divertere, perpeti potuit; deditque operam, ut in Academicis, quæ tum vigeant, audiretur; in ea præsertim, quæ in ædes Cardinalis Sabaudi convocabatur. Quo tempore magni ad eum hominum concursus fiebant: neque enim erat, quod quisquam ita visendum putaret, quam, rusticanum hominem, ab agro & ab aratro profectum, fossoris vel caprarii habitu ornatumque, inter homines omnium nobilissimos doctissimosque, aurea in sel-

cella sedentem, lepidos elegantesque versus effundere. Nec vir ille princeps passus est, desiderari a se liberalitatem suam, sed pecunia eum donavit: cujus exemplum secuti sunt alii deinceps plures. Sed, die quodam, Ciampolus, cum, doctis ac nobilibus quibusdam viris, amicissimis suis, prandium daret, impetraverat ab eo magnis precibus, ut, quo honestius versari inter convivas illos posset, urbanas vestes, ac sumtuosas, quas illi comparaverat, sumeret. Sed, cum deinde opiparæ ac saliores in mensam dapes ferrentur, commotus, Quod genus, inquit, hoc hominum? quæ hæc conjuratio est? id unumne ex compacto omnes agitis, ut mortem mihi maturiorem efficiatis? Unaque opera, abjectis sumtuosis illis vestibus, sagum suum pelliceum induit, peram pastorem sumsit, seque e triclinio foras eiecit, & in patriam recepit; iratus etiam Ciampolo, quod adhuc voluisset eum ad Urbani Pontificis pedes adducere. Qui Pontifex cum illum audisset in patriam profectum, moleste tulit, & graviter cum Ciampolo questus est, quod eam voluptate privasset. Discedens, pecuniam, quam ex donariis acceperat, apud Ciampolum reliquerat: ex qua, sibi transmissa ac numerata, domum in agro, ex sui animi sententia, ædificavit: ubi, multos annos cum in summo otio & tranquillitate vitam egisset, & filias honestis viris nuptui dedisset, demum senio morboque confectus, naturæ debitum reddidit; &, ex hac vita decedens, alia sibi Tempe, alium Parnassum Pindumque quæsiuit.

XXVIII. ANGELVS RAPARIVS.

NUnquam rerum omnium effetrix atque magistra natura, post genus humanum conditum, (præterquam raro, in geminis fratribus,) duorum hominum formas ita inter se pares effinxit, ut eadem esset in utrisque, vel plane difficilis ad distinguendum, similitudo: sed, in hominibus formandis, in tanta varietate versatur, ut, qui in eam rem se mente & cogitatione conjiciat, ad incredibilem admirationem efferrî atque abstrahi sentiat. Istuc idem in ingenii formis usu venire,

B b 5

quis

quis nesciat? Nunquam enim duorum ingenia hominum, studiorum ac voluntatum similitudine inter se æqualia, reperias, sed in aliqua re discrepare animadvertas; ut aliud uni, aliud alteri magis placeat, ac magis expetendum esse videatur. Sed tale ingenium, quale in Angelo Rapario Cremonensi fuit, in nemine extitisse invenies. Erat, vel certe videbatur, vir optimus atque sanctissimus; sed, dum ad summæ sanctitatis terminos vela dabat, interdum a vehementi quodam flatu se abripi, atque ad varios scopulos abstrahi & deferri sinebat. Nam sibi persuasum habebat, vix quemquam, qui lethali se scelere contaminasset, posse, veræ pœnitentiæ lavacro, ejus peccati maculas eluere. Itaque librum, de falsa pœnitentia scriptum, reliquit; in quo, inanibus quibusdam rationibus, conabatur ostendere, omnes ferre iis, qui peccassent, quod vera pœnitentia non contingeret, æternæ salutis aditus esse præclusos. Tum, nimium in se ipse inquirens, dum metuit, ne vitiosum aliquid colligeret, ad ineptias devolvebatur: quarum aliquas referam; nam infinitum esset; omnes colligere. Non solum diebus festis, ut ab Ecclesia præcipitur, verum etiam profestis, non semel eodem die, sed iterum ac sæpius, Missæ sacrificio intererat; quod quidam illi scrupulus in animo hæreret, nec posset evelli, se ecclesiasticis legibus non obtemperasse, quia suspicaretur, a sacerdotibus illis, qui sacra fecissent, non absque defectu aliquo satisfactum suo muneri; ideoque pluribus sacris audiendis operam dabat, ut, si fieri posset, in unum aliquem sacerdotem incurreret, qui vitio omni careret. Neque, cum peccata confiteretur, quidquam tam deplorabat, quam, quod non semper de sacrificantis certus esse posset sanctimonia. Cumque pertinacius in hac opinione persisteret, confessarium, qui eam illi stultitiam conabatur adimere, in sceleratorum & impiorum numero habebat, neque eo amplius utebatur. Quo fiebat, ut nemo sacerdos inveniretur, qui vellet ejus confessiones audire. In ceteris vero rebus ita quoque erat ridicule religiosus, ut magnos ac lepidos de se ludos daret. Si qua fortasse via faceret iter, ubi mulieres vestes, lineas madidas, modo e fullonia depromptas, in sole siccabant, ac vel lin-

teum, vel subuculam, funibus, ut mos est, dependentem, pallio vel manu contigisset, sua eam culpa e fune depulsam concidisse, & furibus objectam periisse, arbitrabatur. Itaque, quanta maxima vi poterat, mulieres illas rogabat, ut vestes omnes dinumerarent, ac diligenter investigarent, num quæpiam illarum desideraretur. Cumque mulieres, suum illis numerum constare, serio affirmarent, non tamen quiescebat, sed, perturbato suspensoque animo domum rediens, dabat se sollicitudini atque morori. Fiebat etiam interdum, ut præter nummulariorum mensas progredieretur, ubi nummorum acervi sæpenumero extant ac prominent; statim, magna ejus in animum suspicio incidebat, partem aliquam ejus pecuniæ a se surreptam, & in crumenam suam aversam; seque, tanquam furem manifestarium, collybistis tradebat, ut de se supplicium sumerent. Cumque illi, id non fieri verisimile, dicerent, quod nunquam oculos ac manus a nummis illis amovissent, idque ab eo, mentis vitio, fieri arbitrarentur, vix eum a se poterant remove. Erant tamen aliqui malitiosi ac vafri, qui, rem ita se habere, ut diceret, affirmarent; propterea, quod furto sublatum esset, restitueret: tum omnis ab eo furti admissi suspicio recedebat, atque eos hallucinari, nec recte oculis uti, ajebat. Neque alia erat ratio, ejusmodi scrupulos, ejus ab animo, evellendi, nisi eidem assentiri, quodque de se fatebatur, concedere. Nam homo, qui tam diligenter suum teneret, quam quivis alius, confestim ad se redibat, atque, a cogitatione sua deceptum ultro, vidisse se quod non viderat, & fecisse quod non fecerat, affirmabat. In quodam vero asino, quos de se risus, quos ludos dedit! in quantam facetorum hominum urbanitatem incurrit! Die quodam, per posticum, in peristylum quarundam ædium intraverat, ubi plures erant asini, qui frumentum domino domus deportaverant; qui improvise illius adventu visi sunt paululum exterreri ac loco moveri: at illi, nihil tum animadvertens, iter suum persecutus est, ac per ostium egressus est foras. Sed, cum paululum progressus esset, venit illi in mentem, modici illius asinorum metus, quo paululum dissipari visi sunt; & ab
hac

hac cogitatione, quasi quodam aditu, ingressus est in suspicionem, ne, sua culpa, eorum unus vel plures se in viam ex postico illo dedissent, & in abigendum aliquem incidissent. Nec mora; reversus, exquisivit ab asinariis; quot secum asinos duxissent: qui, Quinquaginta, responderunt: ac confestim cepit illorum numerum inire. Verum, sive quia unum in enumerando præteriret, sive quia oculis timor obsisteret, novem & quadraginta eos esse, reperiebat. Tum exanimatus metu, & amenti similis, ea circum loca perreptans, ut quemque viderat, num asinum, qui se ex aliorum societate distraxerat, aspexisset. Sed, cum omnes negarent, revertitur, ac rursus in eorum enumeratione versatur; atque adeo, quod optabat, non reperit, ut, ex quadraginta novem, quadraginta octo factos esse quereretur. Ac, Me miserum, clamabat, cur non venit in mentem, postico ostium claudere? jam, nisi caverò, ad unum omnes se istinc fuga surripiunt. Ad quam vocem accurrunt asinarii, & quid quereretur, interrogant. Quid querar, rogatis? Hic mihi, qui sui huic malo caput; vestri asini, nisi quamprimum occurritis, seditione facta, vasa conclamant, profectionem & fugam adornant, ad hostes, hoc est, ad fures transcunt; & jam duo ex iis in illorum castris præsidiiisque versantur. Quo audito, asinarii oculos attollunt, uno aspectu universum exercitum lustrant, ac nullum vident abesse. Tum, ad illum conversi, Profecto, mi homo, insanis; hic quieti sunt omnia, milites salvi, numerus convenit; quamobrem, si te ea res sollicitum habet, jubemur, libero ac soluto animo esse. Alio die, amico cuidam suo cœnam dabat, cumque farcimen præstantissimum, sibi Cremona missum, conscidisset in frusta, ut amico anteponeret, ibat, ut funiculum, quo farcimen adstringebatur, ut, quod erat intus, arctius complecteretur, e fenestra in viam ejiceret; & quia tenebræ erant maximæ, & funiculus paulo unctior, verebatur, si in prætereuntem aliquem incideret, ne pallium illi, vel pileum, comminularet; & cum aliquantulum incertus animi fuisset, utrum projiceret, an non, tandem venit illi in mentem edicti, quo in omnibus fere municipiis præcipitur, ut, si no-

His tempore sit desuper aliquid dejiciendum, triplici antea prædictione populus admoneatur. Itaque ter, e fenestra, maxima voce clamavit, Cavete, cavete; adeo ut vicinia, cum majorem aliquam esse causam ejus clamoris ac moniti suspicaretur, tota se ex ædibus foras effuderit. Multaque præterea, his similia, inepta ac ridicula fecit, ac dixit. Omnes, quos quidem ipse audisset, qui de loco superiore conciones ad populum haberent, plerunque inanem ac supervacaneam ajebat operam sumere: quia singula vitiorum genera, ut avaritiam, superbiam, libidinem, crudelitatem, ad accusandum arripiunt, & in eo se jactant, vel divini judicii severitatem; atque infernorum suppliciorum acerbitatem, compositis ac magnificis verbis exponunt, adeo ut etiam ex auditorum oculis lacrimas, quæ cito arescunt, excutiant; quæ quia nemo ad res suas revocat, hoc est, ad ea, quæ ipse avare, superbe ac crudeliter fecerit, ideo fieri, ut vix quisquam ab eorum oratione melior excedat: contra, illos opus oratorium facere, qui privata cujusque generis hominum vitia nossent, qui ea, quæ in mercatorum & artificum tabernis, quæ privatorum in domibus, in aulis Principum, in judicum tribunalibus, aliisque in locis, passim committuntur, asperiant, insectentur, objiciant, & ad divinæ legis normam revocare contendant. Ac, neminem adhuc se reperisse affirmabat, qui habitaret in hac una ratione dicendi, præter F. Franciscum Nerium Januensem, e Capucinatorum familia, qui tum Romæ in concionibus dominabatur; quem, quoad vixit, summa ope coluit, & scriptorum suorum heredem instituit. Nam multa graviter ac severe scripta reliquit. Sed, quisnam ab homine tam tetrico, tamque austero, faceta ad ridicula carmina expectasset? At, in hoc, expectationem omnium decepit. Etenim, longum rhythmicum carmen, ex minutis strophis confectum, in illius laudem edulii composuit, quod vulgo raviolos appellant; ac singulis strophis intercalaris erat versus insertus; &, quoniam carminis ea lex erat, ut ultima strophæ uniuscujusque syllaba, eodem quo extrema, intercalaris modo, desineret, trecenta fere verba, similiter eodemque modo cadentia, re-

pe-

peterat. Id carmen quotannis Sodalibus Deiparæ Virginis Assumptæ recitabat; quo die ex symbolis, animi relaxandi gratia, simul edebant. Sed demum, tabe confectus, hinc communem in locum excessit.

XXIX. AUGUSTUS PACINELLUS.

SI de uniuscujusque facultate existinare ex amore & gratia licet, quia ille apud viros principes floruit, magnum profecto virum, Augustum Pacinellum, patritium Senensem, extitisse, fateamur necesse est; cum tribus deinceps S. R. Ecclesiæ Cardinalibus fuerit eximie carus, Paulo Æmilio Sfondrato Card. S. Cæciliz, Desiderio Card. Scagliæ, & Marco Antonio Card. Bragadino; a quibus, in causarum cognitionibus, quod munus perpetuo sustinuerat, magno ejus opera æstimabatur. Quod autem maxime illis fuerit cordi, magnoque in honore ac precio, illud in primis argumento est, quod a nemine eorum, ipsis vivis, discesserit, sed in eorum amicitia & gratia perpetuo manserit. Neque hunc eorum amorem & gratiam gratis assequebatur, sed multis magnisque virtutibus. Erat in omni fere genere honestarum artium doctus, sed præsertim exquisita quadam juris civilis; ejusque universi, scientia peritus: nam Pontificium etiam didicerat. Non enim cum quadam de foro rabula, in minorum magistratuum subfelliis latrare docuerat, sed doctor singularis, vel potius omnium suæ ætatis præstantissimus I. C. erudierat, Fabius Benevoglientes; de quo sæpius commemoravimus. Neque etiam ille, cum Doctoris & Magistri insignibus decorabat, asini magis quam Jurisconsulti habere similitudinem dixit; ut de quodam accidit, quem, cum iret, ut Doctorem faceret, forte in via in asinum incidit, qui, diducto riclu, speciem quandam ridentis efficiebat; in quem intuens, Quid rides, inquit, inepte? te quoque possumus, si nummi veniant, in numerum atque ordinem Doctorum impellere. Non igitur eam de illo opinionem habebat, verum tantum illi tribuit, ut dignum judicaverit, qui statim eam vim doctrinæ, quam ab ipso hauserat, quaque redundabat, in alios dif-
fun-

funderet. Atque octo annos continuos, in celeberrimo Senensi Gymnasio, Jus civile, magna auditorum frequentia, docuit. Sed, cum animadvertisset, dormitantem oscitantemque eam esse sapientiam, quæ non ad usum transferatur, eaque artius plus habere splendoris, quam utilitatis, quæ ad ludendum, quam quæ ad pugnandum sumuntur; docendi munere, quod magna cum laude obibat, sponte se abdicavit, ac doctrinæ vim illam, qua se præstare non ignorabat, ex umbraticis illis exercitationibus in pulverem, aciem, clamores, ac solem educere, hoc est, ad forensium usum transferre, constituit. Itaque profectus est Romam, & adire ad privatas causas cœpit, non, ut in agendo disceret, quod plerique faciunt, sed ut, doctus, quid efficere posset, ostenderet. Sed non fuit illi magnopere elaborandum, ut, quantum ingenio, quantum doctrina, valeret, declararet. Nam primæ illæ causæ, ab ipso susceptæ, & summa diligentia elaboratæ, & tanquam elucubræ, tantum commendationis habuerunt, ut non levis inter summos viros esset contentio, quisnam potissimum doni cum suæ posset habere. Sed vicit omnium studia diligens Cardinalis S. Cæcilie sedulitas: nunquam enim quievit, nisi eo suam in domum perducto: quem statim Auditoris honore ac nomine cohonestavit, qui, pro se, causas, quæ in suum forum convenirent, cognosceret atque decideret. Quod munus, tanta cum fidei, doctrinæ, & abstinentiæ laude, administravit, ut Cardinalis, Cremonensem Episcopatum adeptus, non diutius secum in corde volutaverit, cuinam potissimum vicarias suas partes demandaret. Nam statim occurrit Augustus, cuius opera fideli ac strenua usus esset; atque vicariæ eum illi provinciæ præfecit; quam semper tenuit, neque antea dimisit, quam Cardinalis Episcopatum deposuit, atque alteri tradidit. Quibus actis, nihil in eo fuit moræ, quin Cardinalem, Cremona abeuntem, & Romam proficiscentem, prosequeretur. Cui etiam fidem, benevolentiam, studium, usque ad extremum vitæ illius spiritum, præstitit. Quæ res magno argumento est, fuisse in eo summam animi constantiam, agendi dexteritatem, excellentemque multarum artium scientiam; quod Card-

dinalis, usque eo difficilis ac morosus haberetur, ut vix quisquam inveniretur, qui illi satisfaceret; quo fiebat; ut non pauci, desperantes, se posse illi, ad animi ejusdem sententiam, præsto esse, peterent, ut, ejus voluntate, discedere liceret; alii etiam aulam illam ultro deserebant. Neque levem ille ab eo, ad cujus animum ita facete animum suum adverterat, suæ fructum industriz ac fidei tulit. Nam, una cum Odoardo Cardinali Farnesio, electus ab eo est, ut daret operam, quo ea, quæ ex testamento, quod scripserat, post mortem suam fieri vellet, perficerentur. Magnus sane honor, atque hominis pietate ac sapientia dignus. Verum, cum Cardinalis e vita migrasset, non licuit illi diutius esse ocioso; sed statim a Cardinali Scaglia, Auditoris sui munus; demandatum ac traditum. Cujus domi cum ad multa ac gravissima negocia adhiberetur, eam sibi prohibitatis, doctrinæ, & abstinentiæ, famam nomenque confecit, ut, variis temporibus, Episcopatus plures sint delati, ex iis, qui intra Senensium fines continentur: quos ille constantissime recusavit accipere. Quid multa? ipsum etiam Senarum Archiepiscopatum, qui, Cardinalis Bichi morte, pastore carebat, ultro a magno Etruriæ Duce oblatum, eadem animi magnitudine atque constantia repudiavit atque rejecit. Sed illa hominis virtus, ille rerum omnium humanarum contemptor animus, nullius rei ita erat cupidus, ut tranquillitatis & otii; quæ nusquam longius, quam ab aulis Principum, exulant. Nec defuit illi Deus, Cardinali Scaglia ad se evocato, in votis & optatis occurrere. Itaque nihil habuit prius, quam ut Romæ in domum Caritatis, ad forum Sabellum, secederet, ibique totum se pietatis ac literarum studiis & operibus traderet. Jucundum sane, atque ex animi sui sententia, id illi ocium fuisset, si diuturnum esse licuisset. Verum, ab aulæ molestiis tutum esse non potuit: illuc enim vehementissimi, Cardinalis Bragadini, conatus ac preces irruerunt, ab eoque extorserunt, ut vellet sibi esse a cognitionibus, verum cum ea condicione, ne cogeretur coloniam, in quam venerat, commutare; hoc est, ne haberet necesse, domum illam deserere, & in sedes Cardinalis immigrare. Habe-

bat in animo, si paululum illi longior vita suppeditasset, duo volumina typis mandare, hoc titulo inscripta: *Responsa ad quasdam insignes quaestiones*; itemque, volumen aliud epistolarum, quas, Cardinalium, quibus operam navaverat, nomine, tum Latine tum Italice scriptas, complures ad viros principes dederat. Quæ omnia, a Bernardino fratre, propediem edentur. Moribus erat optimis atque sanctissimis, adcoque, in tribuendo unicuique suum, religiosus, ut duo haberet inter se distincta marsupia, unum, in quod vestigalia, ex bonis Ecclesiasticis prodeuntia, conferret, alterum, quod redditus, quos ex bonis suis capiebat, includeret: illud Ecclesiastici, hoc prophani, nominibus appellabat: ex illo non plus sumebat, quam quantum esset ad vitam parce ac duriter degendam satis; ex isto, quæ superarent, necessitatibus pauperum suppeditabat. Cum sternuebat, tantos naso clamores edebat, ut totam viciniam, in qua erat, perterrefaceret. Præterea, Galliarum Regis partium ita studiosus, ita acer ejus nationis propugnator atque defensor extitit, ut interdum, fere non minus ad ineptias revolveretur, quam olim, me puero, popularis quidam suus, capularis atque Acherunticus senex, qui Ædiculæ S. Martini, ad montem pietatis, Parochus, propterea nolebat ad ægrotum quendam sacram Eucharistiam deferre, quod esset Hispanus: omnes enim ejus nationis, ridicule, impiorum ac sceleratorum numero habebat.

XXX. CYNTHIVS LVCA- RINVS.

Multa a veteribus poetis monstra elegantissimis depicta versibus extitisse narrantur, quæ ex variis diversisque naturis conflata constarent, ut Chimæram, Minotaurum, Sirenes, Stympthalides, aliaque ejusmodi naturæ portenta; quæ, si ad historicæ veritatis rationem exigantur, omnino falsa esse convincentur, si vero ad animorum formas referantur, nihil ab illis rectius, nihil elegantius, dictum esse reperietur. Nam quidam

Cc

cx

exiis, ex tam contrariis diversisque, inter se repugnantibus, naturæ studiis cupiditatibusque conflantur, ut nullum unquam tale monstrum, cujusquam ingenio, excogitari fingique potuerit. Atque ut ad rem propius accedamus; quisnam Chiron, qui a superiori corporis parte hominis, ab inferiori equi similitudinem ac speciem gerebat, quænam Siren, quæ superne formosissima speciosissimaque puella, sædum in piscem desinebat, cum monstruoso Cynthii Lucarini Trebulani, quod est oppidum in Vmbria, ingenio æquari conferrique posse videatur? Cujus si superiores animi partes, tanquam caput, aspexisses, nihil illo fieri posse festivius existimasses; sin autem paulo infra, quasi ad crura pedesque oculos dejecisses, nullum unquam monstrum, tam vario tamque dissimili exitu conclusum fuisse, jurasses. Atque hæc erant in eo hominis, vel angeli potius, si ita fas est loqui, festivissimi signa; summa divinarum humanarumque rerum omnium scientia, exacta atque perfecta Græcæ, Latinæ, Etruscæ, Hebrææ, Arabicæ, & Chaldææ linguæ notitia; quibus linguis non solum loquebatur, scribebat, verum etiam elegantissimos versus faciebat; omnium, sacrarum literarum, interpretum notitia, quorum volumina legerat, quodque in eis bellissimum esset decerpserat, & memorizæ custodiendum mandaverat: in eisque voluminibus, elegantibus quam maxime typis impressis, conquirendis comparandisque, nulli, neque labori neque sumtui, parcebat: præterea ingenium acre, velox, acutum, unico aspectu ad intima eorum, quæ monstrarentur, usque percurrens, ac cognitione scientiaque complectens. Hæc, inquam, hominis, non unius e multis, sed plane singularis, in eo laudem habebant: reliqua vero, quæ cum eorum extremitate, quasi cum ventre scilicet, crura, pedesque, jungebantur, nihil simile hominis, sed sædi cujuscumque anguis, vel si quid eo est immanius, representabat: quorum caput erat, infans ac monstruosus mulierculæ cujusdam, Leonora nomine, amor, qui, ubi quemque comprehensum suisque laqueis implicitum habebat, magno ac solido eum mactabat infortunio. Hæc sibi eum mulier, virtute formæ, qua præstabat, emancipaverat; hæc, ut ait il-

la apud veterem poetam lena, tanquam piscem habebat, quem, quoquo vellet modo, condiret, sive patinarium, sive assum; ad hujus domum res, a parentibus illius, magno labore parta, exulatum abibat; hæc, quod metuebat (ut sunt hominum mentes, inconstantes & variae,) ne altera eum sibi præriperet, quenique ipsa caperet fructum, domum ad se averteret, dedit operam, ut ejus apud se animum, tanquam avem, ne quopiam aufugeret, devinctum haberet; atque, ut mos istarum est, ad veneficia cantionesque confugit, & amatorium illi poculum propinavit. In quo rebus suis non bene consuluit. Quod si inedicatam illam potionem non hausisset, multo sibi diutius ille durasset. Nam, ea epota, paulatim de statu mentis dejectus est, cœpitque aliena facere ac loqui. Quamobrem, cum ex lege, ejus, ad agnatos, tutela rediisset, lucrum illud penitus constitit. Neque mala, quo magis illum assicaret, meretricis illud acumen non adhibuit, ut se ejus amore differri assimularet: nam versibus Græcis ac Latinis, misere scriptis, ab altero sibi dictatis, sed quos a se compositos diceret, se dies noctesque exercuari, nec sine illo partem ullam quietis capere posse, significabat. Ille, eodem genere sermonis & carminis, non minus misere, responsu illi dare, se magnum facere, fortuna Paridi Narcissoque, qui tam perditè amaretur, anteire, existimare, sentire, se ad mutuum in amore cum illa faciendum adigi, munera conduplicare, lucro illi potius, quam sibi decori esse. Verum eorum, quæ, e domicilio mentis egressus, inaniter fuderat, pauca quædam huc conferant. Velle enim, ajebat, ei, quam plus oculis suis amabat, ædes, ita magnificas, ita amplas, exstruere, ut totum illud spacium occuparet, quod Spoletum inter ac Trebiam adjacet; tum alteras eidem Romæ ædificare, novem Musarum concilio sacras; deinde, navem argenteam, egregio opere elaboratam, comparare, qua equorum, remigum partes agentium, opera, tota Urbe, quasi mari, una cum sua Leonora veheretur. Sed nihil tam habebat in ore, quam currum parari, mirabili artificio, multisque mysteriis refertum, in quo triumpharet, eo quod, scientiam rerum omnium complexus, cunctos mortales sapientia vicisset.

Sed, ad nosocomium insanientium adductus, antea vitam amisit, quam recuperare sanam mentem posset. At ego de hoc homine dici audivi, quamquam mulierculæ illius amore implicitus teneretur, præter externas illas significationes atque dispendia, nihil amplius ipsi cum illa fuisse.

XXXI. BENEDICTUS FLO- RETTUS.

IN hoc omnia plane sunt hominis; nihil brutorum animalium, nihil monstri simile, reperitur; nullus amor, nulla cupiditas, nullæ ineptiæ; sed contra, multa gravitas, continentia, variz exquisitzque literæ. Poëtas omnes, Græcos, Latinos, & Etrusca lingua loquentes, diligentissime legerat; omnes eorum flores, veneres leporesque collegerat, &, si quid ab eis titubatum esset, censoria prope auctoritate notaverat. Quamobrem effectum est, ut poëticæ facultatis peritissimus evaderet, ac penitus omnia ejus artis præcepta, atque adeo omnia mysteria, nosset. Ita tamen, ut magis æstimator metuendus esset, quam poëta admirabilis. Neque mirum. Nam, si præcepta possent poëtam facere, nihil adjuvante natura, quis non esset poëta? facile enim esset, quæ a magistris ejus artis traduntur, accipere, ac mandare memoriz. Quisnam poëta, sive sit Homerus, sive Virgilius, si sola præcepta valerent, auderet se cum Aristotele conferre? qui eadem acie mentis, qua rerum omnium vim naturamque viderat, hæc quoque aspexit, quæ ad poëticam artem pertinebant. Omnino sic se res habet, ut in hac una, magis quam in ceteris aliis rebus, natura dominetur ac præstet. Quod a Floretti opinione non absuit; qui cum tentasset, quid in eo genere efficere posset, semel in Macheronico, iterum in Fidentiano faceto carmine, atque intellexisset, se non posse ad mediocres, nedum ad summos pervenire, quamvis omnia summa fecisset; a scribendis versibus se continuit, & ad aliud studium transtulit. Nimirum in cognoscendis ac funditus percipiendis Etruscæ linguæ divitiis, omnes fere nervos ætatis industriæque suæ consumpsit: usque adeo, ut ad Crusca-

ni Lexici marginem, cujus, domisuz, exemplum habebat, multa ibidem, perperam dicta, correxerit, multa etiam nova atque egregia addiderit. Cui libro, post ejus mortem, tantus honor est habitus, ut a multis summis viris vehementissime expeteretur, ac quæreretur; sed inventum est, venisse eum in potestatem Jo. Caroli Medici, Ferdinandi, magni Etruriæ Ducis, germani fratris, ab eoque, thesauri cujusdam loco, ne diripiatur, omnibus custodiis subiectum haberi. Cum igitur tantos in eo sermone progressus fecisset, ut progredi longius non posset, multis in operis scribendis styllum, quem, veteribus poëtis & oratoribus legendis animadvertendisque, formaverat, tanquam in medium eduxit: ex quibus operibus Progymnasinata tantum poëtica typis mandanda curavit; neque tamen suum illis, sed Udeni Nisicli, nomen inscripsit. Reliqua cum jam prompta atque expedita haberet, ac prope in eo esset ut ederet, abductus est ab hac cogitatione, a quodam vehementi divini numinis afflatu; cujus vi impulsus, in intimam animi sui sedem ingressus est, ibique, omnibus aliis cogitationibus facessere jussis, reputare secum ipsemet cepit, quam inanes essent nostræ contentiones, quam stulta consilia, fragilesque spes omnes, quas mors antea perverteret, & in ipso cursu obrueret, quam possent portum aspicere; quamque nihil esset, in hac misera & exigua vita, ob ingenii & eruditionis famam, in omnium ore atque sermone versari. Itaque, relictis ceteris studiis, vitæ suæ tabernaculum in rerum cælestium divinarumque meditatione collocaverat, ac quotidie horam integram, ad sacram Deiparæ Virginis Annunciatæ imaginem, in attentissima ejus mysterii aliorumque contemplatione defixus, conterebat: reliquum tempus, vel pietatis operibus dabat, vel in sacrorum librorum Conciliorumque lectione collocabat; atque exercitatione studioque tantum profecerat, ut omnium peritissimus haberetur. Statura fuit procera, capillo nigro, truci vultu, sed a quo plurimum mores discrepant. Sed quia humilis illi pagus, ubi nasceretur, contigerat; ortus enim est Alvernæ, qui locus Comitum De bardis imperio subest; quod potuit, naturæ errorem correxit, seque Florentiam

tiam contulit; ubi, cum duos & triginta compleisset annos, est mortuus.

XXXII. POMPEIVS ROGERIVS.

Quid esse dicam causæ, cur sive natura sive Deus, raro excellentem cujusquam sapientiam ab aliqua admistione stultitiæ sejunxerit, nisi, ne efferantur hominum animi, sibi que, non Deo, unde, tanquam a fonte, omnia in nos bona decurrunt, id, quo ceteris præstant, ferant acceptum? ut nimirum intelligant, se, ab ipsis quod desipiant, a Deo quod sapiant, habere. Ac fortasse, ne Pompejus Rogerius in hanc fraudem incideret, passus est cum Deus in illam insaniam, qua captus est, & in qua obiit, incurrere. Erat memoria summa, ingenio peracri, infinita rerum, jam inde ab initio generis humani usque ad nostra tempora gestarum, scientia; quas res, adeo memoria comprehensas habebat, ut indidem eas, tanquam ex aliquo promutuario, cum esset opus, expromeret, atque adeo eloquentia, qua præstabat, ad vivum exprimeret; ut eas non legisse, sed vidisse, & cum hominibus illis, de quibus erat sermo, vixisse videretur. Ac fiebat interdum, ut in circulis amicorum, si veteris cujuspiam facti memoria usurparetur, iisque, quos inter erat sermo, a fide historię aberrarent; ab ipso corrigerentur, ac, si correcti nollent in viam redire, efferretur iracundia, ac sæpenumero, qua erat animum impotentia, ad verborum contumelias descenderet, neque eos solum, ut iratorum mos est, rudes, atque omnium rerum imperitos, verum etiam, fungos, bardos, codices appellabat. Hæc, atque alia etiam, his majora, in eum olim maledicta congeffit, qui amplam atque copiosam domus suæ bibliothecam habet exstructam, ubi, quidquid orationum, historiarum, carminum, juris civilis, sacrarumque literarum commentariorum, medicinæ, geometriæ voluminum est, etiam e tecto tenus extructa loculamenta cernuntur, libri autem ipsi, scite eleganterque illigati atque vestiti, sed quos tum ipsi tum aliis religio est tangere; sunt enim ad ornatum, non autem ad usum, expositi. Hic, inquam, tam nobilis bibliothecæ dominus, die

die quodam, cum, in taberna notissimi bibliopolæ, apud eos, qui se cum aderant, facti cujusdam narrationem Dionisio Cassio tribueret, qui multos ante annos mortuus fuerat, quam illud, de quo erat sermo, contigisset, commotus Pompejus, qui & rem ejusque auctorem rei probe meminerat, Abi sis hinc, ait, ignavissime, qui, cum sis desidiosissimus, bibliothecam, ostentationis gloriæque causa, habes; at libri non ad eum sunt usum inventi, ut ab illis, tanquam a re sacra, manus abstineas, sed ut eos sumas, legas, verses, in manibus habeas. Sed non mirum, si tam multa legisset: nam, incredibili celeritate, libros percurrerebat: quod licebat animadvertere ex capitis motu, (nam id erat illi vitium, ut, legendo, caput moveret,) quo capite, rapido incitatoque cursu, unamquamque lineam lustrabat, nec uspiam hærebat; Sed, quia erat luscus, ac minimum oculis utebatur, cum legeret, ita ori paginam admovebat, ut eam etiam naso araret. Illud vero mirum, quod, cum infirmisissimis esset oculorum viribus, ut diximus, cum ad scribendum se conferebat, ita minutis literulis paginas exarabat, ut acutissimorum etiam hominum sciens effugere. Aliquot quotidie horas studiis detrahebat, quas tessærarum ludo dabat; atque difficile erat, alterum invenire, qui majore ejus ludii studio teneretur. Verum, ob nescio quam distillationem, quæ, a capite oriens, defluebat in collum, eam animi ægritudinem mœroremque contraxit, ut ad insaniam adigeretur. Primum, mortis necessitatem, & divini judicii severitatem in conspectu semper habere, novum vitæ genus instituere, nihil nisi de æterna vita cogitare, corpus jejuniis, vigiliis, verberationibus, aliisque pœnis, ultro susceptis, afflictere. Sed haud quidquam adhuc pro infano fecit, vel dixit, sed contra, summa cum prudentia atque sapientia, omnia: tum vero stulti speciem non potuit effugere, cum libros, quos centum aureis coëmerat, octo vendebat, ut precium in aliis spiritualibus libris collocaret. Postremo, prorsus mentem ab eo abiisse, impia illa est testata oratio, mortiferæ eidem fraudi futura, si a ratione, non autem ab aliena mente, prodiiisset, qua pro certo affirmabat, contra æternam damnationem nullum sibi in divina misere-

ricordia esse perfugium, & in hac infania, cum omnes religiosorum hominum, qui frequentes illi aderant, contrarias rationes respueret, usque ad extremum vitæ spiritum perseveravit.

XXXIII. IO. DOMINICVS CIAIESIVS.

Varium ac multiplex esse insanientium genus, pro-
ut varix atque multiplices sunt rerum imagines,
quibus illi addicti tenentur, superfluum est, ac non ne-
cessarium, pluribus verbis ostendere. Mitto eam, quæ
acuta in feбри, ægros male habet, quam Græci *Φρενίτις*
appellant. Nam hæc, levato accessionis impetu, sine mora
dilabitur. De ea, quæ continua est, loquimur, quæque
nos in risum hilaritatemque impellit. Quæ ratio ridiculi,
in iis sedem habet, qui se primos esse rei cuiuspiam vo-
lunt, nec sunt. A quo genere morbi paucos mortalium
esse immunes invenias; quod vix centesimus quisque, in
eo quod profiteatur, sive sit poësis, sive eloquentia, sive
suz formæ elegantia, sive quid aliud, ceteris, qui sint
ejusdem professionis, non anteire se credat. Quod si as-
sentator quispiam accesserit, qui illi ultro arrideat, ejus-
que ingenium admiretur simul, hic protinus ex stulto in-
sanus evadet. Hoc hominum, ridicule insanientium,
genere non minimum delectabatur Leo X, Pontifex Max.
cujus Gnathones, quos circa se habebat, dabant ope-
ram, ut eos, quibus levis mens esset, ad insaniam
adigerent, seque eos esse, qui non essent, arbitrarentur.
In quo mirabiliter lusus est a quodam, cui petenti adi-
tum conveniendi non dabat: qui cum multos dies expe-
ctasset, atque omnes ad Pontificem allegationes diffici-
les, omnes aditus arduos interclusosque videret, sedu-
cto Pontificii cubiculi præfecto in aurem dixit, se esse
poëtam, solum præter cæteros, qui sua vellet carmina
Pontifici tradere, quibus lectis obstupesceret, horreret,
ad incredibilem admirationem efferretur. Quo ille audi-
to, ventis atque avibus ocus advolavit in Leonis cubi-
culum, atque hilaritate lætitiæque redundans, Inveni-
mus,

mus, inquit, perfectæ insanix hominem, qui tibi voluptati maximæ erit. At ille sine mora intromissus, ex illis se integumentis simulationis evoluit, causam, cur insaniam simulasset, aperuit, negocium, quod volebat, exposuit. Itaque ille deridiculo eos habuit, quibus ludendus tradebatur. Sed ut ad Dominicum, Doctorem Ciacesium vulgo appellatum, veniamus; hic cum in amicitiam Ducis Garavini pervenisset, Dux statim hominis ingenium est odoratus, & tanquam solum quoddam, existimavit esse, in quo si sementes facta fuisset, magnæ indidem stultitiarum fruges essent proventuræ. Neque cum mentita est seges, sed fructus plurimos extulit. Ac primo, facile illi fuit persuadere, posse se equos alere, quibus Neapoli rheda veheretur, atque etiam equos cum rheda muneri sibi missos. At ille, qui solo vitam pane oblectabat, atque, si is aderat, magnas Deo gratias habebat, cum quod ageret non haberet, quotidie ostiatim cibum equis emendicabat; quem facile inveniebat; quoniam ejus stultitia jam emanarat in vulgus, & ipse, versibus Latinis, quos fundebat ex tempore, ac Juris civilis & Philosophiæ nodis, magna cum sermonis suavitate dissolvendis, mire sibi hominum animos conciliabat. Sed cum jam rhedæ equorumque tæderet, Florentiam se contulit, in magni Ducis aulam facetiis insinuavit, atque a Ferdinando, hujus nominis primo, exceptus est, inter parasitos ac ridiculos homines aulæ. Verum, quia probis erat moribus; nullum enim verbum, nullum ridiculum dictum dicebat, quod turpitudinem aliquam tegeret; & quia Latino sermone perinde ac vernaculo utebatur, traditus est ab eodem Ferdinando liberis suis, ut, illius consuetudine usuque edocti, assuescerent loqui Latine. At, per id tempus, magna illum cupido inceserat, inter Doctores Juris civilis perveniendi, quamobrem Ferdinandum opere orabat maximo, ut, sua voluntate, Pisas ire, cumque ibi honorem sibi adipisci liceret. Ac Ferdinandus, quia existimabat, locum illum honoris pollui, si eum ridiculus homo atque inter ludibria aulæ, quamvis idoneus, adeptus foret, id illi beneficium constantissime pernegabat. Sed cum ejus cupido in dies magis magisque incendere-

tur, die quodam furtim Florentia egressus, Pifas se contulit, & ab iis, quorum hæ partes erant, persoluto antea pretio, Juris utriusque interpretandi facultatem coëmit. Nec mora; cum ejus facultatis diplomate, arundini imposito, in astuo sedens, ovanti similis, est Florentiam ingressus. Quod ubi Ferdinandus accepit, usque eo commotus est ira ac stomacho, ut vehementes, ad eos, qui illum cooptaverant, literas dederit; in quibus graviter querebatur, quod ausi essent, in suum atque illius Gymnasii dedecus, talis notæ viro eum locum ac numerum dare. Qui responderunt, ignorasse se, quid illie hominis esset; verum, jam ditu neminem illuc venisse, eum enim locum, qui, periculo facto, eo dignior inveniretur. Atque ab eo die cœptus est non alio, nisi Doctoris Ciajesii nomine appellari. Pluribus rerum inanum imaginibus, quemadmodum solent ii, in quibus perfecta est insania, addictus tenebatur; sed non aliis magis, quam galli Indici, quem semper in ore habebat, & soricis, quem pluviali indutum Pontificio, cum equitum Hierosolymitanorum insignibus, perpetuo sibi ante oculos obversari sèbat. Fuit præterea multis aliis summis viris, quibus ridiculi homines erant in pretio, eximie carus; ut Card. Montalto, a Monte, Peretto, qui, me audiente, ridiculorum hominum, quos ad eam diem audisset, primas ei deferebat, aliisque. Sed tandem Neapoli, stipem quæritans, est mortuus, ubi Comitem Montis Regii, cum adeptam illi Proregis provinciam gratularetur, his omnibus eum cognomentis affecit, Illusterrimi, ut Comitum, Celsitudinis, ut montem, Majestatis, ut Regem, Excellentiz, ut Proregem; hoc enim Proreges titulo cohonestantur.

XXXIV. SEBASTIANUS BETTARUS.

ERant in ipsis propemodum Societatis Jesu initiis, recenti adhuc S. Patris Ignatii memoria, in quibusdam præstantibus Societatis ejusdem viris, si non magna ingenia, admirabilis tamen, in erudiendis, prima
il-

illa puerili institutione, adolescentulis, industria; quam illi industriam, ut alibi de Turfellino ac Brunello diximus, caritatis igne succensi, ad proximi utilitatem conferre statuerant; idque a superioribus, in beneficio & gratia, petebant; atque illi erant gratiosi in concedendo. Itaque, omnis ceteris studiis, habitarunt in hoc uno, videlicet in tradenda juventuti, Latinæ orationis formandæ, via atque ratione. Ex hoc genere in primis fuit Sebastianus Berettarus Florentinus, homo, factus ad id munus: quo, non facile, quemquam me vidisse dixerim, (nam sæpius, discendi studio incensum, ejus me opera contigit uti,) qui planius, scientius, ac melius doceret. Qui cum illud intelligeret, quod persuasum est omnibus, qui aliquem hujus rei gustum habent, Ciceronem esse unum, quem præ ceteris, ad imitandum, adolescentes omnesque sibi proponat; non solum assidua illius lectione eo, studio atque imitatione, intendit, ut divinum illum dicendi scribendique Latine magistrum exprimeret; sed, quo tota illum mente atque animo intueretur, atque ita scribere consueffet ut ille, omnia illius opera, sua manu, descripsit. Id quod a Cicerone ipso, de orationibus Demosthenis, esse factitatum accipimus. Quid igitur accidit? majus quiddam eo, quod de se fatetur Antonius. Ille enim, cum ad libros Græcorum legendos accederet, ita sentiebat, orationem suam, eorum cantu, quasi colorari, quemadmodum coloratur is, qui in sole inambulat: at hic, ex Ciceronis eloquentiæ lumine, in cujus contemplatione ita attente studiosæque oculos defixos habebat, non solum scripta sua aliquid coloris attrahere, verum etiam, ad illius similitudinem splendoris, illustria, omnium ad se oculos convertere animadvertibat. Quod ex Pauli Manutii disciplina hausisse videtur, qui, in scribendo, ita suis Ciceronem vestigiis persequabatur, ut existimaret, nusquam pedem, nisi ubi ille posuisset, sibi fas esse defigere.† Quæ res minime quibusdam probabatur, qui non æquum esse ajebant, Latini sermonis elegantiam, ex latissimo campo, in unius Ciceronianæ dictionis terminos finesque, concludere. Quamvis in historia non nihil se a similitudine Ciceronis abstraxerit, & ad historicorum imitationem traduxerit; ut apparet ex vita

P. Josephi Anchiatz; per quam, in insulis Canariis, Deus admirabilia, ac supra naturæ vires, effecit. Atque, ad tot codices, quos, tum Ciceronis tum suis operibus scribendis describendisque implevit, nunquam dexteram, sed lævam semper manum, adhibuit. Erat enim sinister; sed eadem, celerius ac firmitus, quam alii dextera soleant, utebatur. Magna fuit apud summos ac doctos viros existimatione; a quibus sæpe, de rebus ad elegantium literarum studia pertinentibus, consulebatur; & in his, a Jo. Juvenali Ancina, Salutiarum Episcopo, eximie sanctitatis doctrinæque viro; ad quem epistolam, a Sebastiano missam, aspexi, eo cultu atque nitore, ut, cum expleri satiarique non possem, centies eam perlegerim. Extrema senectute illud sibi bellissimum solatium relictum esse, mihi narrabat, ut, festis diebus, Basilicam S. Mariæ Majoris adiret, ut vespertinis ibi horis interesset. Nusquam enim eas magis ex animi sui sententia, quam in eo templo, cani celebrarique aiebat. A quo reversus, ut P. Virgilium Cœparium, Collegii Romani tunc Rectorem, mihi dicere memini, jentaculo se reficiebat; quod aliis etiam diebus, cum in opere aliquo se exercuerat, faciebat. Neque in his tantum liberalibus disciplinis, ejus se continebat industria, sed ad alia etiam munera subeunda egrediebatur. Nam & confessiones audiebat, & Collegiis nationum, quæ Patrum Soc. Jesu prudentia & auctoritate reguntur, magno ejus opera usui esse reperiebatur. Denique, plenus annis ac meritis, ut ejus vita, innocentissime acta, nos credere persuadet, evolavit ad Deum; qui nunc illi gratiam pro meritis refert.

xxxv. FRANCISCUS ROGERIVS.

Qui de vitæ genere eligendo consultant, illud sequantur oportet, quod cum ea arte conveniat, cui, ab incunte ætate, suam operam studiumque tradiderunt; ut, cum aberraverint, non sit illis postea integrum, pedem ab errore desistere. Sed cum, a Philosopho, certa vitæ ineundæ ratio exquiratur, nihil illi minus con-

venire arbitror, quam connubium. Nam, quid illi res sit cum corporis illecebris, cujus mens, sublimium rerum contemplationi dedita, peregrinetur in czelo? etenim neque philosophiæ, quam tanquam filiolum amplecti se dicit, satisfacit; neque uxori, cui operam dare jubetur, animum explet. Quod si Franciscus Rogerius, Romanus, sedulo cogitasset (quamquam ille non fuit Philosophus, sed poëta) quantum in re uxoria sit incommodi ad sapientiam, nunquam homo, elegantium literarum studiis deditus, in eas se tricas coniecisset, unde nunquam se explicare tibi fas fuit, neque eam ægritudinem contraxisset, quæ omnem fere illi ex animo hilaritatem extraxit. Noram ego, illum non pueriles solum annos, & adolescentiam, sed bonam etiam virilis ætatis partem, in studiis literarum consumsisse; videram etiam sæpe, ab amicorum societate disjunctum, in aliquem solum locum, meditatum abire; offenderam aliquando, extra portam Flaminiam, vel Collinam, cum libro, & in attenda ejus, quod legisset, meditatione defixum: nulla erat illi, quod quidem animadverti posset, cum muliere aliqua familiaritas consuetudoque, nullus, nisi cum doctis ac literatis viris, usus & amicitia, nullus sermo nisi de literis; nusquam, cum se a studiis abstraxisset, ac paululum solitudinis fastidium cepisset, prodibat, nisi ubi de rebus, ad literarum studia pertinentibus, sermones conventusque haberentur; vestitus modestus, ac propius ad illum accedens, quo utuntur Ecclesiæ ministri. Sed, cum summe expectarent homines, vel, dum ad insigne aliquod sacerdotium eveheretur, vel etiam ad Episcopalis muneris fastigium ascenderet; ecce tibi, levius cujusdam rumusculi odore, ad amicorum, hominum sagacissimorum, nares affertur, Franciscum non in-scitam nec invenustam puellam sibi matrimonio junxisse, ut cum ea, vel in ea potius, inferioris arcana nature perscrutaretur. Quod, cum aliis novum, aliis mirum, aliis incredibile videretur, incendit studia quorundam, ut odore illo, tanquam leviter presso vestigio, vulpem prosequerentur, hoc est, ad ejus rei caput pervenirent. Sed inanem operam sumserunt: nam ita ille omnes, ad ejus notitiam rei, vias, sua suorumque taciturnitate, tan-

quam

quam frontibus ac virgultis, obstructas habuit, ut nemini liceret progredi longius. Paucis se in conspectum dabat; ire publica via, verecundabatur; percontantibus de ea re, alia omnia respondebat. Verum, cum jam pulcre uxori venter intumuisset, neque adhuc circuli illi essent inventi, qui, ut nunc sunt mores, mulierum ventres ambiendo, vestesque ab iis removendo, eorundem inflatus tumoresque celarent, cumque ad pariendum vicinæ esset obstetrix accersenda, nutrix, quæ illi, quod peperisset, mammam daret, inveniendæ, aliæque multa parandæ, quæ sint necessaria puerperæ; cum, inquam, instarent hæc omnia, se ex illis integumentis dissimulationis tandem evolvere, ac maritum est fateri coactus; ita tamen, ut prudentis in eo sibi displicentis animi signa aspiceres. Jam vero, cum in re familiari non ita ampla atque lauta esset, necesse habuit petere auxilium ab eo, cujus patrum, suis ipse carminibus in cælum extulerat: a quo donatus est facultate interpretandi, in Gymnasio Romano, morales Aristotelis libros; sed non ita magno cum stipendio. Quod munus, ut poterat, obeuntem vita defecit. Erat vir probus, mitis, modestus, fugitans litium, non pertinax, non iracundus, suavis amicis, nemini molestus. Et, quamvis in aliis liberalibus disciplinis ac præsertim in jure civili, non esset indoctus ac rudis, poetiæ tamen facultatis laude præstabat: ad quam, a natura, præsidii non minimum habuit; ut plura de eo, dispersa, nec in unum corpus collecta, monumenta loquuntur; illudque in primis carmen, quo Urbanum VIII Pont. Max. laudavit. Verum, ad id studium, de quo dicimus, velis, ut ajunt, remisque contenderat: ut autem in Græciam navigaret, atque, ab Aristotele aliisque magistris, Philosophiæ præceptis institueretur, ne a portu quidem navem solverat, nedum ut longo scopulosoque evectus mari, earum regionum fines attingeret. Sed cum, necessitate cogente, ad egestatis terminos se compelli sentiret, neque ab Apolline Musarumque choro quidquam, nisi delicias meras, quæ ventrem non implent, neque quidquam rem familiarem adjuvant, acciperet; coactus est, ejus domini, quem diximus, opem implorare, eique, supplicibus verbis ex-

po-

ponere, facile rebus suis egenis, ac propemodum perditis, subveniri posse, si locum aliquem ac numerum, inter portitorum aliorumque telonariorum ministros ac famulos, obtineret. Tantum non rogabat, ut bajulis describeretur, qui in portibus aliisque locis, ubi vestigal solvitur, ligandis, volvendis solvendisque sarcinis, suas operas locant. Cui ille, Invenisse me, inquit, arbitror, quem adinodum res tuas, dubias impeditasque, certissimas & expeditissimas reddi posse existimem, ac Philosophiam moralem, in Gymnasio Romano, auditoribus trade; hic enim locus, superioris magistri morte, relictus inanis ac vacuus, dignus est, quem, tua doctrina atque sapientia, impleas; teque stipendium, tuis æquum laboribus, consequetur. At Rogeris, Ludis me? ait; egone audeam eam artem alios docere, cujus ipse sum funditus expers ac rudis? Tace, inquit ille, inepte; abi, ac strenue in id studium incumbe; nam vix mensis intercedet, cum summus philosophus fies. Quid multis opus est? cogebat hominem præposterum fieri. Nam prius est discere, quam docere. Sed, ne a Francisco Rogerio longius declinet oratio; ille, quem tantopere pudebat uxoris, ut æri, si fieri potuisset, celatum esse vellet, connubium cœlibi vita potius sibi fuisse; simul ac masculam ex ea prolem accepit, quam suo seminio impertitus fuerat, ita repente omnibus lætitiis incessit, ut nulla eidem major voluptas esset, quam, infantem puerum in sinu gestare, osculari, quasi pompam, hac illac circumducere, Mathematicos adire, orare, mercede etiam operam illorum conducere, ut modum inspicerent, quo cælum affectum sideraque composita fuerant, cum puer primum spiritum duceret, ex eoque ejus fata canere non dubitarent, quem magnum virum fore, ingenuus parentibus in filios amor vaticinabatur.

XXXVI. LEPIDVS PICCOLO-
MINEVS.

DOcte eleganterque a non nemine dictum est, optimum cuiusque ingenium, fertilis agri similitudinem ac simulacrum habere. Nam, quemadmodum ager ille, si a cultoris industria non deseratur, multo plus reddit, quam acceperit; ita secundum hominis ingenium, si exquisiti cuiuspiam magistri diligentia accedat, qui liberalibus eum disciplinis atque artibus excolat, uberri- mos ex se fructus ac præstantissimos efferet. Quid mi- rum est igitur, si Lepidus Piccolouineus, Senensis, tan- tos in Jure civili progressus fecerit, cum in Fabii Benvo- gliensis, ea tempestate, legum antistitis, disciplina fuerit educatus? Huic summo, omnium confessione, magistro, simul ac ex grammaticorum ac rhetorum scholis excessit, præstantissimum ingenium suum, tan- quam agrum, prima illa puerili institutione novatum iteratumque, juris scientiæ seminibus quasi conferendum tradidit. Quæ semina, ingenii gremio excepta atque conclusa, celerius multo, quam in aliis soleant, sese ef- fuderunt; adeo ut, non subsequi, sed magistrum præire videretur. Sed, quod mirabile est, non tamen hæc semi- na, ut in præcocius ingeniiis sæpe contingit, exierunt in herbulas, quæ, spicas imitatz, ante messem flavescent, sed, penitus immixtis radicibus, in solidas ac perductas ad maturitatem fruges evaserunt. De hoc homine nar- rabat mihi Jo. Franciscus Fagnanus I. C. singularis & Congregationi Sac. Concilii Tridentini ab arcanis, cum Senis esset, eam a se in Lepido Piccolomineo vim doctri- næ animadversam esse, ut, pluribus audientibus, dixe- rit, eum, si Romam se contulisset, ob eximiam excel- lentemque Juris civilis scientiam, summum, in ejus au- læ advocatis, nomen habiturum, si vero ad capeffendam Remp. animum adjecisset, ob morum probitatem sua- vitatemque, & summam amplitudinem esse perventu- rum. Neque aliter res cecidit, atque opinatus fuerat. Nam cum jus civile in patria interpretaretur, intelligeret-
quo

que, theatrum illud angustius, quam suæ virtutes poscerent, esse, Romam venit; ubi ejus ingenium, in quadam causa, simul perspectum & probatum est, tum a vide expectatum, a viro principe, cui erat summa, in omnes Ecclesiasticæ ditionis magistratus, auctoritas & imperium a Gregorio XIII. Pont. Max. demandatum ac traditum. Sed eo, non ita multis annis interjectis, extincto, spes Lepidi omnes ad Jo. Baptistæ Cardinalis Castanæ domum, unde secundus status ostendebatur, vela dederunt. Delectabatur mirifice Cardinalis ille eruditione ejus atque doctrina, in eaque magnum sibi esse usum, & ad causarum cognitionem, & ad legum intelligentiam, experiebatur. Quarum ita ille legum capita ac numerum noverat, ut, si, cum una studiis operam darent, legis cujuspiam, sive in Pandectis sive in Codice Justiniano contineretur, inspiciendæ necessitas cogeret, ejusque inveniendæ causa Cardinalis ad indicis opem confugeret, vetaret ille: ac, Mane, agebat, mox ego hunc tibi laborem perquirendi faciam lucri: apertoque libro, continuo ea se illi in conspectum, quæ erat in quæstione, lex dabat. Sed ipsemet aliquanto post sensit, id ad se neque prudenter neque ex optimis moribus fieri, quod, contra sapientis præceptum, videri se vellet, plus quam dominum, sapere; erroremque correxit. Prospero ac flante ad voluntatem vento, ejus, quo cursum intenderat, navis ferebatur; cum alia Spiritus Sancti aura, ex adverso exoriens, quem cursum navis tenebat, mutare, ac in longe diversas regiones dirigere compulit. Nam, divino afflatus Spiritu, cepit ipsemet secum cogitare, ac diligenter expendere, levitatem, inconstantiam, vanitatem, earum rerum, ad quas omnibus, ut ajunt, velis remisque contenderet, utque sæpius plures dolendi, quam lætandi, causas afferant; contra, ea, unde iter averteret, quam essent certa, stabilia, nunquam fallentia, nullisque casibus obnoxia. Quæ cogitatio, cum ejus in animo acriter vehementerque pugnaret, fecit primum, animi ut incertus esset, ambitione, ac rei familiaris augendæ studio, an cogitationi illi obsequeretur magis, quæ aderat, instabat, urgebat; ut, tutiori navigio atque aura vectus, ad portum æternæ salutis conaretur appel-

lere. Sed vicit tandem cogitationis illius æquitas, ac salutis suæ ratio; ad quam, hoc tam infesto periculosoque mari ut navigaret, ex exigua putrique cymba in tutissimam munitissimamque, adversus prædonum impetus, Societatis Jesu navim se contulit. Sed nulla navis est tam magna, tamque munita, quam maritimi fluctus aggredi, ac prædonum classes oppugnare, non audeant, ut etiam ex propugnatoribus aliqui, undarum vi pulsī, dejiciantur in mare, vel, a prædonibus capti, in servitutem abripiantur. Quamobrem Lepido, in hac etiam navī, non semel periculum fuit, tum a fluctibus, tum a maritimis furibus; ab illis, ne, raptus atque obrutus, in profundum abstraheretur; ab his, ne, captus, æternis vinculis tenebrisque mandaretur. Primum, cum perlatum ad illum est, Cardinali Castanæ, a Patrum amplissimorum Senatu, Pontificatum Max. demandatum fuisse. Tum enim, sæva, illius in animo, tempestate, a spe, quam dimiserat, oborta, parum absuit, quin ab ea opprimeretur. Itaque a P. Claudio Aquaviva, tum Soc. Jesu Præposito generali, in beneficio & gratia petiit, ut paululum ab Urbe recedere, & dies aliquot Tusculi sibi esse liceret; quod vereretur, ne Romæ, multa audiendo videndoque, auribus atque oculis veteres honorum opumque cupiditates excitarentur, suumque ætioris vitæ propositum consiliumque despiceretur. Sed brevi, tam sæva tempestas, celeri Pontificis morte sedata est, & tranquillitas summa successit. Deinde, ab iracundiæ æstu se nonnihil abripi, & in portu turbari permisit. Unde ferme Societatem deseruisset; quantumvis in ea, ob excellentem doctrinam, fieret ab omnibus plurimi, & moralem Theologiam in ipsorum Gymnasio docendi munus accepisset, ac tum præsertim magno esset apud omnes in honore, quod, cum de Archiepiscopo Senensi in demortui locum subrogando ageretur, ipse a Ferdinando, magno Etruriæ Duce, in primis expeteretur. Sed a me, quem patria caritate complectebatur, rationibus victus, atque ad se reversus, sententia destitit, ac provinciam, sibi mandatam, laudabiliter, usque ad vitæ exitum, gessit. Quæ exitus, celerius illi multo, quam ætas posceret, contigit, (nondum enim ad quinquagesimum vitæ suæ annum

num pervenerat,) ob inexplebilem discendi cupiditatem; cum nullum sibi tempus, a literarum studiis vacuum, daret.

XXXVII. FABIVS SERGARDIVS.

Quamvis natura comparatum sit, ut, ex infinita pene hominum multitudine, alius aliam rem, in qua se exerceat, occupet, ad eamque animum & cogitationem suam adjungat, nimirum hic ad litterarum, ille ad militaris vitæ studia se conferat, hic in mercatura, ille in agrorum cultione se vortat, alii in rerum naturalium causis exquirendis, alii in corporibus curandis, totos se collocent; denique, prout varia sunt hominum ingenia, unusquisque in eo elaboret, ad quod majora se a natura adjumenta habere intelligit; nam pessime cum hominum genere actum esset, si unum omnes æque studerent, & reliquarum rerum voluntates & curas abjicerent: quamvis, inquam, hæc ita sint ut dicimus, nec mirum videri debeat, si unus in una re magis, quam in altera, toto pectore atque omnibus nervis incumbat; tamen in Fabio Sergardio, Curtii Senensis filio, non levis iis, qui eum noverint, quærendi cura injicitur, quid sit, cur Roma, orbis terrarum arce, relicta, in qua natus, altus, doctus educatusque fuerat, Senas se contulerit, ibique ætatem agere, ingenii sui vires expromere, ac vitam finire statuerit. Erat in homine ingenium, ad omnia summa natum, Juris civilis scientia, multæque præterea literæ, generis claritas, cum omnibus fere nobilitatis Romanæ familiis arcta cognationis affinitatisque necessitas: nam parens sua, Martia, ex vetere nobilique Rusticorum genere originem duxerat; quod, aliquot ante annos, quæ est rerum omnium humanarum conditio, ut omne, quod ortum sit, mortalitas consequatur, una cum Francisco Rustico, ultimo ejus familiæ, prorsus extinctum, evanuit. Quamobrem, tot auxiliis sublevatus, poterat, per gradus magistratuum ascendens, ad honores maximos pervenire; quorum honorum cupiditas,

prope innumeros, ex omnibus orbis terræ partibus, Romam semper attraxit, qui, nulla extrinsecus ope adiuti, suopte ingenio perquam latos sibi, amplissimos ad honores, aditus aperuerunt: & tamen voluit in eorum numero esse, quos quidam, in somnis laborare, dixit; cujusmodi sunt ii, qui honores in municipiis quærunt. Naut, & Senis, publice in Gymnasio, Etruscæ eloquentiæ præcepta tradidit; tum, vicarius Archiepiscopi illius partes gessit; quod munus administrantem, vita desecit. Marcello Vestrio Barbiano vita functo, qui Fabii materteram in matrimonio habuerat, quique Gregorio XIV, Clementi VIII, & Paulo V, summis Pontificibus, a brevibus fuerat, legi schedulam illius manu scriptam, ubi, tanquam si jam Cardinalis factus esset, (quod & fieri potuisset,) totam familiam descripserat, quibusque illi libitum fuerat, singula ejus munera distribuerat; ac Fabio epistolas Italice, mihi Latine scribendi partes assignabat; quo consilio, nescio. Sed mors omnes illius rationes subvertit. Nam, & Cardinalatum illi intercepit, & duorum labori hominum, mei Latinas, Fabii Italicas epistolas exarandi, pepercit.

XXXVIII. HIERONYMUS LAMPUGNANUS.

QUOD in ore vulgi & in communibus proverbiiis prope versatur, ex omnibus præstantissimis artibus, quibus optima hominum ingenia studium suum atque operam tribuunt, Juris scientiam in primis esse frugiferam ac fructuosam, præter multos, quos, ex nulla vel tenui re, quotidie, ab hujus artis studio, ad maximas divitias pervenisse videmus, ostendit Hieronymus Lampugnani Mediolanensis, Subdiaconi Apostolicus: qui, ubi primum ad Philosophiæ ac Theologiæ studia operam suam contulerat, atque etiam eas aliis doctrinas publice tradendi facultatem acceperat, cum, nullum ex iis fructum utilitatemque se percepisse, animadverteret, nisi ut in scholis, aut in publicis disputationibus, garriret, iis omissis, se ad juris prudentiam transtulit. Qua
pla-

plane percepta, ejus interpretandæ docendæque potestatem adeptus; unde sperabat, labores, quos in ea, tanquam in sæcundo ac fertili solo, quasi semina collocasset, magno sibi cum sænore proventuros. Quæ spes ne ipsum falleret, sed quam celerrime ex sententia procederet, noluit expectare, dum, a litigantibus, de jure consuleretur; quod, nisi post longum tempus, non solet accidere; neque voluit apud minores magistratus, hac illac concursando, pro reis causam dicere, quod laboris habet multum, utilitatis parum; sed, magis compendiarium ad pecuniam faciendam via, statuit, domi ociose adolescentibus, qui ad studium juris prudentiæ ingrederentur, facilem ad illud aditum aperire; atque Justinianas juris civilis Institutiones, mercede, interpretari. Verum, ut se doctorem ac magistrum, ex hominum, qui illum non nossent, ignoratione, tanquam integumentis, evolutum, ostenderet, dedit operam, ut in Gymnasio Romano jus civile gratis interpretaretur. Quod illi non fuit difficile impetrare. Et, quo, studio majore, auditores, suas ad scholas, tanquam, ad mercatum juris prudentiæ, concurrerent, edictis propositis populum admonuit, se tali die initium docendi facturum; omnesque præterea, quotquot noverat, invitavit; ac me quoque, gratiæ scilicet causa, secum adduxit. Sed repente, tantus hominum concursus factus est, tam magni clamores editi, ut, nisi turba opprimi vellem, nisi exhibilantium vocibus obtundi, necesse mihi fuerit, ex illa concione, in quam me immiseram, tanquam ex aliquo jactato adversis tempestatibus mari, emergere, meque in Ædem D. Jacobi proximam, quasi in portum, recipere. Non cessavit deinde, statis ad docendum diebus, scholas habere; ad quas accedebant adolescentes plures, ejus disciplinæ studiosi, tum ab amicis, tum a Patribus Soc. Jesu missi; a quibus domum, honoris gratia, reducebatur, & in via interrogabatur de iis, quæ in schola tradiderat; quæque minus ipsi intellexerant, explicando docendoque faciebat illis satis. At, ubi sensit, se in possessione docendi constitisse, inane illam publice jus civile tradendi operam laboremque contempsit, cœpitque domi, mercede, docere. Ac

mirum dictu est, quam multi adolescentes, nobiles ac divites, brevi ad illum tempore in disciplinam convenirent; quod id studium necessarium sit iis, qui forum, aulam, & honores meditantur. Auxit etiam opes parsimonia; quæ admirabilis in eo fuisse narratur: auxit contubernii magisterium; nam contubernaless domi plures alebat, sed ad mercedis, quam ab ipsis capiebat, rationem, quæ erat magna, satis parce ac tenuiter; adeo ut, quod Sabbato piscium, vel die Jovis carniū, supererat, aceto, aliisque condimentis, a putredinis injuria tuebatur, ac suo deinde tempore, convictoribus suis, tanquam delicatum aliquod edulium anteponebat. Et, cum, die Jovis, puls quædam panis obtriti, ex jure, esset allata, eamque omnes repudiassent, quæsit, Quidnam ea igitur fiet? cui, non irridicule, respondit unus, Quid rogas? condiatur, ut proximo die Dominico, pransoribus in prandium proferatur. Pecuniam autem, quam cogebat, non sinebat, in arca inclusam, apud se operam perdere, sed usura centesima locabat. Sed, quia sæpenumero fit, vel, ut debitorum improbitate, qui per dolūm assimulant, se decoxisse, vel morte eorum, quorum vitæ periculo pecuniæ sænori dantur, fors & sænus una depereat; contigit, ut noti cujusdam decoctoris fuga, una cum multis, hoc eodem calamitatis jure comprehensus sit, & millia aliquot aureorum amiserit. Quæ jactura tantam ægritudinis vim in eum invexit, ut, ab eadem de mentis statu dejectus, menses aliquot helleboro curandus fuerit. Atque ad hanc eandem ægritudinem non minimum contulit, consilium, quo, paucis ante diebus, schola contubernioque dimisso, se in Trivultii Cardinalis ac Principis aulam dederat, ut esset illi a cognitionibus. Intelligebat enim, ingenti illo lucro, quod ex utraque re percipiebat, se esse privatum. Sed paulo post correxit, quod præviderat minus. Nam, aula valere iussa, rursus ad eas artes, a quibus discesserat, sese recepit, in eisque, usque ad ultimum vitæ spiritum, permansit. Quo tempore, cum congregationis nostræ Sodales, in quibus ille una erat, plures coissemus, ut in vinea quadam essemus de symbolis, jamque alacriter prandium iniissemus, P. Franciscus Carettonius, qui tum So-

Sodalitati præerat, nescio quid, per jocum, dixit; quod ille, secus ac prolatum fuerat, accipiens, vix se continuit, ut postea mihi ipse narravit, quin cultrum, quem habebat in manibus, ejus pectori infingeret. Unde licuit mihi colligere, quantum periculi sit, ei, cui parum mens constet, se committere. Vix ex eo morbo, quo fuerat correptus, convaluerat, cum sum donatus ab eo, uno ejus libri, quem ediderat, exemplo; qui liber hoc titulo erat inscriptus: *Hieronymi Lampugnani I.V. Philosophia, ac sacra Theologia Doctoris, compendium introductionis ad Justinianæ Institutiones, de ratione studendi in utroque Jure.* Cum denique, anni cl^o Is CXLIV hyemis sævitia, quæ multos mortales afflixit, quæque senibus solet esse incommoda maxime, magna cum pituitæ oppressum vis sustulit. Societatem Jesu, præcipua quadam caritate, complexus est; sicut & vivus multis ipse rebus ostendit, & in morte sua, testamento, declaravit. Nam domum professam Societatis ejusdem, quæ Romæ est, reliquit hæredem ex asse.

XXXIX. GERARDUS VOS- SIUS.

SI dignus est quispiam, cui omnes ad Christi judicis misericordiam aditus intercludantur, eo quod vitam, ex virtute majorumque institutis, non exegerit; profecto is ego sum, cui ad domesticam disciplinam accessit etiam institutio, atque exemplum, optimi doctissimi-que viri, Gerardi Vossii; qui ob vicinitatem Xenodochii Teutonicorum, quod erat prope ab meis ædibus, me puerum, quotidie templum ejus nationis frequentantem, patria pene caritate complexus est, & a cohortationibus suis nunquam deseruit. Atque, si recte memini, id illi cum parentibus meis, quibus maxime erat cordi, conveniebat, ut summa daretur opera, quo in officio continerer, perficereturque, ut, ne primoribus quidem labris, gustarem genus vitæ liberioris, & extremis, ut dicitur, digitis attingerem, quod difficile esset ei, qui semel paruerit voluptatibus, ab earum se imperio in

libertatem vindicare, atque animum ad virtutem adungere. Itaque, cum ea mihi semper probitas, integritas, pietas, sapientia, ante oculos esset, cum ejus frequenter præceptis instituerer atque formarer, mea culpa fuit, si nihil profecerim, si nihil ex ea indole hauserim. Verum, atque animus ephebis ætate exiit, ac diligenter in ejus vitæ ac mores inspicerem, cæpi egomet mecum cogitare, quid esset causæ, cur illi, qui semper fuisset exemplum probitatis, innocentie, virtutumque omnium, qui omnium divinarum humanarumque rerum scientia ita præstaret, ut neminem sui ævi metueret, cum ita Græce loqueretur, ut ejus oratio Athenas ipsas olere videretur, ita tamen fortuna esset usus adversa, ut nunquam ex eo statu, in quo a fortuna collocatus esset, potuisset emergere, ac procedere opibus & honoribus longius; cum tam multi, nullis virtutibus præditi, nullis doctrinarum præditiis muniti, nulla innocentie fiducia fulti, contra, summa turpitudine obliti, ad honores & imperia niterentur. Sed nihil mihi veniebat in mentem, nisi, divino consilio id fieri, ne assuescerent homines, ob res fluxas atque caducas, quas sibi viderent cum improbis esse communes, virtuti operam dare, camque divitiarum & honorum pedissequam facere. Quæ virtus, ut sapienter M. Antonius orator apud Tullium inquit, & semper & sola libera est, quæque etiam, si corpora capta sint armis, aut constricta vinculis, tamen suum jus, atque omnium rerum impunitam libertatem, retinet. Magna semper fuit, apud homines doctos, existimatione atque honore; multos S. R. E. Cardinales, literatos viros ac probos, ætissima habuit familiaritate conjunctos; sed Card. Sirleto in primis usus est familiarissime. Fuit etiam summis Pont. ac Gregorio XIII præ ceteris, eximie carus, denique bonis omnibus acceptissimus; qui, ejus morte, damnum Romanas ac Græcas literas fecisse, testati sunt. Plura ex Græcis Patribus in Latium sermonem convertit, atque inter cetera S. Jo. Chrysostomi orationem encomiasticam in principes Apostolorum, Petrum & Paulum; quam etiam doctissimis commentariis illustravit: quos commentarios elegantissima, ad Urbem Romam, apostrophe, peroravit atque conclusit.

Me-

Mementum etiam, in iis, Cardinalis Sirleti, cui divinam rerum lectarum memoriam, & cujusvis generis antiquorum librorum notitiam, tribuit. Per Voslium etiam S. Ephraem Syrum, Latine loquentem, legimus.

XL. LÆLIUS GUIDICCIONVS.

Magnum ingenium, quo natura, rerum omnium parens, Lælium Guidiccionum, patricium Lucensem, donavit, non ille incultum desertumque reliquit, sed, statim ab ineunte ætate, optimarum artium studiis, omnique liberali, & digna homine nobili, doctrina, excoluit. Sed, cum virtutis & ingenii vis tanta, in Reip. multis maximisque provinciis administrandis, florere deberet, quemadmodum olim duo illa, non Luce solum, sed orbis etiam terræ lumina, Bartholomæus & Joannes, fecerant; caruit omnino muneribus publicis, sive temporum injuria, sive aulae vitio; quæ sæpenumero, in mandandis honoribus, bonis prætermisiss, eorum præmia indignis desert; sive animi illius judicio, ut, remotus a studiis ambitionis, otium & tranquillitatem vitæ sequeretur. Quæ res eo admirabilior videri debet, quod ea indoles ac materies, in ipso ætatis flore, in eam domum incideret, e qua fere nunquam Paulus V, in eligendis summis magistratibus, exibat, tanquam si, quidquid esset, in toto orbe terrarum, gravitatis, sapientiæ, ac vitæ splendoris, in ea domo contineretur: incidit, inquam, in aulam Scipionis Card. Burgheffi; ex qua, cum nihil Lælius reportasset, tanta tamen fuit in homine gravitas, tanta animi constantia, tanta virtus, quæ nullam sibi propriæ utilitatis rationem, sed solum honestum, propositum esse ostenderet, ut, cum, Pauli V morte, omnes Cardinalem amici, omnes noti, omnes fere familiares, ut sit, deseruissent, solus ille unicuique amoris, observantiæ, ac pietatis exemplum, in fide permaneret, neque ulla vi alia, nisi Cardinalis ejusdem morte, se passus sit, ab eo divelli. Erat ingenio admirabili, eloquentia summa, & in persequendis, tum suo tum alieno nomine, officiis, accuratissimus diligentissimusque. Verum eum anno cld l. CXXX, magnus Etruriæ Dux, una cum

Jo. Carolo fratre, Romam, pietatis ac religionis ergo, venisset, ac magnificentissimam eam villam, quam Cardinalis extra portam Salariam extruxerat, invisurus esset, missus est illuc Lælius, ut Principes illos, plena eloquentiæ atque observantiæ oratione, exciperet, eisque signa ac tabulas pictas, quibus ea villa referta est, & artificum nomina, demonstraret. Sed vir, ita ingeniosus, ita eloquens, ad solum Principum illorum aspectum, obstupuit, obmutuit, nec verbum ullum, ineptum saltem, proloqui potuit; ac, nisi magnus Dux, qui eum exanimatum videbat, prior loqui occupasset, perpetuo, in eo stupore & taciturnitate, hæsisset. Sed vix id illi mors vinculum, unde nunquam exiit voluerat, rupit, cum nova conjunctio novusque nexus exoritur. Nam arcta cum sibi familiaritate copulavit atque constrinxit Antonius Cardinalis Barberinus, Urbani VIII fratris filius; qui eum postea insigni sacerdotio, quod Canonicatum vocant, in Æde Deiparæ Virginis majori, aliisque officiis beneficiisque, decoravit. Neque se domo & familiaritate illa indignum præstitit: neque Cardinalis, in eo exornando, se operam perdidisse cognovit; nam magnum illud Lælii volumen, quod eruditorum manibus teritur, Rhythmorum, aliorumque operum, tum soluta oratione, tum versibus, multorum ab eo annorum labore & industria elaboratum atque perfectum, suo inscriptum nomini, in lucem emissum, aspexit. Quod suum nomen, libro illi commendatum ac traditum, minus quam si in aliquo ære vel marmore insculptum esset, imbrum vim, tempestatum impetus, temporis injuriam, pertimescet, neque alio casu, nisi communi orbis terræ ruina, in interitum ruet. Sed, cum Philosophiæ, Theologiæ, omnique elegantium literarum studio, deditus fuit, tum majore a natura studio est ad poëticæ facultatis gloriam abstractus; ad quam, mira etiam adjumenta, ab eadem natura, a qua impellebatur, obtinuit. Fuit poëta, elatus, sublimis, gravis; quique admirabilem etiam suavitatem haberet adjunctam. Quæ duo, pene inter se diversa, ita in eo copulabantur, ut neque gravitas suavitatem minueretur, neque suavitas, orationis sublimitate, excluderetur. Omnibus Latinis poë-

poëtis longe Virgiliū anteponebat, summis in cœlum laudibus efferebat, & a calumniis hominum vindicabat. Cujus etiam *Æneidos* sex libros in Etruscum sermonem convertit, nec convertit ut interpres, sed ut poëta, sententiis iisdem, & earum formis, tanquam figuris. Poësin etiam Latinam attigit; nec in eade ipso inventus est minor. Nam scripsit elegantissime, ut apparet ex iis, quæ ab eodem scripta circumferuntur. Sed mihi videtur, in epigrammatibus, lepide, breviter, arguteque concludendis, multis, qui in hoc genere carminis elaborarunt, præstitisse. Legi ego, in Theatro Eleonoræ Baronæ, cantrixis exiunt, in quo omnes hic Romæ, quotquot ingenio & poëticæ facultatis laude præstant, carminibus, tum Etruscæ tum Latine scriptis, singulari ac prope divino mulieris illius canendi artificio tanquam faustos quosdam clamores & planus edunt; legi, inquam, unum Lælii epigramma, ita purum, ita elegans, ita argutum, ita venustum, prope ut dixerim, nihil me vidisse, in eo genere, elegantius neque politius. Incredibili tabularum studio & cupiditate flagrabat; adeo ut, in illis comparandis, nulli neque labori neque sumtui parceret; ex iisque insignem domi suæ Pinacothecam instruxerat, in quam, summa ambitione, omnes, sive cives sive hospites, introducebat; ipse erat uniuscujusque demonstrator, ipse laudator, ipse memoria, omnium eorum artificum nomina repetens, quorum eas manu depictas aiebat; atque, has Michaëli Angelo Bonarotæ, has Raphaëli Sancio Urbinati, has Perino Vago, aliisque, qui longe omnibus, pingendi arte, præstiterunt, tribuebat. In quo, ut insignem quendam pictorem dicere audiui, qui sæpius eas attente consideraverat, mire se decipiebat, vel ab aliis, qui eas illi carissime divenditas obtruserant, deceptus, errabat. Quo in errore, usque ad extremum vitæ, permansit. Nam unam quandam ex eis tabulam, quam Raphaëlis esse aiebat, Basilicæ Vaticanæ legavit, quæ, ad sepulcrum Urbani VIII, Pont. Max. affixa, conspiceretur: quam cum locus non admitteret, Canonici in sacratio, aurata inclusam theca, collocarunt. Omnem propemodum aurum usum amiserat, quod pituita, a capite defluens, omnes pene obstructos ad eas aditus ha-

be-

bebat. Celeri, ac repentina prope, morte deperiit, ob magnam vim sanguinis, quam pridie, vel biduum ante, sibi mittendam curaverat. Plures B. V. Ædes, heredes testamento reliquit.

XLI.

BALDUINUS DE
MONTE.

IN hoc, naturam inter & fortunam, ut usitato hominum more loquar, certamen fuisse videtur; illa ut, quibuscunque eum posset bonis, ornaret; hæc ut ludos eum faceret, vel tanquam pilam potius haberet, ac miseris modis, quancumque vellet in partem, impelleret. Ac primum, ad naturæ dona quod attinet; natus est Urbe veteri, summo genere, ex Simoncella nimirum familia, in primis honesta & clara; nam in eam, De Monte, adoptione pervenerat. Forma fuit egregia, ut omnes inter se corporis partes, cum quodam lepore, consentirent. Ingenium habuit, ad omnes res aptum; tum ad pacis, tum ad belli artes mirifice factus. Etenim a Ferdinando, magno Etruriæ Duce, ut ille apud Homerum Phoenix a Peleo patre Achilli juveni, datus est Francisco filio, qui Cardinalis futurus fuerat, & bene faciendi & recte dicendi magister: ac multos post annos, a Ludovico Cardinali, fratris Zagarolæ Ducis, lateri custos est additus, ut ejus adolescentiam, optimis moribus ac disciplinis instrueret. Verum, ob singularem dicendi suavitatem & copiam, qua præstabat, ab eodem Ferdinando, magno Duce Etruriæ, tanquam adminiculum quoddam, datus est Marchioni Maximiliano Conzagræ, quem, ad Mathiam Cæsarem, oratorem mittebat, ea conditione, ut, si ille, quod mandatum fuerat, minus exequi potuisset, ipse continuo, ejus vicarius, muneri succederet, atque omnia oratoris officia persequeretur. Aliisque deinceps temporibus, ab illis magnis Ducibus, ob egregiam excellentemque, omnium politissimarum elegantissimarumque artium scientiam, honorifice est in ipsorum aula habitus. Quorum Principum beneficentia, vacui ac liberi temporis multum adeptus, plura, tum soluta oratione, tum versibus, elegantissime dulcissimeque scripta,
ad

ad communem attulit fructum, atque, ad immortalem sui nominis famam, in aspectum luceinque omnibus protulit. In quibus liber ille numeratur, in quo optiui præstantissimique Autistitis forma & character exprimitur. Admatus est etiam plurimum a Carolo, Mantuæ ac Montisferrati Duce, ob easdem corporis animique dotes; & ab eodem sæpius Romam, cum mandatis, missus ad Urbanum VIII Pont. Max. quicum, ob excellentiam ingenii, ac frequentes de literarum studiis sermones, etiam tum Cardinali, magnum illi usum amicitiamque intercessisse, non ignorabat. Neque prætermisit Urbanus, veteris consuetudinis memor, ac suavisissimis illius sermonibus illectus, cum invitare, ut vellet apud se esse. Atque utinam induxisset animum, Pontificis amicissimi invitationibus acquiescere. Non enim, in eam fraudem delapsus esset, unde famæ vitæque suæ exitium ac pestem invenit. Formæ autem bono, quo nil fragilius, neque inanius, mulieres plures in sui amorem attraxit; nec minus ipse multas auavit: in quarum amore quam multa odiose, jocosæ, ac juveniliter fecerit, referremus, nisi ad majora ac potiora festinaret oratio. Sed nullo modo consilium est, præterire facinus quoddam ex amore ab illo inchoatum in ea urbe, ubi tum ætatem degebat, & ab altero, qui ipsi in amore successerat, absolutum atque perfectum. Amare occeperat, contra jus fasque, virginem, Deo sacram; a quo non solum nos manus, verum etiam oculos, abstinentes habere, jura omnia clamant. Sed erat forma & vultu, adeo eleganti, adeo venusto, ut lapides etiam posset, ut se amarent, adigere. Erat enim ab unguiculis ad capillum summum festivissima; ac, suæ sibi pulcritudinis conscia, non eam contemnebat, sed, artis auxiliis convocatis, augere studebat. Nam, paucis illis capillis, qui ex temporibus pendebant, cosmoticis medicamentis, aureum colorem inducebat, calamistro cincinnulos addebat, in aures, armillas, auribus brachiisque gestabat, torques, ex baccis rotundioribus factos, & ad pectus usque defluentes, collo commendabat: quæ omnia, virtute formæ eveniebat, ut quam maxime illam decerent: præterea, citharizare & cantare ad chordarum sonum, doctissima, iis, qui non satis parati,

ti, ad cavendum fuissent, omnem virtutis modum deturbabat ex animis. Quamquam Balduinus, ut postea declaravit eventus, non tam eam libidinis, quam honoris gratia (erat enim nobili genere nata,) amaret & cole-ret. Nam, cum ejus ad aures pervenisset, Gregorium XV, qui tunc Pontificatum max. gerebat, Cardinalis Ludovisii fratris filii opera, Romæ, Vaticanam Academiam instituisse, in qua, præcæra totius Italiæ ingenia se ex-ercerent, magnam sibi ingenii ostendendi, & eruditio-nis declarandæ, occasionem esse oblatam existimans, a-morem ambitioni gloriæque posthabuit, ac Romam iter adornavit; sed, discedens, amores amico cuidam suos commendavit, eidemque mandavit, ut illis, si quid ab ipso opus esset, suppeditaret, nec ulla in re deesset: tum, valere virginem jubens, Hunc tibi amicum meum, inquit, pro me, tantisper dum absum, substitui, qui om-nibus in rebus præsto erit; eo igitur, tanquam me, utere; ejus enim operam tibi maxime ex usu esse repe-ries. At ille primo, amici rem mandatam gerere, nun-quam fere, nisi re necessaria coactus, ad illam accedere, fines mandati non egredi; tum, paulatim ejus forma im-pulsi, ejusque amore, supra quam dici potest, incen-sus, (utpote qui sibi magis esset, quam Balduino, ami-cus,) suum agere negotium cepit, atque blandiciis, muneribus, & formæ, qua præstabat, bono, intimum se apud eam virginem fecit, & causatus voculæ suavitatem, & mirificam canendi illius artem; ab ejusdem ad-spectu colloquioque, quo suos illi amores, lacrimans, titubanti animo & pectore, eloquebatur, pedem nus-quam referebat. Sed admonitus, atque etiam prohibitus, ne illuc accederet, adeo admonitionibus & objurgatio-nibus illis non est deterritus, neque cohibitus, ut, majori amoris impetu percitus, insidiis, auroque, cui non pot-est obfisti, claustra illa pudoris pudicitæque perfrege-rit, & ad intimum virginis cubile pervenerit. Quæ vir-go, quia non nollit facere cum eo mutuum, a quo tan-topere se diligi & amari sentiebat, quasi alterum Lean-drum, infesto periculosoque jactatum mari, suum in complexum, tanquam in portum, iis manibus excepit, in quibus natura, quid efficere posset, videbatur experta: omnes

omnes enim in eas numeros pulcritudinis elegantique contulerat. Sed novus hic Leander, inventus est superiore aliquanto felicior. Nam ille, inanis ac siccus, tumentibus est maris fluctibus obrutus; hic autem, expletus saturatusque deliciis, adversæ fortunæ faucibus absorptus, suam secum Heroen eandem in perniciem attraxit. Etenim virginis alterius, quæ cum illa de forma certabat, indicio, manifesto in flagitio deprehensi, ille altissimam in turrim compactus, hæc angustis unitis domus anguli sinibus conclusa, audaciæ temeritatisque pœnas dederunt; nec diutius, post id facinus admissum, vixerunt, sed brevi, tenebris & loci squalori, uterque in morbum implicitus, decessit. Sed redeo ad Balduinum, a quo paululum ine turpe amici sui factum abduxerat; cui, ad cetera bona, a natura tributa, militaris etiam animus, & periculis omnibus superior, accesserat. Quod magnus Etruriæ Dux animadvertens, in rostratam eum navim, quam Prosperam vocabat, imposuit, ut bellum cum piratis gereret. Et Carolus, Dux Mantuæ, majoribus eum navigiis præfecerat, quæ contra hostem paraverat; quod in homine virtutem, & industriam magnam, videbat. Jam vero quod secundo loco proposuimus, quantum in eo augendo ornandoque natura laboraverat, tantundem in eodem deprimendo spoliandoque, suas fere omnes fortuna vires exercuit. Primum, perpetuo fuit pauper; quamquam ipse non minimam in partem ejus culpæ venerat, quod homo voluptati obsequens fuerat, & qui sic sunt, rei familiari haud parcunt, sed eam profundunt. Tum, cum ea navis, quæ Prospera nomine, sed quæ multas in ipsum calamitates inxerat, in hostium potestatem devenisset, ab inhumanissimis illis prædonibus, multo quam alii, qui eodem calamitatis jure comprehensi sunt, acerbius & inimitius est habitus. Nam, & ad reum, hoc est, ad Acheruntem, damnatus, quod nullus locus æque sit Acheruns, atque triremus, & nauticum in cœnam & in prandium panem, qui duritia lapidem silicem vinceret, accipiebat: ad hæc, quingenis singulos dies, pro jentaculo, & totidem pro merenda, plagis afficiebatur. Atque, ad panis duritiem, quo vescabatur, probandam, tanquam testes, duo in ore loca, dentibus va-

eua adhibebat, quos, in eo pane rodendo, reliquerat: cum ad demonstrandum, quo verberum sævitia processisset, proferebat, modo ventrem & scapulas, vibicibus varias, modo aperiebat latera, funibus perusta; modo obiciebat crura, compedum signis impressa. Quo tandem ex Orco reducenti eum fecit magni Ducis Etruriæ misericordia atque benignitas: qui princeps vir, persoluto pretio, expeditum illum e servitute, ac, liberum rursus, domo sua excepit. Sed iterum fortuna, acrius quam antea defæviens, vim in eum suam exercuit. Nam, non solum vitam, verum etiam famam & existimationem est conata eripere. Cum enim, domi suæ, cædes facta esset, ac notus caufidicus, Gregorio XV, tum Pontifici, amicus, interfectus, idque formosissimi adolescentis, & alterius sicarii, opera perfectum, quibus fuerat argentum ob id repensum; insinulatus est etiam ejusdem facinoris ille; tum, quia dicebatur, in partem argenti venisse; tum etiam, quia constabat, eum iis, qui interfecti corpus in cloacam quandam Urbis detulerant, cereum illuxisse. Quamobrem, conjectus in vincula, nemini dubium est, quin pœnas, una cum aliis duobus, dedisset, nisi, Scipionis Cobellutii Cardinalis S. Susannæ, qui tum plurimum poterat, auctoritas, ex suspitionis illius flamma ereptum, incolumem præstitisset; quod indignum putaret, tantam vim ingenii, turpi judicio labefactari, & funesta carnificis manu deleri. At, quanto rectius æternæ illius saluti consultum ab eo fuisset, si rem legibus judicari passus esset! non enim ille, omnibus rebus imparatus, (ut tum sibi accidit, cum ferro erepta vita est,) sed Christianis sacris munitus, quamvis turpi morte affectus, supremo judici Deo, in quo sunt omnia, salvus & incolumis extitisset. Cum igitur illud vite fortunarumque omnium naufragium, quod adversa illi fortuna molita fuerat, effugisset; in domum Ludovici Principis, etiam tum pueri, secunda Cobellutii vectus est aura, ut eum, non solum morum, verum etiam animi ac virtutis magister, ad omnes præclaras ac dignas homine nobili disciplinas percipiendas, impelleret, instrueret, cogeret. At, nec ibi quoque a fortunæ, quæ ad ejus perniciem excubabat, insidiis fuit immunis. Nam

Bono-

Bononiz, cum, nocte quadam, domo Principis egredi cuperet, ac janitor fores, quæ suæ custodiæ ac fidei erant commissæ, recusaret aperire, res primum ad verborum contentionem, tum ad pugnos venit; in quo certamine janitor, ad pulsandum verberandumque robustior, plusquam quingentos illi colaphos infregit, ac totum os contudit. Sed ita male pugnis acceptus, non dubitavit, postridie mane, in proœtonem venire, ac liventes pugnis oculos, ac colaphis tuber totum caput, asferre. Sed, quisnam, nisi sit sapiens, fortunæ, quam iratam habeat, vim possit effugere? Sapientem eum appello, qui totam speciem sui in se positam habeat, qui nihil a rebus externis, nihil ex errore imperitiæ multitudinis, pendeat. A cujus dignitate cum longe Balduinus abesset, quid mirum, si illa, quæ, a multis & imperitis, rerum mortalium domina ac regina appellatur, suam in eum vim & potestatem exercuerit, ac rationem invenerit, qua eum, ut antea conata fuerat, vita famaue devolveret? Ratio autem fuit ejusmodi. Germanorum copiarum, Cæsaris nomine, in Italiam transierant, ac Mantuam oppugnaverant. Cumque Dux sibi non deesset, sed omnia, ad bellum necessaria, parasset, imperaverat Balduino, quem ab eo ratibus præpositum fuisse, antea narravimus, ut, certo quodam in loco Padi fluminis, aggeres perfringeret, atque latum aquis, ad exeundum, aditum aperiret: ita enim fore, vel, ut hostes de spe oppidi potiundi deciderent, vel, si pericula præliorum audacius iniire ac persequi vellent, ab aquis circumventi atque intercepti perirent. Qui, cum imperata facere neglexisset, ac propterea Mantua in potestatem hostium venisset, aspergebatur infamia, quod, corruptus ab illis, malitiose Ducis imperia exequi noluiisset. Quamobrem, cum, bello confecto, & rebus cum Cæsare compositis, Dux Mantuam recuperasset, ille, sive facinoris conscientia deterritus, sive dubios judiciorum exitus pertimescens, si, hoc crimine, ab adversariis in contentionem compelleretur, Venetias demigravit. Sed tandem, Urbis desiderio captus incensusque, quod ab Urbano Pontifice, a quo fuerat invitatus, multa speraret, in viam se dedit. Sed, per Mantuanæ ditionis fines iter faciens, a Mantuanis mili-

tibus, qui erant in insidiis collocati, interceptus, sive verè sive falso confecti criminis, pœnas dedit. Nam ad ejus ratis, in qua vectus fuerat, spondam appulsus, jussus est collum præbere. Quo factò, caput illi præcisum est, & Mantuam missum. At fortuna victrix, & calamitosi hominis infortunio læta, Io triumphæ, canens, ad subvertendos alios, æque sibi invisos, excessit.

XLII. ARCHITA EPISTAMENUS.

Quonam fato fieri dicam, ut tam iniquo jure, literarum studia sint, nescio: quæ cum, ob insignem illorum præstantiam excellentiamque, cariora ac gratiosiora, quam cetera omnia, esse deberent, ita tamen eorum æstimatione, fere apud omnes, concidit, ut vix præcium inveniant. Quod si quis fortasse summus in aliqua maximarum rerum scientia, a viro quopiam principe, ambitionis aut popularis auræ causa, tecto excipiat, non ille honestius aut nitidius in victu habetur interdum, quam mediastinus quivis, vel qui latrinam illi ac matulam lavat. Cum contra eunuchis, quos, concinatos ac meretricularum in morem comotos, ad excitandum voculæ suavitatem, lascivissimisque cantiunculis, dormientem languentemque libidinem, habet, vel conviviorum magistris, altisque novarum gutturis ac ventris voluptatum architectis, nummos modio metiatur, ac Liberi florem, & unctiuscula obsonia, quotidie in prandium ac cœnam affatim præbeat. Atque esset optandum, ut doctrinis expoliti homines, eodem apud istos, quos vulgus beatos appellat, honoris atque existimationis loco ac numero essent, quo ii, qui equos ipsis alunt, ac strigilibus stringunt ac poliunt. Nam isti sæpius a dominis accersuntur, in colloquium evocantur, rogantur, num in stabulo salvæ res sint, ut valeant equi, quos ingentibus mercati sunt preciiis, ut pingues, ut nitidi sint. At miseri illi, tanquam si eos, qui devorat omnia, Orcus exforbuerit, evulsi ab illorum memoria, jacent, nunquam ad colloquium, nunquam ad rem aliquam, nisi necessitas cogat, admittuntur. Verum, id fortasse, (quod nemo tamen vir cordatus ac prudens dederit,) sed

sed id, inquam, ferendum videretur, in literatis illis, quos mendicitas premit, quod magnas omnibus diis eos æquum esset gratias habere, si suppetat, unde, parce saltem ac duriter, vitam possint exigere, neque cogantur, in triviis ac plateis, inopia atque egestate enecti, animam exhalare. Sed id etiam magni Principes conari nonnuquam audent in iis, quibus nihil deest, immo, quibus est domi, unde in omnium rerum abundantia vivant, quos, ut se, apud imperitam hominum multitudinem, literarum cupidos probent, atque ut, ex excellentium hominum doctrina, sibi famam, ac domui suæ splendorem, arcessant, magna spe, magnisque ad se pollicitationibus advocant, ac venire compellunt; sed, cum venerint, nihilo eos honestius ac liberalius tractant, quam si obscuro orti loco, vel potius si mendicabula hominum essent. Ut olim in Archita quodam Epistameno usu venit, quem, locupletem, ac domi suæ nobilem, summus vir, princeps, ac rerum tum dominus, cum fama & auditione accepisset, in omnium liberalium artium studiis, longo intervallo, iis omnibus, qui literis operam darent, antecire; magna est ejus apud se habendi cupiditate incensus, eoque ardentius, quod audierat, nullam esse linguam, neque Græcam, neque Hebraicam, neque Chaldaeam, neque Ægyptiam, neque Indam, quam non ita sciret, ut si in ea natus esset; multis enim in rebus, sibi ornamento atque usui eum fore sperabat; neque antea quievit, quam magnis ad se pollicitationibus attraxit. Verum, cum id, quod voluit, assecutus est, fecit ille ingenium suum, nec fere majorem homini honorem habuit, quam si infimæ sortis famulus fuisset: nam viro doctissimo, ænophorum vini, bini vel terni singulis diebus panes, & totidem Julii, cum spira, quam ex jure vel vino voraret, patriæ ac laribus familiaris relictæ, tum longi itineris suscepti, merces ac precium erant. Itaque, tot tamque ingentes pollicitationes in nihilum recidisse, ac data sibi verba esse, intelligens, statuit, insigni aliqua significatione, sui virum illum principem erroris commonefacere, simulque docere, assatim sibi domi esse, quod ederet ac biberet; neque sui similes alienum cibum, tanquam mures, rodere. Itaque, tribus il-

lis mensibus, quibus cum illo fuit, statim ab initio cœpit cœnophora illa, quo ordine accipiebat, in cubiculo quodam disponere; & unicuique cœnophoro suos denarios panesque diurnos, & spiram, addebat, quæ collo illius inserta, tanquam crepundia, vel torques, ab eo penderet. Sed, cum jam plenum esset cubiculum, adeo ut nullus alteri cœnophoro suppeteret locus; relictis ibi literis vehementibus, ad Principem datis, in quibus, se ab eo fuisse contemptum ac deceptum, querebatur, ac propterea, quæ sibi, quasi mendico, ac fame enectō, dedisset, se resignare ac relinquere omnia aiebat; confestim se ab Urbe subduxit, ac regiones alias est persecutus. Quod ubi factum est palam, ac Princeps epistolam legit, usque eo est commotus, ut, sine ulla dubitatione, insanire omnibus ac furere videretur; ac licitoribus negotium dedit, ut hominem persequerentur, & ex fuga retractum, in vincula raperent. At ille, jam e conspectu evolaverat, & Principis alterius regiones ingressus, omnem iis, qui ipsum persequiebantur, sui assequendi facultatem eripuerat.

XLIII. VINCENTIUS PILOTA.

REcte sapienterque, contra Stoicos, a Peripateticorum schola defenditur, non inutiliter a natura datum esse homini ardorem quendam animi, & alacritatem, qua, ad res arduas ac difficiles fortiter suscipiendas persequendasque, impellatur. Nihil enim, quod sit admodum laudabile, fieri posse videtur ab eo, qui ad id lente, ac pacata mari similis, aggrediatur. Ideoque non frustra antiquitus institutum est, in bello, ut, antea quam acies dimicarent, undique signa concurrerent, clamoremque universi tollerent; quod, his rebus inflammari animos ad pugnam incitarique, existimarent. Sed non minus docte sapienterque dictum est, hanc incitationem animi, naturaliter innatam omnibus, rationis imperio regendam esse, neque committendum, ut quamcumque illa velit in partem, nos abstrahat atque compellat; curandumque, ut virtutum sit cos, non temeritatis irritamentum. Denique, ut in omnire, sic etiam

iam in ista, semper videndum est, quatenus egregie, atque ut Philosophus & magister, ex veteris sapientis dicto, Terentianus Sofia, *Id arbitror*, inquit, *apprime in vita esse utile, ut ne quid nimis*. Quem si Vincentius Pilota, Beneventanus, magistrum habere, ac bene præcipientem audire voluisset, sedatis animi motibus, quasi leni placidoque mari, secunda potentiorum hominum gratia, tanquam aura, vestus, ad opes & honores vela dedisset: sed quoniam maluit, infesto scopulofoque perturbationum suarum, stomachi, iracundiaque præsertim, qua effervescebat, pelago sese committere, eoque tenui fractoque sui iudicii navigio deferri; quid mirum, si in Syrtes scopulosque devenerit, ad eosque navem affligerit? Erat, in Vincentio Pilota, mira quædam, amicis, iisque qui in ejus opem auxiliumque confugissent, commodandi, eorumque utilitatibus serviendi, propensio; inerat incredibilis, veritatis conservandæ, mendaciisque evertendis, ardor, ac studium: sed utrumque ita immoderate intemperanterque faciebat, ut propterea in multorum odia & offensiones incurreret; neque verebatur, cum iis, omni verborum contentione, de rebus etiam levibus, certare, quorum obedire tempori, vel honori servire, erat illi maxime utile. Diligebat eum Paulus V; cujus ille fidei & taciturnitati eas notas commiserat, quibus arcana sua in literis, quas ad Legatos Nunciosque suos mittebat, enuntiabat, ne, si literæ interciperentur, sua etiam ab iis consilia surriperentur, quibus ea scire, usui esset: diligebatur etiam a Scipione Card. Burghesio, Pauli ejusdem sororis filio. Sed tandem, animi sui impotentia, infestos sibi eos reddidit. Susceperat etiam similtates cum Margottio Card. Lanfranco, summi Pont. a secretis. Quamobrem fuit coactus aula excedere, pingui sacerdotio, Beneficiato nomine, quod in Basilica Vaticana obtinuerat, se abdicare, Roma discedere, ac Beneventum se recipere; ubi vita functus excessit e vita. Fuit ingenio eleganti, nec vulgari eruditione atque doctrina. Utebatur summis viris, ac doctis, quibus tradebat se, cum multa conversatione. In iis usus est plurimum Roberto Card. Ubaldino, quicum multas sæpe horas traducebat. Quo-

rum congressus neque erant taciti, nec ludicri sermones, nec rerum colloquia leviorum, sed de rebus, aut ad Philosophiam, aut ad humaniores literas, quibus ille deditus erat, pertinentibus. Plura scripsit carmina, non sine cultu ac nitore, quæ, magna cum voluptate ab Hugone Ubaldino V. C. mihi tradita, legi: qui Ubaldinus, pro amicitia, quæ cum illo maxima intercedebat, imprimeunda & edenda curabit. In poetis sui ævi optimis numerabatur. Legitur ejus carmen ad Jo. Baptistam Marinum missum, & Marini ad ipsum responsio. In scribendis carminibus, cum ceterorum, sui æqualium, poetarum, tum maxime Marcelli Macedonii consilio uti consueverat.

XLIV. IO. HONORIUS AXELIUS.

Magna profecto memoriæ vis est, quæ, omnia, quæcunque in animo constructa atque recondita habemus, tanquam thesaurum, tuetur atque custodit. Ideo magna illi habenda est gratia, ac maxima diligentia retinenda, ne unquam nos fugiat. Nam, si rerum, a nobis perceptarum inventarumque, custodiam deferat, omnia continuo, quantumvis maxima, una cum illa profectioem fugamque adornabunt. In hac facultate admirabilis extitisse traditur, ille totius Græciæ facile princeps, Themistocles; cujus ex animo, quod semel in ipsum esset infusum, omnes deinceps ad egrediendum aditus interclusos obstructosque reperiebat; adeo, ut artem memoriæ, quæ tum proferebatur, repudiaverit atque neglexerit, ac gratius sibi eum esse facturum dixerit, qui se oblivionis potius quam memoriæ artem edocuisset; quod sibi quædam alte in animo infixæ hærent, quæ inde extrahi cuperet. At cum omnibus, qui literis student, hæc virtus necessaria sit, nullius tamen magis propria esse putatur, quam Jurisconsultorum. Ac vere; nam, cum domus Jurisconsulti, totius sit oraculum civitatis, quomodo iis, qui consilium expetitur veniunt, satisfacere poterit, nisi omnia, quæ in ea arte continentur, quæ sunt propemodum infinita, & intelligentia comprehendat, & memoria retineat? Verum, si

fo-

sola memoria, sine iudicio, optimum Jurisconsultum posset efficere, nemo, in ea sententia, Jo. Honorio Alexio antecessisset. Tanta enim rerum omnium copia abundabat, tantum juris tum civilis tum pontificii legum numerum animo comprehensum habebat, tam multa juris utriusque interpretum placita, dicta, atque responsa collegerat, vix ut ea multorum Jurisconsultorum memoriz, quamvis cella vinaria aut penaria, quamvis quovis capaciores horreo, caperent. Sed ea adeo confusse atque permiste coacervata atque constructa aderant, ut nihil esset primum, nihil postremum. Quamobrem illi, cum de jure consulebatur, eveniebat idem, quod domino magnæ plenæque ornamentorum omnium domus, sed in qua nihil sit suo loco positum, nihil ordine collocatum, quia rerum, quæ possideat, vini naturamque non norit, qui rogatus de re aliqua, vel unam rem pro altera, vel plura simul, quia eadem sibi videantur, profert. Nam, cum ejus opera conducebatur, ut suam de ea re, quæ in controversiam deducta esset, ex scripto, sententiam diceret, omnia illi veniebant in mentem, quorum aliqua mire eorum, qui ad ipsum confugissent, causam adjuvabant, quædam vero, ac multo maxima ex parte, nihil plane rem, quæ in iudicium deducta esset, attingerent. Quamobrem fiebat, ut Jurisconsultorum non nemo, cui non esset tam lauta supellex, cum quispiam ad ipsum consulendi causa, veniret, daret operam, ut antea Honorium adiret, ab eoque scriptum aliquod auferret, unde ille, nullo suo labore, magnæque cum laude, quod esset ad causam accommodatum, exciperet, quæ autem aliena ab ea essent, repudiaret, atque rejiceret. Atque tum fuisse ab omnibus iudicatum memini, si Honorio memoriz ingenioque par iudicium contigisset, nihil eo futurum fuisse perfectius. Verum, dum ita in ea parte animi claudicaret, neque magnum in Jurisconsultis nomen habuit, neque aliquam publici muneris partem est adeptus: solum Hospitalem suæ nationis domum (erat enim Trajectensis,) Provisoris nomine, administravit. In ejus etiam templo tumulatus est. Dixit etiam semel causam, apud Quæstiores fidei, accusatus, quod ipsi cum hæreticis quibusdam amicitia

esset, ususque literarum; verum statim, causa cognita, est absolutus; sed non ipso defendente. Nam, si suæ ipsius causæ patrociniū suscepisset, ab eo iudicio victus, ac notatus infamia, discessisset; quod omnes lites, quibus ille aderat, perderet; patrono illi, P. Africani hospiti, haud abfimilis, quem Siculo cuidam patronum causæ cum daret, Quæso, inquit ille Prætor, adversario meo da istum patronum, deinde mihi neminem dederis. Neque, qui litem alicui intendebat, vel ipse in iudiciū vocabatur, impensius quidquam optabat, quam ut is, quicum omnis ipsi res esset, illius patrociniū uteretur; tum enim nihil sibi patrono opus esse, sed, nemine defendente, se causam certissimam obtenturum esse, existimabat. Adeo ut Cardinalis Zolleranus Germanus, litigatorum cuidam, cui savebat, die quodam clara voce diceret, Bono animo es, vicisti; nam adversarii tui causa, non alio nisi Honorii advocati præsidio fundatur ac nititur. Senex jam, fieri maritus cupiens, ludificatus a veteratoribus quibusdam, qui asscandi hominis gratia, simulaverant, matronam, fortuna ac divitiis nobilem, ejus esse corporis cupidam; idque adeo illi persuaserunt, ut nullis popularium amicorumque suorum admonitionibus adduci posset ut crederet, se a nebulonibus illis illudi. Sed tandem, cum probe emunctus ab illis fuisset, data sibi verba esse intellexit.

XLV. ANTONIUS MARAFFA.

Vir prudens ac doctus, qui, multos abhinc annos, vita decessit, non pessime cum iis actum esse aiebat, quibus sive natura, sive error, eam mentem injecisset, ut se in aliqua arte esse omnium primos existiment, cum nec digni sint, qui in postremis numerentur; nam iis solis bene esse; &, quamquam aliis diridiculo sint, ipsos sibi plaudere, & ex eo, quod didicerint, cum ad id, quod est in eo summum atque perfectum, pervenisse se credant, voluptate omnium maxima perfundi. Atque idem ille addebat, pessime de illo hominum genere mereri, qui eum illis errorum conentur eripere; quemadmodum ille, natus Argis, apud Horatium,

Qui

*Qui se credebat miros audire tragicos,
In vacuo latus seffor plausorque theatro;*

cumque jam, cognatorum amicorumque cura ac diligentia, morbum illum expulisset, graviter cum illis est questus, quod summam sibi voluptatem extorsissent, & gravissimum mentis errorem eripuissent. F contrario, maximas naturam sollicitudines curasque, quibus perpetuo excrucientur, iis ingenuisse dicebat, quorum in mentibus, earum rerum, quarum studio ducuntur, impresserit speciem pulchritudinis eximiam quandam, quam intuentes, in eaque defixi, ejus ad similitudinem, orationem vel carmen conentur effingere: nam fieri, ut non solum perpetuis, sed majoribus etiam in dies crucibus torqueantur; quoniam, quo longius in ea, quam colunt, arte, studio atque exercitatione progrediuntur, eo magis intelligunt, quantum absint a summis. Quæ si vera essent, neque ab eo per jocum dicta fuissent, nemo, Antonio Maraffæ, felicitate anteisset. Qui, cum vix Grammaticam didicisset, ac Philosophiam & Theologiam ne a limine quidem, ut dicitur, salutasset, optimum se putabat esse Philosophum atque Theologum; cum poëtam nullum legisset, ea se poëmata facere existimabat, quorum similia nunquam Ariostus Tassusque fecissent. Nam poëma longum, Italico sermone, conscripsit, quod Særæ hebdomadis formam seu modum appellat, quo mundi totius procreationem, sex diebus perfectam, amplectitur; aliaque etiam poëmata, pene innumera, reliquit, oppido ridicula; quæ ille cum in Academicis, & in eruditorum cœtibus, recitaret, cachinnos omnium commovebat. Quod cum, vel invidentia, vel hominum inscitia, fieri diceret, vehementer iratus, ab ejusmodi cœtibus abstinuit, neque se deinceps eruditis hominibus, ad coronam, dare sustinuit; sed, quos faciebat versus, scriptos, amicis legendos tradebat; qui, non potest satis narrari, quos ludos præbereint. Erat inusitatorum monstroforumque verborum inventor, magis quam Sissenna ille, cujus, in libro de claris oratoribus, meminit Cicero: quæ verba, partim a se inventa & excogitata efferebat, partim ab Istris, Gallis, Hispanis, Illyriis, Teutonicis, Sarmatis, atque etiam, si diis placet, Indis,

Ec 3

pau-

paululum immutata, mutitabat; iisque tum præsertim utebatur, cum versus rhythmo, hoc est, syllaba similiter cadenti, esset terminandus. Quamobrem multorum ad illum concursus fiebant, simulantium, se rhythmorum inopia laborare, ac rogantium, ut verbis, similiter cadentibus, quibus egerent, sibi subveniret. Quibus ille ea suppeditabat, quæ deinde riderent. Complura, etiam vocabula, in familiari sermone, aliter, quam communis ferret usus, accipiebat; ut, cum loca sæda, inculta, ac sordida, loca pathica vocabat, homines autem, nefario illo crimine infames, somnieticos appellabat. Expetebatur vehementer in amicorum hilariorumque hominum conviviiis, ut aliquem sibi ex eo ludum jocumque compararent: quibus ille, versutus & callidus, non solum, non se parabat ut rideretur, sed eos ultro irridebat: ut, cum olim, in convivio, sal illi in os quidam inseruisset, dixissetque, Accipe sal sapientiz, ille repente ahenum, plenum aquæ, quod ibi erat, arreptum totum in illum invertit, iniquiens, Et ego te baptizo. Ac, ne existimarent homines, ipsi verba dare se posse, denunciabat illis, se quadam esse scientia præditum, qua in animos omnium penetraret, quæque illi in eo viderent, agnosceret; quam scientiam, unico verbo, occultam appellabat; itaque sibi occultam esse aiebat. Simul ac e Calabria, ubi honesto natus est loco, Romam se contulit, dedit operam, ut in Sodalitatem eorum exciperetur, qui, eadem domo eodemque cibo utentes, doctrinæ Christianæ rudimenta pueris tradunt. Ac bene cum illo actum esset, si, usque ad extremum vitæ spiritum, se in ea Sodalitate continuisset; non enim habuisset necesse, in summa rerum omnium inopia Romæ, in valetudinario Consolationis, vitæ finem facere. Sed homo, libertatis in primis cupidus, nullis voluit se legibus adstringere, nullum certum vitæ genus ad arbitrium aliorum sequi; sed, cum illi idem propositum esset ac Regibus, ut ne cui pareret, nève qua re indigeret, primum non difficulter obtinuit, ut nulli serviret; alterum assequi non poterat, ut non egeret. Nam ad egestatis terminos, ab adversæ fortunæ tempestate, sive potius a cupiditate otii, ac laboris odio, adactus; ubi ne,

fa-

fame eneetus, conficeretur, cogeatur, in aliorum misericordiam confugere, & siccus ad unctos accedere. Quam ad rem, multorum illi fuerunt amicitie expetendæ; ad quas suis sese carminibus insinuabat, tantumque ab eis auferebat, quantum esset, ad vitam parce & in panis traducendam, satis. Sed, ut eo, unde digressi sumus, revertamur; cum ille ex Sodalium eorum, de quibus diximus, numero se exemisset, literas a Clemente VIII ad omnes Europæ Episcopos impetravit, ut, quacunque doctrinæ Christianæ, rudibus & ignaris ejusdem, tradendæ gratia iter faceret, hospitio, viatico, rebusque omnibus, ad necessarium usum, juvarent. Atque eorum sumptibus bene viaticatus, Italiam, Galliam, Germaniam, Poloniam peragravit. Illud vero mirum accidit, quod, cum Theologiæ ignarus, multos de rebus divinis sermones habuisset, multa etiam, tum soluta oratione, tum versibus, scripsisset, nullum illi verbum excidit, quod hæresin saperet. Erat vir probus, religiosus, pius, ac fide optima. Habitum, quem ab iis Patribus, quibus nomen dederat, acceperat, nunquam deseruit; unde P. Antonius ab omnibus appellabatur.

XLVI. AUGUSTINUS PALLAVICINUS.

Multas adolescentiæ vias ostendi, fallaces ac lubricas, quibus illa insistere, aut ingredi, sine casu aliquo aut prolapsione vix possit, tum vix paucos inveniri, qui directum illud ad virtutem iter teneant, neque in cornosas illas, ac vestigia fallentes, quas diximus, vias, deflectant, utinam falso jactaretur, nec ingentibus sceleribus flagitiisque, in quæ innumera adolescentium multitudo sese ingurgitat, id altius, quam necesse sit, veritate niti, constaret. Quod autem Augustinus Pallavicinus, Januæ, nobili loco natus, nunquam pessimis illis factis studuerit, quorum est affinis adolescentia, Philosophiæ habenda est gratia, cujus ille quasi blandimentis delinitus, voluptatum illecebras repudiavit, neque eas immigrare suum in animum, sivit. Ut, qui

qui Philosophiam, vitæ magistram, expultricemque viti-
 tiorum, dixerit, probe, quanta in ea vis insit, intellexisse videatur. Augustinus igitur, simul ac Romam Janua venit, ea ætate (erat enim admodum adolescens) quæ ætas haud difficulter capi jucundissimarum rerum varietatibus solet, noluit, in tam corrupta civitate, tritas aliorum adolescentium persequi vias; non sibi fas esse duxit, in amore ac voluptatibus, præsertim cum honesta ac liberali facie esset, adolescentiam suam collocare, sed sibi utilius existimavit, illud vitæ quasi ædificium extollere atque absolvere, cujus in patria fundamentum substruxerat, auctore & quasi architecto P. Marcello Pallavicino, patruo, ex Societate Jesu; cujus extant ingenia in eam Societatem merita. Quæ ædificatio, ut recte succederet, ac sibi usui, alii exemplo esset, tradidit se Societatis illius magistris, tanquam fabris, ut ab iis ædificaretur, expoliretur & ornaretur. Neque illi materiz aut operæ parferunt suæ. Nam, ita cum brevi philosophiæ præceptis excultum reddiderunt, ut perfectus Philosophus evaserit, neque ipse magistrorum sedulitati, sua diligentia studioque, deerat, ut etiam illorum in se erudiendo industriam, ingenii celeritate, præcurreret. Ejus ingenii fructus est nobilis illa, in libros Physicorum Aristotelis, paraphrasis. Patuisset illi, ob generis nobilitatem opesque, quibus præstabat, ad honores aditus; sed quo Philosophiam, quam sibi, tanquam sponsam, adjunxerat, arctius amplecteretur, procul a Rep. abesse statuerat, ædesque, Capitolio proximas, amœno sane loco, conductas habuit. Sed, quos uberiores ejus ab ingenio fructus nos capere oportebat, mors eos, tanquam calamitas aliqua, interceptit. Quam illi mortem, neque amœnus neque salubris, in ipso ætatis flore, peperit locus, in quem alieno anni tempore, animi gratia, secesserat.

XLVII. FRANCISCUS AL-
CIATUS.

Magnum, ab Andrea Alciato Mediolanensi Juris-
consulto, Alciatæ familiæ ornamentum ac decus
effluxit; cujus virtute, toto orbe terrarum, in subfelliis,
in tribunalibus magistratuum, in Gymnasiis, in scholis,
in Jurisconsultorum libris, Alciati nomen celebratur.
Hic, princeps ex omnibus, ausus est Jurisprudentiam,
multorum seculorum barbarie infuscatam, nitori pristi-
no reddere. Hic est adortus, eandem, barbarorum in-
juria, omni ornatu orationis, tanquam veste detracta,
squalore ac pannis obstitam, ex iis sordibus, in quas con-
jecta erat, extrahere, & majorum suorum regno collo-
care, hic, omnium elegantissimarum artium, tum Græ-
carum tum Latinarum, excultissimus, tantum animi ha-
buit, ut non dubitaverit, vulgarium Jurisconsultorum
turba reclamante, ac contra nitente, ea illi omnia orna-
menta, tanquam jure judicioque, repetere, quæ, per
summam illorum, quorum fidei commissa fuerat, inju-
riam, amiserat; adeo ut nihil sit illa hodie excultius, ni-
hil politius, nihil ornatius. Ejus postea exemplum secuti,
Duarenus, Connanus, Budæus, Cujacius, Donellus
aliique, conati sunt, operi, quod ipse inchoaverat, ac
fere ad extremum usque perduxerat, tanquam fastigium
imponere. Ex hoc germine exorti plures postea ex ea-
dem familia extiterunt, qui partem ab ipso gloriam,
multis partibus auxerunt. Atque, ut de aliis taceam, uno
Terentio Alciato, ex Sodalitate Jesu, mea definitur
oratio, qui omnem omnium bonarum artium vim va-
rietatemque cum sit scientia & cognitione complexus,
eandem cum orationis elegantia ornatuque sociavit, plu-
res annos in Gymnasio Soc. Jesu, auditores, quorum
magnus ad eum numerus confluebat, Theologicis at
Philosophicis disputationibus erudit, nunc, laboribus
illis egregie functus, maximarum rerum consultationi-
bus adhibetur; ubi illa ejus vis ingenii, doctrinæ, & eru-
ditionis, quæ in illo scholastico pulvere & literaria qua-

si palæstra, admirationis ac delectationis plurimum habuit, in solem atque aciem, hoc est ad usum Reip. translata, ita utilis atque adeo salutaris invenitur, ut hanc ex Urbano VIII Pont. Max. vocem exprefferit, nempe, P. Terentium esse Cardinalatu dignissimum. Ab Andrea igitur Franciscus, de quo instituimus dicere, prodiit. Hic insitum generi ingenium ad jurisprudentiæ studia conferens, tantam est facultatem adeptus, ut dignus sit habitus, qui cum Andrea, a quo parens ejus omnium bonorum heres fuerat institutus, compararetur, ac propter excellentem doctrinam, Mediolani, in Collegium Jurisconsultorum cooptatus fuerit; ad quod nemini aspirare licet, nisi illi, qui sit in ea facultate perfectus. Sed ea exuperantia doctrinæ, magnis stipendiis, conductæ est a Papiensi Gynasio, ut ibi, quod de ipso redundaret, in alios sese transfunderet; nimirum, ut jus civile doceret. Quod, quasi solum ac fundamentum ejus amplitudinis fuit, cum id illi docendi munus, conjungendæ cum Carolo Borromæo amicitia, qui, mortuus, in Sanctorum numerum relatus est, materies existerit. Etenim ille Papiam, una cum aliis, venerat, ut Francisci sapientiæ fontibus irrigaretur. At bene ac præclare cum illo actum est, si, quantum Carolus de illius doctrinæ præceptis arripuit, tantum ille de Caroli sanctitatis indole hausserit. Sed Carolus, in referenda magistro suo gratia, non est passus desiderari a se officium suum. Nam Jo. Antonio Mediceo, avunculo suo, ad Pontificatus Max. culmen evecto, evocavit eum Romam, & amplissimis muneribus exornavit: ac primum perfecit, ut Datarius constitueretur; quo munere, non alterum fere in aula Romana invenias, quod negotii plus exhibeat, quod auctoritatis plus habeat, quod fidei plus exigat: illa enim est provincia, quæ diligentissime mandatur a summis Pont. neque quisquam eligitur, nisi is, cui illi maximam rerum suarum fidem habeant. Dedit operam deinde Carolus, cum provinciam illam, ex animi sui sententia, administrasset, ut in Collegium Cardinalium cooptaretur. Cooptato autem, quoniam tantæ ingenii vi negotium deesse non poterat, multæ aliz provincie sunt demandatæ, nempe Gynasii Roma-

mani cura sollicitudoque, ut illud una cum Cardinalibus, Morono, Cornelio, Sirleto, in clientelam fidemque reciperet. Cui etiam M. Antonius Muretus, omni virtutum genere cumulatus orator, tantumtribuendum esse statuit, ut, in quadam oratione, quam, in Æde S. Eustachii, de præstantia literarum habuit, ipsum & Sirletum, ornamenta seculi, firmamenta literarum, domicilia virtutis & eruditionis, appellat. Tum, patrocinium & clientela Regni Hiberniæ, ut dicitur, commissa & tradita; tum, universæ familiæ Franciscanæ patrocinium; quæ familia, patronis suis, plus fortasse negotiis exhibere solet, quam centum alie simul. Postremo, ne longum faciam, Carthusianorum ordinis tutelam custodiamque recepit. In quibus omnibus provinciis recte administrandis, morbo interijt, ac tumultus est in Æde, quam Romæ Carthusiani, in Thermis Diocletiani, Decipæ Virgini dedicatam habent.

XLVIII. ASCANIUS COLUMNA.

NON falso a quibusdam dicitur, raro naturam filios a similitudine parentum abstrahere, si consuetudo tamen eos & disciplina degenerare non sinat; itaque vix unquam contingere, ut navo, prudenti, industrio, proboque parenti, iners atque impurus & improbus filius existat. Nam, ut ait Horatius,

Et bonis

Est in juvenis, est in equis patrum

Virtus; nec imbellem feroces

Progenerant aquila columbam.

Quod in Ascanio Columna, M. Antonii filio, qui Turcas classe devicit, deque illis gloriosissimum triumphum reportavit, apparet. Nam ille, hereditario quasi jure, naturam admirabilem habuit, non quidem ad bellicas artes, a quibus eum suscepta vitæ ratio avocabat, sed ad humanissima studia, omnesque, dignas homine nobili, vel principe potius viro, disciplinas. Præterea, ab omni lucro abhorrens, ad liberalitatem, omnemque vitæ ampli-

pli-

plitudineiu, fuit mire propensus; adeo, ut ex suis vengalibus large detraheret, quod literatorum hominum, quorum erat studiosus in primis, usibus adderet. Nemo erat Romæ vir doctus, nemo liberalibus studiis paululum deditus, quin eum ad se vocaret, in amici loco haberet, denique officiis beneficiisque omnibus amplecteretur. Admodum puer, forma fuit egregia; in quam Aurelius Ursus, poëta singularis, eleganti carmine, lusit; cujus hæc erat sententia, quod Venus, similitudine formæ decepta, suum esse Ascanium existimans, iuit, ut arctis eum circumplicaret amplexibus, sed postea, errore detecto, *Risit, & Ascanius sic mens, inquit, erat.* Etiam tum adolescentulus, in aula ædium suarum, Philosophicis disputationibus, doctissimos Urbis Philosophos, tanquam in aliquod certamen contentionemque, vocavit: quo ex certamine magnam est laudem consecutus; & ad studium illud discendi, quo flagrabat, vehementius exarsit. Itaque Salamanticam se contulit; ut ibi, apud exquisitos e toto orbe terrarum magistros, uberius copiosiusque omnium rerum magnarum atque artium scientia pectus impleret. Quibus expletus saturatusque, Regis Philippi II aulam petiit. Nec se illuc profectum esse pœnituit. Nam doctrinæ elegantia, ac sermonis gravitate suavitateque, ac recenti parentis ipsius memoria, omnium, qui ante ipsum in Hispania fuerant, maximi animum ad se convertit, accepit adeo, ut ille a Sixto V in collegium Cardinalium cooptandum ipsum curaverit, tum ad oratorem suum scripserit Romam, ut ne quid deinceps cum summo Pont. negotii ageret, quod non antea cum Ascanio Card. Columna communicatum habuisset. Quamquam postea, invidorum calumnia, tantum Regis beneficium fuerit illi ereptum. Atque utinam non etiam, cum doctrina, plura ex Hispania, Regni illius procerum mores secutus, Romam asportasset, quæ apud nos partim ridicula, partim levia ponuntur; profecto, majori in honore ac laude fuisset. Ea autem, quæ, quoniam a nostris moribus abhorrent, hominum animos offendeabant, hæc erant: Abaco mensæ in qua pranderet vel cœnaret, lecto ubi cubaret, sellæ ubi sederet,

ret, omnibus denique locis, ubi agendum sibi aliquid esset, umbellas, serico auroque contextas, impositas habere; tum, ab ephebis, quorum magnum apud se numerum habebat, prandium quod pranderet, caligas & femoralia quibus indueretur, efferri, ac, positis humi genibus, tradi jubere. Tum, parentis clarissimi nomine, ad aliorum contumeliam, abuti videbatur: nam, cum primum Basilicæ Lateranensis Archipresbyter creatus est, atque apud Canonicos illos verba faceret, Non, inquit, habebitis Archipresbyterum, terræ filium nescio quem, ex Piceno, vel ex Liguria, (nam tum Basilicæ Vaticanæ Archipresbyter, Cardin. Picenus, Liberianæ, Liger sed nobilissimus, erat,) sed hominem Romanum, nobilitate, splendore, divitiis civitatis, omnium clarissimæ, primum; uno verbo, M. Antonii Columnæ filium. Quamquam deinde, usu atque experientia edoctus, hæc, de quibus loquimur, partim satietate abjecit, partim experiendo contempsit, ac totum se ad Romanæ aulae gravitatem moresque composuit. Sed lævia hæc, ac nugatoria, non potuerunt nec debuerunt tot tantarumque illius virtutum luminibus officere: nam semper, vir summus, doctus, magno ingenio atque animo præditus, habitus est. Insignem domi suæ bibliothecam instruxit; cui Pompejum Ugonium custodem præfecerat. Utebatur hominibus doctis eruditisque: & in primis Francisco Lælio Ubaldino, Franciscano Istrictioris, ut ajunt, observantiæ deditus fuit. Flagrabant apud illum eloquentiæ studia: itaque laudavit Philippum II, Hispaniarum Regem, mortuum, ornata oratione, ac plena prudentiæ. Scripsit contra Cardinalem Baronium, qui, in annalibus Ecclesiasticis, multis rationibus ostenderat, Reges Hispaniarum, furtim ac de insidijs, in monarchiam Regni Siciliæ invasisse. Cui vicissim Baronius respondit. Sed, cum intelligeret, Clementi VIII se esse minus gratum, adeo ut vix quisquam ex aulicis, quibus hæc Pont. voluntas nota erat atque perspecta, auderet se illi, amicitie vel honoris gratia, comitem addere, invitatus a Rege Hispaniarum, ut Regno Tarraconensi, pro rege, præfesset, accepit conditionem; illudque, summa cum æquitatis laude, per triennium administra-

vit: ac deinde reversus est Romam, ubi demum exiit e vita. Erat facie honesta atque decora: nisi quod ita male oculis utebatur, ut vix, ac ne vix quidem, quæ ante pedes essent, aspiceret. Tum Regi Hispaniarum incredibili erat amore obsequioque devinctus, adeo ut, mortui jam proximus, id illi, officiosissimis literis, nisi meminisse male, sua manu exaratis, significaverit; in quibus erat scriptum, non tam sibi ægre esse, quod intelligeret instare sibi finem hujus lucis, & amissionem omnium vitæ commodorum, quam quod Majestati suæ, tali seruo sit carendum, quo nullum unquam, nec magis fidum, nec ardentiori, in ipsa diligenda, amore incensum, sit habitura.

XLIX. MAPHÆUS BARBERINUS.

QUI ad Pontificatus maximi fastigium evehitur, in novum quodammodo hominem transire, ac novam quodammodo oris imaginem videtur induere. Nam, ubi primum, summi illius honoris limen attingit, continuo mutat mores, novas cogitationes, nova consilia suscipit, novo nomine appellari se præcipit. Sixti V est hoc, hominis sapientissimi; ad quem, recens Pontificem factum, cum summus vir quidam venisset, ut tantam illi dignitatem gratularetur, a quo insignem accepisset injuriam, humaniter hominem excipiens, ejusmodi ad eum orationem habuit: Quam F. Felici Peretto, Card. a Monte alto, injuriam imposuisti, scito, te impune ablaturum; sed cave posthac, ne Sixtum V, in quem, ex fratre Felici, transivi, novo scelere, vel quemlibet alium, mihi subjectum, offendas; etenim intelliges, quid sit periculi, Sixtum V, Pont. maximum, lædere. Cum igitur Maphæus Barberinus duas imagines referat, unam Maphæi, Urbani VIII Pontificis alteram, ea relicta, quæ est Urbani, Maphæi solius imaginem in Pinacothecam nostram inferemus. Ortus ille est Florentiæ, familia honesta. Statim ab ineunte ætate, multa ac magna celebris ac peracris ingenii signa ostendit. Quamobrem
Ro-

Romam, a parentibus missus, demigravit, ubi quamvis ad extremum usque spiritum vitæ permanserit, incorruptam tamen sermonis, quem cum lacte nutricis hauserat, antiquitatem conservavit; atque ejus vox semper Romanis auribus peregrinum quiddam olere ac resonare visa est. Sed, ubi Romam pervenit, omnibus iis doctrinis, quibus puerilis ætas informari ad humanitatem solet, institutus est in scholis Patrum Soc. Jesu, a duobus illis exquisitis magistris, Tursellino ac Bencio. Literas etiam Græcas avide ac diligenter arripuit. Sed ad poëticæ facultatis in primis studium a natura ferebatur; ad quod magna etiam, ab eadem, instrumenta acceperat. Ex poëtis, qui tum florebant, Aurelium Ursium dilexit ex omnibus plurimum, eumque sibi magistrum elegit; adeoque in hac exercitatione studioque sese continuit, ut nullis negotiorum occupationibus, nullis honorum ambitionibus, sit ab eo distractus. Neque mirum, si tantam sit facultatem adeptus, ut non videam, cui ille deberet cedere, una ætate qui esset. Sed, in odis præsertim, proxime ad veterum poëtarum laudem videtur accedere. Quid verbis opus est? ita puræ, ita elegantes, ita Latinæ, ita omni lepore omni que rerum ac sententiarum flore conspersæ, Patribus Soc. Jesu, sunt visæ, ut, ipso vivo, in ipsorum scholis, discipulis ad imitandum proponerentur. Quod, ex recentioribus poëtis contigit ante ipsum nemini. Semper enim veteres, in quibus perfectæ eloquentiæ laus continetur, aptiores sunt habiti, in quibus imitandis adolescentes primum illud incunantis ætatis studium collocarent. At quanto fecisset rectius, si se in hoc Latine scribendi labore continuisset, neque studium suum ad Etruscas Musas transulisset? nam, dum conatur, ceteris, in hac etiam lingua, summi poëtæ palmam præripere, inventus est, multis, longo intervallo, inferior. Accessit deinde ad honores adipiscendos, & Remp. gerendam, non nudus, atque inermis, nulla cognitione rerum, nulla scientia imbutus, sed omnium bonarum artium ornamentis instructus. Atque initium Reip. capeffendæ cepit, a supplicibus libellis Pont. max. referendis; in eorum enim ordinem, quibus id minus incumbit, adscitus est. Tum, Abbreviatoris,

postea, cum divitiis abundaret, Cameræ Apostolicæ Clerici, locum ac numerum obtinuit. Quo munere cum egregie fungeretur, missus est a Clemente VIII Nuncius in Galliam; cuius etiam nomine, Regis filium, de sacro Baptisinalis fonte, suscepit. Et, quia apud illum Regem, omnium maximum, Sedis Apostolicæ rem feliciter gesserat, a Paulo V Cardinalis renunciatus est: qui locus illi, atque honos, ita deberi putabatur, ut nemo contradiceret. Sed non licuit tantæ hominis virtuti esse otiosæ, quod virtutis vis omnis in actione consistat; sed necesse erat, ut, qui ad Remp. gerendam a natura factus esset, traderet se totum Reip. omnemque, ad eam administrandam tuendamque, curam ac sollicitudinem conferret. Quod optime Paulus V, acerrimo vir iudicio, intelligens, quem Maphæi sapientia non fugerat, cuiusque, maximis gravissimisque in rebus, periculum fecerat, ex Musarum hortulis, ubi, a negociis publicis feriat, interdum se oblectabat, eductum, in arduam sane difficilenque provinciam transtulit, nimirum Bononiam, ut eam, Legati nomine, administraret. Quibus postea partibus cum fide diligentiaque transactis, Signaturæ eum iustitiæ, quam vocant, præfecit. Atque in omnibus his muneribus, quidquid illi vacui temporis a negociis publicis dabatur, totum eruditorum hominum, sine quibus nullam esse vitam duceret, consuetudini colloquiisque concedebat; ut minime dubia, planeque explorata spes esset, si unquam ad summam amplitudinem pervenisset, nihil fore literatis hominibus felicius; neminem enim circa se habiturum, neminem honoribus amplificaturum, nemini ea munera, quæ debentur industriz, mandaturum, nisi qui sapientiæ, præ ceteris, gloria excelleret. Quemadmodum jam eam, quam de ipso commoverat, expectationem expleverit, dicent alii; qui Urbani VIII Pont. Max. imaginem, diserta oratione tanquam coloribus pictam, expressuri sunt.

L. FRANCISCUS BENCIUS.

ET propositi nostri ratio, & grati erga eos, qui optime de nobis meriti sunt, animi virtus, & illorum excellens in omni humanitatis genere laus, a nobis exigit, ut egregia, trium præstantissimorum e Societate Jesu hominum ingenia posteritati mandemus; quamvis suis ipsi scriptis assecuti sint, ut immortalem nominis sui memoriam efficerent. Etenim, ex ipsorum ludo, tanquam ex aliqua eloquentiæ officina, cum ea, quantulacunque in nobis est, facultate prodivimus. Atque exordiamur a Francisco Bencio; qui, ante quam in Societatem Jesu veniret, Plautus appellabatur, ab Aquapendente. Hic, admodum adolescens, in disciplina M. Antonii Mureti, qui tum eloquentiæ omnisque elegantis doctrinæ princeps habebatur, educatus, atque Græcis ac Latinis literis institutus est. Ex quibus, quasi fundamentis, ea illi eloquentiæ & eruditionis ædificatio extructa est, quæ pervenit ad summum. Verum ille, id quod raro usu venire videmus, summam eruditionem cum summa probitate, non ex certo tempore, sed ab ineunte ætate, suscepta atque exulta, conjunxit. Atque, ut eloquentiam, ad quam non minima, a natura, adjumenta se habere intelligebat, doctrinarum studiis instrueret, sine quibus verborum volubilitas inanis atque irridenda est; quasi ad earum mercatum, ad Gymnasium Romanum, & ad scholas Soc. Jesu, se contulit, ut Jurisprudentiæ ac Philosophiæ præceptis institueretur. Sed, in eo mercatu, illud etiam mercimonium est nactus, quod, divini numinis instinctu compulsus, fuerit coactus, venditis rebus, quæ habuerat, omnibus, emergere. Quæ res, quoniam continet aliquid, dignum admiratione, quodque Dei in eos, quos sibi elegit, providentiam maxime referat, non est prætereunda silentio. Jam Romæ septennium commoratus fuerat, cum, die quodam, in Æde Deiparæ Virginis Annuntiæ, Collegii Soc. Jesu, sacramento Pœnitentiæ, peccatorum sordes ablueret, visus est vocem, in hæc verba, audire, Et tu quoque aliquando, religiosorum istorum numerum augebis.

Quam ille vocem primo neglexit, nec per aures penetrare in animum sivit, sed in suis Jurisprudentiæ ac Philosophiæ studiis sese continuit; quo, eorum præsidio, ad opes honoresque aditus sibi muniret. Quapropter onines ætioris vitæ cogitationes, utpote consiliis suis inimicas, quantum potest, abire jubebat ex animo: Sed frustra. Nam, quæ incitior est, adversus stimulum calces? Feriis enim, Christo ab inferis resurgenti sacris, cum, ex Ecclesiæ præcepto, Christi corporis Sacramenta sumsisset, sensit, se tanta vi impetuque a superioribus illis cogitationibus impelli agitarique, ut, cum ferre non posset, eas necesse habuerit illi, qui sibi erat a confessionibus, aperire. Inter hæc, quædam res incidit, quæ homini, ad perfectioris vitæ terminos properanti, quædam quasi calcaria addidit. At enim, multorum est ad eum literis perlaturum, matrem, quam præcipua amoris sui parte complectebatur, lethali implicitam morbo, ita periclitari, ut, de medicorum sententia, pronunciatum esset, nullam in ea spem salutis reliquam esse. Itaque advolat in patriam, ventis atque avibus ocus. Sed, in itinere, eam comperit diem obiisse supremum. Ex quo nuncio, ita ab intimo quodam animi dolore oppressus est, ut omnia eum solatia deficerent. Cunque lacrimarum flubibus pene obrueretur, a Christo, cujus crucifixi imaginem oculis subjectam habebat, summa vi & ardore animi, opem auxiliumque expetiit. Qua in precatione, sensit sibi, pristinæ vocationis memoriam refricari, animumque, ad propositum, Societati Jesu nomen dandi, renovari revocarique. In qua sententia eo libentius mansit, quod acceperat, illud unicum matris suæ votum fuisse, ut in Societatem Jesu ingrederetur. Ac, ne longum faciam, senatu consiliorum suorum in animum convocato, & rationibus diligenter examinatis, quæ ipsum, aut sententiam mutare, aut in ea permanere, suadebant; cum horam integram, in ea deliberatione, consumisisset, Christo, vocanti se, atque adeo attrahenti, manus dedit. In Societatem Jesu recepto, nihil fuit antiquius, quam ut Mureto magistro, laboris, quem in ipso erudiendo susceperat, gratiam referret: neque habuit majus pretium, quod illi persolveret, quam ut per-

suaderet, ut, sacris initiatus, vitam, eo loco atque ordine dignam, exigeret. In quo fuit felix. Nam impetravit, cumque, cohortationibus suis, ita mores mutare coëgit, ut esset omnibus exemplo, sanctissimeque moreretur. Quem etiam inortuum laudavit, luculenta oratione, quæ extat. Quanti autem Muretus Bentium faceret, declarabant honorifici, quos de illius eloquentia, eruditione, ac doctrina, sermones habebat, ut etiam laudum suarum summam in eo collocatam haberet, quod, qui ad Bencium audiendum confluerent, ad Mureti auditorem atque alumnum ire, se prædicarent: declararunt etiam Aristotelis Rhetoricorum libri duo, quos, a se in Latinum sermonem conversos, illius nomini dicatos emisit: quos etiam libros Bencius, publice, me audiente, ejusque dicta excipiente, interpretatus est. Erat multi laboris multæque industriæ; quibus rebus, eximiam dicendi vim, & minime vulgare eruditionis genus, est assecutus, præterea summam apud omnes literatos existimationem ac famam, a quibus consulebatur, frequenter audiebatur, ac certatim diligebatur. Fuit etiam summis viris, multisque Cardinalibus, apud quos literarum studia vigeabant, eximie carus, ab eisque magno in honore habitus. In quem illud extat Cæsaris Cardinalis Baronii elogium: *Franciscus Bencius, vir maxime pius, & insigniter eruditus, qui, & Musas reddidit Christianas, & graviore concentu canoras.* Neque tamen, ex hoc hominum favore & gratia, ejus unquam elati sunt animi, aut unquam illi aliquid arrogantie accessit; sed humilis ac demissus, ea gloria, quamvis virtute parata, minime delectabatur, totamque abjiciebat, atque deponebat. Erat ingenium mite, apertum, ac simplex, nullaque simulationis arte fucatum. Quæ res magnum sibi omnium amorem & studium conciliabat. Sed, cum plures annos Romæ, in Gymnasio Soc. Jesu, Rhetoricam docuisset, aliquot etiam Aristotelis Moralium libros, magna cum laude, interpretatus esset, tandem gravi morbo cœpit urgeri. Ex quo, cum fortasse præfagiret, se non esse convaliturum, quemadmodum P. Franciscum Carrettonium tum mihi dixisse memini, volentibus eum adire, hanc legem indixit, ne alios sermones,

nisi de rebus spiritualibus ac divinis, inferrent, cetero-
qui eorum salutantium officia se nihil morari. Vixit an-
nos duos & quinquaginta: quorum duo & triginta in
Societate consumserat, cum, annos natus, non amplius
viginti, se iu ea Christo mancipasset. Multa scripsit egre-
gie, tum soluta oratione, tum versibus. Quæ autem man-
data sunt typis, hæc enumerantur. Annuarum literarum,
de rebus Societatis, volumina quatuor. Quinque Mar-
tyres; poemata heroicum. Orationum & poematum,
volumina duo. Ergastus & Philotimus, drama, quod
magno apparatu datum est in aula Gymnasii Societatis
ejusdem, cum in literario certamine, victores corona ac
præmio donarentur.

LI. HORATIUS TURSELLINUS.

Sequitur vir alter eximius, Horatius Tursellinus, Ro-
manus, in quo, dubitari posse videtur, quid plus lau-
dis habuerit, num humilitatis virtus, an politissimarum
literarum elegantia. In utroque enim harum virtutum
genere, mirum in modum excelluit. At, si rationum
momenta, non solum artificis statera, sed etiam popu-
lari, ut dicitur, trutina expendantur, humilitati ejus-
dem palmam dandam esse reperietur. Nam, esse quan-
tumvis disertum, atque etiam eloquentem, quamvis
res difficilis inventu sit, tamen naturale quoddam est
bonum; at, sentire, se ceteris superiorem esse, neque ta-
men pati, se animum altius attollere, sed potius illum
demissum, atque omnibus subiectum habere, divinita-
tis cujusdam esse censetur. Neque id obscurum aut la-
tens, sed maxime est perspicuum ac patens. Etenim di-
sciplina hæc, se ceteris summittendi, ex divinæ sapien-
tiæ thesauris deprompta, Christi Salvatoris nostri ver-
bis, sed magis exemplo, commendatur ac traditur; qui,
cum, utpote Deus, natura, imperio, æternitate, par ac
similis Patri, hujus virtutis usum atque experientiam
habere non posset, quasi mortalibus invidens tantam fe-
licitatem, se mortalem immortalis effecit, in eamque
humilitatis altitudinem conjecit, in quam nemo adhuc
pervenit. Tursellinus igitur, civis Romanus, nec ob-
scuro inter suos natus loco, cum præstaret ingenio, ac pos-

posset, in ea Sodalitate, in quam se adscribendum curaverat, vel Remp. capeßere, ascendens gradibus magistratuum, vel gravioribus disciplinis operam tribuens, honestiorem docendi provinciam obtinere, aut ad majora negotia adhiberi, in literarum humaniorum studiis continere se maluit, atque anno cIdo LXII, quo anno, Societatis Jesu institutum amplexus est, quoniam id ad majorem Dei gloriam redundaturum intelligebat, facultati illi se totum addixit, cujus in sinum, a primis temporibus ætatis, sua eum voluntas studiumque contulerat. Itaque superioribus (licet enim hoc) se promptum exhibuit, ut onine curriculum industriz suæ, usque ad extremum vitæ spiritum, in erudienda exercendaque, in bonis literis, adolescentia ac juventute conficeret. Intelligebat nimirum, quanta vis in prima puerili illa institutione, ad reliquum vitæ cursum inesset. Quod ita apte eleganterque faciebat, ut nihil aptius. Nam in iis scriptionibus, in quibus adolescentes exercebat, nihil continebatur, nisi sacrum, religiosum, ac pium; & ex iis etiam ethnicis auctoribus, quos interpretabatur, plures sententias eligebat, fusiussque explicabat, quæ illis, ad mores componendos, ex usu essent. Sed quid mirum? proximus S. Ignatii Lojolz, ordinis auctoris, temporibus extitit, cum Socii inter se de humilitate, patientia, probitate, deque omni virtute certabant, atque ipsius Ignatii sanctitas, qui omnia solitus esset ad majorem Dei gloriam referre, recens in suorum memoria hæreret. Narrabat mihi P. Stephanus, cum ille, ad veterum poëtarum obscena vel amatoria carmina, præsertim Tibulli, ad Latine linguæ notitiam legenda, accedebat, ne quod humani generis hostis, ex ea lectione, animæ suæ vulnus infligeret, solitum esse antea, positis humi genibus, humili demissaque ad Deum oratione sese munire. Docuit Romæ juventutem, annos viginti; quorum postremo, ejus ego auditor fui, atque elegantissimæ orationi interfui, qua commemorabat, se, tanquam emeritis stipendiis, docendi labore solutum, missionem impetrasse, vel tanquam equum, senectute confectum, liberam per agros evagandi potestatem obtinuisset. Quamquam in hoc errabat: nam,

cum hæc loqueretur, vix quinquagesimum annum attingerat. Non desiit tamen in Collegio Romano privati multos erudire, qui postea optimi dicendi inagistri extiterunt. Partem etiam aliquam, in sua Societate, publici muneris attigit. Nam Seminarium Romanum, Collegium Florentinum, & Lauretanum, Rectoris nomine administravit. Laureti autem, mortifero morbo implicitus, ac jam depositus ac desperatus, Deiparæ Virginis patrocinio, in cuius opem auxiliumque confugerat, (ita enim ejus egregia in Virginem pietas nos credere persuadet,) amissam valetudinem recuperavit; sed denuum anno cIo Io C IX, VIII Idus Aprilis, e vita emigravit, si ætatem spectemus (erat enim annos natus quatuor & quinquaginta,) nondum morti inaturus. Multa edidit, in quibus incorrupta Latini sermonis sanitas, & Ciceronis elegantia, quem sibi ad imitandum proposuerat, tineta, apparet oratio; De vita S. Francisci Xaverii lib. VI; Epistolarum ejusdem lib. IV; Lauretanæ historiæ lib. VII; Literas annuas Soc. Jesu anni cIo Io C III; De particulis Latinæ orationis; Nomenclatorem vocum Latinarum; Orationem funebrem in morte Gregorii XIII; Epitomen historiarum a mundo condito, lib. X.

LII. HIERONYMUS BRUNELLUS.

HUic æquum erat, corporis staturam, virtuti parem, contigisse. Erat enim corpore pusillus, in quo sæpe ab auditoribus suis irridebatur, sed virtute & eruditione magnus, Hebraicis, Græcis, & Latinis literis, apprime doctus: quas omnes linguas, multos annos, in Gymnasio Rom. Soc. Jesu, magna cum laude, docuit. Latine autem, ita scienter, ita nitide, eleganterque scribebat, ut proxime ad veterum oratorum laudem videretur accedere. Nihil erat, in ejus oratione, nisi purum, nisi sanum, nisi Latinum; nullum verbum, nisi, tanquam tessellæ in emblemate vermiculato, suo loco positum; nihil confusum, aut obscurum, sed recte disposita, atque perspicua omnia. Absuit quidem ab eo vis illa oratoria: itaque orationes nunquam scripsit, quod

quod sciam, sed præfationes tantum, & epistolas; in quibus mira hæc, quam dico, sermonis puritas & elegantia deprehenditur. Erat præterea in notandis animadvertendisque vitiis, & instituendo docendoque, prudentissimus. Quamobrem multi viri doctissimi, ejus judicio atque censuræ, sua scripta subiciebant; neque, quod ipse correxerat, defendere audebant. Hoc correctore ac judice utebatur Fulvius Ursinus, vir, nostra ætate, eloquentia & eruditione clarissimus. Ego quoque eloquentiæ studium, annos plures, Philosophiæ, Theologiæ, ac Jurisprudentiæ, quibus artibus assiduam operam dabam, occupationibus intermissum, hoc rursus summo auctore & doctore renovavi. Ac tanta erat in homine humanitas atque benignitas, ut neminem, qui ad ipsum venisset, respueret, sed humaniter omnes exciperet, seque illis ad docendum daret. Cujus ego, in docendo instituendoque, patientiam satis mirari non possum, cum importunitatis meæ venit in mentem, qua, extremis ejus vitæ annis, eram illi molestus. Nam, cum discendi studio flagrarem, nullus fere dies abibat, quin me illi, cum scripti-one aliqua, sisterem, ut ab eo corrigeret; neque unquam repulsus, tristis domum redivi. Atque hæc ejus in docendo facilitas eo erat gratior, quo, sine arrogantia, ad aliorum scripta emendanda, videbatur accedere. Sed totum hoc caritati illi, omnes juvandi, qua intus æstuabat, referendum erat acceptum. Erat enim vir optimus, atque sanctissimus, & iis præditus moribus, qui discuntur in ea Societate, cui pene ab ineunte ætate nomen suum dederat, ubi annos quadraginta & octo ita exegerat, ut, tum sociis suis, tum aliis, exemplum esset, innocentix, probitatis, modestiæ, virtutumque omnium. Et, quamquam infirmissemis esset viribus, tamen longior illi vita suppetitavit, quam duobus illis superioribus, Bencio nempe ac Tursellino, qui robustiore corporis firmitate esse videbantur. Nam est usque ad tertium & sexagesimum annum ætate provectus. Edidit orationes aliquot D. Jo. Chrysostomi, in Latinum conversas; videlicet, de descensu Christi ad inferos, & latrone; & orationem in duodecim Apostolos; item eam, Quod nemo læditur, nisi a se ipso; Catenam in Ezechielem Prophetam, ex Sforziana bibliotheca productam.

LIII. IULIUS SANSEDO-
NIUS.

Multæ me causæ impellunt, ut Julii Sansedonii imaginem oris, in mea Pinacotheca, una cum aliorum illustrium virorum tabulis, meo rudi stylo, tanquam penicillo, depictis, affigam: primum, longa jam inde a puero, hominis notitia; quamquam nullus mihi cum eo usus necessitudoque intercesserit: tum, propinquitas, quam non inepte Terentianus ille senex, in propinqua parte amicitiae posuit; etenim aliquot ante ejus obitum mensibus illuc viciniae commigraveram, ubi ædes conductas habebat: postremo, domus in qua nunc habito, non solum ejus mihi memoriam refricat, verum ipsum etiam ante oculos statuit; ac videre eum videor, ad crucem, quam duabus ex trabibus compactam, in horto ædibus adjuncto, defixam habebat, in Christi Domini passionis ac mortis meditatione defixum hære-re; in sacello, in quod unum ex cubiculis converterat, rem divinam facere; in bibliotheca, quam multis ex libris sibi construxerat, literis operam dare; ad B. Virginis aliorumque Sanctorum imagines, quæ in omnibus domus angulis, ostiis, parietibus, affixæ conspiciuntur, caput ac genua flectere; denique ex hac domo, quæ, multos annos, probitatis ipsius domicilium fuit, e vinculis corporis solutum, in cælum, (neque enim mihi aliter persuadeo) tanquam in suam domum, emigrare, ut, una cum sui similibus, ævo sempiterno fruatur. Nam hunc, sane amicum, ac remotum ab arbitris, locum sibi delegerat, ut perquam similem Eremitis vitam posset exigere. Neque defuerunt, qui id illi ocium quietemque conarentur adimere. Etenim adolescens, summa apud virum principem gratia, ac propterea insolentissimus, adnexas domui illius ædes, magnis sumptibus, a Domino suppeditatis, ædificaverat; unde tam multi erant illius in impluvium hortumque prospectui, ut omnes, qui illic habitarent, Julio arbitri essent, quid suæ fieret domi: e qua ne foras ejiceretur, vix ætatis, ad extremum perductæ, misericordia, & mortis jam adventantis vi-
ci-

cinitate, obtinuit. Volebat enim adolescens ille, longius ædificando, procedere, domumque illam, cupiditatis, quæ nunquam expletur, faucibus absorbere. Sed omnes ejus conatus in irritum reciderunt. Nam brevi Deus ostendit, quid sit periculi, eos lædere, ac pro nihilo ducere, quos in amicorum numero habeat. Ille enim vir princeps, cujus fiducia, adolescens tantam arrogantiam ac tantos spiritus sumserat, aliquot ante annos, quam ille, cui mortem in foribus jam esse putabat, est mortuus, cumque secum una paucos post menses attraxit, qui erat ipsi in amoribus ac deliciis. Etenim adolescens, bonis omnibus everfus, extra eam civitatem, in qua opibus, gratia, atque divitiis floruerat, in quadam taberna diverforia, omnibus ad necessarium usum egens, excessit e medio. Sed illuc redeamus. Julius igitur ex Sanfedonia gente, vetere ac nobili familia, ortus est Senis, in Etruria; quæ civitas, ut plurima atque clarissima egregiæ sanctitatis lumina declarant, sanctorum virorum sanctarumque mulierum, sæcunda semper genitrix extitit. Quamobrem, domi conceptam, partam, educatam probitatem, una cum bonis artibus, quibus erat excultus, transtulit in urbem Romam, hoc est, in amplissimum celeberrimumque orbis terræ theatrum; ut esset omnibus spectaculo. Ad pauca quædam de eo, qui in hac Urbe perpetuo mansit, tranquillissime senuit, ac sanctissime obiit, exponam; quæ non ab aliis, qui ipsi vidissent, accepi, sed meis ipse oculis hausi. Neque sum nescius, longe plura, mihi incognita, silentio transiri; sed, qui legerit, cum plura noverit, hanc a me jacturam rerum, animo æquo fieri patietur, si meminerit, non esse mihi propositum, claræ cujusque hominis vitam, tanquam totum corpus, cernendum referre, sed oris tantum imaginem, quam maxime cum naturæ veritate certantem, exprimere. Ac primum, exceptus est inter eos Sacerdotes, qui a Sodalitate Caritatis aluntur, ut, in templo S. Hieronymi, confessiones audiant, Missæ sacrificium faciant, ac diebus festis, solemnî ritu cantuque symphoniz, rem divinam faciant, interdum etiam sermones de rebus divinis, ad spirituales ipsorum filios, habeant. In quo contubernio mul-

multos laudabiliter complevit annos, adeo, ut nullam egregiæ cum muliere quapiam familiaritatis suspicionem dederit; nihilque commiserit, quod eam, quæ de ejus innocentia erat, opinionem aliqua ex parte labefaceret. Præfuit deinde domui illi; in ejus impluvio, S. Philippi Nerii, socios suos B. Virgini commendantis, imaginem, coloribus pingendam exprimendamque curavit, cum elogio, in quo scriptum erat, S. Philippum in ea domo Sacerdotein fuisse, ac tres & triginta ibi annos, animarum saluti strenue operam dando, consumfisse, & Congregationis Oratorii fundamenta jecisse. At tantus erat, in Julio Sansedonio, ecclesiasticorum rituum ac ceremoniarum usus, tantus in agendo lepos ac dignitas, tanta in voce suavitas, ut fere semper, ad solennia sacra facienda, ad vespertinas horas concinendas, Sacerdos adhiberetur. Per id tempus, Clemens VIII, Pont. Max. edixerat, ut alumni Collegii Germanici, Jus Pontificium discerent; quod olim, faciens iter per Germaniam, ab iis, qui ad Episcopatus ascendissent, sacrorum Canonum ignoratione, multa iniqua judicia fieri animadvertisset, ejus Juris docendi provinciam, a Patribus Soc. Jesu demandatam, acceperat Petrus Albertinus, magis Philosophus ac Theologus præstans, quam Jurisconsultus metuendus; qui, cum in disputationibus quibusdam, a P. Lepido Piccolomineo, ejus juris peritissimo, argumento breviter arguteque conclusio captus esset, sive pudore deterritus, sive quod ejus opera ab Odoardo Card. Farnesio conductæ esset, eo se munere abdicavit. Quod statim Sansedonius sibi delatum accepit, neque antea dimisit, quam a Paulo V factus est Grosseti Episcopus. Sed, cum neque amorem neque salubrem in locum venisset, atque eam fortasse provinciam, multis obseptam difficultatibus comperisset, æstulare vehementer animo cœpit, ac varias in partes distrahi. Ac forsitan hæc tentationes illæ erant, a quibus cum oppugnaretur, sibi erat visus in somnis S. Philippus Neri dicere, ut ad ea remedia confugeret, quæ olim ab ipso didicisset. Etenim sanctissimi illius viri memoriam præcipuo quodam honore studioque prosequabatur, cui peccata sua confiteri, ab eoque consilium, ad omnes vi-

tz suæ rationes, expetere solitus fuerat; atque parvum illud Christi crucifixi signum ex argento, quod S. Patris, sepultura affecti, pectori infidet, munus illius est, memoris sui erga eundem Patrem animi monumentum. Sed cum, ut antea narrabam, diutius in ea cogitatione curaque fuisset, tandem statuit, optimum factu esse, Episcopatum dimittere, eique, unde acceperat, reddere. Quod ab ipso factum est statim. Verum, quia nihil sibi reliqui fecerat, unde viveret, cogeatur prope victum emendicare. Multi viri locupletes ac nobiles, ejus sanctitatis fama compulsi, ejusdem sumtibus largius etiam quam necessitates suæ postulareut, suppeditabant. Præterea, ejus inopiâ sublevabatur ab iis, quos sacris initiabat: multi enim, ob sanctitatis opinionem, quam de eo conceperant, dabant operam, ut ab ipso potissimum initiarentur. Totus erat pictatis operibus deditus; valetudinaria invisere, ægrotantium cubilia circumire, ægris ministrare, lectulos sternere, nulla in eis curandis, ne vilissimi quidem hominis, officia desugere, loca religiosa frequentare, ea præsertim, in quibus homines, pœnis ultro susceptis, in se deserviunt. Deinde, ligueam sub lecto, ubi cubabat, arcam, in qua mortuus condi vellet, habebat; in eaque, una cum mitra, pontificia ornamenta, quibus indueretur, continebantur. Quibus rebus fiebat, ut vir sanctus atque perfectus, ab omnibus haberetur. Sed tandem ex calculo, qui omnes urinæ aditus obstructos habebat, summa animi æquitate, ut sanctos viros decet, excessit e vita; Patribus Congregationis Oratorii Romani, heredibus relictis: ex quo nempe Deus paupertatis amatorem non destituerat penitus victu, rebusque necessariis pluribus; utut non parum id mirati aliqui fuerint. Multa hominem, abundanti ingenio atque affluentem ocio, scripsisse necesse est; sed nihil extat, quod quidem ad notitiam meam venit, præter vitam B. Ambrosii Sansebonii, ex Dominicana familia; cujus etiam imaginem, supra ostium domus, ubi corporis vinculis laxatus abiit e medio, graphice depingendam curaverat.

LIV. ROMULUS PARADISUS.

Civitas Castellana, Vejentum urbs primaria, fere semper plures, præstantes in omnium virtutum genere, viros edit, Philosophos, Medicos; qui, suis scriptis atque doctrinis, facultati illi, ejus erant principes, plurimum splendoris ac luminis attulerunt. E quibus, non sui modo ævi, sed alterius etiam, longe superioris, omnibus antecedit ille, cui Roma multum se debere fateatur; Alexander nimirum Petronius, qui suis civibus salubriter vivendi rationem ostendit, & in ea urbe, ætatem, ad extremum usque senectutem, perducendi, tanquam vias aperuit. Quam multos musicæ artis peritissimos tulit! quot poëtas, non ignobiles, dedit! In quibus non postremum obtinet locum, Romulus Paradisus, Hieronymi filius; qui a patre, una cum hereditate, miram, ad poësin, indolem accepit. Fuit enim ille, poëta sonorus ac grandis: a cujus similitudine, natura filium non abstraxit; a qua ad illud sublime ac tragicum scribendi genus ferebatur; cui etiam illa corporis proceritatem, oris dignitatem, vocis claritatem ac magnitudinem, addidit, quo grandius pleniusque, quod illi exibat ab ore, sonaret. Sui igitur ingenii viribus fretus, in Urbem Romulus venit, non quidem omnium rerum rudis, sed, parentum diligentia, puerilibus disciplinis excultus, ut fortunam experiretur, num sibi, cupienti Remp. capeßere, ad quam incitato studio ferebatur, ad-
 versatrix, an favorabilis esset. Atque, ne ad honores adipiscendos, & ad Remp. gerendam, nudus veniret, nulla juris scientia ornatus, jus utrumque, civile ac pontificium, didicit, & utriusque interpretandi facultatem obtinuit. Sed, quia ita comparatum videmus, ut, qui se ipso tantum, nec pecunia, fretus, quæ sua vi per-rumpit omnia, ac bonorum præmia creptum it, adire ad Remp. velit, nugæ agat, nisi aliquem ad eam aditum januamque patefecerit; videlicet, nisi apud aliquem magistratum vel principem virum, quid ingenio, quid
 li-

literis, quid prudentia efficere possit, ostenderit; perfecit, amicorum opera, ut Petri Pauli Crescentii, per id tempus, Cameræ Apostolicæ Auditoris, ab epistolis esset, suæque eidem integritatis, fidei, probitatisque specimen aliquod ederet. In quo munere tuendô, satis signi dedit, qua abstinentia futurus fuisset, si partem aliquam Reip. potuisset attingere. Nam, cum a quodam, cui, nescio quid, apud suum dominum, in beneficio & gratia impetraverat, nummi aliquot aurei essent allati, non solum ab illis abstinuit, sed oculos, iratus, avertit; non solum, qui donabat, liberaliter non est complexus, verum etiam, male verbis acceptum, insectatus est malleo, quo signum epistolis imprimebat. Quod minus mirum videretur, si factum esset ab homine locuplete ac nullius rei egente: sed, tam singularis abstinentiæ exemplum, profectum est ab eo, qui in summa rei nummarie difficultate esset, maximisque rei familiaris angustiiis premeretur. At hic spectatæ vir probitatis, Crescentio in Cardinalium collegium cooptato, ob cuiusdam, gratiosi apud illum hominis, arrogantiam contumaciamque, quam ingenio liberoque animo affecti ferre non possunt, coactus est, domo illa discedere, & ad Aloysium Cardinalem Capponum, cum eodem munere, transire. Quem secutus est Bononiam, in illa ejus nobili legatione. Ubi quemadmodum partes, sibi commissas ac traditas, administraverit, idemmet Cardinalis Capponius ostendit; qui, reversus Romam, Roberto Card. Ubaldino, omnium maximarum artium studiis omnisque elegantia doctrinæ expolitissimo ornatissimoque, commendavit, & ab epistolis tradidit. Apud quem, dum vixit, fuit in honore atque æstimatione: neque dubium est, quin ad opes honoresque pervenisset, si non celeriter eum vita defecisset; nondum enim secundum & quadragessimum compleverat annum. Quæ mortis celeritas eo luctuosior, atque ab artium elegantissimarum studiis alienior, existimari debet, quod non licuit illi, Mezentium suum, heroicum poemâ, Etrusca lingua compositum, edere; ex quo liceret intelligere, quantum vir ille ingenio præstaret; nec epistolas, ad viginti millia, typis mandare. Sed, quod caput est, ejus probitatis

nullum certius adduci argumentum potest, quod nihil fere in ejus facultatibus inventum est, ut posset efferri, ac necesse cum fuerit, sine aliqua pompa, in sepulcro infimæ sortis hominum condere. Et sane non alius illi vitæ finis contigit, nisi ille, qui plerumque solet iis evenire, qui, quantumvis ingeniosi, in aulis principum virorum, fortunæ, quæ fere semper est fallax, sese committunt. Illud vero, oppido ridiculum, nulla est ratio prætermittere. Nam, cum rhythmos quosdam typis mandare constituisset, illi, quem penes est facere librorum, non præcipuorum tamen, imprimendorum potestatem, ut moris est, tradidit, ut eos legeret, ac typographo excudendos dari curaret. Qui, ut primum in *Paradisi* nomen incurrit, illico, non secus ac si anguem pede prefisset, exhorruit, atque, Tibi removendum est, inquit, ab hoc libro nomen istud, quod non secus ab Etruscis carminibus, tanquam prohibitum alienumque, repellitur, ut cælum, sors, fatum, aliaque ejusmodi minime usurpanda vocabula. Sumtoque calamo, *Paradisi* cognomen delevit, ejusque loco, tria puncta, hoc videlicet modo... substituit. Eadeinque opera, interminatus eidem est, ne auderet, *Paradisi* nomen, in eum, unde depulsum fuerat, locum restituere; nam illico curaturum se, ut opus illud inter prohibitos atque invendibiles libros rejiceretur. Romulus, admirans hominis simplicitatem, vix se continuit, quin in risum effunderetur; sed, sibi vim adhibens, tacitus abiit. Nec mora; librum typographo, cum illis tribus punctis, loco cognominis, imprimendum tradidit. Cujus postea exempla cum inter amicos plura divisisset, ut quisque illi obviam venerat, Mi Paradise, ajebat, jure partam ex tuis carminibus laudem tibi vehementer gratulor. Cui Romulus, admoto ad os digito, Cave, dicebat, obsecro, ne hoc me cognomento appelles, nisi postulas, librum, ex hominum manibus creptum, impiorum sceleratorumque librorum numero haberi. At, quodnam tibi nomen dicam esse? replicabat ille. Respondebat, *Romulo trium punctorum*; nam id mihi cognomen, veteri inducto, indidit ille, qui libros imprimendi copiam facit. Quæ res, non potest satis narrari, quos ludos aulæ præbuerit.

LV. GABRIEL PENNOT-
TUS.

Nobilis ac vetus, jam inde a Constantini ac B. Sylvestri temporibus ducta, Canoniorum Lateranensium familia; eorum, inquam, qui arctioris vitæ lege adstricti continentur; optimis semper ingeniis, ac præstantium eloquentia, ac multiplici literarum genere, viro-
rum copia, floruit: qui, non sive modo familie decori ornamentoque, verum etiam Ecclesiæ universæ, utilitati atque splendori fuerunt. Atque, ut, ex superiorum seculorum spatiis, orationem in hæc nostra tempora contraham; ex iis, qui in ea familia laude digni extiterunt, numerandus mihi videtur in primis Gabriel Pennottus, Novariensis. Hic, sacris literis non mediocriter institutus, multos annos, apud suos fratres, Theologiam docendi munus egregie sustinuit, ac præcipuas Italicæ civitates, Quadragesimæ diebus, non minori eloquentia, divini verbi semine coluit. Sed omnis ejus facultas præsertim perspicui potest ex sacri Clericorum Canoniorum Ordinis historia tripartita; quæ, ut mea fert opinio, est ceteris ejus laudibus anteposenda. In cujus historię prima parte, de clericali S. Patris Augustini habitu institutoque copiosissime differit; quibus de rebus magna semper fuit, inter eosdem Canonicos, & Eremitanos ejusdem instituti fratres, discordia, & gravis quæstio, diu inter ipsos, variis disputationibus ac libris editis, exagitata, ut etiam, ex quotidianis sere contentionibus, ad verborum quasi contumelias descendere-
tur; cum utraque pars, non alio D. Augustinum habitu institutoque usum esse contenderit; adeo ut summis Pontificibus fuerit necesse, edictis, eorum hominum dissensiones dirimere. In altera vero historię ejusdem parte, originem progressumque totius Ordinis regularium Canoniorum exponit. Tertia pars, Canoniorum Salvatoris Lateranensis, discreta narratione concludit. Fuit vir probus, sui que instituti legibus obtemperans; dabatque operam, ut familie, quibus præerat,

ad legum earundem normam vitam moresque componerent. Quamobrem multorum in se odium concitavit, quorum, cum magna esset omnium fere rerum libertas, atque licentia, nemo erat, qui non ferret moleste, revocari se, & intra rationis cancellos includi. Ac Romæ, cum cœnobium Deiparæ Virginis, cui a Pace nomen est, Abbas administraret, hac de causa in apertum vitæ discrimen sæpe se obtulit, cum rationes sibi referri postularet ab eo, qui multos annos pecuniam publicam tractaverat, atque in fratris, qui mercaturam faciebat, usum transfuisse dicebatur. At, die quodam, deambulanti mihi in peristyllo ejus cœnobii cum uno ex illis Canonicis, quidam quasi armorum inter se concurrentium strepitus venit ad aures: cumque rogassent, quid illud rei esset, quinam inter se armis dimicarent, respondit ille, Fratres, arreptis ferramentis, quæ circa cubiculi Abbatis focum essent, (erat enim hyems summa, & illuc Fratres, calefaciendi se causa, convenerant,) in Abbatem impetum fecisse; qui, fulcris focalibus, illorum impetus excipiebat propulsabatque. Denique finis fuit ejusmodi, ut, transacta potestate, omnes eum fugerent, nec vellent aspicere; ac vix inventus est superior aliquis, qui habere in suæ familiæ numero vellet.

LVI. FLAMINIUS CERASOLA.

Flaminii Cerasolæ si patriam quæris, Bergomum; si genus, nobile; nam ejus civitatis patritius fuit; si literarum studia, Jus civile, ac sacrarum doctrinarum scientiam; si mores, optimos; si ingenium, non hebes ac tardum, sed austerum; fuisse invenies. In Latinis literis, puer, institutus est a Publio Fontana, poëta clarissimo; &, cum Romam se contulisset, educatus in domo Ludovici Cerasolæ, patrui, Basilicæ S. Mariz majoris Canonici, hominis, lingua prompti, qui nihil pensi haberet, occulta aliorum vitia palam facere, ac, nulla cujusquam injuria provocatus, aliorum existimationi famæque detrudere. Hic noctu interfectus est a suis; idque existimabatur potentioris cujuspiam opera fuisse perfectum,

Etum, in quem ille petulanti ore fuisset ausus invehere. Augebat suspicionem, quod, cum pecunia, argento ac pretiosa suppellectile abundaret, nihil eorum desideratum sit. In Gymnasio Perusino dedit operam Juri civili, ibique ejus artis interpretis & Doctoris nomen & facultatem obtinuit. Quod arbitror fuisse causæ, cur Robertum & Hugonem fratres Ubaldinos agnosceret, atque arcta sibi familiaritate constringeret. Ac primum, Herculano Gomitolo, Perusii Episcopo, navavit operam Vicarius, tum sive tempus, cum negotiosam vitam, ociozæ aulæ splendorem domesticis parietibus, studiorum fructus ambitionis laboribus, anteponendum esse duxit; atque ad aulicorum Roberti Cardinalis, Ubaldini, quem Perusii, ut diximus, cognoverat, numerum venit; eique fuit a cognitionibus. Quod antea muneris Sylvio Cardinali Antoniano præstiterat. Cui, sicut & Scipioni Coblutio Card. S. Susanuzæ, carus in primis fuit. Sed, aulam fortasse pertæsus, homo ad literarum studia propensus, se patriæ restituit, cum locupletem Canonicatum, Cardinali Ubaldino suffragante, fuisset adeptus. Nec factum est diu post, quam illuc profectus est, cum sui ipsum consilii pœnituit; credo, quod sæpius illi veniret in mentem, & Urbis, quam reliquerat, magnitudinis, libertatis, magnificentiæ, ac veteris amicorum, quos ipse diligebat, & a quibus diligebatur, consuetudinis. Quamobrem, repudiato Sacerdotio, ad Urbem se contulit: &, quoniam eo animo Romam venerat, ut ibi perpetuo viveret, atque etiam vivendi finem faceret, ædes sibi quam optimas, non procul ab Exquilis, ædificavit, easque eleganti suppellectile, & insigni in primis bibliotheca, instruxit; seque ad ea studia revocavit, quibus ab ineunte ætate deditus fuerat; nempe ad sacrorum librorum lectionem; ac, quæcunque tum Græci, tum Latini doctores, de B. Virgine, Dei matre, scripta reliquerunt, a reliquis eorum operibus excerpit, & in plura volumina digessit: opus, rerum divinarum interpretibus utile; nam nullo pene sumtu nulloque fere labore, quidquid ad illud argumentum attinet, uno in loco constructum inveniunt, quod deinde in concionibus ad populum agitare, ingenii & eloquentiæ viribus, possint.

Erat homo religiosus ac pius. Nam, quicumque domum ejus venerant, omnes ad Christi infantuli ac lactentis sigillum, ex cera, ni fallor, affabre factum, adducebat, & ad secum Orationem Dominicam & Salutationem Angelicam recitandam, invitabat. Domi hortum habebat, unde flores lectissimos; omni tempore anni, ad infantulum illum ornandum colendumque excipiebat. Tum, tempore Quadragesimæ, semel in die, idque vesperi, cibum capiebat; & quotidie mane ritu divinam in eo templo faciebat, quod, ex veteri Ecclesiæ instituto, ad scelerum suorum expiationem, populi frequentia, celebrabatur. Sed erat etiam iracundus, immitis; vitia hominum, sive quod ea ferre non posset, sive naturali quadam acrimonia, nullo hominum delectu habito, reprehendebat, insectabatur, majora verbis faciebat. Quo fiebat, ut in multorum odium & offensionem incurreret. Habuit etiam fratrem, Joanne Cerasola nomine, Gregorii XIV honorarium cubicularium. Moriens, omnium bonorum suorum heredem instituit Sodalitatem suæ nationis, ea lege, ut Collegium adolescentium Bergomatum fundaret administraretque.

LVII. ADRIANUS POLITUS,

SI Adrianus Politus, M. Antonii filius, Senensis, mortuo Cardinali Cornelio, cui in scribendis epistolis operam dabat, divinare potuisset, neque errasset in eligendo, quam potissimum de duabus conditionibus, quæ illi proponebantur, persequeretur, unam, Cardinalis Sorbelloni Mediolanensis, Cardinalis Peretti a Monte alto alteram; uterque enim cum sibi expetebat; parem meritis suis fortunam fuisset affecutus. Sed maluit, ad Sorbellonum migrare; credo, quod existimaret, Pontificatui cum maximo opportuniorem, quam illum alterum, quamvis Sorbellonus ad rem attentior esset; eumque, Gregorio XIII mortuo, secutus est, in conclave euntem. Ubi Cardinali Peretto, quem repudiaverat, ad Pontificatum Max. evecto, quantum conjectura errasset,

set, intellexit; ac tum, majorem ex errore suo dolorem sibi sensit inuri, cum eum vidit, qui locum illum, nempe ab epistolis, quem ipse neglexerat, occupaverat, ad Cardinales rescribi. Sed Cardinalis Sorbellonus, cum mortem obiret, certam quandam pecunie summam inter familiares suos distribuendam legavit, pro ratione cujusque dignitatis, & temporis, quo in sua familia fuisset: verum Adrianus, ex ea pecunia, quæ ad ipsum pervenerat, usum fructum quarundam ædium, ad scalas Montis Jordani, sibi coëmit, ut iis, quod vita suppedicaret, uti frui liceret; quæ semper omnibus nobilibus popularibus suis apertissimæ hospitalisque fuerunt. Etiam tum adolescentulus comœdiam, quæ Deceptorum inscribitur, composuit; & quo tempore, Romæ, sui juris ac spontis fuit, Cornelium Tacitum in vulgarem sermonem convertit; sed, cum sibi ipse non satisfaceret, rursus illud opus linæ traditum, longe expolitius atque perfectius reddidit. Scripsit etiam librum, Lexici cujusdam instar, in quem verba omnia Etrusca atque Latina coniecit, ac suis interpretationibus illustravit; qui liber acriter vehementerque oppugnatus est ab Academicis Florentinis, quorum plures, longo amicitie usu sibi conjunctos, habebat; sed, eruditorum fere omnium sententia, omnia argumentationum quasi tela, ab arce defensionis suæ, fortiter ac strenue, hoc est, docte eruditeque, propulsavit ac repulit. Sed, cum jam ab onere senectutis se gravius urgeri sentiret, Urbi se Romæ subtraxit, quæ, tanquam mare æstuans, perpetuis ambitionis aliarumque curarum fluctibus agitur, & in oppidum S. Quiriaci, ubi natus fuerat, quasi in portum, se recepit; ut ibi, quod reliquum esset vitæ, ociose ab animo degeret. Ubi non diutius, quam annos sex, mansit, propterea quod ejus quies crebris amicorum, ad se adeuntium, salutationibus interpellaretur. Itaque, sæviente hyeme, Sarcianum abiit; ubi alios sex annos, secum, ut dicitur, vixit, & antea vitæ rationes accepti & expensi cum Deo subduxit, & quod erat reliquum de ratione, est conatus illi persolvere; atque, mense Octobri, annos natus tres & octuaginta, est morbo consumptus. Qui, suo in sepulcro,

hæc verba, a se composita, inscribi: *Hic jacet Adrianus, M. Antonii Politi & Virgilia Ceina filius; qui in hac vita nihil maluit, quam quod fuit; utinam in alia sit, quod maxime concupivit. Ne mireris hospes, neve hoc superbe dictum putes. Nam, ab adolescentia, nunquam fere medico vel advocato usus, prospera semper valetudine fuit. Non enim est vivere, sed valere vita. Implevit annum octuagesimum ætatem, in quo primum lenta febris decubuit, & occubuit.* Dicitur fuisse ingenio acri, atque mordaci; ut propterea iudicium decreto, interdictum fuerit bibliopolis, ne librum epistolarum, quem ediderat, venalem haberent, quod in iis, in Principis illius, quem ad rem fuisse attentum diximus, aliorumque mores acriter vehementerque infectatus esset.

LVIII. CELSUS CITTADINUS.

EX omnibus rebus, quæ hominum ad se ingeniosorum studia ac voluntates alliciunt, summa atque perfecta omnis antiquitatis notitia, Celsi Cittadini, patritii Senensis, ad se operam, laborem, & industriam attraxit. Ac primum, nulla erat paulo illustrior familia, de qua ille, interrogatus, non statim esset progeniem illam, usque ab eo, qui ejus fuisset auctor nobilitatis, memoriter proferens. Atque ad eum finem, ex omnibus publicis Senarum tabulariis, ad tria voluminum millia attente diligenterque perlegerat, ex iisque, quæ sibi usui essent, excerpserat. Tum, veterum numismatum cognitionem, ita, longo usu, fuerat consecutus, ut vix nummum aliquem aspiceret, quin statim, quanti ille esset, ac cujus Imperatoris vel Consulis ætate fuisset impressus, afferret. At vero, in veterum monumentorum elogiis & inscriptionibus legendis explicandisque, ea erat eruditione ac scientia præditus, ut paucos haberet pares, qui autem illum antecederet, neminem fortasse invenisses. Ad historiam vero quod attinet, adeo omnium seculorum memoriam, quam ex libris acceperat, diligenter animo septam & custoditam habebat, ut non posset effluere;

&

& si quid ex historiis repetendum esset, revocabat se in animum suum, ibique, explicatis ordinibus temporum, uno in conspectu omnia videbat, quodque opus ad rem esset, excipiebat. Etruscam vero linguam ita possidebat, ita totam fecerat suam, ut nullum sit in ea verbum, vel priscum, vel novum, vel inusitatum, vel ab usu quotidiani sermonis intermissum, nullum vel simplex vel translatum, quod ille non nosset; nullus dicendi modus, elegans, venustus, alicuius, cujus ille rationem non redderet. Atque, ut, ad ea probanda quæ diceret, veterum librorum testimoniis uteretur, quingenta volumina, auctorum ipsorum manu conscripta, ut Petrarchæ, Boccatii, Bembi, aliorumque, sumtu, labore, ac diligentia comparaverat. Græcam linguam noverat, ad marmorum antiquorum inscriptiones, non minima ex parte Græco sermone Græcisque literis exaratas, intelligendas legendasque necessariam. Neque Græce solum scivit, verum etiam Hebraice. Multarum præterea artium elegantissimarum notitia præstabat, ut Cosinographiæ, atque plantarum. Erat optimis atque doctissimis viris deditus: itaque, quotquot, sua ætate, summæ doctrinæ & eruditionis famam habebant, usus amicitiaque comprehenderat; in his Franciscum Bencium, Fulvium Ursinum, Antonium Quærengum, aliosque non parum multos. In omni vitæ genere, veteribus Philosophis par similisque inveniatur. Ejus enim victus, vestitus, erat simplex, parabilis, sine munditiis. Neque id vitæ genus Senis solum adhibuit, ubi, annum agens septuagesimum, diem obiit extremum; verum etiam Romæ, apud summos viros, in quorum aulis versabatur, nihilo se nitidius, nihilo ornatus mundiusque, tractabat; neque dubitabat, in hominum facietorum urbanitatem incurrere, qui omnia posita in eo arbitrantur, ut scite convivium exornetur, ut ædes niteant, ut calces arte pedibus hæreant, ut omnis ornatus hominem deceat. At ille, bono ingenio se maluit esse ornatum quam serica veste indutum, honestis moribus præditum, quam nullis inquinato sordibus amictu circumdatum; quod, ut mulier inquit illa apud Comicum,

Pulcrum ornatum, turpes mores pejus ceno collinunt,

Lepidi mores turpem ornatum facile factis comprobant.

LIX. CLEMENS MERLINUS.

EA mihi sententia verissima semper est visa, quæ de uniuscujusque ingenio judicandum præcipit, ex eorum moribus, quibus cum ille conjunctissime vivit. Quis enim, cui nihil pensi sit, fidem frangere, ab jure, ab æquitate discedere, castitatem nihil pendere, amicus esse poterit illi, qui virtutes illas amplectatur, colat, & sanctissimas habeat? Qui a literarum studiis abhorreat, atque omni mente & cogitatione totus in eo sit, ut, quidquid incidat in animum, velit, & quod voluerit, conetur atque perficiat; audebitne fœdus amicitiamque cum eo connectere, cujus animo nulla major sit voluntas, quam totum vitæ suæ tempus, evolvendis Philosophorum Jurisconsultorumque libris, discendi causa, consumere? Omnino sic se res habet, ut similitudine, studiorum ac voluntatum, maximam ad amicitias conjungendas vim habeant, & quod est consequens, ex amicitiiis, quibus unusquisque implicatur, quale sit illius ingenium, sive probum sive malum, statuere liceat. Quamobrem, quamvis Clemens Merlinus Foroliviensis, nobili apud suos genere ortus, sua sponte, multis atque præclaris ingenii sui monumentis, satis signi dederit, egregii cujusdam animi atque præstantis; attamen, ex amicis, quibus ille deditus erat, manifeste apparebat, qualis quamque egregia inesset homini indoles, ad omnes pulcerrimas artes ad amussim effecta. Longum esset, sigillatim omnes optimos doctissimosque viros enumerare, quos ille complexus amicitia fuerat: satis sit, uno verbo ponere, tot eos fuisse, quot ætas hæc extulit. Atque, si nulli essent, quos proferre possemus, solus Fabius Chisius, vir domi suæ nobilissimus, sanctissimis moratus moribus, ab ingenio, doctrina, & eruditione locupletissimus, rebus gestis, multisque provinciis, pro Ecclesia Romana, summa cum abstinentiæ, probitatis, prudentiæque laude, administratis, longe clarissimus, quo ille est usus familiarissime, posset ipsi, egregii &

ex-

excellētis viri opinionem famamque conficere. Sed quamquam magna hæc Clementis sit laus, tamen foris expetitur. Habuit etiā apud se alia multa, sui ipsius propria, in quorum societatem non alius se inſert. Multæ in eo literæ & exquisitæ; nec deerant noſtræ hæ liberaliſſimæ humaniſſimæque; adeo ut, tum Latine, tum Etruſce, doctè eleganterque perſcriberet. Aderat Philoſophiæ, ac præſertim juris civilis, ſcientia, cujus uſum Chiſius ab illo, doctrinam a magiſtris, accepit; ſumma ſermonis comitas, lepor, venuſtas, admirabilis morum ſuavitas affabilitasque; qua adeo Ludovicum Card. Ludoviſium, quo tempore privatus Sodalitatem Deiparæ Virginis Aſſumtæ, in domo profeſſa Soc. Jeſu, una cum illo frequentabat, ceperat, totumque poſſederat, ut ſe nihil eſſet illi carius, nihilque jucundius. Qui Cardinalis deinde, Gregorio XV, patruo ſuo, Pontificatum Max. adeptus, nihil habuit antiquius, quam ut illum, quibuſcunque poſſet modis, ornaret; ac primum perfecit, ut in Auditoribus Rotæ numeraretur; tum, manibus pedibusque, ut dicitur, obnixè omnia fecit, ut in Cardinalium ordinem vocaretur. Sed omnes ejus conatus in irritum reciderunt: nam Pont. ſummus, ſive, ut communi more hominum loquar, fato aliquo, ſive quia egregia hominis merita parum nota atque perſpecta haberet, obſtinaverat ſe, hac in re fratris filio inorem non gerere. Nam, quamvis totius Reip. adminiſtrationem in ejus ſolicitudinem curamque rejeciſſet, Cardinales tamen creandi arbitrium penes ſe eſſe voluerat. Sed, cum Cardinalis acrius vehementiusque inſtaret, urgeretque, ut honoris ſui gratia, id homini amiciſſimo, ſibi que gratiſſimo, largiretur, tandem Pontifex, odio victus, Cedo, ait, alterum, qui meo magis animo allubeſcat; nam, in hoc, ne fruſtra ſis, operam perdis. Cumque Cardinalis diceret, neminem ſe alium, niſi Merlinum, velle, ridicule Pontifex reſpondiſſe fertur, Quoniam ita te obſtinate obduras, neque Merlinum neque Merlottum habebis. Interea dum altercationibus dies teritur, tempus abit, ac Pontifex, antea quam nova Cardinalium comitia fierent, e vita deceſſit. Gregorio extincto, de ſpe, longius honoribus procedendi, Cardinalis Ludoviſi

ope-

opera, lapsus, ad cognoscendas causas totum se contulit, & magnam optimi Jurisconsulti laudem est adeptus. Sed cum, procedente tempore, cepisset se nitidius in mensa tractare, neque solum invitare in cœna & in prandio plusculum, verum etiam, quavis diei hora, cum sitis urgeret, largius, nivatum in se merum invergere, contigit id, quod necesse erat, ut fieret plenior, vel potius obefior. Verum, cum propter civilia officia, ac perpetuas studiorum occupationes, quibus tenebatur, nullum fere sepositum tempus haberet, quod curationi corporis daret, ambulationi præsertim, cujus finis est sudor, vel lassitudo, qua noxii humores inutilesque tolluntur, quibus corpus abundat; acuta febri correptus est, & paucos intra dies ab ea perenitus.

LX. MUTIUS VITELLE-
SCUS.

Mutius Vitelleseus, Alexandro patre natus est Romæ, ex antiquissima nobilissimaque familia, quæ Corneto, ad quod oppidum, ejus origo refertur, profecta, in Urbem se contulit. Quæ familia, nunc ad unum senem redacta, ejus more (quæ est omnium rerum humanarum condicio, ut, quæ sunt orta, occidant,) una cum illo extinguetur. Sed parens Muti, cum esset locupletissimus, ac, propter divitias summamque nobilitatem, magna apud omnes existimatione & honore, propemodum est ad egestatem adactus, quod pro nonnullis magnam pecuniam intercessisset. Nam qui homo sese miserum ac mendicum volet, præ pro altero fiat. Quamobrem, quo fidem suam servaret, coactus est auctionem facere, ac relicta a majoribus suis bona vendere. Verum Mutius, simul ac, de parentum gremio exiens, est profectus in ludum, statim magna edidit, non adumbrata sed expressa, signa virtutum. Erat in puero docile ingenium, quo celeriter acciperet, quæ tradebantur; memoria summa, qua, quæ tradita fuerant, custodiret; mens, ad optima facilis, & a vitiis abhorrens; quam etiam severa parentum disciplina, & solers, for-

formandi custodiendique in ætate prima filiorum pudoris, diligentia, ad virtutem incitaverat. Accedebat forma honesta, summa suavitas oris ac vocis, sine arrogantiz suspitione gravitas, mores denique ad omnem venustatem mirabiliter facti. Quibus rebus fiebat, ut parentes ipsius, iique, quorum intererat, eum quam optimum fore augurarentur, omnes in eo suæ familiarizque dignitatis spes collocatas haberent. Neque dubium est, si ille ad Remp. voluisset accedere, quin, ascendens per omnes honorum gradus, cum illis moribus, ad summam amplitudinem fuisset perventurus. Sed, Patribus Soc. Jesu in disciplinam traditus, ut in ipsorum Gymnasio bonis artibus institueretur, sive eorum Patrum sanctitatis exemplo permotus, sive divini numinis afflatu impulsus, maluit, res perennes ac stabiles brevibus atque caducis, æternas interituris, antepone; atque dedit operam, ut in Societatem reciperetur. Neque fuit illi magnopere laborandum: nam tanta vis ingenii atque virtutis erat quærenda, roganda, obsecranda, non autem, ultro se dans, repudianda. Cujus rei nuncius simul ac allatus est domum ad parentes illius, eosque qui futuræ adolescentis amplitudinis spe alebantur, continuo commoveri omnes, queri, clamare; adolescentem, imperitum rerum, illud facinus, nondum confirmato consilio, sed dolis eorum captum, fuisse aggressum, qui, ad quæstum suum callidi, quicumque in adolescentibus Romanis, qui scholas ipsorum frequentarent, ingenio, nobilitate, divitiisque pollerent, in sua castra conarentur adducere; optimum esse factu, aliquo eum in loco, ab insidiis illorum tuto, collocare, atque experiri, num occulto divini numinis impulsu, an temerario incuntis ætatis impetu, fuerit in eam cogitationem delatus: nam fore, ut, a persuasionibus illorum desertus, mutata voluntate, quasi velificatione, ad nova consilia animum appelleret, & ad suos penates rediret. Itaque a Gregorio XIII impetrant, ut tantisper fidei custodizque Patrum Oratorii, quibus P. Philippus Neri, clarus sanctitatis fama, præerat, committeretur, quoad se ipsa res aperiret, videlicet, non illum Patrum Jesuitarum dolis deceptum, sed sua ipsius sponte, ad illorum

vi-

vitæ genus fuisse compulsum. At, cum S. Philippus, five parentum illius rogatu, five adolescentis animum tentandi gratia, conatus cum esset ab eo consilio revocare, ita ille locutus fuisse dicitur, ut vir sanctissimus, Spiritui Sancto, quo ille impulsus agebatur, non esse resistendum, decreverit. Remissus igitur in Domum probationis, unde fuerat abductus, secum una Stephanum Bubalum, nobilissimum Romanum, quem, sæpius ad ipsum officii gratia ventitantem, fecerat lucri, perduxit. Qui postea Stephanus eos in literarum studiis profectus fecit, ut Philosophiam ac Theologiam multos annos docuerit, studiis Gymnasii Rom. Soc. Jesu præfuerit, Domum five collegium pœnitentiariæ Apostolicæ, Rectoris nomine, administraverit, disputationem de Angelis eruditissimam doctissimamque typis mandaverit. At Mutius, summa sociorum omnium gratulatione, tanquam postliminio reversus, excipitur. Nam, quanto Societati ipsorum futurus esset ornameto, sentiebant. Neque opinionem, quæ de ipso erat, sefellit, sed multis partibus auxit. Erat enim exemplum modestiæ, demissionis animi, obedientiæ, virtutumque omnium; inter æquales suos, ingenii præstantia, clarius ceteris, explendescebat: quas omnes virtutes magis commendabant mores, natura mitissimi; simplex, nec arte quæfita, qua se dabat omnibus, comitas; & egregius, ut diximus, oris decor ac dignitas. Mature fuit ad docendos alios adhibitus, non quas-cunque disciplinas, sed omnium maximas atque gravissimas, nempe Philosophicas ac Theologicas. Itaque ad ducentos, (nam ego quoque in illis eram) ipso itinere duce ac demonstratore, triennale Philosophiæ curriculum confecimus; ac, ne idem in Theologia, sicut aggressus fuerat, efficeret, repentina quædam vis morbi prohibuit, ex perpetuo studiorum labore, quem vix poterat ferre, contracta; quod tenui & infirma esset valetudine. Quamvis in naturæ vitium, optima vivendi ratione, ac præsertim temperantia, ita correxisset, ut ad summam fere senectutem pervenerit. Cum igitur sanguinem cœpisset expuere, cumque metus esset, ne brevi in aliquam tabem incideret, superiores, de medicorum sententia, a docendi cura munere, ad ipsorum

Remp.

Remp. administrandam, transfulerunt: & initium magistratuum gerendorum cœpit a Collegio Anglicano. Nam, cum alumni illi seditionem fecissent, qua Patrum Soc. Jesu imperium detrectabant, missus est, ad eos compescendos, atque in officio retinendos, Rectoris ac moderatoris jure ac nomine. Qui statim, contumaces illorum motus, blanda, ac liquidiore quam ullus est Favonius, oratione sedavit; ac deinceps, ne commovere se possent, incredibili quadam animi lenitate, in quam, cum opus esset, severitatis nonnihil inslueret, firmavit, sibi que ad nutum dicto audientes effecit. Ne multa; tam scitus tamque doctus rei bene gerendæ inventus est artifex, ut non ulla esset provincia tam difficilis tamque ardua, quæ non illius digna administratione videretur. Itaque, nulla res est in ea Societate, in qua aut honos aliquis sit aut potestas aut procuratio, quin ea res illi sit delata. Atque sæpius Provincialis, postea Assistentis, functus est munere. Qui honos, cum apud illos, ut revera est, maximus habeatur, diligentissime mandatur, neque cuiquam committitur, nisi illi, qui probitate, prudentia, ac rerum usu, ceteris antecellat. Quos omnes magistratus ita gessit, ut neminem non solum ab se non alienaverit, sed, id quod in potestatibus difficillimum habetur, omnium in se amorem, benevolentiam, studiumque converterit. Quapropter, cum Claudius Aquaviva, Præpositus generalis, ex podagra, in morbum implicitus, decessisset, adeo, tantus illi locus, atque honos deberi existimabatur, ut nemo contradiceret. Factus igitur generalis Præpositus, per annos triginta continuos, in eo munere, summa omnium virtutum cum laude gerendo, versatus est. Ac, pro virium imbecillitate, nam infirmo erat corpore, satis commoda usus est valetudine. Tantum, aliquot ante annos quam est mortuus, cum, die quodam, Card. Francisco Barberino advenienti præsto esse vellet, ac celerius per cochlides scalas se demitteret, pede lapsus concidit; quo casu crus graviter læsit, habuitque necesse, quoad vixit, claudicare, ac scipione, ne caderet, uti. Postremo ætatis suæ anno podagra cœpit urgeri; ad extremum gravius ac periculosius ærotare. Cumque, ad ultimum casum adductus, ac

paululum de mentis statu dejectus, complures dies, ita defixus lecto jacuisset, ut nullam in partem commovere se posset, tandem ad optatos S. Patris Ignatii evolavit amplexus; a quo sextus, Societatem, quam ille fundaverat, gubernavit ac moderatus est, cum summa prudentia. Obiit annos natus unum & octuaginta. Plurimum valuit in dicendo; quamquam in concionibus ad populum, quod corpore erat infirmo, non multum jactare se potuit; sed in cohortationibus nemo erat, cui ille deberet cedere. Vox clara, canora, & jucunde ad aures accedens; sententiæ illustres, concinuz, venustæ: dicendi genus elegans, elaboratum, politum, quodque multitudinem magis delectaret, quam moveret. Nam illam vim, qua permoveret atque incitaret animos, in qua sunt omnia, non admodum tenuit. Itaque, si est optimum, suaviter dicere, nemo erat, qui eo melior inveniretur.

LXI. IO. STEPHANUS DE SYRIS.

SI quibusdam magnis ac præstantibus viris tam longa vita suppeditasset, quam magnum ingenium & ad omnia summa idoneum contigit, profecto nemo illis viris gloria præstitisset. Sed iniquo plane jure fieri videmus, ut, quibus singulare atque admirabile ingenium natura tribuerit, mors illis ejusdem augendi declarandique spacium ademere, & egregia ac præclara multorum, quæ ab aliis, ad illustrandas eas artes, quas colebant, prodire potuissent, tanquam semina enecaverit. Ex hoc numero multi, patrum nostrorum memoria, extiterunt: nostra vero ætate, ut de aliis taceam, proferre possumus Jo. Stephanum Syrum, Savonæ nobili genere natum. In hoc, jam inde serme ab incunabulis, ea, ad omnia disciplinarum maximarum studia, indoles ac materies eluxit, ut Franciscus parens, ex sex & viginti præstantibus ingenio liberis, quos ex Maria Bassa, uxore, susceperat, unicum elegerit, quem eruditissimorum hominum artibus, omnique eleganti doctrinæ totum ad-

addiceret ; cum alios ferme omnes post primam illam puerilem institutionem ad alia liberalissima ac digna homine nobili studia traduxisset. Quamquam eorum non nemo, non solum tinctus literis, sed Latine linguae literate peritus extiterit. Ac, cum de multis possem dicere, ne sim longior, uno Jo. Baptista mea definitur oratio. Hic, multos annos, primum solus, tum, cum Alexandro fratre, ita negociatus est Romae, ut nunquam omnino literarum studia, quibus a puero operam suam dederat, intermiserit, sed ad ea, quoties maximorum negotiorum onere, quibus premebatur, paululum sublevatus esset, sese retulerit. Post autem, summis illis laboribus, aut omnino aut magna ex parte, liberatus, Alexandri fratris pietate, qui eos in se susceperat, ac sepe numero, in amoenissimo suo suburbano, optimorum librorum lectione, quibus non exigua loculamenta instruxerat, ætatem exegit. Quemadmodum autem una cum fratre gravissimis publicis negotiis, suæ fidei diligentiaque commissis, satisfecerit, incredibile memoratu est. Tantum inveniendò excogitandoque, tantum ingenio prudentiaque valuit, ut ad belli, quo tum Italia exarsit, ceterarumque rerum maxime necessariarum usum, infinitam pene vim pecuniæ, sine cujusquam querela vel damno, subministraverit, ac res difficiles, arduas, dubias, implicatasque, certas, faciles, explicatasque, consilio atque ratione, reddiderit. Quam deinde provinciam cum alii magno quidem animo, sed non eadem qua ille virtute atque prudentia, suscepissent, nec ea illis sub manus recte succederet, immo tæde omnia provenirent, laudis illius obtreffatione conati sunt periculum illi creare, ejusque res aniplas atque magnificas in angustum coartumque contrahere. Sed hominis virtus, integritas, fides, majoribus erat præsidiiis munita, quam ut expugnari, latiore ejus res campo extendebantur, quam ut statim contrahi possent. Quamobrem omnes adversariorum conatus repulsi, in irritum reciderunt. Tali igitur viro Jo. Stephanus frater a parentibus est commendatus & traditus, ut omnibus cum doctrinis excolendum curaret, qui statim, puerum, annos natum non amplius tredecim, in Gymnasium Soc. Jesu, disciplinæ

Hh

cau.

causa, misit; ubi, admirabilis ingenii illius celeritas longam magistrorum operam non desideravit; nam vehementius properabat, quam ut condiscipuli, laudis ejus dein cupidi, æquo animo ferre possent; atque, intra sexennium vix integrum, omnes disciplinas, quæ a Patribus illis traduntur, arripuit, Grammaticam, Rhetoricam, Philosophiam, aliasque. Scribebat, tum soluta oratione, tum versibus, elegantissime; ut propter eam, in maxima concione, sit præmio donatus; qui honor, adolescentibus illis, prope dixerim, peræque gloriosius habetur, atque iis, qui Olympiæ in quinquenniali illa ludorum celebritate victores, præconis voce, citabantur. Sæpe disertissimas orationes habuit; sæpe poemata recitavit; in publicis Philosophicis disputationibus, ab ipso dissentientium argumenta, tanquam tela, cum plausu rejecit. Has artes, tanquam solum ac fundamentum substruxit Jurisprudentiæ fabricæ, quam erat exædificaturus: quam fabricam, quid mirum, si tam alte extulerit, cum nihil materiæ, nihil labori pepercerit, cum non a Græcæ Latineque linguæ notitia, non a Philosophiâ, ut plerique faciunt, inermis ac rudis, sed iis artibus pulcre instructus, ad jus civile percipiendum accesserit? nam cum brevi ejus artis, qua nulla est facilior, cognitionem devorasset, ita pectus, Juris civilis scientia, complevit, ut antea prope magister quam discipulus, juris interpret quam consultor, inventus sit esse. Neque jam quidquam relictum videbatur, nisi, ut quod naturali singularis ingenii prudentiæque bono, & abundantia doctrinæ, sponte sua faceret, ut nimirum legum sententias aperiret, Juris laqueos enodaret, suarum rerum incertos compotes consilii dimitteret, id inquam etiam munus, eorum auctoritate concessuque assequeretur, quibus jusest ac potestas, juris utriusque publicæ interpretandi facultatem aliis attribuere. Hanc igitur facultatem, magna omnium cum voluntate adeptus, etiam tum adolescens, domum suam omnibus apertam, cœpit habere, qui in suis rebus turbidis, ipsius essent opis indigentes. Itaque domus illa, ut de Q. Mutii janua vestibuloque narratur, magna quotidie frequentia civium, ac summorum hominum splendore, celebrabatur.

Quod

Quod munus, de jure respondendi, eo erat omnibus gratius, quod illud summa cum animi integritate innocentiaque conjunxerat. Non eas ille lubricas adolescentiæ ingressus est vias, in quibus consisti sine casu vix potest; sed directum ad virtutem persecutus est iter. Nihil dedit ætati, nihil voluptati concessit, nihil conviviorum lustrorumque libidini tradidit. Neque dubium cuiquam erat, quin brevi illius domus futura fuisset totius civitatis oraculum, si per Urbanum VIII Pont. Max. licuisset, qui, cum divinis quibusdam bonis instructum exornatumque cum aspiceret, æquum existimavit esse, lumen illud consilii, doctrinæ, ac sanctitatis, patriæ, unde emanaverat, restituere, ut illam tueretur, augeret, ornaret. Sed tum omnium sententia fuit, elegantius Pontificem illum facturum fuisse, si lumen illud in arce orbis omnium terrarum, Romæ videlicet, constituisset, ut non uni populo, sed nationibus omnibus illucesceret. Itaque, vix expectato legitimo tempore (nam trigessimum pene ætatis annum attigerat,) Savonensem Episcopum cum creavit. Illud vero insigne ac singulare ipsius doctrinæ exemplum edidit, quod eo ipso die, quo istud ipsi onus demandatum fuerat, cum se in suburbanum suum, de quo diximus, contulisset, sive colligendi sui gratia, sive meditandi, quantum esset illud onus, quod suis humeris imponeretur, admonitus est, ut postridie Pontifici se sisteret, quo de se, ut moris est, periculum fieret in literis: sed, quamvis omnibus rebus imparatus accessisset, usque eo se solertem exhibuit, ut, interrogatus ab Antonio Coccino, Rotæ auditore, ac postea Decano, qui ejus excutiendi partes acceperat, de nova ac perplexa questione, quam ille diu secum agitaverat, at Jo. Stephanus ne cogitaverat quidem, ita docte, ita fidenter, Coccino contra disferenti, respondit, ut ipse Urbanus diceret, ipsius disputationem probabiliorem verioremq̃ue, quam Coccini, sibi videri. Profectus Savonam, biennio post revocatus ab Urbano, ut ad majores res adhiberetur, dum professionem adornat, est mortuus. Quanto Jo. Baptista & Alexandri fratrum, ac totius civitatis, cui illi ob incredibilem ipsorum humanitatem ac suavissimos mores,

erant gratissimi, cum dolore dici non potest. Videbant enim, summum familiæ suæ ornamentum ac decus extinctum; quod Urbanus, prudentiæ, qua Ecclesiam suam administrabat, fama commotus, amplissimis cum honoribus destinaverat; cumque vita functum audivisset, Profecto vir sanctissimus, inquit, est mortuus.

LXII. ANTONIUS MARIA DE GRATIANIS.

Quam multa sæpe ac summa ingenia in occulto latent! quæ, si amica cujuscumque opera in apertum proferrentur, maximum sibi, familiæ, patriæque suæ, atque adeo orbi terrarum, splendorem & ornamentum possent asferre. Nunc autem, cum, tanquam ferrum humi defossum, in tenebris jaceant, sua desidia, tanquam rubigine, exeduntur, & illorum usus nequior efficitur. Atque, ne longius aberret oratio, nisi Antonius Maria de Gratianis, Biturgiæ, nobili in primis loco, natus, in Cardinalem Commendonum incidisset, qui cum Aloysio fratri magnus usus & amicitia intercedebat, vel in castris usu militiam didicisset, Julii patris exemplo, qui sæpe in ea ordines duxerat, vel procula a Rep. sine literis, sine aliquo rerum usu, agrum, a patre relictum, coluisset, vel per inertiam desidiamque, mortis similem vitam exegisset. Commendonus igitur, qui fortasse, qua erat animi sagacitate, adolescentis ingenium odoratus fuerat, Aloysio fratri fuit auctor, suator, impulsor, ut liberalibus cum disciplinis erudiendum instituendumque curaret. Itaque, annos natus unum & viginti, missus est in quoddam Forilivii oppidum, ubi notus quidam magister, brevi ac nova ratione, eas artes docebat, quibus ætas puerilis institui ad humanitatem solet. At ipse parentum, in ipso erudiendo, negligentiam, discendi celeritate compensavit. Nam, cum eo esset profectus, omnium rerum rudis, paucis post, annis An mensibus? reversus est Latini sermonis adeo peritus ac doctus, ut diligentiam admirarentur omnes, ingenium agnoscerent, at Commendonus adeo amplexus est hominem, ut eum nunquam a se dimiserit, sed in filii loco dilexerit.

ac

ac, magistri partes sumens, in libris Aristotelis de Rhetorica, de Repub. ac de moribus, crudierit, tum semper ad inanus habuerit, ejusque & fide & industria cognita, omnium consiliorum cum esse participem voluerit, in illis octo nobilissimis legationibus, quibus functus est, quarumque immortalis erit memoria, quibus legationibus diligenter obeundis, ac fideliter administrandis, Commendonus ita se præbuit, ut eum omnes, tanquam e cælo delapsum, intuerentur. Nam, si repetere memoriam temporum placeat jam inde usque ab initio nascentis Ecclesiæ, inueniemus, nullum unquam fuisse tempus Reip. Christianæ atrox atque difficile, quin eodem tempore divinitus excitatus sit aliquis, qui ingenio; auctoritate, sapientia, arduis illis rebus ac dubiis posset occurrere: idque cum constet, tum ex antiquis tum ex recentibus nostrorum monumentis ac literis, non est necesse pluribus verbis ostendere. Atque in Commendoni ætatem inciderunt hæc omnia, maxima atque gravissima; Concilium Tridentinum, cujus convocandi gratia, his missus est ad Ferdinandum Cæsarem, semel a Pio IV Pont. Max. iterum a Cardinalibus, qui sacrosancto illi conventui præerant. Tum, res in Polonia consecutæ sunt, implicatæ atque difficiles, unde magnus periculorum metus portendebatur: eo etiam profectus est, semel atque iterum; primo, Pii IV jussu, ut Nuncii ordinarii provinciam administraret; quod munus cum egregie atque sapienter obiret, antequam inde discederet, creatus est ab eodem Pont. Cardinalis: deinde coactus est rursus illud iter arripere, missus a Pio V legatus ad Regem Augustum, ut, uxori Catharinæ nuncium remittere cogitantem, de sententia dimoveret, & ad bellum Turcis inferendum impelleret. Ubi etiam, cum Rex ille diem obiisset supremum, omnes conatus adhibuit, ut in ejus locum succederet aliquis, qui catholicæ religionis cultor existeret; ac tantum auctoritate potuit, valuitque eloquentia, ut Henricus, Galliarum Regis frater, Rex Poloniæ, omnium suffragiis, eligeretur. Quibus actis, cum Pontifex fecisset illi potestatem redeundi in Urbem, rebus nondum plane in tranquillo collocatis, & hæreticis, quancunque fors

obtulisset rerum novarum occasionem, paratis arripere, Antonium Mariam, de quo est sermo, reliquit, ut, ex Pontificis auctoritate, Episcopos & Catholicos Regni confirmaret, novoque Regi adesset. Quem cum adventare, jamque in Saxoniam pervenisse, comperisset, sexcentis ferme millibus passuum obviam illi processit, & quo loco, Regni res essent, exposuit; rationes, quibus illud ex sententia administrari, & Catholica fides promoveri posset, ostendit. Quæ ita Regi grata fuerunt, ut ea sibi scripta tradi mandaverit, neque deinceps quidquam, nisi ex ejus auctoritate atque sententia, gesserit. Inciderunt etiam in Commendonum tempora, alia quatuor, maxima atque gravissima: fides catholica, tota Germania, labefactata, ac pene convulsa; comitia Augustæ habenda; metus, ne Augustana Confessio, in summam Germanæ religionis perniciem, Austriæ civitatum populis permitteretur; sædus adversus Turcam inter Christianos Principes ineundum. De his omnibus, quater intra paucos annos, missus est in Germaniam Legatus ad Maximilianum Cæsarem; qui etiam fuerat placandus, quod iniquo animo tulisset, Cosmo Mediceo, a Pio V, Magni Ducis cognomentum fuisse inditum; quod, ejusmodi cognomentis & appellationibus quemquam afficere, ad Imperatorem, non autem ad Rom. Pontificem, pertinere contenderet. In his omnibus adfuit Antonius Maria; neque quidquam sine ejus consilio gestum est. Sentiebat enim Commendonus, quantæ sibi ejus opera esset utilitati ornametoque. Neque id Regem Henricum fugit; qui magnis ad se illum pollicitationibus, semel, iterum, ac sæpius, invitavit, ut ejus opera, quemadmodum expertus fuerat, egregia atque fideli uteretur. Sed nulla tam luculenta condicio inventa est, quæ illum potuerit a Cardinali Commendono divellere; cui soli, neque alteri cuiquam, quoad viveret, suas operas deberi existimabat. Qui Cardinalis cum de referenda tot tantisque illius in se meritis gratia cogitaret, si non parri, grato tamen aliquo munere; die quodam ad se vocatum donavit syngrapho, in quo erat perscriptum, ut ab argentario, quatuor scutorum millia, numerata per-

perciperet, quæ vellet esse quasi mercedem laborum, quos pro ipso suscepisset; simulque petebat ab eo, ne hanc, quamvis exiguant, sive in ipsum voluntatis significationem aspernaretur, sed illud, quidquid esset, æqui bonique consuleret. Cui Antonius Maria respondisse fertur; quidquid fecisset, se honoris sui gratia fecisse, verum, si res ad calculum revocaretur, bene inita subductaque ratione, non par inveniretur ratio acceptorum atque datorum: nam, se multo illi plura debere profitebatur, quam ipse ab illo accepisset: illum vero dolorem se non posse dissimulare, quod cerneret, eorum se loco ac numero haberi, qui mercenariam ipsi operam darent: se enim, nihili antea hominem, ejus opera atque labore, factum esse alicujus precii, ipsique Reipub. inventum esse, in usu, probiorem. Ac, petita ab eo demisse & humiliter venia, syngraphum confecit. Admiratus Cardinalis magnitudinem animi, spernentis id, ejus alii cupiditate abrepti, fidem jurisjurandi, religionem, justitiam, bonam famam, existimationemque contemnunt, non ita multo post, locupletem Saxiferrati Abbatiam, ex qua bis mille scuta quotannis redibant, sibi detractam, est illi, quamvis invito ac repugnanti, elargitus. Mortuo Cardinali, Sixtus V. usus eo est, in Latinis literis scribendis. Quo in munere perquam diligentem ac laudabilem illi operam dedit. Post cujus mortem, eodem gradu fuit apud Alexandrum Cardinalem Montanum, eique in tribus illis Conclavibus, quæ deinceps consecuta sunt, affuit; in ejusque opera, Clementi VIII, ad Pontificatum Max. adipiscendum, longe maximus usus fuit. Id quod Clemens non dissimulavit, sed sæpe, multis audientibus, dixit, se, Antonii Marix, in agendo, dexteritati, prudentiæ, diligentique Pontificatum referre acceptum. Quapropter ornabat eum officiis beneficiisque pluribus: nam & Episcopum Americæ creavit; quod superiori Episcopo mortuo esset alter, in illius locum, subrogandus; & Nuncium, ad omnes primum Christianos Principes, sæderis causa feriendi contra Turcas, deinde ad Kemp. Venetam, misit. Ubi, maxime duabus in rebus gravissimis, ejus virtus eluxit. Etenim cum de jure imperioque quæreretur, quod Veneti in

Adriatico mari exerceant, pro Sede Apostolica libellum elegantissimum scripsit, qui etiam nunc in tabulario Vaticani palatii continetur: neque tamen eo offensi sunt Veneti. Cumque Alphonso, Ferrariæ Duce, vita functo, Cæsar Estensis, cognatione illi proximus, Ferrariam sibi deberi, contenderet, auctoritate consilioque perfecit, ne Senatus ille Cæsaris causam susciperet, eamque armis tueretur; immo ab eodem obtinuit, ut Sedi Apostolicæ plura armorum genera, ad illius belli usum, suppeditarentur. Atque constat, Clementem habuisse in animo, in Cardinalium Collegium eum coopere, ac non semel, sed quoties Cardinalium comitia essent habenda, descriptum in illis habuisse, qui eo essent honore cohonestandi; sed semper sententia destitisse, deteritum a Petro Cardinali Aldobrandino, fratris filio, cui cum Magno Etruriæ Duce, ejus ille in imperio ac ditione erat, (nam Biturgiæ, ut diximus, ortus, quæ Magnorum Etruriæ Ducum paret in imperio, cum primis illius civitatis numerabatur,) varix, inquam, discordiarum causæ intercedebant. Verum, cum jam ætate confectus, & podagræ vehementer obnoxius, re ipsa experiretur, Venetum cohim sibi minus esse salubre, petiit opere maximo a summo Pont. ut ab ea provincia removeretur; at, venia impetrata, Ameriam se contulit. Quam Ecclesiam, usque ad extremum vitæ spiritum, & integritatis, prudentiæ, ac sanctitatis fama, administravit, quæ sit nunquam inferitura, sed deinceps omnibus, qui in eundem locum ac numerum venerint, ad similitum virtutum exemplum imitationemque victura. Nemini erat molestus, nemini gravis; sed contra, omnibus jucundus, omnibus comis; nunquam animos extulit, sed demisse humiliterque se gessit; nemini petenti aditum conveniendi non dabat, sed omnes ad ipsum aditus cunctis, qui vellent, quibusvis erant horis aperti; nemo, se ab eo despectum, nemo, contra rem suam injuria aliquid decretum fuisse, questus est unquam; sed omnibus jus suum tribuebat, omnes amplectebatur, omnibus se dabat, cum magna conversatione; cum tristibus severe, cum remissis jucunde vivebat; atque, ad Apostoli exemplum, ad cujusque ingenium, quo omnes lucrificeret, versabat

su-

suam naturam, huc & illuc torquens ac flectens. Nullum honesti sermonis genus a se unquam alienum duxit, sed de omnibus rebus, quæ in sermonem disceptationemque cadunt, copiose eleganterque discebatur; cum militaribus hominibus de officio imperatoris, ac de omni re militari, cum eruditis de omni elegantia literarum, cum philosophis de rerum natura, cum Theologis de Deo immortali divinisque mysteriis, loquebatur. Denique homo erat omnium, ut dicitur, horarum, temporum, atque hominum. Multa reliquit egregia, quæ teruntur hominum manibus; Synodum Ecclesiæ Amerinz, de bello Cyprio, de casibus adversis illustrium virorum sui ævi, Card. Commendon vitam; quo libro omnes ab eo legationes obitæ, omnesque res magnæ, sua auctoritate consilioque gestæ, narrantur. Obiit Ameriz, annos natus quinque & septuaginta, cl. 15 CXL.

LXIII. ALEXANDER MAGIUS.

Fuit in Alexandro Magio, Bononiz, nobili genere, nato, quemadmodum in quibusdam laudandis viris, si non summum ingenium, attamen admirabilis erga literarum studia ardor atque conatus; ac præsertim tantus erga omnes, qui aliqua sapientiæ laude excellerent, amor atque propensio, ut totum se illis daret, eorumque studiis obsequeretur. Ac præsertim Torrenatum Tassum ea complexus est benevolentia, ut, quotiescumque, in congressibus literatorum, orta esset quaestio de Tasso atque Ariosto, uter alteri anteponeendus esset, pro Tasso acriter vehementerque pugnaret, eique palmam dandam esse contenderet. Primis ætatis suæ annis, Fabium Albergatum, virum clarissimum atque nobilissimum, cujus facultas, ex libris quos edidit, doctissime eruditissimeque scriptis, apparet, consuetudine sua sic sibi devinxit, ut alter ab altero dirimi distrahi que non posset. Sed, cum ad omnium ingenuarum elegantissimarumque artium studia se contulisset, præcipuam tamen operam, juris Cæsarei ac Pontificii scientiæ de-

dit. Nam, etsi de humanissimis politissimisque literis, ac de omni re, quæ in disceptationem cadit, doctè copioseque loqueretur; tamen, cum ad jus civile ventum erat, ita in disserendo acutus, ita elegans, ita disertus, inveniebatur, ut hominum admirationes & studia commoveret. Et, cum, in Bononiensi ac Macerateni Gymnasio, Juris civilis publice docendi munus accepisset, multos annos magno illud cum plausu sustinuit. Quo munere cum se tandem abdicasset, Romam ad capeffendam Remp. venit, ejusque gerendæ initium a referendis Pontificis Max. supplicibus libellis, fecit. Qui gradus honoris, accedentibus ad Remp. primus se offert. Erat Roma eo tempore Bonifacius Cardinalis Bevilacqua, modicis quidem opibus, verum animo erga præclara ingenia, humanioribus præsertim literis exulta, ingenti ac prope regio. Hic suam in domum Antistites aliquot, probos ac doctos viros, exceperat, quod egestas locum illum honoris, in quem venerant, pro illius dignitate, tueri non patiebatur. In iis Magius numerabatur, atque a Bevilacqua, præ ceteris, beneficiis ac muneribus ornabatur. Nam cum ille, Perusium primum, tum Picenum, Legatus a summo Pont. missus fuisset, in utramque provinciam secum Magium Prolegatum adduxit, quem, ob egregiam juris civilis scientiam, parem illi muneri, ad quod elegerat, fore, atque ob fidem, quam in eo perspexerat, ipsius existimationi & famæ consulturum, non dubitabat. Neque, in eo eligendo, Cardinalem spes, quam conceperat de illius fide ac doctrina, fefellit, sed illius expectationi perque respondit. Tum Fanum fortunæ solus regendum accepit: cui muneri; sui semper similis, magna abstinentiæ justitiæque cum laude præfuit. Reversus in Urbem, relatus est in numerum ac cœtum illorum, quorum ex sunt partes, ut Ecclesiastici imperii civitates a moderatoribus illarum, recte atque ex publicæ utilitatis ratione administrantur; cui cœtui, Congregationi boni regiminis nomen est inditum. Hoc quoque egregie, usque ad exitum vitæ, functus est munere. At totum illud tempus, quod a gravioribus ipsi curis supererat, libenter iis studiis dabat, quibus ab ineunte ætate deditus fuerat; pulcherrimis nimirum

rum elegantissimisque literis illis, quæ, nobilia præsertim ingenia, sua amœnitate suavitæque, ad se alliciunt ac capiunt. Itaque sæpius in Academiis conspiciebatur, aut doctissimis aliorum sermonibus interesse, aut se aliis ad docendum dare, aut carmina, a se facta, in medium afferre, & existimantium arbitrio judicioque summittere. Quæ carmina, una cum aliis ejus operibus, Etrusco sermone conscriptis, ejus morte, ad fratrem pervenerunt, ac, domesticis parietibus septa, aliquando in lucem proditura, servantur. Sed in Academia Humoristarum frequentior erat; in qua etiam principatum obtinuit. Atque ex tot animi ingeniique bonis, unum, ejus in corpore, vitium deprehendebatur; quod, altero crure captus, deformiter claudicabat. Athæ corpora claudicatio nihil plane animo detraxit: qui, semper excelsus erectusque, in nulla virtutis parte claudicavit. Mortuus est domi Cardinalis Bevilacqua, ut quidam ajunt, ex stranguria; ut alii, ex morbo, quem puduit medicis aperire; quamobrem a curatione desertus, eum, nondum maturum, ad interitum dedit.

LXIV. BONIFACIUS VANNOZZIUS.

Non semper accidit, ut claritas ac nobilitas animi, sit generis ac sanguinis nobilitatis splendorisque comes; sed altera ab altera, non raro, disjungitur. Etenim sæpe videas vilem & ignobilem in eo animum, qui sit nobili genere ortus, contra generosum & clarum in eo, qui nullum a majoribus suis lumen acceperit. Atque, si alterutrum sit optandum, malim equidẽm virtutem sine fumosis imaginibus, quam fumosas imagines sine virtute; quod illæ extrinsecus accidunt, hæc animo intrinsecus hæreat; in illis nullam nos partem habeamus, hæc tota a nobis fere pariat. Itaque, merito laudatur, multisque nobilibus viris antefertur Bonifacius Vannozzius, Pistoriensis, qui, cum honesto quidem apud suos loco natus esset, sed illa summæ nobilitatis laude non elaperet, ita tamen virtutis ingeniique bono excelluit, ut, nisi fortunæ malignitas, quæ virtuti fere

semper obstitit, intercessisset, ad summam fuisset amplitudinem perventurus. Hic, etiam tum juvenis, cum factus esset Gymnasii Pisani Gymnasiarcha, quo munus illud splendide magnificeque administraret, facta auctione, bona sua, quæ non erant admodum exigua, præsentipecunia divendidit. Quibus partibus egregie transactis, ad Principem Sulmonæ se contulit, eumque, tum proficiscentem in Hispaniam, tum ab ea in Italiam redeuntem, est comitatus; deinde, ejus jussu, in Sabaudiam profectus, ut ibi cujusdam litis patrocinium susceperet, (erat enim jurisconsultus in primis;) quæ his erat Principi, cum Regis Galliarum classis præfecto communis. Deinde navavit operam ab epistolis, Cardinali Sfondrato, qui postea appellari maluit Cardinalis S. Cæcilie, Gregorii XIV fratris filio. Cui fideliter liberaliterque serviendo, ita Pontificis gratiam promeruerat, ut ab illo iis sacerdotiis locupletatus sit, unde scuta mille quotannis redibant; ac sine dubio Cardinalis etiam honore eohonestatus fuisset, nisi quædam calamitas intervenisset, quæ de tanta tamque explorata spe illum everteret. Statuerat omnino Pontifex, proximis comitiis, in Cardinalium eum ordinem cooptare, ac rem cum eo communicaverat: sed simul egerat, ne sua cuiquam consilia faceret palam; volebat enim, ea esse clausi omnes; atque serio proposuerat, Principis arcanum, suæ fidei creditum, ita suo in pectore clausum ac constructum habere, ut indidem ille saluum posset auferre, cum vellet; sed propositum tenere non valuit, Cardinalis Sfondrati sibi precibus imperioque ereptum; qui ardebat cupiditate incredibili, cognoscendi eorum nomina, qui essent cooptandi. Nolebat enim prætermitti amicum quendam, cordi suo carissimum. At Pontifex, ubi eum comperit tacere nequisse, cum maxime erat opus mutito, accersitum ad se compulit, ex schedula, in qua candidatorum nomina erant descripta, sua ipsius manus nomen delere, & illius substituere, pro quo Cardinalis laborabat. Itaque ad fidem, quam prodiderat, vindicandam, non alius est carnifex, præter ipsum, adhibitus. Post mortem Pontificis, transit ad Henricum Cardinalem Cajetanum, qui, missus ad Regem Poloniz,

niz, maximis de rebus legatus, eum semper habuit ab epistolis, & consiliorum omnium arcanorumque participem. In qua legatione quanti fuerit ejus opera, apparet ex epistolis, quas, cum reversus esset in patriam, in unum volumen collectas, ac miscellanearum nomine appellatas, emisit. Nam sæpius ab Henrico (qui, quanto sibi ornamento esset, intelligebat,) missus est ad magnum Regni Cancellarium, qui exercitibus regis præerat, & in Transylvaniain, ut aversos Regis Poloniae, & Andreæ Cardinalis Battorii, fratrum, animos componeret, ac litium discordiarumque inter se causas præcideret, atque convelleret. Interim Henricus, legatione sua obita, reversus est Romam, secumque Vannozzium duxit, suis item partibus functum; ac sui eum juris esse permisit. At, illi non licuit esse ocioso: nam statim a Cosmo II, Magno Etruriæ Duce, Florentiam est evocatus, ut Principi Francisco, qui futurus erat Cardinalis, operam navaret: suo enim jure se repetere eum posse existimabat, in quem, utpote sibi subiectum, imperium & potestatem haberet, quandoquidem tanto alienis usui utilitatique fuisset. Tum, rursus ad Urbem ab eodem remissus est, quo, Francisci loco (nam tum res ita poscebat) Carolus frater Cardinalis renunciaretur. At verum est, quod dicitur, nullam esse sapientiam tam magnam, tam puram, ad quam infuscandam non aliquis stultitiæ rivulus influat. Nam vir, tam prudens, tam doctus, in Magni Ducis aula, quædam inepte, & contra sapientis gravitatem, admisit; &, quod magis mireris, contra id, quod ipse, in suis politicis & Christianis præceptionibus, sigillatim fugiendum esse docuerat. Ex quo licet intelligere, quanto sit facilius, aliis recte præcipere, quam suis ipsum præceptis obtemperare. Solebat Dux ille magnus, ubi paululum volebat hilaritati se dare, Presbyterum quendam, Julio nomine, hominem oppido ridiculum, ad se vocare, eumque pastoritia fistula canentem audire, ac vini congium unico spiritu haurientem aspicere. Tum ille, nulla de causa, multis audientibus dixit, pluris fieri vini cadum vel utrem, quam honestos homines, ac literis deditos. Quod cum ad Magnum Ducem esset perlatum, jussus est ab aula recedere,

ac Pistorium abire; ubi præcepta illa Politica & Christiana, de quibus supra commemoravimus, in tres libros divisa, composuit, ac librum unum epistolarum miscellanearum ad alios duos, quos antea scripserat, addidit. Quæ omnia, typis impressa, circumferuntur. Sed ibi ad alias longe majores ineptias recidit. Ducebatur in vincula famulus quidam suus; hunc, per vim, contra jus fasque, e licitorum manibus abstulit. Non est prætermittenda Principis illius gravitas ac moderatio. Nulla graviore eum poena affecit, quam ut Romam in exilium mitteret; ubi a Cardin. Aquino, ejus amicissimo, exceptus, paulo post morbo periit.

LXV. FORTUNATUS SCACHUS.

Qua tempestate, sæva atque immanis lues toto Illyrico debacchabatur, adeo ut mortalium plurimos, Orci faucibus absorbendos vorandosque committeret; fiebat, ut non parum multi fuga sibi consulere, atque alios lares, alias civitates, alias urbes persequerentur. In his Margarita quædam, Petruich cognomine, ex oppido Dalmatiz Trau, una cum aliis multis, Anconam patria sede commutavit. Et, quoniam, inanis a marsupio, verebatur, ne vitam, quam salvam a pestilentia retulerat, ad egestatis terminos redacta, fame deperderet, Equiti Jacobo Oliverii Scaccho, ex vetere claraque ejus civitatis familia, operas suas, pro ancilla, locavit, cum esset ætate integra, & forma non mala. Sed bonus ille conductor fecit id, quod occasio suadebat, ætas hortabatur, libido cogebat, ut plus ab ea, quam quantum sibi debebatur, exigeret, nec ancillares tantum operas, quas conduxerat, verum eas etiam, quæ sunt concubinae, deposceret. Itaque die quodam, fortasse plus potus, mulierem compressit, ex eoque complexu gravidam fecit. Sed id, quod natum esset, decreverunt, non tollere, sed exponere. At expositum hospitalis domus Deiparae Virginis Annunciate, misericordia, excepit, & quinquentium aluit. Quo exacto, parentes, quod fortasse fa-

Qui eos sui poenitentia subiisset, pro suo agnitum, donum reduxerunt, & Fratrum Eremitarum S. Augustini habitu indutum, religioſe illorum familiz dicarunt, & F. Antonii Mariz nomine appellarunt; cum antea illi, legitimæ prolis jus Pontificio diplomate obtinuissent, nempe ad personam & ad honores dumtaxat, non autem ad hereditates. Jam pueri res omnis esse in vado, jam ille in portu navigare videbatur; cum nova tempeſtas exorta, inde eum repulit, quo Favonius, vel si quis est alius illi liquidior ventus, antea detulerat; nova videlicet Sixti V. Pont. Max. constitutio, quæ omnes, ad Religioſorum ordinum familias iis aditus interclusos esse jubebat, quibus, ex minus justis nuptiis naſci contigiſſet. Sed paulo poſt, ſedatis fluctibus, ſecundiore illi ſtatu veſto, Fani fortunæ, ad eandem familiam aditus patuit, Fratriſque Fortunato nomen eſt inditum; fortasſe quia fortunam, a qua oppidum illud nomen invenit, propitiâ habuiſſet. Jam vero, quæ tanta dicendi vis eſt, quæ tanquam penicillus, diſertæ orationis ope, quaſi coloribus, incredibilem illam dicendi cupiditatem, quæ peracri ingenio hominem, & ſtudio ſagranti, inceſſerat, poſſit exprimere? qua ſagrabat ſic, ut vix in altero ſagrantiuſ ſtudium inveniretur. Ac primo, unus e multis, nulloque apud ſuperiores numero, in ſunera vocatus cum aliis una prodire, publicis privatiſque ſupplicationibus intereſſe, horarias tum nocturnas tum diurnas preces, ceterorum choro inſertus, fecitare, pſallere, menſis deſervire, interdum in culina, obſonii partiendis, coquinandis, patinis aliisſque vaſis abſtergendis, dare operam quoque, denique alia omnia facere, quæ vulgarium communia ſunt fratrum. Sed, cum in hac ignobilis vitæ patientia aliquandiu perſeveraſſet, jamque diſcendi deſiderium, quo æſtuabat, ſerre non poſſet, tandem magnavi, convocatis in auxilium amicis atque cognatis, expugnavit, ut Ariminum, ſtudioſorum cauſa, mitteretur. Ubi, non contentus ea eruditione, qua ibi ſe expoſcili ſentiebat, quod ſibi erat conſcius, ſui ingenii vires longe majorem perpeti poſſe; ſtatuit, alibi eam exquirere, ejusque comparandæ gratia, operæ, ſumtui, & labori non parcere. Atque anno cſto lxxciv Maſtriſ

generalis comitiis, Romam se contulit, perfecitque, ut sibi in Hispaniam proficisci liceret. Verum, dum, majore animo quam viatico instructus, Barcinonem navigat, sit, ut, a pecunia destitutus, dum sapientiz famam quærit, in famem incurreret; a qua nisi confici vellet, necesse habuit coquum agere, ac vectoribus, quod ederent, coquere. Quis unquam existimasset, per culinam, & coquinandi artem, esse iter ad sapientiam? Navi egressus, terraque, quod reliquum erat itineris, peragens, majoribus etiam incommodis atque molestiis confectus est; adeo ut Toletum, mortuo quam vivo similior, perveniret. Quæ res illi in bonum conversa est. Nam Patres illi, hominis, ad extremum casum adducti, aspectu commoti, magis misericordia quam alicujus superioris imperio compulsi, in familiam eum suam receperunt; tum, ad Complutensem academiam miserunt, ubi exquisiti tota Hispania magistri docebant; ibique nobilissimos omnium condiscipulos habuit; in quibus Rodericus Borgia, nunc S. R. E. Cardinalis, numerabatur; quibus cum una Philosophicis ac Theologicis est disciplinis eruditus. Quarum disciplinarum curriculo, septem annorum spacio, strenue gnaviterque confectio, voluit, Hispano more, in arenam descendere, cum viris doctissimis de eo, quod didicerat, triduo, tum mane tum vespere, pugnaturus, eorumque, contra differentium, argumentationum tela fortiter excipere atque repellere. Idemque certamen, ex Hispania reversus, instauravit in patria. Tradidit se deinde linguarum cognitioni: e quibus Hebraicam ita novit, ut in ea natus videretur. Sed Græcas literas, ut M. Cato, senex arripuit: nam videbam ego, qui Romæ in eadem, qua ille, vicinia erat, Græculum, qui mercede docebat, quotidie ad eum venientem. Nec minorem, libris edendis, operam dedit; quibus, ut dicere solitus erat, nomen suum immortalitati commendaret. Nam Venetiis, anno dñi M. C. IX, sacrarum literarum librum, quem Biblia vocant, plures in linguas conversum, ac duobus voluminibus comprehensum, & Paulo V. Pont. Max. dicatum, edidit. Quo tempore, Zachariam & Hieronymum Condemnerios, nobiles Venetos, arcta sibi familiaritate de-

vin-

vixit; qui etiam suas illi operas polliciti sunt, ut a Senatu illo, apud quem plurimum auctoritate & gratia valebant, Reip. Theologus, magno cum stipendio, subrogaretur in locum F. Pauli Servitæ, qui paulo ante e vita decesserat. Sed recusavit ille, nec ausus est ei succedere, qui tantum, suis scriptis, dedisset Reip. Christianæ damnum ac malum. Tum, annis quindecim, quibus, Urbano VIII Pontificatus Maximi navis clavium tenente, Sacratio Pontificio præfuit, duo concepnnavit volumina de sacris unctionibus, unum, Sacrorum elæochrismatum, alterum Sacrorum arcanorum titulo inscriptum, utrumque varia atque admirabili eruditione refertum: sed, dum paret se, ut duo alia volumina ad communem utilitatem in lucem proferat, coactus est, homo abundanti doctrina, studioque flagranti, literis mandare rationem ac viam, quæ sit incunda, in Sanctorum numerum referendis iis, qui summa cum probitatis laude vixerunt. De quo argumento volumen unum docte eleganterque confecit; nec potuit alterum, quod jam in fine laborabat, absolvere, subito apoplexiæ morbo correptus, quæ tantam ejus capiti oculisque calamitatem invexit, ut excogitandi eidem tum, & cernendi, facultatem ademerit; quamvis, celeri medicorum ope, tum caput, tum oculi, ad suum munus præstandum, sint propemodum revocati. Emisit item volumen unum concionum, quas variis temporibus ac locis ad populum habuerat: at, ne alterum prodiret in vulgus, fuit impedimento morbus ille, quem diximus. Non enim erat magis doctus, quam eloquens; sed utraque in re plurimum præstitit; atque disertæ ejus vox, & eruditæ auribus digna, in præcipuis Italiæ civitatibus audita, admirationes & plausus sibi confecit; ac Bononiæ præsertim ita probata est, ut in solennibus quibusdam supplicationibus, cum excitandus esset aliquis, qui ad populum verba faceret, ex triginta magni nominis concionatoribus, ab amplissimo illo Senatu sit electus, cui illæ partes demandarentur, & ob amœnitatem ingenii, qua florebat, dignus fuerit habitus, cui Comitibus Aldobrandi opera, ipsi Senatui dicata, verum inchoata, ac nondum perfecta, absolvenda ac perficienda traderentur; cujus-

que opera, ad tradendam in eo Gymnasio Theologiam, annua ducentorum aureorum mercede conducebatur. Sed, num, quia poterat optime loqui ac scribere, in aliis docendis instituendisque non satisfaciebat? at, hoc quoque in genere, laboravit, & excelluit. Etenim Romæ sacras literas interpretatus est; Maceratæ Theologiam, Patavii Hebraicas literas docuit; præterea, tum ibi, tum Perusii, tum Recineti, discipulorum studiis præfuit. Quid multa? nihil erat in studiis literarum honestum ac pulchrum, ad quod ille maxima, a natura, adjumenta non haberet. Sed homo, ocii quietisque in primis cupidus, quique nihil tam laborabat, quam ut æternam sibi gloriam, scriptorum suorum fama, conficeret, secretum semper aliquem & remotum ab arbitris locum quærebat, ubi scriptioni operam daret. Ac primum, Panum secessit: verum, ibi adeo cum ocii portum, quem speraverat, non invenit, ut etiam varios ac sævos insectationum fluctus, maxima ex parte a se commotos ac concitados, incurreret; quod in pravos atque corruptos totius Ordinis ac suorum moderatorum mores inveheret; quos fortasse corrigendos, emendandos, atque etiam gravi aliqua animadversione coercendos diceret. Atque hos fluctus facile, si quiesceret, evitare potuisset: sed probum eum esse virum oportet, qui alios esse probiores, quam ipse sit, postulat. Nam, quid est tam intolerandum, quam ab altero rationem vitæ reposcere eum, qui non possit suæ reddere? Ac non postremum insectationis illius, quam ille subiit, caput fuit nimia atque suspecta mulierum consuetudo, quibus erat addictus. Neque novum faciebat: nam ego non paucos, cupidos literarum, hoc vitio cumulosos inveni, quos, sieubi, cum studiorum ac laborum satietas atque odium ceperat, ad mulieres videbam confugere, atque in illecebrosa earum suavitate illam expuere miseriam ex animo. Qui omnes fluctus sunt, Oliverii Scacchi, germani fratris, sed ex justa uxore nati, opera auxilioque, sedati, qui tum in Urbe, sectator aulae, morabatur: qui etiam, pessime ab ipso sibi relatam esse gratiam, agebat, utpote ingrato, suorumque parum vel nihil ferme studioso. Habebat enim hoc, ut, accepto beneficio, obliviosus extemplo fieret,

neque mortalium quemquam, re, opera, aut commendatione sua, juvaret. Ejus igitur infestationis periculis, fratri ut diximus opera, functus, optione data, ubinam vellet esse, Ripam tranfonem elegit, locum, studiorum suorum rationibus aptum. Sed Magistri generalis Comitii anno eId Id C XVIII Romæ habitis, fratri hortatu, Romam se contulit, ubi pro eo, quod ejus nomen magna erat apud omnes fama, summus est doctorum viroꝝ omnium salutationibus & auxplexibus exceptus, atque a Scipione Cobellutio S. Sasaniz Cardinali in clientelam susceptus; qui doctis se viris deditum esse ostendebat; cujus patrocinio confirmatus, invito Generali, qui alio eum destinaverat, ad sacras literas interpretandas, Romæ permansit. Sed Maphæo Barberino Cardinali jucundus fuit in primis; qui, quantum faceret, summus Pont. Urbani VIII nomine, factus, ostendit. Nam Macerata, ubi sacras literas docebat, jussu evocari Romam, sacratio suo Pontificio præfecit. Cui muneri, annis quindecim, ut dictum est antea, præfuit, tenui & infirma corporis valetudine; cujus valetudinis adversæ incommodum aëri Vaticano tribuens, habitavit fere semper in Cænobio vel Deiparæ Virg. Transpontinæ, vel D. Homiphrii; ac postremo, in eodem clivo, ædibus, a se conductis; quod fortasse fuit causa, cur Pontifici minus gratus existeret, aut etiam invisus propterea, quod liberius de ipso locutus fuisset; quo frequenter in genere, sive naturæ vitio, sive ingenua quadam animi libertate, peccabat. Itaque cæpit enixe, aliquam laborum, quibus annis quindecim perfunctus esset, remunerationem efflagitare, ac dicere, se jam, exacta ætate, infirmissimaque valetudine, vix oneris, quod ferret, labori posse sufficere. Quod ubi intellectum est ab eo, qui jam diu omni erat cura & cogitatione intentus, ut occasionem, si qua se daret, acciperet, qua popularem quendam suum, in eum honoris locum, attraheret, Pontificem certiores facit, F. Fortunatum Scacchum se munere illo abdicasse. Quod statim delatum est ei, cui postulabatur. At nihil propius est factum, quam ut ille miser, qui per hanc rationem fuerat eo honore eversus, ex ægritudine in morbum incideret; ac, pro amicitia

ac vicinitate, sæpe mihi narravit, sua verba aliter fuisse accepta, atque ipse protulisset; nunquam enim sibi fuisse in animo, de provincia illa decedere, sed solum præsidii aliquid, quo, decurso ætatis spacio, affecta præsertim valetudine, commode manere in ea posset, expectere. Sed, temporì cedens, insigni bibliotheca, quam sexies mille aureis comparaverat, pluribus divendita, profectus est Fanum, ibique, annos natus prope septuaginta, decessit. Fuit firma corporis constitutione, commoda statura, sed quæ, apta compositione membrorum, oculos moveret; naso, aliquantulum leonino simili, oculis vegetis hilaribusque, fronte late diffusa, cui calvitiei nonnihil erat adjunctum, colore candido, in lævi ac tenera cute.

EXVI. FRANCISCUS CONZAGA.

Franciscus Conzaga, Caroli Conzage, Gazoli domini, filius, & frater Scipionis Conzage Cardinalis, cujus imaginis claritas nostram hanc Pinacothecam sua luce lustrat ac complet; annum agens decimum quintum, missus est a patre in aulam Philippì secundi Hispaniarum Regis, ut ibi inter honorarios ephēbos esset, quos Hispanica lingua Meninos vocant. Ubi, pro ea pietate, quam una cum lacte parentis suserat, adeo se aulæ mundique blandientis illecebris deliniri non est passus, ut non alias ipsum majus rerum fluxarum caducarumque odium & contemptus exceperit; usque adeo, ut ab infesto scopulosoque aulæ mari, in quosatis feliciter navigabat, ad littus se receperit, ac, mutata velificatione, ad certum salutis portum, iter cursumque duxerit, atque in Franciscanam familiam, eam videlicet, quæ arctius vitæ genus sequitur, ac soccis pro calceis utitur, se aggregandum adscribendumque curaverit, ibique tantos in literis progressus fecit, ut ad ipsum, tamquam ad sacrarum disciplinarum oraculum, adiretur; tum bonarum artium studiis, tum literatorum hominum amore, Scipioni fratri non dissimilis; quibus Scipio adeo deditus erat, ac Torquato Tasso in primis addictus, ut, Patavii cum esset, eodem atque ille cubi-

cu-

culo, eadem mensa ac eodem poculo uteretur, & quod est mirabilius, quodammodo eidem ad manum, scribz loco, esse non dedignaretur: nam totum illius, Hierosolymæ liberatæ, pœma, sua manu, descripsit. Cum igitur P. Franciscus, & vitæ innocentia, ac doctrinæ elegantia, ceteris specimen esset, comitiis, Lutetiz Parisiorum habitis, florenti adhuc ætate, (nondum enim annum trigesimum octavum excefferat,) electus est generalis, totius suæ familiæ, custos. Quam provinciam, tanta cum integritatis, abstinentiæ, caritatis, diligentiaque laude gessit, ut vicerit gloriam superiorum, ac nemo, ex minoribus natu, qui adhuc eidem muneri præfuerunt, cum illo æquare ac conferre se audeat. Nulla enim, tota Europa, domus religiosi sui ordinis invenitur, vel tam exilis, vel tam ampla, quam ille non adierit, ejusque collapsam aliqua ex parte disciplinam non emendaverit, atque optimis ac sanctissimis legibus institutisque non formaverit temperaveritque. Ut hodie facer ille ordo, nullo fere negotio regatur, Francisci institutis servandis, & quasi vestigiis persequendis. Verum, nihil ægrius est factum, quam, ne navim conscenderet, Asiaticum iter arriperet, Palæstinam peragraret, atque singulas ibi sedes, ubi sui versarentur, perlustraret: sed, ne id perficeret, quod conabatur, summa vi est inhibitus a Pontifice max. a quo unice diligebatur. Implevit tamen atque edidit ingentem codicem, in quem multa retulit, ex ignorantie tenebris, quibus obruta jacebant, extracta; quæ omnia, ad ejus familiæ, cui ipse præerat, profectum augendum amplificandumque, maximo esse usui possent, ea eruditione, doctrina, cæterum copia refertum, ut, in magna temporum ac rerum obscuritate, quandam quasi facem prætulisse videatur iis, qui, suis deinde auspiciis, quinque maximis voluminibus, totius Franciscanæ familiæ annales sunt complexi. Ingentia igitur hominis merita, quæ novem annis, quibus arduam illam provinciam administraverat, mirandum in modum excreverant, additis etiam paternis, quod parens, in expositibus Caroli Caesaris, ordines duxerat, & una cum duobus filiis non sine gloria militaverat, præterea bello Senensi magnas equitum turmas du-

ductaverat, eisque præfuerat; hic, inquam, tantus meritorum tum ipsius, tum parentis, cumulus, Philippi II Hispaniarum Regis studia, ad eum insigni aliquo sacerdotio exornandum augendumque, commovit. Itaque Comiti de Olivares, ejus ad Pontificem oratori, mandatum dederat, ut, simul ac locupletis cujuspiam Episcopatus, in Italia, occasio se daret, suo nomine eum illi a Pont. committendum deferendumque curaret. Nec fuit illi, ad sui mandata Regis exhaurienda, longum tempus expectandum. Etenim, non ita multo post, Caroli Borromæi Cardinalis, qui postea in Sanctorum numerum relatus est, morte, Mediolanensis Ecclesia, suo pastore ac sponso viduata, relinquitur. Longum esset, explicare verbis, quantum Sixto V Pont. voluptatem hæc Regis, de illo in demortui Cardinalis locum subrogando, voluntas objecerit. Nec mora; evocatum illum ad se, regis hujus voluntatis participem fecit, & simul in spem maximam, amplissimæ Cardinalatus dignitatis ab ipso consequendæ, erexit. Quam ille spem non admisit, sed rejecit; quod diceret, se non esse eo loco ac numero dignum, verum, in eum aptius recipi posse Scipionem fratrem, tunc Patriarcham Hierosolymitanum; propterea se demisse atque humiliter petere, ut in Cardinalium comitiis illius rationem dignaretur habere. Quæ commendatio non omnino pondere caruit, sed in primis suffragata est fratri, ad honorem illum adipiscendum; nam brevi, ab eodem Pont. Cardinalis est factus. Quod vero ad Mediolanensem Episcopatum attinet, disertis verbis testificatus est, sibi vires, tanto oneri pares, non esse. Quod Pont. non serio, sed modestiæ scilicet causa, & inanum officiorum, ut mos est aulæ, dictum existimans, fuit illi auctor, ut consilio cogitationum suarum advocato, de re tota diligentius & accuratius deliberaret: ac paucos post dies revocatum eum interrogavit, quidnam consilii cepisset; sibi enim esse decretum, Mediolanensem eum Ecclesiæ præficere. Tum ille extraxit e gremio schedulam, sua manu conscriptam, in qua denunciabat, quidquid incommodi detrimentique, ex inepta imperitaque ipsius gubernandi ratione in Ecclesiam illam recidisset, fore, ut totum ipsi referretur acceptum; se enim in-

intelligere, quam esset illud onus, fraterculi viribus, impar, qui tum primum e cellula pedem foras efferret: sed, neexistimaret, id a se, declinandi laboris causa, fingi, aliam longe inferioris ordinis Ecclesiam asferret; nam tum, nullam se, ejus recusandi, causam allaturum. Admiratus Pontifex magnitudinem animi, spernentis, quod alii, ut adipiscantur, manibus & pedibus obnixè omnia conantur, non ita multo post eum Cephaledis, quod est oppidum Siciliæ, creavit Episcopum. Quam Ecclesiam ita quinquennium, quo illi præfuit, administravit, ut etiam nunc, incredibilis, pastoralis ejus vigilantia, ardens salutis animarum studium, abstinencia, crebris sermonibus, non a Cephaleditanis solum, sed a Siculis pene omnibus, usurpetur, & in magna apud eos laude versetur. Quæ virtutes eo erant illustriores, quod a prudentia, sine qua nulla est virtus, regebantur, & tanquam illuminabantur. Quarum virtutum fama, cum per omnes partes commeasset, ac fulgore suo cuncta compleisset, ad Clementem VIII permanavit, ejusque oculos mire perstrinxit, ut etiam Romam venire eum jusserit; ubi plura, de hominis sanctitate, judicio, prudentiaque, suis ipse oculis accepit, quam quantum ad eum fama ac rumor attulerat. Quamobrem, cum intellexisset, quanto sibi usui in rebus Christianæ Reip. arduis ac difficilibus, in ejus consilio, opera prudentiaque fuisset, statuit, optimum esse factu, ex Cephaleditana Ecclesia in Papiensem, eum transferre: multo enim latius atque utilius, tantam vim ingenii atque virtutis, in nobili atque ampla in primis Italiæ civitate, doctrinæ, eruditionis, & sanctitatis suæ lumen diffusuram, quam remoto neque ita magno Siciliæ in oppido conclusam atque contractam. Vix menses octo intercesserant ab eo die, quo, a Clemente, Papiensi est præfectus Ecclesiæ; cum a Vincentio Conzaga, Mantuæ Duce, ad Mantuanam postulatus est Sedem, quæ, vetere pastore morte sublato, alterum deposebat. Sed, quamvis Pontifici gratum esset in primis, talem Antistitem, ea ambitione, a viris principibus expeti, ille tamen ejus animo scrupulus inerat, quod alienum a bonis moribus esse putaret, quempiam ab una Ecclesia ad alteram sine causa tradu-

cere. At voluit ex eo, quænam ejus, ea de re, animi sententia esset, exquirere. Qui, interrogatus, ea libertate, quam illi optimæ mentis conscientia dabat, respondit, nunquam se Episcopalis muneris cupidum studiosumque fuisse; proinde si euperet, suo sibi beneficio ipsum quam maxime obstrictum habere, ad suam cellam & ad suos se quamprimum redire permetteret, deinde tum Papiensem tum Mantuanum Episcopatum jure committeret, qui majora, quam ipse, a Deo atque a natura, natæ essent instrumenta, Ecclesiæ bene regendæ. Tanta hominis virtus, ac demissio animi, grata Pontifici max. fuit; ita tamen, ut ejus magis studium incenderit, ad Episcopatum illi demandandum, quem repudiabat, atque ad deferendam eidem post paulo, extra ordinem, Apostolici Nuncii provinciam, ad Henricum quartum, Galliarum Regem, qui nuper ab hæreticarum partium, quarum ille antesignans fuerat, castris ad Catholicorum septa transierat, discordiis cum Hispaniarum Rege compositis atque sedatis. Ac profectus est in Gallias, una cum Alexandro Mediceo Cardinali, qui postea in locum Clementis VIII electus est Pontifex, Leonis XI nomine. Sed triginta sex illis mensibus, quibus est versatus in Gallia, ita, generis claritate, multoque magis virtutum, quæ in eo elucebant, splendore, ejus sibi Regis animum benevolentiamque devinxerat, ut non alter inveniretur, cui Rex ille esset addictior, ejusque fidei magis consilia sua omnia crederet. Quod malevoli quidam finistre interpretantes, materiam ac sementem discordiarum inter ipsum & Cardinalem Legatum conati sunt facere; quasi nihil inter ipsos conveniret, sed alter alteri suspectus esset. At Legatus, cui Conzæ animus, apertus ac simplex, notus erat atque perspectus, ob hanc intimam Regis cum illo familiaritatem, ad eum magis magisque diligendum, adigi se impellique sentiebat; eoque ardentiori in eum studio ferebatur, quod, conscius negotiorum arcanorumque omnium, publicæ utilitatis causa ab eo fieri videbat, ut Rex ita cum ipso de rebus omnibus communicaret. Neque id Legatus dissimulavit; qui sua confessione testatus est, arduum atque perplexum legationis illius negotium, ex intima Regis cum

cum Nuncio amicitia, redditum fuisse expeditissimum planissimumque. Quod etiam apertius, Pontifex factus, significavit. Vix enim in illud fastigium receptus est, cum amantissimis cum literis, sua manu exaratis, Romam accessit; quarum literarum sententia, sive potius verba, hæc erant: Quandoquidem laborum, quibus in Gallia premebamur, onere, pro tua virili parte, a te suscepto, leve illud nobis est redditum, volumus, ut rebus nostris secundis, pariter hic Romæ, ubi te expectamus, nobiscum una fruaris; quo te, prout meritis de nobis es, omni officiorum ornamentorumque, quibus possumus, genere prosequamur. His literis acceptis, statim itineri se dedit. Sed, cum Senas venisset, eoque illi de Leonis Pontificis morte esset allatum, nihilo minus inceptum prosecutus est iter Romam, ut sacrosancta Apostolorum limina de more veneraretur. Quo perfunctus officio, hilari solutoque animo, suam ad Ecclesiam sese recepit. Sed, ut in Galliam, unde digressi sumus, revertamur; habebat in animo Clemens, revertentem illum ex ea, in Cardinalium ordinem adscribere, sicut multis significaverat: sed quiddam accidit in Pannonia, inter Vincentium Mantuz Ducem, & Joannem Franciscum Aldobrandinum, copiarum Pontificiarum imperatorem, quod eum de sententia consilioque deduxit. Ita plerunque contingit, ut Dei & Ecclesie res, feliciter procedentes, ab humanis & inanibus contentionibus, in medio cursu, frangantur, ac corruant. Neque tamen propterea de Pontificis in illum amore quidquam diminutum est, neque aliquid de opinione illa detractum, quam idem Pont. de illius fide, integritate, doctrinaque, suo in animo insitam atque hærentem habebat. Etenim non cessabat, per literas, suo thirographo scriptas, de rebus eum gravissimis, & ad Ecclesiam universam pertinentibus, sæpe consulere. Atque ille, unde hæc nos, literis tradita, accepimus, triginta & eo amplius ejusmodi epistolas, seu brevía ut vocant, suis se oculis vidisse testatur, in quibus, præsertim suam ab eo sententiam exquirebat, vel de divinis auxiliis, quæ tum quæstio quotidianis fere disputationibus ante ipsum agitabatur, vel de corruptis quorundam

religiosorum ordinum moribus emendandis corrigendisque. Incredibile memoratu est, quantam ille vigilantiam ad gregem suum custodiendum adhiberet; a quo, tanquam in perpetua quadam vigilia manens, nusquam oculos deiciebat, quantam severitatem, ad eundem in officio continendum, quem ardorem animi ad ipsum diligendum, asferret. Singulis diebus festis, doctis ac disertis concionibus, ad Christianam cum pietatem erudire, ad vicia evellenda, & contrarias iis vitiis virtutes in ipsorum animis inserendas, impellere, innumerabilem pene pecuniam, in pauperes cuiusvis generis, in Xenodochia, Nosocomia, & in religiosorum ordinum domos, tum privatim tum publice distribuere, ac prope diffundere. Atque ad eleemosynas quod attinet, elegans ac factum quoddam ejus factum, nec praterendum silentio, narratur. Carolus, Niverniae Dux, qui postremis etiam temporibus Dux Mantuae fuit, cum Mantuam venisset, (utpote qui ceteros suo ex ingenio aestimaret,) quatuor illi venaticos canes muneri miserat; quos hilari vultu accepit, eademque opera mandavit iis, qui adduxerant, ut suis verbis Duci nunciarent, se propediem, una cum illo, eorundem sagacitatis industrizque periculum esse facturum. Non ita multos post dies, invitat eum Dux, magno illustrium ac militarium virorum comitatu, ad venationem. Promittit ille, non sine ingenti totius populi admiratione; cui notum erat atque perspectum, quantum Episcopus genus illud oblectamenti, tantopere a professione sua alienum, odisset. Postridie mane, Dux adest una cum suis, ruris habitu atque ornatu; atque Episcopum, longis vestibus, & ad talos usque pertinentibus, videt indutum: miratur, ac, Quæso, inquit, has vestes depone, ac breviores sume; nonne vides, quanto tibi hæc sint impedimento futuræ, ad feras bestias citato equo persequendas, venabuloque fericendas? Cui ille, Hanc, inquit, mihi da veniam. Ac pingui lautoque jentaculo large liberaliterque acceptum, in peristylum cum amplum adduxit, pauperum plenum; quibus viritum nummos, ut quotidie solitus erat, sua manu divisit. Tum, leviter arridens, Hæc est mea, o Dux, inquit, venatio, hi lepores, hi apri, hæc da-

mæ;

maz; quocirca, tuos tibi habe canes, quos vides ad eas venationes, in quibus mea fere vita consistit, nulli plane usui esse: ac pauperes, cum dimitteret, identidem admonebat, ut etiam atque etiam Deum, quo Duci esset propitius, orarent. Tum Dux, tantæ tam docti sanctique Antistitis virtutis exemplo, incredibili admiratione affectus, O si, inquit, omnes tui similes hoc venationum genere delectarentur, in eoque se exercerent; neque in nostræ Galliæ, neque in Germaniæ, neque in Angliæ vitis atque peccatis, ita homines offenderentur. Sed nec desunt plura, quæ de Francisco Conzaga referri merentur. Vincentius Dux, Francisci, Ferdinandi, & Vincentii pater, gloriatus fuerat apud suos, eum se adducturum, ut secum chartis luderet, vel ad aliquod aliud ludorum genus delaberetur atque descenderet. Itaque jubens sibi chartas afferri, provocavit eum in aleam: sed negans ille, id a se ullo modo fieri posse, quod nullus ex illis chartis, ad usum veri Episcopi, liber confici posset; se tamen, quo ipsi morem gereret, eo descensurum ait, ut unam cum ipso horam, latrunculorum ludo, traderet. Dux condicionem accepit; sed integra nondum hora abierat, cum ab eo, triginta aureis nummis est dirutus. Quos Dux se illi domum missurum esse spondit; at Franciscus, Nihil agis, inquit; præsentis opus est pecunia; nolo enim, tantum Principem mihi debitorem habere, cum quo, iudicio, certare non liceat. Eductoque, ex proximo ibidem atramentario, calamo, Ducem coëgit, ut scripto, eam statim pecuniam numerandam sibi, mandaret. Qua accepta, Principe ipso præsentem, in quandam religiosam ac pauperem domum, deferendam curavit, cum mandatis, ut Deus, pro Ducis salute, unde ea pecunia prodibat, exoraretur. In quem Ducem postea intuens, Si tibi molestum est, ait, tantam uno tempore pecuniam in pauperes erogare, ne tibi posthac veniat in mentem, me in ludum provocare. Quibus actis, magna suæ virtutis admiratione relicta, discessit a Duce. Qui conversus ad suos, Nihil opus est, inquit, sanctos viros velle sibi ludos efficere. Jam vero, quis posset assequi oratione infinitos illos sumptus, quos in sacris Edibus, in domibus piis ac religiosis, tum ve-

teribus instaurandis, tum novis exedificandis, faciebat; ut nullus sit pauperum & calamitosorum hominum ordo, cui non ille domum ac perfugium aliquod excitaverit, in quod, fortunæ fluctibus eiectioni, tanquam in portum, sese colligerent. Videlicet, filiabus, a parentibus derelictis, mulieribus a flagitiosa vita ad honestam pudicamque conversis, orbis parentibus pueris, puellisque male nuptis, mulieribus nobili genere natis, quas vel res male gesta, vel fortunæ favientis injuria, ad terminos egestatis impulerat, præterea Clericis seminarium, ubi alerentur, optimis moribus imbuerentur, & sacros Ecclesiæ ritus edocerentur, extruxit. Sed, num, quia erat in sacris Ædibus instaurandis ædificandisque magnificus, in eisdem exornandis locupletandisque, parcus inveniebatur? At utroque in genere laboravit & præstitit. Atque, ut de ceteris sileamus, in Ecclesia Cathedrali, quam magnificis ædificiis auxerat, argento, sacris vestibus, ac preciosa suppellectile exornanda, septuaginta aureorum millia, & eo amplius, effuderat; si tamen est effundere, quod in Dei immortalis cultu collocetur. Sed nullus erit finis, si sit consilium, omnia ejus, pietatis in Deum, liberalitatis in pauperes, caritatis in omnes, exempla proferre. Denique, dives meritis, dives virtutibus; sua in Ecclesia, debitum naturæ reddidit; cum, in ipso mortis articulo, omnia ea mala prædixisset, quæ postea civitati illi inciderunt; ut propterea diceret, se maximas Deo gratias agere, quod non crepta sibi ab illo vita, sed opportune donata mors esset, ne tanta oculis, quæ postea ventura essent, mala conciperet. Obiit igitur, non sine maxima sanctitatis opinione. Multa enim occurrerunt, quæ supra naturæ vires existimantur ab Episcopo Donesmundo, ex eadem qua ille erat Franciscana familia, relata in ejus vitam, quam edidit. Quæ, apothecosis ejusdem gratia, a testibus interrogatis ac juratis excepta, in publicas tabulas, seu instrumenta, confecti cepta erant; sed, ne opus perficeretur, belli calamitas obstitit, quæ Mantuæ civitatem afflixit. Theologice ejus disputationes una cum concionibus, ubi asseruntur, ambigitur; utrum apud Principem Bozzoli, fratris ejus filium, an in Bibliotheca Terræ S. Marthi, quæ

quæ Principis illius paret imperio: quam bibliothecam, eo in loco, sibi ipse extruxerat eo animo, ut ibi, quod reliquum esset vitæ, conficeret; sed, factus Episcopus, animum ab ea cogitatione abducere, & ad alia consilia est transferre compulsus.

LXVII. AURELIUS CHISIUS.

Clarissima Senarum civitas, non modo nulli Italiz, quæ quidem feratur in primis, belli pacisque artibus cedit, sed neque virorum, quos virtutum maximarum merita evocarunt in cælum, numero inferior existit. Atque insignium, doctrinæ & eruditionis laude, civium plurimorum, qui meæ ætate, communi naturæ facti extincti, æternam nominis sui famam reliquerunt, imagines, tenui nostro stylo, quasi penicillo, descripsimus, & huic alteri Pinacothecæ commendavimus; quarum imaginum tam magnus est numerus, ut non minimam ejus, ut ita dicam, parietum partem vestiat atque exornet. Eos vero, qui ad summam sanctitatem, dum viverent, effloruerunt, non sum adumbrare conatus; quoniam totum hoc integrum reservabam ad eum librum, in quo cogitabam laudabiles eorum mores exprimere, qui nostro hoc ævo habitii essent omnium sanctissimi. Sed, in Aurelio Chisio, hoc me quasi legitimum tempus expectare non sinunt eximia Fabii Chisii, ex cujus stirpe hoc tam fulgens sanctitatis lumen emerfit, merita atque virtutes; qui nunc Sedis Apostolicæ apud Ubios Nuncius, ac Monasterii in Westphalia, Sedis ejusdem nomine, communis pacis conciliandæ causa, interpretis atque auctor, nigrum præbet speciem animi, ingenii, consiliique sui. Neque ingratum id illi fore existimo, si inter eos, qui, humanæ doctrinæ præstantia, magni & clari habentur, cognati unius, cælesti sapientia referti, imaginem collocemus; ut, quoties in eam intueatur, & præclarissimis domesticæ virtutis exemplis gaudeat, & ab ejus similitudine abstractum se non fuisse lætetur. Aurelius igitur,

natus est Senis, ex Augustino Chisio, & Olympiâ Pulgarina, optimis ac nobilissimis parentibus, anno cId Id LXVL Non fuit in puero, nec docilitas ingenii nec suavitas morum: in adolescentia, etiam libertas & vivendi licentia notabatur. Sed, annuntiagens undevigesimum, dexteræ excelsi opera, ineuntis adolescentiæ vitia magnis virtutibus emendavit atque correxit; tanta animi alacritate, ut Spiritui Sancto, novum in ipso opus instituenti, repugnare non sit ausus, sed totum se eidem reficiendum, expoliendum, instaurandumque permiserit. Et, quod magis miremur, novum vitæ genus, ejusdem Sancti Spiritus impulsu, horridum, fævum, atrox, suscepturus, non ejus ineundi rationem, a religiosorum ordinum familiis, & in eorum domibus, esse petendam existimavit, sed in privatis etiam ædibus posse illam inveniri putavit. Tum, in rerum cælestium cogitatione totum se collocaturus, non in loca solatque deserta confugiendum statuit, sed in urbium frequentia, in foris, in hominum strepitu, secretum sibi unumquemque posse facere duxit, ubi in acri atque attentâ Dei meditatione defixus, omnes alias cogitationes a se rejiceret, atque repelleret. Itaque in sua civitate ætatem agens, in immensis cæli regionibus, inter cælestis patriæ cives, mente animoque peregrinabatur; popularis inter suos positus, longissimo ab aliis intervallo distabat; intra-domesticos suos parietes clausus, latissima cæli spacia emetiebatur. Erat illi, somni loco, vigilia, pro preciosa ac divite veste rudis atque horridus fæcus, pro esca atque portione jejunium, pro corporis oblectamentis flagella, atque alix ejusmodi poenæ, ultro susceptæ, quibus in se acriter vehementerque sæviebat; risus locum ac sedem vis lacrimarum, quæ perpetuo eidem ab oculis decurrebant, occupaverat, adeo ut, quemadmodum de principe Apostolorum Petro traditum memoriz ac literis est, velut fulci quidam in malis conspicerentur, unde in pectus, quod madidum semper gestabat, lacrimarum rivi defluerent. Jam vero, ubi ad sacra Christi corporis mysteria sumenda ventum erat, tum licebat videre, quantum ille fletui obsequeretur, quantum lacrimis indulgeret; quarum ea erat copia, ut non

genas tantum rigaret, non pectus solum lavaret, sed, in terram decidens, pavementum ipsum Ecclesie madefaceret: adeo ut sæpe ædituus, rationis totius ignarus, verreretur, ne lychnus aliquis vitreus, ex iis, qui ejus orantibus capiti impendebant, effractus, illam vim aquæ dedisset. Erat in primis cupidus, Societati Jesu nomen dandi, quod ea (absit verbo invidia,) magis fere quam reliquæ Religiosorum ordinum familie, iis, quas sibi ipsi præscripsit, legibus pareat: sed ab eadem excludebatur, quod esset humaniorum literarum funditus expertus; quibus saltem imbutos eos esse oporteat, qui initiari sacris ecclesiasticis volunt. Quæ fuit causa, ut Patavium proficisceretur, quo ociosius & utilius daret operam literis. Sed fiebat, ut, simul ac Grammatici eujuspiam librum in manus sumeret, adeo a capitis dolore invaderetur, ut haberet necesse, illum abjicere; cum autem ad orandi studium se reciperet, statim dolor ille consisteret, nec auderet progredi longius. Itaque, Dei voluntate perspecta, cum, annum integrum, inanem illam operam sumisisset, reversus est in patriam; ubi, a Præposito Societatis ejusdem, maximo opere petiit, ut, quoniam omnis sibi, ad sacerdotes perveniendi, aditus esset obstructus, saltem ad fratres, seu coadjutores Societatis, ut vocant, transeundi potestas fieret. Quod etiam, justis de causis, impetrare non potuit. Sed quoniam, nullum veræ sanctitatis ædificium recte constitui, neque tolli altius potest, nisi humilitate nitatur; summum, in jaciendis humilitatis fundamentis; studium adhibuit, atque operæ non pepercit suæ. Itaque humum fodere, cubicula everrere, parietibus opera araneorum dejicere, ut ædes niterent efficere, aquarum urnæ ingerere, ac plenam per vicos plateasque deferre, sua palam vitia detegere, nunquam, se accusandi, finem facere. Audierat a Francisco Vannio, pictore in primis, formæ imaginem suæ, quam maxime ad similitudinem veri, expressam fuisse coloribus: oravit, ut eam liceret aspicere, ac, facta potestate, plures eam scindit in partes. Injuriarum, in quibus æquo animo perferendis, veræ perfectæque humilitatis specimen editur, adeo patiens fuit, ut, publice læsus, ac ludibrio habitus, omni-

omnibus lætitiis incesſerit. Verum, ejus patientiæ præ-
 cium non exiguum tulit. Nam cum, a quo tam inſi-
 gnem contumeliā acceperat, tanta repente pœnitentia
 ſubiit, ut, ſacco indutus, ac fune præcinctus, pa-
 lam per urbem incesſerit, atque peccati ſui veniam ex-
 poſcens, quod auſus eſſet tantam homini ſanctiſſimo
 contumeliā, per ſummam injuriā, inferre, con-
 tumaciæ ſuæ voluntarias pœnas dederit. Tantis igitur
 humilitatis patientiæque radicibus poſitis, quid mi-
 rum, ſi ea in Deum & in homines caritas, quæ inde
 prodiit, tam alte ſuccreverit? Primum, piam ac reli-
 gioſam domum, quam vulgus Dereliſtarum appellat,
 ab Hieronymo Benevogliente, I. C. eximio, incho-
 tam, ad abſolutionem perfectionemque perduxit: in
 quam plures, facie honeſta puellas coëgit, ne inopia
 & egeſtate coactæ, quæſtum occiperent, ac Dei in
 ſe templum violarent; perfecitque, ne quid illis ad
 neceſſarium vitæ uſum deeſſet. Deinde, quum dolore,
 quantum maximum animo capere poterat, afficeretur,
 ex miſera & indigna virginum quarundam calamitate,
 quas cum generis claritas, majorum amplitudo ac di-
 gnitas, ab aliarum numero abſtraxiſſe, egeſtas tamen
 ad infimæ ſortis hominum condicionem ſordesque com-
 pelleret; dedit operam, quantum potuit, neque ulla alia
 in re impenſius elaboravit, ut inſignis domus aliqua ex-
 citaretur, quæ, adverſæ fortunæ fluctibus, jactatis,
 quali perſugium ac portus exiſteret, atque Refugii eam
 nomine appellavit. Quam domum de integro, coëmſia
 in ea vicinia ædibus pluribus ac dirutis, fundamentis
 crexit; ſacellum, in quo res divina fieret, conſtituit;
 ſignis, tabulis pictis, ac præcioſa ſupellectile, inſtruxit
 ornavitque: tum, prædia coëmſit, ex quibus tantum quoti-
 dianis rediret, quantum ſatis eſſet, ad veſtes illis com-
 parandas, ad panem præbendum, ad vinum obſonium-
 que tradendum. Eas poſtremo omnium bonorum ſuo-
 rum heredes inſtituit. Atque in his omnibus, conſtat,
 triginta aureorum millia fuiſſe conſumpta. Sed, quod in-
 credibilem ejus animi magnitudinem, & humanæ glo-
 riolæ contemptum, mire declarat, tam amplo excelſoque
 ædificio ſuum nomen inſcribi non eſt paſſus: tantum,
 poſt

post ejus mortem, multis illæ virgines precibus impetrarunt, ut in lapide, quo ejus sepulcrum tegebatur, quæ & quanta ejusdem essent in piani illani domum merita, grandioribus literis insculpta legerentur. Ibi enim, anno cIdo C XI, morbo consumtus, annum agens quintum & quadragesimum, est humatus. Sed præcipuam habuit servatæ castitatis laudem. Nam, cum in assidua atque perpetua illarum virginum custodia vigiliæque maneret, cum auctoritate, consilio, re, atque opera, omnibus horis, præsto illis, tum ægrotis, tum bene valentibus, esset, ut etiam scetidam ægrotantis ejusdam virginis sanient, quam evomebat, sibi sit in os conatus ingerere; cum, inquam, tam frequenti virginum illarum consuetudine uteretur, adeo tamen secunda inter ipsas castitatis fama versatus est, ut nullam unquam cuiquam, ejus minus honeste habitæ, suspensionem aperuerit. Quod etiam Patrum Societatis Jesu, qui, quinque & viginti annos, ejus confessiones audierunt, testimonio confirmatur. Ajunt enim, toto hoc tempore, nulla ejus animum, impuræ cujuscumque cogitationis, vi impetuque fuisse oppugnatum verberatumque: ut etiam in eo, vetus sanctissimi Patriarchæ Josephi castitatis exemplum, longo intervallo, sit renovatum. Etenim, impuræ cujusdam meretricis, quam a flagitio revocare conabatur, amplexibus, sese fuga expedit, relicto pallio, quod illa e fenestra in viam eiecit.

LXVIII. LORETUS VICTORIUS.

Mirum nemini videri debeat, si, tot præstantissimis hominibus mortuis, vivi unius imaginem inferamus. Ea enim est hominis, in suo genere, virtus atque præstantia, ejusmodi mea, in illo exornando exprimendoque, cupiditas, ut ad eam explendam, si sit expectandum, dum eo iter arripiat, quo il, quodrum imagines nostra hac Pinacotheca continentur, abierunt, millies me antea, tanto illo majorem, mors opprimere possit, quam ille vitæ suæ spacii metam aspiciat. Quamvis, in

Kk

eam

eam sedem, ad quam irer est omnibus, receptus, posse videatur suam, & alterius, quem dilexerit, viram ab Orco, suo cantu, redimere; quemadmodum de Orpheo & Eurydice narratur. Cujus ille, superioribus annis, non nihil simile, si vera est fama, perfecit, qui suam, Eurydicem quandam, in tenebris, ex Cerberi tricipitis, nempe cognatorum custodiis, quibus ille verba dedit, eripuit. Sed fecit sapientius, quam vetus ille Orpheus. Non enim flexit retro sua lumina, ut ille; sed semper, quæ ante ipsum erant, aspiciens, tutus, quo voluit, evolavit una cum illa; non, ut suam ex ea, ut falso quidam suspicantur, voluptatem expleret, sed quemadmodum ipse in quadam ad me epistola affirmat, quo illius pudicitiam, ab adolescentis ejusdam infidiis, præstaret incolumem. Natus est Spoleti, magis ingenii virtutisque bono, quam generis claritate, præclarus ac nobilis; atque admodum puer, voculæ suavitæ, ac docilitate ingenii, sectus est, & in musicis eruditus, ab exquisitis tota Italia magistris. A Cosmo, Magno Etruriæ Duce, simul auditus & probatus est, & ab Octavio Donio Florentino, qui illum eum perduxerat, acceptus, magno in precio habitus, ac domi suæ innutritus, ubi deinde, tum sua tum magistrorum diligentia, tantos profectus fecit, ut scenicis in ludis, qui sæpe Florentiæ magnificentissimi dabantur, in scenam productus, primarum semper partium actor, tantum commendationis haberet, ut apud omnes gentes, ubi aliquis musicæ arti honor habetur, celebre ejus nomen & clarum existeret. Cujus vocis eximie cantus, cum Ludovici Cardinalis Ludovicii Gregorii XV fratris filii, pervenisset ad aures, per eas illi in animum commeans, maximum, ad intima cordis ejusdem cubilia, sui desiderium inexit: in qua cupiditate adeo fuit intemperans, ut non antea quieverit, quam summis cum precibus, a Magno Duce, in beneficio & gratia, impetrarit. Cujus precibus Magnus Dux non potuit obstitere; quod tum ille, Romæ, rerum potiebatur. Sed Ludovicius tam alte hominis precium extulerat, ut non cuivis ejus audiendi faceret potestatem, sed iis tantum, qui æqualitatem communis conditionis, præstantia dignitatis aut fortunæ suæ, transirent; quod, eam

eam vocis cantusque suavitatem, vulgarium non esse aurium pabulum, existimaret. Quæ res magnum illi convertebatur in bonum. Nam viri illi principes, quo, magno se beneficio a Cardinali esse affectos, ostenderent, large in eum dona ingerebant; ex quibus, ad eos nummos, in quibus nunc est, brevi pervenit. Sed interdum Romæ, per hyemem, in sacello Patrum Congregationis Oratorii exaudiebatur. Ubi cum ego, nocte quadam, Magdalenæ, sua desilentis crimina, sequæ ad Christi pedes abjicientis, querimoniam, canentem audivi: qui, eo ardore animi, ea vi vocis, iis tam mollibus tamque delicatis in cantu flexionibus, Magdalenam nostris pene oculis subiciebat, ut, si revixisset, in illa ejus, penitentis ipsius, imitatione suos veros luctus doloresque agnovisset atque admirata esset. At neminem eorum, qui aderant, arbitror fuisse tam leni animo, tamque remisso, qui non ad eos motus se perducti sentiret, ad quos ab illo impellabatur; nimirum, ad fletum, ad iram, ad odium peccatorum. Nescio alios; me quidem, scio, acriter vehementerque in delicta mea exarsisse, cum ille Magdalene personæ actor, præteritæ illius vitæ crimina execraretur, propter quæ in tantam Dei atque hominum offensionem incurrisset; sensi, mihi ubertim lacrimas ab oculis ire, cum ille flentis peccatricis gemitus, voce ad miserabilem sonum inflexa, representaret; sensi, me ad incredibilem admirationem efferrî, cum, vocem a gravissimo ad acutissimum sonum gradatim impellens, eandemque ab acutissimo ad gravissimum, per varios anfractus, volubilitate incredibili colligens, se posse eam ostenderet, sicut mollissimam ceram, quocunque vellet, contorqueret ac flectere. Quid opus est verbis? nullus erat animi motus, ad quem ab illo, ut ita dicam, abreptus, non continuo formarer ac fingerer. At, quo artificio, qua venustate, quo lepore, id totum ab illo fiebat? Profecto, ars certare cum natura videbatur; ultra majorem in eam vim ac dominatum haberet. Equidem, memoria repetens cantores omnes, quos ad hunc diem audire, longæ mihi vitæ cursus attribuit, sic statuo; nemini eorum, quos, in hoc genere, præstantissimos absolutissimosque, erudita veterum Græcorum Romanarumque natio ja-

ctat, tam multa, vel à natura vel ab arte, concessa fuisse, quam multa in hunc unum congesta miramur; magnum ingenium, miram ad poesin indolem: nam Sætarum Irenæ & Galatæ dramata elegantissima edidit; non vulgarem, in faciendis modis, eruditionem; qui, Ignatium Lojolan, Romæ in Æde nominis Jesu, ejusdem Societatis, regio apparatu datum, modulatus est egregie; vocem suavem ac splendidam, & ad quamcunque varietatem & commutationem efficiendam aptissimam, quæ, ut in fidibus chordæ, ad quemcunque tactum respondeat, acuta, gravis, cita, tarda, magna, tenuis; acre in canendo judicium, atque artificem rationem: quo fit, ut suum, cuique animi mortui, vocis genus adhibeat, neque præpostere agat, ut multi, a quibus vox non arte ac moderatione tractatur, qui hilares ac jucundas res triste, tristes hilare, vehementes remisse, graves ludibunde, iracundas lente, ad nos, per vias ab auribus ad animum perforatas, inducunt. Quamquam in hoc est eorum culpa nonnulla, qui carmini modos fecerunt, quos non apte ad illius sententiam accommodaverunt. Ille vero, à natura atque ab optimorum magistrorum præceptis edoctus, si iracunda perturbati hominis vox & oratio cantu sit exprimenda, vocis genus sumit acutum, incitatum, crebro incidens; si miseratio ac mœror explicandus, flexibile, plenum, interruptum, flebili voce; si metus referendus, demissum, hæsitans, abjectum; si truculenti vis hominis tradenda, contentum, vehemens, imminens; si exhilarati voluptas animi anteponenda, effusum, lene, tenerum, hilaratum ac remissum; si ægritudine aliqua oppressi molestia significanda, sine commiseratione grave quiddam, & uno pressu ac sono obductum adhibet. Hæc, à L. Crasso aliisque summis doctoribus relata, felicius, in illius modulate canentis voce, quam in eorum libris, impressa cernuntur. Quod autem ita scienter in cantu, ad quemcunque velit animi affectum exprimendum, se formet acingat, à natura consecutus est; unde habet, ut, in communis vitæ consuetudine, ad eos omnes motus acriter vehementerque impellatur. Nam si dat se hilaritati, in maximos repente risus effunditur; si tristitiæ, demittit animum; si iracun-

cundia, ita se ab ea abripi sinit, ut ad clamores, ad iurgia, ad contumelias, & interdum etiam ad verberationes, labatur atque deveniat; adeo ut vix ab iis inanus abstinuisse dicatur, quos nefas est tangere. Eadem est ratio spei, misericordiae, aliarumque animi perturbationum: in quarum singulas nimis ille quidem est vehementer. Quid illa ejus, in qua mihi deus videri solet, in voce claritas, & in lingua, explanata vocum inpressio, quantam attentionem benevolentiamque concilia! est enim in magna cantoris laude ponendum, verba, syllabas, literas omnes exprimere, non putide, sed accurate, & cum quodam, sine molestia, diligenti spiritus sono ac vocis: idque non tam, sua sponte, laudabile est, quam, quod est a plerisque neglectum. Etenim, non tam praeclarum est, pronuntiationi distinctae atque dilucidae operam dare, quam flagitiosum, id speruere. Novi ego non neminem ex iis, qui ad summam recte eleganterque canendi laudem efflorescerent, ultimas praesertim syllabas, sive negligentia, sive prava consuetudine, ita obscurare, ut, quid dicerent, quamvis admodum attenderem, non intelligerem; quod non, tam vocem foras emittere, quam intra fauces impellere, non tam in lucem edere, quam tenebris involutam, anteaquam lucem aspiceret, enecare viderentur: quamobrem illud assequerentur, ut, qui audirent, desperantes, posse ex illis tenebris, lucis quidquam, ad ipsorum intelligentiam illuminandam, existere, vel aliud agerent, vel oscitarentur, vel dormitarent, vel cum vicinis capita conferrent, ac de cetera loquerentur. At vero, illo canere incipiente, omnes alacres & erecti consistunt, sermones, quos instituerant, dirimunt, animam continent, ne, crebro respirantes, sibi quodammodo obstrepere videantur; tum, cantu ejusdem mirabiliter deliniti, nullis ab eo fastidiis abalienantur, nulla aurium satietate defatigati discedunt, sed ab eo, tanquam capti alligatique, continentur. Fabulosis poetarum carminibus traditur, ad Amphionis lyrae cantum, Thebarum arcem murosque fuisse substructos. Ridicule, si ad lapides & latera, quibus muri constabant, referatur: verum, si in cœmentis, rudia hominum ingenia, quovis interdum saxo stupidiora, intel-

telligantur, in hoc lepidò tam elegantis fabulæ mendacio, non inelegans veritatis ratio inclusa invenietur; nimirum, nulla re alia, nisi suavi docti cujuscumque oratione, ex agresti immanique vita, nos ad humanitatem ex cultos exedificatosque fuisse, vel potius mutæ caritatis amplexu, quovis muro firmiore, unum in locum coactos, atque oclusos. Sed, quid hæc, inquit, ad Loretum narratio spectat? Multum sane. Non enim ita Amphion dispersos & agrestes homines, lyra, ad Thebanum oppidum conflandum, quasi lapides ac lateres, elaboratos atque expolitos attraxit, ut ille suæ vocis suavissimæ cantu voluntates ad se hominum allicit, eorumque benevolentia, quæ, plusquam centuplex murus, servandis hominibus prodest, se munitione quadam & vallo circumdat. Quot ego homines novi, ad hæc studia duriores, ad dulcissimos ejus cantus commoveri, emolliri, ac flecti! quot, præ nimia voluptate gestientes, quod ad eam continendam angustii essent unius pectoris fines, sibi tunicam a pectore diloricare, quasi eidem, ad egrediendum, aditum darent, & aperte fateri, se pares eidem ferendæ non esse! quot ego patres familias vidi, natu grandes, cum auditum esset, illum quoque cantatum prodiisse, statim, ex ultimis Urbis regionibus, domibus relictis, re familiari neglecta, corruptis itineribus ceno, tempestate perfrigida, imbribus maximis, accurrere, loca in subselliis occupare, ac multas horas, expectando, contere! quot etiam aspexi, quos, locis omnibus obsessis, negotiorum necessitas serius illum impulerat, in confertissima multitudine stantes, premi, impelli, & hac illac, tanquam fluctibus, agi, neque his tamen incommodis deterreri, quo minus eum, cujus causa venerant, audirent! atque isti ipsi, qui serius illuc accesserant, cum discederent, non tam querebantur, se peno fuisse in turba collisos, quam illum dolebant, cupiditate ipsorum celerius, finem canendi fecisse; se enim, nequam fuisse satiatos, sed avidiores, quam attulerant, aures domum referre. Alii multa matri illius bona dicebant, quæ sua fecunditate, Angelum magis quam hominem, peperisset. Alii commune rerum humanarum fatum deplorabant, quod illum, ob excellentem vocis

sua-

suavitatem, & incredibilem canendi artem, omnino mori non debere, aiebant. Alij affirmare non dubitabant, celi beatissimas mentes, si eas canere humana voce contingeret, non alia voce nec alijs modis usuras, nisi illius. Dixi paulo ante, videri eum dignum, qui mori non debeat: sed, quoniam nemini, in tam exiguo vitæ spacio, immortalitas potest accidere, saltem optandum est, ut Xenophili musici ætas illi contingat; qui, nullo valetudinis damno, centum & septem complevit annos. Vel potius, quoniam, in ejus suavissima voce, tot animi reficiuntur, tot curæ abiguntur, tot aures conquiescunt; videtur petendum a superis, ut ejus felicitatis compotem eum faciant, quam Luceiæ mimiæ largitos esse, auctor est Plinius; ejus vocis præstantissimæ ea fuisse perennitas traditur, ut, centum annos in scena pronunciatum verit. Nam illud jam assecutus videtur, ut vetus de Telleni musico, omnium maximo, proverbium in ipsum transierit. Non enim, ut antea, cum aliquem ad recte canendum hortabamur, dicimus, *Cane ea, qua sunt Tellenis*; sed, *Cane ea, qua sunt Loreti*; quoniam sunt optima. Tam constans est omnium opinio, fuisse Tellenem ab eo superatum.

LXIX. FORTUNATULUS LURCO.

Lubet hic narratiunculam apponere, habitam, feriis Bacchanalibus, ad Academicos Humoristas, quæ, cum mores illius, qui in ea continetur, exponat, inaginis cujusdam instar potest haberi.

Multa sæpe homini in vita contingunt, sive bona sive mala, quæ ille non cogitavit. Vel illud, quod dicturi sumus, quis unquam crederet potuisse accidere? scilicet, ut quisquam, domo, negotii causa, egressus, quatruiduiam, sine ullo suo sumtu, conficeret, &, quod admirabilius videatur, magna ex parte ad caupones diverteret? Sentio, vos vehementer mirari; scio, me rem incredibilem polliceri. Nam, qua insolentia avaritiæque hic ordo sit, indicant leges severissimæ, in caupones & stabularios scriptæ, quibus, gravissimis propositis poenis, eorum fraus & nequitia compefitur. Attamen, res

ita se habet, ut dicam. Ejusmodi enim casus affuerunt, quibus est illis pulcre os sublitum. Accipite igitur rem jucundam, & dignam vestro cachinno. Sed, antea quam ad rem aggredior, explicandum est, quid hominis sit hic, ad quem ea, quam sumus dicturi, res attinet. Hic est, annos natus quinquaginta & plus eo, magnus, ventriosus, obesus, rubicundo ore, facetus, amœnus, quotidie mensam amicis complet; semper est in convivio magister, in comestationibus dominus, in compotationibus princeps; ubi in aliquod oppidum venit, mirandum in modum, (canem venaticum diceret,) odoratur in popinis omnia, & pervestigat, num aliquid sit in eis vini, ex palati sui sententia: quod si reperit, nefas putat esse inexplabile, antea illinc pedem efferre, quam dolio illi, quod probaverit, omnem animam intertraxerit. Præterea, homo est mulicrosus, &, tanquam Minnervus alter, sine Veneris voluptatibus nullam esse vitam existimat. At nihil factum est propius, quam ut hæc illi voluptas pessime infelicitèrque succederet. Nam cum, festis Bacchanalibus, statuisset, multo, quam antea, effusius in venerem ruere, in eoque luto altius hære, aromatarium quandam adiit, quem acceperat medicatam quandam aquam habere, quæ non solum deficientem libidinem exciteret, verum etiam ab inferis, mortuam, revocaret; ac quatuor ejus cyathos ab illo coëmit. Sed satis superque unus fuisset: etenim nonnihil cantharidum habebat admistum; quæ cantharides quantam ad urendum, exulcerandum, atque etiam enecandum, vim habeant, nemo est plane qui nesciat. At ille nondum vim earum fuerat expertus. Redit igitur alacris, ac mulierem quandam in sua vicinia, quæ corpore corpus alebat, domum suam invitat, ut ea secum nocte concumberet. Illa conditionem accipit, ac se venturam constituit. Adest nox, venit mulier, cœnant. Sed, antequam se lecto commendent, Est mihi, inquit ille, potio, quæ, epota, vires augeat atque confirmet. Mulier, quæ non minus præceptus in seculus ferretur, quam ille, Da mihi, inquit, hanc potionem; volo enim, gigantis non minus vires habere. Ille statim amphoram aquæ profert, ac dimidium ejus præbet mulieri, reliquum ipse totum exhaurit. Tum eunt cū-

bitum; ac tantam denique vim incendiū intus in visceribus æstare sentiunt; ut, cum ferre non possent, primo mane, se e lecto in terram ejecerint, ac singula singuli ahena corripuerint, gelida aqua impleverint, in eamque nates demiserint. Sed, tanquam si non in aqua frigida sedentes, ab æstu relevarentur, sed in Phalaridis tauro inclusi essent, plorabant, clamabant, se uri, inflam-mari, incendi. Accersitur medicus; adest. Qui, ubi eos videt, ita demersos in aqua, cachinnos extulit; rogat, quid sit. Cumque de potione illa, quam ebiberant, audisset, multo est majores in risus effusus. Sed tandem, quo miseris auxilio esset, jussit refrigerantia quædam, clysteris ope, in viscera utrisque infundi. Hic igitur, quem deformavi, habebat nescio quid negotii in oppidulo, ab eo, ubi ipse habitabat, quadridui fere via sejuncto. Com-mode ergo, atque ex itineris ratione, viaticatus, equum conscendit, viæque se tradit. Noctu, venit in quoddam castrum & ad cauponem divertit. Erat ejus castri domi-nus, Comes quidam sævus, acer, iracundus, impotens animi; qui primum, caverat edicto, tum, sigillatim cau-ponibus præceperat, ne quemquam tecto recipere, prius quam coram sibi stitissent. Caupo, qui existimaret hominem hunc liberalem; & quia de via sessum aspice-ret, noluit, ea insuper molestia afficere, ut ad dominum mitteret; sed plena ac pingui cœna refectum, statim in lecto collocavit. Tum ipse Dominum adiit, atque, apud se hospitem esse, narravit. At ille, stomacho & ira-cundia, supra quam dici potest, elatus, Itane, inquit, imperio meo præsto es, furcifer? Et, qua erat ani-mi impotentia, nihil propius est factum, quam, ut illi misere fustem in tergore frangeret, aut pugnis in ore sementem efficeret. Et, Nisi mihi, inquit, exhibeas tuum istum hospitem, tam delicatum, tam nobilem, excludito mihi oculum, si non mactabo te atque illum infortunio. Caupo, domum reversus, hospitem, altio-ri somno oppressum, atque stertentem, offendit, impel-lit, excitat, atque, Tibi dominus adeundus est, ait; ille, somni plenus, Ne mihi molestus sis, inquit; sine, dormiam. Ac redormire protinus cœpit. Caupo instat, urget, impellit; excitatum admonet, ut surgat. Tan-

dem ille ægre a somno distractus, sarcinas suas poscit, & cauponi atque domino mala multa ingerens, ad Comitum venit. Qui Comes, tristi ac severa fronte, Cur, inquit, o hospes, ex edicto meo, simul ut pedem in oppidum intro tulisti, non recte ad me ibas? Quia, respondit, non putavi, mei similes ea lege posse constringi. At nesciebat, quem ipse crabronem irritaret. Nam, hoc responso, vehementer Comes offensus, Scis, inquit, quanti te ac tui similes facio? quanti eam, quæ mihi latrinam lavat: ac nisi te ex hoc oppido, avibus atque auris ocius, ejeceris, faciam, ut hujus diei locique, meique, tibi immortalis ac sempiterna sit meminisse memoria. Ille, qui Comiti repugnare non auderet, nescio quid secum mustitans, abiit, atque extra oppidum, ut potuit, sub quadam quercu, nocte illa quievit. Postridie mane, cum processionem ornaret, ecce tibi duo, qui Comitem ajunt opere eum maximo evocare; velle enim se eidem satisfacere de eo, quod proxima superiore nocte nimis in eum acriter violenterque dixisset. Ille negare venire, nec Comitem flocci facere. Sed tandem, multis precibus exoratus, se est passus adduci. Quem ut hospes aspexit, in ejus collum irruens, excusavit, quod iracundia summa esset; ac, se nolle, ait, dictum, quod dixisset. Eadem opera jentaculum jussit afferri; quo ille mirabiliter recreatus, multis magnisque Comiti gratias actis, repente evolavit e conspectu Comitum, cauponis, & castri; neque quisquam, ob cœnam, vel hospitium, plus illi molestus fuit, quam si nunquam illuc venisset. Verum, metuens, quod vix poterat credere, ut immunitas abiret, retorquebat sæpe oculos ad illud oppidulum, &, quidquid obstreperet, vocem cauponum, se revocantium, esse oredebat. Sed, quemadmodum, malis iniitiis orta, deteriores fere semper exitus solent habere: ita etiam, bene cœptis, prospere feliciterque cuncta succedunt. Neque, uti temere fortuna incipit bene vel male mortalibus facere, ita temere desinit; sed ludum utrumque pertinaciter ludit. Itaque fortunatus iste non habebit necesse, suintus faciendi gratia, marsupium exenterare: sed gratis altera sibi advenienti cœna præbebitur, nam vespere aliud oppidum ingressus, more suo

in

in hospitium ad cauponem divertit, cœnat, decumbit. Postridie mane, surgit, cauponem vocat, rogat, ut rationem conficiat, quidque sibi pro cœna, quam comederat, debeatur, enunciet; seque ad prosecutionem comparat. Sed interea dum caupo adest, dum ratio ñitur, dum equus ornatur, compotatores quidam, qui probe madulam habebant, inter se de nugis rixari cœperunt; res a verbis ad pugnam & ad manus venit. Caupo, exanimatus, rationes conficere, quas inire cœperat, desinit; nullum de cœna verbum amplius facit; sed, hospitis genibus advolutus, orat eum, obsecrat, ut se in illorum controversias interponat, pugnam dirimat, sibi que subveniat: nam, Si quæ cædes, inquit, hic fiat, numquidnam dubitas, quin perpetuo perierim? edicta sunt acerba, prætor severus, ego semper infelix. Quibus ille precibus motus, ibat, ut cauponi operam daret. Sed repentinus licitorum concursus duas res fecit illi compendii; nempe diremptionem pugnæ, inter ebrios commissæ, & solutionem cœnæ, quam obligurierat. Nani, cum mallet sibi cavere, quam cauponi, atque id ipsum metuens, quod ille, videlicet, ne raperetur in carcerem; equum conscendens, se, quantum potuit, ex oppido illo proripuit. Conquisitus est postea in omnibus popinis, non tam propter cœnam, quam ob testimonium, quod ipsi Prætor, de ea pugna, denunciaverat. Sed ille jam fecerat, quod servus malus; nempe in pedes se dederat. Jurarem, bonam fortunam iter una cum eo fecisse: nam tot illi commoda evenerunt, quot ne optare quidem sibi quisquam, nedum sperare, sine illa, ausus esset. Quid autem illi in caupona contigerit, in quam, ea quæ consecuta nox est, divertit, accipite, ac, bonam fortunam cum illo fuisse, negate. Aberat hæc caupona ab oppido, quod petebat, millibus passuum circiter octo; in quam manipulus quidam surum, quidquid, ex proximis villis, ovorum, gallinarum, caponum, vini, succidiarum, diripiebat; omne congerebat; ex quo facile fuit cauponi, eam homini, gutturi dedito, cœnam apponere, quæ maxime in illius ventris rem esset; adeo ut deliberaret, utrum aliquot ibi dies commoraretur, an statim discederet. Etenim, ita lepide ac nitide

se

se fuisse acceptum, videbat, ut nunquam sibi melius in vita fuisse fateretur. Sed, dum maxime in senatu cogitationum suarum sententias exquirat, de improvviso nova res accidit, quæ senatum dimittere, sibi quæ ipsum metuere, atque inde sese surripere cogeret, ubi comitia de capite suo fore non dubitabat; nimirum militum non paucorum adventus. Hi erant latrunculi illi quos diximus, qui se domum ex præda receperant, & undique cauponam armati obsederant. Si cor illi in pectore cœperit artem facere ludicram, quid me attinet dicere? in cogitatione vestra relinquo: nam multo erit vobis major ad intelligendum, quam mihi ad enarrandum, facultas. Tum unus, qui, ex habitu, videbatur habere imperium in ceteros, Numquidnaui, inquit, rei tibi cum istis est? qui, Nihil, respondit. Cur igitur emissitios istos oculos hac illac circumferebas? Quia nimis, ait, pulcris armis præditos eos aspiciebam. At scin', (excepit ille) quomodo se tibi res habeat? nisi te hinc properas ocus amovere, arbori alligatus, signi loco, istorum sclopis, in quem colliment, existes. At, Quo vis, ille, abeam, ait, si apud cauponem hunc habito? In malam rem, inquit lictorum explorator & emissarius. Eademque opera, duobus validissimis latronibus imperat, ut illinc abstractum, quo maxime ille velit, abripiant. Qui non procul ab eo oppido eum statuunt, cuius illud iter gratia susceperat. Ferebat ille quidem moleste, se nimis celeriter fuisse ab ea sagina depulsum: sed longe impensius gaudebat, suam sibi crumenam adhuc salvam cum intestinis omnibus esse. Sed non poterat illi male esse, cui sese comitem fortuna adjunxerat. Tuebatur se, eo oppido, notissimi hominis interfector, incredibili diligentia ac vigilantia: nam, ubi quisquam in oppidum venerat, continuo hominem conveniebat, in ejus se amicitiam, insinuabat, magnoque artificio excuspebat ex eo, quis esset, cujus, quo iret, quamobrem illuc venisset, an futurus esset ibi diutius? denique, ab hoc aditu patefacto, ad intima ejus cordis consilia penetrabat. Is videt hunc peregrinum, robustum hominem, ac gladiatoria propemodum corporis firmitate, sclopo & machæa probe munitum, & statim, suspitione offensus

his insidias sibi ab illo parari putavit. Quamobrem, consilio cogitationum suarum advocato, non varie, sed cunctis sententiis, decernitur, nisi ad cavendum paratus esset, suo capiti infortunii balistam intendi. Quamnam igitur rationem, ut ab ipso caveret, inivit? cum aliquandiu hæssisset, homo acutus excogitat, domum suam hominem invitare, & tantisper, dum ille ibi negociaretur, asservare apud se, victum catenis atque compedibus: sed quibusnam? num ligneis? minime. Num ferreis? multo minus. At quibus? escariis, hoc est, apud mensam plenam, cum esca atque potione victum habere. Itaque non dimittit tempus, sed simulata amicitia, hominem occupat prior: salutem, advenisse gaudet, domum suam invitat. Non fuit diu luctandum cum eo, ut oblata sibi occasionem arriperet: nam statim manus dedit, ac se victum esse confessus est. neque minori cum alacritate, nova ac certa spe cibi, tanquam funiculo aliquo capistratus, præeuntem illum secutabatur, quam bos vel equus dominum, cum plenum ad præsepe, ut ibi eum vinciat, adducit. Omnino, quoad ille apud mensam meticulose illius rostro deligatus est, hæc fuit ratio illi vivendi. Interdiu, suo operam dabat negotio, noctu ostensum ad præsepe se recipiebat: & quamvis se observari sentiret (neque enim erat tam stultus, ut, apud animum illius, metum pugnare, non intelligeret,) nimis tamen pulcros ludos, ex tam inepta hominis calliditate sumebat. Unum displicebat, quod opinione celerius sua ad exitum negocia festinassent: voluisset enim hominem diutius exedere. Quamobrem hospitem adiit, narrat, rebus suis, quarum gratia in oppidum illud venerat, a se rite confectis, nihil jam esse reliquum, nisi ut domum rediret ad suos: gratias agit, quod se tam liberaliter ex suis cibariis tractasset: operam illi suam pollicetur ac desert. Illico nova homini suspicio incessit, propterea hunc a se abire, ut aliquo occultatus, se ex improvviso, ac de insidiis, aggrediretur atque opprimeret. Ac secum, Mox, ait, experiar, utrum vere hic abeat, an simulet se abire, & in eum intuens, Num te fugit, inquit, itinera omnia esse infesta latronibus? ea igitur te lege dimittam, si du-

duos tecum, quos comites itineris dabo, venire sufficias; qui commeatum etiam omnem large præberi curabunt. Tum enimvero ridere secum ipse coepit; ac, Scilicet id unum, inquit, deerat felicitati meæ, ut reditus profectioni similis inveniretur. Sed videlicet ignorabat, bonam fortunam, qua illuc comitatus advenerat, re bene gesta, reversionem, cum ipso parare. Itaque, ne verbum quidem addendum putavit; verum, laudata hospitis in se benevolentia, Facerem tibi, inquit, injuriam, si tantum, a te mihi ultro oblatum, beneficium repudiarem, suspectis præsertim itineribus. Quamobrem, ut præceptum erat, reductus est domum; atque eadem opera ipse solutus est sumtu, hospes suspitione.

LXX. BALDUINUS TONSOR.

PRædicta narratiuncula ad se aliam attraxit, in eadem Academia habitam, qua, vasa nebulonis cujusdam ratio, ut se litium molestia liberaret, exponitur.

Magnam nonnullos sapientiam, simulatione stultitiæ, texisse, proditum memoriæ ac literis est; idque propterea, ut commodum inde aliquod aucuparentur, vel paratum sibi infortunium, a capitis sui peste, depellerent. Quis nesciat, (ut de ceteris taceam) Ulysses, ac L. Brutum, multum, temporibus suis, sapientia præstitisse? Et tamen eorum alter, liberali uxoris suæ consuetudine devinctus, ne sua cum aliis Græciæ Principibus, Trojam abeuntibus, arma conjungeret, causam non eundi, ex insanæ simulatione, quælivit; alter vero, quo patriam dominatu regis liberaret, seque vitamque suam Tarquinii odio sævitæque surriperet, eam, quæ in ipso erat, sapientiam atque virtutem, stultitiæ integumentis obduxit. Similis fuit ratio, non multis abhinc annis, Balduini cujusdam tonsoris. Nam, quo se litium quarundam molestiis eriperet, ad simulationem stultitiæ, se ipse dolis effinxit. At facio injuriam Ulyssi ac L. Bruto, clarissimis viris, cum de Balduino tonsore subjicio; sed malo, eos mihi habere iratos, quam, tam doctum hominis plebeji dolum oblivioni non vindicare. Neque illum iratum vereor, si rescierit; immo maximas mihi

gratias habeat, ac magno se honore affectum existimet, quod, cum duobus, omnis fere memorie clarissimis viris, comparetur. Ac propter eos, qui illum non noverunt; hic est, ventriosus quidam, obesus, capito, qui tonstrinam Romæ sapis celebrem habet, & sane, homo est voluptarius, iracundus, cerebrosus, magnæ escæ, sed longe majoris vini; omnes, quotquot sunt Romæ cauponias, & cauponum nomina, memoriter nominat; tum, quidquid in unaquaque cella vinaria est vini, seu albi seu atrii, seu lenis seu asperi, novit: quas alii emunt curas ac negocia, ille odit, atque abhorret: sed in primis, est fugitans litium: vineam, extra portam Collinam, possidet, quæ agri fertilitate, regionis amœnitate, cœli salubritate, cum nulli aliarum villarum cedat, sit, ut de ea veterator quidam, qui oculos ad eam adjecerat, litem intendat, & hominem quietissimum quam tumultuosissime adoriatur. Homo callidus cœpit excogitare, quemadmodum eam a se molestiam anoveret, & in alium transferret. Ac statim venit ipsi in mentem alter tonsor, Ulyssi nomine, qui Ghitam, sororem suam, habet in matrimonio: hic sibi videtur incus idonea, supra quam suas fallacias cudad. Ergo, sub initium Quadragesimæ, cœpit repente, abrepto gladio, insectari omnes domi, aliena loqui, clamare. Hic omnes accurrere, retinere, mirari, de repente eum esse a mente depulsum, qui paulo ante valuisset. Accersitur Ulysses; advocat. Ubi Ulysseni videt, tanto magis simulat insanire. Itaque os sibi distorquere, spumas agere, tectum ascendere, quasi præcipitare se vellet, &, tanquam imaginibus falleretur, dicere, Corripite direptores meæ vineæ, retinete, discerpите, interficite latrones; ubinam est Ulysses meus, qui mihi opem ferat? Tum ille, En adsum, inquit. Atque eum existimans, ob litium terrorem, in eam ægritudinem fuisse delapsus, objurgare leviter cœpit, ac polliceri, ad ejus defensionem, operam suam. Balduinus, quasi tum primum Ulysses aspiceret, O mi Ulysses, inquit, tunc hic eras? mihi igitur auxiliare, audaciæ istorum occurre; tuum negotium agis, cum mihi operam præstas; siquidem isthæc ad te vinea, una cum ceteris bonis, morte mea redibit, ut ego perierim,


vides; vix bidui vel tridui mihi reliquum est vite. Ulysses, plura eum loqui, non est passus; sed, in lecto collocatum, remotis arbitris, oravit, ut paululum quietis acciperet. Nemo invitus audit, cum spes hereditatis sibi proponitur. Quamobrem Ulysses, ab hoc vento abreptus, ridicule ab eodem, est passus, se hac illac impelli; & id secum habere rationis cepit: Miser hic, quantum video, prorsus interiit; nam, ut deliramenta ejus audio, quidquid hellebori mittunt Anticyræ, huic ægro mentem, quæ aufugit, revocare non potest; nullus est illi filius, quem patri, si intestatus sit mortuus, esse heredem oporteat; ad sororem igitur suam, uxorem meam, lege, bona ejus omnia pervenient; nonne magis ipso insaniam, si tam bonam vineam non omnibus copiis defendam? Quamobrem, omnis ceteris curis, cepit id unum agere, ipse advocatos adducere, circum patronos cursare, judices adire, docere, ad diem, atque adeo ad horam præsto esse, cum adversario concertare, operæ atque labori non parere. Quid verbis opus est? tantquam si Balduinus diem suum obiisset, ipseque in possessionem vineæ venisset, pro herede se gerere; de pastinando, serendo, ædificando cogitare; vineam inter filios partiri, sic dicens; Ea pars, quam salices directo ordine definiunt, in qua est puteus, Septimillæ mez, doti dicetur; ea autem, quæ ad viam publicam pertinet, quæque arundinetum habet adjunctum, Momus, filio itidem meo, assignabitur; ita tamen, ut Momus, per sororis fundum, haustum habeat, soror ex fratris arundineti pedamentaumat, ad vineam. Sed, ut ad Balduinum revertar, cum ea simulatio insanix feliciter sub manus succederet, unus adhuc scrupulus residebat, quemadmodum de testrina se gereret; etenim, negotium illud deferri, unde tantos quæstus fecisset, unde se & familiam aleret, e re sua non esse; nimis enim magnocum damno desipuisset, ac jure mittendus fuisset Anticyras, si dissolutus, in re tanta, fuisset. Quare, simulata paulum mente, sic Ulysses mæstus alloquitur, Mi Ulysses, quo loco mez res sint, vides, & sane, cælum ruere, & naturam interire, mea quidem nihil refert; sed, meus in te amor, me, quamvis oblitum mei, tui-

tuorumque immemorem esse non patitur: quantum detrimenti, ex hac mea invaletudine, constringina factura sit, non te fugit; quocirca, e re tua esse arbitror, ut ea probo cuiquam viro & fideli, quam optima conditione possit, locetur. Ulysses, id se curaturum esse, respondit, simulque daturum operam, ut pecunia suas in manus veniret. Neque dicto fides abfuit: nam paulo post Bal-lioni cuidam locata est. Balduinus, hac cura liberatus, ociosus ab animo, insanix operam dabat. Ac primo illo insanix simulatae tempore, ceperat se violentius agere, alios adoriri, velle sibi manus afferre, se precipitem agere, eaque fingere, quæ furentium sunt maxime: sed postea consilium displicuit, has secum rationes deputan-ti, Si perpetuo uti hoc impetu velim, primum, ad lan-guorem defatigabor; tum, metuo, ne mea, de medico-rum sententia, audacia, tenebris, vinculis, verberibusque coerceatur; quare nihil est a rationibus meis alienius, qui nihil nisi ocium quaero, atque ansam, qua cuculum istum eludam, quem tam avide bonis meis inhiantem aspicio. Quamobrem decrevit, tantum intra verba desipere, atque aliquid etiam leviter manu peccare, ut, pa-tinas in terram abjicere, vel, visa muliere pulcra, in ejus amplexus irruere, atque alia his similia conari. Initio simulatae ægritudinis, virginis cujusdam operas conduce-rat, quæ, ne æger umbris & imaginibus vanis perterre-retur, neve, ex insaniam, manu aliquid violenter faceret, una semper cum illo erat, cœnabat, propter dormiebat. At improbus, ubi videt hanc forma non mala, primo suis eam nugis aggreditur; illa timere, seque e conspe-ctu proripere, tum leviter repugnare, postremo deditio-nem facere. Sed quia Balduinus erat legitimæ prolis, supra quam dici potest, cupidus, antea quam quidnam sibi cum ea esset, clam eam secum matrimonio junxit, postea gravidam fecit. Ulysses, inscius harum rerum ignarusque opinum, quo arctius affinis sibi animum officiis beneficiisque constringeret, primo mane surgere, fora omnia circumire, aves, pisces, coëmere, Balduino apponere. Ille, esse, patinas detergere, Ulysssem obsona-torem optimum esse, dicere. Sed fiebat interdum, ut non semper Ulysses in tot nummis esset, quot sunt ad

emendos turdos, ficedulas, & capones, satis; unde torgebatur, eidem vervecinam, vel bubulam carnem, apponere, ac pro Græco, Romanum vinum inferre. Cum id contingeret, tum enimvero illum furere & insanire dixisses; clamare, Ulyssæi suum hostem dicere; vicinos, populares, ut sibi subvenirent, orare. Ulysses, qui jam spe & cogitatione sua vineam illam devorasset, verens ne, si affinis suus esuriret, tantus sibi bolus eriperetur e faucibus, ad proximam cauponiam accurrere, aves coctas, & exotica vina, mercari, res alienum constare, sumtui finem non facere. Ille quiescere, Ulyssæi virum bonum esse dicere, eumque exedere. Jam, apud iudices, agitata lis erat, qui, tum jure, tum Balduini misericordia adducti, secundum illum sententiam dixerant. Restabat, ut Balduinus, ex suo dicto promissoque, diem obiret extremum, cum ancillæ venter, qui celari non poterat, jam pulcre plenus, Ulyssæi venit ad oculos. Qui admirans, Hem, Balduine, inquit, numne solent insani ita inhoneste virgines ludere? cui Balduinus, Sic agitur, ait; quid ad te ea res pertinet? mea est uxor; parchoæ testibus præsentibus eam duxi; atque hoc quidem haud pro insano feci. Ulysses, re inopinata percussus, ac de spe omni dejectus, obmutuit, nec potuit proloqui unum verbum, vel ineptum saltem. At Balduinus, Quid est, ait, quod conturbatum te video? numne animum ad mulierem, quemadmodum ad hereditatem meam, adjeceras? Hic Ulysses dolorem suum amplius dissimulare non potuit; atque, Itane, pessime, inquit, me ludos fecisti? itane tibi idoneus visus sum, quem dolis falleres? ideoque mortem exoptabas, ut non modo viveres, sed etiam improbiorem aliquem, nequioremque te, gigneret? lurco, nebulo, veterator, impurus: utinam fuissent tibi cœnæ Thyestæ & Terei, turdi atque aves illæ, quæ mea pecunia comparatæ tibi advolarunt in ventrem: ut illud posthac edas quod te perdat, illud bibas quod nunquam transeat. Cui Balduinus, Hominem, ait, impurum & execrabilem vide; qui non solum morti & fortunis meis inhiat, quasi lupo esuriens, sed ultro contumeliis oneratum me advenit: abi sis hinc, in ganeum, quantum potest; nam, si pergis molestus esse,

esse, vel si huc intro posthac pedem tuleris, tibi pugna os exossabo. Neque quidquam propius est factum, quam, itidem ut murena, manibus coci, ossibus exuitur, Ulysses os, pugnis comminutum, a Balduino reserret. Sed ille, ne ad damnum, dedecus etiam accederet, iram continuit, seque inde proripuit, frustra querens, a Balduino se fuisse deceptum. Dixi antea, si recte meministis, Balduinum, quo cautius insanire posset, tonstrinam Ballioni locasse: hic restabat ejiciendus. Et primo, humaniter hominem Balduinus appellat, oratque, ut aliam sibi tonstrinam inveniatur. Cui Ballio, Quid ais? inquit; an ignoras, eam mihi fuisse locatam? in medio sunt tabulae locationis; aspice. Næ, tu homo es ridiculus, respondit Balduinus, qui istas speres tabulas praesidio tibi futuras; an nescis, quidquid in insania gestum est, solere a prætore restitui. At ego probabo, inquit ille, tibi lucida fuisse intervalla, cum locabas. At ego, respondit Balduinus, tum te praesertim insaniam percepisse ostendam, cum me tonstrina ejiciebas. Quid igitur agam? ait ille. Ego dicam, excepit Balduinus, abi & suspende te. Tum iratus Ballio, Sycophanta, inquit. At tu, clamat Balduinus, vel comprime linguam istam, vel si pergis male loqui, novacula hac, quam in manibus habeo, venas tibi praecido. Voluit deinde Ballio experiri, judicioque rem persequi; sed omnem operam perdidit. Nam judices, subveniendum esse insanæ, censuerunt.

Ipse autem alio abire est coactus. Quare Balduinus vineam, uxorem, & tonstrinam, sine controversia possedit.





**PINACOTHECA
TERTIA.**

THE

NEW

REVERENDISSIMO PATRI,

D. ANDREÆ FOSSÆ,
CANONICO REG. LATERA-
NENSI ET ABBATI.

BEne atque praeclare, Andrea sapientissime, de Repub. mereri mihi videntur, qui egregia hominum ingenia, quae sua aetate floruerunt, quorumque memoriam, sicut alia omnia, vetustas obrueret, omnium seculorum posteritati commendare, atque ab oblivione vindicare nituntur; ut eorum imagines ingenii, in suis libris, tanquam in aliqua tabula, docta atque disertae oratione, quasi coloribus picta, pens oculis subjiciantur. Nam quid est tam utile, atque adeo necessarium, quam eos, qui nullo rerum usu nullaque experientia imbuti, huius curriculum vitae ingrediuntur, in quo tam multi turpiter labuntur ac corruunt, posse, tanquam in speculum, in eorum vitam, qui illud ante ipsos confecerunt, inspicere, atque ex iis sumere exemplum sibi? videlicet, ut, quod illis iter ad laudem aperuit, in eo omnes nervos aetatis industriaeque suae contendant; quod autem eisdem datum est vitio, omni ope studioque defugiant. Atque hic mortuorum memoria propaganda labor multo magis est suscipiendus ob eos, qui, dum mortalem hanc vitam incohererent, quum sapientia atque doctrina ceteris anteerent, sive inertia, quod scribendi laborem effugerent, sive animi demissione atque modestia, quod memoriam in posterum ingenii sui nullam desiderarent, nihil omnino scripserunt, vel, cum ad scribendum se contulissent ea, quae ab ipsis essent inventa & excogi-

tata divinitus, post ipsorum mortem, cognatorum vel negligentia, aliquo in angulo, pulvere situque marcescerent, aut muribus blattis que cibum praberent, vel eorundem avaritia, ea quibus nullum satis dignum constitui precium potest, exigua mercede ad ceteros pomariosque advolarent. Sed ex iis, qui, quum divinitate quadam ingenii praearent, atque eximia cujusdam facultatis auctores existerent, nullum tamen a se librum, unde, quantum doctrina abundarent, colligi posset, possi sunt egredi, unus fuit Socrates. Hic enim, eruditorum quidem testimonio, & iudicio Gracia, cum prudentia & acumine & venustate, tum vero eloquentia, varietate & copia, eorum, qui ante ipsum docuerant, habitus est facile princeps; & nullam tamen literam ipse reliquit. Quamobrem, quantum aequum est nos debere Xenophonti, ac Platoni in primis, qui nisi Socratis ingenium, variosque sermones, suis scriptis immortalitati mandassent, illum vetustas, ut alios fortasse multos, oblivione obruisset; & quod magis dolendum esset, ea nos Philosophia carere contingeret, in qua de bonis rebus & malis, deque hominum vita ac moribus disputatur. Etenim ab eo Philosophia, quae antea in natura obscuritate, & in caelestium rerum contemplatione peregrinabatur, e caelo deducta esse dicitur, & in hominum cætus societatemque translata. Quem ego morem sequutus; id quod etiam alii ante me fecerunt, duobus jam voluminibus, eorum, qui me superstitite occiderunt, ingeniorum imagines sum conatus exprimere; horum praesertim, qui ex scriptis ipsi suis, quales fuerint, cognosci non possunt: nunc autem superioribus duobus tertium addo, conflatum ex iis, vel qui post eos, quos recensui, mor-

tem

tem obierunt, vel qui tum, cum scriberem, & memoria fugerant. Neque fuit mihi diutius in ea deliberatione cunctandum, quisnam potissimum esset deligendus, in cujus nomine hoc postremum opus exiret. Nam ea jampridem meum animum cogitatio subit, ut aliquid inveniam, quo, si non pari tuis meritis, grato tamen munere, significem, quantum me tibi debere profitear. Etenim, tua sponte nec alicujus persuasione vel gratia impulsus, mea omnia, quæ adhuc sunt typis impressa, legisti, miris in calum laudibus extulisti, tum antea me pene, quam aspiceres, singulari amplexus es benevolentia, incredibili conjungenda mecum amicitia cupiditate flagrosti; deinde, cum summum in tua clarissima religiosa familia magistratum gereres, ultro, non semel sed bis, salutandi mei gratia, domum ad me venisti, ibique, efficacissimis verbis, quæ non simulati cujusquam officii ratio vix vi exprimeret, sed quæ intimus cordis effectus expromeret, te tuaque omnia mihi detulisti; præterea, domus tua, ample magnificeque convivium exornasti, large munera contribuisti; denique, cum Ravennam Roma ad comitia Abbatis generalis profectus esses, simul ac patriam attigisti, elegantibus sane literis, plenissimis amoris, humanitatis & officii, prior me salvere jussisti. Quamobrem gaudeo, mihi, ad te remunerandum, id esse oblatum, quod tibi gratum fore non dubito, quum te liberalium horum studiorum, quibus nos a pueris operam dedimus, te in primis cupidum præbeas; quod non potest sine summa excelsi & elegantis animi magnitudine amœnitateque contingere. Sed ego stul-

tus, qui, dum veteris obligationis nexu me conor
exsolvere, novis atque arctioribus beneficii alterius
vinculis me tibi constringi non sentio. Nam dando,
multo a te plus accipio, quam est id, quod eme-
rior. Ego tibi munus, ex sua exiguitate ac tenuitate
parvum ac leve exhibeo; tu, illud accipiendo, au-
ditoritate, qua praeas, aliquid eidem magnitudi-
nis ac ponderis acquiris. Ego tibi opus, nulla fere,
ex sua vi, luce clarum atque conspicuum, trado;
tu mihi illud, tui nominis, cui dicatur, claritate
perfusum illuminatumque, restituis. Etenim tam
magnus in te meritorum numerus confluit, ut iis
non solum ipse niteas; sed nitorem etiam lumen-
que tuum refundas in eos, qui tuo se decorari no-
mine, postulent. Primum, nobilitas generis, qua
multos jam annos viget in vestra familia: siquidem
anno dñi CCC XXXIV Jacobus Fossa, l. C. ut tem-
poribus illis eximius, electus est iudex unus ex o-
mnibus, qui ortas, inter Genuenses ac Savonen-
ses, lites controversiasque dirimeret, & a quo jure
componeret; & Marcus Fossa, una cum aliquot
aliis, oratoris functus est munere, missi ad Ca-
rolum V, quo tempore in Liguriam venit; ut Im-
peratorem illum, tot victoriis clarum, omni offi-
ciorum genere prosequeretur, Reip. nomine, quoad
ille per Liguriam faceret iter. Et, quoniam mos
est vestra nationis, propter angustos ejus agri fi-
nes, ut civium suorum opera in mercatura vorta-
tur, nemo ex Fossiorum familia in aliqua sordida,
vel illiberali arte versatus invenitur, ut ex ea qua-
stum faceret; in quo genere numerantur opifices
omnes, iique qui mercantur a mercatoribus, quod
statim ipsi divendant: verum, quicumque animum
ad

ad mercatura studium adjunxit, non ea usus est vili nec tenui, sed nobili, magna, atque copiosa; ut videlicet holoserica vestes, in Germaniam, Galliam, Hispaniam, & ad Indos usque, comportaret, & ab illis multa referret, quorum magna est in iis regionibus, nulla autem ferme in nostris, annona. Quamquam te hoc genere laudum minime delectari comperio, quas non nobis ipsi peperimus, sed vel natura vel majoribus nostris acceptas referimus, sed totum abjicere, ac pro nihilo ducere. Imagnifice, fumosarum imaginum fiducia subnixi, se inferant, in quibus, prater formam & genus, nihil unquam sapiens laudavit. Alia sunt in te, tua propria, quæ veram in se laudem continent; quod videlicet ingentis spem lucri, quæ ex mercatura se objiciebat, generosa quadam contumacia, a magnitudine animi ducta, contemseris. Itaque non navem parasti qua merces vectares undique, vel in Hispaniam potius aveheres, quo te parentes destinaverant; sed incredibili sapientiæ amore ac perfecta probitatis studio inflammatus, cum vix a pueris excessisses (decimum enim quintum annum attigeras) Mediolani dedisti nomen in laudatissimam Lateranensium regularium Canonicorum familiam, ut ibi, rerum omnium humanarum curis expeditus, otiosus ab animo, utrique rei operam dares, & literarum studiis & quod tibi magis erat cordi, vitæ morumque sanctitati. Transacto tyrocinio, studiorum gratia profectus es Patavium, quæ urbs semper est habita scientiarum omnium domicilium; ibique, ea animi alacritate & contentione, bonarum artium, Philosophiæ, Theologiæ, ac sacrorum in primis Canonum cursum es in-

gres-

gressus; labore, assiduitate, diligentia ut aequalium tuorum, qui in eodem curriculo versarentur, studia praecurreres. Itaque, emenso earum disciplinarum spacio, cum eam jam tibi vim doctrinae comparaffes; ut ceteris praesse posses, qui vellent earundem disciplinarum cursum ac spacium inire, doctoris in illis atque magistri potestatem, omnium concessit, obtinuisti. Verum, tua illa egregia ad eloquentiam indoles, ad quam omnia a natura studioque adjumenta habebas, templa, suggesta concionesque spectabat. Jam omnes illustriores Italiae civitates, tui theatrum ingenii fieri poscebant: omnia sunt enim in te, quae solent perfecti oratoris speciem exprimere; forma dignitas, quae maximam, ad voluntates omnium sibi conciliandas, vim habet, latera, vires, eaque alia, quae nemo sibi potest, nisi a natura tradantur, affingere; actio singularis, quae si praesertim in vocem gestumque dividenda sit, vox est plena, canora, suavis, distincta, quae nec literas exprimat putidius, neque obscurer negligenter; gestus, qui nihil habeat ineptiarum, nec verba exprimat, sed cum verbis sententiisque conveniat. Illa vero tua vis dicendi sublimis atque magnifica, ut est copiosa, gravis ac vehemens! ut sensus ac dolores habet! ut in animos hominum influit eosque, quamcunque in partem causa postulet, agit, flectit, permovet, atque compellit, siue sit opus ad spem, siue ad timorem, siue ad odium peccatorum ac virtutis amorem, siue ad rerum humanarum omnium contemptum! orationis vero genus, quam purum, enucleatum, splendidum! ita tamen, ut naturalis, non fucatus, in eo nitor eluceat; quam exsculptum, comitum, ornatum! ita tamen,

ut

ut rerum gravitate, & majestate verborum refer-
tum, non autem inanibus puerilium sententiarum
flosculis conspersum, totum appareat; ut quādam
nobilis cujuspiam matronæ venerandam quasi casti-
moniam præferat, non autem illecebrosas meretri-
cis blandicias objiciat; quemadmodum faciunt ora-
tores ii, qui nihil ad animorum utilitatem, ad
voluptatem tamen aurium omnia, referunt. Tua
igitur hæc vox, tam docta, tam gravis, tam elegans,
tam eruditis auribus digna, totos triginta ferme
annos, audita est, in illustrioribus, ut diximus, Ita-
lia civitatibus, tanquam calum (hoc enim nomine
sanctus Spiritus, in sacris literis, concionatores ap-
pellat,) tonare, fulgurare, atque improbos scelera-
tosque tangere, ferire, atque pervertere. Et quod
rem continet, non tam oratione, id quod faciunt ii,
qui ab eo, quod verbis docent, moribus discrepant,
quam exemplo, es affectus, ut improbos percelleres,
& ad frugem, ut dicitur, revocares. Sed, num
quid is, qui tantam semper utilitatem omnibus at-
tulit, nulli, Congregationi suæ, usui fuit? immo
Reipub. regenda scientissimus tu in tua, ubi tan-
quam jubar quoddam lucidissimum nites, per omnes
bonorum gradus ad summum in ea dignitatis culmen
ascendisti. Etenim Prioris, Abbatis, Concionatoris
privilegiarii, Procuratoris in Romana aula prima-
rii, Visitatoris, Definitoris, denique Abbatis Gene-
ralis functus es munere. Quin etiam, quo tempore
aulatuum, in negotiis tua Congregationis, Procu-
ratoris Generalis nomine expediendis conficiendis-
que, fidem, diligentiam, assiduitatemque intueba-
tur laudabatque, S. P. Q. R. tuarum virtutum fa-
ma compulsum, non solum honorificentissimo diplo-
ma-

mate Romana te civitate nobilitateque donavit, verum etiam in senatum cooptavit, ac beneficiis officiisque omnibus cumulavit, quibus illi ornari solent, quorum maxima atque amplissima extant in universam Rempub. merita. Neque id quod tibi a summis tuis occupationibus reliquum erat temporis, voluisti (quod facere tuo jure poteras) quieti & cessationi concedere; neque aves imitatus es, quae, ab operis labore defessa, libere hac illac volitare cernuntur; sed placuit etiam tibi, aliquam omnibus oculi tui rationem constare. Itaque duo magna & egregia volumina confecisti, quorum uni titulus est, Pentachordum Caritatis, alteri Amussis viri probi, ad librum Tobiae. Quae quidem opera, ne adhuc, typis impressa, in eruditorum manus pervenerint, duo fuerunt in mora: primum, modestia tua, quae, licet virtutum omnium ornamentis instructus, recundaris in publicum prodire; tum, acerrimum illud iudicium, quo praestas; ad cuius exactam rationem si placeat omnia dirigere, nihil tibi possit satisfacere. Sed erit illud tempus, cum, tuum ad arbitrium absoluta atque perfecta, nihil hominum conspectum lucemque refugient, sed sua omnibus suavitatis, elegantiae, doctrinaeque, quantum quisque velit, impertient. Quae cum ita sint, patere, a tui nominis, tantis meritis, tanquam luminibus, clari fulgore, meum istud opus, ex se obscurum, lucis aliquid mutuare. Hoc mihi gratius facere nihil posset.

I A N I N I C I I
E R Y T H R Æ I

PINACOTHECA TERTIA.

I. IUSTUS LIPSIUS.

Iusti Lipsii, hominis, nostra ætate, doctrinæ & eruditionis fama clarissimi, imaginem descripturus, quam potissimum viam insitam, prorsus ignoro. Nam, si, quæcumque ille scripsit ediditque, quorum non parvus est numerus, velim sigillatim oratione referre, sunt ea mihi temporibus distinguenda, & loca notanda, & occasiones suo ordine enumerandæ, quibus est ad scribendum impulsus. Quod si persequeremur, non tam videretur ex quibusdam quasi delineamentis, quo fuerit ille a natura factus ingenio, ostendere, quam vitam ejusdem exponere; quod est ab instituto meo alienum: sui autem, plerisque omissis, in aliquorum enarratione versabor, vereor, ne iis, qui eum nunquam noverunt, minus lucide appareat, quantum vir ille omnium artium præclarissimarum laude præstiterit. Itaque, utrique rei occurram, quantum potero; atque, iis tantum, quæ magnam in primis, ad eum, qualis fuerit, exprimendum, viam habeant, afferendis, satietati medebor, eorumque ignorantia, quos tanta vis virtutis effugerit, consulam. Ac duabus præsertim rebus clarum ac nobile suum nomen effecit: primum, singularis eruditionis laude, qua nemo illi antecessit, qui una esset ætate; nam plures veterum Latinorum libros recognovit, castigavit, atque eorum partim doctissimis suis commentariis, omni eruditione refertis, partim animadversionibus, partim notis illustravit, complures etiam libros de suo, non minus docte quam scite eleganterque, composuit.

Nam,

nam, qui illi annus propemodum aditum ad vitæ curriculum dedit, idem quoque scribendi initium attulit. Anno enim nono, qua homo ætate, cum jam ratione uti valeat, vere incipit vivere, poëma scripsit; tum, annos natus duodecim, orationes composuit, atque etiam habuit, quæ magis spe & expectatione, quam re ipsa, quamvis sententiarum verborumque splendore non careant, laudantur: atque ab hac indole, consequentibus annis, usque ad exitum vitæ, alia deinceps, ut videbimus, maturiora ac præstantiora prodierunt. Sed, ab in-eunte ætate, dilexit atque admiratus est, ex omnibus auctoris plurimum, Cornelium Tacitum; utpote qui omnino in illud dicendi genus, cui non absit quidquam neque superfit, natura serebatur; quem usque eo in amoribus habuit, ut ad verbum edisceret. Audivi de eo, qui sermoni se interfuisse narrabat, in Germania, cum esset apud principem nescio quem virum, ac die quodam injiceretur mentio de Tacito, gloriantem Lipsium dixisse, se aureum illud volumen adeo memoria comprehensum habere, ut nihil ex ea unquam exciderit; qui etiam sponsonem laceessivit, ni ita esset ut diceret; atque: Agite, inquit, statuite hic aliquem cum pugione, ac, si, Cornelium totum recitans, verbum unum peccavero, non recuso quin eo me ille pugione confodiat; ac sponte jugulum vel pectus, quod ferire possit, aperiam. Deinde, sibi gloriam famamque quæsit, ac multorum in se studia, dictionis novitate, convertit. Illud enim Latine scribendi genus induxit, quod proprium est suum, nec aliorum: &, quemadmodum Ciceronis studiosi, Ciceroniani vocantur, ita etiam, qui ad Lipsii stylum se exercent, Lipsiani appellantur. Genus orationis est breve, concisum, verbis inops, crebro incidens, nunquam sere circuitum; & quasi orbem verborum, apta atque eleganti compositione consiciens. Quæ scribendi ratio ac modus, avide primum ab auditoribus suis est abreptus. Nam, quid tam cupiunt adolescentes, quam se magistrorum suorum esse quam simillimos? Sed fit etiam, communi quodam vitio, ut ea magis, quæ facilio-ra sunt, aut etiam insignia ac præne vitiosa, conspectemur imi-

imitando, quam ea, quæ maxime excellunt in eo, quem imitamur. Ideo illius auditores, doctrinæ & eruditionis nervos, qui in illo erant, non assequebantur, dum subtile, attenuatum, incisum ac breve orationis genus imitabantur. Quod ille animadvertens, sui ipsius conscius, auctor illis erat, eosque hortabatur in primis, ut hac una in re ab ipsius similitudine se, quam maxime possent, abstraherent, ac tota mente Ciceronem, atque omni animo, intuerentur. Hæc nova dicendi scribendique ratio, a discipulis, multoque magis a scriptis Lipsii, ex Belgio translata est in Italiam, multorumque studia cepit; eorum nimirum, qui, Tullianam illam scribendi varietatem & copiam se assequi posse, dissiderent. Itaque hanc sermonis jejunitatem sterilitatemque, in qua se posse excellentes evadere non dubitant, sunt amplexati; & quia tantum quisque laudat, quantum se assequi posse non desperat, hanc unam solum ad eloquentiam viam, in cælum efferunt, eamque, quasi formam figuramque dicendi, omnibus elegantiorẽ prædicant, quam in suis ille scriptis expressit. Varia studiorum suorum domicilia habuit. Sexennis, Bruxellis, ejus eruditionis, quæ deinde, tanquam ædificium aliquod, in eam altitudinem, quam videmus, excrevit, fundamenta jecit, apud ludimagistrum: atque ea celeritate, prima illa rudimenta Grammatices, quæ ab illo tradebantur, accipiebat, ut magister, quo condiscipulorum tarditatem, illius studio, incitaret, suis impositum genibus, ea recitare juberet, quæ illi ediscenda mandaverat. Tum, Coloniz Agrippinz, in scholis Patrum Soc. Jesu, iis disciplinis excultus est, quibus puerilis ætas impertiri solet. Sed adolescentuli docilitas, & rectum ad virtutem ingenium, (nondum enim purum integrumque animum aliqua vitiorum labe contaminaverat,) Patrum erga illum studia mire commoverunt; quibus illi, Societati nomen dando, respondisset, nisi id parentibus oboluisset; qui cum statim Lovanium evocarunt, ubi ex illorum arbitrio ac voluntate, cum furi civili, atque, in Gymnasio Liliensi, Philosophiæ, multum operæ dedisset; ab earum artium tanquam portu, ingenii quasi navim solvit, eoque vela dedit, quo jam pridem sua cum

naturalis inclinatio propensioque vocabat; nimirum ad humanissima ac liberalissima studia; præsertim cum patrens, qui posset obfistere, Bruxellis, quam ille urbem, præfecti prætorio munere, administrabat, interfisset, Neque diu otii sui fructum a se expectari passus est. Et enim, Variarum Lectionum librum, Cardinali Granvellano dictum, edidit. Qui liber, Cardinali in primis operam dante, latum illi aditum in Peretani domum aperuit, ac multas simul conunoditates obiecit; ut Romæ videlicet, cum illo, cui erat ab epistolis, esset; ut urbis, quondam nationum omnium reginæ, atque ibi imperii majestatisque, reliquias, etiâ nunc hostibus terribiles admirandasque, conspiceret, contempleretur, & honore cultuque prosequeretur; ut insculpta marmoribus, veterum Imperatorum, beneque de Republ. meritorum civium, elogia oculis lustraret, manuque describeret; ut M. Antonium Muretum, omnium eloquentissimum, in Gymnasio Romano eloquentiæ præcepta tradentem, audiret; ut P. Franciscum Bencium, in Gymnasio suæ Societatis, juventutem optimis disciplinis instituentem, eo sibi amoris nexu constringeret, ut in fratris germani loco diligeret; ut Carolum Sigonium, Petrum Victorium, Hieronymum Mercurialem, omnis eruditionis doctrinæque principes, fama sibi antea notos, aspiceret, audiret, cum eisque colloqueretur. Sed, discessu ab Urbe, nescio quomodo, a se discessit nonnihil, & voluptatibus, quibuscum antea inimicitias gerebat, quasi indulgit, ac Lovanii paululum arûmo obsequutus est suo: verum Leodii, Caroli Langii, viri doctissimi, ac veteris amici, admonitionibus, ad se ipsum rediit, ac totus sibi displicens, libros, de constantia composuit. Neque ita multo post, Viennam Austriæ, & in Maximiliani II aulam venit, compluribus doctissimis viris ornatam ac refertam; a quibus est honorifice ac peramanter exceptus. Sed, cum jam patriam ac domum animo conceptam haberet, nullis conditionibus adduci potuit, ut ibidem, ad illius ornamentum aulæ decusque, consisteret, ac literatorum illum numerum & chorum expleret; quem numerum chorumque, cujusmodi viri constabant? ii, qui, omnium eruditorum judi-

judicio, omnem rerum præclarissimarum scientiam animo conclusam habere existimarentur; Augerius Giffenius Busbequius; Joannes Cratonus, Nicolaus Biesius, Joannes Sambucus, Stephanus Pighius. Adhuc nemini se ad docendum dederat; sed, per fines Saxonie iter faciens, accepto Belgico tumultu, & acerba bonorum suorum direptione, re necessaria cogente, compulsus est, Jenæ hanc provinciam accipere, eamque annum & eo amplius obire. Sed jam ex illis integumentis dissimulationis, quibus tegebatur, evolutus artifex, amplius latere non poterat. Quamobrem, cum jam Colonie Ubiorum Annam Colstriam, nobili loco natam, ac viduam, ex qua nunquam liberos suscepit, uxorem duxisset, & Antiquas lectiones, ac Notas ad Cornelium Tacitum scripisset, quem postea uberioribus commentariis illustravit auxitque; evocatus est Lugdunum Batavorum ab ejus Reipubl. Ordinibus, honorificis stipendiis, ut redundantem effluentemque vim illam eruditionis doctrinæque, qua pectus completum habebat, in alios refunderet, qui eam vellent excipere. Quod ille munus, sibi delatum, cum accepisset, tredecim in eo annos summa est cum laude versatus; adeo ut ejus nomen, toto orbe terrarum, omnium linguis ac literis celebraretur. Quod fuit causæ, ut, cum clam inde ac furtim, religionis, ut ajunt, causa, se subduxisset, ubi id palam est factum, nullus tota Europa fuerit vir princeps, nullus Rex, nulla Respubl. nulla paulo illustrior civitas, nulla Academia, quæ non summa vi illum expeteret, ac certatim, maximis ad se præmiis, evocarent; Guilielmus, Boiorum Dux; Ernestus, ejus frater, Ubiorum Eburonumque Antistes; Wolfgangus Theodoricus Salisburgensium, Julius Herbipolensium, Præfules; Christianus, Saxonie Dux; Clemens VIII, Pont. Max.; Henricus IV, Gallie Rex; Ferdinandus, magnus Dux Etruriæ; S. P. Q. Venetus; Patavini; Bononienses; alique, quos longum esset omnes referre. Sed omnium istorum, quos enumeravimus, studia, Lovanii amor evicit, Brabantie Ordinibus summa cum benignitate evocantibus; quibus & suos de Cruce libros dicavit. Scripsit etiam, ibidem cum esset, hæc omnia. Facem historicam, qua obscuras

Græcorum Romanorumque res perlustrare cupientibus, tanquam ceræum lucet; tum, volumen in Senecam Philosophum, quod etiam, eleganti epistola, Pauli V Pont. Maximi nomini dicatum, enūsit; cui epistolæ adolescentulus ego respondi, Marcelli Vestrii Barbiani rogatu, cui Pontifex, suo nomine respondendi, partes mandaverat; erat enim illi a Brevibus. Sed totius scribendi cursus quasi meta fuerint Lipsio, Deipharæ Virginia, Sichemensis & Hallensis, res novæ atque admirabiles; cui Virgini Hallensi, moriens, lacernam suam pelliceam testamento legavit. In quo, non potuit, quin factorum hominum urbanitatem incurreret; qui quidem ridicule, sed non admodum religiose, ideo lacernam pelliceam Virgini illi relictam aiebant, quod ejus miracula, quæ tantopere in cælum laudibus efferebat, frigerent ad populum. Stomachabatur in eos, qui, superbia & ambitione ducti, judicium de aliorum scriptis ferre, seque Criticos appellare, audebant; quorum audaciam insolentiamque conatus est Satyra Menippea, quam adversus eos armaverat, labefactare atque infringere; cum contra ipse nunquam præponeret se aliis, sed omnes vcreretur ac diligeret. Et tamen tam multa scripserat, eaque, quorum commemoratio & fama non iisdem, quibus vita illius, finibus terminata sunt, sed progressa longius, atque etiam nunc vigent, eorumque vitæ cursus cum omni futuri temporis spacio adæquabitur: ut sunt, Commentarii ad Polybium, ad Panegyricum Plinii, aliaque opera; ut libri Saturnaliorum, &, in pauca ut conseram, ea omnia, quæ numerantur ab illis, qui ejus vitæ seriem, suis scriptis, posteritati mandavunt. Hepatario morbo laboravit; cuius curandi gratia, in Eburones, ad Spadanos fontes acidos, profectus est. Sæpius in vita, manifestum vitæ discrimen adiit; ter in puerili ætate, quæ non raro adversis casibus solet esse obnoxia: nam parum absuit, quin a nutrice, fortasse dum altiori somno oppressa est, suffocaretur, vel in aquam mergus, vel crurifragio, interiret. Deinde, lethali morbo præne sublatus est Dolz, quæ Sequanorum est Academia; ubi, quum luculenta oratione Victorem Giselinum, inter medicos allectum, laudasset,

ac statim deinde, opiparo convivio exceptus esset; in quo, ut mos est illarum regionum, convivæ invitare se plusculum solent, & in sese largius merum invertere, repente, insolito horrore correptus, cum febris domum rediit; cui nisi, præstantissimorum medicorum auxiliis, itum obviâ mature fuisset, eo celeriter consumto, elegantissima politissimarum artium studia; tot egregiis operibus carerent, quæ postea, cum vita suppeditasset, ab ejus ingenii fonte emanarunt. Postremo, anno clb lō CV, annos natus unum de sexagesimo, ex vehementissima tussi, ac distillatione, a capite defluente, X Kalend. Aprilis interiit; cum antea sacro perunctus Oleo, ac Pœnitentiæ & Eucharistiæ Sacramentis bene viaticatus, illud iter esset ingressus, quod suscipiendum est omnibus.

II. JACOBUS MERLO HORSTIUS.

COgitantibus nobis, transalpinis regionibus relictis, quo nos, Justi Lipsii imaginis referendæ gratia, cupiditatis quidam ardor adduxit, domum, hoc est, ad nostros, redire; paululum moræ obijcit Colonia Agripina, Ubiorum urbs longe clarissima; viri optimi, ac, tum doctrinæ, tum, quod refert, sanctitatis apud ipsos fama notissimi causa; nec festinantes nos vult antea dimittere, quam ejus iconem, quam maxime ad similitudinem veri descriptam, nobiscum afferamus, ceterisque illustribus viris adjungamus, qui, in nostra Pinacotheca, delectationem inspicientibus afferunt, commemoratione hominum & cognitione formarunt. Et sane jus postulat. Nam quamvis, ut David Rex inquit, ille, qui justitiam ac pietatem coluit, rectissimum tenuerit iter ad gloriam, nec cujusquam oratione ac scriptis, ab oblivione hominum se vindicari desideret; attamen omnis exsuperantia virtutis, jure suo, debitum laudis præconium-efflagitat, sui que memoriam nominis, rerumque gestarum, literis custodiri ab eo deposcit, qui id ullo modo præstare vel assequi valeat. Atque is, qui adeo nostrum ad se studium atque operam attrahit, est Jacobus Merlo Horstius; in quo non minimus exitit

Catholicæ religioni apud Ubios splendor ac decus. Hic, viginti & unum annos, Ecclesiæ S. Mariz in Pascuo, Parochi jure ac nomine, ita præfuit, ut non solum ceteris Parochis, sed longe superioris etiam ordinis hominibus, debeat esse exemplo, quemadmodum commissæ sibi a Deo animarum regendarum provincia sit gerenda. Primum, ne minima quidem in eo cogendæ pecuniæ cupiditas ac studium exarsit, nullæ innatæ eidem avaritiæ suspicio se prodidit, ut, quemadmodum a pluribus committi videmus, locupletioribus semper sacerdotiis inhiaret, ac, tenuioribus valere jussis, pinguiora invaderet; in quibus justissima illa Dei querela consumitur, qui, avida istorum ingenia verberans, Prophetarum ore eos, ait, non greges sibi commissos pascere, quemadmodum pastores æquum est facere, sed se ipsos alere, neque quidquam curæ illis esse, ne populi, celestis pabuli inopia enecti, depereant, sed omni mente in ea cogitatione curaque versantur, ut opibus divitiisque circumfluant, quibus quotidie laute splendideque convivium exornent, abacum argento optime tacto instruant, quod in conviviis exponant, pretiosam suppellectilem comparent, Attalicis peripetastrotis parietes ædium suarum vestiant, canes, pane ex Christi pauperum ore, quibus debetur, crepto, educunt expleantque, quibus in venationibus utantur. At iste, de quo loquimur, eo sacerdotio, ad quod semel eum Deus vocaverat, quamvis exiguum, contentus, in eo regendo administrandoque, omnes, ut par est, nervos ætatis, ingenii, industrieque exseruit. Et, quia fortasse non deerant, qui ejus cupiditatem studiumque, ad majora concupiscenda inflammarent atque incenderent, quo posset abundantius vivere, eos Davidico illo rejiciebat, *Dominus regit me, & nihil mihi deerit; in loco PASCUÆ, ibi me collocavit;* ad ecclesiæ suæ nomen alludens, quæ S. Mariz, ut diximus, in Pascuo appellabatur; in quo, modico, ut dixi, contentus, non avidi, non appetentis animi signa præbebat. Tum, in suo munere recte laudabiliterque tuendo, nullus eum major labor sollicitudoque torquebat, quam illa, ne quid detrimenti Catholica fides caperet, in hac custodia semper permanebat, ab eaque ne

tantulum quidem oculos deficiebat, etiam si omnes mortales sibi capiundos esse inimicos non dubitaret. Sed quum tanto Catholicæ religionis studio teneretur, fortasse non poterat illi, quos in fide erudiendos susceperat, doctrinæ inopia, satisfacere. Immo erat apprime eruditus ac doctus, & Theologicis præcipue disciplinis instructus: nam in iis numerabatur, quos Theologiæ Licentiatos appellant. Itaque, festis diebus, docta atque igne caritatis incensa oratione, studebat, ex animis hominum, vitiolorum radices evellere, & contrarias illis virtutes inserere; privatis vero sermonibus, non cessabat, suis opem asserre, afflictos consolari, errantes in viam reducere, peccata in odium adducere, pacem componere, ac discordiarum causas, si quas inter aliquos intercedere noverat, funditus tollere. Quæ oratio eo apud suos gravior habebatur, quod cum ejus vita mirabiliter congruebat. Vivens, in assidua mortis meditatione versabatur, in eaque magnam inesse vim ad bene vivendum, non immerito existimabat; ac propterea, ut ceterorum hominum studia ad eandem exercitationem commoveret, quam tanto sibi usui fuisse cognoverat, libellum composuit, quem etiam, extremum spiritum agens, sua manu conscripsit, quem *Epitaphium hominis Christiani*, vitæ ejusdem regulam exprimens, appellavit: in quo hominem, vita functum, & conditum in sepulcro, cum viatore loquentem inducit, eumque amice ac perhumaniter admonentem de statu hominis post mortem, tum quod ad corpus tum quod ad animum pertinet; ac præsertim de ratione dictorum factorumque omnium, quam Deo severissimo judici reddit; quæ, quo altius mentis memoria in animo hæreat, potest unusquisque ad res suas revocare, (nam ad id demum redeundum est omnibus,) seque jam esse mortuum, ac prædicere ea aliis, effingere. Verum melius ex aliis ejus scriptis agnoscitur, quali ipse ingenio fuerit. Plura enim scripsit, plenissima eruditionis ac pietatis. Multum etiam operæ ac laboris, in D. Bernardi operibus illustrandis tribuit. Sed nimis celeriter evocatus est a Deo, ad laborum suorum fructus percipiendos. Etenim annos natus, non amplius septem ac quadraginta, XII Kal. Aprilis 1516 C XLIV, a vita recessit.

III. MARTINUS BONACINA.

EX iis omnibus, qui generi hominum consulere deque eo bene mereri laborant, iis non immerito, palmam esse dandam existimo, qui ita literarum studiis operam navant, ut aliquid ex se pariant, cognitione & scientia dignum, quod deinde editum, ad communem omnium utilitatem hominum proferant. Etenim illi, vehementi cuidam cupiditati, unicuique a natura insitæ, occurrunt, ut aliquid semper addiscat, ac præstantissimam illam animi facultatem, nempe intelligendi vim, rerum pulcerrimarum notitia augeat, alat, ac nutriet. Omnes, Aristoteles inquit, homines, ad aliquid intelligentiæ scientiæque comprehendendum, naturali quodam impetu incitati feruntur. Verum, illi quoque non minus, immo multo etiam, ut opinio mea fert, magis, hominum in se studia voluntatesque merentur, qui ea literis tradunt, quibus ii, in quorum manus ea pervenerint, meliores fiant, atque animi morbos erroresque depellant, quos si evelli extirparique contingat, quanta a Rebus publ. quanta a privatis hominibus vis infortuniæ abesset! atque ex contrario, quantum eisdem pacis & tranquillitatis bonum accederet! Unde, obsecro, bellorum, seditionum, discordiarum, ac litium semina oriuntur, nisi ex hominum cupiditatibus? Eas tolle; simul etiam litium controversias, bellorum certamina, unde illa promanant, eripies. Itaque homines inter se amice ac concorditer viverent, nihil quisquam ex alterius bonis concupisceret, nemo alterum injuria vel damno afficeret. Quo quid potest generi hominum felicius accideret? Atque ei rei pro sua virili parte dant operam ii, qui in eo sunt omni cura & cogitatione intenti, ut libris, a se editis, animi vitia, quæ mali tantum, quantum diximus, afferunt, noceantur, curentur, ac depellantur. At utraque in re Martinus Bonacina Mediolanensis, ut magno generi hominum esse usui posset, multum studio atque labore perfecit. Nam libris acutissime scriptis, tum ea, quæ ad ingenium excolendum, alendumque, & ad sciendi sitim explendam, valerent, exposuit, cum

et-

etiam, quæ ad mores, prolapsos, erigendos, ad cupiditates, longius progressas, revocandas, ac rectam vitæ rationem instituendam, sunt necessaria, quam plura, *Moralis Theologiæ* nomine inscripta, edidit: quæ, inquam, omnia ad utilitatem diriguntur eorum, quos in vita errare contingit, vel, si nunquam ab officio disceserunt, quemadmodum in eo permanere ad extremum usque spiritum possint. Quæ tantum commendationis habuerunt, ut laudibus, non semel sed sæpius, non uno tantum in loco, sed in pluribus ab ipso aucta & locupletata, sint typis excusa. Neque omnibus in rebus fecit desiderijs eorum satis, qui sciendi cupiditate studioque tenentur. Multa enim sunt, quæ nihil vel parvum nos scire expediat; sed eas vel tantum recognoscendas illis objecit, quas, quoad fas est, homini, scientia perceptas ac memoria comprehensas nos habere, conveniat; ut Christi Domini incarnationem & celestis gratiæ præsidia. Nam de re utraque accuratissime scripsit voluminibus aliquot: quibus &, quæ divinitus de inexplicabili illo mysterio traduntur; quo Deus, Dei Filius, communem hominum naturam assumpsit, eamque sibi arcano atque a nemine intellecto unius hypostasis nexu conjunxit; & quæ nos de divinis auxilijs sentire oporteat, quibus ad eam, unde æterna nostra salus continetur, suscipienda excitamur, prosequenda juvamus, perficienda confirmamur, est persecutus. Cujus egregia virtus atque doctrina eo gratior ac probabilior videbatur, quod erat cum summa morum ac vitæ probitate innocentiaque conjuncta. Nam isti, si diis placet, vitæ morumque magistri, si secus vivant quam docent, si legibus, quas alijs indicunt, continentis virtutumque omnium ipsi non obtemperant, magna ex parte, quod in ipsis est, doctrinæ, quam tradunt, commendationem videntur evertere, ac suis doctissimis ac sapientissimis vocibus, ne commcare in animum possint, audientium aures obstruere. Hanc igitur amplissimam omnium artium, bene vivendi disciplinam, Bonacina, non solum literis, verum est etiam moribus persecutus. Neque id dissimulatum est ab ijs, qui eodem tempore, in simili, *Moralis* videlicet *Theologiæ* tradendæ argumento ver-

fati sunt: quos ille, non uti mos est eorum, qui idem opus urgent, adversarios aut obtrectatores laudum suarum, sed socios potius & consortes laudabiles ejusdem laboris, habuerat; qui fere omnes, in suis libris, honorificis sane verbis, vitæ eidem sanctæ ac laudabiliter ætæ testimonium dederunt. Atque ejus hæc singularis probitatis doctrinæque famam arbitror fuisse causam, quæ Urbani VIII Pont. max. studium incendit; ad insignis cujusdam civitatis Episcopatum illi demandandum. Quod utinam Urbano Pont. non venisset in mentem. Non enim, in medio fere spacio, fuisset interruptus illius ad summæ doctrinæ gloriam, cursus, multique, ad studiosorum utilitatem, ejus ab ingento, fructus pervenissent, quos omnes mors illis, tanquam calamitas aliqua, interceptit. Etenim, dum anno L^o CXXXI, ætate mediâ, ac summis caloribus, discedens ab Urbe, in Germaniam properat, prius quam Viennam attingeret, est coniectus in morbum, qui cum in dies fieret amplior, sensit, sibi mortem instare, ac multis veræ pietatis signis editis, animam Deo, unde acceperat, reddidit; non quidem inanem ac nudam, sed tanquam talentum, quod, ut in eo negotiaretur, accepisset, magno cum sænore auctam locupletatamque. Ac præter libros, quos diximus, ab eo relictos, edidit etiam alios duos; unum, de electione summi Pontificis, de beneficiis alterum.

IV. ROBERTUS UBALDINUS.

Magna profecto vis inest in prima illa puerili institutione, ad reliquum vitæ cursum similiter peragendum. Nam si illa, ex sanctissimis legibus atque ex optima disciplina constiterit, consimilis etiam illi vitæ cursus consequetur: sin autem ex otio, inertia, desidiaque consuetur, quis dubitet, quin, qualis sementis fuerit, tale sit etiam id, quod ex ea metatur? At, instituendæ formandique, in ætate prima, puerorum animos ad majorum instituta, ac probatissimos mores, adeo ad parentum, eorumque, in quorum potestate illi sunt, curam ac sollicitudinem pertinet, ut, quæcumque illi in par-

partem se dederint, sive ad virtutes sive ad vitia contulerint, non tam puerorum illam esse laudem vel culpam, quam eorum, quorum illi disciplina continentur. Recte Diogenes, ut Cynicus, cum videret, adolescentulos quosdam ante præceptoris oculos scurriliter quidpiam agere, non illos verborum objurgationibus verberavit, sed elato baculo, quo nitebatur, aliquot magistro, cujus illi culpa delinquebant, plagas imposuit; Sic, inquit, doces? Perspicuum est, quam longe parentum in libros indulgentia prodierit, qui eos a teneris, ut Græci ajunt, unguculis assuefaciunt, quidquid incedit in animum, velle, victui, vestitui ac cæteris rebus, supra vires indulgere, sermone uti immodesto ac procaci, multa in eis, pudenda dictu, conspiciere. Fac in istis esse Francisci vel Dominici indolem, jam tota, hac disciplina, corrumpetur atque delebitur. Contra, da illis ingenium malum, & ad pejora omnia pronum, quodnam est facinus tam audax, quod non illi, cum adoleverint, concepturi? quodnam scelus tam atrox ac fævum, quod non suscepturi etiam sint, si causa peccandi se dederit? At ex contrario, si non mollis, prima illa puerorum educatio fuerit, si nulla cæca atque sopita parentum socordia intercesserit, si disciplina quam maxime severa non defuerit, quid non boni sperari poterit ab iis, quos pietas, frugalitas, pudor in ea domo aluerit? Talis erat illa domus, in qua educatus est Robertus Ubaldinus ex M. Antonio Ubaldino & Lucretia Gherardescha, Leonis XI. Pont. max. sororis filia, natus. — Aberat ab ea domo luxuria, improbitas, perfidia, fraus; vigebatque in ea, castitas, modestia, temperantia, simplicitas, fides. Eruditus est in scholis Patrum Soc. Jesu, una cum aliis fratribus, tum literis humanis tum philosophicis. Cujus ea erat ingenii docilitas, ea in accipiendo, quæ a magistris tradebantur, celeritas, ut clare inter ceteros condiscipulos exsplenderet. — Et, quia Perusii, ubi parens suus plurima ac maxima negotia habebat, magnam ineuntis ætatis partem exegit, factum est, ut, quemadmodum alios doctos viros, ita etiam Balthasarem Ansideum, Græcis doctum literis & Latinis, ita consuetudine sua sibi devinxerit, ut

fe-

fere nemo illi fuerit carior, neque iucundior. Legi ego aliquot Ansidei ad ipsum & ad fratres epistolas, quibus eos ad studium eloquentiæ adhortatur; quæ epistolæ tantam visæ mihi sunt habere Latini sermonis puritatem suavitatemque, ut appareret, in eis nativum quendam leporem, ac proprium Romani generis, esse, non autem ascitum. Verum, cum Robertus a magistris suis didicisset, atque etiam ipse legisset, neminem sibi soli natum esse, sed multo magis generi hominum, quibuscum naturæ ejusdem societate conjunctus teneretur, simulque accepisset, eam Philosophiam procul abesse ab eo viro, qui aliis esse usui postulet, quæ nos avocet a curia, a foro, a negotiis publicis; statuerat, eas artes, quas adhuc didicerat, non domi otiosas, voluptatis suæ gratia habere, sed foras educere, & ad communem utilitatem usumque transferre, atque, cum primum per ætatem posset, Rempub. capessere. Sed, quomodo ad eam auderet accedere, nisi antea leges & instituta majorum, quibus recte ea administraretur, nosset? Itaque utrumque Jus didicit, tum civile, tum Pontificium; & postquam, sapientissimis illius præceptis, satis pectus impleisset, Pisas se contulit, ut ibi, ex legibus suæ patriæ, Doctoris sibi nomen ac potestatem adscisceret. Tantus adolescentis in studiis literarum atque in omnibus bonis artibus profectus, incredibili Alexandrum Medicum, magnum ejus avunculum, voluptate afficiebat, cui ob egregiam virtutis indolem, quam in eo admirabatur, carus erat in primis: jamque constituerat animo, atque etiam, parentibus ejusdem audientibus; dixerat, suam eum in aulam excipere, ut sibi ab epistolis, ac particeps consiliorum omnium, esset; sed non ante, quam ille paululum ætate processisset; erat enim tum admodum adolescens; quod, arbitror, fuit causa, cur eum secum in Galliam non duceret, quo Legatus proficiscebatur a Clemente VIII. Pont. Maximus ad Henricum IV. Regem, qui nuper cum Romano Pont. & cum Ecclesia Catholica in gratiam redierat, ut palam hæresin, in qua fuerat, detestantem exsecrantemque, ab iis eum censurarum ecclesiasticarum laqueis explicaret, in quas se induerat. Qui postea Car-

dinalis, legationis illius munere, sibi tradito, diligenter obito, cum e Gallia in Urbem se recepisset, invenit Robertum, in iis studiis, in quæ fuerat ingressus, cupidius se continentem, quam reliquerat; cepitque ex ea re voluptatem. Ac illi, aliquot jam annorum accessione, magna ex parte, elegantis illius formæ nitor decreverat, quem ineuntis ætatis flos solet afferre; jamque barba genas obsederat, cum, sui memor promissi, amplexus eum est, cepitque ejus opera uti, quam magno sibi usui ornametoque esse sentiebat. Interim Clemens VIII, sive morbo corporis, sive ægitudine animi, ut quidam ajebant, excessit e vita. Habita sunt novæ Pont. comitia. Ne multa; non varie, sed cunctis sententiis, Alexander Card. Mediceus, in demortui Pont. locum sufficitur. Magna tum ac certa Roberto spes honorum atque opum affulsit, in quam etiam, Pont. Leonis XI nomine appellatus, eum vocaverat: sed vix ea illuxerat, cum extincta celeri Pontificis obitu est. Nam ex tanto fastigio, post septem & viginti dies quam illud conscenderat, corruit. Tantum domesticæ amplitudinis (si ille diutius vixisset) damnum Robertus æquissimo animo sustulit. Sed continuo spes ejus, quæ visæ fuerant a radice revulsæ, majore vi repullulare cœperunt. Etenim Paulus V, qui Leoni successerat, sive hominis misericordia motus, quem repente de tanta tamque florenti fortuna dejectum cernebat, sive multo magis singulari ejusdem virtute compulsus, cubiculi sui Pontificii præfectum sibi delegit; qui honoris locus in summorum Pont. aulis, honestus atque honoratus in primis habetur. At Pontifex, ejus fide & industria cognita, cepit illum ad res multo graviore adhibere, intimum suis consiliis habere, & si quando majoris momenti res incidisset, de qua ad Reges aliosque summos in Rep. Christiana Principes accurate esset diligenterque scribendum, ceteris, quos scribæ loco ad manum habebat, repudiatis, eas illi partes demandabat; quod diceret, se neminem invenire, qui majori sententiarum gravitate, ac verborum splendore, animi sui sensa complecteretur. Idque mihi narrare solitus erat Marcellus Vestrius; qui tectam ejus in scribendo pra-

prudentiam, & singularem Latini sermonis elegantiam, miris in cælum laudibus efferebat; ac fidei faciendæ gratia, ostendebat mihi aliquot ejus brevia, quibus, mea etiam sententia, nihil poterat esse præstantius. Quibus rebus cum magnam Pontificis benevolentiam assequeretur, non minorem aulicorum invidiam excipiebat, eorum in primis, qui ætissimæ Pontifici cognitione implicabantur; quod illum unum plures quam se omnes fieri animadvertabant. Itaque excogitant rem singularem. Mittendus erat in Galliam a Sede Apostolica Nuncius: persuadent Pontifici, temporum rationem, in quibus tum res Galliæ versabantur, exposcere, ut is eo mittatur, qui nobilitate, ingenio, prudentia & auctoritate, plurimum præstet; se autem neminem videre, qui in his omnibus virtutibus Roberto Ubaldino, Pontificii sui cubiculi præfecto, antecedit. Hoc eo faciebant, ut non solum abesset ab aula, verum etiam libenter & cum magno honore beneficioque abesset, ipsi autem, remoto & ablegato eo, ejus consilio multum movebatur Pontifex, quemque sibi anteponi, indigne ferebant, primum apud eum locum tenerent amicitie, auctoritatis, atque consilii. Pontifex, quamquam agre eum, cui maximam fidem rerum suarum habebat, a se divelli pateretur, tamen communem utilitatem privatæ anteponendam esse duxit; atque misit eum Nuncium in Galliam. Ubi talem se præbuit, cujusmodi illi, Pontifici confirmaverant, ac Pont. ipse non dubitabat. Nam sapienter, atque ex Sedis Apostolicæ dignitate omnia gessit. Verum, qui adeo liberales in eo laudando extiterant, iidem, in ipso, debitis ejus virtuti præmiis, exornando, nimis parci inveniebantur. Obtinuit jam ferme consuetudo, ut ii, qui ad summos Reges Nuncii mittuntur, si munus illud fideliter diligenterque administraverint, confecto triennio, in amplissimum Cardinalium Senatum legantur: at illi, quibus Roberti virtus, & apud Pont. gratia, invisæ erat, dederunt operam, ut in Cardinalium comitiis nulla ejus ratio haberetur, ejusque electio in nonum annum protraheretur; quod dicerent, nullam esse rationem, tum, cum minime opus esset, e Gallia eum removere, sed expectandum, quo-

ad Henrici Regis filius regnum obtineret, præsertim cum ejus opera gravissima fidelissimaque uteretur. Legi ego ejus epistolam, diserte quidem ac prudenter, ut nunquam non alias, e Gallia ad Scipionem Card. Burghesium scriptam; ubi, qua erat animi æquitate præditus, nequaquam ægre accipit, in Cardinalium comitiis se fuisse prætermisum; quum cæteris apud Reges alios Nunciis idem fuisset honor impertitus; sed ea tantum sibi causa dolere, quod Regni proceres, in contemptum Regni illius Majestatis id factum esse, graviter conquererentur; id sibi acerbum & grave videri. Sed tandem Cardinalis factus, venit ad Urbem; ubi benigne quidem & humaniter exceptus est, iisque antea beneficiis, & ecclesiasticis opibus, quibus tantam sustinere dignitatem satis commode posset. Interim Pont. Paulus gravem in morbum implicitus, ab eoque oppressus, vivendi finem fecit. Agitur de subrogando novo Pont. atque a demortui cognatis, iisque, quorum maxime intererat, eum sibi dari Pontificem, quem scirent, a suis rationibus alienum non fore, eum in locum adducta res erat, ut, cum tot suffragia haberent in potestate, quot essent ad creandum novum Pontificem satis, necessario summum illud Sacerdotium ad eum esset venturum, quem illi vellent. Atque adeo id erat omnibus exploratum, ut Augustinus Mascardus orationem, quæ ad Cardinales, eo ipso die, quo conclave ingrediuntur, haberi solet, non dubitaverit hac sententia concludere: Vivat adhuc ac perseveret in Petri successoribus Petrus; hoc enim nomine is appellabatur, cui illi suffragabantur. Sed eorum comatibus fortiter acriterque resisterunt Card. Ubaldinus aliique nonnulli; quibus indignum videbatur, per hunc modum perpetuari dominationem. Atque ridicule eorum quidam respondisse fertur illi, qui priores in illis comitiis partes habebat, cum Petri, cui suffragabatur, merita nimis exaggeraret; eaque esse diceret maxima, ingentia, immortalia. Tace, inquit; nullam ego majorem in ejus virtutibus laudem invenio, nisi eam, quod docte sciteque Oeconomi tui munus administraverit. At poterat ille, si tantum ingenii a natura habuisset, hanc responsionem alia responsione eludere, ac dicere: ideo

Oeco-

Oeconomum illum suum satis esse dignum, cui Ecclesie universae administratio committeretur, quod privatam domum recte administrare didicisset. Nam ex Apostolo Paulo, cujus auctoritate nihil est gravius, Quomodo is, qui domui suae praesse nescit, Ecclesiae universae, & Christianorum omnium quasi familiae, gubernandae provinciam accipiet? jugulasset profecto ille hominem hoc dicto. Sed, ut sese res habeat, nunquam Pontificatus max. ab eo, quem ipse volebat, abiisset, si id egisset quod agebat, nec tempus maluisset in altercando consumere. Nam si Pontificio illum in solio collocasset, certatim, perterriti, accurrissent omnes, ut Pontificem eum agnoscerent ac venerarentur. Sed illi consilium atque animus defuit. Verum, non potest praeteriri silentio, incredibilis illius, qui ad tantas opes dignitatemque vocabatur, magnitudo animi atque constantia; qui, cum sibi Pontificatus creptus e manibus esset, non abiecit animum, non despondit, non desperatione fractus ac debilitatus, non ex dolore de mentis statu dejectus est, vel ex ægitudine de vita depulsus; sed ne vultum quidem mutavit; ac vixit usque ad extremam senectutem. Ex quo licet arguere altum quendam & exaggeratum, ac superiorem humanis rebus omnibus, animum. Cum igitur, de eo Pontifice eligendo, suffragatorum inertia, occisa spes esset, conversa sunt hominum studia in Alexandrum Card. Ludovisium, Bononiae Archiepiscopum; atque ea ipsa nocte, summa omnium voluntate, creatus est Pont. In quo praesertim Roberti opera ac studium enituit. Neque vero hoc fugit Gregorium (hoc enim nomine appellatus est novus Pontifex,) nam multis in rebus, gratum suum erga illum animum ostendit; inprimis, quod illustrem Bononiae Legationem per illum administrari voluerit, ac Card. Ludovisius, fratris sui filius, villam in Tusculano magnificam eidem tradidit, ut ea, quoad vita suppeditaret, uteretur, frueretur. Cujus egregiae erga se voluntati dum parem gratiam referre contendit, quo illius studiis obsequeretur, magnum rerum suarum discrimen adiit; atque, eo tempore amicus aberat, cui sua omnia consilia credebat, quique nimios illos

erga hominem de se bene meritum grati animi impetus, magna ex parte, retardare potuisset. Sed animus generosus ac præstans ægre beneficiis vinci se patitur, atque antea ex nimia indulgentia obsequioque desiderari in se mavult prudentiam suam, quam ut aliquid illi, cui se debere profiteatur, a se petenti recuset. Incredibili optimarum elegantissimarumque artium studio & cupiditate flagrabat: & in primis illustrium tum veterum tum sui ævi poetarum lectione expleri saturarique non poterat; habebatque selectos quosdam amicos, doctos & honestos viros, quibus cum eos lectitare, laudare, admirari, & si quid incideret, quod præ ceteris extaret ac promineret, clamores efferre, consueverat. Erat literatis viris deditus, eorumque inopiam large sua pecunia sublevabat; ut de Augustino Mascardo narratur, quem alieno a se animo esse, non ignorabat, quemque sciebat, in conventibus amicorum, in aulis Principum, multa nec recte in ipsum loqui. Nam, Tusculi cum esset in ea villa quam diximus, audissetque, Mascardum, gravi implicitum morbo, in lecto decumbere, præterea destitutum ab iis, quos in cælum laudibus efferebat, omnium rerum inopia laborare, ultro eum adiit, humanissimis verbis consolatus est, & nummis aureis centum donavit, quorum præsidio ex eo morbo, unde nunquam sine illis se expedivisset, evasit. Item ille auxilium nummarium Francisco Balduccio, poetæ insigni, in pannis & inopia vitam agentis, attulit. Nam, ut idemmet Balduccius mihi narrare solitus erat, die quodam, cum jejunos, & affectus fame, nescio quod illi carmen recitaret, Cardinalis aperuit ipsi arculam quandam, nummis aureis plenam, rogavitque eum, ut tantum inde sumeret, quantum ejus voluntas ac necessitas pateretur: quod cum ipse renuisset facere, ille tantum auri, quantum manus capere posset, exceptum, in ejus sinum rejecit. At homo, gratus, atque affluens omni lepore ac venustate, ne versum quidem unum in eum, quod certe in ejus libris appareat, fecit, cum tot laudum maximarum in illo argumenta suppetrent. Omnes fere, alicujus, sui ævi, nominis poetas ærissima sibi habuit familiaritate conjunctos, Joan.

Baptistam Marinum; ad quem elegans scripsit carmen Etruscum; cui Marinus non minus eleganter politeque respondit: Franciscum Bracciolinum, summum, post Torquatum Tassum, epici carminis artificem ac magistrum; Porphyrium Felicianum, Fulginatium Episcopum, epistolarum ad summos Principes scriptorem, ac poetam clarissimum, qui etiam, extrema suæ senectute, librum illi Odarum dicavit, in quibus tum præteritæ suæ vitæ peccata deslet, tum fallaces spes, & inanes cogitationes, quas ad sese falsæ honorum species fragilesque fortunæ attraxerant, acri ac vehementi incusatione atque querela prosequitur, tum Deum sibi propitium facere studet; quibus nihil mihi videtur purius, nihil gravius, nihil elegantius, nihil doctius; de quo opere interrogatus quidam, qui non poetice solum facultatis, sed mille etiam aliarum artium princeps habetur, quænam ejus esset sententia, respondit, luteum illud esse negotium, nec satis dignum, quod, typis editum, communem hominum lucem aspiceret. Quod si ille nihil laude dignum existimat, nisi quod immanibus, ingentibus, longissimeque petitis translationibus, ita in altum feratur, ut oculorum aciem effugiat, nisi, quod vibrantibus nec satis apertis sententiolis constructum, paucorum, judicio carentium, approbatione legatur; fateor, Porphyrium longe ab hac laude abesse: si vero illud semper est habitum optimum scribendi genus, in quo Petrarcha, Bembus, Casa, Guidiccionus, aliique hujus notæ poetæ, versati sunt, nescio, cur Porphyrius, qui suis eos vestigiis persecutus est, nullo, ut ille ajebat, in numero sit habendus, ac propterea ineptus existimandus, quod careat ineptiis. Reliquit ipse Odas, Etrusco sermone, cui nunc sermoni magnus honor est, scriptas, quamvis non ita multas. Non enim homini, in Republ. gerenda occupatissimo, multum solet esse otii ad scribendum; sed tanta verborum elegantia, tanto sententiarum splendore, ut neminem videam, ex iis, qui nihil aliud in vita egerunt, qui se illi debeat antepone. Et, quo majorem illi laudem, quam ceteris, esse tribuendam scias, non inanissimos mulierum amores, non brevem atque caducum illarum pul-

pulcritudinis florem tractandum celebrandumque suscepit; de quo argumentó, ob multitudinem eorum, qui in illo versati sunt, nihil est facilius scribere; sed in eo elaboravit, in quo plurimum prodesse legentibus posset; nimirum de fugiendis voluptatum illecebris, de sedandis opum divitiarumque cupiditatibus, de contemnendis honorum dignitatumque muneribus, de supremo iudicio, de inferorum suppliciis, in memoria habendis; quas res asperas, inamœnas, omnisque voluptatis expertes, tanto lepore, tantaque amœnitate tractavit, ut, severius tamen id ipsum atque a sensu hominum abhorrens, suave omnibus ac jucundum videatur. Symphoniacis ac musicis, quorum plures domi alebat, non mediocriter delectabatur; quorum vocibus cantuque, a negotiis publicis aut privatis, vel sua voluntate, feriatu, vel satietate defatigatus, illam ex animo, quam intus conceptam habebat, miseriam expueret. Familiam suam, pane, vino, obsonio, atque omnibus aliis in rebus, large liberaliterque habendani curabat. Nam solitus erat dicere (nec injuria) bonam aut malam dominorum, in animis hominum, existimationem, ex sermonibus pendere, quos illorum familiares, vel bene vel male in omni victu tractati, de ipsis in vulgus dissipassent. Neque solum ejusmodi se præstabat iis, qui, honestioris ordinis, præcipua domi lux munera exercerent, sed infimæ etiam sortis hominibus, cujusmodi sunt, circumpedes, rhedarii, mediastini: nunquam etiam, ne ab eo quidem ordine, passus est desiderari officium suum, neque in secunda neque in adversa valetudine: nam ægrotos eos invisere, consolari, ut nullare, ad valetudinem recuperandam necessaria, egerent, curare; cum sacra illis Eucharistia deferretur, adesse; atque alia ejusmodi pia Christiani Principis officia præstare, quæ ego aliis in domibus fieri non vidi. Sed pietatem in Deum suam, multo magis in morte ostendit, cum, matre, lectissima ac præstantissima scæmina, prætermissa, cum fratribus, moribus, ingenio, ac religione insignis, oblitus, Congregationem de propaganda fide, omnium bonorum suorum, quæ erant maxima atque amplissima, hæredem instituit. Non est passus, plus apud

se valere matris vel alterius ex cognatis propinquitatem, quam in Deum pietatem. Hunc quam diuturna lucis usura perfrui, hunc Pontificem max. factum oportuit. Unius tamen propinqui, Leonis videlicet XI. Pont. max. magni sui avunculi, memoriam non abiecit; cuius egregia in Rempubl. Christianam merita nolebat, temporis diuturnitate, in hominum oblivionem adduci, sed perpetuo in oculis omnium hærere. Itaque, regium eidem e marmore sepulcrum, cum ejus statua, item e marmore, egregii artificis manu elaborata, in Æde S. Petri in Vaticano faciendum ornandumque mandavit, quod esset insigne grati ac benevolentis sui erga illum animi monumentum. Denique, ut est humane vitæ conditio, in dolore cruciatuque, calculi quorbo, decessit.

V. PAULUS PALETTUS.

SI ex me. quæritur, quid sit illud, in quo nobis elaborandum magnopere censeam, quodque, si daretur optio, eligendum, ut ceteris hominibus antè se possumus; responderem, illud esse, in quo homines ceteris animalibus antecellunt. Quidnam est illud, in quo homines ceteris animantibus, infinito pene intervallo, se superiores esse gloriantur, nisi rationis facultas, & vis eloquendi, qua animi sui sensa, dicendo, possint exprimere, & audientium animis, tanquam oculis, verbis, quasi coloribus, depicta subicere? Quamobrem, si quis inveniat, qui planius, limatius, politius quam ceteri, præstare id possit, quid jam fateri nos prohibet, multo hunc longius ab animalibus mutis abesse, quam eos, qui rem quidem norint, sed eam graviter, & ornate, & hominum mentibus ac sensibus accommodare, proferre non possint? neque ferat moleste, se habitasse in hac una ratione bene dicendi recteque scribendi, aliis rerum cognitiones reliquisse; nam de illis ipsis rebus, quarum illi notitiam usurparunt, cum opus erit, multo iis ipsis copiosius ac splendidius dicet. Immo, si ita res exigat, ut ea, quorum ipsi sunt domini atque magistri, paulo dilucidius atque ornatus explicata, sint in vul-

vulgus edenda, ad ejus, ut ita dicam, officinam confu-
giendum est, qui sit artifex faciendæ polidendæque ora-
tionis; hic enim ea, ad se delata ac tradita, suo artifi-
cio ita verbis aptis atque illustribus circumvestiet ac
sepiet, ut non ab altero accepisse, sed suo ex ingenio
parta, aliis tradidisse existimetur. Omnino scire ha-
bere sic statuo, ut eloquens, ea, quæ ex aliorum disci-
plinis tractanda susceperit, præne melius, quam illi qui
in eis principes habeantur, scire videatur. Atque, ut ad
exempla veniamus: mitto veterem illum Aratum, qui,
ut constat inter doctos, ignarus Astrologiæ homo, to-
tam de cælo stellisque rationem optimis elegantissimis-
que complexus est versibus: mitto Nicandrum Colo-
phonium, hominem item ab agro remotissimum, qui de
rebus rusticis, non rustico quodam modo, sed summo
verborum sententiarumque splendore & apparatu, tra-
ctavit: mitto etiam peripateticum illum Phormionem;
qui, cum nunquam hostem nunquam castra vidisset, mul-
tas horas copiose, præsentem Hannibalem, de Imperatoris of-
ficio atque de omni re militari tractavit; quamvis con-
tumeliose admodum idemmet Hannibal, levitatis il-
lum senem stultitiæque crimini accusaverit, quod ausus
esset, se audiente, de ea arte verba facere, in qua esset ho-
spes ac rudis, ipse vero peritissimus exercitatusque:
quasi vero homini eloquenti, cujus facultas nullis cir-
cumscripta terminis continetur, sed jus illi est libere
evagandi quam velit, non liceat, de eo quod ipse ex-
pertus non sit, sed ab eo, qui illius usum habeat, acce-
perit, longos sermones & elegantes intexere. Sed for-
tasse Hannibalem puduit, se, hominem imperatorem,
qui tot annos de imperio cum Populo Romano certas-
set, a senè umbratili, qui nunquam hostium vultum
aspexisset, in tradendis explicandisque ejus artis præce-
ptis, in qua ipse princeps haberetur, eloquentia vinci;
præsertim cum Græcas literas didicisset, usus doctore,
Sofilo Lacedæmonio, quem habuit semper in castris,
cum eoque quamdiu fortuna passa est, conjunctissime
vixit. Veteribus igitur exemplis omissis, ut ad recen-
tia veniamus, nonne paulo supra nostram ætatem, cum
Catechismus esset conficiendus, in quo, eleganti stylo,

& ad imperitorum intelligentiam accommodato, quatuor illa capita explicarentur, quibus omnis vis & ratio Christianæ doctrinæ continetur, videlicet Apostolorum Symbolum; Sacramenta, Decalogus, & Oratio Dominica; nonne ad eorum facultatem confugiendum fuit, cujus facultatis proprium existimatur, ac revera est, lumine orationis illustrare, quæcunque quavis in arte traduntur? nimirum ad Paulum Manutium, Julium Poggianum, Cornelium Amaltheum, quorum tum eloquentiæ laus vigeat in primis. At eorum quisque in pervolvendis Ciceronis aliorumque eruditorum libris dies noctesque occupatus, sacrarum literarum scientiam ne a limine quidem, ut dicitur, salutaverat; Cornelius etiam medendi artificio se tuebatur; qua arte a studiis Theologiæ nihil esse potest alienius. Et tamen, quæ in scholis Theologorum subtiliter arguteque disputantur, adeo eleganti, ornata, copiosaque oratione complexi sunt, ut ea quodammodo magis ipsorum esse propria, magis & ad ipsos pertinere videantur, quam ad eos, a quibus illa, tenui, perplexo, & exiguo sermone, disputantur. At, quorsum, inquires, hæc tam alte repetita oratio? Eo nimirum, ut omnes, quicumque eloquentiæ cupiditate studioque tenentur, incitatiores ad ejus laudem cursu ferantur, neque ceterarum magnitudines artium pertimescant, cum, aliquo monstrante capita earum & fontes, possint in eas ingredi, ac tantum inde haurire, quantum sibi sit satis, idque dilucidius atque elegantius explicare, ut diximus, quam ii, a quibus, in illis cognoscendis tractandisque, omne suæ ætatis tempus videmus esse contritum. Intellexit hoc Paulus Paletius Spoletinus, qui non solum toto, ut ajunt, pectore, eloquentiæ complexus est studia, e quibus tantas percipi utilitates posse non ignorabat, verum etiam aliis duce, ad ea persequenda, se præbuit, ac Spoleti, ludum, quasi quandam eloquentiæ officinam, aperuit; cepitque, prima illa puerili institutione, puerorum ingenia, tanquam dolare, atque ad eloquentiam effingere: ex quo ludo omnes plane prodire, quicumque tum Spoleti, tum in Umbria, non vulgarem eloquentium ac doctorum hominum famam sunt adepti.

In

In his, qui se eidem in disciplinam tradiderunt, numerantur in primis Franciscus & Antonius Barberini Cardinales, qui eo tempore, quo Maphæus Card. illorum patruus, Spoletinam Ecclesiam administravit, eidem se excolendos, exercendosque dediderunt, ac Franciscus etiam, patruo ad summum Pontificatus max. culmen evecto, minor hominis, & virtutis, & diligentia in ipso instituendo erudiendoque, annuis pecuniis de suo attributis, inopem ejus senectutem sustentavit, ac non minimum ex ejus morte dolorem accepit. Accuratum ille quoddam scribendi & exquisitum afferebat genus, quod arte limabat expoliebatque. Ita enim mihi narratur ab iis, quibus, ex illius scriptis, judicare de ejusdem ingenio ac literis contigit. Nihil enim mihi venit in manus, unde ego, quantum utraque in re ille præstiterit, affirmare liquido possim. Certe M. Antonius Bonciarius, qui non postremum inter eruditos ac disertos hujus ævi viros locum obtinuit, omnibus fere sui sæculi scriptoribus eum anteponebat, orationis cultu ac nitore; ac præsertim in scribendis epistolis: unum illi atque alterum præfert, ex antiquis Ciceronem, ex recentioribus Paulum Manutium. Qui Bonciarius, cum per amicum sibi esset allata a Paletto epistola, nec suis eam posset oculis, quia cæcus esset, excurrere, alteri legendam tradidit, ut videlicet, saltem auribus animo traderet: sed auditione, tanta sensit se voluptate perfundi, ex styli amœnitate elegantiaque concepta, ut non semel audivisse contentus fuerit, sed eam sibi jussisset iterum ac tertio relegi, ac ne tum quidem expletus saturatusque discesserit. Summa denique huc redit: in ea illum sermonis elegantia cultuque, ajunt, fuisse versatum, qui esset illius proprius, neque cum aliquo alio communis; adeo ut, si sine illius nomine aliquid ab eo scriptum legeretur, ex politissima scribendi ratione, atque adeo ex colore ipso ac sono, ejus esse, agnosceretur. Id quod Urbano VIII, Pont. max. contigisse narratur; cui cum regularis quidam Canonicus Lateranensis, nescio quem librum, ejus nomini dicatum attulisset, placuit, auctore præsentem, epistolam, præfixam operi, legere; ac confestim in suspensionem venit, eam ex Paletti offi-

cina fuisse profectam; accurata ac diligenti Latine scribendi elegantia ductus; neque tacitum illud habuit, sed palam iis, qui aderant, fecit. Denique, hunc quoque, sicut ceteros, in quorum commemoratione versamur, communis conditionis æstus abripuit, ac morti, cui nos nostraque omnia debentur, addixit.

VI. MARCELLUS SACCHETTUS.

Sæpius, in animantibus brutis, quam hominibus ratione præditi, accidit, ut patres, filios sibi similes, gignant. Illa enim suos in filios, si sint fortia, fortitudinem, si imbellia, timiditatem, quasi jure naturæ, transmittunt. Nam *bonis, ut Horatius inquit,*

Est in juvenis, est in equis, patrum

Virtus; nec imbellem feroces

Progenerant aquila columbam.

At contra, in hominum genere, nonne interdum vidimus, ex ignavis, timidis, atque inertibus parentibus eos esse liberos ortos, quos natura a paternis vitiis ac probis abstraxit? Neminem nominabo; ne cum filiorum laudibus, parentum præterea dedecus jungam. Quam multos contra, doctos, egregios ac bellica præsertim laude præclaros viros audivimus vel legimus, qui, pro se, Reipub. sui similes filios substituerint, ac non potius in contrariis ipsoꝝ virtutum vitiis insignes ediderint? Quis ad incredibilem admirationem non efferatur, cum de Scipione, Africani illius nunquam satis laudati filio, audierit, tanto illum inertia, timiditate, improbitateque nobilem extitisse, quanto parens suus fortitudine, sapientia, ac magnitudine animi, celebre suum nomen, omnis posteritatis memoriz commendavit? quis non ad eandem admirationem rapiatur, cum legerit, Q. Fabium Maximum, Allobrogi filium, eam claritatem, quam parens, ex devictis hostibus, atque ex omnibus, difficillimi illius belli administratione sibi pepererat, neglexisse, sibi que famam ex omnibus turpissimis flagitiosisque voluptatibus, in quarum cæno volutabatur, collegisse? Nec minorem nobis admirationem incutiet M. Cicero, M. Tullii il-

lius eloquentissimi progenies, qui non in eo omnem suam operam ac studium sibi esse collocandum duxit, ut parentis, qui omnibus, quicunque fuerunt, quique futuri sunt, longè multumque dicendi gloria præstitit, laudem æmuleretur; sed id sibi putavit esse palmarium, si binos uno spiritu congios exhauriret, & in ventrem inverteret, aliaque, ex temulentia, turpia dictu, committeret. Ignavo igitur ac timido patri ignavus ac fortis; contra navo, prudenti, ac forti, improbus & ignavus filius potest existere. Verum, qui sex vel septem ex uxore sua liberos susceperint, si eos omnes naves, industrios ac rectos ad ingenium bonum habeant, in rebus rarissimis, ac miraculo proximis, numerandum id est. Semper enim eorum aliqui vel plures, ab aliorum similitudine se abstrahent, & ad probum, damnum, flagitiumque appellent. Atqui, ne aquilarum quidem generosissimis, halæctis nomine, hæc felicitas accidit, ut pullos suos omnes eadem, qua ipsi, clarissima oculorum acie præditos habeant: nam eorum aliqui, coacti, adversus solis radios, oculorum aciem intendere, conivent, eorumque fulgorem ferre non possunt; itaque hos illi, tanquam degeneres, e nido præcipientes agunt, reliquos, quorum acies contra firma steterit, educant. At vetas hæc nostra, id, quod antea vix fieri posse credidimus, in Urbe, omnium regina, Romæ inquam, tribus patribus familias, summo genere natis, aspexit, atque admirata est, quorum unusquisque fuit & numero, & optimorum claritate filiorum fortunatissimus. Hi sunt, Virgilius Crescentius, M. Antonius Ubaldinus, & Jo. Baptista Sacchetti. Ac de duobus superioribus non est hic scribendi locus. Jo. vero Baptista, ex Francisca Altovita, femina lectissima, summæque inter suos nobilitatis uxore, plures filios suscepit, quorum neminem communia adolescentium vitia transversum egerunt, sed, ad unum omnes, directum illud ad virtutem iter, ad veræ ac germanæ probitatis laudem commendationemque, perduxit. Sed antea quanti Marcellum conor exprimere, meum ad se stylum attrahit Julius frater, cogitque, ut ejus, quantumvis viventis, imaginem leviter adumbrem, ac Marcelli tabula.

tanquam aliquam appendicem, adjungam. Hic ingenio, eruditione, doctrina, & quod refert, moribus ac vita, præclarus, impulit Urbanum VIII. ipso ejus pene Pontificatus initio, ut se in amplissimum Cardinalem collegium cooptaret. Videbat enim sapientissimus ille Pont. si tali viro eminentissimum illum ordinem auxisset, quanto eidem ille decori ornamentoque futurus esset, deinde, non magis illustrem, quam arduam atque difficilem, Bononæ legationem per ipsum administravit; quam ille diligenter summaque Pontificis cum approbatione obivit in multis præterea gravissimis honestissimisque muneribus ac negociis, est ejus consilio atque opera usus; quam sibi semper opportunam ac fidelem invenit. Atque, Urbano extincto, nihil propius est factum; quam ut in illius locum subrogaretur. Erat enim summa eorum voluntas, qui magnam in illis comitiis auctoritatem habebant, nisi ætas hominis, adhuc viridis, ob recentem ejus Pontificis memoriam, qui unum & viginti atque eo amplius regnaverat annos, eum procul ab illo fastigio habuisset, quod videbatur (ut habebat quorundam sermo,) non minus diuturnum illius imperium fore, quam Pontificis nuper extincti fuisset. Tanquam si gravissimum laboriosissimumque omnium onus ac munus, decrepitis tantum ac capularibus senibus sit demandandum, quorum corpus, annis infirmum, tot laboribus subeundis par esse non potest; vel, tanquam si virtus, in juvenili ætate inventa, non sit regendis imperiis idonea. At ille prudentiæ, vigilantæ, probitatis, virtutumque omnium laudibus, jam pridem tanto fastigio maturus extiterat; mune autem, cum conscientia optantæ mentis, tum usurpatione doctrinæ (habet enim apud se, excultissimos literis viros,) hilaris ac jucundus, Signaturæ justitiæ Præfectus, summam dat operam, ne quid detrimenti, justitiæ, improborum hominum astu; accipiat. Jam vero, ut omissis ceteris fratribus, de quibus alius fortasse dicendi locus se dabit, ad Marcellum veniamus; qui ingenii acumine, animi magnitudine, rerum usu, doctrinæ non vulgaris præstantia, dignus est; cujus imago consuetudinis ac vitæ, literarum præsidio expressa,

omnis

omnis posteritatis memoriz commendetur. Hic Romæ, anno dñi M LXXXVI natus, quum sacro Baptisinalis fonte ablueretur, susceptorem, vel patrinum, ut nunc vocant, sortitus est Jo. Baptistam Cardinalem Castaneum, qui postea, Urbani VII nomine, factus est Pontifex; qui patri multis audientibus dixit, semper se id patrini munus refugisse, neque voluisse cuiquam baptizato sponso rem accedere, nisi duobus, infantæ Isabellæ, & Marcello Sacchetto; cui Marcelli nomen indidit, ex Ecclesiæ nomine, cujus titulo cognominabatur. A teneris, ut Græci ajunt, unguiculis, maximam habuit indolem ad picturam, ut sine aliqua magistrorum ope, non inscite neque ineleganter multa suo Marte delinearet describeretque, nonnulla etiam coloribus ornaret ac vestiret. Atque, ut audiui dici, plures ejus tabulæ proferruntur, in quibus antienissimarum regionum situs, collesque arboribus vestiti, ac liquoribus perlucidis fontium irrigati, egregie sua manu depicti, cernuntur. Quod si hominibus nobilissimis laudi datum esset, quod pingerent, proxime ad eorum famam accessisset, qui feruntur in primis; at ille, majoris gloriæ cupidus, hanc aliis recte pingendi laudem honoremque concessit, & solum, cum libebat, cum erat commodum, pingebat, eaque honesta oblectatione multas animi sollicitudines curasque ponebat. Sed mirum ac singulare, quod in eo vigeat, ingenium, incredibili poësis amore studioque flagrat; in quo admirabilis extitit, atque versibus Etruscis fabulam scripsit, quam etiam in nuptiis Thaddæi Barberini & Annæ Columnæ, populo spectantem præbuit; præterea volumen Etruscarum odarum, Francisci Petrarchæ carminibus par mole, confecit, in quo, qui viderunt, enarrant licere conspiciere, quantum vir ille ingenio, eruditione, ac poëticæ artis facultate præstiterit. Omnino, in illud genus eum, Joannis Casæ, quem ceteris præferebat, magnificum atque præclarum poëmatis genus, natura ducebat, quod etiam feliciter imitando effingebat exprimebatque. Verum, tanta vis virtutis & ingenii, primo, totis sex mensibus, peregrinata, absuit ab urbe domoque, ac totam fere peragravit Europam, atque Gallos, Hispanos, Germanos, Ba-

tavos, Anglos, est circumvectus, regali propemodum sumtu. Nam in tabulas, quas conficiebat, retulit, in hoc itinere multa aureorum millia fuisse expensa. Est etiam occasionem nactus, quam arripuit, plures, in illis exteris regionibus, viros principes adeundi, ac perpetua sibi amicitia usuque conglutinandi; a quibus est perhumauiter exceptus, & officiis beneficiisque maximis exornatus; plures etiam insignes doctrina & eruditione viros, quorum nomen, libris editis, tota erat Italia celebratum, arcte sibi conjunxit, ad quos, incredibili discendi cupiditate incensus, tanquam ad fontes adibat, unde, qua aestuabat, sitim expleret. Rebus domesticis, atque familie universæ, præfuit, eaque animi magnitudine ac magnificentia domum suam instructam habuit, ut etiam equos & canes venaticos aleret, qui principum virorum aliorumque venationibus usui essent. Neque ulla alia in re ita cum aliquo, quam beneficentia ac liberalitate certabat; neque rei cujusquam rationem minus habebat, quam pecuniæ, si in amico, qui ejus esset egens, infunderetur; ac lucrum sibi esset objectum existimabat, si qua amico commodandi occasio sese dedisset. Quo fiebat, ut non solum expetitus ac rogatus, dubiis, egenis, ac pene perditis aliorum, inopum in primis, rebus, cum posset, opitularetur, verum etiam ultro, nec postulatus, se illis inferret, ac rationem, qua faciles, expeditæ, opiparæque redderentur, offerret. Atque ex eo sæpe auditum est, cum diceret, nunquam se diem perdidisse, quo die, afflictis miseri cujuscumque rebus, consilio, opera, ac re ipsa, præsto esse potuisset. Cujus liberalem ac munificum animum Jo. Baptista pater admirans, cum caput illi, ut parentes, liberorum studiosi, faciunt, demulceret, iis, qui aderant, diceret, in eo, filii sui, capite, multos Reges inesse. In pauperes vero quatenus liberalitate progredieretur, satis est, unum ejus factum asserre, ex quo licet intelligere, non solum in illos liberalem eum, verum etiam profusum ac prodigum extitisse. Narrauit mihi testis locupletissimus, qui ipse vidisset, non autem ex auditu argueret; cum Sacerdos quidam ex Cong. Oratorii Romani, a S. Philippo Nerio instituta, Ludovico nomine, subsid-

dium a Marcello nummarium, ad præsentem inopis cuiusdam calamitatem sublevandam, expeteret. Erat Ludovicus hic, quem dico, singulari in pauperes Christi amoris sania præclarus, ut id unum dies noctesque studeret, quomodo eos, quibus egestas imperaret, ab inopia auferret. Hic, inquam, cum, die quodam, insignis cuiusdam pauperis necessitatibus, præsentì pecunia, esset occurrendum, ac non modo in suis nullis nummis, sed etiam in magno ære alieno inveniretur, a Marcello, cuius eximiam in se atque in pauperes liberalitatem fuerat expertus, scuta sexcenta mutua petiit, cum antea ejus postulati causam exposuisset. Cui Marcellus: Deus bone, inquit, quid tibi venit in mentem, a me mutuum petere? quasi ego solèam mutuitanti aliquid credere, ac non potius pecunias meas fœnori locare? Fœnori, ait Ludovicus, quoniam fieri aliter non potest, & quavis usura accipiam. At, scin', respondit Marcellus, quid sit pecunias fœnerari? eas est pauperi dono dare; nam qui dat pauperi, fœneratur. Eademque opera, multo plus quam ille poscebat, enumeravit. Longum esset, sigillatim omnia, quæ in hoc genere benigne ac liberaliter fecerit, enarrare, cum, ceteris in rebus, interdum parcus inveniretur. Neque minorem maximi regalisque animi significationem exhibuit in villis ædificandis. Etenim unam ad Ostia Tiberina mari proximam excitavit, amplitudine magnificentiaque cum veterum Romanorum villis conferendam, quam, egregiis signis ac picturis, summorum artificum manu elaboratis, ornavit. Cujus præceptis ibidem Petrus Cortonienfis prima fere picture rudimenta posuit: ille enim argumenta dabat, ille rationem ostendebat, qua graphice ea, quæ essent coloribus illustranda, describerentur. Quid multa? ejus nunc opera institutisque Petrus in summis pictoribus numeratur. Alteram etiam magnificentissimam fundavit villam, Urbi proximam, edito amœno ac salubri quodam loco, valli imminentem, quam vulgo, credo, quia magnam depressa in altitudinem est, infernum appellant; quam non potuit absolvere; sed Mattheus frater perficiendam absolvendamque nunc curat; ubi Petrus idem pictor, qui jam

ma-

maturitatem adeptus est firam, & Marcelli memoria, & Julii Card. fratris ejusdem gratia, quantum pingendi artificio valeat, totum exprimit. Sed, præter agriculturalum artem, vel potius voluptatem, quibus ille mirifice delectabatur, nec minores inde fructus percipiebat, præter mercaturæ rationem, cui eo tempore, ex more Florentinæ nobilitatis, studium suum, dabat. Urbanus octavus Depositarium Cameræ Apostolicæ & sanctioris ærarii Quæstorem eum fecit, idque sponte sua, & a nemine rogatus: præter, inquam, has artes, erat sciens Reipubl. multumque consilio atque prudentia in iis, quæ ad eam recte gerendam pertinent, præstitit. Quo fiebat, ut magno apud eundem Urbanum esset in amore & gratia, & arcanorum multorum conscius: neque alius fere quisquam erat, cui majorem rerum suarum fidem haberet, neque, cui libentius consilia fere sua omnia crederet. Quam egregiæ suæ fidei opinionem, adversus eum eosque qui tum imperabant, non alia re magis tuebatur, quam, nihil sibi suisque petendo, fideliter diligenterque mandata faciendo; neque unquam imperavit ipsemet sibi, ad colligendam hominum potentiorum gratiam, quidquam assentari, sed aperte ac modeste, quidquid esset in unaquaque re, quæ in deliberationem veniret, vitii vel incommodi, aperiebat; neque, si quempiam, cui alia mens esset, offenderet, quidquam pensi habebat; adeo erat diligens veritatis. Denique omnibus in rebus, alti, præstantis, ac liberalis animi signa præbebat: atque in negotiis gravissimis, nactus est occasionem, de Leopoldo Archiduce Austriæ bene merendi; apud quem, Pontificis jussu atque mandato, multa sæpe tractaverat. Itaque facile fuit Marcello, sua, in agendo, dexteritate atque prudentia, viri illius principis animum sibi ac studium adjungere. Sed momento pene temporis, ex optima valetudine, gravissimum incidit in morbum, unde cernendi audiendique omnem ferme vim & facultatem amisit. Hujus tam repentini morbi causam sustinuisse, quidam ajebant, illius ardens, in negotiis, a Pontifice sibi commissis ac traditis, rite expediendis conficiendisque, studium ac sollicitudinem. Nam, dum ille, nulla valetudinis suæ ha-

bita ratione, fere quotidie, hyeme summa, imbribus maximis, sermones cum eo ad multam noctem produceret, ac statim deinde e loco calido in aërem frigidissimum exiret, sit verisimile, ut lethalem illam pituitam contraheret, quæ a capite in aures defluens, earum aditus obstrueret, ne aliorum in ipsas dicta commearent; tum vias, ab oculis ad animum perforatas, occluderet. Sed, quæ animi illius magnitudo ac splendor in contemnenda pecunia, atque in rebus humanis omnibus pro nihilo habendis, eluxerat, eidem, in tam dubio difficultique morbo, æquo animo perferendo, prorsus enituit; ac ne minimum quidem unquam de fortis ac constantis viri gravitate, ac de sua in Deum fiducia, decessit. Quamobrem, de medicorum sententia, coactus est, Neapolin se conferre, atque a calidis Puteolanis aquis auxilium expetere; quarum ope quamvis a principio, paululum visa sit vis morbi consistere, paulo post tamen eo impetu in totum corpus cursum cœpit arripere, ut cunctos, qui aderant, cogeret, illius salute spem omnem abjicere. Sed cum majore periculo in dies esset, a Priore Navo factus est certior, supremam ipsi vitæ horam instare; & simul admonitus, ut, si res posceret, æternæ suæ salutis prospiceret. Quo nuncio accepto, nullum perterriti, nullum commoti animi, signum dedit, sed dulcissimis amplexibus, & gratiarum actionibus, eum excepit, quod veri ac fidelis amici munere functus esset. Ac statim ad Franciscum Card. Barberinum, ad fratres, aliosque, literas dedit, plenas amoris, elegantis, officii. Habebat hoc etiam a natura, ut animi sui sensa, diserta, copiosa, & propriis aptisque verbis rem explicanti oratione, ut quivis alius, exprimeret. Quibus actis, fortiter ac viriliter animam Deo, a quo acceperat, reddidit, in complexu viri nobilissimi sibi-que amicissimi, Jo. Caroli Gavotti Savonensis. Qui officii amicitiaque eum causa, Roma egredientem, Neapolin usque fuerat profecutus. Defunctus amplo magnifico-que elatus est funere, prosequentibus amicis Neapolitanis, qui mœrore, quem vultu præ se ferebant, suam in illum benevolentiam significabant.

VII. STEPHANUS TUCCIUS.

Qua ratione comparatum sit nescio, ut nemo fere, pluribus in studiis harum artium maximarum, perfectus & absolutus existat, sed bene cum illo agatur, si cum omnia conatus fuerit, sit in earum aliqua princeps. Multos inveni, eo ingenii acumine præditos, ut, cum se mente & cogitatione in aliquam scientiam coniecissent, quæcunque in intimis ejus penetralibus abdita atque constructa continerentur, mentis acie scrutarentur, ac cernerent; ubi vero se ad ea verbis explicanda conferrent, continuo se ab eloquentia deferri, facerentur, eaque, quæ acute invenissent, discrete eleganterque tractandi aliis laudem, sua confessione, concederent. In hoc fortasse numero reponendus est Socrates; qui, cum Philosophiam, ex cælo deductam, in hominum cœtus transtulisset, literam ipse nullam, ut ajunt, scripsit, sed suos sermones, Platonis, omnium ejus ætatis eloquentissimi, scriptis, immortalitati mandandos reliquit. Virgilius, summus, omnium concessus, quibus recta mens constat, Poëta, si pascua, si rura, si bella, versibus canenda suscepisset, facile omnes superabat; si vero præstantissimum ingenium ad dicendum contulisset, indifertus ac plane inscius inveniebatur. M. Tullius Cicero, cui tanta eloquendi vis inerat, ut antea avibus cantus, fontibus aquæ, defuturæ viderentur, quam ipsi verborum flumen ac copia; cum poësin conaretur attingere, qui aliud assequeretur, nisi ut de se ludos inimicis daret? qui ejus identidem versus ad irridendum arripiebant. Sed istuc magis ab illis lingua, quam animo, dictum fuisse, percipio: nam versus illius sunt, ut mihi videntur, lepidissimi nitidissimique, pace D. Hieronymi dixerim, qui M. Tullium vim Græci sermonis, in vertendo, parum feliciter affectum fuisse contendit, quos ex Græco in Latinum convertit: me enim magna quadam voluptate, cum lego, afficiunt; tum, quia perspicui, tum quia dulces, meum sese in animum fundunt. Quod mihi non contingit in iis, qui hanc bene interpretandi laudem suam esse propriam, agentes, ita

ita perplexe, ita insuaviter, ita inamœne loquuntur, ut celeriter fastidio & satietate a se homines abalienent. Fitne verisimile, ut Græci sermonis proprietatem ignoraverit ille, qui navigavit in Græciam, qui a Græcis doctoribus declamare didicerit, qui, ut ab illis corrigi & doceri posset, commentabatur, Græce declamitans, qui ex longo usu & exercitatione ita Græco sermone uteretur, ut in ea lingua natus & educatus esse videretur? Sed D. Hieronymus a communi consuetudine usuque hominum se abripi sivit, qui nolunt eundem pluribus rebus exollere. Utinam, quæ isti parum feliciter ab illo ex Græcis Latina facta cavillantur, omnia existerent; profecto, ita illis essem contentus, ut meliora non quærerem. Sed ad illud caput revertamur, unde tota hæc fluxit oratio. Omnino queri posse videtur de natura sua genus humanum, quod industriæ hominum certos quosdam fines præscripserit, intra quos, in artium maximarum studiis persequendis, sese contineat, nec progredi longius queat. Vix enim Jovi concessum esse, veteres ajebant, ut in pluribus eorum ita præstet, ut sit omnium, qui in unoquoque sigillatim elaborarunt, facile princeps. Quid verbis opus est? At deterrenda hominum ingenia, ne in plura studia distrahantur, negant, fas esse cuiquam, pluribus in artibus excellentem evadere; sed debere unumquemque ad earum aliquam, ad quam a natura factus sit, sese conferre, in eaque omnes ætatis industriæque conatus collocare. Verum, si cuiuspiam nostra ætate contigit, ut, non unius tantum, sed plurimum doctrinarum laude, peræque floret, haud scio, an alius proferri possit, qui feliciter sit id affectus, quam Stephanus Tuccius, Siculus, e Soc. Jesu. Hic, mirum est, quantam quamque perfectam disciplinarum pene omnium, ingenii docilitate, sit scientiam cognitione complexus. Primum, longe multumque præstitit sacrarum divinarumque rerum studio, quod Theologia appellatur a nostris; quo studio vera, nec obscura, quantum homini fas est, Dei notitia percipitur: tum, ingenii acumine, prout Siculus; tum disserendi subtilitate, cum esset, in capiendis adversario,

O o

mire

inire versutus; tum ea, quæ ipse didicisset, alios docendi facilitate, quia in rebus penitus a se perspectis ac cognitis versaretur. Sed in ea præcipue Theologiæ parte excelluit, quæ rationem hominibus ostendit, qua animum a peccatis, quorum conscientia constricti tenentur, expediant, ac salutem ipsorum in perpetuum consulant. Itaque magnum onus, a Superioribus sibi suis traditum, sustinebat, iis respondendi, qui ejusmodi de causis consultum eum venissent. Tum princeps erat ex illis, qui in literis periculum eorum faciunt, qui aut Ecclesiasticis sacris initiandi, aut ad aliquod munus admovendi; sive illud animarum sive aliquam aliam curam ac sollicitudinem haberet adjunctam: ab eoque puerulus, annos natus non amplius decem, cum ad Ecclesiasticos ordines mihi aditum, quem primam tonsuram vocant, aperiri poscerem, sum probatus, an literas scirem: quod eo memini magis, quoniam eodem pene temporis momento, quo in me periculum facturus erat, maximo viscerum dolore abreptus est, ut haberent necesse, qui aderant, in proximum ibi cubiculum eum inter manus deferre, ac pro se quisque sedulo facere, quod eam illi molestiam leniret. Erat in primis a philosophia instructus, tum ab ea, qua, mentis acie, rerum omnium vis & natura perspicitur, tum ab ea, quæ de moribus est. Concionator numerabatur in primis; sed versatus est in quodam genere, severo, gravi, & ad commovendos animos apto, atque ab ineptiis sententiarum, siveque puerili, omnino abhorrenti. Eripiebat illi concursum populi F. Franciscus Panicola, qui aliud orationis sectabatur genus, lætum, exhilaratum, amœnum, profluens, omnium sententiarum verborumque luminibus conspersum, verba aperte transferens, paria paribus referens, adversa contrariis, sæpissimeque similiter extrema definiens, quique tum temporis maxime placens, in suggestis, in concionibus dominabatur. Atque ego, etiam tum puer, in æde nominis Jesu, domui professe, suæ Societatis, ubi tum conciones ad populum habebat, illum audiui, cum graviter vehementerque in eos interpretes rerum divinarum invehe-

ret, qui, picta atque omni florum varietate confersa oratione, inuperitque multitudinis aures demulcere conabantur. Quid enim aliud esse, verbum Dei adulterare, nisi eodem pigmentis prope meretriciis delibuto, ad famam eloquentiæ aucupandam, ad inanes vulgi rumores colligendos, ad hominum sibi studia concilianda, denique ad sua commoda & utilitates, abuti? Neque illa acri ac vehementi inculpatione aliquid proficiebat. Nam simul ac erat auditum, illum, quem non erat obscurum, ea oratione designari, verba esse facturum, maximi ad eum concursus fiebant. Adfui etiam, cum, summa occasione ex Alexandri Cardinalis Farnesii morte, quæ omnibus improvisa acciderat, quod antea nulla de ejus ægrotatione fama exisset, tanto animi ardore, tanta vi vocis & orationis, cepit de hominum vitæ brevitate, de rerum humanarum inconstantia, de fallaci hominum spe, de inanibus nostris contentionibus, de divini judicii severitate, ad quam nobis veniendum esset, e qua nulla nos vis posset eripere, non magnitudo divitiarum, non splendor generis, non amplitudo honorum, non Demosthenis, non Ciceronis eloquentia, sed tantum, recte factorum dictorumque conscientia, salvos ab ea esset præstitura; atque de aliis ejusmodi rebus; tanta, inquam, vi cepit disserere, ut omnes, qui aderant, vehementer commoverentur, nec lacrimas tenerent. In aliis vero humanissimis liberalissimisque studiis, Latine videlicet eloquentiæ ac poësis, sic eminebat, ut difficile sit judicare, in utra earum majorem sit laudem assecutus. Multas scripsit orationes, inultas habuit; in his duas, De Christo pro nobis crucis morte affecto, in Sacello Pontificio, ad Gregorium XIII, Pont. max. ni fallor; quarum illa, quæ est brevior, tantam habuit commendationem, ut sit omnibus magistra, qui in illo augustissimo orbis terræ theatro, apud Pontifices max. & amplissimum Cardinalium Senatum, sunt verba facturi. Ad poësin vero, difficile memoratu est, quantum a natura instrumenti habuerit. Nam poëticam locutionem, tanquam molliissimam ceram, quocumque vellet, torquebat, ac flectebat. Tria (quod quidem ad

notitiam meam pervenerit) ex sacris literis argumenta desumpta, & elegantissimis versibus comprehensa, deduxit in aëtas, & populo ad spectandum proposuit. Primum, supremum illud iudicium, in quo Filius hominis, cui omne iudicium dedit Pater, ab omnibus, qui sunt, qui fuerunt, quique futuri sunt, rationem vite responderet; tanto rerum apparatu, tanta actorum multitudine, ut omnes, quotquot tunc erant in Seminario Rom. in cujus ædium aula nobile illud drama dabatur, sive clerici sive contubernales, quos convictores appellant, actores adhiberentur, atque omnes principum virorum suppellestiles, ad eosdem exornandos; exhaurirentur, itaque Cives Rom. qui nullum, ante illud tempus, spectaculum tale conspexerant, amentium similes, se domibus suis proriperent, & illuc accurrerent, ut spectaculi illius specie, quam maiorem esse, quam erat; mente conceperant, oculos pascere, & animum saturare liceret: atque ejusmodi erant hominum concursus, ut, ad turbam cohibendam summovendamque, nullæ Helvetiorum, nullæ aliorum militum, custodiæ sufficerent. Verum, quia in iis comparandis, quæ sunt ad scenam necessaria, & actoribus exercendis, multum temporis necesse est ponere, quod totum studiis eripitur; dicitur Gregorius XIII Patribus Soc. Jesu, quorum erat studiosissimus (ut videre licet ex Gymnasio, quod, regali sumtu magnificentiaque, illis extruxerat,) auctor fuisse, ut ejusmodi inutilibus laboribus ac sollicitudinibus parecerent, quibus nihil ipsis, nisi comædorum nomen parent, & pueris, quos in disciplinam accepissent, facultatem præberent, quæ a literarum studiis avocarentur, quibus maxime necesse esset eos operam dare. Deinde, alia duo dramata pulcherrima spectandi copiam fecit; Juditham, & Christi Nativitatem; quorum exempla sunt apud me domi. Sed, quamvis ea, quæ diximus, egregia, præclara ac summa, in ejus virtutibus numerarentur, alia etiam inerant, illis longe superiora; immo, sine quibus illa propiora sunt vitiis quam virtutibus: singularis videlicet probitas vite, ac sanctitas morum; quibus, summis etiam Pontificibus, erat

erat admirabilis ac metuendus. Quorum unus, cum ad Pontificatum max. esset euectus, ejus fortasse consiliis (nam intimum eum sibi habebat) adductus, statuisset, summum illum honoris gradum, ad veterum sanctissimorum Pontificum exemplum, & ad veram ecclesiasticæ disciplinæ normam administrare; ac, ne nummo quidem uno, cognatos, ex bonis Deo dicatis, locupletiores efficere; nullo ferme negotio id se consecuturum esse putavit, si mortis memoriam suo ex animo nunquam passus esset excidere. Itaque aridum demortui ejusdam hominis caput, suum in cubiculum deferendum curavit, in quo cum defixos oculos & intentam suam cogitationem haberet, ad nullam animi pravitatem, nec ad aliquem insanum erga suos amorem delaberetur. Atque integrum biennium in hac mente consilioque perseveravit. Quod cum minus iis probaretur, qui jam auri montes, regna, & imperia spe ac cogitatione devoraverant, atque P. Stephani consiliis de sua spe deiici arbitrarentur, dederunt operam, ut illum a Pontificis familiaritate abstraherent. Neque eorum artibus alius, atque ipsi opraverant, exitus contigit. Nam paulatim sensit Pater, omnes sibi ad Pontificem aditus interclusos, atque obstructos penitus esse: nec solum lubenti, sed hilari etiam passus est animo, eam sibi molestiam adimi, qua a suis studiis non minimum avocabatur; atque in Tusculani Residentiam, quam vocant, se abdidit, ibique ferme statuerat summo in ocio ac tranquillitate, quod reliquum erat vitæ, conficere; sed, cum die quodam Pontifex, qui in Tusculanum, animi gratia, secesserat, ad eum venisset, eumque humanissime salutasset, ille, ut Pontificem ad se venientem aspexit, processit illi obviam, atque ea libertate, quam spiritus illi dabat (nam ubi spiritus, ibi libertas) magna voce, ait: Bene ambulabas; quis te fascinavit? palam illi exprobrans, quod Rempubl. alio, atque statuerat ac primo capefferat, animo gereret. Ne multa, dignum factis ac moribus suis vitæ exitum habuit, hoc est sanctissimum, ac Dei oculis, cui nullum majus, morte Sanctorum, spectaculum est, gratissimum jucundissimumque, ac simul, ad sensum,

acerbissimum; nam in Collegio Rom. pene interelusione animæ, vitam suavit. Tumor enim quidam ex vitiosis humoribus, in posteriori colli ejusdem parte constatus, cum in dies magis excreceret, nec ad eam vim humorum excipiendam, pellis colli sufficeret, adeo eam, quæ gutturi inkraret, ad se attraxit, ut fauces illi præcluderet, ac demum, sua malignitate, vitam adimeret. Defuncti cadaver pollinctores, acerrimo cutique hærenti præcinctum cilicio, invenerunt. Addunt ad ea, quæ diximus, quidam ex eadem Societate, quibus pulcre ille erat cognitus, incredibili eum lætitia fuisse persusum, cum audivit, se fuisse receptum in Societatem; a qua plura ipsum repellere videbantur; primum, ætas adhuc mollis, nec satis illi matura, cum vix decimum septimum ejus annum attigisset; tum, humilitas generis, cum in obscuro, Monfort, Mamertinæ diocesis oppidulo, ex iussimæ sortis parentibus ortus esset; tum, aspectus paulo horridior, qui ab se homines abalienaret; tum, mores inveniusti, quique rus merum olerent. Sed vicit hæc omnia, egregia adolescentis, ac pene pueri, ad virtutem indoles, ingenique ad omnes res summas nati, qui in eo eminebat, splendor ac dignitas. Receptus in Societatem, totos sedecim annos, in tradendis eloquentiæ præceptis, & instituendis ad omnem humanitatem adolescentibus, contrivit. Quotiam tempore, omnes per se Philosophorum fontes est persecutus; unde tantam doctrinæ & eruditionis vim hausit, tum in sacris tum in prophanis literis, ut omnium sui temporis eruditorum famam æquarit; adeo, ut P. Alphonsus Salmeron, in quo maximum Societati Jesu constituitur ornamentum ac decus, in rebus dubiis ac difficilibus, per literas, sententiæ & opinionis ipsius vellet fieri particeps, eique, tanquam Apollinis oraculo, fidem haberet. Biennium Romæ Theologorum scholas frequens adivit, neque in excipiendis iis, quæ a magistris dictarentur, operam sumebat inanem; neque rivulos, ut plerique faciunt, confestabatur, sed rerum controversarum summis memoriæ mandatis, ad eos, qui doctissimis suis disputationibus diligentissime res illas ex-

exagitassent, tanquam ad caput, unde univcrsum flumen erumpcret, se conferebat; tantumque ea exercitatione profecit, ut iis, ad quorum nutum omnes vitæ suæ rationes accommodatas habebat, habitus sit idoneus, qui Patavii, in urbe omnium disciplinarum magistra, Theologorum præcepta doceret, iisque, in illis tradendis, succederet, quorum admirabilis extitisset industria. Neque opinionem, quæ erat de ipso, fecellit. Nam, ita munus istud obivit, ut disputatio de Deo trino & uno, ab auditoribus suis excepta, ac literis consignata, typis, in scio ipso, mandaretur. Quod verò ad pœnas attinet, quas in se ultro suscipiebat, præter id quod diximus, insuper ea narrantur: cum, a certo quodam tempore, vestes, quas semel induisset, nunquam deposuisse, nisi cum vellet flagris se cedere; quod singulis noctibus ea acerbitate sævitique faciebat, ut flagellum sæpius a scapulis ad pedes, ac rursus a pedibus ad scapulas recurrens, nullum corporis locum, a verberibus vacuum & immunem, relinqueret; thoracem ex cilicio, nunquam, ne febris quidem urgente, abjecisse; nudis asseribus, vili involutus lodice, noctu somnum capere consuevisse; ad quem conciliandum, quia incœnatus cubitum ihat, sorbitionem ex insuavi olere decocto adhibebat; quam vini haustus sequebatur; præterea somno non plus tribuisse, quam quinas singulis noctibus horas; totidemque, experrectum, precibus, in medio cubiculo nixum genibus dedisse. Incredibili fertur fuisse patientia, in corporis doloribus perferendis; cujus patientiæ eximium, in ea massa toleranda, speciem edidit, quæ illi circa cervices, ad capitis humani magnitudinem excreverat; quæ ne mole sua caput deorsum attraheret, ligneis ac ferreis fulcris erat sustentanda; ac ne compressa tetros ciceret dolores, nova semper somni capiendi ac quiescendi ratio & status excogitandus; &, quoniam tumore nimio fauces, quas comprehenderat, ita in arctum angustumque deduxerat, ut omnem cibo ac potioni in stomachum aditum intercluderet, ne ille vita deficeret, calidorum panum fumo & coctarum carniurn nidore nutriendus.

VIII. GABRIEL ZINAMUS.

Regium Lepidi, tum agri amœnitatē fertilitateque, tum viarum & ædificiorum numero ac magnificentia, tum hominum ingeniiis, ad omnes artes pulcherrimas aptis, tum civium opibus, divitiis, ac generis nobilitatē illustrium, copia, nobilissimas inter urbes Italiæ refertur, neque postremum inter eas locum ac numerum obtinet. Quid mirum est igitur, si fere semper aliquos ex sese, præstantes ingenio & eruditione, viros ediderit, qui suæ patriæ, atque adeo Italiæ universæ, essent ornamento atque splendori? Atque, ut de aliis ætatibus taceam, patrum memoria, in Juris civilis scientia Ruviam habuit, (quamquam aliæ etiam Civitates eam sibi vendicent;) tanta ejus artis notitia præditum, ut totius terrarum orbis oraculum haberetur; tum Q. Marium & Marcellum Corrados fratres ea urbs tulit, in quibus omnis veteris eloquentiæ cultus ac nitor elucet, in quibus omnis Græcæ Latinæque eruditionis thesaurus, tanquam in arca, concluditur. Nostra autem ætate, plures ab ea prodierunt, qui Etrusco sermone elegantissime, tum soluta oratione tum versibus, scripserint. Equibus eos tantum enumerabo, quibuscum aliquis mihi amicitiae usus necessitudoque intercessit; Gabrielem videlicet Bombasium; cujus etiam imaginem ingenii, in prima Pinacotheca, quod in me fuit, expressi; & Alphonsum Fontanellam Marchionem; & hunc, quem ego oratione aenea, quasi coloribus, conor effingere, Gabrielem Zinamum. Hic igitur, honesto genere natus, nam Comitum dignitate tituloque erat ornatus; suum omne, ab ineunte ætate, studium contulit ad Philosophiam, atque ad has humanissimas ac liberalissimas artes. Sed præsertim poëticæ facultati, ad quam, a natura, magna adjumenta se habere sentiebat, operam dedit, in eaque sese continuit; multaque scripsit eleganter, atque egregium in primis poëma de Christi Domini cruce, ab Heracleio, de Persarum manibus recuperata: in cujus rei argumento versabatur etiam Franciscus

seus Bracciolinus Pistoriensis : quod cum ille jam paratus esset edere, sed diem ex die duceret, antevertit Bracciolinus, qui prior suum typis excusum emisit, ac magnam apud omnes laudem ac plausum reportavit. Neque ea res mediocriter hominem perculit; atque cum ego audivi in loco, ubi Academia Humoristarum habebatur, cum suum illud volumen gestaret in manibus, socordix se desidixque accusaret, quod in orbis terrarum theatro, dilatando protrahendoque, primum in scena locum, sibi alterum passus fuisset eripere; dicebatque, sibi esse in animo, id poemam, cujusmodi illud esset, typis mandare, & in vulgus emittere: sed id, quod cogitaverat, non perfecit; credo, quod vereretur, ne, ubi exempla conferrentur, verborum sententiarumque luminibus, suum, ab illius carmine, opus superari judicaretur. Sed utut sese res habeat, illud certum est, nunquam ex domesticis parietibus, ubi tanquam in tenebris latebat, emeruisse, atque in lucem produsse. Dicitur, etiam tum juvenis, in Germania fuisse. Erat altero oculo captus, vel saltem eodem, minus commode utebatur; sed iudicii acumine præstans, tum in notandis animadvertendisque vitiis prudentissimus. Verum, tanta in eo modestia aderat, ut ii, quorum scripta, in ipsius iudicantis arbitrium venerant, non offenderentur, sed singulari beneficio se ab eo esse affectos existimarent, de eoque gratias agerent. Nihil in ejus moribus deprehendisses, quod ad reprehendendum arripere; nullum ex ejus ore verbum exibat, nisi honestum ac grave. Neminem contemnebat; nemini se præponebat.

IX. JO. BAPTISTA SPADA.

CLarissima ac nobilissima Etrurix urbs Luca, adeo intra suos fines, tanquam intra quædam vincula, libertatem habet inclusam, ut omnes eidem, ad egrediendum, vel aliis ad eam oppugnandam, atque de sua sede exturbandam, obsepti atque interclusi sint aditus. Atque adeo cives sui æquo jure omnes esse jubentur, ut hostium loco habeantur, qui æquitatem communis ju-

ris, aut præstantia dignitatis, aut divitiarum opumque magnitudine, transire contendant, atque hæc satis iusta causa esse videatur, cur publicatis ipsorum bonis, & Republ. ejiciantur, aut capite, temeritatis audacique per-
 rias debitas gravesque persolvant. Quo sit, ut civibus il-
 lis ab omni, de Republ. perturbanda, contentione ex-
 clusis, summa pax ociumque contingat. Quod ocium,
 cum nihil aliud inveniant, in quo honeste consumant,
 totum a primis ætatis temporibus, aut in mercimoniis
 comportandis avehendisque collocant, quo civitas sua
 omnibus iis rebus affluat, quæ sunt ad vitæ usum neces-
 saria, aut in liberalissimis artibus studiisque consu-
 munt. Ac plures eorum, qui liberalibus se disciplinis
 dediderunt, imagines huic possum referre; sed, quo aliis
 etiam sit locus, ceteris prætermisissis, iis tantum hujus
 Pinacothecæ paginas, quasi parietes, vestiam atque or-
 nabo, quorum ingenii formam, magis quam aliorum,
 comprehensam animo ac perceptam intelligentia deti-
 neo. Atque in primis se offert Jo. Baptista Spada I. C.
 In quo, erat ambiguum, utrum magis ipsius Juris scien-
 tia, cujus tum erat princeps, an fides & animi modera-
 tio, laudaretur. Nam primum, tanta ac tam prompta
 ejus erat, in agendo & in respondendo, celeritas, subti-
 litas, ac diligentia, ut, qui in suis cum causis posset ha-
 bere, nullius alterius advocati industriam patrocinium-
 que requireret. Ejus vero fides, simul ut versari in foro
 & causas agere cepit, ita eluxit, ut etiam, qui inimico
 inter se animo essent, & aperte inimicitias exercebant,
 utrique, in maximis atque gravissimis de jure contro-
 versis, eum sibi advocatum eligerent, neque, aliqua
 cujuspiam amicitia ac gratia, se posse ab eo decipi ac
 prodi, vererentur. Tanta ac tam constans, in animis
 omnium, ejus fidei ac probitatis opinio infederat. Ita-
 que eodem tempore, Alexandro Cardinali Montalto, &
 Petro Cardinali Aldobrandino, operam dabat, inter
 quos, ob privatas quasdam discordias, non bene conve-
 niebat, sed alter alteri adversabatur; ac rursus, Card-
 nalis ejusdem Aldobrandini, & Scipionis Cardinalis
 Burghesii, causas suscipiebat; ac postremo etiam vitæ
 suæ

fux tempore, ejus opera pariter utebantur, Cardinalis Burghesius & Ludovicus Cardinalis Ludovisus, qui non conjunctissimi vivebant, sed perpetuo inter se dissentiebant. Etenim quivis eorum, maximam eidem rerum suarum fidem habebat. Fuit apud Clementem VIII, Paulum V, & Gregorium XV, Pont. max. magno in amore atque existimatione, ut etiam Paulus V habuerit in animo, Datarii illi partes demandare; sed, ne id perficeret quod cogitaverat, fuit impedimento sorditas, qua ille laborabat; id illi vitium honorem illum, aliosque etiam majores, eripuit. Conatus est etiam, Thesaurarii generalis provinciam, quod munus est venale eidem, deducta tertia, divendere; sed ille recusavit emere, quantumvis sub ea conditione emeret, si vellet, ut si intra quinquennium vita decederet, nihil de precio amitteret, sed integrum illud, cui vellet, testamento, legaret. At ille non putavit esse tanti, unico pene temporis momento amittere, quod tot annorum laboribus comparasset. Nec minimam ejus animi moderatio laudem meruisse existimanda est, quod maluerit intra communem privatorum hominum conditionem se continere, quam eam, præstantia honorum ac dignitatis, excedere. Adfui olim ego, cum ille, tanta apud omnes homines existimatione ac nomine, tanquam si esset unus quivis e populo, in argentariam quandam veniret, atque ab argentario, non arrogantibus sed demissis verbis, rogaret, ut sibi pauxillum illud nummorum conficeret, quod reliquum apud ipsum erat de ratiuncula Gherardi, fratris sui, qui postea Antonio Barberino, Cardinali S. Monuphrii, Urbani VIII, Pont. max. fratri, cognitionibus fuit; neque aliis cognomentis aut titulis fratrem afficeret, nisi iis, quibus infimæ etiam sortis homines affici solent. Ut satis, ex ea Repub. eum ortum esse, constaret, in qua vetitum, ac capitale propemodum est, se aliis superiorem efficere, atque, aliqua in re, communis libertatis fines, tanquam lineas, transire. Advocati primo Consistorialis, tum etiam deinde, advocati fiscalis, functus est munere. In quo munere, illud aulæ, atque adeo universæ civitati, consilii, doctrinæ, prudentiæ, sapientiæque suæ lu-

lumen ostendit, ut donius sua quotidie eorum frequen-
tia redundaret, qui, suarum rerum incerti, consilium
expetitur accederent; neque erat aliquis paulo locu-
pletior, qui, aut de hereditate, aut de dote, aut de fini-
bus, ambigeret, quin cum sibi advocatum adoptaret,
nemo, qui vellet testamentum facere, filix dotem con-
stituere, aut castrum aliquod aut fundum emere, quin
ad eum referret, neque quidquam putaret agi perite
aut callide posse, quod non ex ejus consilio & auctori-
tate gereretur. Quid mirum est igitur, si ejus janua at-
que vestibulum, ut diximus, id quod de Q. Mutii do-
mo refert antiquitas, maxima quotidie frequentia ci-
vium, ac summorum hominum splendore, celebraretur?
quid mirum etiam, si Paulus V tantum ejus meritis tri-
buendum esse censuerit, ut Joannem Baptistam Spa-
dam, fratris ejus filium, in eodem, quo ille erat, Ad-
vocati Consistorialis loco ac numero collocandum con-
stituendumque curaverit, ut, una cum patruo, eo lite-
retur ac frueretur, illo mortuo, solus eum locum obti-
neret. Verum, tantum Pauli V beneficium digno in
loco collocatum fuisse, res ipsa ostendit. Nam illud hic
Jo. Baptista junior ex sese virtutis specimen edidit, ut
Urbanus VIII, ejus fama commotus, maximis eum
honoribus exornaverit, summosque magistratus capere
jussit. Nam primo, arcanis Congregationis Consul-
tæ, in qua de rebus totius Reipubl. administratione agi-
tur, negotiis præfecit; deinde, arduis temporibus
quasi fluctibus, agitatur, Urbis navis, multos annos Gu-
bernatoris, non magis nomine quam imperio, clavum
tenere voluit. Postremo, cum omnes Italix Principes,
contra Sedem Apostolicam conjurassent, eidemque bel-
lum atrox & acerbum habuissent indictum, & Urbanus
VIII, ejusque cognati, qui maxime eo bello expeti-
dicebantur, necesse haberent aliquo, qui sibi esset ad
manum, scribæ loco, quemque omnium consiliorum
participem facerent; non alium ad id officium admise-
runt, nisi Jo. Baptistam, apud quem, fide & industria
cognita, tuto in loco omnia sua arcana se posse depone-
re, pro certo existimabant. Hunc etiam locum amicitiz
nunc

nunc tenet apud Innocentium X; qui tantam prudentiam, in regenda Urbe ostensam, otiosam esse non fuit, sed ad totam Æmiliam administrandam, Præsidis nomine, adhibet. Sed ut ad Jo. Baptistam superiorem revertar, cum multos annos Juris civilis gloria florisset, morbo consumptus est, ac magnificentissimo funere elatus, in Ædem Deiparæ Virginis, ad portam Flaminiam; atque Advocati omnes Consistoriales in funus prodierunt.

X. LÆLIUS FINIUS.

Lælius Finius, Mirandula, quod est oppidum Italiae, perpetuis ac validis, quibus septum est, munitionibus, clarum, sed prodigiosis Principum, qui ejus potiri sunt ingeniis longe clarissimum, nobili inter suos ortus est loco, patre natus I. C. ob præstantem Juris civilis scientiam, Alphonso II, Ferrariæ Duci, in primis caro; quem etiam habuit a consiliis, magnique operam ejus æstimavit, in pluribus gravissimisque negotiis. At Lælius filius suis parentem vestigiis profectus, at statim ab ineunte ætate totum se ad Juris civilis scientiam contulit, cœpitque esse in foro, non sine magna ingenii doctrinæque laude: sed a patruo, qui locupletem S. Antonii Prioratum in patria obtinebat, perductus est Romam, ut ibi, litigantium patrocinis suscipiendis, clarum suum nomen efficeret: verum Alexander Cardinalis Montaltus, in cujus tutela tum patruus tum ipse latebat, quique tum Congregationi Consultæ, quam vocant, præerat, ad quam pertinet, in omnes Ecclesiasticæ ditionis urbes ac loca, Prætores ac Judices, a quibus regantur, mittere, voluit ejus opera ad gerendam Rempubl. uti: ac primo Assisinatem, tum Narniensem, illi provinciam attribuit. In quibus administrandis, non modo nullum detrimentum existimationis fecit, sed magna abstinentiæ, innocentæ, prudentiæque laude crevit, ut etiam utraque civitas, bene gestæ reipubl. gratia, omnibus eum, quibus posset, honoribus prosecuta sit, atque civem suum effecerit. Cumque Romam veniens, ad Clementem VIII, Pont.

max.

max. & ad illius pedum osculum admissus fuisset, ortus est sermo de iis, qui sunt in potestatibus, quemadmodum eos se gerere oporteret; cumque dixisset Pont. Prætores decere tum oculos, tum manus abstinentes habere; illi ea fiducia, quam ipsi optimæ mentis conscientia dabat, quod suspicaretur, id sibi dictum, audacter respondit: Pater sancte, si quod unquam facinus tale me tibi veniet in mentem, te ipsum frustraberis, ac facies mihi insignitam injuriam; eo enim sum genere ortus, atque ita me ab ineunte ætate comparavi, ita etiam vitam institui, ut aliena appetere, aut aliquid de publico aut privato surripere, vel aliquod committere, quod sit ingenuo homine indignum, absit a meis moribus longissime. Tum Pont. quasi, quod dixerat, corrigens: Noli existimare, id a tue tua causa dictum; sed ideo mihi excidit, quia pleraque pars hominum, in hoc officii genere graviter turpiterque delinquit. At Lælius eatenus regendis civitatibus navavit operam prætor, quoad Card. Montaltus, Cong. Consultæ præfuit; ea vero potestate ad Petrum Cardinalem Aldobrandinum, Clementis VIII fratris filium, translata, ipse etiam animum transtulit ad Juris Civilis studia; in quibus ea exercitatione utebatur, ut Jurisconsultorum libros, quorum numerus scire in immensum excrevit, diligenter pervolutaret, ac præcipuas ex eis sententias excerperet, & in codicem referret, quem vulgus Jurisconsultorum, apto fortasse, sed minus Latino nomine, Repertorium vocat. Sed ille, non unum, sed plures codices ejusmodi sententiarum impleverat, unde, tanquam ex penu quodam, in causis, quod sibi esset opus, expromeret. Accesserat, quod patruus pinguem illum Prioratum, quem diximus, ipsi resignaverat. Itaque, jam dives, omisiss omnibus aliis curis, totum se in studiis continebat. Erat ille quidem optimis atque sanctissimis moribus, qui Deum inprimis vereretur, sed suspiciosus, timidus, quique vere omnia in peiorem partem raperet; cunque, vitio depravatæ mentis, eo pervenisset, ut se omnium insidiis circumveniri, & ad necem expeti, suspicaretur, quo tutus esse posset, in domum hospitalem S. Antonii, in Exquilis, quia ejus habitum

bitum gerebat, se recipiendum curavit. Receptus, nihilo securior est factus; nam, ut quisque domum illam ingrediebatur, ad ipsum interficiendum, cum mitti putabat. Atque adeo in ea opinione defixus hærebat, ut nullis amicorum persuasionibus, nullis Fratrum illorum, quibuscum vivebat, admonitionibus, ab ea dimoveri ac dejici posset. Itaque, in ea animi ægitudine, a qua in dies acrius vehementiusque premebatur, excessit.

XI. JACOBUS CRESCENTIUS.

Quantum domestica patrum familias disciplina, si-
ve severa siue mollis, filiis, quos generaverint, momenti afferat, ad vitam recte vel secus instituendam exigendamque; eorum, in utramque partem, qui domi suæ bene vel male educati sunt, declarat eventus. Tria præsertim esse arbitror, quibus, ab incunte ætate, puerorum mores imbuti, ad nequitiam trahantur, quamvis magna in eis indoles ac materies ad omnes bonas artes existat. Primum, nimius in eis vettiendis ornandisque suntus atque luxuries: nam videre licet, infimæ sortis hominum filios, vix e sinu matrum egressos, immo vix a lacte depulso, pretiosis vestibus, serico auroque contextis, vel ipsos incedere, vel e manibus utriusque sustentium pendere, vel crines longius fluentes, & in morem mulierum comtos, purpureis ex ligulis conspicuo elegantique nodo devinctos habere; ut, qui parentes illorum ignoret, non eos opificis cujuscumque aut lanii, aut ceterii, sed viri principis esse filios, existimet. *Quis eorum, ut sapienter Quintilianus ait, non adultus concupiscet, cum in purpura repat?* Deinde, puerorum moribus pestem & exitium affert parentum socordia ac negligentia formandi, custodiendique in ætate prima pudoris. Vidi ego non paucos ea in liberos indulgentia, (si ea indulgentia, ac non potius summa iniquitas ac stultitia appellanda est,) cum multa, a filiis improbe facta ac scurriliter dicta, suis ipsi oculis atque auribus acciperent, non modo improbitatem illam scurrilitatemque objurgationibus verberibusque non coercerent,

ve-

verum etiam, si diis placet, osculo risuque exceperent. Postremo, eorum puerorum pudor, modestia, probitas in perpetuum modum perierit, quorum mores, parentum, quibus cum vivunt, luxuria perdiderit. Nonne in perditis ac desperatis rebus habendi sunt ii, qui sua vitia possint majorum sinorum exemplo & auctoritate defendere? At non erat talis, Virgilii Crescentii, viri patricii, Jacobi patris, domi disciplina. Quam in domum nunquam vitiis illis, de quibus commemoravimus, aditus patuit. Nam, cum propter generis nobilitatem, summasque divitias, liceret ei, filiis sumptuosa vestimenta præbere, non alia illis tradidit; nisi usitata atque vulgaria, quibus etiam ipse, quamvis flos delibatus esset populi, utebatur. Malebat enim, eos ingenio bono, quam lepidi ornatu instructos incedere; pudorem, quam aurum ac sericum gerere; pulcros mores, quam insignem corporis faciem habere. Itaque licebat aspicere, quatuor, viri clarissimi filios, una cum alio, qui honoris gratia eadem in domo educabatur, lanceis tibialibus, femoralibus, thoracibus, sagis ac palliis, quibus seriei nihil esset admistum, amictos incedere; quibus præceptor, vir gravis ac fidelis, accedebat comes assiduus, qui, tum foris tum domi, una cum parente, ad majorum instituta ac sanctissimam disciplinam eos erudiret, neque aliquid audire vel spectare curaret, quod purissimum illorum morum nitorem contaminaret. Denique, si domestica parentum sanctissimorum exemplo animis, ad meliora propensis, acriores vehementioresque ad virtutem stimulos addunt; quid poterat inveniri, Virgilio patre honestius? quid sanctius? quid enim unquam ab illo audiebant, quo non pudentiores aut meliores efficerentur? quid illum agere videbant, quod cum imitati essent, id quod maxime in parentum gloriam redundat, non similes patri invenirentur? quid mirum, si ab ineunte ætate ad extremum usque spiritum, nunquam læsæ, sed conservatæ sanctissimæ innocentie opinionis laudem sint assecuti? Fit, tum ex vitiis, tum ex virtutibus, consuetudo, postea natura. Quod si in sanctorum virorum amicitiiis tantum nobis præsidii est ad vitam moresque componendos; quid mirum

tôt tantisque virtutibus ornatos existisse eos, qui in Patrum Soc. Jesu institutis, in S. Patris Philippi Neriî disciplina, sive potius complexu, fuerint educati? Magna Virgilii & Constantiæ, ipsorum parentibus, cum viro illo sanctissimo consuetudo ususque intercessit; Constantia etiam, usque ad extremum vitæ diem, a confessionibus eum habuit; ejusque liberi, non alio eundem nisi parentis cujusdam loco ac numero, coluerunt; atque ipsi, & Jacobus in primis, de quo loquimur, non secus dilecti sunt ab illo, ac filii. Hic Jacobus, eruditus est humanioribus in literis, in scholis Patrum Soc. Jesu: ac necum una integrum annum P. Horatium Turfellinum & Franciscum Bencium, qui tum optimi dicendi magistri habebantur, audivit; qui multa, tum soluta oratione tum versibus, scribendo, ita probabatur, ut in principibus discipulis numerarentur. Exaëto anno, dissimilitudo studiorum, ad quæ uterque nostrum animum appulit, nos ab invicem distraxit atque sejunxit. Ille enim se Jurisconsulto, ego me Philosopho tradidi: Petrus Paulus vero, cui, omnium fratrum concessu, Reipubl. capeßendæ laus, omnique ambitionis labor fuerat relictus, multo magis studium illud est amplexus, sine quo Respubl. recte administrari non potest; nimirum Juris civilis scientiam. Neque sibi defuit, sed continuo ad Rempubl. accessit, honorum curriculum inivit. In quo progressus est longius, quam esset utile sibi rei quæ suæ domesticæ. Nam Paulus V, qui hominis mores & ingenium nosset, quoque parente ortus esset, ac vellet eum ornare ex suis virtutibus, mandavit eidem, ut Auditorii Camere munus, quod tum venale erat, sibi coëmeret; in quo tanti sumtus faciendi erant, ut totam pene rem familiarem exhaurirent, vel saltem eam in illa lacunam efficerent, quæ nunquam postea potuit expleri. At ille, ejus honoris, quo præter Pontificium nullus est major, celeriter adipiscendi cupiditate impulsus, Pontificis imperio esse parendum duxit. Itaque eam provinciam mercatus est, ab eaque factus est ipsi gradus ad Cardinalatum. Ad quam dignitatem etiam perductus est. At Jacobus, qui jam pridem insigne quoddam Sacerdotium, quod Abbatiam

vocant, Nursæ obtinuerat, Ecclesiasticis sacris initiatus, ac Sacerdos effectus, sacrarum literarum studijs, omnibusque pietatis operibus, totum se tradidit. Sic vita erat; singulos dies, sacrosanctum Missæ Sacrificium facere; festis diebus, superpelliceo indutus, una cum alijs Oratorii Romani Patribus, in choro, vespertinas horas canere; frequenter celebriores sanctorum Martyrum memorias invisere; beatissimi Patris Philippi exemplo, cuius similitudinem, quantum poterat, in se transferre conabatur; cuius etiam ope, die quodam, ex tortuosis cœmeterii Priscilliani anfractibus, quibus ita se implicaverat, ut de salute desperare cogeretur, sit ereptus. Neque iste, tantum in se beneficium, Philippi intercessionem acceptum non retulit: nam continuo, argenteam magni ponderis tabellam faciendam, ac sancti viri sepulcro appendendam curavit; cum antea, suis sumptibus, loculum, quo sancti viri corpus tegitur, cypressinis ex tabulis confectum, holoserico villosa purpureo, multo auro distincto, intus ornandum sternendumque mandasset. De fructibus, quos ex pingui illo Sacerdotio capiebat, minimum sibi sumebat, ac totum ferme pauperum, ejus loci, usibus assignabat. Quod utinam nunc fiat ab unoquoque, cui sacerdotium illiusmodi locuples commissum est. Sed Jacobus, cum maxime dat operam, ut bonorum operum fructibus animus augeat exornetque, ex stranguria, qua cœperat laborare, decessit; dignus, qui vel nunquam moreretur, vel saltem, quum ea lege ortus esset, multo minore cum cruciatu doloreque evolveret ad superos. Illud miror, quod, cum ingenio valeret, otio abundaret, a literis non abhorreret, animum ad scribendum non appulerit, quo, insigni aliquo opere, sui memoriam, apud posteros, quam maxime longam efficeret.

XII. LÆLIUS UBALDINUS.

Nulla res, ut diligenter omnia perquiramus, ad conjungendas conglutinandasque amicitias, majorem vim habet, quam duorum perpetuum tum ad res honestas consensio, tum ad res vitiosas offensio atque fa-

fastidium. Quod ideo additum est a nobis, ut aleatorum, compotatorum, ac libidinosorum surumque societatem atque consensum, amicitie nomine aspicere videremur: hos enim non virtus, quæ solum ac fundamentum est veræ amicitie, eo inter se nexu constrinxit, sed insanus acturpis voluptatum ardor ac cædis. Ex contrario, nihil ad dissuendas amicitias atque odia constituenda plus valet, quam contrariæ hominum sententiæ, & dissimilitudines studiorum ac voluntatum. Nam, cujus magis amicitias fugimus, quam ejus, qui odiosus sit, qui nostris semper studiis adversetur? contra, quid Pyladem & Orestem, nobile par amicitie, ita arctio inter se amoris nexu constrinxit, ut corporibus duo, quemadmodum inquit Ovidius, mentibus autem unum essent, nisi quia, eadem semper sentiendo, perpetuam inter se pacem, amorem, amicitiamque exercuissent? quodnam vinculum ita Theseum Pirithoo habuit adjunctum, ut nunquam dirimeretur, sed eodem, ut est in fabulis, copulati, ad inferos sese demitterent, nisi quia ita quonibus in rebus inter se convenirent, ut nullum unquam oriretur dissidium? quid superiorem Africanum & Lælium veræ exemplum amicitie constituit, nisi perpetua ipsorum, in eo, quod esset honestum, expetendo prosequendoque consensus? Sed nullus erit finis, si omnes, ex omni antiquitatis memoria, colligere, sit in animo, quorum amicitie nullam unquam calamitatem senserint ex eo, quod alter ab altero discreparet. Sed ex iis, quos ipsi nos vidimus, par amicorum unum se offert, in quibus, ad conjungendam amicitiam, princeps fuit virtutis amor, ac honorum artium studia, quibus uterque flagrabat; unde tanta extitit animorum conjunctio, ut non duæ voluntates simul coisse, sed ex duabus una affecta esse videretur. Quod par amicorum ex duobus constat, in quos omnia, tum naturæ tum generis tum ingenii ornamenta convenerunt; videlicet ex Ascanio Card. Columna, & Lælio Ubaldino. Atque de Cardinali Ascanio satis superioribus libris dictum est a nobis. De Lælio ea proferemus, quamvis non ita multa, quæ ab Hugone Ubaldino, fratris illius filio, in referendis suorum laudibus, nimis patre

parco, vix potuimus exprimere. Hic genere ortus nobilissimo, cum, statim a pueritia, magistris, ad ea perdiscenda; quibus prima illa ætas imbui solet, traditus, celeriter cepit ingenii lumine clarius enitere, quam ex ejus æqualibus multi; in quibus erat Octavius Bandinus, qui postea a Clemente VIII factus est Cardinalis. Erat Lælii & Octavii parentibus vetus amicitie consuetudo cum M. Antonio Mureto, cui tum temporis, omnium fere concessu, eloquentiæ, omnisque eruditionis, primæ deferebantur. Ad hunc parens uterque filium suum adduxit, ut vir ille doctissimus sapientissimusque, percontando interrogandoque, periculum faceret, quidnam illi in Græcis, quid in Latinis literis, quibus ad eam diem operam dederant, profecissent. Quorum ille quidem cum tentasset industriam, laudavit adolescentium indolem, sed fuit parentibus auctor, ut mitterent eos in Galliam; primum Parisios, ut ibi ab illis humaniorum literarum magistris, accuratius scientiusque, in elegantissimis humanitatis disciplinis erudirentur perficerenturque; deinde ad Jacobum Cujacium, qui tum eorum, qui Jus civile docebant, antesignanus existimabatur. Quod factum est ab illis diligentissime. Neque adolescentes itineris ac peregrinationis suæ pernituit. Legi ego Mureti ejusdem epistolam ad Cujacium, more suo scriptam elegantissime; in qua eos illi adolescentes etiam atque etiam commendabat, qui ad ipsum disciplinæ causâ venirent; aiebatque, suo in primis hortatu, quo a bonis artibus instructiores ad Jus civile perdiscendum accederent, Parisios se contulisse, ubi, Græcæ Latinæque linguæ doctoribus, se recoquendos traderent; hoc enim verbo utebatur: tanquam si ex aliorum magistrorum ludis, unde illi proficiscebantur, senium quasi quoddam contraxissent, quod Parisiensium præceptorum sapientiæ tanquam igne esset recoquendum, suoque eos artificio, tanquam medicamenti, situ illo senioque depulso, in florentem quandam viriditatem adducerentur; sicut Medea dicitur Peliam, suis venenis excoctam, secisse ex sene adolescentulam. Quod non ita magna ratione a Mureto, pace tanti viri dixerim, mihi factum videtur, ut studiosos adolescentes,

tes, tantos labores capere, tantum iter suscipere, tantos suintus facere, in eloquentia comparanda, juberet, cum ea illis domi, hoc est, Romæ, magistrorum copia suppeteret, quarum similes in Gallia, atque adeo tota in Europa, non invenirentur; Petrus Joannes Perpinianus, Jo. Petrus Massejus, Fulvius Cardulus, Horatius Tursellinus, Hieronymus Brunellus. At hi omnes, in Collegio Rom. Soc. Jesu, utriusque eloquentiæ præcepta, magno auditorum concursu utilitateque, tradebant. Quod si locus fortasse displicebat, & antiquissima ac celeberrima Gymnasia recentibus, Patrum Soc. Jesu scholis anteponebat; apud quos honestius & utilius eos poterat detinere, quam apud se, qui, jam tum eloquentiæ & eruditionis fama clarissimus, elegantissimas literas in Gymnasio Romano docebat? Sed fortasse in suæ nationis homines amore, quo plerique plus æquo incenduntur, eatenus progrediebatur, ut vellet Lutetiam Parisiorum, sicut olim Athenas, omnium bonarum artium esse mercatum, quo ii confugerent, qui liberalibus disciplinis exornare animum cuperent. At Lælius, cum jam ea didicisset, quæ Mureto placuerant, Philosophiæ ac sacrarum literarum studio incensus, profectus est Salamanticam, ut in celeberrimo illo Gymnasio studiis obsequeretur suis. Qua in civitate cum Ascanio Columna, qui ibidem eadem de causa erat, ea amicitiae fundamenta jecit, quæ usque ad exitum vitæ firmissima duravit. Captus est uterque amœnissimo alterius ingenio, ac morum suavitate, eatenus, ut, ne ad breve quidem tempus, inter se distracti ac sejuncti esse possent. Sed vehementius impotentiusque, ut ita dicam, Ascanius ferebatur in Lælium, adeo ut ejus consuetudine usuque expleri saturarique non posset: verum cum Lælius Philosophiæ ac Theologiæ capita ac fontes, ab aliis sibi monstratos, nosset, ut inde tantum posset haurire, quantum vellet, Christianæ perfectionis cupidus, in laudatissimam D. Francisci familiam nomen dedit; eam videlicet, quæ arctius vitæ consecratur genus. Neque novo istoc & inexplicabili nexu, quo se Deo, religionis voto, obstrinxerat, aliqua ex parte remissum est vinculum illud amicitiae, quo se Ascanius eidem obligaverat; immo multo

factum est arctius atque obstrictius: nam, ne minimum quidem temporis spacium, sine illo esse; & tanquam ex illius ore spiritum duceret, ejus lateri semper hætere; adeo ut, si ille cœnobium commutaret, illuc Ascanius se conferret. Quæ individua animorum conjunctio multo manifestius apparuit Rômæ; quam in Urbem F. Franciscus (id enim nomen, ut mos est Fratrum religioforum, superiore mutaverat,) una cum eodem Ascanio, a Sixto V in Cardinalium Collegium cooptato, migraverat. Nam, si, verbi causa, ille in cœnobium B. V. quod est in Capitolio, habitatum commeaverat, illuc sibi Ascanius abundum esse censebat, ut illi proximus esset, quemadmodum animo, ita & corpore; si itidem ille, superiorum jussu, in alterum D. Petri in monte aureo cœnobium immigraverat, nullam sibi Ascanius moram esse interponendam censebat, quin illic, ut dicitur, remigio veloque contenderet: neque Franciscus illi in amore non respondebat; sed unice unum ex omnibus diligere; quo ille vellet, descendere; de illius studio studia sibi sua omnia esse. Ardebat incredibili quadam eloquentiæ cupiditate Ascanius, usque eo, ut, si quempiam audiret, paulo diligentius huic studio operam dare, ad se advocaret, nosse vellet, hortaretur, obsecraret etiam, ut in id studium, in quo erat, incumberet; nihil enim esse dignius, in quo omnis nostra opera consumeretur, quam hoc, in quo Romani nominis gloria longe multumque ceteris nationibus præstitisset. Idem mecum egisse illum memini, cum puer a Jo. Francisco Carrettonio, ob hanc causam illi amicitilino, ad eum essem perductus, quia non obscuri ac tenues in me eloquentiæ igniculi elucere viderentur. Quid enim, agebat, est turpius, quam nos, homines Romanos, qui orbem terrarum armis subegimus, qui dicendi gloriam Græciæ, a qua, una hac in re, adhuc vincebamur, eripuimus, pati, tantum tamque locuples patrimonium exterarum nationes invadere, & undique bonis, nobis ereptis, circumfluere? Florebat eo tempore in concionibus vir quidam probus ac doctus, insigni sacerdotio præditus, sed sensuum oculorum, ab ipso natalis sui die, penitus expers. Qui quidem, multis in rebus

bus claudicabat, præsertim in gestu, quem nulla venustas commendabat; tum erat in instruendo dissipatus, ne nullus esset rerum ordo, nulla distinctio; sed vox magna, canora, verborum splendor, ac perfacile currens oratio; quæ sensus ac dolores haberet, quæque, quos vellet, animorum motus in auditoribus excitaret: tum magnum ad se hominum concursum alliebat, ut vix cum caperet D. Laurentii in Lucina Ædes, quantumvis maximæ; ubi diebus festis a prandio concionabatur. Præterea, ea vi & acrimonia, vitiorum sordes insectabatur, ut concione perorata, complures, ejus oratione permoti, ad sacerdotum pedes sese projicerent, ac peccata multis cum lacrimis ultro confiterentur. Hunc Ascanius studiose a principio audiebat; sed, vel quia in aliud dicendi genus, longe ab eo diversum, ferebatur, letum, amœnum, omni florum varietate conspersum, sententiis magis quam verbis abundans, vel quia acrius, quam vellet, se ab eo verberari sentiebat; eo relicto; totum Francisco, tanquam suis auribus magis accommodato, se tradidit. Nullæ in ejus oratione incrant verborum faces, quæ ad audientium animos inflammandos erumperent, nulli fere reprehensionum aculei, qui ad eosdem fodiendos immitterentur; sed omnia erant summo lepore ac suavitate condita, verba aperte translata, paria paribus relata, adversa contrariis, sæpissimeque similiter extrema definita atque conclusa; denique nihil ille non ad voluptatem aurium deferebat. Neque id ego affirmare audeo, quod aliquis ejus sermo se in aures meas immiserit; nunquam enim cum mihi contigit audire: sed ideo ad id cogitandum adducor, quod, puer, longam ejus concionem, ad Card. Ascanium habitam, descripsi; ab eo mihi traditam, a quo privatim domi ad omnem humanitatem erudiebar; in qua omnes illæ sententiarum concionitates, omnes verborum flosculi, omnia illa orationis lumina, de quibus diximus, continebantur. Sed hoc tam excellens ingenium, cui, quantum ego puer judicare potui, non tam propositum erat perturbare animos quam placere, nec tam inflammare quam delectare, haud diu in suggestis & in concionibus, ut ipse optaverat, jactare se potuit. Etenim, dum

Ascanii Cardinalis studiis nimis est obsequens, Sublatus est mortuus, cum nondum tertium & trigesimum ætatis suæ annum impleisset. Quod si longius vitæ spatium nactus esset, nã ille ad summam Panicarolæ eloquentiam pervenisset, quam imitando conabatur exprimere.

XIII. IO. BAPTISTA MANSUS.

SI qui sunt, qui alios docere conentur id, quod ipsi didicerint, hi cgregie præter ceteros, de juventute, atque de universo hominum genere, mereri mihi videntur: præsertim, si id faciunt, nulla re commoti alia, nulloque præmio adducti, nisi utilitate communi. Et enim, mea sententia, optime omnium intelligunt, quid virtus ipsa velit; cujus ea vis est atque natura, ut ab iis, quorum pectora impleverit, in allos se transfundat, cum eisque communicet. Atque antiquissimis temporibus complures doctissimi clarissimique viri extiterunt, qui domos suas, quasi ludos, universæ Græciæ aperuerunt; ubi, qui vellent, liberalibus illis disciplinis erudirentur. In quibus ipsi principes essent. Sed, quia magis nostrorum temporum ac domesticæ virtutis exemplis gaudemus, quam veteribus & externis, libentius in his temporibus, in quibus nos sumus, nostra versabitur oratio, iisque definietur viris, quos ipsi novimus. Atque in præsentia duo se nobis offerunt, Jo. Baptista Strozza Florentinus, & Jo. Baptista Mansus Neapolitanus, quorum uterque tum generis, quo fulgebat, splendore clarissimus, tum artium pulcerrimarum studiis, quibus excellebat; fama notissimus, summam laudem positam esse putabat in eo, ut honestis adolescentibus ac studiosis se ducem præberet, ut venirent eo, quo sine duce ipse pervenisset. At Strozza non solum eos, qui in ejus disciplinam convenissent, opera ac labore juvabat, verum etiam, si viri boni essent, eosque ad summos honores pervenire posse existimaret, maximis sumtibus; in sui gloriam, alebat. Sed de hoc satis dictum est in superioribus libris, ubi ejus imaginem morum vitæque descripsimus. Jo. vero Baptista Mansus, Villæ Marchio, de quo referte instituímus, cum omnium elegantif-

tissimarum artium, quarum princeps haberetur, gloria floreret, literatorum omnium, qui in suam tutelam confugissent, patrocinium suscipiebat, omnibusque præerat, qui ad honestam aliquam disciplinam, ac nobili viro dignam, animum adjunxissent. In quo Strozza longo intervallo vincebat: illius enim institutio iis tantum disciplinis continebatur, quæ animi adolescentis quadam quasi humanitate expoliunt atque ornant; ut sunt, poetarum & historicorum cognitio, philosophorum inventa, omnisque elegantia doctrinæ: at Mausi, in juventute erudienda excolendaque, labor & industria multo progressa est longius. Etenim non solum iis ex cultos disciplinis efficiebat, quas diximus, eos, qui se ipsi commiserant, verum etiam aliis prope centum artibus instructos ornatosque reddebat; equos frenis regere, sibi dicto audientes facere, in gyrum compellere, in cursus cogere, tum ad ludendum arma suspicere; ut, ludicra illa armorum tractatione edocti, discerent, quemadmodum iis uti deberent, cum ea ad pugnandum essent sumturi; tum, saltare, citharizare, ad chordarum sonum psallere, atque ea omnia facere, quæ sine reprehensione a viri nobilis persona abesse non possunt. Et ideo præcipuus fuit auctor, Neapoli, collegii Nobilium instituendi, ubi adolescentes nobiles, iis studiis operam darent, quibus eos æquum erat impertiri. Præterea, in eadem urbe, otiosorum Academix una cum aliquot aliis initium dedit. Usus est familiarissime Jo. Baptista Marino, & Torquato Tasso, cujus etiam vitam scripsit. Fuit magna apud Proreges Neapoli, aliosque ejus regni proceres, æstimatione, ab iisque eximie carus habebatur. Sed commendabat hanc ejus in omnibus iis artibus, quas diximus, summam excellentemque notitiam, eandemque cum aliis communicandi ardorem ac studium, ea, quam (utinam falso) querimus, raro cum optimarum rerum scientiam conjunctam inveniri; nimirum vitæ ac morum probitas, neque ea usitata atque vulgaris, sed quæ vix in virum, omni sanctitatis laude perfectum absolutumque, conveniat. Non enim solum communi quadam voluntate virtutis atque officii, ab iis se abstinebat maxime vitiis, a quibus nos Christi lex avocet, sed alia

quadam nova ac singulari ratione, exquisitius ac religiosius vitæ genus prosequeretur. Non modo vetitis & impermissis voluptatibus nihil concedebat, verum etiam multa naturæ, ipsique necessitati, denegabat. Sed cum in omnibus Christianis virtutibus efflorebat, tum maxime in ea insignis inveniebatur, quam nostri humilitatem appellant, hoc est, in animi demissione atque modestia. Quamobrem invitæ suas laudes audire, multa sibi detrachere, atque aliis omnia tribuere, palam sua sibi vitia objici, ut mos est in sodalitiis B. Virginis, in quibus ille numerabatur, hilariter ferre; jussus ore terram lambere, aut sodalium pedes exosculari, non recusare; neque imperantis auctoritatem defugere; neque minus dicto audiens esse, si imperaretur caliendum e capite, quo calvitium occultabat, sibi eripere, & in terram abjicere; nam statim imperata faciebat; neque dubitabat, magno intuentium cum risu, caput pilis nudum ostendere. Unum in eo, quod vitium posset existimari, deprehendebatur, quod nimis ad rem attentus videretur; sed qua de causa ita rei faciendæ studere, ostendit in morte. Etenim hæredem omnium bonorum suorum, Seminarium nobilium reliquit: ut non tam illum rei suæ augendæ servisse, quam optimorum adolescentium utilitati consuluisse pateret; ne videlicet, rerum ad vitæ usum necessariorum inopia, a liberalium artium studiis avocarentur.

XIV. ALEXANDER GLORIERIUS.

SUMMA sæpenumero hominum ingenia, quæ maximam & ingentem de se expectationem commovent, in eum amplitudinis locum minime veniunt, ad quem sua merita vocant. Quod duabus de causis posse contingere arbitror; vel communi vitio hominum, quibus omnis exsuperantia virtutis suspecta sive potius odiosa est; vel fortunæ, si ita fas est loqui, iniquitate, quæ non potest pati, bona illa virtutum præmia fieri quorum, cui ipsa velit, largiendorum penes se arbitrium potestatemque debere esse defendit; quamobrem pergit turbare, atque perficere, ne quid illis succedat super-

nus,

nus, immo ut aspera ac fœda eisdem cuncta procedant,
 quos concepta de illis rerum maximarum spes vocat in
 cælum; atque etiam adjuvatur ab iis, quibus aliena vir-
 tus est formidolosa, ut diximus. Verum, ex iis, qui no-
 strâ memoria ad Rempubl. capeffendam accesserunt, ne-
 mo fortasse, a vitæ privatæ otiosæque quasi portu, ma-
 jori spe ac virtutis opinione, tanquam secundis flatibus,
 impulsus, ad honores vela dedit, quam Alexander Glo-
 rierius, Cæsaris Glorierii, multis summis Pontificibus
 earum epistolarum a secretis, quæ Brevia vocant, filius.
 Etenim locuplete in familia, & honesto genere natus,
 quippe qui Joannem Glorierium arcta cognatione at-
 tingebat, cui, Gallorum Regis Secretario, & Gallica-
 rum copiarum Quæstori, Franciscus Asulanus, divi-
 num illud Guiliełmi Budæi opus de asse, recentibus at-
 que elegantibus a se typis impressum dicat, tum singu-
 lari ingenio, a-natura, quam faultricem in tribuendis
 animi virtutibus habuit, instructus, optimis atque san-
 ctissimis moribus præditus, formæ dignitate atque præ-
 stantia nemini suæ ætatis inferior, præterea Carolo
 Cardinali Borromæo, Pii IV Pontif. max. sororis filio,
 qui tum rerum potiebatur, eximie carus, cujus etiam
 nomini inscripta typis mandavit trecenta Paradoxa,
 Theoremata, ac positiones Juris civilis, quas declaran-
 di causa, quantum in eo studio profecisset, publice tuen-
 das Romæ susceperat, tribus diebus continuis, adversus
 quoscunque, qui eas oppugnare conatus esset; quod,
 hæud scio, an cuiquam alteri in gymnasio Rom. conti-
 gerit præter ipsum. Hic igitur adolescens, tot præsidia
 ingenii fortunæque munitus, tot liberalibus disciplinis
 a parente, qui ipse quoque literas amabat, instructus,
 omnium in se oculos atque ora converterat. Atque ini-
 tium magistratuum gerendorum fecit ab eorum loco
 ac numero, quos, a supplicibus libellis referendis, Re-
 ferendarios vocant. Hic enim primus ad Rempubl. ad-
 euntibus aditus patet. In quo munere ea diligentia, in-
 tegritate, doctrinaque versatus est, ut plures ad eum
 causæ cognoscendæ judicandæque deferrentur; in qui-
 bus adeo se æquum, integrum justumque præbebat, ut
 ii etiam, adversus quos sententiam dixerat, æquo ani-
 mo,

mo, agentesque gratias, ab ipso discederent. At parens, qui gnatum haberet, tali ingenio præditi, quique de eo audiret omnes una ore bona omnia dicere, hac fama impulsus, cum afflueret opibus ac divitiis, comparavit illi unum inter Clericos Cameræ locum, unde facilis est atque expeditus ad majores honores ascensus, & quo ii, penes quos, honores tribuere, jus est atque potestas, majoris spe lucri, ad amplissimam illi dignitatem mandandum impellerentur. Quo igitur amplior atque expeditior filio aditus ad honores pateret, aliud Secretarii Apostolici munus obtinuit. Jam grillatoris, ut inquit ille, passibus ad summam amplitudinem properabat; nectam illa dignus videbatur, quia haberet multum quod perderet, quam quod vera ad illam via, hoc est, virtutibus, grassaretur. Cum fortuna sævire ac miscere omnia cepit. Erat in eo tenax justique repositum; vigeant etiam studia & qui bonique; contra quæ si quis vir princeps niteretur, excludebat ejus cupiditates, neque quemquam patiebatur plus jure ac legibus posse, memor dicti Sapientis, qui: *Noli, inquit, querere fieri iudex, nisi valeas virtute irrumperere iniquitates; ne forte extimescas faciem potentis. Et ponas scandalum in aequitate tua.* At mihi quidem duobus diversis atque contrariis inter se studiis, flagrasse atque exarsisse videtur. Nam, cui honores sunt cordi, justitiæ a se amorem, si ita res exigat, ejiciat oportet, hominibus potentibus, gratiosis, cupidis, ultro se offerat, operam navet, cupiditatibus illorum inserviat. Ne multa; eum, die quodam, Clericorum Cameræ Apostolicæ senatus de rebus gravibus colisset, atque adesset una Philippus Guastavillanus S. R. E. Cardinalis & Camerarius, Gregorii XIII sororis filius, actum est in eo conventu de quibusdam fructibus, quos Camerarius sibi assererat; sed re vera ad Collegium Clericorum pertinebant; cumque ceteri quorum ea res erat, tacerent, solus Alexander suam ac suorum collegarum defensionem, acri ac vehementi oratione suscepit. Quare Cardinalis vehementer offensus, qui in neminem unquam inciderat, qui sibi contradiceret; ad eum conversus: Tanta ne, inquit, vi pro tuis collegis, adversum me causam dicis? at ita factum

non

non oportuit. Hoc loco libet interponere, neque id tamen sejunctum, a re posita est; quam sit necesse iis, qui in Republ. versantur, quo honores, pecuniam, & gratiam consequantur, eorum obedire tempori, ac voluntati, qui auctoritate ac potentia plurimum pollent, ac nonnihil interdum de jure suo remittere; his enim rebus sapissime, infimo loco nati, sine ingenio, sine doctrina, magnis etiam vitæ morumque sordibus inquinati, ad summam amplitudinem pervenerunt: contra, sine illis, nobili genere orti, in parentum castissimis domibus bene & pudice educi, atque artibus honestissimis eruditi, curriculum honorum cum essent ingressi, non modo ad calces pervenire non potuerunt, sed partim, vix e carceribus egressi, prohibentur progredi longius, partim in medio spatio franguntur & corrunt. Sed revertamur eo, unde discessimus. Cætu igitur illo, quem diximus, dimisso, ille qui se læsum putaverat, iracundia supra quam dici potest elatus, avunculum adiit, rem secus, quam gesta fuerat, narrat, Pontificem, ceteroquæ sanctissimum, in Alexandrum, & in totam ejus domum, incendit, inflammat, incitat. Quo facto, palam elato, cuncti, tum, ut a Guastavillano gratiam inirent, tum ut Alexandri ejusdemque domus florentem fortunam everterent, ad eum opprimendum consenserunt. Ac primum Pontifex Cæsarem, Glorierii patrem, Brevium conficiendorum munere ac loco, quantum potest, eiecit, causatus, nescio quid, de re admodum gravi, ab eo esse conscriptum, quod non ipse jussisset; tumque ille, purgandi criminis causa, chirographum, ipsius manu subscriptum, exhibuisset, in quo illud, quod inficiabatur, præcepisset, Pontifex, acceptum, sua manu, ante ipsum conscidit, ac plures distraxit in partes; credo (neque enim existimare aliud licet de tam suavi Pontifice, & in manifesto scelere deprehensos reos etiam misericorde) quod inimicorum calumniis, & iracundia, de mente consilioque deductus, arbitraretur, literas illas adulterinas esse & ab ipso corruptas. Tum Alexandro Cameræ clericatum ademit, atque alteri concessit; deinde Secretariatus Apostolici munus (quo illi ejus recuperandi spes omnis adimeretur)

ere

creptum Collegio Secretariorum addixit, vetuitque publicis literis, ab eo unquam distrahi ac divelli: præterea, bona eorum omnia, quæ inveniri poterant, hastæ subjicienda, eorumque præcia ad ærarium referenda curavit. Quid multis moror? beatus erat, qui aliquid excogitasset, quo illi fama, vita, ac fortunis everterentur; deque eorum capitibus quotidie comitia fiebant, in domo cujusdam Andreæ Martini, Card. Camerarii scribæ. Atque actum de illis omnino fuisset, nisi Hypolytus Estensis, & Ferdinandus Medices, Cardinales eo tempore potentissimi, eorum patrocinium suscepissent. Nam unus magnam illorum pecuniam, domi suæ celatam, faucibus illorum eripuit, qui eam jam spe & opinione devoraverant; alter cavet, ne iniquo aliquo judicio, eorum sanguis exsorberetur; & clam eos Florentiam misit; ubi tam diu commorati sunt, quam diu rerum potiti ii, qui ipsis negotium periculumque facesserant. Incitabat etiam viros illos principes ad afflictam eorum fortunam sublevandam, Alexandri fratris uxoris misericordia, quam nulla tunc temporis in Italia, atque ausim dicere, toto orbe terrarum, pulchritudine corporis, oris venustate ac gratia, vicit; quæque tum omnium oculos ad spectaculum sui conversos habebat. Gregorio igitur intra paucos menses, quum hæc gesta erant, e vivis crepto: ac Felice Peretto Cardinali a Montealto, Sixti V nomine, in ejus locum subrogato, Romam redierunt, petieruntque supplicibus ab eo libellis, ut causam ipsorum susciperet, eamque æquioribus judicibus, qui nullius neque auctoritate neque gratia neque potentia moverentur, cognoscendam traderet. Qui æquitate postulati permotus, totius cognitionem causæ, Auditoribus Rotæ Romanæ permisit. At illi continuo non varie, sed cunctis sententiis, judicarunt, iniquo judicio fuisse illos oppressos, ac propterea in veterem fortunæ ac dignitatis locum restituendos esse. Quæ sententia perpetuis consignata literis extat. Quod omnibus exemplo debet esse, qui Rempub. tenent; ne videlicet quidquam in potestate committant, quod postea alter, qui illis successerit, auferat, atque irritum jubeat esse. Sixtus igitur, de sententia judicum, restituit illis omnia, quæ loco

mo-

moveri non potuerant, quæque ærarium non absor-
buerat; Clericatum vero Cameræ, quia legitimus Cle-
ricorum numerus constabat, neque eum augeri fas erat,
non continuo reddidit, sed in eorum consensu tantisper
supra illorum numerum expectare eum voluit, dum eo-
rum aliquis vel morte surreptus, vel ad ampliorem or-
dinem evectus, locum unum vacuum, in quem ille suc-
cederet, faceret. Neque fuit illi diu expectandum. Nam
celeriter eorum unus, ut sunt omnes res humanæ incon-
stantes ac variz, morbo naturæ debitum solvens, nume-
rum ac locum, quem ille impleret, liberum inanemque
reliquit. In veterem igitur dignitatis locum restituto,
mandaverat illi Pont. ne se Card. Guastavillano, a quo
tam insigni fuerat injuria laceratus, iratum ostenderet,
sed eum sæpius, honoris gratia, inviserat, sectaretur,
coleret, denique officiis omnibus prosequeretur. Cum-
que Pontifici, dicto audiens esset, venit in mentem Car-
dinali, eorum obliſo quæ fecerat, petere ab eo, quid-
nam esset actum, quamobrem tantam in se malorum
molem attraxisset. Qui rem illi omnem ordine, ita ut
erat gesta, narravit. Tum Cardinalis: Profecto, inquit,
tanta indignus calamitate fuisti; non modo enim a cri-
mine, verum etiam, quantum audio, a conscientiz su-
spicione abfuisti. At nihil propius est factum, quam ut
Alexander, quodam animi dolore incensus, hæc in
eum oratione inveheret: Nonne tibi patet, me in o-
dium & in crimen injustum fuisse vocatum, cum o-
mnes in me crudelitatis tuæ aculeos erexisti? Sed bilem
continuit, ne in aliquam Pontificis offensionem incur-
reret. Ea igitur, quam diximus, calamitate perfunctus,
rursus ad ingenium rediit, ac novis se implicuit æru-
mibus. Erat Cardinalatus honoris avidissimus: quem cum
non posset adipisci, palam querebatur, illum indignis
deferri, se autem malle, salva existimatione sua, quovis
vili redimiculo caput cinctum gerere, quam, aliqua ad-
sperſum infamia, regio illud diademate redimitum ha-
bere. Quod, illis delatum, qui ejusmodi querimonia de-
signabantur, magnam ipsi apud nos offensionem attulit.
Sed ea res causam in primis suam jugulavit. Præfectu-
ram annonæ administrabat, quæ ne Urbi Romæ de-
ef-

esset, Farnesius Principibus est conatus obistere, ne frumentum, quod in suis agris exarassent, externis mercatoribus venderent, qui illud extra ditionis ecclesiasticæ fines asportarent. Quod principes illi cum apud Clementem VIII quererentur, qui jam affinitatem cum illis meditabatur, ac sibi injuriam fieri dicerent, quoniam id ipsis, ex summorum Pont. privilegiis, licitum esset, Clemens Alexandrinum, ad se vocatum, graviter verbis accepit, admonuitque, ut conatu desisteret, nisi vim suam vellet experiri. Quibus ille auditis, animum despondit, eaque ægritudine, non ita multis post, mensibus an diebus? repentina morte decessit. Frat omnino vir probus, sed nimium iis deditus, quos eximios habebat; hos locupletabat, horum studiis obsequabatur, iis in se imperium esse volebat, idque ab omnibus animadverti scirique, summa ope cupiebat.

xv. D. PETRUS NICOLAI.

Antiquissimus clarissimusque Canoniorum regularium Ordo, jam inde ab Apostolicis temporibus, ut ejus historię tradunt, tanquam a capite, ductus, & usque ad hæc tempora permanens, omnibus plane seculis, magnum, in omnium virtutum genere, præstantissimorum hominum numerum, Ecclesiæ Catholicæ genuit; quorum alii in concionibus ad populum, Christianæ eloquentiæ fama, clari ac magni sunt habiti, alii in publicis Italiæ Gymnasiis, ob insignem humanarum divinarumque rerum scientiam, multitudine discipulorum floruerunt, alii etiam politissimis & elegantissimis illis studiis, quæ ab humanitate sibi nomen asciverunt, præditi, celebre atque illustre suum nomen reddiderunt. Verum, ex iis omnibus, qui in earum virtutum, de quibus diximus, laute versati sunt, haud scio, an quisquam, singularis ingenii dotibus, D. Petro, ejusdem familiæ Canonico, antecesserit. Ita, quæ disperse in singulis ornamenta miramur, in eum omnia confluxerant. Hic S. Romani, tenuis, agri Lucensis, pagi adeo obscuro ortus est genere, ut ne cognomen quidem haberet, quo ab aliis, qui ejusdem essent nominis, distingueretur; ita-

itaque fuit illi necesse, a parente, cui Nicolao nomen erat, mutuum illud accipere: atque Petrum Nicolai, hoc est, Nicolai filium, appellari se voluit. Verum, natura, quæ in tribuendis ingeniis, non generis claritatem, non opes, non divitias, non potentiam cujusquam sequitur, sed ea in materiam ad excipiendum idoneam; tanquam in agrum novatum iteratunque, disseminat, eam illi ingenii viam, amœnitatem docilitatemque largita est, ut in illo excolendo, si eam, ut par erat, industriam adhibuisset, nihil illo fuisset in virtutibus excellentius. Educatus est, in domo Seminarii Lucensis, ibique a magistris, omnibus illis literis eruditus, quibus puerilis ætas informari ad humanitatem solet. Neque solum Latine scribendi elegantiam, incredibili celeritate accepit, ut orationes componeret, ac versus, quibus legitimus numerus constaret, effunderet; verum etiam Musicæ didicit, qua, versibus Etruscis, quos summa etiam felicitate condebat, modos faceret, quos ad chordarum sonum numerumque cantaret una cum condiscipulis illis, qui erant canendi arte eruditi; ac visus est sæpenumero ex tempore cantiunculam aliquam edere, eidemque, una atque eadem opera, modos lepidissimos addere. Annos circiter septendecim natus, sanctissimas antiquissimi honestissimique Canonicorum Regularium Lateranensium leges & instituta amplexus est, eorumque tyro habitum induit; tyrocinii tempore expleto, in Philosophiæ primum, tum in Theologiæ curriculum prodit; quod tantæ cum laude confecit, ut vix illud expleverit, quin aliis dux fuit, qui in idem studium ingrederentur; multosque annos in publicis Gymnasiis, magno cum plausu, earundem facultatum doctoris & magistri functus est munere; adeo ut Patavinæ, in quartam urbem domicilium est literarum, ad se illum attraxerint, ut ibi iis docendo instituendoque præesset, quibus ad intima sacræ Theologiæ arcana perveniendi penetrandique studium foret. Et in iis, qui ad ejus se ductum aggregaverunt, quorum magna erat multitudo, numeratus est etiam D. Andreas Fossa Genuensis, qui postea omnibus tum doctrinæ tum naturæ dotibus instructissimus, summum in verbis Dei concionatoribus ac divi-

narum rerum interpretibus locum obtinuit, atque omnibus aniplissimæ suæ familiæ muneribus egregie functus, nunc Genuensi Canonorum sui Ordinis cœnobio, Abbatis nomine, præest. Sed ut ad Petrum Nicolai, a quo paululum digressa fuerat, revertatur oratio, inter Scraphicos allectus est, quodrum Academia Patavii, ingeniorum claritate ac numero, in primis Italiæ enitebat: in qua etiam placita quædam, seu positiones, quas Dialectici & Rhetores vocant, ex cantico *Te Deum laudamus* excerptas, quas etiam typis impressas edidit, eo hominum cœnsursu & approbatione tuendas suscepit, ut nihil tum temporis esset, quod magis omnium linguis atque sermonibus celebraretur. Quid multa? propter ejus singulare ingenium atque doctrinam, sermo erat omni populo. Huic versatile ingenium, quemadmodum de Porcio Catone tradit Liviùs, ita ad omnia fuit, ut natum ad id unum diceres, quodcumque ageret. Summorum Theologorum Philosophorumque, ut D. Thomæ & Scoti, Aristotelis & Pendaſii, inter se contrarias discrepantesque sententias, pari ingenii acumine ac subtilitate, cum voluntas ejus ferret, tuebatur. Nihil est in aliqua disciplina adeo abstrusum atque reconditum, adeo angustis & concisis disputationibus illigatum implicatumque, quod, si in illud se mente & cogitatione conjecisset, apertum explicatumque ipsi non fieret, quodque auditoribus suis, ut ita dicam, mansum confectumque, ut nutrices infantibus pueris, quasi in os non insereret, adeo ut nemo esset ingenio, ita tardo, ita obtuso, qui non illud sibi traditum intelligentia acciperet. Abdicavit se munere docendi, invidi cujusdam inſidiis expetitus, atque studium & opcram suam contulit ad conciones de divinis rebus ad populum habendas. Cujus consilii eventus adeo illi ex sententia successit, ut in omnibus præcipuis Italiæ civitatibus, apud quas verba fecit, summi semper oratoris locum numerumque obtinuerit, ac Lucæ in Æde S. Michaëlis, omnium ejus Urbis celeberrima ac religiosissima, concionibus quotidie habendis, ita unius Quadragesimæ curriculum confecit, ita omnis elegantia doctrinæ, verborum splendore & copia, ita voce, gestu, omnisque actionis lepo-

re ac suavitatem, populum illum tenuit, ut neminem unquam, eò loco dicentem, magis sit admiratus; ac senes, qui omnium meminissent, qui ad eam diem ibi verba fecissent, dixerint, a se neminem esse auditum, cujus eloquentia literis esset instructior, ac vocis motusque suavitatem conditor. Denique ingenii felicitate illud assequeretur, ut, quaecunque in partem se daret, evaderet omnium facile princeps. Plures edidit orationes, tum Latina tum vernacula lingua conscriptas, variis a se temporibus habitas. Elegias, epigrammata, odas, atque alia Etrusca poemata, fundebat ex tempore: ac, si calamum ad scribendum sumebat, verba ac sententiae, non sine cultu ac nitore, vix vocatæ, sub acumen styli subibant. Erat Græcis literis doctus, Hebraicarum autem usque copertus, ut non dubitaverit, in Æde S. Frigidiani, sui Ordinis, insignem quandam Legis Mosæicæ doctorem atque magistrum in certamen contentionemque vocare; quem argutissimis suis disputationibus, tanquam laqueis, irretitum ita cepit, ut certaminis superior, omnium confessione, discesserit: ad quod certamen concursus dicitur e tota urbe factus esse. Ob quas laudes eam sibi virtutis opinionem famamque consecravit, ut, quamvis, ut diximus, tenui obscuroque erat ortus in pago, vulgo *magnus rusticanus* appellaretur. Neque procul a Republ. ætatem egit, sed partem ejus non minimam cepit. Quippe qui S. Frigidiani ejusque cœnobii Præfecturæ præpositus fuit; qui magistratus habetur in primis eorum, qui ab eo Ordine mandantur; & qui illum adeptus est, Episcopi in morem tondetur, Pontificio pallio atque annulo utitur, & honoris gratia, magnus Prior nuncupatur. In quo munere administrando, inveniutus est nequaquam ita felix. Namque iis se difficultatibus implicavit, unde expediri vix posset; iis conflictatus est ærumnis, quibus pene oppressus esset. Verum, emerfit aliquando, atque ad munus docendi, quo se abdicaverat, rediit. Itaque missus est Ravennam, ut ibidem alios sui Ordinis, iis artibus erudiret, quibus ipse longe multumque præstaret. Quas partes dum strenue agit, in comitiis suæ congregationis, ab iis, penes quos est eligendi potestas, Abbas, titulo tenus, eligi-

tur; qui honor non ita multis defertur: quorum ordo, quamvis nomine magis quam imperio, locum inter Abbates obtineat, tamen honorificus inter suos habetur, ac multarum rerum ininunitatem habet, qua perfruunturii, quos Doctores sive Magistros beneficiarios vocant. Ea tempestate Bonifacius Cardinalis Cajetanus provinciam Æmiliam, Legati imperio, obtinebat; cuius imperii sedes, ut ceterorum Legatorum, erat Ravennæ. Qui Petri ingenio ac moribus, prout ipse amabat literas, catenus delectatus est, ut eum sibi domesticum & familiarem adoptaverit, ut secum domum, quo properabat, adduceret, ejusque opera iis in rebus uteretur, quæ Theologi partes efflagitarent. Egressus Ravenna, ac Romam petens, voluit facere iter per Etruriam, contra amicorum omnium sententiam; qui, quasi præfagiret illis animus, id ei incommodum eventurum iter, omnes uno ore erant auctores, ut Etruriam fugeret, & suos videndi salutandique cogitationem saluti suæ postponeret. Sed vicit amor suorum ac patriæ, & in pagum S. Romani se contulit. Nec vero aliter atque prædicta fuerat, res illi evenit: nam vix e patriæ finibus foras pedem extulit, cum in itinere diem obiit supremum; neque absuit suspicio, eundem fuisse veneno sublatum, in albis aliquot ex saccharo orbiculis accepto, ab eisque tradito, quos non solum nulla privatim læserat injuria, sed insuper multis magnisque beneficiis affecerat in magistratu quem gesserat, & quorum causa eam in se malorum vim, qua pene fuerat oppressus, attraxerat. Itaque, vix major annis quinquaginta, arbor illa, dum maxime ad omnium virtutum laudes effloresceret, & maximi ex ea fructus expectarentur, iniquorum hominum scelere, si vera est fama, recisa, exaruit.

XVI. ANTONIUS BUCCAPADULIUS.

SI Romanis hominibus, in sua civitate, ubi sita est arx veræ germanæque religionis, ubi Latini ritus majestas, tanquam in suo regno, sedem ac domicilium habet, laudi daretur, quod Latine, pure, dilucide, elegantique loquerentur ac scriberent, si munera illa, quæ
elo-

eloquentis cujuspian hominis requirunt industriam, iis deferrentur, qui eloquentia cæteris antestarent; quis dubitat, quin multi semper existerent, qui cum veteribus scriptoribus conferri dicendi gloria possent? Verum, cum videamus, nihil fere iis esse contentius, qui totos se in hoc studiorum genere collocarunt, ut etiam, contumeliæ causa, pædagogi nomine afficiantur; cum in eorum honores ac præmia ii cernantur invadere, qui nondum, ne suspicione quidem, assequi potuerunt, quænam sit ratio puri, dilucidi, Latineque sermonis, immo qui vix primoribus labris gustarunt Latine Grammatices studia, & extremis, ut dicitur, digitis attigerunt, cumque, ut ea, quæ scriberent, & casibus, & temporibus, & genere, & numero conservent, multis egent pædagogis: quid mirum, si Romanorum hominum, quod ad eloquentiæ laudem attinet, spes infringatur, & languescat industria? *Honos, inquit ille, alit artes, omnesque incendimur ad studia gloriæ; jacentque ea semper, quæ apud quosque improbantur.* Quod si nostra ætate unus aut alter homo Romanus, Latine scribendi laude perspicuus, eo est in loco conspectus, qui huic præsertim arti studioque debetur, hic non tam sui artificii meritis, quasi viribus, ad eum pervenit, quam potentioris cujuspian auctoritate & gratia, quæ ad honores, etiam eos, qui industriz debentur, consequendos plurimum valet, tanquam machinatione aliqua, est ad eundem attractus. Sylvium Antonianum in Urbe natum Clemens VIII, magis recte scribendi laude & celeritate, qua superior erat cæteris, quam longo cum ipso amicitiz & consuetudinis usu, ad Latinas literas scribendas adhibuit: similiter Gregorius XIII, hanc eandem provinciam Antonio Buccapadulio demandavit, amicitia, quæ cum ipso intercedebat, impulsus. Atque hic Antonius, ab origine ultima, stirpis Romanæ, nobili inter suos ortus est loco, (etenim Buccapaduliorum familia non in postremis Urbis Romæ numeratur) patre usus est diligente in ipso erudiendo, & eoque magis, quod ille summam in puero ingenii docilitatem, & in percipiendis iis, quæ tradebantur, celeritatem, agnoscebat: cujus ingenii magnitudinis erant in-

dicio quidam eloquentiæ quasi igniculi; qui in eo, etiam tum puero, elucebant. Utenim, quemadmodum probe inquit Cicero, hominis decus, ingenium, sic ingenii ipsius lumen est eloquentia: ad quam cum se a natura ferri sentiret, simul ac doctrinis illis, quibus puerilis ætas impertiri solet, eruditus, excessit ex ephebis, cum sibi eloquentiam, quasi sponsam despondisset, noluit eam indotatam habere, sed ad magistros Philosophiæ ac Theologiæ se contulit, ut eam, ab iis, sponsæ, quam sibi delegerat, dotem arcesseret. A quibus, satis habuit, earum scientiarum fontes & capita noscere; ut inde postea hauriret tantum, quantum esset necesse ad suam eloquentiam ornandam instruendamque. Quæ eloquentia, cui a parvis initiis orta, maturitatem suam adepta esset, non eam ille domesticis parietibus inclusam aluit, sed foras eduxit, ac sæpe multis audientibus, quanta ea esset, aperuit. Sed cito intervenit Gregorius XII, qui illum, ab omnibus aliis exercitationibus abductum, ad conficiendas Pontificias epistolas, quibus Brevium est nomen, adduxit; quarum concinator, Secretarii domestici nomine, insignitur. Ad quas scribendas, tantam primum eloquentiam attulit, quantum nemo alius ante ipsum, qui in eodem munere versatus sit; tum magnum sacrarum literarum usum, quarum verba atque sententias, ita scite in suis epistolis illicabat, ita apte iis locis, quibus opus erat, includebat, ut ex ad illam rem natæ viderentur; tum, singularem prudentiam, qua nullum in illis verbum collocabat, nullum dictum ex ipsius dictantis ore exhibat, quod iure reprehendi posset; postremo, illud orationis genus adhibebat, quod Pontificiam maiestatem, eorumque, ad quos literæ dabantur, conditionem ac dignitatem deceret. Nec fuit illi magnopere desiderandum in eo munere, ut insignis aliqua ingenii prudentiæque sibi suæ declarandæ occasio atque materia objiceretur. Nam Gregorio Pontifice, qui tredecim annis Ecclesiæ navis in puppi sedens, ejusque gubernacula retinens, e multis eam scopulis auctoritate sapientiæque eripuit, multæ ac graves sese dederunt: ut, cum magnus militiæ Hierosolymitanæ Magister, pluribus maximis criminibus

accusatus, Romam fuit evocandus, ut causam diceret: quæ de re, multa ad Reges, ad Respubl. ad Dynastas, brevia scribenda ac mittenda fuerunt: quæ ego, Marcelli Vestrii opera, ex Sedis Apostolicæ tabulariis accepta, ita legi, ut neminem unquam de rebus, ad summam Reipubl. spectantibus, scribentem, magis sim admiratus. Qui magnus Magister, me puerulo, utpote non amplius quinque annos nato, Romam venit, regali prorsus apparatu, ab Hippolyto Card. Estensi hospitio exceptus; apud quem etiam, sive ægitudine, sive alia vi morbi oppressus, vivendi finem fecit, atque delatus est in Ædem D. Ludovici, nationis Gallicanæ, ea funeris pompa magnificentiaque, qua nulla postea Romæ major neque amplior est visa: nam, quantum incuntes illius ætatis retinere memoria valuit, quantumque meminisse possum, præter omnes Laicorum Sodalitates, præter omnes religiosorum Ordinum e mendicato vitætantium familias, præter Sacerdotes, superpellicii indutos, quorum incredibilis erat numerus, longus atratis in equis sedentium ordo conspiciebatur, quorum partim tubis dissonis atque discordibus, ac lætum maxime præferentibus, canebant, alii longissima ex serico vexilla trahebant; hos subsequabantur, non minus multo pedites atrati, qui tympana, fractum ac discordem sonum edentia, pulsabant; plerique vexilla item alia ex serico post se trahentes, lugubrem oculis afferebant aspectum: & quoniam eo die lutulentæ erant ac corruptæ itineribus viæ, erat mihi ægre, ut puero, tantam vini sericæ vestis infici, lutoque corrumpi: accedebant deinde, si recte memini, omnes illi Hierosolymitani equites, qui Magistrum suum ac ducem, honoris officique gratia, Romam comitati fuerant, quorum non parvus erat numerus, longis syrmatibus, quacunque incedebant, humum, insectam cæno, verrebant: funeralium vero, quæ defuncti læctum, auro tectum, hac illac complectabantur, ea vis erat, ut viæ, quibus funeris pompæ iter erat, non collucere sed ardere viderentur. Sed quid frustra tempus in his rebus referendis conterimus, quæ nihil ad rem, de quâ agimus, pertinent? Redeo ad Antonium, cui, Gregorio extincto, Sixtus V, qui illi

in Pontificatu successerat, scribendarum epistolarum munus, quod tanta eloquentiæ fidelitatisque cum laude ob-
eundo administraverat, abrogavit, ac Thome Gualteru-
tio, qui omnium Brevium conscribendorum provinciam
acquisierat, mandavit; homini elato, ac pertinaciter suo
juri sententiæque addicto, cujus eorum, quæ diceret (nam
sepius cum in Sodalitiis verba facientem audivi,) quam-
vis admodum attenderem, quæque scriberet, nunquam
potui quidquam intelligere; ita confusa erat oratio,
ita perturbata, nihil ut esset primum, nihil secu-
dum. Sed hic non diu lactare se potuit; etenim, non
ita multo post gravi in crimine, quo Pontificis summi
majestas lædebatur, deprehensus, pœnas legibus dedit,
ac tum munere, tum pecuniis, quibus illud compara-
verat, quæ erant magnæ, evêrsus petivit; & in ejus locum
subrogatus est Jo. Baptista Canobius. Sed Sixto morte
sublato, rursus Antonius a Gregorio XIV est revocatus
in cursum, ac tenuit locum, unde fuerat depulsus,
fere tandiu quam vixit. Fuit etiam Basilicæ Aposto-
lorum principis, Canonicus; ei que muneri assiduitate,
ac diligentia, quoties per occupationes publicas licebat,
non defuit: præterea moribus integerrimis atque mi-
tissimis.

XVII. JOANNES BARCLAJUS.

URbs Roma, domicilium quondam Imperii, eloquen-
tiæ atque omnium bonarum artium sedes, ac to-
tius miraculum orbis, cum, frequentibus barbararum
nationum in Italiam incursionibus, non semel, sed sæpe
diruta atque vastata, non solum, præstantissimam pul-
cerrimamque, qua miraculo erat omnibus, faciem,
majestatem imperii, liberam sui aliorumque regendo-
rum potestatem, amisisset, verum etiam (o rerum hu-
manarum inconstantiam!) elegantium disciplinarum
studia, eloquentiæque laudem abjecisset, qua primum
una Romani, omnium gentium victores, a victa Græ-
cia, superabantur; deinde, summorum illius orato-
rum, Periclis, Æschinis, Demosthenis, dicendi glo-
riam, M. Antonii, Lucii Crassii, Q. Hortensii, Marci
Ci-

Ciceronis virtute, si non superarunt, certe adæquarunt, Latinum quoque sermonem, in quo formando exponendoque tot doctissimorum virorum ætates videmus fuisse contritas, oblivioni mandavit, atque alia lingua, ex multarum colluvione linguarum conflata, loqui cœpit. Qui sermo Latinus, quasi fato suo functus, in ipsis Urbis ruinis, ut ita dicam, sepultus per multa secula jacuit: sed conati sunt primum, tanquam ab inferis mortuum, excitare, Dantes Aldigherius, Joannes Boccacius, Franciscus Petrarca; nec infelici successu. Sed ii postea, mutato consilio, maluerunt eam linguam, in qua nati erant, quamque una cum lacte nutricis suxerant, vocibus angere, figuris dicendi ornare, & ad perfectionem absolutionemque perducere, quam in ea lingua, ex veterum scriptorum libris, quos bellorum calamitas reliquos fecisset, tanquam ab Orco revocanda, operam perdere; in qua colenda, & naturali illius puritate nitoreque persequendo, bene cum illo agatur, qui cuiuspiam ex veteribus scriptoribus proximus, sed longo intervallo tamen proximus, accesserit. Deinde venit illis in mentem, quod Horatius, de se ipso ac de iis, qui Græcos versiculos facerent, inquit, non minus eos insanire, qui magnas Græcorum mallent implere catervas, quam qui in silvam lingua ferant; his nunc similes eos esse ex nostris, qui, cum ad scribendum se conferunt, malunt Latinorum scriptorum, quorum magnus est numerus, quam suorum cumulum augere. Itaque illi, ingenio iudicioque, quo præstabant, tum soluta oratione, tum versibus, vernaculum ipsorum sermonem, ejus principes copiz atque inventores, eo perduxerunt, quo nemo adhuc potuit pervenire, ac ne fortasse quidem perveniet, quamvis egregii complures tum poëtæ tum oratores extiterint. Latuerunt deinde, post hos Latinæ literæ non paucos annos; sed rursus Nicolao V Pont. a nobilissimis ingeniis excitatæ revixerunt. His alii successerunt, usque ad nostram ætatem; neque unquam Latio Latinus scriptor egregius aliquis defuit; sed tam pauci ex nostris huic studio operam suam dederunt, sive qua magni laboris res sit, sive quia nullus illi honor habeatur; ut in illud, tanquam in possessionem nudam ac va-

etiam, exteræ nationes invaserint; ac fere omnes, qui dediti literis sunt, de ea re, quam tractant, copiose eleganterque perscribant; neque quicquam illis deesse video præter unum, quod non est eorum, urbanitate quadam quasi colorata, oratio. Duos tamen excipio oratores externos, Petrum Joannem Perpiniānum Hispanum, & M. Antonium Murtum Gallum; quorum in orationibus recinit quiddam & resonat adeo urbanum, ut in Romana civitate nati, non autem in eam asciti, videantur. In iis, qui extra Urbem Romanam, atque adeo extra Italiam, Latinis literis studium suum dederunt, Joan. Barclajus numeratur; cuius ego legi Argenidem, & partem etiam Euphormionis degustavi tum, eum nondum lata lex erat, ne bibliopole cuiquam liceret eum vendere, aut cuiquam domi habere ac legere. De cuius operis stylo, operæ pretium est agnoscere, quid scribat auctor anonymus; qui quanquam nomen suum & patriam non indicet, tamen peregrinum eum esse apparet. Ita enim ait: *Latinitas quoque ipsa Romanas aures peregrinitate radit, & veteris puritatis sapore imbutum palatum offendit.* Vere an secus id sit Barclajo ab illo, qui se ejus amicissimum profitetur, objectum, non est meum statuere, sed eorum iudicio relinquo, qui diutius ac diligentius sint in ejus scriptis, quam ego, versati. Verum ille patre natus est Guillelmo Jurisconsulto, Scoto, ex vetere ac nobili in Scotia Barclajorum familia, sed non ita multis ante annis, sive fortunæ, sive hominum vitio, ex florentissimis rebus ad summas rei familiaris angustias prope redacta. At Guillelmus, cum videret, non posse se honeste in patria vivere, aliam urbem, aliam civitatem persequi statuit; atque in Galliam venit, ut ibi liberali aliquo artificio ætatem suam tueretur. Erat tum annos natus triginta, ac vix tantum literarum attigerat, quantum prima illa puerili institutione potuerat. Nam totam adolescentiam, ac primos florentis ætatis annos, in aula Regis Scotiæ, inanibus aulicorum officiis edificendis persequendisque, contriverat. Avarici igitur Biturigum, in celebri illo Gymnasio, cum vellet facultatem aliquam addiscere, quæ suis cultori fructuosa esset; ad jurisprudentiam animum ad-

adjecit, atque Jacobo Cujacio, cui tum primæ in Gallia ejus facultatis, quam profitebatur, deferebantur, operam summo studio ac diligentia dedit. Nec sui eum laboris industrizque pœnituit: etenim, Cujacio ipso iudice, tantos in Jure civili progressus fecerat, ut ab eodem Juris civilis publicæ quovis in Gymnasio interpretandi potestatem acceperit. Ex discipulo igitur magister effectus, P. Edmundi Hayi, Societatis Jesu, illius avunculi, opera, qui tum plurimum auctoritate & gratia valebat, impetravit, ut in Mussipontana Academia, quam Dux Lotharingæ, tanquam mercatum bonarum artium, aperuerat, eam disciplinam aliis traderet, quam a Cujacio, summo doctore, acceperat; hoc est, ut Jus civile doceret. Ibidem est illi res, uxor, liberi inventi; Joannes nimirum Barclajus, qui nunc nobis est propositus: hunc enim solum sua ex uxore accepit; qui, sibiul ac ætas disciplinæ patiens fuit, a parentibus, Patribus Soc. Jesu erudiendus est traditus. Qui Patres, cum in puero summam ingenii docilitatem, qua celeriter acciperet quæ tradebantur, aspicerent, eumque longius æqualibus omnibus præcurrere animadverterent, illi, utpote quos fama est optimorum ingeniorum aucupium facere, (quod nec piorum, & intelligentum quisquam vitio ipsis vertit,) summam dederunt operam, ut in suo eum numero haberent: atque adeo concinnaverant aream, adeo quasi cibum offuderant; ut nihil propius sit factum, quam ut eum caperent. Et sane cepissent, nisi parentes, qui rem fuerant odorati, quibus ille erat unice unicus, obstitissent, atque aucupum consilia disturbassent; discedentes denique una cum filio jam grandiore; commodum, cum Rex Scotiæ Jacobus, Regni Angliæ, quod hæreditario ad ipsum jure pervenerat, possessionem esset adeptus. Itaque in Angliam se contulerunt: magna enim in spe erant, novi Regis adventu, Catholicam Religionem omnibus illic malis atque periculis, quibus exagitata fuerat, fuisse perfunctam, simulque apud Regem illum, & ipsum non ineruditum, locum bonis artibus fore. Neque, ad bonas artes quod attinet, Guillelmus est opinione sua deceptus. Est enim honorifice a Rege exceptus, & ad Consiliarii dignita-

tem

tem magnis stipendiis vocatus : sed ad religionis in-
 luminitatem quod attinet, ad spem inanem se fuisse devo-
 lutum sensit. Quam postquam in dies magis inagisque
 extenuari atque evanescere videt, quia erat avitæ reli-
 gionis retinentissimus, maluit, quæ a Rege offereban-
 tur, repudiare, quam vel in minimam suspicionem reli-
 gionis desertæ venire : ac statuit, inde, quantum po-
 test, sese surripere. Annum tum agebat Joannes deci-
 mum septimum, cum de Regis inauguratione elegan-
 tissimum carmen edidit, maximo verborum sententia-
 rumque splendore illuminatum : quod lectum Rex ad-
 eo probavit, ut summa ope a parente contenderit, fi-
 lium secum ne abduceret, sed apud se eum esse pateretur ;
 quem constituerat opibus & honoribus locupletare atque augere. At pater, metuens, ne filius, ut sunt
 adolescentum animi molles, & ætate fluxi, dolis cape-
 retur, & a veræ religionis cultu abduceretur ; redu-
 xit eum in Galliam, ut ibidem tantisper cum ipso ma-
 neret, quoad catholica fides altiores in ejus animo ra-
 dices ageret, quam ut ulla vi labefactari convellique
 posset, ut eum postea optimis doctrinis adversus im-
 proborum impetus vallatum munitumque, ad Regem
 remitteret, qui collapsæ familiaris decus instauraret, ac
 majorum suorum loco restitueret. Sed Parisiis, dum se-
 cundus aliquis fortunæ status ostenderetur, quò vela da-
 ret, expectans, ab Andibus, optimis conditionibus evo-
 catur ; ut in ipsorum Gymnasio primariam Juris civilis
 cathedram obtineret. Ubi cum jam quinquennium do-
 cuisset, est mortuus. At Joannes filius, noluit præstan-
 tissimum ingenium, mitioribus Musis aptum, ad juris-
 prudentiæ studia conficere ; quæ cum spinosiora, atque
 ab omni fere delectatione magis vacua, quam cogita-
 verat, esse comperisset, convertit se ad satyram, Petronii
 Arbitri exemplo, scribendam ; ubi & principum
 omnium aulas, quas partim ipse vidisset, ut Gallicanæ,
 Anglicanæ, Belgicæ, Lotharingicæ, partim ab aliis
 commemorari audivisset, ut Romanam, Hispanam,
 Cæsarianam, earumque vitiosos aulicorum mores, ele-
 ganti sane stylo, perstrinxit : tum, magna spe imbutus,
 profectus est in Angliam ad Regem, quò cum parens, sed

sed natu grandioſem, deſtinaverat. A quo exceptus eſt humaniſſime, breviſque in intimam ipſius familiari-
tatem perductus; quod jam pridem eam, quam in ado-
leſcentulo ingeniū virtutiſque aſpexerat indolem, ad-
amaſſet; atque ab epiſtolis, & conſiliorum omnium
participem; habuit. Utrum autem, apud Regem, in-
corruptam catholicam religionem ſemper conſerva-
verit, vel ſaltem, ſi non animo, ſpecie tenus hæretico-
rum ſe erroribus oblinierit, incertum eſt mihi: illud
autem certum, catholicorum omnium in Anglia fuiſſe
opinionem, Regem illum in eo libro, cui titulus eſt,
Funiculus triplex, & curiſculus triplex, componendo,
uſum fuiſſe Barclajo adjuſore atque magiſtro: nam
Rex, quamvis literas adamaret, vix leviter illis tinctus
exiſtimabatur; aliquam tamen de ſe literati viri opinio-
nem faciebat, quod eruditorum ingeniis delectaretur,
iisque faveret. Ibi Barclajus, ex uxore, quam habebat,
maſculam prolem ſuſcepit. Sed aliquanto poſt, ſive
cum deſertæ veræ religionis, ſi tamen eam deſcendit, pœ-
nitentia ſubierit, ſive Card. Bellarminus, qui Regis li-
bro reſpondit, quemque illius dicta firmiſſimis, validiſ-
ſimisque rationibus convellere ac labefactare videbat,
de falſa quam imbiberat opinione dejecerit, rectum ad
ingenium rediit; & clam ex Anglia, una cum uxore &
filio, ſe fuga ſurripuit, ac Romam venit, ubi cum pro-
eo, quod ex Euphormione, quem ediderat, celebratum
ejus nomen eſſet, eſt ab omnibus humaniter exceptus,
& a Paulo V, qui tum Romanam Eccleſiam Pontifex
adminiſtrabat, bonis omnibus, quibus ſponte ſe exuerat,
amiſſis, in victu, veſtitu, ac ceteris omnibus ad vitam
neceſſariis, magnifice ac liberaliter habitus. In cujus
etiam gratiam, atque ut oſtenderet, verè & ex ani-
mo, non autem per ſimulationem aliquam pietatis er-
rores, quos falſa opinione imbutus ac ſua privatus imbi-
berat, ejeciſſe; librum adverſum ſectarios docte erudi-
teſque conſcripſit, & in lucem edidit. Eadem ingeniū
ſœcunditate peperit egregium illud opus, Argenida nō-
mine, quod & argumenti novitate & verborum ſplen-
dore, ac rerum varietate, tantum commendationis ha-
buit, ut mulierum etiam, quæ illud miris in cœlum lau-
di-

dibus efferrī audiebant, ad cognoscendum, quid illud afficeret, studia commoverit; adeo ut quidam quo animum illis expleret, in Italicum sermonem illud converterit. Per idem tempus contigit, ut M. Antonius de Dominis, Archiepiscopus Spalatensis, relicta Catholicorum militia, in Angliam ad hæreticorum castra confugeret, sive stomacho & iracundia vehementius adversus quosdam elatus, (hanc enim causam sui dementissimi consilii & facti afferebat; tanquam si aliqua causa justa cuiquam esse possit, contra fidem arma capiendi;) sive vitio depravatae mentis, sive, ut omnium tum erat opinio, ambitionis avaritizque studio, quod sibi persuasisset, se primas apud Regem illum partes in administranda Republ. habiturum. At Barclajus, qui & regionis illius mores & Regis consuetudinem nosset, egregio scripto, quod ego, ob ejus elegantiam atque prudentiam, mea manu descripsi, edicit, quemnam illa ejus profectio & fuga exitum esset habitura. Neque secus evenit, atque prædixerat: nam, cum Archiepiscopus sua se opinione ac spe deceptum intelligeret; coactus est Romam venire, ibique palinodiam canere, libello edito, in quo errores suos, qui fuerant pene innumera- biles, detestabatur. Id quod egomet vidi: namque in foribus Sacelli Pontificii, sua manu, Cardinalibus distribuit, quum Sacro absoluto discederent; adeo perfrecta fronte, ut si in Palæstinam ad loca illa religiosissima, Christi vestigiis impressa, perlustranda, non autem in Angliam ad bellum Catholicis inferendum, profectus fuisset. Ex eo tamen libello licet intelligere, quantum vir ille, ingenio, eruditione, & eloquentia, qua præstabat, proficere potuisset, si iis armis salutariter, ad tuendam, non autem ad oppugnandam orthodoxam fidem, uti voluisset. Sed non diu factum est, postquam ille Catholica Ecclesie restitutus fuit, cum signa aliquot dedit, quæ essent indicio, non illum veritatis amore, sed temporis gratia, hæresin abjurasse. Etenim multa dixit & scripsit, quæ improbum ejus animum, ab illis integumentis dissimulationis evolutum, ostenderent. Deinde manifesto deprehensum est, eundem, convasatis rebus omnibus, fugam ornare, ut rursus se in hostium castra reci-

reciperet. Quamobrem comprehensus, fidei quæsitorum iussu, coniectus est in carcerem, ut ibi de eo legibus fieret iudicium. Sed, antequam damnatus traderetur iis iudicibus, quibus ad supplicium a Quæsitorebus fidei publice, ut relapsi, tradi solent, ex ægritudine, quum ea, quæ cogitasset, scæda sibi atque aspera evenirent, coniectus est in morbum, quo celeriter occidit. Defuncti corpus depositum est, testibus præsentibus, apud Ædem sanctorum duodecim Apostolorum, ut ibi esset, quoad definitum aliter foret. Summa denique hæc fuit, ut anno cLs Is C XXV, qui erat annus jubilei, feriis sancto Spiritui sacris atque solemnibus, quo die insignes quidam sacrilegi, ac desertores religionis, hæresios damnati, in Ædem B. Mariæ Virginis supra Minervam, dedecoris ignominiaque causa, adducebantur, ut populo Romano spectaculo essent; eodem, inquam, die, illius cadaver, in eadem arca, in qua conditum fuerat, deportaretur, atque a lectore, qui fuerat excitatus, pronuntiatus magna voce capitibus hæresum, quibus prius ille se obliniverat, ac deinde rursus inquinaverat, continuo deferretur in forum, cui Campo Floræ nomen est, ibique igne tremaretur. Sed ut ad Barclajum, a quo paululum aberravit, revertatur oratio, Rômæ novam ex uxore sua masculam prolem accepit, ac cive uno Urbem nostram auxit. Quem cum sacro Baptismatis fonte abluendum curaret, Maphæum Barberinum Card. patrinum, seu ut olim loquebantur, patronum ac sponsorem adhibuit, quicum, similitudine studiorum ac voluntatum, magnus illi amicitia usque consuetudoque intercedebat; qui deinde, a Deo proximum, in terris, dignitatis locum evectus, Urbani VIII nomine, non modicæ illi utilitati & commodo fuit: nam & divitias & opes ac gratiam contulit, filiumque ejus majorem natu, & pingui sacerdotio locupletavit, & honorarii intimi cubicularii titulo cohonestavit. Ædes, dum vixit, habuit mercede conductas, Vaticano proximas, quibus erat hortus adjunctus, quem lectissimis floribus consererat; iis, inquam, floribus potissimum, qui non ex seminibus, vel radicibus, sed ex varii generis bulbis oriuntur; quæ florum genera, annis abhinc triginta, a not-

titia hominum aberant, nec fuerant Romæ conspecta, sed in summis Alpibus sine aliquo honore cultuque jacebant, præter hyacinthos & narcissos, e quibus grati suavesque odores afflantur, ceteri vero, specie tantum ac colore, nulla fere odoris suavitate, commendantur. Ex Alpibus igitur in Urbem allati, ob novitatem, tantum illis ab hominum cupiditate, precium statim accessit, ut bulbi eorum quidam, singuli, centenis & eo amplius nummis venierint: sed deinde, cum, humi positi, tam magnam ex se sobolem procreassent, jam ut nihil illis secundius inveniat, illorum pretia, quæ ita in altum ascenderant, sic conciderunt, ut nullorum fere florum plantarumque sit vilior annona. Itaque horum florum Barclajus studiosissimus cum esset, eorumque bulbos ingenti pretio coëmisset, accidit, ut nocte quadam ad unum omnes fuerint eruti atque subrepti, ab operis, ut ipsius opinio ferebat, quas pridie ejus diei, ad eos consecrandos, ipse conduxerat. Neque longius a similitudine veri abibat: illi enim probe noverant, quo unumquemque illorum loco sevisset, & signa ac notas locorum, memoriæ mandaverant, quibus cognitis, sibi ipsi foderent, & id quod vellent, parvulo labore, nullo errore invenirent. Illud quidem admirabilitatem maximam facit, quod, cum fures illi se per maceriem in hortum demitterent, non fuerint animadversi a duobus molossis, quos ibi in præsidio collocatos habebat: jam ut fiat mihi credibile, id quod sæpius audieram, nec ullo modo fieri posse existimabam, fures nocturnos, cum clam domum cujuspiam, furandi causa, se inserunt, canibus, si qui sunt ibi, beneficiis atque cantionibus, vocem, ne latratum edere possint, eripere. Denique, vir optimus, dignus qui diutius viveret, vel potius qui nunquam moreretur, lethali morbo correptus, munus illud implevit, quod necesse est omnibus exequi; videlicet mortem obivit, atque honesto funere delatus est in templum S. Honuphrii, in colle Janiculi, quo sæpe, dum viveret, aëris amenitatem salubritatemque secutus, se conserebat. At hæres sepulcrum illi, in Ede religiosissima S. Laurentii, via Tiburtina, ad dexteram ostii eximèrii, e marmore faciendum curaverat, eique ima-

ginem

ginem parentis, usque ad pectus, item e marino re scite factam, apposuerat. Quod sepulcrum, omni ex parte, par atque simile erat alteri ad lævam ejusdem ostii, quod Card. Franciscus Barberinus, Bernardo Gulielmo, magistro suo, excitaverat cum illius imagine usque ad pectus item e marmore. Quod uxor Barclaji, mulier tumido, ut aiebant, animo atque elato, cum vidisset, statim viri sui imaginem ex sepulcro illo, quod totum demoliri non posset, detrahi jussit ac domum suam afferri; quod acciperet indigne, cum, cui ipsa nupta fuisset, generis splendore clarum, sed ingenii & eruditionis fama clariorem, cum homine obscuro, ac nullius fere ingenii, & ut ipsa dicebat, pzdagogo, componi.

XVIII. PAULUS ÆMILIUS SANCTORIUS.

RESTE sane atque prudenter Isocrates, doctor singularis, cujus domus habita est quædam quasi officina totius Græciæ, eorum, qui se in disciplinam ipsi tradebant, inspiciebat diligenter ingenia, eaque ad id, ad quod erant apta, compellebat, neque sinebat, in eo operam perdere, in quo plane abhorrerent, & essent absurdum. Quod cum fecissent, conformabat perficiebatque in unoquoque, quod illius natura pateretur. Quamobrem Demosthenem, quem unum, divinitate quadam ingenii præditum, præ ceteris ad dicendum a natura factum videbat, ad causas agendas, atque ad populum concionibus tenendum, impulit, instruxit, armavit. Idem, cum Ephorum & Theopompum, quorum primum, quod verborum licentia, tanquam equulus, qui liberius evagetur, exultaret, frenis coercerebat, alterum vero, quod verecundaretur ac cunctaretur, calcaribus adhibitis, celerioribus ingenii moribus uti cogebat, quia eos melius historiam scribere, quam orare causas posse, intelligebat, præceptis ad illud scriptoris genus quam maxime necessariis erudit, in eisque in primis exercuit. Quæ igitur tempestate Gymnasium Romanum Soc. Jesu, & magistrorum, Perpiniani videlicet, Maffei, Tursellini, aliorumque nobilitate, ac discipulorum summi ingenii laude præstantium copia, florebat, tres adole-

Rr

scen-

scentes, una ferme omnes ætate, in omnium literarum genere, ac præsertim in his humanissimis liberalissimisque studiis, ceteris clarius exsplendescabant, Bernardinus Stephonius, Julius Cæsar Stella, & Paulus Æmilius Sanctorius. At non omnes omnibus in rebus, in pari laude, versabantur, sed in sua quisque arte erat alteri præstantior. Ac Stephonius vincebat ceteros carminum ejusque generis conficiendorum celeritate, ut non esset alter, qui plures versus, *sans pede in uno*, ut de Lucilio Horatius iuquit, effunderet: Julius Cæsar Stella, ad heroicum carmen a natura factus, considerata accurate diligenterque scribendi tarditate, promptam Stephonii in faciendis versibus celeritatem superabat; at Paulus Æmilius, ad scribendam historiam se a natura ferri compellique sentiebat. Itaque summi illi, de quibus diximus, magistri id conformabant in illis, quod natura ipsorum pateretur; ac Stephonii in componendis varii generis poematis, exercebant industriam, & in primis dabant operam, ut recideret sibi ille multa, quæ, sicut in vitibus, sese nimium profudissent, vel ut nitidius quædam currere elaboraret, quæ lutulentius effluerent. Stellam vero, qui limatius scribendi genus consecratur, a cohortatione sua non deserebant, eidemque auctores erant, ut argumentum aliquod heroici carminis sibi deligeret, in quo magnificum illud atque sublime locutionis poetice genus, quo præstabat, expromeret, ac tota mente Virgilium atque omni animo intueretur. Quod ille arripuit, & Columbi navigationem ac res gestas grandibus ac splendore sententiarum illustribus explicare versibus cœpit: ac nondum vigesimum ætatis suæ expleverat annum, cum duos ejus operis libros edidit, tanta eruditorum omnium approbatione plausuque, ut tum fuerit judicatum, non esse credibile, nisi iis qui suis ipsi oculis subjecissent, tantam vim facultatis, artisque præstantiam, in id ætatis hominem cadere posse; neque dubium cuiquam fuerit, si in suis studiis manere; neque, ut postea fecit, ad inanes aulæ ambitiones animum traducere voluisset, quin propius quam ceteri, qui in eodem curriculo versarentur, ad Virgilii gloriam accessurus fuisset. Postremo Paulus Æmilius Sanctorius,

& magistrorum cohortationibus persuasus, & iaturæ vi, a qua multa ad eam rem habuerat adjumenta, compellus, omnem fere suam operam ac studium ad scribendam historiam contulit, magna ingenii, eloquentiæ, elegantæ, prudentiæque cum fama; quæ opinio adeo omnium fere animos, toto terrarum orbe, invaserat, ut vulgo Historicus appellaretur. Verum, ab incunte ætate usque ad exitum vitæ, nihil propinodum aliud egit, nisi ut sui ævi res gestas docta atque elegantî narratione complecteretur; quo tempore, etiamsi quindenos, ut de quodam scriptore historiarum dicitur, dies in singula periodo perficienda ac rotundanda trivisset, facile illi fuisset, ab orbe terrarum condito usque ad sua tempora historiam contexere. Nihil tamen apparuit, præter operis totius fragmenta quædam, in quibus vel locus, vel regio, vel pugna, vel similis res aliqua graphice descripta continebatur. In quibus, quantum ego intelligere possum, maxime Cornelium Tacitum mihi videtur imitatus. Nam, quemadmodum ille, pressus verbis, creber est rerum frequentia. Atque eo magis ab eo perfectum aliquod opus expectabatur, plenumque prudentiæ, quod non ille, scribendi causa, se in aliquam solitudinem, vel in religiosorum hominum castra abdidisset, sed in aulæ luce versatus, non minimam Reipubl. partem accepisset, quod & Referendarii munere functus esset, & plures provincias administrasset; quibus ex rebus & prudentia & rerum usus, scribendi historiam necessarius, acquiritur. Atque ejus operis, in quo ipse vehementer elaborare dicebatur, fama compellus Paulus V, Pont. max. bonæ existimationis in primis cupidus, opere magno petiisse ab eodem perhibetur, quidnam de ipso ac de rebus a se Pontifice gestis scripisset; cui: Nihil, Pater sancte, respondit, nisi quod cum veritate consentiat; nam, quis nescit, primam esse historiæ legem, ne quid falsi dicere audeat; deinde, ne quid veri non audeat? Sed magnam illi faciunt heredes sui injuriam, si cum illud idem opus exædificaverit, parietum umbris occulunt, nec typis editum lucem aspicere sinunt. Erat homo vehemens, acer, imperiosus, adeo ut alumni Collegii Græcorum, qui sub Cardinalis S. Severinæ, ejus

patrui, tutela patrociniſque latebant, ſint, volenti ingredi, ædium ſuarum fores coacti occludere, eo quod, patrui fiducia fretus, turbare ac permiscere omnia vellet, ipſi vero imperia ejus pati nequirent. Erat, in odorandis deprehendendisque aliorum hominum vitiiſ, acutus, in eiſque reprehendendis, cum aliquo maledicto factus. Fuit, quoad vixit, Fabricio Card. Verospo intimus, vita ac moribus illi conſimilis. Poſtremo, pluribus in Repub. muneribus functus, ac Urbini Archiepiſcopus factus, in eo honoris gradu vita deceſſit. Sanctarum Virginum vitas elegantiffimo ſtylo ſcriptas, atque uno volumine comprehenſas, reliquit: ſanctorum etiam Apoſtolorum Petri & Pauli res geſtas, alio volumine, pari, cum ſuperiore, elegantia, cultu atque nitore, complexus eſt. Quæ volumina, typis edita, ſatis indicant, quantum vir ille, egregius in primis, in hoc genere ſcriptionis, ut de eo erat fama, præſtiterit.

XIX. ALEXANDER STUFA.

Parens ac domina rerum omnium, natura, cum ad ceteras bonas artes, tum ad eas maxime, quæ ingenii facultate ac viribus conſtant, unumquemque creat atque ornat; adeo ut, ſi quispiam, ea invita ac repugnante, aliquid aggredi ac moliri conetur, operam ludat, &, quamvis toto vitæ ſuæ tempore in eo perſequento elaboraverit, ejus, quod in ipſo virium, laboris, operæque conſumſerit, ſe poſtea pœniteat. Hinc te Horatius jubet, *ut nihil invita facias dicasque Minerva*. Atque ex veteribus cloquentiæ magiſtris inventi ſunt aliqui, qui, cum mercede docerent, eos, quos minus ad eam rem aptos comperiſſent, non patiebantur apud ſe operam perdere, ſed ad id, quod facere poſſent, dimittebant. Verum cum in omnibus rebus, ut diximus, natura dominetur ac polleat, tum in primis facetiæ illius ſunt propriæ; non ſolum illæ, quæ peracuto brevique aliquo dicto conſtant, verum etiam eæ, quæ æquabiliter in omni ſermone ſuæ ridentur. Natura enim forinat ac fingit narratores facetos. Quamobrem, qui nulla ad eam rem adjumenta ab ea habeant, ſi ſe ad jocandum con-

conferant, nihil in eis, nisi eorum insulitas, rideatur. Atque in utroque facetiarum genere, tum in eo, quod in perpetuitate sermonis, tum in eo, quod in celeritate ac dicto est, elegans atque erudita Florentinorum natio præter ceteros, ut mihi videtur, excellit: de quorum hominum facetiis, aliquot etiam inscripti sunt libri. Florentinus erat Alexander Stufa, de quo referre institimus; in quo egregia multa ac laudedigna numerabantur. Genus, (erat enim summo inter suos loco natus,) divitiæ, ingenium ad omnes liberales artes factum, Juris civilis, Philosophiæ rerumque divinarum scientia, multæ præterea elegantes in eo literæ, tum Latinæ tum Etruscæ; in utraque enim lingua scribebat, cum erat opus, soluta oratione ac versibus; quam scite eleganterque, affirmare non ausim, cum nunquam in ejus scripta inciderim: verum, multo magis in illo laudabatur acerrimum in notandis animadvertendisque eorum operum vitiis, quæ, sive typis impressa sive manu exarata, in vulgus exissent; simulque excellens ejusdem in laceffendo, vel in respondendo cum esset provocatus, acumen & prompta celeritas. Sed in utroque longius interdum progrediebatur, quam ratio præscriberet. Etenim, in aliorum scriptis examinandis notandisque, sæpenumero non tam Aristarchi partes gerere, quam alterius laudi gloriæque invidentis speciem præferre videbatur. Deinde in jaciendo mittendoque ridiculo nullam se legem tenere existimabat, quæ jubet, ut habeamus hominum rationem & temporum. Etea quæ occurrant, cum falsissime dici possint, teneamus: at ille interdum ab æstu ingenii se longius abstrahi sinebat, neque hominum caritas erat illi propria laude antiquior; sitamen, esse quamvis ridiculum, est in magna laude ponendum. Hoc uno excepto, quod in eo reprehenderes, non facile reperisses. Erat enim optimis atque integerrimis moribus. Dum esset Florentiæ, perpetuas cum Andrea Salvatore, poëta, mea quidem sententia, lepidissimo venustissimoque, similitates gessit. Itaque ejus versus acuto dente mordebat lacerabatque. Montis Politiani Episcopatum, sibi a Roberto Card. Ubaldino resignatum, obtinuit, & egregie ac fideliter

administavit. Sed, cum ætatis ad exitum decurrentis flexus, & Episcopalis dignitatis ratio, omnem ab ipso jocosum facietiarumque rationem excluderet, ac summam morum vitæque gravitatem exposceret, fiebat, longa consuetudine usuque impulsus, ut, quotiescunque occurreret aliquod falsum & argutum, quod posset dicere, facilius, ut inquit Ennius, flammam ore in ardente opprimeret, quam illud teneret. Verum, vir hic, quemadmodum natura usus fuerat amica ac liberali, in tribuendis animi virtutibus, ita eandem expertus est parum anicam ac liberalem, quod ad corporis valetudinem attinet. Nam corpus male ab ea constitutum habuit, ægrum, infirmum, & acerbissimis podagræ doloribus fere semper obnoxium, adeo ut pedibus ingredi vix posset, sed aliorum auxilio, inter quorum manus deferretur, egeret. Quo factum est, ut celerius, quam ætas illius, nondum morti matura, postularet, vitæ munus impleret.

xx. FRANCISCUS HERRERA.

Nobilis urbs Liguriæ Savona, & situs amenitate & maris opportunitate & æris salubritate, tum civium opibus, nobilitate, divitiisque, toto terrarum orbe notissima, tanquam ager fertilis, plures semper ex se, præstanti virtute viros, eduxit. Mitto Pontifices max. Xistum IV, & Julium II, de cujus magnitudine animi, rebus gestis, prudentia, deque ejus in Italiam ac Sedem Apostolicam, cujus imperium mire auxit, amore, nulla unquam ætas conticescet. Mitto S. R. E. Cardinales, vitæ amplitudine ac dignitate clarissimos, in his Raphaelem Riarium, qui princeps omnium, iis Romanæ ædibus exornavit, quæ urbis instar habere videntur, quibusque, & molis magnitudine & operis præstantia; neque ampliores nec pulchriores ullæ visuntur; in quo ea Romanæ aulæ dignitas ac decus extitisse narratur, quod nemo deinceps exæquare potuerit. Mitto, inquam, hos omnes; non enim, ut sæpius testati sumus, consilium est, singulos, quos quævis virtutis cuiuspiam laus in cælum extulit, referre. Sed eos tantum, quos in-

genii vel literarum fama, dignos, qui omnis posteritatis memorie tradantur, effecit. Cujus generis tam multos edidit, qui non solum patrie, ut Liguriz, verum etiam Italie, atque adeo universae Reipubl. Christiane, ornamento fuerunt, ut non videam, cui illa urbi debeat cedere. Diximus antea de Gabriele Chiabreta, qui princeps ex omnibus Pindarici carminis, Italici pene omnium ignoti, amenitatem, flores, ac vinctus, in Etruscam linguam feliciter transtulit. Diximus de Jo. Stephano de Syris, Episcopo Sagone in Regno Corsicæ, cui mōris immatura amplissimos honores & ingenii augendi declarandique facultatem eripuit. At nunc Franciscus Herrera, in eadem urbe natus, objicitur; patre Joanne Herrera, natione Hispano, & matre Paola Ferrera Savonensi, nobili muliere. Hic annos natus non amplius novem, profectus est Romam cum patre; qui multos ibi annos, una cum Octavio Casta Albisiganensi, argentariam nobilem fecit. Qui duo adeo simul conjuncte vixerunt, ut omnia inter ipsos viderentur esse communia; neque unquam, in re aliqua, unius nomen sine alterius nomine usurpabatur; ac tum de argentaria quam simul faciebant, tum de domo in qua habitabant, tum de rheda qua vhebantur, Herrera & Coste argentaria, domus, ac rheda diceretur; & ad hanc similitudinem cetera. Atque adeo hæc duo nomina erant inter se conjuncta, ut unum ab altero distrahi separarique non posset, & sive joci causa, sive consuetudine eos simul appellandi, cum quispiam alterutram ex illorum uxoribus aspiceret, Herrera & Coste uxorem videre se diceret. At Franciscus, simul ac Romam pervenit, nihil parentibus fuit antiquius, quam ut ad Patres Societatis Jesu in disciplinam mitteretur; ad quorum Gymnasia, tanquam olim ad urbem Athenarum, adolescentuli a parentibus propinquisque mittuntur. Ubi Francisci ingenium simul aspectum & probatum est; atque eam ob rem data opera a magistris, ut in suam cum Societatem attraherent. Sed non fuit illis magnopere laborandum: nam adolescentem, tum bonitate naturæ ad honestam religiosamque vitam propensum, tum discendi cupiditate ad literarum studia & ad spem summæ

eruditionis exardescentem, facile illis fuit, suam in sententiam perducere. Magna igitur omnium cum approbatione receptus est in Societatem; ubi docilitate celeritateque ingenii, æqualium suorum industriz præcucurrit; adeo ut celeriter ex discipulis ascenderit, ac magistrorum numerum auxerit; neque solum humaniores literas auditoribus suis tradiderit, verum etiam philosophicis eos disciplinis erudierit. Sed utinam hominis ingenio par data esset firmitas corporis valetudineque, multo ille quidem illustrior fuisset ac notior; quod magna homines ingenia, ex operibus editis, unde de illorum facultate liceat existimare, metiuntur, non autem ex vulgi sermonibus. Nam cum decem & octo annos in ea Societate, summa cum laude, versatus esset, ejusque opera magno sociis usui decorique fuisset, ea vi, aque intercutis morbo, invasus oppressusque est, ut medici desperarent, posse illi obfisti. Sed cum propinqui, ejusque in primis fratres, ferre non possent, tantum ingenii lumen immatura morte extinguere, erant illi auctores, ut se a Societate illa segregaret, ubi, in tanto vitæ periculo, non satis cum cura curari posse videretur. Quod cum ille vehementer recusaret, nec Socii à suo cum complexu distrahi divellique paterentur, ad Pauli V, Pont. max. præsidium confugerunt, ab eoque, Breve seu literas impetrarunt, quibus potestas illi fieret, ut morbo ingravescente, domum ad suos, ejus depellendi gratia, superioribus etiam invitis, rediret. Neque tamen propterea quidquam de illorum in ipsum amore diminutum est; quin cum semper, quamquam Societatis legibus solutum ac liberum, non aliter quam in suorum loco ac numero habuerunt: neque vicissim eos ille minus quam antea dilexit ac coluit, neque magis segregatos a se habuit; quod & perpetuus amicitiz usus, quem cum illis retinuit, satis ostendit, & præter alia munera, quibus eos large donavit, stragula illa vestis Damascena, purpureo croceoque ex serico, declarat, qua Romæ, interiores Ædis, nomini Jesu sacræ, parietes exornantur. Cum igitur se recepisset ad suos, majorem nactus est facultatem, morbum illum discutiendi. Ac primum Savonæ, quo, medicorum jussu, se contulerat, ut sub

eodem celo, quo ortus fuerat, feliciter curatio procederet; Savonæ, inquam, subventum est illi, chalcanthi spiritu, solito largius exhibito, utpote jam desperato ac penè deposito. Verum, illius medicamenti, quamvis præcipitis, ea vis fuit, ut morbum, magna ex parte, depelleret: etenim ea vis urinæ egesta est, quam matula triginta & octo vix caperent; atque venter, qui præter modum intumuerat, defecit; statimque ex pleno inanis, ex tumido flaccidus factus est, adeo ut pedibus consistere non posset. Sed postquam omnis emissus est humor, reliqua curationis est prosequutus, quo ex toto convalesceret; hoc est, itinera exercitationesque suscepit, in quibus, ad id morbi genus depellendum, magnus est usus. Itaque, de medicorum sententia, omnes Italix oras, quas mare superum atque inferum alluit, omnes urbes, peragravit. Sed postquam, crebra gestatione exercitationeque concussus, in veterem valetudinis statum rediisse visus est, ad Urbem venit; & inde Albanum migravit. Id ille oppidum elegit, ubi, prope ab suis, atque ab omnibus curis remotus, ab ambitione præsertim, quæ acrius etiam, quam alix omnes animi sollicitudines, cor exedit, ætatem ageret; ac, ne ipsi negotium deesset, vineam, optimo vitium genere consistam, sibi paravit, quæ vinum præstantissimum suppeditabat; atque ædes, non ita magnas, sed quæ homini religioso convenirent, ædificandas curavit. Erat sibi conscius, morbum illum, ad quem magnam haberet propensionem, non in totum sibi fuisse sublatum, sed ejus in-
tus quasi semina quædam subesse, unde, nisi maxima cautio adhiberetur, repullularet. Itaque optima victus ratione, animi præsertim hilaritate, cum, modo Albanum, modo Romæ esset, dabat operam sedulo, ne iterum eundem ad scopulum sanitatem, tanquam navim, offenderet. Aberat, Albano ab agro, passibus non amplius mille, villa, in quam, prolatis rebus, se recipiebat Maphæus Cardinalis Barberinus; nihilo minus, quam Franciscus Herrera, cupidus tranquillitatis & otii: at summæ illi voluptati, quam ex suo rure capiebat, nihil aliud deesse videbatur, nisi vir aliquis honestus ac doctus, qui-
cum suavissimis, de studiis literarum, sermonibus

otium illud honeste consumeret. Sed insperato illi accidit, ut in Franciscum Herreram incurreret; cujus ingenium simul ac aspexit, ita adamavit, adeoque hominis eruditione doctrinaque delectatus est, ut, quoad ibi rusticatus sit, vix posset ab eo divelli. Atque hæc fuit causa Herreræ, conjungendæ cum Cardinali Barberino amicitie. Qui Cardinalis, cum non ita multo post ad summi Pontificatus fastigium, Urbani VIII nomine, esset evectus, & ipse, amicitie, quæ cum illo sibi intercedebat, jure, magnam ad spem honorum divitiarumque vocaretur; non fuit tanti hæc spes, ut propter illam otium, in quod, tanquam in portum, se conjecerat, desereret, coquit vela daret, unde tam opportunus flatus ostenderetur. Sed tandem, assiduis cognatorum precibus, summa vi postulantium, ut familiaris dignitati & fratris honori consuleret, qui nuper, in numerum Referendariorum allectus, ad Rempubl. capeffendam accesserat, passus est se exorari impellique, ut Pont. summum adiret, eique adeptum totius Christianæ Reipubl. imperium gratularetur. Quem simul ac Pontifex aspexit, continuo suavissime est in eum effusus; &, postquam satis, humanissimis verbis profecutus eum esset, iussit, se sibi sistere, semel in hebdomada, hoc est, die Jovis; quo ille die, paululum a negotiis publicis feriatum, dabat se hilaritati, & amicorum colloquiis. Neque minimum ex ejus consuetudine fructum Pontifex cepit. Nam sæpe, in negotiis de summa Reipubl. maximis atque gravissimis, cum esset adhibitus, magni ejus opera æstimata est; præsertim si causa vel in historia, vel in Theologia, vel in Jure Pontificio, verteretur. Etenim universam rerum omnium scientiam complexus erat. Hunc locum tenuit amicitie apud Urbanum annos plures: sed tandem, Jo. Ciampoli ab Urbe discessu, Brevium scribendorum partes accepit. Quod munus quam egregie diligenterque tutatus sit, declarant eadem epistolæ, Urbani nomine, ad varios viros principes scriptæ; in quibus gravitas, prudentia, atque orationis cultus ac nitor, elucet. Erat enim, præter eas artes in quibus excellebat, eloquentiæ studiosus. Quamquam, de ratione Latine scribendi; aliqua esset illi contentio cum P. Hieronymo Bru-

Brunello, dum essent una in Collegio Romano; etenim cum, die quodam, injecta esset hac de re mentio, Brunellus, qui nullum alium probabat scribendi genus præter Tullianum, multis rationibus defendebat, non esse a Ciceronis imitatione discedendum; contra Franciscus alios Ciceroni anteponeret; memini dici, illum non parum Brunello fuisse adversatum. Verum, quantum ille industriz diligentizque ad procuranda Pontificis negotia adhibebat, tantundem etiam, in valetudinis suæ cura, negligens atque indiligens inveniebatur. Quæ fuit causa, ut, paucorum dierum morbo consumptus, interiret, non eo, quicum olim, ut diximus, conflictatus fuerat, sed alio, ex aëre nocturno, qui Romæ gravis solet esse, contracto. Etenim, cum ad multam noctem cum Pontifico fuisset, ut ad cubiculum suum se reciperet, necesse habebat, homo natus annos sex & quinquaginta, infirmaque valetudine, multorum passuum viam ingredi sub dio. Fuit moribus sanctissimis, & fama, in vita sua, secundissima. Honestissimorum hominum amicitias appetebat, iis se dabat, eorum studiis obsequabatur, eorum commodis & honori serviebat; semper hilaris, comis, jucundus. Quamobrem, mortuus, iis qui eum noverant, incredibile sui desiderium reliquit; ac nominis sui memoriam quam maxime longam apud posteros effecisset, si longius vitæ spatium nactus esset; multa enim, quæ egregie inchoaverat ac dolaverat, limare ac perficere potuisset. Itaque, quantum mors illi de vita surripuit, tantum detraxit e gloria.

XXI. ANTONIUS CORINUS.

URbs Apua, in Liguribus, nunc ex ponte, qui ibi visitur, Remolo consecrato, ut antiquissima eorum hominum fama, quasi per manus tradita, loquitur, Pontremolum appellata, quasi Pons Remoli, montis Apennini radicibus adjacet, propter flumen Macram, murens, troctis, ut nunc vocant, aliisque exquisiti saporis piscibus plenum; quod etiam flumen, ejus urbis mœnia alluens, Etruscos a Liguribus dividit, supraque ipsum, cum pontem habet injectum, quem appellari

Re-

Remolum diximus; atque a mari mediterraneo recta via distat in illa passuum non amplius decern. Ager, a quo undequaque ambitur, fertilis est, amœnus, arboribus omnis generis fructuum confitus, forma, varietate, sapore, præstantium; ferax est olei suavissimi vinique generosissimi; multæ in eo aquæ perennes ac saluberrimæ; ær, gravibus vaporibus nullis infectus, purus atque innoxius attrahitur; corpora hominum valida atque robusta, & ad laborem ferendum parata, maxima, bellaudi cupiditate studioque ducuntur. Olim finitimis populis, aliisque infensi Apuenses, sunt a C. Flaminio Cos. ut ex historiis apparet, bello coerciti atque perdomiti, tum præsertim, cum in agrum Pisanum ac Bononiensem ita irruerent, ut coli non posset. Multæ, in eo oppido, familiæ, opibus, divitiis ac generis nobilitate, insignes continentur; complures in eo cives visuntur, literarum gloria florentes, complures rei militaris periti, neque minus civitatis regendæ; quorum hominum sæcunda semper genitrix extitit: atque hoc tempore, quo hæc de illo referimus, septuaginta & eo amplius Juris utriusque doctores ac magistri, tum non parum multi, medendi arte conspicui, aliique etiam, Theologicæ facultatis laude in eo præditi numerantur. Olim totius Liguriæ principatûm obtinuit, atque ante ipsam Urbem Romam conditum viguit, ac multa cum ea Republ. bella aspera ac difficilia gessit. Nunc vero illi, inter reliquas Lunæ totius urbes, primæ deferuntur, ac multis oppidis, vicisque circiter septuaginta, amplitudine, ac bellicosissimorum in eis hominum multitudine & copia, conspicuis imperat. In marmore, validæ robustæque turri, in medio fere urbis, sitæ, insculptus hic versus legitur:

Appia sum, quondam Marco celebrata Catone.

Sed in iis, quos, ab ea urbe profectos, hæc nostra ætate, eximie doctrinæ laus in cælum extulit, merito numeratur in primis Antonius Corinus, Blasi filius; illius, inquam, Blasi, qui cuivis ex omnibus sui ævi principibus Jurisconsultis, in consulendo respondendoque, par, ne dicam superior, fuit. Hic dum Pisis operam studiis daret, & Academix illius Rector ceteris discipulis auctoritate præesset, qui honor apud illos magnus & honest-

nestus habetur, fama exivit, adventare cum exercitu Petrum Strozzi, qui a Cosmo Florentiæ Duce defecerat, ut oppidum illud, omnibus tum rebus imparatum, aggredere. At ille convocatis condiscipulis arma distribuit, ac partem illorum in muris disposuit, partem alteram pro urbis porta stare iussit, qua Petrus in urbem irrupturus metuebatur, ita ut aciei cujusdam speciem referrent. Id ut cognovit Petrus, existimans, majores intus copias contineri, & oppidum egregie esse munitum, non est ausus accedere, eodemque, unde venerat, sese recepit. Interea Dux Cosmus nactus est tempus ad copias comparandas, & ad oppidum muniendum. Fuit Antonius figura corporis venusta, ore eleganti, in quo mira benignitas, cum maiestate quadam, quasi fœdere ac societate conjuncta, se daret; moribus paulo gravibus ac severis, ita tamen, ut in illa gravitate amenitas ac festivitas, cum vellet, copularetur, quæ ad se omnes alliceret attraheretque. Ingenium habuit excelsum, & eloquentiam admirabilem, sive loqueretur sive scriberet, a naturâ sibi tributam; quam postea arte limavit atque perfectit. Ejus sermo miram habebat gravitatem amenitatemque, ut illi videretur non posse obfisti. Egregie Etruscam & Latinam linguam novit, quam, etiam tum puer, a magistris prima illa puerili institutione accepit. Postquam vero ex ephebis excessit, philosopho se tradidit, ut ab eo in utraque Philosophiæ parte erudiretur, tum in ea, quæ est de vita & moribus, tum etiam in illa altera, quæ in naturæ subtilitate obscuritateque versatur. Atque ab his studiis profectus, ad eam, quam ab ineunte ætate adamaverat, Juris prudentiam se contulit; neque antea ad illam est ausus accedere, quam esset omnibus iis artibus, quas diximus, instructus: quibus etiam addiderat historiarum omnium notitiam, & regendæ Reipubl. scientiam; contra id, quod plerique faciunt, qui vix primis Grammatices elementis imbuti, nudi ad eam veniunt atque inermes, nulla cognitione rerum, nulla scientia ornati. Verum quantum Jurisconsulto futuro hic ornatus instructusque lumen accersat, propter omnium bonarum artium, denique virtutum ipsarum societatem cognitionemque, declaravit even-

even-

eventus. Nam vix intro in ejus facultatis vestibulum pedem posuit, cum omnia sese illi intima & arcana aperuerunt; neque solum visus est dignus, qui celeriter in doctorum ejus artis numerum veniret, verum etiam Juris civilis publice interpretandi facultate, ut est moris, adeptus, electus, ut in Gymnasio Pisano, Juris ejusdem Institutiones, neque ita multo post, Pandectas etiam, ex ordine, discipulis interpretaretur. Ubi, cum die quodam per urbem, animi gratia, obambulet, meretricem, pro foribus domus suæ, subtegmen nentem aspexit, atque impetravit a se, ut a gravitate illa discederet, quæ ipsum aliquam in invidiam apud omnes adduxerat, quibus molestum erat, in tanta eum gravitate ac severitate versari, adeo ut vulgo magna faba appellaretur; impetravit, inquam, ut levitati gravitas, hilaritati severitas, cederet; atque: Nihil est tam deformis, ait, quam, mulierem meretricem, lateri hærentem colum habere. Cui illa, nullo sumto ad cogitandum spacio: Nihil est, ait, inhonestius, quam doctorem atque magistrum, a discipulis avulsam, incedere. Sed a docendi munere traductus est Senas ad judicandam provinciam, atque inde in numerum Auditorum Rotæ, primum Pisanae, tum Florentinae, adlectus; quem locum tam multos annos tenuit, ut ceteris ordine & antiquitate præiret, hoc est, decanus existeret. Quod existimatum est non sine magno Pisani Gymnasii incommodo detrimentoque contingere; cum, eo doctore cederet, qui, ingenii doctrinaeque fama, multitudinem ad se discipulorum attraheret. Itaque longo intervallo, revocatus est, ad docendi munus, unde recesserat; ac Jus civile, ex ordine, matutinis est horis interpretatus, tanta eruditionis industriaeque cum laude, tanto auditorum cum profectu, ut, paucis interjectis annis, traductus sit ad primariam docendi Juris cathedram; quem locum millena, & eo amplius quotannis setita, stipendii nomine, consequebantur; & cum nobili apud suos loco ortus esset, voluit honoraria S. Stephani militia condecorari; in eamque, a Ferdinando, magno Etruriæ Duce, ac perpetuo ejusdem militiae magistro, adscriptus est, sibi que in iis, quæ ad eam militiam pertinerent, a

con-

consiliis electus; apud quem etiam sæpius verba fecit, ea sententiarum gravitate, ea verborum elegantia atque splendore, ut nulla ejus orationis pars sine plausu exciperetur. Habebat a natura, tum in motu, tum in gestu, tum in incessu, tum in voce, insitam quandam gravitatem; quæ cum vulgo notaretur, non poterat hominum sermones effugere; ac, si quis magnifice se inferret, aut tarditatibus uteretur in gressu, paulo putidioribus & odiosis, aut verba sunderet sapientia, hic Corinum agere dicebatur. Florebat, ut cum maxime, in Gymnasio Pisano, Antonius, tum summæ eruditionis fama, tum vitæ splendore ac dignitate, quam præsertim tuebatur ex millenorum quotannis scutorum stipendio, zliorumque ducenorum, quæ ex honoraria Consiliarii advocatiquæ S. Stephani militum mercede capiebat, cum Petrus Cavallus, item Apuensis, excessit e medio. Erat vir hic, doctrina, fide, probitate, industria, atque prudentia, non unus e multis, sed inter omnes prope modum singularis, adeo, ut nullum alium in toga ministrum, magni Etruriæ Duces, illi similem viderint. Huic tanto viro qui subrogaretur, nemo inventus est aptior equite Antonio Corino; nullaque interposita mora, evocatus est Florentiam, ut auditoris Consultæ, & Judicis Mercaturæ, delatam sibi provinciam acciperet; quod apud Florentinos amplissimus magistratus existimatur. Neque ita multo post factus est Auditor fiscalis, summo cum imperio ac potestate. Præstabat pietate ac religione; flagrabat cupiditate studioque discendi; adhibebat in causis cognoscendis ac negotiis agendis diligentiam, in expediendis conficiendisque celeritatem. Illa autem austera severitas, quam homini natura tribuerat, in cultu tantum hærebat, nec ad animum permanabat; nam comitatem, hilaritatem, amœnitatemque cum amicis exercebat. Integris fuit moribus. Sed uxore, quam habuit, amissa, quasi nullam sine muliere esse vitam existimaret, alteram duxit; facta ejus rei potestate a summo Pont. quod ii, qui in ea militia numerantur quam ipse profitebatur, primis nuptiis defuncti, alteris se implicare prohibeantur. Obiit, florentissimis suis rebus, Florentiæ, magno totius ci-

vitatis luctu atque dolore, eorum etiam, quos adversarios & obtrectatores laudum suarum habuerat; idque ob singularem hominis excellentemque virtutem; qui, quamvis senex esset mortuus, tamen, quia erat valido robustoque corporis habitu, videbatur, aliquanto longius ætatem potuisse protrahere. Multa ingenii sui monumenta reliquit, tum quæ ad humaniores literas, tum quæ ad Juris civilis, quod in primis profitebatur, studia pertineant; digna, quæ, typis impressa, immortalitati mandentur. Itaque plures reliquit ingenii sui scetus, quam ex uxoribus, quas duxerat, liberos. Quamvis post unam uxorem, ut diximus, alterius maritus fuerit.

XXII. TIBERIUS CERASA.

Incidi non parum sæpe in eos, qui se mirari dicerent, cur multi, quum ingenio doctrinaque omnibus fere sui ævi hominibus doctis præstitissent, nulla ingenii doctrinæque suæ monumenta posteris prodenda curassent, unde immortalem sui nominis famam efficerent. Atque, ut advocatis & patronis, de quibus referre est in animo, nostra definiatur oratio, in illis veteribus oratoribus duas fuisse causas M. Tullius in libro de claris oratoribus tradit. Primum, quia nonnulli eorum animum ad scribendum non appulerunt; inertia, ne domesticus labor ad forensem accederet; nam pleræque orationes scribebantur, habitæ jam, non ut haberentur. Deinde, quia quidam melius putabant se posse dicere quam scribere; quod peringeniosis hominibus, nec satis doctis, ut idem inquit Cicero, plerumque contingit. Verum, hæ rationes, in veteribus patronis valere possunt; qui non ex scripto, sed voce, causas agebant, neque id, quod suassent, literis mandare cogebantur, nisi styli exercendi gratia, qui est optimus dicendi magister & effector; ut hac exercitatione ex improvviso, si necessitas cogeret, possent eodem modo dicere quo scriberent. At quid dicemus de nostris, a quibus non, ut olim, causæ perorantur, sed causarum defensiones summo studio elaboratæ atque profectæ, scriptisque traditæ, iudicum oculis subjiciuntur, quibus etiam defensionibus cau-

causas certissimas obtinuerunt? nonne, cum eas cubiculorum suorum tenebris occultant, pessime tum de sua ipsorum existimatione & fama, tum de posteritate ipsa merentur? nam si illorum responsa, doctrinae prudentiæque plenissima, in lucem edita, omnium manibus tenerentur, haberent ii, qui similium causarum nexibus implicantur, rationem, qua se illis vinculis explicarent. At fortasse ea, inquit, nostrorum est fama meritorum, quam nobis, consentiens omnium hominum laus ac sermo confecit, ut nulla unquam interventura sit temporis, omnia in oblivionem, diuturnitate, adducentis, injuria, qua in hominum animis memoria virtutis nostræ exolescat; immo clariorem eam visum iri existimamus; si nulla extiterint nostri monumenta ingenii, quæ in æstimationum arbitrium veniant: putabunt enim, multo in nobis plura & majora extitisse, quam quantum fama vulgaverit. Nec erant, mea quidem sententia. Nam quamvis, quoad superstites sint ejus seculi homines, addo etiam hæredes, in quo ipsi floruerunt, nihil fere de ipsorum memoria depercat; attamen si nulla subsint scriptorum quasi samenta, quæ, tanquam oleum, memoriarum eorundem splendori, quasi nutrimenta, suppedient, paulatim, tanquam flamma ab humore destituta, extinguetur. Quam multos omnibus fere seculis Philosophos, Jurisconsultos, Medicos, Mathematicos, extitisse putamus, qui ingenio valuerunt & studio, quorum tamen nomina sepulta jacent in tenebris, quoniam nulla operum, a se editorum, luce sublevata enitescunt! Neque est quod dicant, M. Antonium, Lucium Crassum, aliosque non parum multos, de quorum memoria commemoravit M. Tullius in Bruto, e quibus nulla unquam exciderunt opella, etiam nunc, omnium admiratione & laudibus, esse in cælo. Eorum enim fortuna incidit in illud præclarum divini in dicendo hominis ingenium, quod illorum laudem, partim jam mortuam, ab inferis excitavit, partim jam prope senescentem, quantum potuit, ab oblivione hominum, atque a silentio, vindicavit. Quod si eo auxilio caruissent, eorum nomen eadem, quæ ceteros, vetustas oblivione obruisset, ac ne natos quidem eos esse sciremus. At sunt alii, qui

operum suorum edendorum sollicitudinem eorumque in hæredes transmittunt. Hi verò quanto in errore versentur, ostendunt pomariorum, cetariorum cauponumque tabernæ, pulcerrimis elegantissimisque doctorum hominum scriptis monumentisque refertæ, ab illorum hæredibus, ad involvenda & amicienda legumina, pisces, farcimina, atque obsonia, divenditis. Volunt illi quidem uti ac frui bonis, a testatoribus sibi relictis, at vivam atque immortalem illorum memoriam apud posteros reddere non plus laborant, quam ea quæ nihil ad ipsos pertineant; & præ paucis illis nummulis, quos ex libris, quibus, ob eorum elegantiam, nullum par pretium statui potest, coëgerunt, immortalem testatorum suorum gloriam præ nihilo ducunt. Quamobrem ii, quibus præclarum a natura ingenium est tributum, si propterea literarum studiis se dediderunt, ut ipsorum memoriam quam maxime longam efficiant, dare operant debent, ut vivi gloriola sua fruatur, neque in iis, quæ ingeniolis suis pepererunt, in lucem prodendis, labori, operæ, ac sumtui parcant. Nam, quidquid in illis edendis infumitur, totum hæredum ingratorum avaritiæ adimitur. Verum, in iis, qui, cum ingenio & eruditione clari ac nobiles essent, nullam sui memoriam reliquerunt, invenitur Tiberius Cerasa; qui magnum Romæ de jure respondendi munus sustinuit, iisdem temporibus, quibus Bernardinus Biscia; sed paulo illi ætate inferior. De hoc etiam tum puer, accepi (nisi falsa ad me perlata sunt) patre cum medico natum fuisse, sed noluisse eam artem persequi, in qua parens excelluisset, verum, morbis medendi laude & gloria aliis relictæ, ad Juris civilis studia se contulisse. Ex quorum fontibus cum tantum hausisset, quantum esset, ad ejus interpretandi docendique facultatem adipiscendam, satis, Romæ primum causas amicorum tractare atque agere cepit; deinde omnibus, qui suo uti consilio vellent, se ad consulendum dare. Neque ita multum elapsum est temporis, cum ille præcipuam in advocatis laudem est consecutus, adeo ut nulla esset paulo difficilior causa, quæ ad illum non deferretur. Erat enim, cum peracutus ad excogitandum, quid in jure aut in æquo verum esset aut

non

non esset, tum erat ad ea, quæ invenisset, legum atque interpretum auctoritatibus firmanda mirabiliter prudens. Quo fiebat, ut, cum munera ad eum multa & pecunie a litigatoribus convenirent, ad summas divitiarum perveniret; eo quod litigantium stultitia ac pertinacia, qua lites persequi malunt, quam æquis conditionibus controversias minuere atque dirimere, certissimus sit quæstus advocatorum atque patronorum; quorum illi opes augent, suas imminuunt, se ad mendicitatem adigunt, illos ad ingentes nummos plerumque perducunt. Sed Tiberius, tanta isthac juris prudentia, qua aliis optime consulebat, non id solum assecutus est, ut locuples fieret, verum etiam, ut honoribus amplificaretur; videlicet, ut in Advocatorum Consistorialium Collegium cooptaretur. Quem ordinem ita plures annos tenuit, ut eum maxime illustraverit exornaveritque. Erat præterea ingenio natura mitissimo, ac moribus lenissimis humanissimisque, musices apprime peritus; nam & citharizare, & cantare ad chordarum sonum didicerat, & una cum aliis fidicinibus impressos illustrius modulorum modos, aut oculos sibi subjectos, fidium voce cantuque scienter exprimere, ac suavissimos concentus efficere. Quam facultatem ætate tantum, prolatis rebus requiem sibi quærens, exercebat, cum vero res rediissent, ipse quoque ad causas, quas susceperat, tuendas redibat, & canendi usum exercitationemque iis, qui per eam visiabant, relinquebat. Magno amoris benevolentiaque nexu Clementem VIII, Pontificem max. in æstimandis hominum ingeniis, acerrimi iudicii virum, sibi devinxerat, ex eo tempore, quo ille Auditoris Rotæ munus obibat. Sæpe enim illum voce causas docentem audierat, sæpe causarum defensiones, docte accurateque ab eodem perscriptas, legerat, atque de ejus consilio sententiam pronunciaverat. Itaque Pontifex factus, tantæ hominis virtutis non oblitus, ex aliorum eum numero eximere, & in edito dignitatum loco collocare statuerat. Quamobrem, Bartholomæo Cæssio, generali Thesaurario, in Cardinalium ordinem adscripto, perfecit, ut honorem illum mercaretur, ex quo certissimus ad Cardinalatum est aditus. Quocirca vim

illam pecunie, quam, multorum annorum cursu, ex defensionum laboribus coëgerat, unico pene temporis momento, totam in ea comparanda provincia prodegit. Sed spes certa honorum, leviozem illi, immo suavem, eam jacturam faciebat; nec pecuniam illam se perdere, sed scenerari existimabat. Omnino verissima est vox illa atque sententia, neque potest aliter esse, cum divinitus commissa prodierit, in optandis eligendisque rebus, præsertim in honoribus petendis, nos plerumque in maxime rerum earum ignoratione versari, quæ nobis in primis expediunt. Multi enim sæpenumero sibi quædam exoptant, in eisque fortunas suas esse positas putant, quæ postea, cum adepti sunt, se ipsi esse frustratos, ac pessime suis rebus consuluisse inveniunt. Existimaverat Tiberius, eo magistratu, quem tanto emerat, se, forensium causarum labore levatum, propemodum valetudinem suam in tuto collocasse, tum ea, qua præditus erat, Juris civilis scientia, sapientissima & æquissima judicla se esse facturum, postremo honorem purpure, in cujus spem, tantam pecuniam prodegerat, sibi non defuturum, ex quo vel procederet honoribus longius, vel saltem eodem quam diutissime frueretur. At hæc omnia cogitata ceciderunt illi teterrime. Nam vix magistratum illum adiit, cum cœpit cum adversa valetudine consistari, ac præsertim renum morbo laborare; qui ubi affecti sunt, diu male nos habent. Neque aliud illi erat negotium majus, quam ut fere quotidie medicorum consilium advocaret, tum ut eos inter sede causis, quæ præsertim morbum illum efficerent, disceptantes audiret, tum multo magis ut ab eis remedia, quibus morbo illi, ne longius serperet, posset occurrere, perciperet. Deinde experientia compertum est in eo id, quod est verissimum; non semper eundem, qui sit aptus ad studia literarum, esse etiam ad publica negocia gerenda idoneum; aliam enim esse rationem magistratum gerendorum, ac literarum studiis operam dandi; etenim multi, qui in hac umbratili doctrinarum exercitatione, ingenii acumine ac percipiendi celeritate, longe multumque ceteris antecedunt, iidem postea ad Reipubl. capeffendam traducti, & tanquam in pulverem, ut dicitur, & solem ducti,

in eadem Republ. regenda aliis, non tam doctis quam ipsi, sed civilis prudentia præstantioribus, longo intervallo inferiores inveniuntur. Nam muneri, quod susceperat, non satisfecit, sed multa, quæ reprehenderes, admisit, non quidem studio ac voluntate nocendi; sed quod prudentia ac rerum usu careret, aliquid interdum mali faciebat homo minime malus. Denique honorem illum, ad quem tam incitato cursu ferebatur, non valuit attingere, sed in medio spacio, mortis impetu eversus, corruit. Ejus mortis causam attulisse dicitur Clementis Pont. acris quædam ac vehemens objuratio, propterea quod vel decrevisset aliquid injuria, vel quod quapiam in re, illius voluntati non ad nutum præsto fuisset. Quæ cum ita sint, relinquitur, sententiam illam, de qua paulo ante commemoravimus, verissimam ac sapientissimam esse; videlicet, exploratum esse nemini, si id, ad quod cupidius fertur, sit ipsi futurum ex usu, an non? Mortuus Romæ, sepultus est in Æde Deiparæ Virginis ad portam Flaminiam, in sepulcro majorum suorum conditus.

XXIII. ANGELUS CÆSIUS.

Nescio, qua ratione comparatum sit, ut, quo quisque copiosius opibus ac divitiis abundat, eo etiam vehementius a literarum studiis abhorreat; tanquam si pollui nobilitatem existimet artium pulcerrimarum cognitione atque notitia, aut quod divitias sibi minus honestas fore arbitretur, si eas cum doctrinarum societate habeant adjunctas; atque eas a se, ut ipsorum dignitati indecoras, abjiciunt, & ad eos remittunt, qui aut fumosis majorum imaginibus careant, aut rei familiaris inopia laborent. Itaque, dediti ventri atque somno, indocti incultique, vitam sicuti pecudes exigunt; quasi eos pudeat, in hominum numero haberi; cum nulla re alia ita a brutis homines distent, ut rationis & ingenii exercitatione usuque. Audiavi ego non parum multos ex iis, qui beati putantur, cum invitati atque ab iis rogati, quibus eorum existimatio ac dignitas cara erat, ut pulcherrimis animum disciplinis excolerent ac

perpolirent, respondebant, Dei ac majorum suorum virtute satis, ac plus quam satis, sibi esse divitiarum. Quasi vellent dicere, nihil iis esse opus literis, qui divitiis, a majoribus suis sibi relictis, redundarent atque disfluere. At Angelus Cæsius, Federici filius, Dux Aquæ Spartzæ, Romanus, non est passus, generis nobilitatem, opes, divitiis, quidquam sibi suffragari ad inertiam atque socordiam; sed ea voluit esse materiam laboris, industriæ atque solertiæ; ac magno animo totum se literis dedit. Verum, singularis ejus industria, intra angustum ætatis spacium inclusa, non potuit largius sese diffundere, eosque fructus efferre, quorum spem maximam dederat. Nam etiam tum juvenis e vita decedens, parentem, non ita multo ante defunctum, suis vestigiis est prosecutus ad sepulcrum. Mathematicas præ aliis disciplinas coluit, in eisque, qua erat ingenii subtilitate atque acumine, progressus maximos fecit, ut videre licet ex libris, quos edidit; & in Geometricis ac Mechanicis pleraque a nemine excogitata invenit. Præstantissimus etiam ingenium contulit ad rerum philosophicarum scientiam, in quibus summus evasit. Ex quo excellenti studio, omnia egrotia illa opera emanarunt, quæ cum summa singularis ejusdem ingenii admiratione leguntur. Primum, volumen illud ingens, quod Naturæ theatrum inscribitur, unde Apiarium etiam suum depromsit. Tum liber de Cælo, in quo, ex sanctorum Patrum sententiâ probare contendit, Cælum esse fluidum, non autem solidum, ut universa Philosophorum schola defendit. Deinde prodigiosorum omnium physica expositio, pluribus libris comprehensa; tum cælestis natura, non minus multis libris exposita; tabulæ etiam Philosophicæ, in quibus omnium vis & natura plantarum, Mexicanarum quoque, luculenta oratione narratur. His additur Metallophytum, Urbano VIII & Card. Barberino dictum; Physica, Mathesis, & universale rationis speculum, ubi scientiarum ars omnium copiose tractatur. Neque hiantum, quantumvis latissimis doctrinarum finibus, se illa vis ingenii continuit, sed, tanquam flumen extra ripas diffuens, in alias etiam disciplinas & ad eam Philosophiam, quæ est de vita & moribus, exiit, atque

Mo-

Moralia, Paradoxa, Monita, & his similia quamplura, in vulgus emisit. Ad sui aliorumque exercitationem, publicam domi suæ Academiam instituit, quam Lynceorum nomine appellavit; in qua & ipse, quoad vixit, principatum obtinuit. Auctor erat Academicis suis, ut aliquid scriberent; cujus auctoritas eo majus apud eos pondus habebat, quod suum ad illam exemplum accedebat, qui nullum scribendi finem faciebat. Ac, ne ad ea, quæ docte eruditeque composuissent, in lucem edenda, sumtum faciendorum metu detererentur, pecuniam ipse de suo largiebatur. Cujus honestissimæ gloriosissimæque liberalitatis exemplum si viri principes imitarentur, non tam multis egregiis ac doctis operibus egeremus, quæ nunc, auctorum inopia, in aliquem pauperulæ domus angulum rejecta, pulvere obruta sit, tuque corrupta, in magnum bonarum artium detrimentum, eruditorum manibus eripiuntur: præterea eum illi liberalitatis suæ fructum ferrent, quo nullus, neque major neque præstantior, expectari potest ab iis, qui nihil esse in vita magnopere expetendum, nisi laudem & honestatem, existimant; videlicet, ut nomen ipsorum clarum & æternum apud posteros esset. Quid multis opus est? Eo Angeli Cassii, in operibus eruditorum typis mandandis, liberalis ac regius progressus est animus, ut nulli neque sumtui neque labori pepercerit, quo Nardi Antouii Zechi novæ Hispaniæ rerum medicarum liber, qui antea latitabat, in hominum conspectum exiret. Nam & sumtus ad id necessarios præbuit, ac doctissimis suis Lynceorumque suorum commentariis illustravit atque auxit. Laudata est viri hujus principis eruditio, ac mentis acies, qua rerum omnium vim & naturam inspexit, a Jo. Baptista Porta, in præfatione libri, quem de distillatione conscripsit. Uxorem habuit mulierem nobilissimam, sed nullum ex ea, neque virilem neque fœmineum sexum reliquit. Itaque coactus est frater alter, illi ætate proximus, stirpis propagandæ causa, uxorem ducere, quamvis, perpetuo se cœlibem fore, Deo vovisset; cui uxori ipse superstes fuit.

XXIV. POMPEJUS DE ANGELIS.

Nullum ferme tempus fuit, quo tempore, ex Seminario Rom. quod Patres Soc. Jesu moderantur, non aliqui prodierint, qui ingenii doctrinæque, qua præsentis commendatione æternam sibi, itsque quorum opera instructi exornatique sunt literis, laudem gloriæque pepererint. Nam, quemadmodum usu venire videmus in ædificiis, quum firmissimis ea fundamentis constituta, validis parietibus munita, pulcerrimis laquearibus fastigio contexta, rebus denique omnibus probe instructa, expolita atque perfecta sunt, ut non omnem in se laudem retineant, sed magna ex parte refundant in fabros, quorum operis sunt exædificata: ita etiam hominum ingenia, cum iis magistris, quorum industria studioque elaborata, literis erudita, bonis moribus instituta, atque ad absolutionem perfectionemque perducta, inveniuntur, eas communicare laudes debent, quibus feruntur in celum. Cur enim non magnam ex iis sibi partem vendicare æquum sit eos, quorum labore perfectum est, ut ex in illos laudes convenirent? Quod secus accidit in vituperationibus, in quas incurrunt ii, qui, quod a magistro didicerunt, sua sorcordia perdunt, totumque, quod ab illo in ipsorum ingeniis exædificatum est, cum fundamento perire permittunt. Nam vituperationes illæ totæ ipsorum sunt, nec aliquam ex eis partem culpa magistri decerpit. Quis enim, si ædibus illis vitium sit additum, in quas nequam homo & indiligens immigravit, si videlicet parietes admissis imbribus perpluant, si tigna putrescant, si tegulæ decendant, fabri eam esse culpam dicat, & non illius, cujus indigentia, earum jam nequior factus sit ædium usus? ille sua ignavia eam in illas calamitatem invexit; ille, suo adventu, fabrorum operam perdidit. Neque eo magis magister in crimen vocandus est, si discipulus, postquam excessit ipsi ætas ex magisterio illius, & suum in ingenium, tanquam in domum, immigravit, perdat, exturbet, affigat, quidquid ille excitavit, extruxit, ornavit; sed discipulus culpam commeruit; in illum omnes omni-

innium vituperationes confluunt; ille totum earum in se impetum excipit, ac ne guttam quidem in alium rejicit. Sed nihil ejusmodi ex se dedit Pompejus Angelius, Seminarii Romani Clericus; sed id, quod suo in ingenio, ad omnes bonas artes accipiendas apto, tanquam ædes aliquas, Soc. Jesu magistri excitaverant, curavit probe; non quidquam admisit, quo illud in usu deterius evaderet, non aditum ad illud imbris aperuit, hoc est, nullas in illud animi perturbationes, rationi contrarias, admisit, nullis adversis tempestatibus concuti ac labefactari permisit, videlicet a voluptatibus ingruentibus, quæ præsertim animum a studiis avocant, passus est e memoria dejici ac deturbari, quod a magistro didicerat; inmo studio atque exercitatione dedit operam, ut id, quod in se erat, augeret ac perficeret, & ut in usu melius & in speciem pulcrius existeret. Neque ea species oculos fugit sapientissimi oculatissimique Pont. Clementius VIII, qui, ejus probitatis doctrinæque fama commotus, Silvestro Aldobrandino, Card. S. Cæsarii, doctorem accivit, a quo eodem ille & vitæ honestæ acceperat præcepta, & bene scribendi. In quo pulcre ille respondit expectationi, quam de ipso conceperat. Etenim, in adolescentis ingenio, illud virtutum quasi ædificium extruendum curavit, quod iis, quibus recta mens est, probari non ignorabat; nimirum, ut moribus primum illum probis excoleret; quod est quasi solum ac fundamentum virtutum omnium; tum ut pulcherrimis ac dignis homine nobili disciplinis excoleret atque perficeret. Eumque literas docuit humaniores, philosophiam, omnemque eruditionem. Neque aliunde hujus ædificationis exemplum sibi expetendum fuit, quam a se ipso. Et usque adeo, in illo erudiendo, Clementi VIII operam probavit suam, ut Basilicæ Deiparæ Virginis majoris Canonicum, in alterius demortui locum, subrogandum eum curaverit. Non potuit illi provincia magis ex animi sui sententia mandari, quam illa. Erat enim vir pius, & B. Virginis, quam sibi ab ineunte ætate patronam adoptaverat, studiosus in primis. Atque ut, omnis ceteris occupationibus, omne suum tempus, studium, omnem suam operam ac di-

ligentiam, ad ejus Ecclesiæ ac Virginis obsequium cultumque conferret, perfecit primum Clementis Pont. mors: quo e vita sublato, Cardinalis, liberius vivendi potestatem adeptus, studium illud discendi primum remisera, tum plane abjecerat; atque in omnium rerum abundantia statuerat beate, ut ipse putabat, vitam exigere: postremo Cardinalis ejusdem interitus, cui pinguedo corporis ingens vitam ademerat. Itaque omnibus aliis curis solutus, frequens in Ecclesia nocturnis diurnisque horis aderat, una cum aliis collegis concinens. Quod autem ab ejus muneris functione supererat otii, non dabat illud quieti ac cessationi; id quod facere suo jure poterat, cum defessus a laboribus chori redibat; sed in literarum studiis collocabat, & in primis ad scribendum aliquid conferebat. Ejus otii fructus sunt duo illa volumina, quæ edidit; unum Latino sermone compositum, cui hunc titulum præfixit, *Basilica S. Maria majoris de Urbe, descriptio sive delineatio*, alterum vernacula lingua confectum, *De elemosyna, aliisque operibus, quibus munus tuto in supremum Dei judicium venire possumus*; quod egregiam hominis pietatem & in pauperes studium ostendit. Erat studiosissimus florum, atque ad eam rem hortum, ædibus suis adjunctum, habebat, ubi plurimi ac lectissimi flores omni tempore anni conspiciebantur; in quem ille, honestam sibi aliquam animi remissionem querens, interdum descendebat, eumque sua fere manu colebat, ferebat, irrigabat, ac steriles herbas eligens, repurgabat. Hanc ille exercitationem, a domesticis ecclesiæque suæ officiis, quæ ipsum detinebant, dimissus, curationi corporis sui adhibebat, ne inertia situque torpesceret. Atqui hoc florum studium, non multos abhinc annos, est in vectum in Urbem, ac multorum animos cepit. Itaque & plura illorum nomina, quæ nunquam ante id tempus aures nostræ acceperant, sunt audita, ac varix illorum formæ conspectus, quarum pulcritudo, cum recens nostros perveniret ad oculos, eos mirabiliter tenuit. Verum adeo hac etiam in re eatenus progressa est quorundam cupiditas & ambitio, ut singulas florum quorundam capulas, unde illi prodeunt, centenis nummis aureis venire viderimus.

Et-

Etenim, hac etiam in re, sicut in aliis, in quibus oculo-
 rum voluptas quaeritur, evenire compertum est, ut, qui
 modus est cupiditatis, idem sit aestimationis. Sed pau-
 latim procedente tempore, ut in Barclajo diximus, con-
 tigit, ut, quemadmodum mos est exularum omnium,
 cum terræ gremio comprehensæ propagarentur, ac
 multiplices ex se foetus effunderent, vilis earum fieret
 annona, quæque antea ab iis, quibus emtis illis opus fu-
 erat, uno nummo minus aureis centum auferri non po-
 tuerant, obolo uno addicerentur. Ita rerum sunt vicis-
 situdines. In hoc igitur studio aliisque, de quibus dixi-
 mus, cum Pompejus, summa cum laude, consenuisset,
 illud est iter ingressus, quod necessario suscipiendum est
 omnibus.

xxv. NICOLAUS MARIA MADAFFARUS.

Clarissima ac nobilissima Constantinopolis urbe,
 Orientis totius, Imperii domicilio ac sede, a Mu-
 hamete, Turcarum rege, crudeliter capta, interfectoque
 Constantino, ejusdem Imperatore, qui simulata mente,
 ut postea eventus docuit, tanquam veris rationibus vi-
 ctus, in Concilio Florentino, jam sibi omnia cum Rom.
 Pontifice & Catholica fide convenire, palam professus
 fuerat; capta, inquam, Constantinopoli, quidquid erat
 ibi literatorum hominum, Romam confluit, omnesque
 a Nicolao V summo Pont. sunt humaniter liberaliter-
 que tractati; & una cum aliis, quos invenerant, viris
 doctissimis literas Græcas, quæ annis sexcentis, barbar-
 rorum in Italiam incurfionibus, tenebris situque oblitæ
 jacerant, crexerunt, & in veterem dignitatis gloriæque
 locum restituerunt. Cumque, ipsorum e Græcia disces-
 su, tota illa eruditissima olim natio Græce, doctè eru-
 diteque loqui ac scribere dedidicisset; factum est, ut Ita-
 li, Galli, alique, Græcis ipsis, superbissimis homini-
 bus, Græcarum literarum magistri ac doctores existe-
 rent. Itaque, cum adolescentes Græci, ejus linguæ, in
 qua nati essent, quamque barbaries infuscaverat, addi-
 scendæ gratia, in Italiam navigarent, multique eorum,
 ob inopiam, discederent pene discendo, Gregorius

XIII, Christianorum omnium pater amantissimus, misericordia & Catholice religionis zelo permotus, Romæ Collegium instituit, eidemque annua vestigalia large liberaliterque attribuit, quibus, ex omnibus Græcæ totius urbibus, literarum cupidi adolescentes, qui se Romam contulissent, alerentur; ac magnificum etiam templum, D. Athanasio sacrum, ædificavit, ubi diebus festis, suo more rituque, rem divinam facerent, ac demum intelligerent, eam Urbem unicum orbitati illorum præsidium esse, cujus sacrosancti Pont. fuissent a majoribus ipsorum, summa cum arrogantia perfidieque nota, neglecti, neque eo honore habiti, qui Petri successoribus, summisque rerum divinarum interpretibus, debetur. Et, quo deinde in patriam, omni eruditionis genere plane cumulati, proficiscerentur, voluit etiam, ut magistros haberent, a quibus Latini sermonis elegantiam acciperent. Quorum unus fuit Nicolaus Maria Madassarus, Calaber; quamvis etiam ita Græce doctus esset, ut posset iis, qui in ea lingua voluissent erudiri, præesse. Etenim Græcos nonnullos veterum Græcorum Patrum libros, non ante illud tempus a nobis inspectos, bene eos in Latinum sermonem vertendo, civitate Romana donavit, quos fortasse, rei familiaris angustiis adductus, typis mandare non potuit. Erat vir probus, eloquens, neque ex eorum numero, qui eloquentiam sitam esse putant in verborum cursu & copia, atque in inanibus sententiarum flosculis, sed ex iis, qui in irrisione atque etiam animadversione eam esse dignam orationem putant, quæ non rerum maximarum scientia & varietate redundet. Nihil illi, vel ab humanissimis literis, vel a Philosophia, vel a Theologia deerat; neque earum scientiarum aditus tantum atque vestibula salutaverat, sed ad intimos earum recessus penetraverat; ideoque in publicis disputationibus, ad quas sæpe adhibebatur, in capiendo adversario acutus inveniebatur. Multas habuit orationes, in quibus non inelegans dicendi vis, cum sententiarum gravitate conjuncta, laudabatur. Frequens erat Romanis in Academiis, ubi, præsertim ex iis, quæ in eos eruditorum hominum cæcus afferuntur, existinare de ingeniis hominum licet;

& in primis in ea, omnium aliarum celeberrima, quæ Humoristarum appellatur, recitare sua carmina solitus erat; in qua etiam honestissimum illum confessum, qui erat quasi theatrum illius ingenii, voce erudita, disertis allocutionibus sæpe detinuit, eruditione doctrinaque plenissimis. Ob morum probitatem, nec vulgare rerum divinarum scientiam, vocatus est in partem solitudinis animarum; ac curiæ, sive parœciæ S. Thomæ in Parione, præfectus est, Parochi nomine. In qua provincia administranda, adeo erat omni cura & cogitatione intentus, ut, omnibus suis utilitatibus commodisque posthabitis, æternæ curialium suorum salutis prævorteret. Itaque confessiones excipere, præcipua Catechismi capita, pro captu audientium, exponere, errantes in viam redigere, collapsos attollere, cohortationes & admonitiones, atque etiam, ubi esset opus, objugationes suscipere, ab iis se abstinere maxime vitiis, in quibus alterum reprehendebat; denique, ejusmodi se profiteri atque præstare, cujusmodi esse alios exposceret. In sermonibus, quos de rebus divinis habebat, acerrimus erat insectator vitiorum, & in audientium animis aculeos quosdam relinquebat: ideo per sepe ab iis Sodalitatibus invitabatur, in quibus corporis verberationes atque alia ejusmodi veræ animi demissionis opera suscipiuntur atque exerceantur; ut, suis cohortationibus, Sodalium studia incitaret incenderetque. Erat præterea prudens, in consiliis dandis de re, quæ in consultationem deliberationemque veniret. Quo fiebat, ut in omnibus iis consiliis adhiberetur, ubi de rebus ad Parochos pertinentibus ageretur, ac multa de ejus sententia statuerentur. At si diligenter in ejus vitam inspicias, unum invenias, quod fortasse ad reprehendendum arripas; quod, animi causa, postremis annis, quibus parœciæ illi præfuit, vineam habuerit, cujus cultura non minimam temporis ac solitudinis nostræ sibi partem assumit; etenim, qui vult negotii vim sibi parare, vineam comparet; quod fere res nulla negotii plus habeat. Itaque, quidquid ab eo temporis, vineæ cultioni, & voluptati, quam ex ea percipiebat, dabatur, totum provincæ, quam administrabat, rationi commodoque eripie-

batur. Nam poterat fieri, ut interea, dum ille, agri excolendi seque oblectandi causa, ab Urbe ac domo abesset, quemquam ex curialibus suis repentinus aliquis ac pestifer morbus arriperet, cui esset necesse Pœnitentiæ & Eucharistiæ Sacramentis animum expiare, & viatico, ad illud extremum tamque anceps iter, instruere, atque ille miser, tam necessariis auxiliis supremo illo tempore destitutus, e vita discederet. At non erat ita magnum, inquires, aliquem relinquere, qui tantisper accederet vicarius ejus muneri, quoad ipse reverteretur. Bene agis; at si liceat iis, quibus animarum regendarum partes incumbunt, in deferendo grege, sibi commisso, hac ratione uti, si ea illis procedat in numerum; jam omnes Episcopi diœceses suas relinquunt, onus, quod eos urget, in alios rejiciant, ipsi autem otio & tranquillitati se dedant; facile multi se offerent, doctrina ac rerum usu præstantes, qui oneri cervices subjiciant, illudque pro rei dignitate ac magnitudine gerant. At contra videmus, œcumenicis Conciliis, sacrarum legum jussis, interdum etiam minacibus, summorum Pont. edictis, Episcopis, minus ea quæ ad officium ipsorum pertinent prosequentibus, vim & necessitatem imponi, qua se ad Ecclesias suas conferant, neque injussi pedem ex earum sinibus esserant, neve ad eas administrandas, ipsis recedentibus, adventicium requirant auxilium. Verum, Nicolao Mariz Madaffaro, omne vineæ illius excolendæ negotium ac studium ademit nova Bovensis Episcopatus, tenuis sane atque inopis, a Paulo V sibi traditi, cura; ad quam suscipiendam est coactus, ab Urbe discedere. Et sane mihi queri potuisse videtur, se non fuisse ornatum ex suis virtutibus, si, pro virtutum ratione modoque, semper honores mandarentur: nam, sine dubio, majore dignus erat provincia. Sed nescio, quo pacto Episcopatus ille deberi videtur solis Parochis, iisque e Calabria, qui Romam quotidie ad Parœcias capessendas confluunt. Nam, quantum repetere memoria possum, postquam natus sum, Episcopatum eum vidi ejus nationis parochis dari. Sed confestim, arbitror, ejus eum rei pœnituisse, ac, si res fuisset in integro, ac daretur optio eligendi, utrum vellet, multo eum

eum magis optasse, suum illum Romæ agellum, quæ tantopere delectabatur, nullius rei egentem, colere, quam insula, aliisque pontificiis insignibus præfulgentem, inter agrestes ac rusticanos homines vitam agere, e quibus nemo plane existeret, quicum communicare ea posset, quæ doctè excogitasset, atque in ea urbe versari, quæ, profectis diebus, fere cunctis in opus euntibus, solitudinis cujusdam potius quam urbis speciem præ se ferret. Atque hanc fuisse causam puto, cur honore illo non ita multos annos frui potuerit; eoque magis molestia affectum, quod nec tantum ea ab Ecclesia sumeret, quo tueri dignitatem pontificiam posset.

XXVI. CHRISTOPHORUS BRONZINUS.

IN Piceni regione, quæ, in descriptione Italix, quinta a Plinio numeratur, & in ea parte, quæ mare superum spectat, est oppidum Sciroli, ligneo Christi, cruci affixi, signo, summa & antiqua religione prædico, clarum, propter quod ab iis, qui Lauretanam ædem, religionis causa, adeunt, oppidum illud invisitur; nam alia visendi causa nulla est. In eo oppido natus est Christophorus Bronzinus, honestis parentibus, quorum genus, pro oppidi illius, non ita locupletis ac magni, ratione, honestum fuisse, illud est argumento, quod summo ab illis studio filius in pueritia doctus est, & in primis bene ac liberaliter educatus. Qui cum satis a literis instructus Romam venisset, ut erat ingenio eleganti, ac moribus auctis, quibus placere viris principibus posset, captus est aulæ cupiditate studioque; atque ad amicitiam accessit Evangelistæ Cardinalis Pallettæ, statimque in ejus familiarium numerum venit. Erat enim vir ille princeps admirabili sagacitate, in odorandis perverſigandisque hominum ingeniis. Itaque cum, primis illis congressibus, quædam in Christophoro ingenua atque elegans natura ipsi subolisset, nulla ratione dimittendam eam esse occasionem statuit; atque sine ulla morâ suam illi domum aperuit, & Caudatarii munus detulit. Habebat hoc Christophorus a natura sibi concessum, ut, quancunque in partem se daret, brevi in ea per-

perfectius evaderet; quamobrem, munus illud adeptus, ita ea, quæ ad illud bene gerendum pertinebant, intelligentia perceptum ac memoria comprehensum haberet, ut reliqui, qui apud ceteros Cardinales eodem quo ipse loco ac numero essent, exemplum ab ipso, ad quod se fingerent, expetendum esse ducerent, & si quid controversiæ inter eos ortum esset, de iis, quæ suum ad officium pertinerent, continuo ad illum deferrent, ejus sententiam exquirerent, & quidquid ille ea de re sibi videri dixisset, id non minus ipsis ratum fixumque debere esse statuerent, quam si ex Apollinis ore prodiret. Accedebat eodem, ut, cum frequenter pontificiis Sacris aliisque Romani Pontificis functionibus interesset, minutissima quæque, quæ oculis acciperet, quæque a magistris ceremoniarum fieri animadvertibat, attentè diligenterque notaret, & in palimpsesto, quem ad eum usum paratum habebat, referret, mandaretque memoriz. Quo factum est brevi, ut adeo ceremoniarum omnium peritus evaderet, ut posset etiam eos, in quorum eas, ut ita dicam, ludo didicerat, docere. Omnium igitur concessu, ejus quam profitebatur artis, primæ illi deferebantur; neque erat quisquam, qui se eidem auderet antepone. Quod declaratum in primis tunc est, cum Carolus Cardinalis Mediceus Romam profecturus esset, ut ejus, qua fulgebat, insignia dignitatis acciperet. Nam cum omnium eorum officiorum rudis accederet, quæ præstanda sunt Cardinalibus, tum inter se, tum Pontifici max. in Consistorio, & in sacris solemnibus; fuit suorum omnium opinio, ut aliquis ei Caudatarius apponeretur, experiens ac doctus, a quo officii sui admoneretur. Cumque in consultationem deliberationemque deducta res esset, non varie, sed omnibus sententiis, decretum est, neminem posse reperiri ad id munus aptiorem, quam Christophorum Bronzinum. Itaque Card. Mediceo traditur; qui tanti ejus operam æstimavit, ut secum Florentiam cum duxerit, ibique magistri ceremoniarum partes exequi voluerit, atque adeo liberaliter omnibus rebus habuerit, ut antea illum vita, quam voluntas eidem inserviendi, defecerit. Nullis erat aulicorum vitia oblitus; non ille insidias alijs frueretur,

non

non aliud clausum in pectore, aliud in lingua promptum habere, non furtim cujusquam existimationi detrahere, non commodis aliorum invidere, sed neminem ledere, omnes, quibuscunque rebus posset, opera, consilio, ac re ipsa, juvare: neque facile invenisses alterum, qui amico magis amicus esset. Nihil in ejus moribus reprehensione dignum reperisses, si unum tantum exceperisses, quod erat nimis elegans muliebrium formarum spectator, eoque in universum fœmineum sexum benevolentia studioque ferebatur, ut in amicorum aliorumque conventibus, omnes ejus sermones non alio, quam ad mulierum commendationem, revolverentur; ut etiam librum ediderit, quem Mulierum gloriam nuncupavit; in quo earum laudes ornate copioseque in astra sustulit. Quod ab eo non cupiditate aliqua, sed inconsiderata in illum sexum benevolentia, factum existimo.

XXVII. FRANCISCUS VISDOMINUS.

Semper de cujusque facultate, in aliquo artis genere, licuit judicare ex æstimatione ac pretio, quo ille apud eos sit, qui, omnium concessu, ejus artis antistites numerantur. Quod cum ita sit, quis non fateatur, Franciscum Visdominum, etiamsi ejus scripta non legerit, magnam ex epistolis, quas Cardinalium, quibus dabat operam, nomine scribebat, laudem commeruisse, cum ita a Ptolomæo Gailio Cardinali Comensi, apud quem eo gradu multos annos fuerat, probatus laudatusque discesserit? Quis est adeo in rebus Romanæ aulæ hospes ac rudis, cujus ad aures, Cardinalis Comensis virtus nomenque non venerit? At tantum illi nomen sanamque confererant scriptæ, summorum Pont. nomine ad Reges, Respubl. provinciarum præsides, de rebus ad summam Rempubl. pertinentibus, epistolæ: quæ etiam eundem ad illum honoris gradum, ad quem ascendit, perduxerunt. Non levis res est neque vulgaris, epistolas, quibus arduæ res contineantur, scribere, sed longe maxima ac difficillima. Multis est opus virtutibus illi, qui hoc se facere posse profiteatur. Mitto fidem & taciturnitatem, sine quibus munus illud constare non potest;

Tt

mitto

mitto eloquentiam, ejus prima laus est, sermonis puritas ac perspicuitas, qua sensa mentis explicantur, quæque si careat oratio, quid ille, qui scribit, velit vel non velit, percipi intelligentia non potest; mitto, inquam, hæc atque alia multa: illi, qui præstare in hoc laudis genere postulet, necessarium est summum ingenii acumen, cum singulari prudentia ac rerum maximarum usu conjunctum. Quæ prudentia tantum Cardinalis Comensis pluribus sui ævi Cardinalibus anteire existimabatur, ut, qui de re aliqua cum eo æturi essent, metuerent, ne satis ad eum parati meditatiq[ue] accederent. Itaque Clemens VIII Pont. max. vir sapientissimus ac prudentissimus, in deliberationibus suscipiendis vehementer cavebat, ne quid committeret, quod Cardinalis Comensis jure posset reprehendere. Tali igitur tantoque viro, in ea arte, in qua ille princeps habebatur, probatum fuisse, in summa laude ponendum est. Audivi de iis, qui ipsi vidissent, tantam fuisse in Cardinali illo diligentiam, actam acre judicium, ut epistolas, suo nomine a Visdomino scriptas, antea legeret, quam iis mitterentur, ad quos dabantur; atque interdum solitum esse quædam in illis mutare, vel unum verbum delere atque ejus loco alterum subrogare; quæ tamen erant ejusmodi, ut magnum lumen ac pondus illis literis adderent, atque magistrorum quorundam vim haberent, quæ iis, qui discendi cupidi essent, ostenderent, ad quam formam dirigendæ essent epistolæ, quibus perfectæ atque absoluta judicii prudentiæque ratio inesset. Sed usque adeo Cardinalis Visdomino delectatus est, ac Visdominus Cardinali usus est benevolo, ut neminem illorum, alterius satietas ac fastidium ceperit: usque adeo, mutuum illud amoris benevolentiaque vinculum, quo invicem erant adscripti, integrum inviolatumque permansit, ut nulla vis alia, nisi mors Cardinalis, illud dissolverit atque diremerit. At posteaquam lumen illud consilii, gravitatis atque prudentiæ, desiit nobis illucere, postquam tam eximium amplissimi Cardinalium Senatus ornamentum ac decus excessit e vita, voluit fortasse, tot laboribus egregie perfunctus procul a Republ. quietem atque otium sequi; sed prohibuit ipsa Republ. quæ non est

est passa desiderari a se egregiam ac tot in rebus perspectam ejus viri virtutem. Et, a multis expectatus, vixit tamen ceterorum studia Cardinalis Tontus, potentissimus eo tempore, cujus ex arbitrio auctoritateque Paulus V Pontificatum suax. administrabat. Sed ex his quoque vinculis expeditum, tandem Comum, ejus patria, recepit, ibique humanissimis his literis operam dantem vita defecit, epistolis suis antea editis.

XXVIII. EUCLIO JURISCONSULTUS.

Homini parce parco, in nulla re aliâ occupato nisi in facienda cogendaque pecunia, nihil tam cavendum est, quam, ne honorum cupiditati aditum in animum suum aperiatur. Etenim nullæ res dux ita inter se contrariæ sunt, nullæ ita inter se vehementer atque acriter pugnant, ut parsimonia & ambitio. Ubi enim hæc pedem fixit, inde illa altera suum referat necesse est; quodque quis, suum defraudans genium, comparfit miser, ambitioni, extraordinariis sumptibus, distrahendum dissipandumque permittat. Largiendum, convivandum, liberalius epulis indulgendum, rhedæ equique parandi, major familiarium numerus alendus est illi, qui honorum gloriæque studio ducitur. Sed fit interdum, ut ea honorum capiendorum claritas & fiducia parsimoniam, paulo ante pulsam, accendat ad pugnam, ut arcem animi, quam amiserat, recuperare, ejusdemque rursus potiri conetur, nec inanem operamumat, sed in veterem regni locum possessionemque restituat. Ut aliquot ante annos accidit in Euclione J. C. Hispano. Hic juvenis Romam sese contulerat, ut ibi negotiaretur; hoc est, ut ex labore studioque, quod ad res aliorum conferret, rem suam strenue angeret. Itaque, ut mos est eorum hominum, statim clerici vestem & ornatum accepit, cepitque nonnullorum suæ nationis commissis sibi negotia studiose diligenterque peragere: verum, ex mercede, quam consequabatur, vix tantulum decerpebat, quod esset ad vitam parce ac duriter agendam satis; sed quantum necessitatibus naturæ detrahebat, tantundem nummorum acervo, quem cumulare instituerat,

addebat. Qui acervus cum jam satis ex sententia excrevisset, statuit, advenisse tempus; quo liberalius sumtui genioque esset indulgendum. Itaque famuli unius famulæque operas conduxit, & largius mensas cepit instruere; ita tamen, ut singulis diebus, non amplius quam quinis obolis carnes, & binis olera ac poma, in cenas ac prandia, coëmenda mandaret. At cum sæpe in potentiorum ædes se conferret, ut negotiis sibi commissis operam daret; furtim, & tanquam per cuniculos, ejus in animum irrepsit ambitio; quod videret, iis præ ceteris honorem haberi, qui caudam traherent, quo vulgus Antifistites vocat; statuit, parsimoniz, cui tanquam uxori, qui nullum est æctius vinculum, hærebat, nuncium remittere, eamque suas sibi res habere jubere, ac novas cum ambitione affinitates societatesque contrahere. Itaque dedit operam, ut ad eorum numerum adscriberetur, quos aula Referendarios appellat, quique, nisi simul superioris alterius ordinis munere fungantur, nigra tantum veste utuntur. Atque, ut eum, quem inscenderat honoris gradum, pro dignitate tueretur, rhedam equosque coëmit, circumpedes quatuor, qui se sectarentur, mercede conduxit, ac varia veste ornavit. Usque illi sunt visi sunt Euclioni neutiquam graves, donec, amicorum salutationibus & adulantium gratulationibus inflatus, intumuit. At postquam favor ille, tanquam flatus, hominem defecit, quo elatus in altum fuerat, continuo, quasi e cælo delapsus, decidit, tanquam in lutum, in memoriam sordium antiquarum, in quibus olim totis vestigiis hærebat. Itaque in otio, quo sua eum ambitio perduxisset, cum animo reputans cogitansque, jam sibi hordeum, fœnum, avenam, quæ equos aleret emendam, circumpedibus quatuor mercedem, cibum, vestemque præbendam, curandum, ut equi unguibus ferro subactum haberent solum, laxiores ædes conducendas, sumtuosius mensam instruendam, aliaque ejusmodi, quæ, omnibus fere horis, crumentæ animam interciperent; hæc igitur sedulo in animo versans, ea molestia affectus est, ut ex ægritudine in morbum inciderit. Advocatur medicus; accurrit. At ille, qui naturam & consuetudinem hominis nosset, cui medicinam adhibere de-

debebat, continuo, quo morbo laboraret, intellexit; atque: Præsul, inquit, Reverendissime, gravis est hic morbus, ut video, qui te invasit; nec longius abes a periculo. Quamobrem magnopere tibi laborandum est, ex eo ut convalescās. Ita est, ut loqueris, ait ægrotus; fer igitur opem, equidem angor, crucior, differor doloribus, partem mihi viscerum abripi sentio. Medicus, qui, ex pulsu, carere eum febrī, non ignorabat, risum tenere vix poterat; atque: Bono, inquit, animo es jam; reperisse me arbitror, quod bonam hujus morbi partem a te dejiciat; missos fac duos ex his famulis, quos circa te habes, postridie revertar, ut videam, ecquid præsidii fuerit in hoc pharmaco, quod tibi propino. Ille, cui nihil tam erat cordi quam sanitas, non procrastinat, sed statim, ex medici præscripto, duorum hominum sumit, hoc est, non minima se ægritudinis illius parte, levat. Revertitur medicus; rogat, ut valeat, ut medicamentum illud eum juverit, quod jusserit sumere. Bene, respondet Euclio, sed non tamen se usquequaque ex sententia valere. Vin tu, inquit medicus, huic stulto auscultare, neque medico amplius egere? Loquere, ait ille; audio lubens: nam nihil est, quod magis misere cupiam. Igitur, subdit medicus, reliquos duos famulos domo, quantum potest, abige, & mutare coloniam jube; tum, auctione facta, equos, rhedam, & rhedarium quoque, ei, qui licitetur, addicito, atque ad veterem vivendi rationem, multo hac salubriorem, quasi postliminio revertere. At Euclio: O medicum singularem, exclamat, neque jam cum Hippocrate & Galeno comparandum; sed Æsculapij etiam ipsi & Apollini antefereendum! ut ad intima ejus morbi penetralia se intulit! ut rationem, qua illi occurri possit, invenit! Vix bidnum intercessit ab hoc sermone, quem cum medico habuit, cum, rheda equisque divenditis, & rhedario ac circumpedibus, qui tantum illi morbi creaverant, in nialam rem jussu abire, domum vacuum fecit, seque in perpetuum omni molestia dissolvit; atque octo illos annos, quibus deinceps vixit, ita sano fuit corpore, ut sua causa nullus medicus, vel ramento saltem plumbeo, factus sit ditor. Humatus est in templo suæ nationis, prope sacrum.

XXIX. MARCELLUS VESTRIUS
BARBIANUS.

Qui summis in Republ. viris, & virtutum maximarum fama clarissimis, aliquo cognationis nexu implicati tenentur, magnam sibi ab eorum claritate vim attrahunt, vel ad vituperationem vel ad laudem. Nam, si se ab illorum virtutibus longo intervallo disjunxerint, eorum improbitas fortasse jacuisset in tenebris; sed ob luminis propinquitatem, cui adhærent, latere non potest, magisque edito in loco atque perspicuo collocatus, obloquentium sermonibus, tanquam jaculis, patet. Ex contrario, qui cognatorum suorum, omni dignitate principum, similitudinem imitatione persequi student, id assequuntur, ut non solum sua virtute clari existant, verum etiam, ab illorum splendore, claritatis ac nobilitatis plurimum hauriant. Timotheum non propria tantum laus, sed quoque accepta a patre gloria, quam multis ille virtutibus auxit, nobilitavit: Africanus ille minor, cujus virtute Carthago, æmula imperii Romani, a stirpe interiit, nonne avunculi, imperatoris summi, rebus gestis notior atque illustrior, omnium linguis ac literis celebratur? Sed nullus erit finis, si sigillatim referre omnes placeat, ad quorum laudem, majorum commendatio plurimum insuit. Item contra infinitum esset, in eorum commemoratione versari, quorum improbitas atque nequitia eo majore odio ac contumelia digna videtur, quo magis ipsis relictæ a maioribus, a quibus degenerarunt, gloriæ repugnat. Hic laudatissimus antiquorum mos ille defluxit, ut viri nobiles, suarum ædium in atriis, eorum ex sua familia virorum imagines depictas haberent, quorum nomen vel eloquentiæ vel Reipubl. bene gerendæ laus, vel rei militaris gloria, memoriæ posteritatis sempiternæ mandasset; quæ imagines non solum commemoratione hominum & cognitione formarum delectarent, sed posteritatis illorum animos ad imitationem similium factorum incenderent. Verum, inter eos, qui majorum suorum ima-

imagines, vel in tabulis pictas, vel in æt incisas, vel in marmore insculptas, ac magis in animo impressas habuerunt, ut illorum in se virtutes, imitando, effingerent atque exprimerent, Marcellus Vestrius Barbianus, non postremum locum ac numerum obtinet. Etenim Octavianii patris signum, affabre e marmore effictum, suo in cubiculo collocatum, ut sepius ipsemet vidi, habebat; credo, ut præclaris domesticæ virtutis exemplis excitatus, ad illius similitudinem se conformaret atque componeret. Natus est hic Octavianus Foro Cornelii (quainquam, ab origine ultima, stirpis Romanæ se diceret) nobili & honesto inter suos loco, Jus civile didicit; in quo adeo perfectus evasit, ut Romæ, quo se contulerat, Jurisconsultus in primis haberetur. Ubi cum assidue in foro judiciisque versaretur, complures summos viros opera forensi sibi devinxit, & ad divitias pervenit. Sed usque adeo ingenio, quo præstabat, ac longo etiam usu ac exercitatione, omnes Romanæ aulæ mores, ac fori jura, possedit, ut eruditissimum doctissimumque librum; de omnibus Urbis magistratibus, ac de omnium judiciorum ratione, scriptum ediderit: in quo totius aulæ Rom. forma expressa conspicitur; ut, qui sit in ea rudis atque hospes, continuo, ejus libri ope, assequatur, ut penitus totam illam Rempubl. noverit. Hic Marcellum filium genuit ex se, atque, pro ut ipse erat studiosus literarum, omnem, ad filium erudiendum, laborem ac studium contulit. Nec inanis ejus fuit labor. Nam in puero, præter docilitatem ingenii, summus discendi ardor perpetuusque flagrabat. Sed erat in primis Latinæ eloquentiæ cupidus; in eaque, id quod sibi summæ felicitatis loco tribuebat, magistrum habuit M. Antonium Muretum, omnium tum suæ tum multo etiam superioris ætatis oratorum eloquentissimum. Neque apud illum operam perdidit; nam, si non aliud, illud saltem ab eo diligens faciendæ expoliendæque orationis studium arripuit, in quo ille excellebat, & in primis purum ac dilucidum scribendi quoddam genus, quod hodie a plerisque vel negligitur, vel, quia in difficili labore versatur, quem maxima pars hominum fugit, desperatur. Sed, quoniam patri ille erat unicus,

coactus est uxorem ducere, virginem nobilem Romanam, ex Rusticorum familia; quæ familia, mea ætate, ut de multis aliis contigit, Francisci Rustici, ad quem unum redacta erat, morte interiit. Ex qua uxore virilem sexum suscepit, quam ex parentis sui nomine, Octavianum appellavit, omnium elegantissimarum artium instructo ornatum, quæ in nobilem virum conveniunt; adeo ut ne Musices quidem esset ignarus: nam eleganter & fidibus & voce canebat, ac propter ejus artis studium, quo adolescens mirè tenebatur, omnes ejus ætatis modulandi facultate magistros arcta sibi familiaritate conjunctos habebat, ut Lucam Marentium, Felicem Anesium, Rogerium Joannellum, aliosque. Sed cum, post mortem patris, propter divitias, quibus præstabat, illi liceret uxorem dotatam nobili genere ducere, ex qua liberos procrearet, qui genus propagarent, maluit libertati, quæ, simul ac uxor pedem intro in domum fert, exulatum abire compellitur, quam posteritati familiæ, consulere. Itaque, deposito pallio gladioque, erat enim honorarius Calatravæ in Hispania miles, togam sumsit, & ab Urbano VIII, ejus, etiam tum Cardinalis, in intimam familiaritatem pervenerat, ejus in aulam exceptus est, & in amicorum numero habitus, quibuscumque requiescere solitus erat, sicubi eum satietas hominum & negotii odium ceperat: in eoque gradu, majora sperans, est mortuus, ejusque morte, quæ illius fuerant bona, ad sororem, quæ Romæ in cœnobio S. Annæ perpetuam Deo virginitatem dicaverat, lege redierunt. Sed ad Marcellum patrem revertamur, unde paululum digressi fuimus. Qui cum plures annos cum ea, quam habebat, uxore egisset, & ea illum, ille vero eam tulisset, affectus id est, quod mariti fere omnes misere cupiunt, nec impetrant tamen, ut illa, ipso superstite, domo foras efferetur. Sed, cum vegeta ac robusta adhuc esset ætate, ac plures ipsi conditiones, quibus dos magna comes esset, objicerentur, nullam voluit accipere; tum aliorum, tum multo magis suo exemplo doctus, quantum sit negotii in una muliere, quæ nunquam satis ornatur, nunquam satis expletur, quantæque incommoditates, sumtusque intolerabiles, dapniles dotes, con-

consequantur; præsertim, cum satis sibi liberorum esset, quorum procreandorum causa maxime uxor expetitur: sed aulam sequi, & fortunam experiri constituit. Quæ, statim ab initio vultum illi alacrem ac lætum exprimit. Nam traditam a Gregorio XIV Pont. max. earum epistolarum, quæ Brevia appellantur, scribendarum provinciam accepit. Neque parvo atque vulgari, sed magno ac peculiari, ab eo affectus beneficio est, magnumque de sua ipsius virtute iudicium factum. Nam nemo ad id officium admittitur, nisi fide & industria cognita, quod magno in eo juris civilis & pontificii notitia requiritur, & quod necesse est, multorum magnorumque in Republ. consiliorum eum esse participem. Quod munus eo illi gratius accidit, quod eloquentiæ declarandæ facultas obtingeret. Numquam enim, quamvis re uxoria implicitus, Latine scribendi usum exercitationemque dimiserat; qui usus est illi necessarius in primis, qui recte tueri id munus efflagitat. Quem locum honoris non solum tenuit apud Gregorium, quoad ille vixit, verum etiam apud Clementem VIII, annos, quibus vixit, omnes. Novissimo tempore apud Paulum V eidem muneri præfuit; quo Pontifice, primis fere pontificatus illius annis, vivere desiit. Fortunam adversam numquam expertus est, nisi semel in una ex sororibus, nobili viro nupta, quam, rumore emanaverat, parum honeste pudicitiam habere. Sed id fortasse fama magis quam re ipsa valebat. Verum ille, bonæ estimationis cupidus, quique a suis non solum flagitium, sed flagitii suspicionem abesse debere existimaret, usque eo commotus est, ut illam, quoad rumor ille, sive verus sive falsus, evanesceret, non in aliquam nobilium sacrarumque Dei virginum domum, quod proclive illi fuisset, includendam, sed in meretricum conversarum claustra rapiendam condendamque curaverit; neque, amicorum cognatorumve precibus exoratus, adduci potuit, ut cum ea rediret in gratiam, vel ea saltem vincula, in quæ, ejus jussu, confecta fuerat, solvenda mandaret. Erat in eo iudicium acre, ac prudentia non vulgaris, sed quam quasi veteratoriam diceres. Adeo ut Clemens VIII, cum eum ad se venientem aspiceret;

Vulpes adest, diceret, nos paremus ad cavendum. Habebat aliquot circa se canes, quibus vita erat, sua ipsorum opera ad eas literas, quas Brevia vocari diximus, procurandas, clientibus mercede locata; quibus, quia ad sua negotia utebatur, omnia, quæcunque postulassent, impetrata reddebat; idque volebat esse mercedem laborum ac sollicitudinum, si quas pro ipso capiebant: atque erat suspicio, multa cum ipsis, tanquam a Pontifice impetrata deferre, de quibus ne mentionem quidem cum illo fecisset. Ac Clemens VIII, qui hominis fidem suspectam habebat, die quodam, manifesto in flagitio se deprehensum eum habere existimavit. Nam cum breve quoddam ab eo, suo annulo obsignandum, accepisset, in quo nescio quid, nemini ante concessum, continebatur, elatus ira. Si istuc, inquit, est a me datum, nihil moror, quin suspensus inteream. Sed Vestrius, nihilo commotior factus, domum accurrit, ac supplicem libellum retulit, Pontificis ipsius manu subscriptum, in quo Petri Cardinalis Aldobrandini, fratris filii, honoris gratia beneficium illud, postulanti, deferrebat. Quo inspecto, Pontificem, tantum capiti suo mali se gratis deprecatum fuisse, pœnituit. Videbatur Cardinalatus honoris cupidus; ad quem ascendisset, nisi aquæ inter cutem morbo subreptus antea fuisset. Post cuius mortem, legi ego paginam, suo chirographo scriptam, in qua familiam totam ordinabat, mihi que, ac Fabio Sergardio affini suo, epistolarum scribendarum partes assignabat. Habuit semel orationem ad S. R. E. Cardinales, cum, subrogandi Pontificis causa, conclave ingressuri essent; quæ extat; eaque non tam verborum sententiarumque luminibus, quibus enitebat, placuit, quam actione, quæ fuit in eo singularis.

xxx. ANSALDUS CEBÆ.

Ligures, ac Genuenses, in primis Liguriæ totius principes, nullis Italicarum regionum atque urbium hominibus; ingenii præstantia iudicii que acumine cedere, præclara ingenia, quæ inde provenerunt, ostendunt. Multi enim numerari a nobis possunt, partim in scriben-

benda historia, partim in pœtica facultate, partim eloquentiæ fama; illustres. Sed plures semper, quam necesse esset, earum urbium decori ornamentoque, a literarum gloria ad lucri cupiditatem & cogendæ pecuniæ studium abstraxit; tanquam si Rebus publ. sit honestius, eives suos divitiis affluere, quam virtutum laudē præstare. Quod longe secus est: nam divitiarum gloria, fluxa atque fragilis est, virtus clara æternaque habetur; ac multo præstat, unum in civitate eximium doctrinæ virum, quam multos divites esse. Num Colophonii, Chii, Smyrnæ, Salaminæ, exiguum hominum locupletissimorum numerum fuisse existimamus? immo plures erant, nec, divitiis, iis inferiores, qui hodie Picos auro superare creduntur. At nunquam inter eas civitates certamen fuit de divite aliquo, qui opum magnitudine ceteris anteisset, sed de Homero acriter vehementerque pugnatum est semper. Unaquæque enim earum civitatum, eum sibi vendicabat, repetebat, suum esse asserbat. Magna omnino vis est virtutis ac splendor, præ cuius claritate, ceterarum rerum lumen, tenebrarum instar videtur habere. Quod intelligens Ansaldus Ceba Genuensis, quamvis generis nobilitate, quamvis formæ dignitate, quamvis opibus ac potentia, nemini suorum civium esset inferior; nam ex suis maioribus aliquot Rempubl. Genuensem, Ducis honore ac nomine, administraverant: tamen generosa quadam contumacia, a magnitudine animi ducta, contempsit divitias; pecuniæ faciendæ occasiones, quarum magna se copia dabat, omisit; æqualium studia, ludos, jocos, convivia, magna ex parte deferuit; ac totum se possidendum literis tradidit, eo labore ac contentione animi, ut nulla quies, nulla remissio, ab illis abstraheret; ut etiam inde ea corporis ægritudo manaverit, quæ usque ad exitum vitæ obsessum atque irretitum eum tenuit. Semper doctum aliquod carmen, vel philosophicum quidpiam, ex Aristotelis vel Platonis disciplina desumptum, meditabatur; & usque adeo in attenta harum rerum cogitatione defixus hærebat, ut neque, domo exiens, & in publicum prodians, ab eadem defereretur. Nam fiebat interdum, ut pileo caput tegere, ac pallio humeros onerare obliviscer-

retur, neque antea, se iis carere, animadverteret, quam ab aliquo salutatus, vellet salutem mutuam reddere. Nam, manum ad caput adducens, inane a pileo illud esse comperiebat. Multa, adolescens, ut sit, amatorie scripsit, sive ætatis sive cupidinis æstu abreptus, quæ deinde, paulo natu grandior, cum sese jam etiam odisset, emendavit atque correxit. Nam aliis hymnis odisque editis, plenis gravitatis pietatisque, quæ minus caste religioseque scripsisset, occultanda atque ex omni memoria evellenda curavit, si tamen assequi potuit, quod voluit; nam melius ac facilius in agro inhærent ac succrescunt inutiles ac steriles herbæ, quam salubres ac fertiles. Totum se deinde tradidit ad Ester, poemata sacra componendum; quod etiam feliciter absolvit atque edidit. Sed cum illud deinde in Cardinalis Aurizæ, Archiepiscopi Panormitani, judicantis arbitrium venisset, multa sunt inventa in eo, quæ titubare viderentur. Videlicet, quod multa in eo continerentur absurda, quæque a communi hominum sensu abhorrerent. Quam ille accusationem, literis ad Cardinalem, cujus ille delinitor esse debebat, arrogantibus sane verbis, scriptis, est resolvere conatus. Quarum litterarum exemplum placuit hoc loco subijcere.

Cardinalis Illustrissime. Poëtæ magni, quos sine furore esse posse, Democritus negat, sunt excusandi, si, eo impetu, pene a sensu mentis abstracti, quædam interdum efferant, quæ incredibilia & irrisione digna existimantur, ut apud Sophoclem, in Trachiniis, Deianira, Nessum Centaurum, ait, homines ab una fluminis ripa ad alteram manu traducere; quod est intelligendum, nullis velis remisque adhibitis. Idem etiam Sophocles in Tragœdia, cujus nomen est Electra, eandem Electram, Chiriotemi sorori, nescio quid secum asserenti, quod patri sacrificaretur, imperantem inducit, ut illud, quidquid erat, in pulvere alte defossa abstruderet, aut ventorum in gremio. Ubi Scholiastes Græcus: Verbum, inquit, abstrudendi, sive celandi, apte congruenterque pulveri convenit, non autem ventis; quamobrem aliud extrinsecus est addendum, quod minime a ventis abhorreat; cujusmodi, illud esset ventorum in sinu au-

ferendum asportandumque deponere. Id quod etiam Homeri, poetarum principis, auctoritate confirmat, cum dicit, arma equosque jacere. Jacere enim, est quidem proprium armorum; equorum autem (nisi, si dormiant) stare: quodcirca, subintelligendum illud est verbum. Quapropter, me iudice, magnis hominum ingeniis, quibus quidlibet audendi semper fuit æqua potestas, si quid audacius dixerint, non est vitio vertendum, sed potius suspiciendum, vel aliquod tanquam mysterium habendum, quod vulgus imperitorum nosse vel assequi intelligentia non possit. Adde, quod interdum contemnere, nec singula singulis reddere, argumentum est magis, furoris magnificentia, commoti elatique in altum animi, quam hominis, ignorantie tenebris obsiti. Quamobrem sine me remigio veloque in altum capeffere, neque in eo offendaris; & quamvis fortasse minutum inter poetas enumeres, patere me in præsentia, maguorum præsidio fultum, elabi, eumque, quem, servos tuos inter, locum mihi dedisti, tuere, atque defende, Carignani.

Cui epistolæ, Cardinalis in hæc verba respondit: Non fuit igitur alienum a ratione, gens illud dicendi in dubitationem vocare, quod insolens & abnorme esse fateri cogamur, cujus tuendi gratia ad summorum poetarum auctoritatem sit confugiendum, quodque furoris poetici, qui transversos homines, nempe de recta via, agit, excusatione defendatur. Et sane loci poetarum, quos te magistros habere dicis, mirifice ad rem, de qua ambigitur, faciunt. Verum, illud animadvertendum est, cum, in Trachiniis, Nessus Centaurus dicitur manibus homines flumen trajicere, non remis navigando vel velis, trajiciendi verbum apte convenit, tum velis remisque tum manibus. Utroque enim modo flumina trajici possunt. Itaque hæc dicendi ratio non mihi videtur eam inconvenientiam habere, quam habet illa, quæ narrat, quandam decem millium viam esse pedibus, non equo equitando, neque navigio, nam potest quidem aliquis ire navigio, non autem equitare. Quid enim commune habet equitandi ratio cum navigatione? mitto, quod remis remigare, idem est quod remis ferri; sed additur,

tur, remigando, quo res magis explicetur; ut cum dicimus, verbis aliquem loqui. Ad Electram quod attinet, narratur mihi, magis eam esse verborum sententiam, ut Chrysostomi imperetur, ut id, quod ferret, in ventis constructum ac reconditum haberet, aut in pulvere, non autem, quemadmodum tu ipse vertis, vel in pulvere vel in ventis. Ita enim sequeretur, ut non statim venti suum tibi verbum vindicarent, sed post pulverem. Mitto illud, quod ventis celandum quidquam tradere (quod tum fit, cum ab illis dissipatum atque dispersum, e conspectu hominum evolat,) non est ita novum, (pace Scholiastæ dixerim) nec Virgilio visum est tale, qui etiam nova magis ratione, de eo qui urbem relinqueret, ait, quo longius ab ea recederet, eo etiam illam magis abscondere. Postremo, non me latet, Homerum in Iliade Ulyssem a Dolone querentem induci, ubinam Hectoris equi armæque jaceant, quo, etiam dicendi genere, nisi memoria me fugit, usus est alibi. Sed ajunt, jacendi verbum, ut, Eustathius est auctor, in duplici significatione versari; neque solum, jacere, cum dici qui fusus sit humi, sed illud etiam quod uspiam sepositum sit atque reconditum. Idem fere tradit Budæus, qui hujus verbi nominis, situm, in quo aliquid collocetur, designari confirmat. Quamobrem, ni fallor, exempla ista, in quorum castra, tanquam ad petendum auxilium, confugis, tuum remorum inflatum nihil adjuvant; nisi si illud, quod quispiam inusitatus & enormius dixerit, argumenti sumendum sit loco, vel præstantioris illius in arte poetica facultatis, vel meæ inscitæ, quorum utrumque libenter dederò, neque repugnabo. Quæ cum ita sint, infla, per me, tuo arbitrato vela remosque, nunquam enim in eo offendar; sed dabitur mihi existimandi locus, ubi tuus iste flaverit ventus, omnem in scribendo licentiam habiturum esse vim legis.

Utrius oratio propius ad veritatem accedat, non hujus est loci definire; sed mihi videtur uterque pugnare pro nugis, ac velitari inter se, quemadmodum est in veri proverbio, *de lana caprina*. Verum, utut sese res habeat, illa Ansaldi epistola, aliquanto liberius scripta, illi fraudi fuit. Nam data est opera, ut poema ejusdem,

jam editum, e manibus hominum eriperetur, atque inter libros prohibitus referretur. Neque alia ejus decreti causa afferrebat, nisi quod historię sacrę veritatem mendaciunculis multis contaminasset. Neque, ad flectendum rigidum irati hominis animum, quidquam illi suffragatum est jus poëtarum atque potestas; qui poëtarum nomen tueri non possunt, nisi vera argumenta inventis suis augeant atque ornent.

XXXI. JO. FRANCISCUS PERANDA.

Vetustissimum epistolarum scribendarum usum, utilitates multę, etque maximę, consequuntur. Et enim, earum beneficio, fere omnium quę ubique, etiam in ultimis orbis terrę regionibus geruntur, certiores efficiuntur, amicorum benevolentiam conservamus, novas amicitias conglutinamus, veteres instauramus, eos, qui cordi in primis cari sunt nostro, ut parentes, liberi, fratres, cognati, amici, quamvis longo a nobis intervallo disjunctos, adimus, amplectimur, alloquimur, consolamur, salvere jubemus; ea, quę coram ne efferamus, prohibet metus aut pudor, epistola omni pene metu ac rubore soluta, non titubanter, neque perplexe, sed audacter discerteque profundit; quę illi mandata committitis, alacriter excipit, diligenter custodit, fideliter explicat. Ac propter tam magnas utilitates & commoda, quę ab ea percipiuntur, factum est, ut omnibus fere seculis, summus illi honor tributus sit, magnoque in pretio habiti sint, qui tantum munus prestare potuerint, ut scire eleganterque epistolas scriberent. Quorum hominum, magna semper paucitas fuit. Quot enim sunt ex iis, qui epistolas ediderant, quos æquo animo legere possumus? M. Cicero, apud antiquos, ut ceteris in rebus, quibus studium suum dedisset, fuit omnium facile princeps. Secutus est Plinius junior; cujus similitudinem multi assidue imitatione conantur. Ac multa post secula, cum nulum jam veteris eloquentię vestigium appareret, enituit Symmachus, qui unam scribendi laudem putavit esse breviter. Avorum proavorumque nostrorum memoria, Cardinalis Papiensis, singulari judicio ac sapientia

tia vir, magnam in scribendis epistolis consecutus est laudem; sunt enim gravitatis prudentiæque pleuissimæ. Paulo supra nostram ætatem Episcopus Bajusæ & Jo. Guidiccioneus, Forosemproni Episcopi, floruerunt, quorum epistolæ, Italica lingua conscriptæ, seruntur in cælum. Nec minorem sunt gloriam adepti, Iacobus Sadoletus, ac Petrus Bembus, Cardinales; quibus auctoribus, pene pristinus Latinæ eloquentiæ honor est redditus. Quid igitur causæ esse dicam, cur in ea re, quæ communi hominum societati est adeo necessaria, in qua omnes fere quotidie elaborant (quotus enim quisque est, qui non cupiam necesse habeat litteras dare?) tam pauci, non dicam admirabiles, sed, si verum fateri liceat, tolerabiles inveniuntur, nisi rei quandam magnitudinem ac difficultatem? nam quo loco posita laus est, omnis semper ad eum aditus arduus atque difficilis extitit; ideoque quam minime multis illuc perveniendi facultas atque animus adfuit. Multis enim & multigenibus opus est illi virtutibus, qui hanc tantum spe laudem animoque complectitur. Primum dum est opus ingenio, opus iudicio, multis opus literis, opus eloquentia, opus rerum maximarum usu, opus in primis acerrimo exquisitoque iudicio. At nostra memoria magnum, in scriptoribus epistolarum, nomen habuit Jo. Franciscus Peranda; de cuius facultate licet existimare ex libris epistolarum, quos edidit. At illi ingenii acuendi & exercendi facultas & occasio non defuit. Etenim Henrico Cardinali Cajetano navavit operam, ab epistolis; qui Cardinalis, ob honores quos gerebat, ob munera quibusungebatur, ob nobiles illas legationes quas obivit, nullam fere horam, vacuum a negotio potuit sumere; quarum occupationum multitudinem in eum erat redundare necesse, quem consiliorum omnium participem esse volebat. Erat enim Henricus, non solum Cardinalis, cuius ordinis hominibus nunquam solet negotium deesse, verum etiam S. R. E. Camerarius, civitatem Bononiæ, legati nomine, administravit, profectus est deinde in Galliam, hoc eodem titulo, turbulentissimis illis ejus Regni temporibus, cum, Henrico III occiso, Rex Navarra, arctissimo illi cognationis nexu devinctus, sed

sed tum temporis simulans, se esse a Catholica religione
 sejunctum, quia ita tibi facto opus erat, Regnum il-
 lud, tanquam sibi debitum, occupare studebat: ubi Car-
 dinalis eas res gessit, quæ, Romam perlatæ, a concio-
 natoribus, in suggestis, miris in cælum laudibus effere-
 bantur. Quæ Sixtus V graviter fecerit, & aliorum, at-
 que ab ipsis dicebantur, accipiens, concionatores illos
 comprimi iussit; in quibus fuit Bartholomæus Blondus,
 Soc. Jesu; qui postea, vulgi judicio, primum tenuit
 concionatorum locum. Postremo, ad Regem Poloniæ,
 maximis de rebus, a Clemente VIII legatus est mis-
 sus; quam legationem scimus fuisse magnificentissi-
 mam; nam, præter circumpedum gregem varia indu-
 tum veste, præter magnum honestissimorum hominum
 numerum, qui eum, honoris gratia, sectati sunt, præter
 ingens auri & argenti pondus ac preciosam supellesti-
 lem, quibus se rebus instruxerat, magnam vinorum
 præstantissimorum vim, tota Italia exquisitam, secum
 avehendam exportandamque curavit; quo hominibus
 illis longe gratissimum fecit, qui non utuntur vino nisi
 importato; *ac regio illa feret piper & cilius ocus urva;*
 quod vinum, non solum in conviviiis, quæ quotidie agi-
 tabat, large copioseque profundeabat, verum etiam om-
 nibus, quantumvis multibibis atque merobibis, exhi-
 beri jubebat, qui ædes suas adirent, ut ventrem prolu-
 erent; unde eum madidi exirent, exclamabant: O virum
 principem, vini potentem! O regiones Italix felicissimæ,
 quæ boni tantum effertis! quis non optaverit, se in ea
 Italix parte, ubi optima vina gignuntur, sepultum esse,
 quam hic in patria vivere; Jamque sua illis cerevisia,
 præ illorum vinorum præstantia, nautea erat; neque
 eam poterant amplius aspicere. Interea Cardinalis Hen-
 ricus non cessabat Perandam, cujus opera quantæ sibi
 esset utilitati ornamentoque, sentiebat; non cessabat,
 inquam, pecunia ac muneribus sublevare, ejusque rem,
 quod poterat, augere. Cujus amplificandæ materiam da-
 bat Camerarii provincia, quam sustinebat. Atque ad di-
 vitias pervenisset, si scisset uti foro, neque id, quod da-
 batur, maluisset perdere, quam conservare. Etenim quan-
 tum a domini in eum benignitate prodibat, tantundem,

& eo amplius, refundebatur in eos, qui ex veteris Romæ ruinis signa, vel marmorea vel ænea, si quæ essent, aut alia egregiæ antiquitatis monumenta eruerent. Quod negotium cum aliter illi cecidisset atque opinatus fuerat, nimirum tetre infelicitèrque, factum est, ut rursus in eum se inopie locum detruderet, unde cum Cardinalis conatus erat extrahere, immo rem eo reduceret suam, ut bonis careret. Erat præterea optimorum librorum studiosus in primis, in quibus tota Urbe exquirendis comparandisque, nulli neque labori neque suum tui parcebat. Quorum unus, longe sibi carissimus, quem, diu expetitur, vix tandem invenerat, (ut Gabriel Bombasius, ejus amicus, mihi narrabat) simiæ cujusdam opera sive astu, pene corruptus totus interiit. Erat hæc simula Cardinali in amoribus ac deliciis, quæ lepidos de se ludos iis, qui paululum oblectare se vellent, omnibus dabat; sed die quodam, cum vincula, quibus erat constricta, rupisset, totas ædēs vaga lustraverat, ac demum, ne capi posset, ita se occultaverat, ut nulla cujusquam diligentia reperiretur. Aberat tum domo Peranda; in quam cum multas post horas se recepisset, ac lumen afferri & cubiculi sui fores aperiri jussisset, simiam offendit; quæ, ne otiosa ibi sederet, ex atramentario gossipium, multo imbutum atramento, extraxerat, eoque singulas ejus libri paginas infecerat, turpiterque fœdaverat; quod ubi factum est palam, ceteris, ad quos nihil ea res pertinebat, risum, illi autem, qui sciret, quanti librum emisset, quamque cordi carus esset suo, cordolium exhibuit. At vir hic, quamvis egregius, non potuit effugere, quin ad eundem scopulum navim offenderet, ad quam aulici fere omnes suam impellunt; nimirum ut insigni aliqua calamitate, tanquam fabulam vitæ, concluderet. At quoniam fato fieri dicam nescio, ut, qui propter assiduitatem, diligentiam, fidemque, quam dominis suis præstant, propter illorum auctoritatem & gratiam, propter illustrium virorum amicitias, quas in aula contrahunt, meliore conditione deberent esse quam ceteri, eorum præ ceteris vita, fortunæ jaculis pateat. Etenim vel bonorum naufragium faciunt, vel in renium, vel in artuum, vel in vesicæ morbum

nam incidunt, vel in nosocomium aliquod, naturæ debitum reddunt. Quamquam hæ illorum infortuniorum causæ possint asserri: primum, bonorum naufragium, quod sæpe aulici incurrunt, ut dominis rem gratam faciant, qui domini familiares suos fere pulchra veste, quam ingenio bono, esse ornatos malunt; itaque illi, præterquam res ipsorum patitur, student elegantiae: deinde, adversæ valetudines, quod, dies noctesque, horam fere nullam, operæ ac laboris vacuam, habeant, ut dicto audientes sint dominis; qui, æquum an iniquum sit quod imperant, non cogitant. Sed Peraudam, præter egestatem, ea calamitas oppressit, quæ omnem ab animo voluptatem ac lætitiā abigit; videlicet cæcitas, ut Tobias senex Raphaeli Angelo, in humana figura, perpetuum ipsi gaudium precanti, non incommodè respondisse dicatur: *Quale gaudium mihi erit, qui in tenebris sedeo, & lumen cæci non video?* At ille tantum infortunium ita æquo hilarique perpessus est animo, ut, tantum ea delectaretur, jocos facetiasque continere non potuerit; eas tamen facetias, quæ seriū aliquod ac grave significant. Nos, ex omnibus, quæ facete jocoseque dixit, unum tantum eligemus; unde appareat, quantum id, quod ceteri summum fere malum putant, ipse contemserit ac pro nihilo duxerit. Finxit, in actis Parmassi (nam Trajanus Boccalinus, in illis componendis, eo adjectore præsertim est usus,) finxit, inquam, missum fuisse Romam ab Apolline unum, collyrium nescio quod ferentem, quo si oculos Peranda inungeret, amissum lumen recuperaret; ac Peraudam, primum nuncio delectatum fuisse, tum illum rogasse, num melius cum rebus humanis ageretur, quam antea esset, quam ipse aspectum prorsus amitteret; cunque accepisset, nihilo meliore, immo deteriore, eas loco inveniri, tum Perandam dixisse: Quid mihi igitur opus est oculis? nempe ut ea videam, quæ, ne aspicerem, oculos effodi mihi juberem? ergo maximas Apollini gratias ago habeoque; sed collyrium istud nihil moror. Atque hanc animi constantiam alacritatemque ad extremum usque spiritum conservavit.

XXXII. GREGORIUS PORTIUS.

Felix illa virtus ingenii, qua olim, docta Græcorum natio, unde omnis vis eloquentiæ, omnium disciplinarum inventa, emanarunt, cunctis orbis terræ gentibus longe multumque antecessit, etiam nunc in iis clu-
cet, quos ex illis regionibus, quondam florentibus, nunc temporum injuria, quasi adversis tempestatibus, afflictis, ac perditis, Romani, tanquam ad aliquem portum, nau-
fragos appulisse conspeximus. Meminimus, Jo. Mathæum Caryophylum, Petrum Arcudium, Jo. Demisiani-
um, aliosque, quos invida mors, celerius quam reili-
terariæ expediret, summa cum laude in omnium do-
ctrinarum genere fuisse versatos. Nunc vero oculis no-
stris cernimus Leonem Allatium Chium, qui ad orna-
mentum hujus sæculi, ad splendorem literarum, ad ape-
riendum veritatis lumen, cui lucis inimici tenebras co-
nantur offundere, ad ecclesiæ Romanæ defensionem,
contra improbos hæreticorum conatus, denique ad om-
nia summa natus, propter excellentem singularemque
Græcæ Latinæque eruditionis scientiam, videtur mori
nunquam debere. Atque in iis, qui decesserunt, immor-
tali dignus memoria est Gregorius Portius, qui patre
Græco in Italia natus, statim ab ineunte ætate educatus
est in Collegio Græcorum, Romæ a Gregorio XIII,
Christianorum omnium, Ecclesiæ filiorum, patre aman-
tissimo, fundato. Eruditus est in literis humanioribus a
Jo. Demisiano, Græcæ linguæ eloquentia disertissimo;
quamvis ille postea Græcis literis non multum operis
studiique tradiderit; quod intelligi potest ex iis, quæ, si
quando opus erat, Græce tum soluta oratione tum ver-
sibus scripsit; sunt enim omnia, inepte, insulse, inel-
ganterque conscripta; sed omnem sollicitudinem atque
laborem in Latinis dictionibus collocaverit. Cur au-
tem Græcis literis Latinas anteposuerit, causæ, ni fal-
lor, possunt afferri verissimæ duæ; primum, laudis glo-
riæque studium, cujus erat avidissimus: etenim inajo-
rem ingenii eloquentiæque laudem se posse adipisci pu-
tabat, si in Academiis, ubi frequens aderat apud eos, qui
es-

essent Græcæ propemodum linguæ expertes; Latine, ornate eleganterque loqueretur, quam si sermones suos, minus polite elaboratos, Græca lingua scribentium dictis sententiisque referisset; quæ dicta aut essent interpretanda non sine magno aurium fastidio ac satietate, aut sine explicatione relinquenda, nulla auditorum cum utilitate fructusque. Altera Græci sermonis despiciendi causa fuit rei familiaris inopia, qua laborabat; querebat enim ingenio suo aliquem sibi regem ac dominum adipisci, a quo e solitudine & egestate eriperetur. Itaque, non quascunque academias, ingenio suo dignas, aut satis rebus suis pauperculis aptas, existimabat, sed eas tantum, ubi plures purpurati Patres adessent; cuiusmodi erant eæ, quæ in ædibus Andreæ Cardinalis Deti, atque Maurii Cardinalis a Sabaudia, celebrabantur. Interfui ego, cum, in Academia Cardinalis Deti, memoriter recitaret poemata duo, unum de Pithecusa insula, multitudine simiarum, poetarum fabulis, inclyta; alterum, de Scæchicæ ludo; quo argumenti genere lusit olim elegantissime M. Hieronymus Vida Cremonensis: quorum operum ratio, & verborum ac sententiarum splendore erat illustris, ac poëticum in homine ingenium inesse declarabat. Verum, quidam in eis versus, pedum vitio, claudicabant; quod facile in iis contingit, quos ingenii celeritas incitat, nec linæ labor ac mora retardat. Orationes aliquot habuit in Sacello Pontificio; ac duas præsertim, feria IV in capite jejunii, quas ille hoc titulo inscripsit: *Orationes in diem, quo sacra cinerica celebrantur*; quibus magnam apud omnes laudem meruit. Ac prima, in Æde D. Sabine in monte Aventino habita (ibi enim eo anno Paulus V, una cum S. R. E. Cardinalibus, solemnibus Missæ sacrificiis interfuit) tantum habuit commendationis, ut Scipio Cardinalis Burghefius, ejusdem Pauli Pont. sororis filius, in aulam illi suam aditum aperuerit, & quotidianum cibum attribuerit. Quæ oratio, tum per se ipsa placuit, erat enim elegantissima sententiarumque plenissima, tum multo magis ex actione, qua præstabat, omnium in se admirationem excitavit. Illa enim, ut veteres omnes scriptum reliquerunt, qui eloquentiæ præcepta tradiderunt, in agendo una dominatur; illa

clamores & admirationes in iis, in quibus cernitur, facit; illi merito Demostheues primas, secundas, acter-
 tias, detulit; illa tantam vim habet, ut eadem oratio,
 alia esse videatur, auctore mutato. Quæ actio, cum tri-
 bus præsertim ex rebus constare dicatur, oculis, voce,
 gestu, tria hæc adeo in eo erant illustria, ut sola, sine
 alia eloquentiæ laude, eloquentissimi cujusque disertam
 ac copiosam orationem obscurare posse viderentur. Sed
 antea quam in Burghesii clientelam ac domum perve-
 niret, nuper e Collegio Græcorum, curriculo studio-
 rum suorum exacto, egressum, Julianus Dux Casari-
 nus suam in domum excepit, ac benigne & liberaliter
 omnibus in rebus habuit. Illud vero ferri non poterat,
 quod in circulis, amicorum conventibus, jactabat,
 interdum etiam, fidei faciendæ gratia, lacrimas expri-
 mens, se, in postremis Cardinalium comitiis, a Paulo V
 habitis, fuisse designatum Cardinalem, ut amplissimo
 illi Collegio, Theologum aliquem; quo genere homi-
 num illud egeret nunc maxime, suppeditaret; qui Pon-
 tificex, sive ut familiæ suæ opes augetet, sive quod ita
 crederet, sive quod re vera ita esset, sibi persuasum ha-
 bebat, neminem esse eo honore dignum, nisi, qui soror-
 is filio navaret operam famulus: sed tantum sibi bo-
 lum fuisse ereptum, ajebat, ab ipsomet Card. Burghes-
 io, qui ceteris ex sua familia, ejus honoris cupidis, Ste-
 phanum Pignatellum, quem suis omnibus consiliis inti-
 mum semper habuerat, anteferebat, atque etiam Gar-
 zikæ Cardinalis Millini opera factum, ut Burghesio gra-
 tificaretur, qui Card. tum apud Pont. multum auctori-
 tate & gratia pollebat. At mihi, qui tum eram aulicus,
 ac curiose omnes aulæ rumores colligebam, erat deri-
 diculo. Primum, nunquam ille Theologiam, ne ali-
 mine quidem, ut est in proverbio, salutaverat; atque,
 si tum actum esset de aliquo, theologica facultate præ-
 dito, ex familia Pontificis in collegium Cardinalium
 cooptando, quis non illi anteponendum esse dixisset,
 vel Gasparem Pallonum, Basilicæ Vaticanæ Canoni-
 cum, ac Pontifici ab arcanis principum virorum Lati-
 nis epistolis, & generis nobilitate & doctrinæ laude &
 secunda perpetuæ probitatis fama conspicuum, vel
 Æne-

Aeneam Castellum, summum ejusdem Pont. Eleemosynarium, ac Theologum egregium? Deinde, non est eundem inficias, illis comitiis, amplissimo Patrum purpuratorum ordini, Theologum aliquem fuisse questum; sed de honore illo Desiderius Scaglia, causarum fidei generalis Commissarius, cum Hyacintho Petronio, sacri Palatii Magistro, contendebat. Hi enim, ex Dominicana familia, obtrecebant inter se. Sed vicit Scaglia, suffragante Card. Millino, homine, ut diximus, his temporibus potente, ideo quod magno sibi usui eum fore putaret ad Pontificatum max. suo tempore obtinendum. Sed, quantum opinionis suae errore homines decipiuntur, ostendit eventus. Nam, in ejus, quem affectabat, contentione honoris, nullum majorem habuit adversarium. At Gregorius Portius, quamvis de tanta spe, Cardinalis Scipionis opera, ut ipse querebatur, ejectus, non tamen, post Pauli V. vita discessum, eum deferere, atque aliam fortunam experiri voluit; sed in ejus aula permansit; eoque etiam mortuo, alterius Cardinalis Burghesii familiae numerum auxit; quo etiam extincto, ad suos lares se recepit, coepitque suo, ut dicitur, vesperi vivere. Quod, cum minus ipsi ex sententia succederet, inopia cogente, coactus est, senex, ex Card. Cornelii domo cibum petere, eique suas operas non ita magna mercede locare. Apud quem deinde ex fistula, cum fluere ea desisset, interiit. In alex. ludo, usque adeo fuit felix, ut maximas ex eo pecunias sibi confecerit, quibus elegantissimam, & Cardinalitia propemodum magnificentia dignam, sibi supellectilem confecit; ac praeterea eam argenti, tum puri tum calati, vini comparavit, ut fictilia omnia vasa fastidiret, neque aliis patinis, nisi argenteis, pranderet atque cenaret. Ac raro inventus est paucillulum aliquod nummorum amittere; cum ipse alios contra omni aere dirueret. Verum, tam pretiosa supellex, tanta vis argenti, benefacti, in malam rem abiit. Nam fit plerumque, ut, per hanc rationem partum, male dispereat. Denique eo inopiae reductus est, ut, ad res alienum, quod contraxerat, dissolvendum, & ad vitæ munia sustinenda, necesse habuerit, non vulgarem bibliothecam, magno emtam, parvo divendere:

neque jam aliqua sibi spes lucri erat in alea; siquidem jam expertus fuerat, quam mutabilis esset fortuna, qua aspiraute, collusores suos argento emunxerat, tunc autem ab eis, a marsupio iuavis, discedebat, neque, ab ingenio, in spem aliquam divitiarum & commodi vocabatur; cujus amor neminem fere unquam divitem fecit. Multa poemata, alia ab aliis seorsim edita, reliquit; quæ, si in unum corpus conferrentur, justi voluminis formam efficerent.

XXXIII. BERNARDINUS BISCIA.

MULTOS hæc ætas, in qua versamur, Juris civilis scientia peritissimos habuit, quorum etiam formas ingeniorum (quamvis non omnium) quod in nobis fuit, deformatas, Pinacothecæ nostræ mandavimus. Verum, in Bernardino Biscia, quem merito dicere possumus, non suæ modo ætatis, sed multarum etiam superiorum, fuisse ejus artis antistitem, ea fuit, Juris civilis scientia, ea iis, qui consulendi gratia ad eum venissent, in respondendo prudentia, ut doctrinæ suæ fama, e toto orbe terrarum ad se omnes alliceret, qui in rerum maximarum causis, de jure civili, controversias haberent, atque non solum is esset, unde sibi omnes sui cives, quemadmodum apud Ennium gloriatur Pythius Apollo, consilium expeterent, sed etiam ad quem populi, ac Reges omnium maximi, rerum suarum incerti, confugerent, ut ejus ope ex incertis certi discederent. Erat ille tum paterno tum etiam materno genere clarus. Matrem enim habuit Laudomiam Bracalonam, Joannis Bracaloni filiam; ejus, inquam, Joannis, qui olim apud Tranum seu Trajanopolin, una cum Joanne Capotio & Hecstore Juvenali, civibus Rom. nobilissimis, aliisque decem fortissimis Italis, glorioso certamine, Romanorum Italorumque causam suscepit defenditque, contra eorum arrogantiam superbiamque, qui, bellicæ virtutis gloriam a Romanis Italisque ad ipsos transisse, affirmare non dubitabant, idque armis se esse paratos ostendere. Accepta conditio est, ac tredecim ex Italis, totidemque ex aliis, qui Italos præ se contemnebant, electi; sc-

sedusque ictum, ut ea natio, cujus electi ad eam pugnam homines, victi discessissent, bellicæ virtutis laudem gloriamque illorum, a quibus sui superati essent, nationi concederent. Itaque sex ac viginti illi juvenes, tum suo Marte feroces, tum adhortantium vocibus ad pugnam accensi, in medium prodeunt; signo dato, infestis armis concurrunt; summa vi ac viribus pugnant; denique, ut Deus voluit, Itatorum superat manus, omnesque adversarios suos, præter unum, qui in certamine percussus conciderat, victos, ante se ducentes, magna cum gloria, ac faustis omnium acclamationibus, sua in castra victores revertuntur. Ab hac indole profectus Bernardinus, cum fortasse potuisset, si profectus esset in bellum, majorum suorum virtuti par esse; attamen, præstantissimum ingenium a bellicis laudibus ad litterarum ac præsertim Juris civilis studia traduxit, maluitque in pacis ociique artibus, omnibus præstare, quam in bellicis exercitationibus multos pares habere. Acerimo erat judicio, & incredibili prudentiæ vi præditus. Nam ab eo, qui suam ad ipsum causam deferbat, edoctus, statim acutissime, quid causa postularet & quid judici probandum esset, intelligebat, atque, ommissis ceteris argumentis in eo hærebat, ac defixam suam cogitationem habebat. Atque id erat cause, cur in consiliis dandis non ita multis verbis uteretur. Nam paucis ea verbis descripta continebantur; sed, pauci illi versus id a iudicibus impetrabant, quod multæ aliorum paginæ assequi non poterant. Neque mirum. Etenim, cum omnibus in rebus, plus uno vero esse non possit, eo perspecto, si sit, qui illud explicare dilucide possit, minime multis verbis est opus. At viris simplicibus, iisque, qui de aliorum facultate, non tam ex virtute, qua præstant, quam ex inani verborum volubilitate, si quam habeant, judicant, videbatur aut indoctus, quod ab aliis verborum rerumque numero ac copia vinceretur, vel, si ita erat doctus, ut vulgi erat opinio, avarus atque malignus, quod ea, quæ apud se seposita ac constructa haberet, ne mercede quidem accepta, auderet ad aliorum usum utilitatemque proferre. Atque in iis, qui in hac opinione hæserunt, fuit vir quidam, minime malus, qui

cum in Urbem venisset, ut litis cujusdam molestia se expediret, qua implicatus tenebatur, rogavit, quisnam, in civitate, juris consultissimus omnium haberetur, cui patrociniū suæ causæ posset tuto committere; atque audivit, Bernardinum Bisciam esse, cui primæ, omnium fere concessu, deferrentur. Arripuit ille, neque quidquam sibi faciendum prius existimavit, quam ut hominē adiret, seque suamque causam in ejus fidem patrociniūque rejiceret. Venit, hominē convenit, causam suam exponit, ita aperte atque dilucide, ut desiderari non posset planius, atque consilium ad rem suam aptum exposcit; tum nummos aliquot aureos profert, quos mercedem illi esse voluit laboris ac molestiæ, quam suscepisset. Bernardinus, tota causa ex illius narratione cognita atque perspecta, quo erat ingenii acumine, ut diximus, statim, quod controversiam faceret, vidit, & summo in manus calamo ac pagina, in eaque, secretis ac remotis iis, quæ essent levissima ac parum utilia, pauca quædam exaravit, ad controversiam illam dirimendam firmissima ac validissima; atque homini: Cape, inquit, & legenda hæc judici trade; nam statim sua tibi sententia litem adjudicabit. Ille accipit, gratias agit, abit; sed vix exiit e cubiculo foras, cum paginam illam aperit, existimans, longa oratione, causæ defensionem suæ se esse in ea visurum; at ubi conperit, vix quatuor versibus totam suam causam peroratam atque conclusam, revertitur tristis, ac: Cape, ait, a me nummum alterum aureum, & plura iis, quæ a te scripta sunt, adjice. Cumque Bernardinus, nummum illum aureum recusans, otioso cum esse animo imperaret, quod tantum ibi esset scriptum, quantum ad causam obtinendam sufficeret; ille, in eadem sententia perseverans, nempe vilitatem mercedis esse in causa, cur Bernardinus a scribendo deterreretur: Video, ait, me tuam operam deputasse parvi precii esse; en, ad superiorem, alterum nummum aureum addo; & si plures requiris, plures dabo; quæso, operæ ne parcas tuæ, totam istam paginam imple, mihi que animum exple. At tandem Bernardinus, quid ille metueret, intellexit; ac ridens: Abi sis hinc, inepte, cum tuis nummis; pauca isthæc, quæ tu contemnis, si judici ostend-

ostenderis, causam tibi expeditissimam dabunt; non enim multa, ut tu opinaris, ad vincendum valent, sed ea tantum, quamvis paucissima, quæ causæ profint. Credit ille iudici scriptum, sibi datum, quo causæ suæ defensio, non ita multis verbis comprehensa, continebatur, exhibuit, ab eoque sententiam, cujus erat in primis cupidus, abstulit. Nec mora, totus redundans hilaritate & gaudio, ad agendas Bernardino gratias, rediit. Diximus antea, maximis cum in rebus atque gravissimis, Regibus, atque amplissimis viris navare operam solitum. Itaque die quodam, cum ex Patribus purpuratis quidam, archissima cognatione Regi cuidam adnexus, cui nescio quid negotii ex animi sui sententia contigerat, illac rheda vectus transiret, ubi Bernardinus habitabat, eumque innumera fere hominum multitudo, officii gratia, sectaretur, e rheda caput protulit, ac Bernardinum fenestræ incumbentem aspexit, illico rhedarius iussit rhedam sistere, ac magna voce, ita ut omnes, qui aderant, audirent: Scisne, ait, consiliis nostris cum, quem optabamus, exitum contigisse? eademque opera, totum illud negotium, quod sibi lepide sub manus successisse gloriabatur, exposuit. Tum summo cum opere rogavit, ut secretum illud, quod sibi commiserat, in latebras absconderet pectore penitissimo. Cui Bernardinus: A me quidem, inquit, nullus tibi metus esse potest; nam, quod apud meum animum deposueris, salvum semper indidem, cum volueris, auferes; sed quæso te, istuc idem huic hominum multitudini, quæ te circumstat, præcipe. Plures ex sese liberos reliquit, tum virilis tum feminei sexus; in his Lælium Bisciam, qui postea ab Urbano VIII in Cardinalium Collegium est cooptatus, ob ejusdem in Rempubl. merita, quod Cameræ Apostolicæ Clericus, annonam, totamque rem frumentariam, quibus provinciis multos annos præfuerat, summa cum laude administrasset: denique, tanta prudentia, in his duobus muneribus gravissimis difficillimisque gerendis fuit, ut hodie, nullo fere negotio, illæ regantur ab aliis, Lælii institutis servandis & quasi vestigiis persequendis. Sepultus est in Æde D. Francisci, ad Tiberis ripas, ante aram maximam, a majoribus olim suis

extructam; quam etiam aram una cum ejus hemicyclo, antea quam fieret Cardinalis, instauravit, ornavit, ac sacris preciosissimis vestibus auxit; exedificavitque scalam, cujus gradibus ad cellulam ascenditur, qua vir ille sanctissimus usus fuisse dicitur, dum in Urbe versaretur.

XXXIV. CRESCENTIUS SACCARDUS.

Pulcerrima atque amœnissima artium elegantissimarum studia, plures, quam utile fuit Reipubl. a gravissimis disciplinis, ac præsertim a Juris civilis scientia, qua civitates gubernantur, adductos, in sui amorem abstraxerunt. Neque satis illis fuit, interdum, a revolvendis Jurisconsultorum libris, in quorum tractatione, voluptatis minimum, laboris plurimum solet esse, defessis, quasi colligendi sui gratia, in humanissima illa studia, tanquam in hortos, omni florum herbarumque varietate exultos, sese conferre; sed ea amœnitate pulcritudineque percepta, avocantes se a seclatu, a curia, a foro, decreverunt, ibidem habitare, quiescere, otiosam refertamque deliciis honestissimis vitam exigere, & iis, qui vellent, Reipubl. bene gerendæ laudem gloriamque relinquere. In hunc numerum referendus est Crescentius Saccardus; (quamquam Reipubl. quam aliqua ex parte attigit, administrandæ, ut videbimus, laude non caruit.) Hunc Ausculi honesto genere natum, Brunus Saccardus parens, prout ipse amabat litteras, (erat enim medicus non postremus, in iis qui morbis medentur,) celeriter puerile filii ingenium magistris excolendum tradidit. Ac, quibus in locis, tum in Grammaticam, aliasque artes, quibus puerorum mentes fingi ad humanitatem & virtutem solent, tum etiam Jus civile didicerit, referremus, nisi majora potioraque haberemus. At Bononiæ, Collegii Montis alti alumnus, Juris civilis, magistri ac doctoris nomine, docendi interpretandique auctoritatem est consecutus; sed continuo cum ea disciplina, quam, tanquam uxorem, sibi conjunxerat, divortium, ut ita dicam, fecit, ac totum se ad humanissimas litteras transtulit, ad quas naturali quodam impetu se-

ferebatur, in eoque studio, ingenio uberrimo affluens, longe multumque profecit. Scribebat plura, tum soluta oratione tum versibus; sed in soluta oratione, ad quam a natura erat mirabiliter factus, longe melior atque præstantior inveniebatur; in eaque magno est apud eos, qui eum noverunt, in honore ac gloria. Quamobrem, suæ sibi facultatis conscius, ad scribendas pro summatis viris literas, animum appulit. Ac primo, annos natus sex & viginti, Philippo Segæ, summa doctrina & eruditione Antistiti, qui tum Beneventanam Rempubl. prætor administrabat, navavit operam ab epistolis; eundem postea locum tenuit apud Mileti Episcopum; tum idem munus, pari modo, persecutus est apud Alexandrum Guidicionum, Lucæ Antistitem. Atque ab his, tanquam per gradus, ascendens, pervenit in aulam Petri Card. Aldobrandini, a quo eandem scribendarum epistolarum partes accepit; quas quia egregie Cardinali præstabat, & quia ille, ejus operam privatis suis in rebus magno sibi usui esse, intellexerat, voluit eandem publicis etiam in rebus experiri. Erat Petrus Card. Aldobrandinus gazæ Pontificiæ præfectus, quem Rom. Ecclesiæ Camerarium vocant. Itaque illi arcana earum decimarum negotia credidit, quas Paulus V ex omnibus ecclesiasticorum bonorum redditibus detrahendas persolvendasque mandaverat. In quibus negotiis pari cum fide ac diligentia versatus est; ac per hanc rationem, dici quodam modo potest, partem eum Reipubl. aliquam attigisse. Cardinali Aldobrandino vita functo, non est passa ejus opera torpescere, sed a Gregorio XV traditus est Hieronymo Aguccio, qui tum arcanorum omnium de Republ. summæ præerat, ut illi esset ad manum, consiliorum omnium particeps; quem in locum nemo admittitur, nisi fide & industria cognita. Qualis autem quantusque vir esset Aguccia, ingenio, eruditione, prudentia, ac rebus agendis, supervacaneum est dicere, cum res sit omnibus nota atque testata. Cujus ingenio adeo Crescentius delectatus est, ut eundem, ab Urbano VIII Nuncium ad Rempubl. Venetani missum, sit sectatus, nec prius deseruerit, quam illum vita defecerit. Et, cum esset Venetiis, insigne in Aquilejensi ecclesiâ sacerdo-

tium, quod Canonicatum appellant, ab Urbano VIII ultro sibi delatum, accepit; nec diu tenuit, sed resignavit, eoque se exiit. Nec est prætereundum, quod illud illi probitatis, ingenii, prudentiæ, aliorumque virtutum, quibus florebat, lumen exhibuit, ut Marcus Cornelius, Episcopus Patavinus, magnis præmiis ad se vocatum attraxerit; magis id adeo, ut amicorum, quam ut servorum numero ac loco, haberet. Magnus tanti viri honos jucundior Crescentio fuisset, si diuturnior esset licuisset. Etenim, ut ex longo difficilique, quo erat implicatus morbo, se expediret, fuit coactus, Patavio discedere, ac persequi Urbem. In quam vix intro pedem intulit, nondum recuperata valetudine, cum expetitus est, honorificisque stipendiis invitatus in domum suam ab Hippolyto Cardinali Aldobrandino, ipsius meritorum optime conscio. Qui, quo amoris existimationisque loco apud ipsum esset, & vivus multis ipse rebus ostendit, & in morte declaravit. Nam ducentena singulis illi annis, quoad vita suppeditaret, scuta testamento legavit; ac visus est etiam, suum erga illum amorem studiumque in Jo. Georgii fratris sui filiam, una cum hæreditate transmittere; quæ per aliquod eum tempus domi suæ retinuit, ut fideli atque opportuna ejus opera, non tam in epistolis scribendis, quam in consiliis, de rebus suis, sibi dandis uteretur. Atque ea fuit hominis, in omnibus lætissimæ præstantissimæque sceminae negotiis sedulitas ac diligentia, ut nulla illi in re opera consilioque defuerit, usque eo, dum per valetudinem licuit; qua semper infirmissima usus est. Quæ cum in dies decreveret, accresceret labor de medicorum sententia, placuit a natalis soli cælique clementia auxilium expectere; quod reliquum iis solet esse remedium, quorum exulatum abiit salus. Ac, ne omnis plane esset operæ atque laboris, ac Cardinali Gabriellio, Episcopo Ausculano, subrogatus est in locum demortui cujusdam, suæ Cathedralis Ecclesiæ, Canonici, ibique summo in otio & tranquillitate, suo muneri ac valetudini operam dabat. Cujus muneris functio, quoque affecta jam ætate homini, minus gravis ac molesta contingeret, traditus illi est socius atque adjutor, qui, cum esset

opus,

opus, labori succederet. Urbanus VIII interim, fato suo functus est, & Innocentius X pro eo in id fastigium receptus. Itaque rerum omnium commutatio consecuta, & Jo. Jacobo Card. Pancirolæ, arcanorum omnium summa commissa; qui, Crescentii fidei, virtutis, industrizque fama commotus, magnis pollicitationibus, (ut fit, cum rei cuiuspiam cupientes sumis) tanquam socium ac consortem honesti & gloriosi illius laboris, ad se illum advocat. Credit homo simplex ac probus; advolat; neque vana spe ductus ad credendum impellebatur. Ætas enim acta, capillus albus, longus rerum maximarum usus, majora etiam iis, quæ sibi promittebantur, poscere videbatur: sed non editiori se esse positum in loco, invenit, quam in quo annos antea viginti fuerat; nisi quod & senilis auctoritas, ac propria ac singularis virtus, perficiebat, ut ejus opera, ceterorum industriz anteponeretur. Quo factum est, ut graviora cum eo negotia communicarentur, a Pancirola morbis impedito, ad interiora de Republ. consilia, tum coram Pontifice, tum aliis, admitteretur. Ac quorundam fuit opinio, quemadmodum, virtutis præstantia, magnam Principis benevolentiam consecutus esset, non minorem cum etiam aulicorum quorundam invidiam exceperat, quo facto illos, ad eum laborum onere opprimendum, consensisse. Quæ res feliciter illis successit. Nam annos natus unum & sexaginta, suæ curriculum vitæ confecit; magis laudibus, communi bonorum omnium consensu, sibi delatis, cumulatus, quam, externis honoribus opibusque, sive fortunæ, sive hominum malignitate sibi detractis, ornatus. Erat omnibus comis, benignus, humanus, omnibus in rebus inserviens amicis, nisi fides vel religio prohiberet; nihil cuiquam denegabat, quod in sua esset manu, tribuere; si quid autem postulabatur, quod suis esset viribus majus, cum oculis, voce, vultu denique, animi dolorem præ se ferebat, quod non posset illorum postulatis occurrere; ut, qui rogaverant, amiciores ab eo discederent, quam si, quod voluerant, impetrassent.

xxxv. JACOBUS CICOGNINUS.

Pulcerrimus elegantissimusque, jam inde usque ab antiquissimis temporibus, ut est omnium fere eruditorum opinio, mos viguit, ut tragœdia, eclogæ, aliæque ejusmodi in scenis poëmata, a musicis, ad tiliarum chordarumque sonum agerentur & canerentur. Verum, hæc tam erudita tamque elegans consuetudo, multis jam seculis intermissa, atque in oblivionem adducta, plane perierat; neque inveniebatur quisquam, qui eam auderet, tanquam extinctam, revocare in lucem, atque in theatrorum scenarumque celebritate, unde fuerat exacta, reponere; credo, quod arbitraretur, ejus, qua nunc utimur, musicæ rationem suis conatibus respondere non posse; quæ ratio longo intervallo infra eam dicitur relinqui, quæ Damonis aut Lampi aut Dionysii aliorumque hujus notæ musicorum florebat. Sed quid non potest, in hominis, alto excelsoque animo præditi, pectore, laudis gloriæque cupiditas? quæ enim laus tam arduo tamque difficili posita loco est, ad eam obtinendam, egregiam multorum insignium musicorum acuit ingenia. Atque Florentiæ, (etenim, in ea civitate, præstantissimorum in omnium virtutum genere artificum abundanti, hoc primo tentari cœptum est) Æmilii Cavalerii, patritii Romani, Jacobi Perii Florentini, Mantuæ Horatii Vecchi, Romæ Dominici Mazocchi, ac Virgilii fratris, aliorumque, quo ego prætereo, quod eorum nomina, ad meam notitiam non pervenerunt; qui variis temporibus, dramata modulati sunt, quorumque egregia, in reperiendis lepidis, concinnis, neque ante id tempus auditis modis, defudavit industria. Neque minor illustrium poëtarum ardor ac studium illuxit, qui in iis poëmatibus, quæ essent ad filium tiliarumque cantum agenda, concinnandis, summam dederunt operam, ut eos versus facerent, qui modulatorum artificio atque aurium voluptati servirent. Cujusmodi fuerunt, P. Augustinus Mannus, vir sanctissimus ac religiosissimus, c. Congreg. Oratorii; qui animi & corporis de veris voluptatibus comparandis habita inter se consilia,

filia, cum hinc mundi illecebræ, illinc ratio ac Dei metus instarent, deduxit in actus; Octavius Rinuccinus, qui Daphnin, Eurydicen, Arianam, feliciter docuit; Octavius Tronfarellus, qui catenam Adonis, & Abundium Abundantium, spectandi copiam fecit; Respigliosus, vir ingenio, eruditione, & amplissimis in Republ. muneribus gerendis longe clarissimus, qui, dum Urbanus VIII Pontificatum maximum tenuit, varia poematum optimorum genera, tum sacra tum profana, quæ non est enumerare necesse, Cardinalibus Barberinis, ac Thaddæo, germano eorum fratri, lepide concinneque composuit: denique Jacobus Cicogninus, de quo agimus in præsentia; qui longum & insigne dramaticum carmen, in solemnibus ac celeberrimis Michaëlis Perretti, Venafrani Principis, & Annæ Mariæ Cæsæ nuptiis, versibus dulcissimis & ad fidium vocumque cantum accommodatissimis, scripsit; quod splendidissimus ac liberalissimus ille vir princeps, infinito propemodum sumtu ac regali magnificentia, populo spectandum præbuit; ad cujus oculos nunquam antea tantæ rei amœnitatis pulcritudoque pervenerat. Erat enim Jacobus I. C. & causarum patronus, non infacundus, vel potius qui verborum copia alios obrueret. Aliquot etiam oppida, cum potestate prætoris, administravit. Exercuit etiam inimicitias cum Andrea Salvatore, ex mulierum contentione susceptas; quod Andreas mulierculæ cujusdam esset cupidus, quam domi suæ Jacobus habebat, cujusque potius causa noctu ille per tegulas, in Jacobi domum, sese demitteret; cujus dolor injuriæ eum impellebat, ut maximum acerbissimumque adversus Andream odium conciperet, & ad persequendas suas contra ipsum injurias, acriter vehementerque compelleret. Obtrectabant etiam inter se, ut est mos eorum, qui eandem artem exercent, quod Jacobus inique pateretur, in scribendis versibus, & in omni poetica facultate, anteponi sibi Andream. Lingua utebatur celeri & ipicitata. Multus in eo jocandi lepos, multæque facetiæ. Cavillator festivus, conviva commodus, in communi amicorum consuetudine usuque hilaris, jucundus, affabilis; nisi quod interdum obliviscebatur, suæ orationis justam partem

persequi, & suam aliis, quibuscum erat, relinquere. Sed his onissis, omnino inerat illi præstans, amœnum, ac poëticum plane ingenium, neque sibi defuit, sed illud ad poëticæ facultatis studia contulit; ab ejus præsertim linguæ notitia, in qua natus erat, impulsus, quæ verborum & usu & copia bonorum, pulcherrima & eruditissima omnium, quibus nunc Itali loquuntur, habetur: neque injuria, si tamen excipias quendam, qui in ea resonat ac recinit, vocis sonum; qui, cum non recte & presse & æquabiliter, sed aspere, hiulce, crebroque in guttur incidens, ex ore fundatur, minus auribus gratus, atque etiam in quibusdam, qui incorruptam illius antiquitatem conservant, ridiculus accidit. Qui sonus, atque alius quivis, qui peregrinitatem aliquam redoleat, nunc plane a Romanis civibus abest; in quibus est omnis urbanitate quadam quasi colorata oratio; in qua, præter pauca quædam verba, Romanæ Urbis propria, quæ jam pene obsoleverunt, nihil offendi, nihil displicere, nihil sonare aut olere peregrinum possit. In sua igitur lingua, quæ venustate elegantiaque ceteris, ut diximus, præstat, plura ab eo leguntur scripta dulcissime; neque, cum fere ab omnibus ejus opera expeterentur, aliquod illi pretium avare constituit, sed cunctis, qui uti ea vellent, propositam habuit. Atque, non suos tantum amores, sed amicorum etiam, lepido, ut inquit ille, ad cælum versu, vocavit. Erat omnino ad omnem poëticæ facultatis laudem, ad quam a natura ferebatur, mire propensus; verum scenicæ in primis artis amore adeo incensus, ut nihil dies noctesque studiosius, quam fabularum argumenta, meditaretur atque conficeret. Nullus erat minorum grex, quem ille non nosset, nullus in eis actor, præstantior ceteris, quem cupidissime non audiret, quem non arētissimæ amicitie vinculo comprehensum haberet, quem non officiis beneficiisque omnibus prosequeretur. Atque eo amentix in hoc poësis genere progressus dicitur, (id quod ego non credo, nec mihi sit verisimile, in homine; honesto genere nato, liberaliter educato, ac liberalibus disciplinis instituto,) sed dicitur tamen, Fritellini, notissimi mimi, qui tum in scena dominabatur, artificio captus, statuisse, filium, quem ex uxore sua suscep-

ceperat, illi in disciplinam tradere. At, si verum id est, quod ego non credo, æquum erat, cum antiquis illis temporibus in Græcia nasci, quibus temporibus neminerat turpitudini, in scenam prodire, ac populo esse spectaculo; immo nulla dicitur fuisse Lacedæmoni tam nobilis vidua, quæ non in secum iret, mercede conductæ. Sed aliud (si vera est fama, quam nimis cupio esse falsam) admisit, quod illud superius, si perfecisset, longe multumque stultitia antecedit. Ajunt enim, amoris impatientia, quod ejus fævitiam, cuius ille ad insaniam cupiens erat, ferre non posset, sed de fenestra, præcipitem in puteum egisse, unaque opera, & ardoris, quem illi faciebat auctor, & vitæ finem invenisse. Numerabatur in omnibus fere celebrioribus Italix Academiis, & in ea præsertim, quæ tum Romæ florebat, Humoristarum.

XXXVI. OCTAVIUS TRONSARELLUS.

Semper verum illud existimavi, hominum ingenia nunquam deesse, sed partim parentum negligentia, a doctrina puerili, aut ipsorum desidia, a studio & exercitatione, deserta, tanquam agros uberes ac fertiles, nulla cujusquam opera excultos, silvescere, partim, nullis præmiis in luccum evocata atque traducta, in occulto sine laude ac fama latere. Novi ego puer in scholis, ex meis sodalibus, non parum multos, ingenio peracri, & studio flagranti, ac memoria singulari; qui si eum, quem cœperant, cursum tenere voluissent, ad summam eloquentiæ doctrinæque laudem pervenissent. Celeriter accipiebant quæ tradebantur, acriter memoria custodiebant, atque inde, quoties posceret usus, accepta promebant. Sed eos deinde, vel otio, quod plerique sequuntur, ad summam inertiam, vel, inopia, qua premebantur, ad alias artes, quæ panem ipsis præberent, fuisse traductos. Deinde, quam multos unaquæque ætas haud absimiles Ciceroni Virgilioque proferret, si suus esset, ut par est, literis honos! *Honos*, inquit ille, *alst artes*. Verum, si hoc illis pabulum subtrahatur, macies, ut ita dicam, atque interitus accedat necesse est. Atque nostra

tempestate, Octavius Tronfarellus, verum illud esse, quod antea dicebamus, ostendit; nimirum ingenia semper, si colantur, existere, ac fructus ex se maximos & uberrimos edere. Qui quidem Octavius facultatem, sibi a natura concessam ac traditam, non est passus, culturæ inopia, efferari atque sylvescere: sed studio & exercitatione, nullius potentioris ope sublevatus, catenus progressus est, ut nemo sibi præcurreret, qui in id studium, in quo ille erat, incumberet; sed poëta esset, gravis, magnificus, summus; quamvis, ob rerum ac sententiarum amplitudinem majestatemque, quibus abundat, non nemini paulo videatur obscurior. Ejus majores, orti in Gallia, in Italiam commearunt, ac sedem domiciliumque suum Galleſii, quod est oppidum in Sabinis, collocarunt. Sed Octavii avus, relicto Galleſio, Romam petiit, anno uno post, quam ab exercitu Cæsaris direpta est; & Antonium, Jo. Francisci, Horatii, & Octavii patrem, adhuc infantem puerum una secum adduxit. Ex ejus filiis Jo. Franciscus Juvenali Ancinz, Salutarum Episcopo, navavit operam Vicarius; quod maximi argumenti loco est, optimis cum moribus instructum & ornatum fuisse; cum nemini in illius sanctissimi Episcopi familiam aditus pateret, in quem vel minima errati cuspis suspicio conveniret. Quam Vicarii provinciam, quoad Episcopus ille vixit, summa cum laude doctrinæ & æquitatis administravit. Eodem, veneno, ut erat fama, sublato, Bononiam se contulit, ut ibi, quod reliquum erat vitæ, traducereſ. Quod reliquum vitæ spacium, celerius multo quam erat necesse, confecit. Nam, si diutius in eo versari potuiſſet, amicitia, quæ sibi cum Alexandro Ludovisio intercedebat, fructu non caruiſſet. Qui Ludovisius, primum Bononiæ Archiepiscopus, tum Cardinalis, creatus, incredibili celeritate ad summum Christianæ religionis fastigium evolavit; hoc est, augustissimum Petri, Apostolorum principis, solum obtinuit. Verum, quo amoris gratiaque apud se loco ac numero illum haberet, etiam tum Archiepiscopus declaravit. Nam, mortuum, in Archiepiscoporum sepulcrum jussit inferri. Puer Octavius, præter P. Felicem Soc. Jesu, exquisitos e tota illa Soci-

etate magistros habuit; in literis humanioribus, P. Farnianum Stradam, & P. Bernardinum Stephonium, in Philosophia P. Terentium Alciatum. A Philosophiæ spaciis, studium suum contulit ad Juris civilis cognitionem, ac dignus est habitus, cui leges interpretandi, ac de jure respondendi facultas publice traderetur. Frequens erat, per id tempus, in Sodalitate primaria Deiparæ Virginis Annuntiæ, in Collegio Romano Soc. Jesu; sed admonitus a P. Bombino, ut vel versus facere desisteret, vel in eum Sodalium conventum locumque venire desineret, maluit eo cœtu in perpetuum carere, quam a sperata egregii poëtæ nominis gloria discedere; atque Sodalitati illi Academias anteponendas statuit, deditque operam, ut in Academiam Humoristarum exciperetur, quæ tum ingeniorum optimorum nobilitate florebat; quod illi antea, per Sodalitii illius, in quo erat, leges facere non licuisset; quibus legibus, in improborum atque a directa virtutis via aberrantium numero, pueri & adolescentes illi habentur, qui in academicis, cujusvis academix, præter Partheniam, nomen profiteri audeant suum. Exceptus igitur in Academiam Humoristarum, ingenii augendi & declarandi amplam occasionem est nactus, sed tandem satietate fastidioque alienatus ab ea est, quod, ut ipse aiebat, certorum adolescentium arrogantiam superbiamque ferre non posset; sed re vera, quod cum Augustino Mascardo, ejus Academix tum temporis principe, sibi non conveniret. Itaque ad Academiam Ordinatorum transeundum censuit; quam Academiam Cardinalis Detus, in suis ædibus, fundandam erigendamque curavit, ut domum suam a solitudine vindicaret, atque ea remissione animi liberalissima, aliqua ex parte, molestiam, quam morbus asferret, leviozem efficeret. Sed clarissimus purpuræ, in qua ille renitebat, splendor, & cognationis nexus, quo Aldobrandinis principibus implicabatur, tum suavissimus vocum & chordarum cantus, quibus eruditæ illæ exercitationes condiebantur, Cardinalium complures, eorum præsertim, quos Clemens VIII in illum ordinem cooptaverat, tum præcipuos aulae Romanæ Antistites, ac præterea magnum honestissimorum hominum ad se nu-

merum alliciebat. Quapropter gravissimus ille dicendæ locus, maxima ambitione, a multis expetebatur. Octavius igitur par iugeni sui & vocis eruditæ dignitatæ theatrum nactus, cum semper aliquid, se & consensu illo dignum, afferret, laudationes ac plausus referebat. Verum, cum hoc sibi negotium datum esset, ut Academiz universæ impresam, quam vocant, e multis, quæ proponebantur, eam potissimum, quæ sibi aptior videretur, eligeret, magnam cum Margarita Sarrocchia contentionem certamenquæ suscepit; quæ mulier, qua erat animi elatione & impotentia, eam ceteris anteponendam esse, maxima voce ac pluribus verbis, agebat, quam suo ipsa ingenio peperisset. Ea erat salinum, plenum salis, cum hoc dicto, A SOLE. Sed Octavius, cum esset argumentatus, quantum res ferebat, hoc ipsum etiam posuit pro argumento, quamobrem impressa illa nullo esset modo recipienda, quod nullum inde elegans nomen elici posset, quod Academiz universæ imponeretur. At Felix Cima, qui in comædiis, non sine plausu, Raquettis, hoc est, Galli hominis, Italo sermone sed Gallico accentu sonoque loquentis, partes agebat: Tace, inquit; ego habeo nomen, quod consiteamini, nullum cum hac impressa posse nobis aptius inveniri. Quodnam? ait Sarrocchia. Ego dicam tibi; quoniam est in animo, nos ad salinas damnare, erroneos vagosque esse appellandos censeo; nam hæc hominum natio hoc afflicti pœnæ genere solet. Atque ut ejus opera numeremus, quibus est laudem adeptus; primum, magnū illi nomen sanctamque consecit, Cathenā Adonis; cujus dramaticæ componendi causam attulit controversia quædam inter Jo. Georgium Aldobrandinum & Jo. Dominicum Lupium orta, de duabus mulieribus cantatricibus, quibus tum temporis primæ dabantur, utra nimirum alteri, vocis suavitate & canendi arte, præstaret; hæc erant, Cæcchia quædam, quæ, quoniam habitabat in ea parte Urbis, quæ olim stagnantibus aquis exundabat in morem lacum, Cæcchia a lacuna appellabatur; & Margarita Costa; non magis canendi artificio, quam turpi quæstu, famosa. In eo enim dramaticæ ambæ committebantur, & utrique æqua pars cantus dabatur, in qua, quidquid una-

utraq;que earum posset, ostenderetur. Sed ne musicum hoc certamen comitteretur, fuit impedimento Aldo-
brandini Principis uxor. Itaque mulieribus substituti
sunt eunuchi. Verum illud drama tantum habuit com-
mendationis, ut species eo anno reponeretur, & typis
mandari curaretur. Et quia objecerat non nemo, inven-
tionis expertus esse illud opus, prius negavit id, quod ob-
jiciebatur, seque, quod fecisset, equitis Marini, poetæ
clarissimi, auctoritate fecisse, ac suis eum vestigiis pro-
sequutum esse, a quo eadem inventa mutuasset, quibus
olim ille suam Daphnen in ætæ redegisset, scenæque
mandasset. Deinde fabulas edidit, postea Rhythmos;
quibus accessit trium inter se dearum de fortunæ princi-
patu contentio, ac poëmatia quædam, quæ musicis po-
sulantibus modulanda tradiderat; ad hæc, egregia poë-
mata duo adjunxit, heroico plane stylo conscripta, u-
num, Constantinus, dictum, in quo Imperatoris illius
res gestas exponit; Victoria navalis, alterum, quo in-
credibilis apud Naupactum pugna illa navalis exprimi-
tur, cum, interfectis Turcarum ducibus, eorum classis
devicta est atque depressa. Postremo sanctorum, Abun-
dii & Abundantii, profusam pro Christi nomine vitam
ac sanguinem, eleganti dramate comprehensam, exhi-
buit. Multa præterea alia honorariis Principis Cardina-
lis a Sabaudia, cyphæis scripsit; in ejus viri principis
aula jucundus, & in Academia ejusdem, admirabilis ex-
titit. Jam inde ab ineunte ætate, erat aucupii studiosus
in primis; quapropter sæpius erat in agro; neque labori
operæque parcebat suæ; ipse concinnabat aream, ipse
offundebat cibum, ipse retia explicabat, ipse attrahe-
bat, attrahendoque, tanquam aliqua in cavea inclusas,
in illis aves excipiebat; & onustus præda domum rever-
tebatur. Postremo vineam emit, quæ præcipuam mor-
tis ejus causam sustinet; tantum nimirum illi, ruris volu-
ptates, cum incredibili studiorum labore conjunctæ,
steterunt. Frequens ibi aderat semper; in sole, operis a
se conductis instabat; sæpe etiam attente illorum offi-
ciisungebatur: nam fodiebat, ocrebat, aut aliquid e-
jusmodi opus faciebat; & quamvis hæc voluptati erant,
ejus tamen vires, ex labore debilitabantur, neque aderat

cerealis mensa ac plena, quæ eas recrearet & instauraret; sed ejus victus, asperam, ut inquit ille, commebat viam; hoc est, parce ac duriter vitam agebat. Nam quinque obolis carne, tum agnina, tum bubula, pro temporum varietate, se ac famulam sustentabat suam, quodque de suis fructibus comparerat miser, suum defraudans gentum, totum in libris collocabat, quos frequenter emebat. Sed tandem, tertiana febrî correptus, cum nullus ab initio metus ostenderetur, non ita multo post ab atra atque lethali bile oppressus, excessit e vita, prid. Kal. Septemb. anno dñi M C XLI; cum jam nox appeteret: ut non ineleganter quidam dixerit, Phœbo occidenti nihil tam convenire, quam ut astra succederent. Multa, nondum impressa, reliquit, quorum pars magna interiit. In his Papia, a Carolo magno recuperata; cujus operis duo tantum libri sunt inventi. Fuit homo apertus ac simplex, grato animo, ac moribus ingenuis, ac libero homine dignis.

XXXVII. JOANNES BRICCIUS.

SI verum est illud, quod paulo ante posueramus, cum Octavii Tronsarelli imaginem spectandam contemplandam proponeremus, nempe ingenia hominum bona atque præstantia, omnibus annis, atque adeo omnibus horis, humano generi dari, quæ si magistrorum opera ac studium accederet, veterum excellentiam, in omni genere bonarum artium possent æquare; id in Jo. Briccio verissimum patuit. Ille enim aberrare eos ostendit, qui, neminem posse, ajunt, liberalis cujuscumque artis partem aliquam, nisi a magistris monstratam, attingere, nam ea ille virtutis indole fuit, ut sine cujusquam ope, naturæ tantum auxilio, non unius tantum ingenue artis, sed plurimum etiam notitiam sit assequutus. Non fuit ille in aliqua earum excellens; esto; sed cuam mirum videri non debeat, rudem hominem, ingenii æstu abreptum, & industriæ diligentiaque quasi remigio velocè, sine rectore, compulsus, illuc fuisse delatum, quo pervenit? atque ab initio ventis fluctibusque jactatus, inde repellatur, quod aggredi cupiebat. Nam parens,
mi-

mirum in modum averſus a literis, fortaffe quod nolle, filium aliqua in re ſuum ſibi, qui literas non didiciſſet, ſuperiorem videri, nunquam cum miſit in ludum, immo acriter verberabat, ſi, quo erat ille diſcendi ſtudio incenſus, tabellam abecedariam in manibus habere cernebat; nec quidquam illi frequentius decantabat, niſi, ſe nolle eum aliam artem addiſcere, niſi eam quam ipſe noſſet, quaque ſe familiamque ſuam tueretur; erat enim culcitrarum concinnator vetus, ac totos dies Romæ, in foro D. Pantaleonis, peſtini lanario, equulei formam præ ſe ferenti, inſidens, expectabat, dum quopiam in opus condiceretur. At Joannes, nihil parentis minis verberibusque perterritus, clam illi, omnia litterarum nomina, quæ sæpe ab æqualibus ſuis ordine recitari audierat, memoriæ mandabat. Nam, quod eſt præcipuum ingeni ſignum in puero, quidquid tradebatur, facile percipiebat, & fideliter cuſtodiebat, tum, ſumta aliqua tabella, in qua omnes literarum notæ, eo ordine quæ eas ipſe memoriæ mandaverat, erant deſcriptæ, ſuis ipſas nominibus appellare aſſueſcebat; tum literas jungere, ac verba ſyllabatim pronunciare ſtudebat; ac demum, tantum ſtudio & exercitatione proſecit, ut nemo eo plenius ac celerius legere putaretur. Nec minori induſtria diligentiaque literis, ad exempli quod ſibi propoſuerat imitationem, primum ruditer, tum magis concinne exprimendis, ſcribere didicit. Incredible memoratu eſt, quanta aſſiduitate ſtudioque, quidquid a culcitris inſtaurandis concinnandisque reliquum erat temporis, in omnium librorum, qui quidem Italico ſermone ſcripti eſſent, leſione conſumeret. Quo fiebat, ut multarum rerum varietate & copia peſtus impleret, quas deinde, cum eſſet opus, expromens, omnibus diſciplinis inſtruetus, nihilque ſibi a doctrina deeſſe, videbatur. Sed cum poëtiſ ſibi magis rem eſſe exiſtimabat; quippe qui, ad verſus faciendos, ſe a natura impelli ferrique ſentiebat. Itaque eorum libros attentius diligentiusque volutabat. Ac primo cantuunculas quasdam compoſuit, quas mendici, orbiluminibus, canerent in triviis ac popinis: tum, in parvulis, neſcio quibus, dramatiſ ſacitandis, ingeni vires exercuit, quæ feriis Bacchanalibus, pueri

atque infimæ sortis homines in plateis, personati peragerent; in quibus quia ridiculæ personæ inducebantur, vulgus delectabatur. Hinc, majore animo, comedias aggressus est scribere, a præceptis non abetrantes, quæ præscribuntur ab iis, qui ea tradiderunt; ac plures edidit, in quibus primo loco numerantur, Tartarea infernalis, Maga formosa, Pantaleon, hoc est, senex decrepitus, ex autore insaniens, aliaque, quæ in Apiario Clarissimi viri, Leonis Allatii, leguntur. Verum, cum hæc omnia, ut ipsum etiam eorum nomen clamat, nihil nisi fabulæ essent, cumque, si a pistore panem peteret & vinum ex ænopolio, nisi æs afferret, nugas referret, statuit, ad ea studia animum etiam adjungere, quæ cibum præberent. Sed nunquam induxit animum, ad sordidum illud artis genus, tanquam postliminio, reverti, unde elegantium disciplinarum studia, captum victumque, in sua castra perduxerant. Atque ad picturam studii genus non illiberale, auxilium ab ea petitum, confugit; quam per se ipse ea facilitate, vel felicitate potius, qua ceteras artes, est asssecutus, in eaque se exerceuit; ita tamen, ut non eas tabulas, quibus Apelles & Protogenes inviderent, efficeret, vel, in quibus omnia, adeo cum ipsius veritate naturæ certarent, ut ad uvæ racemos (si eos contigisset effingi,) aves deceptæ circumvolarent, sed quæ tantum illi, tritici, olei, ac vini, in penum congererent, quod esset sibi familiæque suæ omni satiss. Ac præsertim coriaceis in stragulis, familiarum insignia, quæ in scuto depicta, plumæ e clypeo dependentes ambirent, tanta cum venustate artificioque formabat, ut omnium ad ipsum concursus existerent. Comico- rum mimorumque gregibus, ad scenas coloribus ornandas, illuminandasque, operas suas elocabat, ipse quoque in scenam, mercede conductus, prodibat, ac populo spectaculo erat. Nam, summa cum venustate, ridiculas personas agebat. Neque homo, a natura factus ad omnia, musicæ fuit expertus. Nam & cantunculis, quas filii, quos docuerat, canerent, modos faciebat, ac perpetuos, quoad vixit, Sodalitatis sanctorum Ambrosii & Caroli, in via Flaminia, musicæ, Præfecti nomine, præfuit. Sed, ingravescente ætate, conflictari cum adversa valetudine

cœpit, ac doloribus artuum ita premi, ut se commovere non posset. Sed quamvis corpus, ægritudine annisque inôrnum, gereret, animum tamen, semper validum vegetumque, retinuit. Neque illum passus est esse otiosum; atque eo ipso tempore, quo gravius esset æger, quod vehementer ejus artus laborarent, agitabat aliquid ingenio, ac commentabatur. Sed tandem fuit illi necesse, morbo, cujus vini ferre non posset, cedere. At hic mihi vir generi hominum datus a Deo videtur, qui esset argumento, neminem in studiis literarum aut in aliqua alia re laudabili, ingenii sui viribus debere diffidere, neque in rebus magnis, ac magnopere expetendis, labore, qui nunquam potest esse sejunctus, exterritum, una cum spe, ejus quod concupierunt, cogitationem abjicere. Nam multi, cum otium desidiamque secuti, id, quod volunt, se assequi posse desperant, non inertiam suam, sed naturam, quæ benigna est omnium parens, accusant.

XXXVIII. JO. VILLIFRANCUS.

Volaterris, Etruriæ urbe notissima ac celeberrima, egregia & immortalitate digna ingenia multa prodiiſſe, ut de aliis taceam, præclara Raphaelis Volaterrani doctrinæ monumenta declarant, quibus pulcherrima elegantissimarum artium studia illuminantur. In quorum numerum merito referendus esse videtur Jo. Villifrancus, ibidem natus; qui aliquot ante annos extra eandem urbem mortem obivit. Erat in eo non contemnenda ad poësin indoles, ac præsertim admirabilis, ad versus faciendos, vita atque celeritas; in sermone familiari, multa festivitas multæque facetiæ, quibus principum ad se virorum voluntates alliciebat; magna in omnes comitas; in suscipiendis amicorum negotiis alacritas, in procurandis diligentia; in commissis continendis neque prodendis fides; in commensationibus, in conviviiis, hilaritas. Sed has virtutes, multa alia vitia æquabant. Magnæ, in omni victus genere, sordes; itaque cubiculo habitabat, incomto, immundo, pulvere atque operibus aranearum pleno; vestibis utebatur obtrititis, scedisque maculis, omni ex parte, refertis; sub-

cu-

cula induebatur ita illuvie simul ac sudore, tanquam glutine, imbuta, ut parieti hæsisset, si quis eam in illum impulisset. Summa in victu parsimonia; nam omnia ejus prandia cœnæque erant asperæ atque terrestres, multis oleribus; neque jusculi præterea quidquam degustabat, nisi si quando foris cœnaret aut pranderet; nam tum, aliquo invitatus, biduo ante esuriales serias ventri indicabat, quo ille plus caperet. Perpetua in sermone procacitas, ac nulla fere modestia; in versibus fundendis obscœnitas; in illud enim carminum genus erat a natura propensus; ac dum esset Florentiæ, ridiculum ac facetum quoddam fecerat carmen, in quo, si recte memini, infelicem ac miseram poësis conditionem deplorebat, cui qui operam darent, eos semper egere contiungeret; verum pluribus erat verbis obscœnissimis conspersum refertumque. Venit ad aures uxoris magni Ducis, hujus carminis, fama, in quo ille ridicule in adversam poëtarum fortunam & inopiam luserat, magnæque mulierem cupido incesit ejus carminis inspicendi. Nec mora; misit ad eum, qui suis verbis nunciaret, ut ad se quamprimum cum carmine illo veniret. Homo, cui mulieris sanctitas ac religio nota erat, cujusque aures ab omni verborum obscœnitate turpitudineque abhorrebant, tulit moleste, illius in animum eam cupiditatem fuisse illapsam; sed quoniam erat obtemperandum, prout temporis brevis patiebatur, conatus est turpia illa verba remove, & alia, eorum loco, reponere. Neque, pro sui felicitate ingenii, id quod voluit, non est assecutus; sed quia facetiæ illæ magna ex parte in verbis habebant leporem omnem, iis mutatis salem amiserant. Audivi eum ego, alterum carmen legentem, a se missum ad puerum longe formosissimum, in quo se suosque mores graphice deformabat. Mira etiam in eodem inerat ad cupiditates omnes voluntas atque propensio; & quo fortasse eisdem obsequi posset, maximum divitiarum opumque desiderium. Etenim, Virginio Ursino Brachiani Duci cum suas operas, non ea qua ipse voluisset mercede, conductas haberet, qui ipsius ingenio facetiisque delectabatur, neque, præter pactam mercedem, quidquam ab eo muneris acciperet; accidit, ut
die

die quodam Virginio, coram Cosino, magno Etruriz Duce, aliisque summis viris, qui simul animi causa convenerant, & ex Joannis argutiis sibi risum voluptatemque captabant, Joanni diceret: Ne multum de Epitaphio, quod sepulcro tuo incidas, componendo labores; nani illud inveni, quo, si omnia quæras, nullum invenias, quod paucioribus verbis te totum designet atque exprimat. Cedo, inquit ille, quodnam est istud? nam mire ejus audiendi sum cupidus. Audi igitur, ait Virginio:

Hoc Villifranci tumulantur ibi ossa sepulcro,

Presbyter ac Vates panem qui rosit in aula.

Tum Villifrancus: Bene, inquit, lepide & eleganter est dictum; non potuit melius: sed quæso, mea causa hos duos illi versus alios adijunge:

Qui dum Virginio Urfino serviret, ab illo

Pumice non unum potuit deradere nummum.

Hoc extemporario carmine audito, in tantum repente risum effusi sunt omnes, ut disrumpi viderentur, ac Virginio, merito relatam esse gratiam, dicerent, quod crabrones irritasset. Maxime juvenum vel adolescentium familiaritates appetebat, quo melius hilari jucundæque vitæ se traderet; quod adolescentium ætas, mollis ac fluxa, alienum a rebus seriis & gravibus animum gereret, ab eisque cohiberet, ac totum in omnem hilaritatem ludumque diffunderet. Itaque cum adolescentibus omnibus fere horis conspiciebatur. Elegantem edidit Eclogam, Amaranta nomine. Scripsit etiam poemata heroicum, Columbi videlicet navigationem, quod manu ipsius scriptum, Pauli Jordani Ursini, Brachiani Ducis, Virginii filii, custodiis asservatur. Id opus dum scriberet, frequens a Virginio, ad venationes prodeunte, sibi comes adhibebatur, ut suis ipse oculis, non alieno ore, venationum certamina, quæ sibi in eo poemate describenda erant, acciperet. At hic homo, ita voluptatibus obsequens, ut se Regem esse cuperet, quo illis indulgere ex sua libidine posset, non modo ad divitias, quas optabat, pervenire, sed ne prima quidem senectutis limina attingere valuit. Nam fallaces ejus spes, & inanes

cogitationes, in ipso propemodum ætatis ipsius flore, mors sæva pervertit; quæ in triremi, in qua una cum Paulo Jordano navigabat, tridui cum morbo fatigatum, oppressit, atque, in oppidulo, Cajetæ proximo, quod Circeus mons dicitur, pro temporis & facultatis ratione humatus. Reliquit longum ac jocosum epigramma, Italicis versibus ab ipso scriptum, quod suo sepulcro inscriberetur; ac nos conati fuisset in totidem Latinos illud versus convertere, si verba Latina illum potuissent leporem saltemque retinere, quem habent Italica; sed quia omnis noster labor irritus fuisset, non fuit consilium, inanem hanc operam suuere, præsertim cum majora potioraque habeamus. Tantum satis sit dicere, fuisse illud, tum ejus ingenio, tum vita ac moribus, dignum.

XXXIX. HIPPOLYTUS MERENDA.

Proxima atque adeo finitima Etruriæ aliisque Italiæ populis Æmilia, magno Romanis Pont. quorum illa imperio subest, semper utilitate atque usui fuit, magnum aulæ ornamentum ac decus ex suis civibus attulit. Ecquando non illa strenuos ad bellum duces, militiæque artis peritissimos, dedit? ecquando illa milites egregios, bellatoresque fortissimos, ad belli ejusdem usum non præbuit? illa præstantes ad pacis artes ac studia viros complures semper exhibuit, qui Reipubl. bene gerendæ scientia præditi, urbibus, quas regerent, salutis & commodo essent, qui curiæ ornamentum, ordini amplissimo splendorem afferrent. Sed multos in primis in jure civili peritissimos misit, in his Merendas, patrem & Hippolytum filium. Sed Hippolytus longo fuit intervallo, paternæ industriæ superior, quem, dici vix potest, quanto illum antecesserit in respondendo celeritate, in inveniendi subtilitate, in iis quæ maxime firma essent eligendis prudentia. Itaque omnes ad eum causæ deferbantur; quas studiose recipiebat ac fideliter tuebatur; neque ullam fere defendit, quam non obtinuerit; nisi si quando ii, quorum res erat, & a quibus totam causam fuerat edoctus, falsa ad eum detulissent. Nam tum, vincere non affuetus, ita exclamabat, ita ira incendebatur, ut fu-

re-

re omnibus videretur. Primo patroni munus exercuit, ac statim principem in patronis locum obtinuit. Sed, cum multos jam annos floruiſſet, maguamque pecuniam feciſſet, ſive quod laborem ferre non poſſet, ſive ut in patria bene partis in ocio uteretur frucretur, ſive ut valetudini, qua minus erat firma, ſerviret, reverſus eſt. Cæſennam, in patriam; ubi cum multos annos beatus, vel remiſſius certe, vixiſſet, tandem, vel recuperata valetudine, vel veteris famæ lucrique memoria (quamquam nulla illi inerat avaritia, ſed erat liberalis ac ſplendidus) in Urbem ſe recepit, ac revocavit in curſum; præſertim cum Alexander Cardinalis Ludoviſius, Gregorii XV nomine, ad Pontificatum max. fuiſſet evectus; quo cauſarum Rotæ Auditore, multum fuerat in foro verſatus. Romam igitur rediens, eodem ille quidem ingenii acumine, eruditione, doctrina, ac fortasſe etiam majori quam antea, præditus, ſed non liſdem moratus moribus, rediit. Nam cum primum juvenis in forum venit, vel quia totum animum in eo collocatum concludumque retineret, ut nobiles cauſas agendo, in principibus patronis numeraretur, nullam ejus partem, ad voluptatum illecebras, dilabi patiebatur; verum, quum ea jam eſſet ætate, quæ hæc juvenilia facinora fugere magis quam ſectari ſolet, tum illa magis perſequi cepit, neque ſibi indecorum duxit, capite candido ac barba alba, quæ ſunt adoleſcentium, facere. Hæc tamen ineptiæ, ad quas ille animi relaxandi gratia, quamvis aliena ætate, deſcendebat, vix forſan videntur, tanto ac tali viro, vitio vertendæ; quas ineptias ingentes virtutes obruebant: primum, tanta juris civilis ſcientia, ut diximus, quanta vix in altero, qui ea eſſet ætate, reperiebatur: tum, ſingulare veritatis ſtudio; nullam enim cauſam tuebatur patrocinio ſuo, quæ nullis veritatis radicibus niteretur: præterea, conſtans erga amicos fides ac benevolentia; ut etiam uni eorum, lucubrationes ſuas, cui nullum ſatis dignum pretium poteſt conſtitui, teſtamento legaverit: poſtremo, eximia erga Chriſti pauperes liberalitas, quorum neceſſitatibus, omnibus horis, large copioſeque ſuppeditabat; quam in eos liberalitatem, tum ſemper multis in rebus oſtendit, tum maxime in morte declaravit,

ravit, cum, pauperrimam Conversarum, ut vocant, Romanæ, in via longa, domum, heredem omnium suorum bonorum, quæ sunt scuta quinquaginta millia & eo amplius, instituit: in cuius etiam Fide sacra, D. Jacobo dicata, sepultura affici voluit. Fiebat interdum, ut ex nimis attenta cogitatione, qua defixus in studiis hærebat, ad quædam ridicula delaberetur, quæ propiora viderentur esse infantiæ, quam rationi. Cujusmodi illud est, quod, cum, die quodam, rheda vectus, quam nemo præter ipsum inscenderat, via Flaminia ferretur, rhedariusque ad portam Urbis pervenisset, ac vellet reversionem facere, vetuit ille, atque cum iussit progredi longius, quatenus existimatis? catenus, quoad Ariminum, vel, ut alii dicunt, Cæsenam veniret.

XL. CÆSAR VALENTINUS.

Non imprudenter omnino & insecite, a nonnullis magnis viris summisque oratoribus, factum existimo, ut, cum se putarent satis magnam adeptos esse dicendi gloriam, nullam posteris vellent ingenii sui monumenta relinquere, unde illis de ipsorum facultate existimare fas esset. Etenim, cum tanta in actione vis sit, ut Demosthenes, interrogatus, quid primum, quid secundum, quid tertium esset in oratore, statim primas, secundas, ac tertias, actioni detulerit; sæpe accidit, ut ea, quæ, dum agerentur, actoris voce ac gestu sublevata, clamores & admirationes efficiebant, deinde, cum legerentur, quoniam actio literis mandari non potest, ita vilescerent, ut admiraremur, tam alias res egisse populum, ut, audiens, in iis admiraretur, exclamaret, atque exhorresceret. Ac multos, nostra memoria, vidimus & audivimus, in suggestis, in scholis, quibus, dum audirentur, nihil videbatur fieri posse doctius, nihil limatius, nihil perfectius; sed, cum nos ad eorum scripta, si quæ ipsis excidissent, convertebantur, fiebat, ut iudicium nostrum contemneremus, nosque actionis lenociniis fuisse deceptos, fateri cogeremur. Atque, omittis ceteris, quos proferre possemus, ne vagetur oratio nostra longius, ea Cæsare Valentino desinitur, quem hoc ser-

sermone referre instituius. Hic ab origine ultima stirpis Romanæ, honesto genere natus, statim ab ineunte ætate, a parentibus est liberalibus disciplinis institutus; & in primis Latini sermonis elegantix studuit: sed, a prima illa puerili institutione abstractus, complexus est juris civilis ac pontificii disciplinam. Quam cum omni ex parte cognovisset, publice ejus docendi facultatem obtinuit; atque annos quinque & viginti in Gymnasio Romano, præsertim Jus Pontificium, magno discipulorum concursu, magnisque stipendiis, edocuit. Quo tempore exacto, quasi rude donatus, ejus vacationem muneris habuit, cum tamen nihil de stipendio deperderet, sed integrum, usque ad finem vitæ, perciperet. In hoc homine præsertim apparuit, quantum antistaret ceteris artibus eloquentia; cujus tantum specie, tam magnum ad se discipulorum numerum attrahebat, ut aliorum magistrorum, quantumvis doctissimorum, exedras auditoribus vacuas redderet. Latini igitur sermonis elegantiam, cujus ab ineunte ætate studiosum fuisse docuimus, ad ea, quæ tradebantur, quamvis aspera atque horrida, transferebat. Voce erat clara & acuta, jucunde ad aures accidens oratio, ita volubilis, atque ita facile, quo eam ille ducebat, excurrens, ut nusquam insisteret: quo fiebat, ut magno eum silentio audiretur; nec quisquam erat adeo dissolutus, adeo incommodis moribus præditus, qui dicenti auderet obstrepere. Quamobrem iis, qui videbant, ejus artis princeps videbatur. Verum, sæpenumero fiebat, ut, qui venissent, ab eo non tam docti quam delectati, non tam expleti quam avidi inanesque, discederent. Ut bene cum illius existimatione esse actum existimem, quod neque ipse neque quisquam alius, quod sciam, ejus in Jus Canonicum commentaria in lucem ediderit. Quæ enim lepida atque jucunda, auctoris oratione ac voce prolata aurium, quæ suavitate capiuntur, judicium sibi conciliarant, eadem literis, quæ nemini adulantur, expressa, oculorum, quod est acrius & incorruptius, judicium non effugissent. Magnam pecuniam fecerat, quam, tum ex stipendiis quæ diximus, tum ex re familiari, quo satis erat ampla, collegerat. Quod facile fuit homini & frugi & optimis ac sanctissimis moribus

prædito, qui semper omnia extraordinariis cupiditatibus denegasset, in quibus comparandis nequam homines sæpe evertuntur fundis ac familiis. Quam pecuniam collatam habebat in iis bonis, quæ una cum vita amittuntur; videlicet in officiis Cancellariæ, quæ vocant. Neque unquam a Pontifice, qui tum rerum potiebatur; homine parco & in re facienda occupato, cum esset senex & capularis, ad quem sua morte, bona illa redibant, impetrare potuit, ut officia illa divenderet, atque ex suercede, quam coëgisset, fundos vel ædes aut alia ejusmodi mercaretur, quæ possent ad hæredes testamento transmitti. Ille enim Pontifex, princeps ex omnibus, iis, qui paulo processissent ætate, officia illa vendendi, facultatem ademerat, cum ceteri ante ipsum cuiusvis, quantumvis decrepito, id liberum reliquissent. Cum jam a laboribus alios docendi, suo jure, quievisset, quia & vir erat probus, & humanissimis literis deditus, frequens in Sodalitatibus conspiciebatur, in ea præsertim, quæ ex nobilibus, in domo professæ Soc. Jesu convocatur, ubi etiam, una cum aliis, eloquenter copioseque differebat; & in Academia Humoristarum aderat, non ut ibi ipse aliquid ageret; ætas enim cum prohibebat eas partes sumere quæ sunt adolescentium, sed ut alios, dicentes, & sua poemata recitantes, audiret, & si quid in eis titubatum esset, animadverteret, & pro ea auctoritate, quam ipsi ætas dabat, modeste humaniterque corrigeret; quod tamen jus, quoniam singulari etiam erat modestia, ita usurpabat, ut magis ab auctoribus illarum scriptiorum sibi permissum, quam vendicatum ab ipso, videretur. Sed demum, cum ævum in longum protraxisset, fato suo functus, humatus est in Æde Virginis Capitolinæ, in sepulcro majorum suorum. Oblatum sibi a Xisto V Episcopatum, constantissime repudiavit, quod scientiæ suavitæ, qua nihil est hominibus jucundius, delectatus, quietam vitam turbulentæ, otiosam negotiosæ laboriosæque, anteponendam esse putaverit.

XLI. GENESIUS PROIDA.

SUMMA ac prope singularia naturæ donâ, quibus cum-
 mulatur Hispania, primum ab Ibero anine Iberia,
 postea ab Hispali Hispania cognominata, si velimus hic
 omnia referre, longius nos ab instituti nostri ratione
 digrediemur, quibus non est propositum, urbium vel re-
 gionum naturas ac dotes exponere, sed hominum, qui
 in iis aliqua ingenii laude floruerunt; imagines, ut sæpe
 dictum est a nobis, brevi oratione describere; aliarum
 vero rerum cognoscendarum cupidos ad illorum vo-
 lumina relegamus, qui ea omnia diligentissime sunt lite-
 ris persecuti. Illud vero non nihil ad rem nostram face-
 re videtur, quod ajunt, ibi corpora hominum nasci, ad
 vigiliam, inedia, ac laborem animi prompta, tum fir-
 missima corporis valetudine, ob cæli salubritatem, quæ
 per omnem Hispaniam æqualis est, quia aëris spiritus,
 ut referunt ii, qui de regionibus illis scripserunt, nulla
 paludum gravi nebula inficitur. Quo factum opinor, ut
 post multa secula, cum se ad literarum studia contulis-
 sent, inventi sint multi, qui in omni eorum studiorum
 genere, cui se dedissent, excellentes evaderent, non in
 iis solum disciplinis, in quibus singulare ingenii judi-
 ciique acumen exigitur, ut in Philosophia ac Theolo-
 gia, sed in iis etiam, in quibus ingenii ejusdem amœni-
 tas celsitudoque requiritur; cujusmodi humanissimæ li-
 beralissimæque sunt artes. Etenim laborem, patientiam,
 & sollicitudinem, quæ sunt afferenda ab iis, qui exquisi-
 tius, quam vulgus hominum, studere literis postulant,
 non reformidant, sed cum sint, ad ea perferenda suscipi-
 endaque, a natura facti institutique, in se recipiunt ac
 transferunt. Nonne plures, ex una Hispania, sacrarum
 ac divinarum rerum interpretes prodierunt, qui Theo-
 logicam facultatem doctissimis suis commentariis illu-
 strarunt, præsertim ex Dominica atque Ignatiana So-
 cietatis Jesu familiis, quam ex ceteris orbis terræ regio-
 nibus? nonne in omnium elegantia literarum excultos,
 tum vetere tum nostra memoria, eos dedit, quibus nihil
 desideres melius neque præstantius? Unum est, in quo

Italia Hispaniæ & ceteris nationibus præstat, Jurisconsultorum videlicet copia, qua non solum abundat, verum etiam redundat, propter eorum multitudinem, qui, vix ac ne vix quidem literis tincti, veniunt, cum entium locum ac numerum; nemo enim, qui precium afferat, ab eo repellitur: atque, superiore anno audivi non neminem ex iis, quos inter, lucrum illud distribuitur, misere querentem, locum illum honoris in opinione hominum eviluisse, nam minus multos, quam antea, ejus cupidos inveniri, neque scelestiorem, eo vendendo, se vidisse annum, quam ille sibi obtigisset. At contra in Hispania, nemo in eum ordinem admittitur, nisi probata industria; immo nemini ejus muneris petendi potestas tribuitur, nisi illi, qui antea, longis gravissimisque disputationibus, ejus, quod didicerit, periculum fecerit. Ab ea schola profectus est in Italiam Proida. Ac primum Neapoli cœpit causas agere; ubi etiam uxorem duxit, mulierem Neapolitanam, facie non satis honesta atque decora. Sed, cum minus amplum suæ virtuti theatrum forum illud existimaret, se Romam contulit, & in foro esse cœpit. Ubi cum nondum esset cognitus, pauci, vel nemo potius, ejus consilio utebatur; quod, uxor avara, quam perpetuam sibi oblatricem in ædibus habebat, quæque Neapoli, ubi major ejus arti quæstus fuerat, curabatur nitidius, ejus incitæ vel negligentæ cum tribueret, cum miserum habebat, &, prius quam galli cantarent, eum a somno excitabat; poscebat, aurum, vestem, aut unctiusculum jentaculum; cumque hæc ille denegaret, seque inopie excusatione defenderet, illa irata, ac dote fortasse ferox, contumelias ac jurgia suscipere, ac dicere: Ignavissime, impurissime, decoctorum nequissime, aulæ Romanæ dedecus, fori ludibrium. Contra ille, cum non posset bilem continere, aliis illam maledictis verberabat, atque insanam, rabiosam sceminam, canem appellabat. Sed ejus petulantia par eise non poterat, quæ poëtria erat, prorsus ad eam rem unica; multo enim plura, quæque acrius hominem urerent, inveniebat. At ille tandem victus, cum nihil se verbis proficere, quibus erat illi inferior, intelligeret, minis eam perterrefacere, sibi que obnoxiam facere conabatur;

ac:

ac: Nisi, aiebat, linguam cohibes, eam tibi comprimam, ac, capillo abreptam, in mediam viam protraham, ac convolvam in luto; ac, si pergis esse inepta, vitâ ipsa devolvam. Istuc, inquit illa, videre velim; nam, si me digitulo uno attingas, feres infortunium; nonne te subit, me Migni Cappelli filiam esse? at cujus viri? nempe ejus, qui toti Neapoli terrorem injiciat. Atque hæc eo confidentius scribo, quia meis ipsemet auribus accepi; quod domus, in qua habitabat, paries mecum esset communis. Nonnunquam etiam res ad manus atque ad pugnam veniebat, & eam ille capillo scindebat, ea unguibus illi in oculos involabat, magnosque toti vicinæ ludos præbebant. Aefuit, cum, jurgio uxoris impulsus, candelabrum ex aurichalco, e mensa sublatum, ob os illi objecit, ac non leve vulnus infixit. Tum ille, sive misericordia commotus, sive quod metueret, ne ejus nomen ad magistratus deferretur, idque existimationi, quam de se conciliare studebat, officeret, depositis Jurisconsulti partibus, eas, quæ sunt chirurgi, suscepit, & eatenus sua vulnus illud manu curavit, quoad ad sanitatem perductum est. Atque hæc antea, quam in foro celebratum ejus nomen esset. Verum, posteaquam, quibusdam in judiciis, ejus industria cognita atque probata est, omniumque sententia judicatum, nullam esse causam, quæ non ejus digna patrocinio videretur, jamque munera illi multa atque pecuniæ domum a litigatoribus convenirent, perpetua inter eos pax atque otium constitit. Mira in eo ingenii vis aderat, judiciuin acere; nam cum vidisset, quid causam faceret, quidque judici probandum esset, in eo hærebat; in interpretando, in definiendo, in explicanda æquitate, summa prudentia; adeo ut judices eam causam probabiliorem existimarent, quam ipse defenderet. Verum cum jam Romæ sic floreret, omnesque ad eum causæ maximæ, quæcunque erant, deferrentur, evocatus est Neapolin, ut insignem quandam provinciam a Rege ipsi delatam, capefendam accederet, unde an rursum in Urbem redierit, nescio; illud scio, ejus filias Romæ fuisse nuptui datas. Id illi unum erat vitium, quod nimis studiose latrunculis luderet; adeoque interdum, cum se honestissimæ

illi animi remissioni dedisset, eatenus ludendi ardore incensus progrediebatur, ut causarum, quas tuendas susceperat, patrocinium defereret, ac clientum oblivisceretur, qui venerant, ut cum ad iudices docendos adducerent.

XLII. LUDOVICUS VIGNATUS.

Diximus antea, in Genesio Proida, nullam esse in Europa regionem, in qua vilior sit Jurisconsultorum, sed nullius sæpe frugis, annona, quam in Italia, cum, in Hispania, & in aliis quibusdam exteris nationibus, qui faciunt civibus omnibus consilii sui copiam, pauci quidem sint, sed doctrina rerumque usu præstantes, atque, si ad numerum illorum, qui illum mercantur ut eo se jactent, spectetur, non possumus ire insicias, quam plurimos inveniri, qui indigni sint eo loco ac numero: sed si ad eos convertamus nos, qui serio ad Jus civile se conferunt, ut in eo studio excellant, plures se nobis obijcient, quos non solum illis æquare, verum etiam longo intervallo anteferre possumus. Atque multorum hætenus Jurisconsultorum imagines, quantum facultas nostra tulit, a nobis expressas, in hunc librum retulimus, qui jurisprudentiæ gloria sunt ab omnibus habiti, non solum urbis, sed totius etiam orbis, oraculum. Neque tamen persecuti sumus omnes, quos, me superflite, egregie aliis consulentes vita defecit. Atque in præsentia se mihi offert Ludovicus Vignatus, Laudis Pompejæ, Transpadani oppidi, nobili loco natus; qui Romam florentem adhuc juvenis se contulit, non ut in foro disceret, sed ut, quantum efficere posset, doctus, in forum veniret; ac primo se, ad Scipionis Lancelotti ductum aggregavit, in ejusque contubernio, quoad ille vixit, permansit; qui tum erat Rotæ Auditor, ac postea a Gregorio XIII, ob ejus doctrinam, Cardinalis est factus. Eo mortuo, domum aperuit, ut omnibus, qui vellet, in suis rebus dubiis se ad consulendum daret; tum sua industria, tum Horatii Lancelotti, Cardinalis Lancelotti fratris filii, Rotæ Auditoris, qui postea, Paulo V Pont. max. Cardinalium numerum auxit, amicitia fre-

fretus. Etenim iis, qui versantur in iudiciis, ad obtinendas causas, auditorum gratia plurimum prodest. Quó factum est, ut brevi sit adeptus illustrém inter advocatos locum; atque ea etiam de causa libenter ab iis, qui controversias habebant, adhibebatur, quod mira erat in eo, in rebus cognoscendis, earumque ponderibus examinandis, accuratio; ut non facile in ullo diligentior majorque inveniretur. Cujus fama virtutis adeo hominum in se studia ad deferendas sibi causas alliciebat, ut postea Horatius, ab Auditoribus Rotæ ad Cardinales, ut paulo ante dixi, traductus, nihil illi de numero clientum ademerit, sed eodem quo antea, & majore etiam, illorum concursu domus ejus celebraretur; quod nihil sit, quod ii, quorum res est, tantopere cupiant; quam sua ab iis, quos sibi patronos adoptant, negocia cum cura ac diligentia suscipi atque tractari. Commendabat hoc etiam formæ dignitas, & naturalis quædam humanitas comitasque, qua ad se venientes excipiebat. Sed florebat, ut cum maxime, & clientum & causarum numero tum Vignatus, cum Paulus V, ejus virtutum fama commotus, Maphæo Cardinali Barberino, qui Legatus Bononiam proficiscebatur, comitem cum adjunxit, ut insignem ibi magistratum administraret; cui admirabili quadam doctrinæ, æquitatis, industriæque laude præfuit. Quamquam mihi narratur, inter ipsum atque legatum, nescio quid discordiarum, de rebus ad Rempubl. pertinentibus, intercessisse, ac propterea deinceps illum apud Legatum, minus auctoritate & gratia valuisse. Quod (si fictum non est) non longius abesse a vero videtur. Erat in Maphæo Barberino, ut perspicere potest ex iis, quæ scripta relinquit, ingenii vis magna, erat exquisita juris civilis multarumque doctrinarum notitia, erat excellentis industriæ ac prudentiæ laus eximia; sed tot tantarumque virtutum cognitio adeo ab intelligentia sua non aberat, ut eam animo comprehensam haberet, ac propter eam tantum sibi tribueret, ut, quod ipse probasset, aliis etiam probatum esse debere, quasi suo jure contenderet, aliosque, qui contrariæ essent sententiæ, in inscientium vel malevolorum loco responderet. Atque acceptum est ab iis, qui sermoni inter-

fuerunt, die quodam, cum jam Pont. max. factus; eujusdam, quem in amplissimum dignitatis locum eve-
 rat, singulares virtutes summis in cœlum laudibus effe-
 ret, exclamasse illum & dixisse: O virum summum, ac
 majore etiam honore quam ille est, quem illi tribuimus,
 dignum! quid vultis amplius? nulla unquam in re a
 nobis ille dissensit. Magni cujusdam argumenti loco su-
 mebat, summæ illum sapientiz arcem tenere, quod o-
 mnibus ipsi in rebus assentiretur. At nihil novum fecit;
 sed summis ingeniis usitatum, præsertim si incredibili
 virtuti, qua ille erat præditus, summum imperium ha-
 beant adjunctum, ut dictorum sanctorumque suorum as-
 sensionem omnium exigant. At Vignatus, Bononia Ro-
 mam reversus, se revocavit in cursum, & rursus causas
 agere cœpit. Quem cursum feliciter, ut antea, tenuit.
 Sed hominis virtutem, Romæ, Mediolanum invidit.
 Nam illum ad se vocavit, & in amplissimum illius Civi-
 tatis Senatum cooptavit. Quo munere cum egregie fun-
 geretur, audivit, Gregorio XV e vivis sublato, in ejus
 locum subrogatum fuisse Cardinalem Barberinum, qui-
 cum una, ut diximus, Bononiæ fuerat; ac continuo, pro
 vetere amicitia, ac pro sua virtute, cujus in nobili illa
 legatione satis magnum specimen dederat, in maximam
 spem amplissimæ dignitatis inductus, Romam advola-
 vit. Quo cum pervenisset, & aliquot post dies, ad novi
 Pont. pedum osculum fuisset admissus, nihil ab eo nisi
 verba retulit. Itaque animadvertens, spei, quam conce-
 perat, eventum non respondere, statuit Mediolanum
 redire; ubi, non multos post annos, repentina morte
 deperiit.

XLIII. JULIUS BENIGNUS.

INepte, ne dicam stulte, mea quidem sententia, fa-
 ciunt, qui egregium a natura ingenium adepti, cum
 ingenii ejusdem viribus, tanquam alis, in altum elati,
 locum aliquem honoris ac famæ conscenderint. Non ni-
 hil a majoribus suis, cum ea non adsit, claritatis sibi u-
 surpare conantur. Tanquam si eorum virtus minus cla-
 ra futura sit, nisi eidem aliquid ab illis splendoris acces-
 se-

ferit. Quod longe secus mihi videtur. Etenim honestius dico, nobilitatem & gloriam totam nos parere, quam aliquam ejus partem, ab aliis partam, accipere; ac longe præstantius existimo, majores nostros ex nobis, quam nos ex majoribus nostris, magnos & claros existere. Quin illud, ex majorum recte factis, incommodi iis, qui nobili genere nati sunt, accidit, ut, si iis, quorum fumosis imaginibus gloriantur, dissimiles inventi fuerint, nihil ex eorum commemoratione in sese, nisi infamiam ac dedecus, attrahant, si quidem ipsorum flagitia, cum illorum virtutibus in comparationem adducta, majorem sermonum ansam hominibus præbeant, qui quidem videbantur quieturi fuisse, si illorum improbitas in tenebris obscuritatis familiar delituisse. Venit mihi in mentem, tum M. Catonis, hominis sapientissimi, tum Q. Pompeji, humili atque obscuro loco nati; quorum uterque sibi gloriosum & honestum duxit, sui generis initium ac nominis a se gigni ac propagari, ac propterea maximis in laboribus, usque ad summam senectutem, summa cum gloria vixit. Nostra memoria, vir maximus atque clarissimus, cum, nulla commendatione majorum, sed propria virtute, ex infimæ sortis hominibus in eum locum pervenisset, quo nullus neque excelsior, neque angustius invenitur, ostentationis gloriæque causa commemorabat, se puerum, parva mercede conductum, in summa inopia & in pannis, ovium ac suum greges pastum adduxisse ac reduxisse. Quid multa? adeo, in tanto fastigio collocatus, suarum ipsum sordium non pudebat, ut eas etiam materiem honoris ac laudis haberet. Sed alio erat animo Julius Benignus. Nam, non contentus ea nobilitate, quam sua sibi virtus peperisset, volebat etiam videri, aliquam a parente accepisse; atque in sepulchro e marmore, quod illi constituerat in Æde Deiparæ Virginis Romæ, quam vocant, de pace, dedit illi formam, sane liberalem, haud illis abssimilem, quam in statuis nobilium Romanorum videmus; tum genus nobile, partes honestas. Nam fecit illum I. C. non unum e multis sed prope singularem. Quæ si quis vera esse contendat, non repugnabo. Sed ego, etiam tum adolescentulus, audiivi sæpius, de duabus ma-

tronis honestissimis, ac veritatis diligentissimis, sancto affirmantibus, se talem patrem, qualem ipse deformabat, nunquam vidisse, neque novisse; usus tamen fuisse familiarissime ejus matre, quam aiebant esse mulierem pauperulam, una cum illo puerulo annum ætatis quintum non excedente, Canonicorum regularium, illius cœnobii, misericordia victitantem. Præterea aiebant, Abbatem, qui tum cœnobio illi præerat, quod videret fulgere in eo puerulo indolem virtutis, (erat enim modestus, gravis, ingeniosus,) suis sumtibus erudiendum eum curasse, neque operam ac sumtum perdidisse, quod ille in omni genere literarum clarius exsplendesceret quam ceteri condiscipuli, vinceretque omnes, studio, diligentia, ac celeritate ingenii; atque, ab his initiis ad eum doctrinæ & honoris locum pervenisse, quem postea tenuit. Quarum rerum ego maxima documenta hæc habeo, quod semper Canonicos illius cœnobii in parentum loco habuit, dilexit, coluit, neque accepti beneficii memoriam apud ipsum exolevisse, & vivus multis in rebus ostendit, & in morte sua testamento declaravit; cœnobiū enim illud reliquit heredem, sed usum fructum, omnium fere bonorum, juveni cuidam, qui erat ipsi a cubiculo, quemque diligebat ex omnibus plurimum, legavit. Verum, utut sese res habeat, sive illi generosa stirps adfuit, sive defuit, fuit homo probus, gravis, eruditus, disertus, Juris autem civilis adeo peritus, ut ceteris magistris, qui illud in Gymnasio Romano docerent, antecire existimaretur. In quo docendi munere cum quinque & viginti confecisset annos, est postea rite donatus. Sed antea in collegium Advocatorum Consistorialium cooptatus fuerat; & quoniam, illorum legibus, nemo in eum ordinem, qui est honestissimus, admittitur, qui non sit etiam nobili genere natus, sudatum est ab iis, quibus hujus rei inquirendæ provincia data fuerat; vix enim quisquam superstes erat ex iis, qui de jure respondentem eum vidissent, cujus monumenta formæ ac nominis in sepulcro, de quo diximus, imprimenda curasset. Interrogatæ sunt etiam mulieres illæ, quas commemoravimus; quæ pro testimonio dixerunt id, quod erat ipsis notum atque testatum; tantum

tum de matris paupertate reticuerunt, ne ejus honori obstatè viderentur. Quemadmodum autem, in disputationibus publicis ac privatis, quibus de doctrina eorum, qui cooptantur, periculum fieri solet, se gesserit ille, qui tot annos id docendo disputandoque versatus sit, quid ine attinet dicere? nam postquam ægre impetratum est, eum non esse a nobilium virorum numero excludendum, ea felicitate ingenii, ea doctrinæ, ea eloquentiæ vi, in disputationibus illis, eorum argumenta diluit, qui ea, quam ille tuenda proposuerat, infirmare ac labefactare conabantur, ut esset omnibus admirationi. Itaque Petrus Card. Aldobrandinus voluit eum habere a cognitionibus, Auditoris loco; quod munus egregie laudabiliterque defendit. Interea Paulus V, cum decrevisset, multa vitia emendare atque corrigere, quæ in omnia Urbis magistratuum tribunalia irreperant, ob extimiam juris civilis scientiam eum, unum ex illis voluit esse, cui tantum munus demandaret. Hic Romæ mos viget, ut ex advocatis Consistorialibus, quos diximus, unus eligatur, qui pauperculis hominibus, atque omni patrocinio destitutis, advocatus adsit, iisque diligentem ac gratuitam operam præstet. Hic sedet inter primores Urbis magistratus, cum statis diebus in carcerem conveniunt, ibique vinctos, qui se vel adversariorum vel judicum injuriis oppressos queruntur, audiunt, cavetque, ne contra rem pauperum decernatur aliquid injuria. Id ille munus, multos annos, summa cum pietatis & diligentis laude sustinuit. Videbatur homini inesse quædam ambitio, neque quidquam ipse ravi cupere, quam in specioso Antistitis habitu ornatuque spectari. Itaque dedit operam, ut in eorum Archiepiscoporum numero esset, quibus cum illorum Ecclesiæ in Turcarum potestate sint, nulla procuratio subest, sed Archiepiscopi tantum nomen ornatusque relinquitur, itaque impetravit in beneficio & gratia, ut Archiepiscopus titulo tenus, metropolis nescio cujus, a Turcis possesse, renunciaretur. Obtinuit etiam, ut Congregationis sacrorum rituum Secretarii munere fungeretur; ad quod officium nemo admittitur, nisi in aliquo ejusmodi dignitatis gradu constitutus. Neque eo fuit con-

tentus, sed summa ab eo adhibita est opera, ut ad Episcopos, quos vocant Assistentes, rescriberetur. Postremo, adeptus est, ut in Sacello Pontificio, ipso præsentente Pontifice, solemnibus cærimoniis, Missæ Sacrificium faceret. Atque hæc meta fuit cursus honorum ipsius & vitz. Nam paulo post lethali est morbo consumtus.

XLIV. ANGELUS DE ACIARIA.

SI cui Angeli de Aciaria, Senis nobili loco nati, probitas, religio, doctrina, minus nota sit, si eum audiat Roberto Bellarmino, avunculo suo, carum in primis extitisse, nonne maximi argumenti loco habeat, in omnibus iis virtutibus, quas indicavimus, perfectum absolutumque eum fuisse? Ea enim erat hominis longe sanctissimi gravitas, ille ejus adeo distractus atque se-junctus ab omnium rerum humanarum cupiditate animus, ut nulla cujusvis affinitatis cognationisque necessitudo, ad eum diligendum & aliquo in numero habendum, momenti aliquid esset habitura, nisi ea etiam fuisset cum virtutis omniumque bonarum artium societate conjuncta. Complectebatur igitur hominem summo studio ac benevolentia, non tam ut cognatum, quam ut virum in primis probum, honestum, ac doctum. Sed, quem ille æstimationis locum in Bellarmini opinione teneret, tum maxime apparuit, cum ab eo, insigni ac locupleti S. Benedicti, Cassinensis olim familiæ, quæ erat Capuz, est Sacerdotio donatus; quod Sacerdotium, cum ipse Abbatis jure ac nomine possidere, sibi detraxit, & in Angelum, eodem Abbatis jure ac nomine, transtulit. Nam quid potuit facere elegantius, ut ostenderet, quanti hominem saceret? quid enim est, in quo viri sanctissimi plus operæ tribuant, quodque illis magis sit cordi, quam ut bona Ecclesiæ, eorum fidei tutelæque committantur, qui in eos usus illa conferant, ad quos a majoribus nostris, religiosissimis mortalibus, relicta fuerunt; nimirum ad pauperum inopiam sublevandam, & ad sacras zedes, collabentes, instaurandas? quid contra est, quod illi tam graviter dolenterque querantur, quam in illa bona eos invadere, qui, ad suas cupi-di-

ditates explendas, ea improbe nefarieque profundant? Quamobrem, tametsi Angelo jucundissimus erat honor ab avunculo sibi tributus, tamen majorem voluptatem capiebat ex eo, quod homines essent existimaturi, honorem illum, cum a Bellarmino provenisset, non quia aliqua cognationis, qua cum illo implicaretur, necessitudo intercessisset, sed quia sic oportuerit, eoque dignus esset, sibi contigisse. Quod si hæc omnes, quibus pingua sacerdotia deferuntur, cura torqueret, multi pravi e Republ. Christiana mores radicitus evellerentur. Non illorum animos, pecuniæ cupiditas, non vitiosus propinquorum amor, non libidinis æstus exureret; non apud eos, pessiua aleæ, venationis, & conviviorum studia vigerent; non villarum amœnitas, non ædium magnificentia, non pretiosæ suppellectilis luxus, eorum cogitationes sibi devinctas haberet; sed pietas, religio, modestia, bonarum artium studia ac pauperum inopix sublevandæ sollicitudo, in illorum mentibus dominaretur. Sed ut ad Angelum revertar, qui tot tantisque a Bellarmino laudibus elatus ornatusque fuerat, non cum erat æquum, otiosum domi sedere, sibi que tantum, non etiam aliis, usui esse; ideo fuerat compellendus in lucem, hoc est in opus, & in oculis hominum constitutus. *Nemo enim, ut Christus ait, accendit lucernam, & ponit eam sub modio.* Pater enim luminum, qui eam virtutis flammam incenderat, non passus est eam in occulto latere, sed aliorum oculis esse expositam voluit. Itaque primum ille Episcopo Navariensi Vicarius generalis est traditus; cui provincix tanta cum laude præfuit, ut diligentiam sollicitudinemque admirarentur omnes, prudentiam & vitæ integritatem agnoscerent. Quamobrem ejus virtuti, hoc ecclesiæ regendæ quasi tyrocinio, spectatæ ac cognitæ, jam deberi existimatum est, ut editione in loco collocaretur, atque ipse non vicarias alterius, sed suas proprias artes ageret. Itaque Theani creatus est Pontifex. Qui magnam virtutis cujuscumque expectationem sustinent, hoc sere semper habent incommodi, ut vix unquam tantum illius virtutis ex se dare possint, ut non multo plus homines de ipso speraverint. At hic, in re Ecclesiæ suæ gerenda, adeo fuit felix,

lix, ut non solum, quam de se commoverat, expectationi par fuerit, verum etiam eidem aliquanto superior extiterit.

XLV. FRANCISCUS BRACCIOLINUS.

Inclita poëtarum natio, vatium præsertim solet appellatione censeretur, quasi, quæ sint futura, vaticinentur. Neque istuc ipsi non profitentur. Nam iis, quibus immortalitatem nominis, suis carminibus, pollicentur, postquam magnifica oratione falsas plerumque laudes, non modio neque trimodio, sed toto, ut inquit ille, horreo, sunt emetiti, continuo vel opes ac divitias, vel honores, vel, si militares sint homines, gloriosas de potentissimis hostibus victorias atque triumphos, sæpe prædicunt. At si in eo poëticæ facultatis vis insit, ut res futuras multa ante prævideat atque denunciaret, isque in ea facultate præstantior ceteris habeatur, qui magis rerum futurarum scientia polleat, quique certius ac verius, quæ sint eventura, præfagiat, mirum dictu est, quantum Franciscus Bracciolinus, Pistoriensis, sui ævi vates in primis, divinandi artificio superatus sit ab eo, qui sibi erat ad manum, scribæ loco, &, quod admirabilius videri debeat, qui poëticam nunquam attigerat, nec versus facere didicerat. Etenim ille multo sapientius Francisco, ut postea videbimus, divinavit, quæ e sua re essent. Atque est, quod Franciscus Apollini, quem jam inde a pueritia sectatus est, jure succenseat, quod divinandi scientiam, in qua ille princeps ponitur, quamque sectatoribus suis ita large magnificeque promittit, sibi denegaverit. Nam, per hanc perfidiam, multæ magnæque ipsi utilitates & commoda præclusa fuerunt, quæ patuissent, si servare voluisset in eo, quod promiserat, fidem. Itaque, merito queri potest, se ab eo fuisse deceptum. Atque ex his illius perfidia incensum ira, arbitror, postea poemata illud, quod *Ludibrium deorum* inscripsit, composuisse; cum nimirum ipsum puderet, fidem habuisse iis, quæ de Apolline traderentur, ipsum esse, qui vim quandam in hominum mentes infunderet, qua illæ concitaret, quæ futura sint, ederent, & quasi diffunderent.

Vc.

Verum videtur non debuiffa Apollinis unius peccatum universo deorum concilio fraudi effe. Sed abeamus a jocis, & ad rem ipsam accedamus. Maphæus Barberinus, tum Cameræ Apostolicæ Clericus, utebatur, in scribendis epistolis, opera Francisci Braccioliui; quem etiam ob præclarum ingenium, & communium studiorum societatem, earum habebat in primis; cum a Clemente VIII, Pont. max. missus est Nuncius in Gallias ad Henricum IV, Galliæ ac Navarræ Regem; ac Franciscum, cum eodem scribendarum epistolarum munere, secum duxit in Galliam, ac plures eum menses, eo loco ac numero, assidua atque utili opera, habuit. Sed, cum Roma, de Clementis VIII morte esset allatum, cœpit Franciscus desperare, eum, quem hac spe sectatus fuerat, posse Cardinalem evadere; quod sere mox fit novî Pontificis, ejus, cui succedit, Nuncios revocare, & eorum in locum alios substituere. Itaque statuit, eum deserere, & in patriam redire, ut ibi in Musarum hortulis, molliter ac delicate in herba ac rosa recumbens, penitus avocaret animum a Republ. Neque fecit secus quam cogitavit. Nam ægre a Maphæo venia impetrata, qui ferebat moleste, talem virum a sese divelli, Pistorium venit, ibique, quemadmodum constituerat, se totum Musis addixit. At ejus amanuensis, multo quam ipse sapientior, & in divinando felicior, delatas sibi a Maphæo scribendarum epistolarum partes, arripuit, easque egregie gessit; adeo ut ille, jam creatus Pontifex, eum Cardinalitias deponeret vestes, ac Pontificias indueret, Cardinalibus, qui aderant, ejus operas ac mores mire commendaverit. Verum ubi Bracciolinus eum, a quo discesserat, non solum in Cardinalium Collegium, id quod ille nunquam putaverat fore, pervenisse, verum etiam summum Pontificem factum, audivit; tum vero se falsum vatem fuisse, suumque amanuensem multo sibi antecessisse sapientia, existimavit; ac relicto florum rosarumque cubili, ubi in musarum nutricatu cubabat, Romam venit, seque in Urbani VIII (id enim erat Pontifici nomen inditum,) conspectu constituit. Non est Pontificis illius humanitas atque benignitas prætereunda hoc loco; qui cum deberet eum rejicere, nec per-

peti,

peti, ante oculos sibi adduci, a quo, alienissimo tempore, & cum maxime ejus opera indigeret, esset desertus atque despectus, adeo nullum adversus eum irati vel commoti animi signum ostendit, ut etiam humanissimis & amantissimis cum verbis sit prosecutus, & Antonio Cardinali S. Honuphrii, fratri suo, tradiderit, ut illi esset ab arcanis; tum, quoad vixit, sicubi negotii cum odium ceperat, dabat illi sese, atque in ejus sermone ac suavitate omne superioris temporis fastidium deponebat. Erat enim jucundus, facetus, hilaris, amœnus, atque oronium, ut dicitur, horarum homo; & interdiu, æstate præsertim, habebat decretum semper aliquem locum, puta tabernam aliquam aromatariam, ante ejus fores sedens, una cum amicis, qui ejus consuetudine usuque delectabantur, suavissimis sermonibus diem consumere. Multa ejus dicta, tum gravia, tum arguta, tum jocosa, tum ridicula, feruntur, quæ, cum alia sint in eo potiora, relinquimus. Multa scripsit Etrusco sermone, tum jocosa, tum seria; utroque enim in genere præstitit; tum soluta oratione, tum versibus, quæ, si quis sibi nota esse expetit, licebit ea ex Leonis Allatii Apïario, ubi fere omnia referuntur, accipere; in quibus poemata illud enumeratur, quod *Urbani VIII electio* inscribitur, libris tribus & triginta comprehensum; quod Pontifex ille, cum sibi traderetur, dixisse Bracciolino dicitur: Gratium est nobis munus, quod desers, ac maximas de eo tibi gratias habemus agimusque; sed illud, ad te remunerandum, invenimus, quod non solum largitatem tui muneris æquet, verum illud etiam longo intervallo exsuperet, quodque, in omni futuri temporis spacio, immortale tuum nomen efficiat, ut tute fatearis, nos esse imitatos agros fertiles, qui multo plus reddunt, quam acceperunt: itaque dehinc, auctoritate nostra, appellaberis Bracciolinus ab Apibus, quod est insigne nostræ familiz; atque nos primi te hoc cognomine nuncupamus; Braccioline ab Apibus, vale. Hoc ille nomen obtinuit, atque ita se postea appellari passus est; illudque operibus, quæ deinceps edebat, inscripsit. In omni genere poëtice facultatis se multum exercuit. Nam lyricum, tragicum, heroicum, pastorium, jocosum; in

cis-

eisque magna est cum laude versatus; sed in lyrico laude impari; in eo enim multos habuit superiores: at in heroico, non video, præter Areostum & Tassum, cui ille debeat cedere; imino non video, quisnam illi comparare se audeat, qui una sit ætate. Neque in uno tantum poemate elaboravit, sed in pluribus; & in omnibus inventus est sui similis. Incidi in non neminem, qui, censorio supercilio, omnia ejus opera, ac præsertim heroica, adunco, ut dicitur, naso suspenderet; quod diceret, omnia in eis esse teterrima, jamque contigisse, ut antea illa fato suo sunderentur, quam ipsum vita deficeret. Quod falsum est. Nam Christi Crux, ab Heraclio & Persis recuperata, (id enim nomen est illi poemati) ipso vivente, ter est typis impressa, semel Parisiis, iterum Lutetæ, tertio Venetiis. Sed quid miremur, Bracciolinum illi displicere, cui ne Torquatus quidem Tassus poeta videatur? Plura igitur heroica scripsit carmina, Urbani VIII creationem, & Crucem Christi a Persis recuperatam, de quibus diximus, atque, exacta jam ætate, annos natus septuaginta, Bulgaros ad Christi fidem conversos, ut ipsemet in fine ejus carminis fatetur. Atque in his omnibus carminibus nihil eorum desideratur, quæ sunt insignia ad maximam laudem; argumenti majestas ac dignitas, inventionis & ingenii acumen, genus orationis altum, exaggeratum, sublime, non tamen caligine obsitum ac mentis aciem effugiens, sed planum, perspicuum, atque omnium intelligentiæ ultro se offerens; sententiæ, non usitatæ, non alteri surreptæ, non communes, sed exquisitæ, sed a se excogitatæ, sed rei, de qua agitur, propriæ; sententiarum ornatus non vulgaris, non obsoletus, non sordidus, sed elegans, nitidus, ac verborum splendore illuminatus; translata non ingentia, non majora quam res postulet, non vi, non precario, alienum in locum irruentia, non longius ducta, sed moderata, sed quæ orationem illustrent magis, quam verba propria & sua, sed quæ statim pene in conspectu animi ponant, quæ intelligi volumus, sed quæ deducta, verecunde, quo vocantur, veniant. At illud fortasse aliquem in eo, ad reprehendendum, locum aperiat; ejus nimirum nimis frequentibus verborum sententiarum-

que luminibus referta oratio; nam cum legas, in singulis fere versibus cogaris insistere, morari, & exclamare: Bene, recte, non potuit melius. Acego vellem in ea quasdam esse umbras ac recessus, a quibus lumina distincta, magis extarent, clariusque niterentur. At, quis non putasset, hominem, qui se orationis maiestate amplitudineque cœlo inseruerat, non etiam illuc attractas suas cogitationes habere? sed profecto sic est; ingenium in alto peregrinabatur, mens humi defixa hærebatur. Nam studio pecuniarum tenebatur, quam nemo unquam, nobili excelsoque animo affectus, concupiscit. At ille, quo rem familiarem ampliorem faceret, vitæ necessitatibus multa denegabat, ac sordido vitam victu oblectabat. Ac die quodam, cum audisset, celebrem quendam argentarium, apud quem multa aurorum centena deposita habebat, bonis elavisse, tam improvise & horribili nuncio percussus, sensit, sibi intus, lienem, pulmones, jecur, chiras omnes, seditionem facere, adeo ut vesica alvusque se fuderint, totaque illi femoralia impleverint. Denique, post Urbani mortem, cum, octuagenario proximus, nihil sibi jam Romæ relictum videret esse quod speraret, sua ipse ossa in patriam reportavit, ut ibi sepultura afficerentur. Atque cum, ajunt, cum Roma migraret, ad portam Flaminiam, Urbem respicientem, dixisse: Urbs salve, ac simul vale; nam hodie, postremum, ex te pedem extollo.

XLVI. ALEXANDER CHERUBINUS.

Magnum Joannis Pici, Mirandulæ Comitis, ingenium, summam rerum pene omnium scientiam incredibilem memoriæ vim, ita majorum nostrorum ætas admirata est, ut in eo homine, qui nondum tertium & trigessimum annum egressus fuerat, & tamen tantam vim rerum complexus esset, tanquam in aliquo monstro atque prodigio, propemodum exhorresceret. Sola viri, etiam tum adolescentis, memoriæ Thomam de Vio, nondum Cardinalem, exterruit. Ediderat Picus, in illa nobili disputatione, quæ cum reliquis ejus operibus circumfertur, nongenta omnium fere scientiarum capita, quæ

quæ publice ex suggesto contra quoscunque, qui ea impugnare vellent, tueretur atque defenderet. Itaque cum Thomas sellam, ex adverso suggesti positam, inscendisset, centum argumenta exposuit, quibus, totidem ex illis capita, labefactaret atque convelleret: at Picus, a postremo incipiens, ita sigillatim omnia repetiit, ut Thomas, se de sella proripiens, exclamaverit: Tace tace sis; jam tua ista repetitione mihi factum est satis. Et quamvis, quæ de illo narrantur, ampla atque magnifica, ut revera sunt, fatear esse; attamen nobilitas generis, qua præstabat, affinitatum, quibus implicabatur, splendor, opum divitiarumque, quibus affluebat, magnitudo, multo clariora ac celebriora ea reddunt, quam fuissent, si earum rerum, de quibus diximus, luce caruissent. Quis dubitat, si Alexandro Cherubino generis claritas adfuisset? quamquam nec humili nec obscuro natus est loco; nam patrem habuit Laertium Cherubinum Nursinum, causarum, quæ constant ex crimine, patronum atque advocatum, tota Urbe notissimum, quique Pontificum summorum Constitutiones, antea dispersas, unum in corpus redegit; sed illi generosa stirps defuit: si præterea, opum divitiarumque, ut dicitur, montes accessissent; si imperii, si illustrium tota ex Italia affinitatum splendor, lumen addidisset: quis dubitet, inquam, quin ille multo illustrior atque etiam honoratior futurus fuisset? Etenim sic comparatum videmus, ut vulgus homines non tam virtute quam fortuna metiatur, eosque magnos appellet, qui communem hominum conditionem, præstantia dignitatis ac fortunæ suæ, transeunt; ac, si eorum quispiam non plane sit bonarum artium expertus, sed unum aliquod asserat, ut juris scientiam, ut eloquentiam, ut aliquam Græcarum rerum notitiam, iis, qui sunt in earum facultatum generibus singulares, celebritate præcurrit; nam nomini, summa omnes ambitione, suis scriptis ac laudibus, lucem dare contendunt, ac summa sæpe ingenia in occulto latere, obruta tenebris, sinunt. Equibus nunquam potuit emergere hic Alexander, nec impetrare, ut aliquo edito dignoque in loco collocaretur, unde tanta vis ingenii, doctrinæque, quanta in illo fuit, pulcri-

tudo, multorum perveniret ad oculos. Cujus laudem, jam senescentem, ac propemodum intermortuam, meas esse partes duxi, ab interitu vindicare, & æternam, si ullo modo assequi possim, efficere. Quæ laus eo dignior est, cui multa sæcula propagentur, quo spacium, ad eam sibi promerendam datum, in angustius spacium, coactum est atque compulsum. Ejus enim ætas, septem ferme annis, brevior fuit, quam Pici Mirandulani; qui tres & triginta complevit annos; cum ille vix octavum & vigesimum annum attigerit. Quamquam tres posteriores vitæ ejus anni magis ad mortem, quam ad vitam, referendi sint; cum totum illud tempus acerbissimis viscerum doloribus excruciat, mortis potius, quam vitæ, similem vitam vixisse videatur. Quamvis, quid annos numeremus in eo, qui amplissimos vitæ suæ fructus possit ostendere? ille breve vixisse dicendus est, qui, quantumvis senex sit mortuus, nihil ex se reliquit, quamobrem vixisse existimetur. Etenim, qui nulli negotio intentus, egregiæ cujuspiam artis sibi famam quærit, hic, ut sapientissimi mortalium scriptum reliquerunt, non modo non vivere, atque anima frui, sed ne esse quidem, videtur. Nihil erat in unaquaque liberalium disciplinarum arte, quod ille non nosset; nullus liber, ad suam usque ætatem, in lucem editus, quem ille attente non legisset, omniaque ejus dicta non meminisset. Summis, me puero, in cælum laudibus efferebatur Jacobus Lainez, e Soc. Jesu, quod in Concilio Tridentino palam apud gravissimos illos Patres gloriatus, nec mentitus in gloriando esset, nullam se Patrum sanctorum sententiam laudaturum, quorum ille libros integros non legisset, penitusque, quod in eis contineretur, non perspexisset. Idque summa eorum, qui audissent, admiratione exceptum esse, narrabant; quoniam vix credibile videbatur, posse quemquam in otio, etiamsi aliud nihil, quoad viveret, faceret, nedum in vita occupatissima, qualis erat Jacobi Lainez, tantam auctorum copiam, qui de rebus sacris scripssissent, ita studiose perlegere. Quod si tanta ille omnium admiratione ac benevolentia in cælo est, qui in unius tantum generis auctorum lectione consumsit ætatem; quam magna in lau-

laude versari necesse est eum, qui nullis certorum auctorum libris, quasi finibus, suum legendi laborem studiumque circumscriptum habuit, sed peræque scriptores complexus est omnes? Sed, cum omnium ingenuarum artium cupiditate studioque flagraret, ad Philosophiam præsertim contulit suam operam, & ad eam imprimis, in qua princeps est Plato. Aperiebat illi ad Philosophiam aditum, Græci sermonis notitia, qua præstabat; eaque duce, facemque, ut ita dicam, præferente, ad intima ejus arcana penetravit; neque quidquam erat in ea ita constructum atque reconditum, quod non ejus intelligentiæ apertissimum promptissimumque redderetur. Eripiebat interdum philosophicis commentationibus aliquid temporis, illudque summinorum doctorum Græcis voluminibus explicandis tradebat. Quo factum est, ut multos libros Græcos Latine reddiderit. Sed quid multis opus est? tanta vis ingenii, cum exitum habuit, ut viscerum doloribus, quibuscum acerrime consistari solitum cum diximus, consumtus, e vinculis corporis solveretur, simulque magno ære alieno, quo implicitus tenebatur, explicaretur. Nam hunc quoque nodum mors, quæ solvit omnia, rupit; ac creditoribus, cum non esset, unde illis satisfaceret, nihil reliquit, nisi plorare. Sed cum Philosophi vita minimè multis rebus indigeat, neque ille gutturi aut corporis ornatui præter modum indulserit, neque ita magnam familiam aluerit, & tamen tantum æris alieni conflaverit, suspitioni locum aperire videtur, fuisse alteram amici cujuspian domum, in quam bona, sibi a patre relicta, & pecuniæ, quas fœnori sumferat, exulatum abirent.

XLVII. MATTHÆUS SALINORUS.

Cum mihi de morte Matthæi Salinori, ex oppido Montis sancti Sabini, esset allatum; & jus amicitiz, quæ mihi cum illo intercedebat, & locorum propinquitas, ubi uterque nostrum, domicilium suum constitutum habuit: erat enim jam dñi mecum Leoninx Urbis incola; impulit me, ut statim ejus imaginem, rudi meo stylo, quasi penicillo, descriptam in eam; quam nunc

molior, Pinacothecam inferrem. Neque veritus sum, adolescenti gravissimo, ingenio summo, eruditione singulari, delirum senem, ac poetam oppido ridiculum, adjungere. Non enim fiet tanto viro injuria, si ejus pulcritudinis elegantia, quæ, spectatu dignissima, admirabilitatem maximam faciet, prope illum collocetur, cujus deformitas, non alia de causa, omnium in se oculos attrahat, nisi quia risum maxime moveat. Nam, utroque in comparationem adducto, & unius formæ vis homini copiosius laudabitur, & turpis, alterius oris imago deridiculo magis habebitur. Hic, jam inde ab ineunte ætate, magnus mulierum fuit amator; atque elegans formarum spectator haberi volebat. Si quæ nova nobilis nupta prodibat, continuo versiculis, in ejus formæ laudem factis, se illi insinuare satagebat; cui, & versibus, quorum insulitas ridebatur, & sermonibus, gloriarum stultitiæque plenissimis, mitos de se ludos dabat. Unicum illi erat studium, omnes amicitia comprehendere, summos, medios, infimos; sed principum virorum & illustrium seminarum familiaritates in primis appetebat; nam, per hanc rationem posse se a ceterorum hominum numero exinui, arbitrabatur, si summorum virorum atque omni dignitate principum amicitia uteretur, ac non solum sciri, verum etiam commemorari, audiret, se apud illos auctoritate & gratia pollere. Atque hæc causa erat, cur, quoties vel Cardinales, vel aliquis Regis cujuspiam aut Reipubl. orator, publice Urbem ingrederetur, daret operam, ut equo, quem ab aliquo potentiori amico utendum acceperat, vectus, in pompa conspiceretur, &, quo unus præ ceteris, omnium in se oculos converteret, varia ac dissimili ceterarum veste uteretur. Quo assequebatur, ut non solum vulgi ad se oculos, sed sibilos etiam atque clamores, attraheret. Multas amavit mulieres; e quarum nonnulla liberos sui quam simillimos procreavit; in quarum amore quam multos versus scripserit, quam multa ridicule ac stulte fecerit, si velim proferre, longius ab incepto abstrahar; sed licet, qui voluerit, cetera ex hoc uno colligere. Quondam Bacchanalibus feriis, cum, personatus, mulieri cuidam, quam diligebat ex omnibus plurimum, vellet ostend-

ostendere, quidnam potissimum ab ea in amore erga ipsam suo requireret, stragula quædam coriacea, quibus ille domi suæ parietes tectos habebat, ab amico utenda deposcit; qui, rei totius ignarus, libenter tradidit. At ille, tum satis sua sponte, tum ex amore, insanus, primum, equo ex eis phaleras, tum vestem, corpori aptant suo, conflagavit, sibi que in tergo cubitalibus literis scriptis, INCORAMATO. Quod verbum, vernacula lingua ambiguum, tum coriacea veste indui, tum vellem ex corde diligi amarique, significat. Interdium sere domi se continebat, neque exibat, nisi si qua res magna compulisset, ibique vel in hortulo, ædibus suis adjuncto, opus faciebat; quem hortum sua manu optimis sicubus conseverat; quarum fructibus, suo deinde tempore, tanquam e cælo missis, quos existimabat sibi amicos esse, donabat; vel in versibus scribendis otium consumebat, quibus prolatis risus excitarentur. Paucos ante ejus mortem annos, cum domum ad eum venissem, magnum cornuum acervum, unum in locum coactum, inveni; cumque eum rogassem, unde ea illi merces advenisset, ac, num fortasse pectines & calceatoria esset effecturus, ostendit mihi ex altera parte alios lapidum tumulos, in quibus auri quædam scintillæ emicabant; atque: Horum, ait, cornuum cineres, ad extrahendum ex his lapidibus sine multa opera sumtuque aurum adhibeo; ac, si res lepide sub manus, ut spero, successerit, Rex fiam. Interdium igitur his se domi exercitationibus oblectabat; vesperefcente autem cælo, in domum aliquam nobilium mulierum sive virorum se conferebat, sive esset sudum sive oruustum imbris cælum, sive nix caderet sive aquilo flaret; ibique vel ludendo vel fabulando, vel risum aliis movendo, multas horas traducebat; neque, quamvis decrepitis, antea de discessione cogitabat, quam nox, medium cæli spacium emensa, properaret, ut diei locum jam advenienti concederet. Sed, cum domum se recepisset, si illuc jejunis accesserat, eo, quod mane coxerat, samem sublevabat: eumque, quidquid erat illud, quantumvis paxillulum, jurabat; sed illud beabat magis, quod soris edisset. Contra inimicorum injurias nullis aliis armis tectus erat, nisi versibus:

nam laceffitus ab aliquo, statim libertate, stultis pene concessa, scriptum in illum carmen vibrabat; atque his telis susceptas ab aliquo secum inimicitias persequabatur. Ac postremum ejus carmen, quod quidem ad notitiam meam pervenerit, scriptum est in eos, qui novis Urbem munitionibus sepiendam circumdandamque susceperant. Quo carmine inepte (non enim, tum imperitia tum mentis vitio, quid publicæ utilitatis ratio posceret, intelligebat,) inepte, inquam, inanem eorum operam reprehendebat, qui, tanquam gloriæ & ambitionis studio abrepti, muris & aggeribus Urbem illam munire conarentur, quam caritate & benevolentia Christianorum Principum septam oporteat esse, non muris, & ad quam tuendam conservandamque, ob ejus laxitatem, vix ingentes militum copię sufficerent: deinde, multo acrius vehementiusque, eorundem sevitiā, inhumanitatem, crudelitatemque diverberabat, qui, nullo delectu, tot pauperum, tot religiosorum hominum, villas, hortos, ædificia, extirparent, diruerent, soloque æquarent; id ab eis factum duriter immisericorditerque, ajebat. Sed quid ea res, inquires, ad eum pertinebat? Multum: nam D. Balbinæ Ædem, cujus erat ille Canonicus, statuerant demoliri, novasque per eam munitiones murosque perducere. Atque id, quod cogitaverant, factis persecuti fuissent, si Urbani VIII vita biduo longior fuisset. Etenim, eum Pontifici, ad extremum fere casum perducto, mortem instare intelligerent, properabant omnia perturbare, quemadmodum a nonnullis accipiebatur, atque pervertere, ut Pontifici, qui successurus esset, operis proseguendi vim ac necessitatem imponerent. Atque hoc fortasse consilio, Urbis muros, ad Portam Tergeminam sive Ostiensem, subruerant antea, quam novos excitarent. At si interea hostis ad Urbem accessisset, omnes ad eam, muris immunitam, aditus apertos ac patefactos offendisset. At quænam vos, ajebat, intemperię tenebant? (quid est, quod non audeat infania?) quænam vos furię agitabant, ut Ædem antiquissimam & religiosissimam, quæ tot secula mansit, quæ tot hostium immanissimorum manus effugit, ubi adhuc Apostolorum principis vestigia cernuntur,

venerantur, adorantur, quam Benedictus Cardinalis Justinianus tanto sumtu instauraverat, picturis exornaverat, quam undique tectam ac pulcerrime laqueatam reliquerat? quibusnam, aiebat, furiis exagitabamini, ut, cum eam conservare possetis, vel intra munitiones complecti vel extra relinquere, malletis perdere, ac penitus ex hominum memoria delere? quid est hoc, nisi parum religiosi & a veteribus Christianorum monumentis alicui animi signum? Sed extremo vite sue tempore, magis quam antea, insanientem eum, relinquamus, & ad alios propereamus.

XLVIII. FLAMINIUS FIGLIUCCIUS.

Magna profecto vis inest in prima illa puerili institutione, qua pueri apud magistros, si probi & docti sunt, ad virtutem & ad bonas artes erudiuntur. Et enim illi eas virtutum exercitationes, quas ab ineunte ætate susceperint, seque in eis continuerint, tanquam lance, primum conchylio tinctæ, nunquam dimittunt, atque, etsi velint, non possunt agere nisi ex virtute. Fit enim ex frequentæ ac longa alicujus studii exercitatione consuetudo, deinde natura, quæ vix potest expelli; ac, si aliquando rejiciatur, quadrigis, ut dicitur, albis postea recurrit. Hinc laudatissimus mos ille a majoribus nostris, sapientissimis mortalibus, institutus, pueros, in Collegiis ac domibus, simul educandi edocendique, ut tenera illa ætas ac fluxa, a turba hominum eripiat, ne, ex illorum consuetudine, damni aliquid moribus contrahant, atque antea vitia discant, quam illa vitia esse intelligant; verum, eo in loco collocentur, ubi, quod primum aspexerint, honestissimum sit, atque ex optima atque sanctissima disciplina, quod primum auribus acceperint, sit ejusmodi, ut doctiores ex eo ac meliores evadant. Quid mirum est igitur, si ex ejusmodi scholis multi sæpe prodierint, qui acceptam ab illis morum probitatem, sanctissime, usque ad extremum vite spiritum, conservaverint? quid enim prima illa virtutum elementa, tanquam semina, in animum, nondum vitiorum spinis occupatum, ex sese, nisi pulcerri-

mos præstantissimosque pudoris pudicitizque fructus possunt efferre? Atque in eorum numero, qui in publicis istis domibus, ad probitatis omniumque virtutum, laudem a puero educatus, nunquam de virtutis via deflexerit, Flaminius Figliuccius Senensis, Seminarii Romani Clericus, collocandus est. De cujus virtute eo confidentius me posse dicere videor, quod, ab incunte ætate, simul eisdem studiis, tanquam sacris, initiati sumus, simul in eodem Philosophiz ac Theologiz curriculum fuerimus, simul etiam in aliquot academiarum luce conjunctissime vixerimus, simul sodalitatem Deiparæ Virginis; in domo professa Soc. Jesu, frequentaverimus; quamquam ille, ut dixi, adolescentulus ex Seminario Romano, ubi publice alebatur, ego ex privatis domi meæ parietibus, prodirem in scholas. Verum hæc laus innocentiz non tam videtur fuisse ipsius propria, quam familiz universæ communis. Habuit enim, inter ceteros, ærta sibi cognatione conjunctum P. Vincetium Figliuccium, Soc. Jesu, virum doctum ac probum, qui magnum onus, a Superioribus suis traditum, Romæ in Collegio Pœnitentiariæ sustinebat, de jure respondendi iis, qui percontatum veniebant de rebus ad conscientiam suam pertinentibus, quos domum, ex incertis certos, & compotes consilii, dimittebat. Sed nondum studiorum suorum curriculum ille consecerat, cum omnium maximus eum dolor percussit, fratris nimirum mors acerbissima. Erat hic, juvenis, formæ liberali atque honesta, suavissimis moribus, ad omnes res lepidus, ingenio neque malo neque improbo, qui operas suas ad domestica negocia locaverat Romæ viro, nobilitate, genere, divitiis, existimatione cum primis civitatis. Viro huic nobilissimo locupletissimoque par nobilitate atque opibus uxor obtigerat, quæ jam longius ætate procefferat. Hæc mulier, viro suo orbata, ob inanes nescio quos nocturnos metus, quibus mulieres sæpe corripiuntur, statuerat, cuiplam se viro conjungere, quæ eum sibi ab animo timorem expelleret. Neque fuit illi diutius deliberandum, quem potissimum eligeret. Nam statim occurrit Flaminii frater, longa ac domestica consuetudine notus, ad quem jam animum adjecerat, ejus æta-

etate, forma ac moribus capta : at unus eam scrupulis pungebat, propinquorum videlicet timor; qui si, vel leviter saltem pressis vestigiis, hæc ipsius consilia odorati essent, continuo ad ea subvertenda omnes machinas adinovissent. Itaque occultissime dedit operam, ut antea cogitata perficeret, quam ad cognatorum notitiam pervenirent; atque omnibus, quæ lex præscribit, adhibitis, conjugali cum nexu sibi copulavit atque constrinxit. Quod, ubi factum est palam, tum ejus cognati & affines præ iracundia atque dolore insanire ac furere cæperunt; neque tam inoleste ferebant, eam inferioris ordinis homini nupsisse (quamquam ille honesto erat loco natus, sed nihil ad mulierem illam,) quam quod verebantur, ne illa, ob amorem, omnium suorum honorum hæredem eum institueret. Quamobrem, exploratis locis, quibus noctu erat illi iter in domum, ibi insidias collocant, ac multis vulneribus affectum interimunt. At mulieris animus nihilo propterea remissior ad novas nuptias conglomerandas est factus. Namque in alterius juvenis manum brevi convenit, cui, præter rem, omnia inerant. At Flaminium Augustini Valerii Card. Veronæ, doctrinæ, eruditionis, ac pietatis fama celeberrimi, domus excepit; qui Cardinalis plurimum ejus ingenio delectabatur; ac, quanti eum faceret, ostendit in morte Canonici cujusdam Ecclesiæ S. Marci, in cujus demortui locum, sufficiens illum curavit. Cardinale Veronæ vita functo, in Cardinalium Petri & Silvestri Aldobrandini aulam transit; ubi demum, honeste ac laudabiliter, datum sibi a Deo vivendi munus implevit, non sine amicorum bonorumque omnium mœnore luctuque. Multa variis temporibus edidit poemata, quæ, ut quævis occasio se dabat, vel novorum Cardinalium, vel insignium nuptiarum, vel cujuscumque recens in Sanctorum numerum recepti, scribebat. Recitavit etiam poemata aliquot & satyras, non sine plausu, in Academia Romana Humoristarum. Sed quanti hic vir esset, ostendit Maphæus Card. Barberinus, qui postea summus Pont. fuit, Urbani VIII nomine, qui, inter sua laudatissima carmina, intulit epistolam, quæ etiam nunc extat semperque extabit, ad Flaminium versibus scriptam. Non

enim

enim emunctissimæ naris ille vir summus, ad hominem suis carminibus cohonestandum, descendisset, nisi tanto eum honore dignum iudicasset.

XLIX. LÆLIUS TOLOMÆUS.

INclyta Senarum natio semper in primis Italix pietati ac religioni dedita fuit. Cujus rei testes, tum ex omni superioris temporis memoria, tum ex nostro hoc seculo, in quo misere versamur, quamplurimos, si libeat, nominare possimus, quos vita sancte ac laudabiliter acta, quos rerum gestarum gloria, multaque ac magna supra naturæ vires patrandi, a Deo sibi concessa, facultas vocavit in cælum; nunc etiam non pauci, tum sua in patria, tum Romæ, videlicet in orbis omnium terrarum luce, vitæ integritate & innocentia, rerum humanarum, &, quod rem continet, sui ipsius contemptu, in corpore terrestri atque mortali vitam imitantur Angelorum; & quod in magna laude ponendum est, eum recta ac laudabili vivendi ratione summam eruditionem atque doctrinam habent adjunctam. Sed his omis- sis, de quibus, a proposito nostro alienum est, dicere; ex iis, quos ætas nostra vidit atque admirata est, quique facto functi sunt suo, se mihi offert in præsentia Lælius Tolomæus, cujus & generis claritas, & formæ dignitas, & ingenii magnitudo, atque affinitatis etiam necessitas, poscere a me videntur, ut ejus memoriam ac laudem, jam pene intermortuam, quod iis accidit, qui nihil scripti reliquerunt, ab oblivione hominum, atque adeo ab interitu, vindicem, eamque immortalem reddam, si possim. Hic, quem dico, adolescentulus, summo genere natus, summisque a natura ornamentis instructus, a parentibus, qui magnam in eo spem dignitatis suæ collocaverant, omnibus liberalibus disciplinis est institutus: quæ eo clarius in illo elucebant, quod egregie eidem formæ bonum, quod si adsit, non minimum virtuti splendorem & gratiam addit, accesserat. Sed majore ille vi animi atque ardore, ad juris civilis disciplinam cognoscendam percipiendamque, se contulit. Incitabant eum Fabii Benevoglienti,

ti, Jurisconsulti ea tempestate clarissimi, stimuli, qui egregiæ adolescentem indolis cogitabat, tanquam suæ hæredem gloriæ, relinquere, eoque magis, quo aliqui eundem cognatione contingebat. Inflaminabat ejus studia, parentum cupiditas, qui jam tum, tantæ spei filium, aulæ atque honorum ambitioni destinaverant. Sed illum non tam eorum, de quibus loquimur, cohortationibus, quam sua sponte, ad maximi jurisconsulti laudem, properantem, divina Spiritus sancti aura revocavit e cursu, atque, a rebus vanissimis & incertissimis, ad res certissimas ac solidissimas, iter capere, suavissima quadam vi compulit. Itaque laudatissimæ nominis Jesu Sodalitati nomen dedit, ubi una mecum Philosophiæ, apud P. Mutium Vitellescum, qui postea eidem Societati, præpositi generalis nomine, præfuit, ac Theologiæ apud P. Mutium de Angelis, aliosque disciplinæ ejusdem magistros, operam dedit. Sed illud ingenium, quod, quancumque in partem se dabat, magnam inde laudem referebat, in illis etiam artibus perfectum evasit. Sed incredibilis eloquentia, cum maximo oris lepore ac vocis suavitate conjuncta, in eo in parvo quodam sermone perspecta, ab illis eum studiis abduxit, & ad conciones, ad populum habendas, abstraxit. Quanquam illud eloquentiæ donum non tam erat ipsius proprium, quam toti ejusdem familiæ commune. Memini, Germanicum Tolomæum, hujus Lælii fratrem germanum, mecum de domestica re quadam agenti, ex improvviso orationem, omnibus suis partibus absolutam atque perfectam, habere, (erat enim sororis meæ vir,) æquabili ac nusquam interrupto verborum cursu. Sed jam ille ad summos concionatores pervenerat, jam in omnibus Italiæ civitatibus celebre suum nomen effecerat, cum eos fructus, qui ab ejus eloquentia percipiebantur, lethalis pituita intercepti; quæ a capite ad pectus atque inde ad pulmones defluens, insanabili eum tabe corripuit; ejusque vi, non ita multos post menses, illud est clarissimum probitatis eloquentiæque lumen extinctum.

L. JO. BAPTISTA AGUCCIUS.

SI cuiuspiam præstantis ingenii viro, præstantis etiam magistri disciplinam contingat accedere, atque in eam partem studium suum dederit, in qua naturam fautricem habeat, quisnam dubitat, quin in ea futurus sit omnium facile princeps? Id quod Jo. Baptistæ Aguccio, Bononiæ, nobili loco nato, usu venisse vidimus. Hic enim ad omnes res egregias a natura factus, incidit in disciplinam Philippi Segæ, singularis prudentiæ viri, quem postea egregia ipsius merita in illud dignitatis fastigium, in quod venit, evocarunt. Nam ab Innocentio IX Cardinalis creatus, dignitatem ejus Collegii mirabiliter auxit. Qui Card. cum videret Jo. Baptistæ indolem, aptam ad res magnas, toto cum pectore est amplexus, eoque vehementius, amore studioque in eum exarsit, quod ille arcta se cognatione contingebat; erat enim sororis suæ filius. Neque Jo. Baptista avunculi in se studiis non respondit, sed mirum in modum semper occurrit. Nullam ille ætatis suæ partem, studiorum labori detraxit, sed unamquamque habuit in illis extensam. Primum pueriles annos, non ludis, non æqualium studiis, sed humanissimis politicissimarum artium literis dedit; e quibus cum excessit, ad eos magistros venit, qui regulam tradunt, qua vera & falsa judicentur, quæque, quibus propositis sint, quæque non sint, consequentia, videlicet Dialecticam. Qua arte instructus, Philosophiæ & Juris civilis est cursum ingressus. Quo confectio, eorum, quibus jus est, juris civilis publica interpretandi facultatem dare, votis omnibus declaratus est juris ejusdem interpres atque magister. Sed pulcherrima elegantium literarum species ac forma, ejus ad se animum magis attraxit, atque arctius sibi conjunxit. In primis exactam atque perfectam utriusque linguae notitiam tenuit, Latinæ nimirum & Etruscæ, & in unaquaque earum scripsit elegantissime. Quibus in studiis, cum Cardinalis Segæ eos illum progressus fecisse animadverteret, ut multorum, qui in eodem curriculo versati essent, industriz præiret, duxit eum secum in Galliam, quo

quo Legatus Pontificis proficiscebatur; ut esset arcano-
rum omnium particeps, & interpret corum ac nuncius,
quæ ad summos viros aliosque perferenda essent. Quam
rem Lanfrancus Margotius, quem pariter ab epistolis se-
cum adduxerat, cum ferret indigne, discedendi potesta-
tem sibi fieri postulavit: qua impetrata, secundis Romam
auspiciis est profectus. Etenim, vix pedem in Urbem
intulit, cum a Cynthio Cardinali Aldobrandino, Cle-
mentis VIII Pont. max. sororis filio, est ad scriben-
darum epistolarum munus adhibitus, ejusque opera adeo
æstimata est, ut a Paulo V, qui post Leonem XI. Cle-
menti successerat, dignus sit habitus, cui honor purpu-
ræ deferretur. At Jo. Baptista, Cardinali Segæ defun-
cto, a Petro Card. Aldobrandino, ad quem, Clemente
ejus patruo adhuc superstitē, rerum omnium summa red-
ierat, receptus est in suorum familiarium numerum, ut
sibi navaret operam ab epistolis, iis præsertim, quæ of-
ficii gratiæque causa scribuntur; in quibus major vis
ingenii requiritur. Cujus adeo egregia atque præstanti
usus est opera, ut eundem secum in nobilem illam ad
Henricum IV Galliz Regem legationem adduxerit.
Cujus etiam itineris acta omnia lepide eleganterque li-
teris consignavit; quæ summa omnium cum approba-
tione leguntur. A qua legatione reversus Cardinalis, do-
mus illi suæ, summo cum imperio & auctoritate regen-
dæ, provinciam detulit, quam Hieronymus frater, a
Clemente in Collegium Cardinalium cooptatus, admi-
nistraverat, eamque, usque ad Clementis Pont. & Car-
dinalis Agucci fratris mortem, obivit; se adversa vale-
tudine, in quam, itinerum laboribus & aulicæ vitæ in-
commodis, inciderat, est coactus, ab ea discedere, & tan-
tis per otiosam & remotam a negotiis omnibus persequi
vitam, quoad convaluisset. Verum, recuperata valetudi-
ne, noluit amplius molestissimis aulæ occupationibus se
tradere, sed toto ut ajunt pectore, pietatis ac religionis
studio (nam sacris erat ecclesiasticis initiatus) literisque
se se permisit, omnesque, qui tum erant in Urbe, litera-
tos homines amicitia comprehendit, iis utebatur fami-
liarissime, eorum studiis deditus erat, eos sibi convivas
adhibebat. Quod vitæ genus jucundius illo fuisset, si per-
pe-

petuam, vel saltem diuturnam, esse licuisset. Nam post aliquot annos, ejus opera, quæ utilis ac fidelis inveniebatur, a Card. Aldobrandino revocata est rursus ad domum suæ præfecti provinciam; nec ab ea sibi fas fuit, nisi Cardinalis ejusdem morte, recedere. Neque ab hac solitudine curaque soluto, licuit illi esse otioso, sed a Gregorio XV, populari suo, nuper ad id fastigium erecto, ex omnibus fuit electus, cujus fidei industrique, jam sibi cognitæ, Reipubl. arcana omnia comitteret, eamque in ejusmodi negotiis, scribæ loco, ad manum haberet. Sed celer Pontificis illius e vitæ discessus (non enim integrum in eo honoris loco triennium explevit) longius illi spatium, numeris illius, in quo excellens habebatur, obeundi summamque amplitudinem simul ademit. Ad quam Urbanus VIII, cum virum, fidei constantia & ingenii claritate præstantem, vellet perducere, Nuncium ad Rempubl. Venetam misit. Quod munus dum egregie, atque ex Pontificis animi sententia, administrat, ea, quæ hominum spes eorumque contentiones in medio fere spatio prosternit ac frangit, mors, inquam, intercessit, nec passa est, Urbanum ea virtutibus illius, quæ cogitaverat, ornamenta deferre. Magnam in scribendis epistolis habuit gloriam; cæconomus summus, ita tamen ut nihil familiaribus, quibus præerat, detraheret, quod dominis adderet, sed eos, sine minorum damno, large copioseque tractabat. Paululum severis moribus videbatur, quamvis in communi amicorum consuetudine omnem humanitatem amœnitatemque exerceret. Erat in omni genere sermonis & humanitatis penè perfectus, & de quacunque re, quæ in disputationem caderet, doctè copioseque differebat; de Republ. de Principis officio, de natura, de vitiis hominum, de cupiditatibus, de modo, de continentia, de historia, de Philosophiâ, de Theologia, de ea, inquam, quæ ad mores pertinet, non autem de ea, quæ in differendi subtilitate versatur; nam hanc nunquam attigerat. Unum in eo vitium deprehendebatur, quod fidem ac benevolentiam suam amicis, ad eos sublevandos adjuvandosque, non præstaret. Scripsit quandam, Latino sermone, historiam, quam cum neque ediderit, neque
ejus

ejus mihi aspiciendi potestas ab aliquo facta sit, quid in eo genere potuerit, judicare non licet. Illud dici ab omnibus audio, qui eas legerunt, epistolis suis nihil esse elegantius, nihil pulcrius, nihilque perfectius. Scripsit etiam animadversiones quasdam ac monita ad Nuncios Apostolicos, quæ, in Pontificum negotiis apud Reges ac Principes gerendis, sequantur; tum, sermones de Republ. recte administranda, eruditionis prudentiæque plenissimos. Quæ omnia, si typis excusa prodirent in lucem, eruditorum in se omnium admirationes & studia converterent.

LI. JULIUS STROZZA.

Si paululum eas ad laudes atque virtutes convertere animum placeat, quibus cumulata ea urbs est, quæ principem inter alias Etruriæ urbes locum ac numerum obtinet, tam multas tamque præclaras eas esse reperiemus, ut, eidem merito Florentiæ nomen inditum esse, fateri cogamur. Adeo rerum omnium pulcerrimarum nitore cultuque florere conspicitur. Mitto civium cæsarem parimoniam, frugalitatem, industriam, numerum, qui, toto terrarum orbe profeminati, summa earum regionum, quas petierunt, cum utilitate ac commodo negotiantur, seque suosque, sine cujusquam injuria, divitiis atque opibus augent. Mitto homines, quos ad Rempubl. capeffendam, ad imperium orbis terræ suscipiendum natos, in Urbem omnium aliarum reginam ac principem mittit: quorum tres, nostra ætate, quamvis non omnes illi Urbi utiles, summi Deoque proximi fastigii culmen tenere conspeximus; neque quidquam facturi est propius, quam ut illis quartus accederet. Mitto complures, quos, in omnium bonarum artium studiis egregios atque præstantes, humanissimis atque elegantissimis literis præditos peperit. Mitto, inquam, hæc atque alia non parum multa, quibus merito floris cujusdam delibati vocabulo nuncupetur. Quid illud, quantam in se habet laudem & gloriam, quod sermo ille, quo nunc utimur, ex barbararum omnium linguarum quasi colluvione exortus, in ea civitate primum est ad huma-

nitatem deductus, tum excultus ac limatus, postremo, iis ornamentis ac deliciis instructus, ut non solum Latinæ linguæ, verum etiam Græcæ, quæ præ se ceteras alias linguas, ut rudes, ut incultas, ut barbaras, contemnebat, verborum copia, elegantia, venustate, ac suavitate, ut parcedicam, non cedit. In hac lingua ortus est ille, de quo referre institui; Julius nimirum Strozza, ex nobili patre; quamvis non iustis nuptiis, sed ex concubina, ut dicitur; quem tamen pater agnovit, atque optimis disciplinis erudiendum instituendumque curavit. Neque Julius apud magistros operam perdidit, sed magnos in iis artibus, in quibus erudiebatur, progressus fecit. Suam Venetiis adolescentiam habuit; ubi parens suus argentariam non ignobilem faciebat; qui non satis sibi propitium habuit Mercurium, cui improbe concessum est ab antiquis, & datum, ut merciononiis præsit, ac lucris; nam id illi negotium decollavit, ac fortunæ vitio, ea in urbe, tanquam in mari, bonis elavit. Hinc factum existimo, ut filius magis Venetias, quam Florentiam, in deliciis habuerit; quod locus ille magis nobis sit cordi, ubi primos illos ætatis annos exegimus; præsertim si ex libidine eos nostra coluimus. Quod si uspiam potest contingere, Venetiis sine dubio evenit. Qua in urbe, quia multæ ad voluptates apertæ sunt viæ, voluptarii in ea homines habitant maximi. Iuerat illi & ingenium satis acre, amœnum, ac poëticum; scribendi ratio non inelegans, ut licet ex eo poëmate judicare, quod edidit; in quo urbis Venetiarum laudes graviter eleganterque prosequitur. In omnibus celebrioribus Italix Academiis numerabatur, Romæ etiam, una cum nonnullis, novam in ædibus Jo. Baptistæ Cardinalis Deti, Academiam instituit; tum ut Cardinali illi, etiam tum pene adolescenti, cui quidvis aliud magis in amore studioque esse dicebatur quam literæ, aliquam hominis eruditi famam conciliaret. Illa etiam ejus Academiæ constituendæ causa fuit, ut Academiæ Humoristarum, cui illi, ob quasdam dissensiones, erant infensi, quæque tum ingeniorum nobilitate florebat, perniciem, exitium & vastitatem afferrent. Libentius enim, atque ambitiosius unumquemque eorum, qui

qui Academiæ persequerentur, viri principis in domum esse venturum, existimabant, ubi majus atque honestius virtutis suæ theatrum esset habiturus, quam privati hominis, quantumvis nobilis, ædes celebraturum, ubi paucis auditoribus, quæ ingenio multoque labore peperissent, exponerent; ut olim eodem in loco, Hieronymo Aleandro contigisse meminimus, qui tribus neque eo amplius auditoribus, egregiam illam ac doctam, Humanistarum impressæ, quam vocant, interpretationem cepit legere; neque propterea est deterritus, sed legit nihilominus; nondum enim fuerat in mores inductum, ut Cardinales, honoris gratiæque causa, ad ejusmodi eruditorum hominum conventus accederent; neque quisquam eos invadere audebat: verum, quemadmodum solstitialis herba repente oritur, ac repentino occidit; ita etiam recentis illius Academiæ quasi viriditas, quæ nimis celeriter sese diffuderat, eodem ferme quo exorta est anno exaruit; ac domus domus, in alia fere omnia distractus, ostendit, non posse esse diuturnum, quod invita Minerva suscipitur. At contra, illa altera Academia, ad quam funditus evellendam omnes illæ machinæ adhibebantur, altioribus in dies radicibus actis, majorem firmitatem ac robur accepit, quam ut aliqua vi convelli ac labefactari posse videretur. Ac, dum adversarii toto in id animo, ut eam evertant, incumbunt, Julius, honorum curriculum ingressus, Protonotariorum ordinem ac numerum mercatus fuerat; eorum, inquam, quos, quoniam in partem lucris, quod ex eo muneris genere, tanquam ex fundo aliquo, capitur, veniunt, parum Latino nomine, Participantes appellant; utrum sua, an aliena pecunia, cum in re admodum tenui versaretur, ignoro: sed postea revocavit se ab eo cursu, quem ceperat, ac veteri vitæ restituit. Quam vitam, multa, quæ fecit ac dixit, prætermittimus; partim quia levia sunt, partim quia non satis digna, quæ literis memorixque prodantur. Unum omnino reticere non possumus, quod sit nobis documento, quemadmodum principum virorum amicitia utamur, & in omnibus dictis factisque circumspiciendum, ne quid offendamus, ne quo irruamus. Jam honorem, quem emerat, produxe-

rat, ac vendiderat, mercedenique coegerat; tum vestes, ejus honoris proprias, exuerat, & ad veteres, cotamunesque redierat: cum a I. Maria Vrbinatum Duce invitatus est in domum suam, ut præfecti cubiculi munere fungeretur: &, quo illi gratior ac jucundior ejus muneris functio videretur, oneravit eum optimis honestissimisque conditionibus. Venit ille, provinciam accipit, labori industrizque suæ non parit: quid in studiis literarum profecisset, ostendit. Etenim vir ille princeps, a publicis privatisque suorum negociis seriatius, cum paululum quieti otioque se dabat, non ludicros sermones, non rerum colloquia leviorum prosequabatur, sed omnis erat illi sermo de literis. Consueverat etiam interdum corpus vomitione purgare; ad quam rem brassica cucullata uti solebat; qua jurulenta cum se impleisset, continuo, injectis in os digitis, tam evomebat, ac pituita noxique humores alii consequebantur; itaque se incolumem vegetumque, sine aliqua medicorum ope, servabat. Hinc fiebat, ut brassicæ ejusmodi genus, pluribus in locis, ad illud procreandum idoneis, serendum colendumque mandaret. Accidit igitur, ut, die quodam, Dux una cum Iulio in via quadam, arboribus confita, inambulet, easque arbores nimis lente quereretur excrecere. Iulius: Tune eas, inquit, brassicæ tuæ cucullatæ esse similes, putas? hanc te oportet serere, quibus, ad tollendum se altius suamque ad maturitatem perveniendum, pauci satis sunt menses. Quod Dux suam ad contumeliam referens, æquo illum animo non potuit amplius aspicere. Id cum Iulius comperisset, seque a consuetis cum Duce colloquiis segregari videret, tempore dato, Duce[m] adiit, ac simulatis quibusdam causis, quæ se ad discedendum compellerent, abeundi potestatem sibi ab eo fieri postulavit, atque alio se contulit. Postremo Venetias venit, quarum ille originis, ædificationis, incrementi, ejusque amplitudinis, ad quam nunc est perducta, ordinem ac rationem, eleganti poemate, iis, qui non nossent, aperuit. Quæ etiam in urbe vitam finivit, neque aliunde certius amoris, quo illam urbem dilexisset, argumentum posse desumi existimavit, quam si & vivus, quod licitum fuit, & mortuus, in ea esse vo-

lu-

PINACOTHECA TERTIA. 741

fuiſſet. Audivi etiam, tragoediam ab eo fuiſſe compoſitam, Erotillæ nomine inſcriptam, quam eſſe egregiam, argumento mihi eſt Antonii Quarenghi carmen, quo illam eximie laudat.

LII. PETRUS ALBERTINUS.

NON parum ſæpe in eos incidi, qui de rerum natura quererentur; quod perpulcris ingeniiſ turpe, abſurdiſ elegans corpus tribueret; quod longe ſecus ab ea fieri oportere contenderent; naturæ enim multo convenientius eſſe, eos, quos ſuo beneficio egregiis animi dotibus ornaret, præcipuam etiam habere laudem ampliſſimæ pulcherrimæque corporis forinæ, eos vero, quibus nulla dediffet ornamenta ingenii, ab omni quoque venuſtate figuræ vacuos inaneſque relinquere. Ita enim, qui eſſent ingenio aut aliqua alia virtute præſtantes, ex oris dignitate ac pulchritudine cogniti, majore eſſent apud omnes æſtimatione atque honore; neque ignotis, qui deformem eorum faciem intuerentur, eſſent contemptui atque ludibrio. Ut Ageſilao Lacedæmonio contigiffæ narratur; qui cum eſſet corpore exiguus, & claudus altero pede, atque ad corporis deformitatem veſtitus humiliff atque obſoletus accederet, a Regis Ægypti, cui ille ſubſidio venerat, miniſtris non aliter ſit habitus, quam quiviſ inopſ atque privatuſ, ac vix illiſ fideſ fieret, cum eſſe, qui ob virtutem tanta tamque admirabili gloria eſſet. Quid multa? tantam habet pulchritudo commendationem, ut Ariſtoteleſ, in ſuiſ de moribus libriſ, docuerit, non poſſe felicitatem in eum cadere, cui inſignis deformitas eſſet. Atque adoleſcens, Romæ vidi quendam, ampliſſimiſ honoribuſ præditiuſ, qui omnia poſita eſſe duceret in procerâ excelleſque ſtatura. Itaque quandam domi ſuæ menſuram habebat, ad cujuſ menſuræ rationem, eorum corpora, qui in ſuorum familiarium numerum venire vellent, exigeret. Quo fiebat, ut paraſrenarioſ, rhedarioſ, œconomoſ, ſecreto- rum conſcioſ, cubicularioſ, atque adeo promoſ condòſ, ac cocòſ, ſi diiſ placet, ita magnioſ haberet, ut, cum cubiculuuſ aliquod ingredi vellent, neceſſe habe-

rent, caput ad superum ostii illius limen demittere. Atque si homines, ex trunco corporis æstimationem acciperent, nullum Petro Albertino precium statui potuisset. Nam nemini eorum, qui, in viri illius principis, de cuius memoria commemoravimus, familia numerabantur, esset inferior. Qui vir princeps, quod gigantea homines forma diligeret, non esse mirandum aiebant, cum ipse quoque, quemadmodum gigantes, terræ filius esset. Quam matrem agnoscebat etiam hic Petrus: nam ex limis ejus erat visceribus ortus, hoc est, patre obscuro atque infimo natus; quem, contra pietatis officium, famuli cujusdam loco habebat. Ille enim filio obsonabat, ille cenam, ille prandium coquebat, ille mensam ornat, ille lectos sternebat, ille, ut ædes niterent, faciebat, ille advenientibus sellas, in quibus federent, præbebat, denique, omnia, quæ sunt famuli, officia persequabatur. Atque ille miser, quo filium liberalibus disciplinis erudiendum curaret, quod habuit, omne prodegerat; neque tot sumtibus aliud, nisi sibi dominum, comparavit. In Gymnasio Romano Soc. Jesu, humaniores primum literas didicit; tum Philosopho, deinde Theologo operam dedit. Et quia cum pareus, pro re sua, satis bene vestitum habebat, & quia minime erat timidus, sed alacer ac promptus, in nobilium adolescentium familiaritates se insinuavit; a quibus, ob opinionem ingenii, eruditionis, ac doctrinæ, quam de se faciebat, prope in fratris loco diligebatur. Semper erat in disputationibus princeps; nemo putabatur acutius vel sententiam suam tueri, vel aliorum refellere. Sed multo majorem opinionem doctrinæ faciebat, & voce qua præstabat, & lingua ad dicendum respondendumque prompta atque parata, qua ceteris antecedeat, quam quanta in eo facultas erat. Sed cum videret, nihil se ex his artibus, quas adhuc coluisset, nisi inanem quandam popularis auræ assensionem aucupari, nec jam res patris, ejus sumtus pati posse; statuit, ab ea disciplina auxilium petere, unde maximas pecunias fieri non ignorabat; atque ad jus civile cognoscendum, animum transtulit. Cujus facultati, cum paucorum annorum, sive potius mensium, studium dedisset, ejus, ut nunc sunt mores, inter-

terpretandi docendique facultatem cōmit; ac vix ejus potius est; cum dux aliis esse cōpit, in eo curriculo, quod ille nimis celeriter percucurrerat; hoc est, alios pecunia docere instituit. Incredibile memoratu est, quanti ad eum discipulorum concursus fierent, eorum præsertim, qui ex prima illa puerili institutione, in scholis Patrum Soc. Jesu, ad jus civile transibant; adeo ut mihi, qui eodem, qua ceteri, de illius virtute, opinione imbutus, misere cupiebam in ejus ludo addiscere, nulla ad ejusdem disciplinam perveniendi facultas obtigerit; quod diceret, se non posse mihi vacare, quod multitudine discipulorum obrueretur. Itaque, beneficii, cujusdam gratiæque causa transmisit me ad legulejum quendam Picenum, quem aliquot menses audiivi. Sed cum animadvertissem, me non plus ab eo accepisse doctrinæ, quam si nunquam in ejus ludum venissem, nolui amplius apud ipsum operam perdere; sed statui, alias scholas, alios magistros persequi; ac nulla eidenz mercede persoluta, (quid enim feceram lucri?) discessi. Quo factum puto, ut nunquam ille postea, oculis me potuerit æquis aspicere. Erant, in eodem ludo, in quo ego nihil sapere discebam, duo adolescentes nobiles; quorum alter ex Attavantum familia Romæ vetere atque honesta, judicum sententiis fuerat securi percussus, quod adolescentem, arcta sibi familiaritate conjunctum, interemisset, ejusque ad pedes, molossos aliquot, a quibus voraretur, alligasset. Occultum enim suum ille scelus fore putaverat, si ille ex facie a canibus corroso, non potuisset agnosci, quis esset. Hujus etiam tanti facinoris horror, ab ea me schola abalienavit: non enim amplius in ea versari sustinebam, quam ejusmodi hominum genus frequentaret. Edixerat, per id tempus, Clemens VIII, ut, qui Romæ in Collegio Germanico alerentur, præter Philosophiam ac Theologiam, Pontificium jus etiam addicerent, eo quod, cum Legatus ad Regem Poloniæ proficisceretur, atque iter faceret per Germaniam, ab Episcopis illis, eorumque judicibus, multa perperam judicari vidisset, ob juris Canonici ignorantiam. Hæc provincia statim tradita est Petro Albertino a Patribus Soc. Jesu, ejus Collegii moderatoribus; ne-

minem enim inveniri posse putabant ad id munus aptiorem, præter eum, qui in ipsorum nutritu pene educatus esset; quique opinione, quam de sua virtute fecerat, arcem omnium scientiarum tenere existimabatur. Cœpit igitur traditos sibi discipulos in studio juris Pontificii exercere, eosque in eam opinionem adducere, aut ab eo aut nusquam melius accipi posse præcepta Juris prudentiæ. Sed venit Lepidus Piccolomineus, ex eadem Societate nominis Jesu, mire ea disciplina, quam ille profitebatur, instructus; qui cornicum, ut dicitur, oculos confixit. Nam, cum in publicis quibusdam disputationibus, multa audiret ab eo, tanquam certissima statui, quæ nullis veritatis indicibus niterentur, multa etiam aliena, atque adeo contraria iis quæ proposuisset, afferri, neque posset pati, optimis ac studiosissimis adolescentibus fucum fieri, ac falsa pro veris obtrudi, aggressus; gravissimis validissimisque rationibus, quæ ille rata ac firma debere esse constituisset, labefactare atque convellere, quoque ipse in errore versaretur, eodemque alios obliniret, ostendere. Qui ætus, qui error, quæ tenebræ obortæ sint, homini minime malo, ut ego non dicam, facile unusquisque conjectura assequi potest, cum ex improvviso se in certamen provocatum fuisse videret, ab adversario doctissimo atque ad differendum paratissimo, quem ne natum quidem esse sciebat. Et quoniam audierat, Lepidum illum Piccolomineum perpetuo deinceps in eo Collegio futurum, ut confessiones illorum, qui in eo alebantur, exciperet, causam invenit, quamobrem necesse haberet susceptam docendi provinciam deponere; eaque se abdicavit; ne videlicet quotidie cum tam valenti adversario sibi res esset, cui se imparem esse sentiebat. Id quod Patres illi, qui cum diligebant, moleste graviterque tulerunt; ac mecum questi sunt quidam ex illis de nimia P. Piccolominei in differendo subtilitate, ab eoque factum fuisse duriter, atque adeo inhumaniter, quod ad evertendam, probi illius hominis ingenii commendationem, voluisset ea, quæ non constant, ex rebus penitus cognitis atque perspectis, neque ad scientiam ullo modo perveniunt, non vulgari quadam trutina, sed exacta artificis sta-

statera expendere. Neque, ea causa, qui illi savebant, facti sunt tardiores segnioresque in eo ornando, ejusque commodis, quantum in ipsis erat, serviendo. Nam Cardinali Odoardo Farnesio, jus civile cognoscendi cupido, doctorem illum ac magistratum dederunt, a quo præcepta juris acciperet; quem statim, in suorum aulicorum numerum receptum, stipendio & quotidiano cibo donavit, sed breve tempus habuit declatandæ, in eo instituendo, industriz: ille enim discendi ardor, qui in eo viro principe exarserat, intra paucos, menses aut dies? non modo refrixit, verum etiam extinctus est totus. Itaque Petro restabat aliud nihil, nisi ut Cardinalem ad publica munera euntem comitaretur, & in procetone, una cum aliis aulicis, officii gratia inambularret, ac fabularetur. Sed alius eum casus adjuvit, Cini nimirum Campani mors, qui in Gymnasio Romano principem juris Pontificii docendi cathedram obtinebat: nam Cardinali suffragante, homine his temporibus potente, ceteris competitoribus suis antelatus est, atque in demortui locum suffectus. Neque quidquam propius est factum, quam ut die quodam incendio conficeretur, cum ædes Farnesianæ, ab ea, in qua ille cubiculum habebat, ignem concepissent; & cum flamma cubiculum ipsum comprehendisset, bibliotheca amissa, vir vivus ex illa flamma incendioque evolavit.

LIII. OCTAVIUS PANCIROLA.

Magna profecto, a rerum natura, hominum ingeniiis tributa vis est, quæ ingenia plerumque neque a doctrina neque a cujusquam præceptis exulta, multa ex se efferunt, quæ doctissimi homines, literarum studiis & exercitationibus assuefacti, assequi nequeunt. Nonne, ab observatione naturæ, ea inventa ars est, quæ merito omnium maxima & excellentissima existimatur, dicendi nimirum ars? etenim, quæ sua sponte homines eloquentes facerent, tum quidam observassent ac delegissent, eadem quibusdam præceptis & in una institutione formarunt. Nonne ii, quibus summa eruditionis ac poëticæ facultatis laus concessa ab omnibus est, ex

rudibus, ineptis, ac ridiculis simplicium virorum poematis, multa sæpe excerpunt, quibus, tanquam stellis, sua scripta illuminentur, quæ sine illis futura fuissent minus elegantia ac minus illustria? Speronis Speroni, hoc est, qui cum semper ante ipsum, apertos haberet *Damæ Rovenæ*, *Rinaldi* ex amore se afflictae *Trabisondæ*, aliosque ejusmodi libros, homo omnium fere suæ ætatis doctissimus, interrogatus, cur id faceret, respondisse fertur, se furem esse literarium, & in primis cupere, sua furta esse occulta, idque sibi ex sententia eventurum esse putare, si pauperum tuguria persequeretur, unde si quid abstulisset, propter eorum, quos expilasset, obscuritatem, omnibus etiam futurum esset incognitum; longe secus oventurum esse, si furtificas, in locupletum & illustrium virorum domos, manus vellet afferre, quorum res, propter ipsorum nobilitatem & amplitudinem, omnium jam patent ad oculos, nam si quid mihi ex illis arrogare vellem ac proprium facere, quicumque aspicerent, continuo clamarent, furem manifestarium, qui ea pro meis venderem, quæ jamdiu in illius vel illius beatissimi hominis supellectile numerarentur. Hactenus sermo est de iis, qui furtum facere, atque ex pauperum bonis augere suam rem student. At sunt inopes aliqui, hoc est, quidam, nullis fere literis præditi, nulla eruditione ornati, adeo fortunati atque felices, ut ditiores omnes certatim in eos, quidquid sibi rei est, conferant, neque aliquem eos locupletandi finem faciunt, unde illorum nomen omnis posteritatis memoriz consecratum existat. Id quod *Ambrosio Calepino* contigisse videmus, qui, cum *Lexicon* quoddam *Latinarum* vocum, plerarumque fortasse non bene intellectarum, edidisset, placuit inventum hominibus doctis; & quoniam non esset integrum, in illud invadere, quia prior ille occupasset. Relicto *Calepini* nomine, tantum unusquisque in illud, quantum poterat, contulit. Itaque jam liber ille, tanta rerum copia redundat, ut copiosa ipsa non æque sit copia, ut liber ille est copia, neque quidquam sit *Calepini* nomine illustrius. Hoc quidem nostra ætate, ut de aliis taceam, usu venit *Octavio Pancirolo Regiensi*, & *Cathedralis* ejusdem *Ecclesiæ* Ca-

Canonico, quamquam fuit Calepino aliquanto felicior; ille enim suo inventu, hic est clarus alieno. Venit hoc in mentem Hippolyto Pancirolæ, fratri ejusdem germano, qui operæ pretium se esse facturum existimavit, si omnium, quæ sunt Romæ Ecclesiarum origines, ortus, auctores, nomina, eorumque, quæ illarum custodiis asservantur, Sanctorum Reliquias, præterea, Nosocomia, Xenodochia, aliasque hospitales domos, unum in libellum colligeret, quem Thesauros absconditos vocaret, idque anno Jubilei jam appetente cō L C, ut qui Romam eo anno religionis ergo, venirent, haberent, unde breviter eorum locorum, quæ ipsi venerantur, notitiam acciperent, quo majorem pietatis ac religionis suæ fructum erga loca illa perciperent, propter quæ patrias sibi sedes relinquendas, & ad Urbem veniendum (nam veniendi nulla alia erat causa) honestum ac gloriosum putassent. Tantum ille aliqua Octavii fratris opera usus est, ad earum Ecclesiarum hospitaliumque locorum memorias quoquo modo a rectoribus ac magistris eorum excipiendas; neque mea illi opera defuit, quod essem Octavii amicissimus. Verum, ipse totum librum Italico, neque ita eleganti, sermone conscripsit, & conatus est etiam edere; idque sibi facile ob ejus libri novitatem eventurum existimabat. Sed res aliter cecidit, atque opinatus fuerat. Nam cum nemini ex Societate Jesu liceat aliquid typis imprimendum mandare, nisi facta a superioribus potestate, illi vero, quibus hæ partes datæ fuerant, ut viderent, num quid ille liber luce dignum afferret, retulissent opus illud, luteum sibi negocium videri, nec satis dignum, quod in iis, quæ ex Sociis ejusdem Sodalitatis exissent, numeraretur, atque idem sibi videri, Cardinalis Bellarminus, quem ille appellaverat, affirmasset; sententia destitit. Nunquam enim apud suos aliquam ingenii habuit laudem; nulla in re Pancirolæ illi alteri similis, cujus opera, ob eximiam Juris civilis scientiam, magnis stipendiis conductæ est ab omnibus Italiæ Gymnasiis, in eisque incredibili auditorum concursu, facultatem eam aliis tradidit, in qua erat princeps; quem etiam a Paulo Manutio laudatum in Epistolis suis invenio. Spem igitur immortalis nominis, quam

quam ceperat, coactus adjicere, eam in Octavium fratrem transfudit, ac librum tradidit, ut editum, pro suo aliis obtruderet. Quem illi librum, non tam dulcedine gloriæ, quam spe aliqua lucelli quæsticuli que commotus, accepit: sperabat enim, magnum emtorum numerum eam sibi mercem conciliaturam; sed spe illa dejectus, ne nummo quidem uno factus est ditior. Jacuit ille liber, fere usque ad alterum Jubilei annum cId Id C XXV tum viri quidam eruditi susceptum illum, delectati materia & titulo, ita auxerunt ornavitque, ut, si Octavii Panciroli nomen & titulum demas, non agnoscas, eundem esse. Atque hodie nihil fere est libro illo celebrius, nihil, quod ciutorem magis inveniat.

LIV. ANGELUS MOROSINUS.

SI natura, seu potius rerum omnium parens Deus, in tribuendis animi dotibus, generis cujusque splendorem & claritatem aspiceret, nemo generosissimus non etiam doctissimus inveniretur. Sed, cum sæpenumero summo genere nati, ob hebetudinem ac tarditatem ingenii, inscitia rerum omnium laborare, contra, infimæ sortis homines, ingenii bono, ad summam sive eloquentiæ sive Juris civilis sive Philosophiæ sive aliarum pulcerrimarum artium scientiæ laudem efflorescere; quid habet ea res argumenti, nisi, in nobilitate familiæ, vel in opum magnitudine, quæ homini extrinsecus accidat, in bonis animi comparandis nullam vim esse? quamnam enim in iis partem, quasi suo jure, fortuna sibi vendicet, quæ ad animum, quo præsertim hominis vis & ratio constet, ornandum perficiendumque pertineant? ideo ex iis rebus, quæ nullis adversis casibus subjiuntur, sed perpetuo nobis inhaerent, laudem, gloriam & famam esse expetendam, ex aliis quæ possunt amitti, quæque ejus sunt partis (corporis videlicet) propria, quod est nobis commune cum brutis, non item nisi ex recto ac laudabili earum usu aliquam nobis existimationem commendationemque queramus; quod nimirum opes, divitias, nobilitatem, temperantiam, modestiæ, ac liberalitatis materiem habuerimus, non autem

tem instrumenta superbiz, avaritiz, atque libidinis. Atque, ut ad rem propius accedam, Angelus Morosinus, humili tenuique Etruriz est ortus in pago, Prato veteri, nomine, ex obscurissimis summaque laborantibus inopia parentibus, qui, ruri opus faciendo, pæce ac duriter vitam agebant: at ille, quum sublimis & egregius traditus sibi a Deo animus, ex paterz vitæ sordibus cogebat emergere, & ad honestiora transire, simul ac per ætatem licuit, Florentiam se contulit, ut ibi rude ipsius ingenium, sed literarum gloriæ in primis appetens, disciplinis omnibus erudiretur, quarum instructu ornatuque referens, inanem eorum, qui divitiis atque opibus abundarent, ac sumosis majorum imaginibus gloriarentur, fastum atque superbiam obtereret, ac studiorum suorum fructibus, nomen suum clarius & illustrius, speciosis illorum cognomentis efficeret, quorum vita ac mors juxta æstimanda est, quoniam nihil ex se relinquunt, unde vixisse eos appareat. Florentiz Thaddæo Clotino operam dedit; a quo liberalibus disciplinis, iis præsertim, quibus prima illa ætas institui solet, est eruditus; neque antea ab eo ludo discessit, quam ea, quæ a magistro didicerat, posset aliis tradere. Etenim, cum quid ab illo monstrabatur, statim intelligentiz quasi pedem intro in illud ferebat; neque, ut ceteri condiscipulorum, in ejus aditu vestibuloque morabatur nec se longius inferebat, se celeritate ingenii in intimam ejus rationem penetrabat, atque inde, tanquam e fonte, adeo ejus rei cognitione se implebat, ut efflueret: quamobrem facile illi erat, quidquid ab ipso redundaret, in alios refundere. Id quod, rei familiaris angustiis oppressus, coactus est facere; atque Florentiz cœpit se aliis ad docendum dare, & ex multis, qui, a propinquis parentibusque missi, in disciplinam convenerant, adolescentes nobilissimi, quidam, ex Vecchietorum familia fuerunt; quos etiam, ut illis esset additus custos, tanquam pædagogus, comitabatur. Cui illi adeo dediti fuerunt, ut non quasi pædagogo, sed tanquam parenti alteri, honorem benevolentiamque præstarent, eundemque eo amoris vinculo sibi conjungerent, quod nulla vis temporis posset abrumpere: erat enim in illo, non solum

lum sanctitas merum atque integritas, verum summa etiam comitas, atque, ad promerendos sibi hominum animos, sermonis venustas atque auctoritas. Sed tantus magister majore dignus erat theatro, quam ut paucis hæreret. Lucem conventumque honestissimum sibi quærebat, non autem solitudinem tenebrasque poscebat. Ideo creptus ex unius domus angustiis, & a paucis erudiendis traductus est in amplissimum Pisarum urbis Gymnasium, & in frequentem discipulorum celebritatem, ut ibi mollissima adolescentium ingenia ad pulcerrimas artes & ad omnem humanitatem informaret. At humanissimæ hæ literæ elegantissimæque, si cui sit in animo, in illis commorari, & quasi tabernaculum vitæ constituere, neque progredi longius, non tam illum perficiunt quam ornant, non tam augent quam delectant, non tam ad publicam utilitatem quam ad privatam commoda fornant ac fingunt. Ideo ille, qui non ignoraret, hominem non sibi soli, sed multo magis esse Reipublicæ natum, præstantissimum ingenium ad eas disciplinas contulit, quibus ea administrari aliquo modo posset: atque juris Civilis, Pontificii præsertim, & moralis Theologiæ, studia complexus est. In quibus quos fecerit progressus, si Roberti Card. Ubaldini testimonium proferre possimus, tanti viri judicio contenti esse debeamus. Eum enim ex omnibus unum elegit, quem quamdiu Montis Politiani Ecclesiæ Episcopus præfuit, sui sibi muneris vicarium haberet. Nec vir ille sapientissimus ac suis omnibus in rebus mirum in modum certus ac diligens, suam ab eo assiduitatem, prudentiam, æquitatem, ac justitiam desideravit; sed, postquam Cardinalis grave illius muneris onus a se rejecit & in alterum transtulit, reversus est Florentiam; ubi Ecclesiam S. Donati, in foro Vecchiettarum, Parocho suo, qui mortem obierat, orbata inveniit; & quoniam penes Vecchiettos, quorum majores eam ecclesiam fundaverant, novi rectoris eligendi jus atque potestas erat, in veteris Parochi locum illi Angelum, cujus memoria in illorum animis nunquam exoleverat, substituendum subrogandumque curarunt. Qui denique in ea provincia rite ac fideliter administranda vitam amisit. Quantum

autem vir ille Latinis ac Græcis in primis literis præstiterit, præsertim declarat ille ejus verissimis ac justissimis elatus in cælum laudibus liber, quem Flores Italice lingue inscriptum edidit. Aliquot etiam, Etrusco sermone, tum soluta oratione, tum versibus, ab eo scripta narrantur; unde liceat intelligere, summum illud ingenium, quaecumque in partem se dedisset, sui semper simile extitisse.

LV. SALUSTIUS SALVIANUS.

Celebratur illa Hippocratis, medicorum longe præstantissimi, sententia, quod natura hominibus, ad rerum artes, quæ sunt longissimæ, intelligentia usuque comprehendendas, vitæ spatium, qua fruerentur, in exiguum gyrum cursumque compulerit. Atqui, hanc Hippocratis de naturæ, in tradenda hominibus vita, tenacitate sententiam si quisquam alius, profecto Salustius Salvianus usurpare cum dolore ac querimonia potest. Qui, cum se ad artis medicæ studia contulisset, quæ longam exercitationem usumque requirunt, ingenii augendi declarandique tempus obtinuit: celeriter enim est mortuus. Sed quamquam ævi brevis, magnitudine tamen industriæ, qua ceteros superabat, est affecutus, ut diutius vixisse videretur, quam illi, quibus longissimum vitæ curriculum obtigit. Ut magis, naturam industriæ, quam industriam naturæ, defuisse, dici verissime possit. Etenim mature in summorum medicorum numerum venit, atque in Gymnasio Romano eam medicinæ partem est interpretatus, quæ morborum naturas & causas acute subtiliterque vestigat. Patrem habuit doctissimum, Tiseruatem, qui Romæ, ubi Salustium filium genuit, in principibus medicis numerabatur; fuitque Gasparis illius Salviani frater, qui in ædibus Pauli Mancini, Humoristarum academiam instituit, eamque, quoad vixit, incredibili labore ac diligentia, summorum ingeniorum nobilitate, atque auditorum frequentia, florentissimam reddidit; qui omnes, quotquot erant Romæ, cujusvis ætatis atque ordinis homines, comprehensos amicitia habebat, obsequio retinebat, cum eis-
que

que sua omnia communicabat. At Salustius similitates cum Alexandro Petronio, civitatis Castellanzæ medicorum nobilissimo, gessit, ob sententiarum, de quibusdam præcipuis medicæ facultatis capitibus, diversitates dissimilitudinesque susceptas; ac paratus erat, quemadmodum Gaspar ejus frater mihi narrabat, nisi mors intercessisset, ea fere omnia confutare atque refellere, quæ Alexander, in libris, de victu Romanorum, ad tuendam sanitatem, firma ac fixa debere esse tradiderat. Discipulorum suorum hortatu, ac precibus, atque adeo vi coactus est typis impressos libros duos edere, de Urinarum differentiis, causis & judiciis, doctissime & eruditissime scriptos; qui libri, cum multa contineant, quæ ille, receptas aliorum sententias, quod cum experientia, rerum omnium magistra pugnent, est convellere, & labefactare conatus; & quia multa pro experientia, contra vulgarem doctrinam asserant, quæ neque ipse, si maxime velit, neque alii dissolvere queant; magnam in se sui ævi medicorum invidiam concitavit; quam ille, veritatis præsidio munitus, nihil est veritus. Ita enim ille, in epistola, quam ad Hippolytum Cardinalem Rubicum, cujus nomini dicavit illud opus, scripsit, aperte fatetur. Ob quarum dissimilitudines opinionum, quas etiam, tum in publicis tum in privatis disputationibus, magna vi animi ac vocis tuebatur, omnes fere suæ ætatis medicos parum sibi æquos ac benevolentes habebat. Edidit etiam insigne volumen, de variis insanix generibus, eorumque curationibus. Nam Romanum valetudinarium dementium, aliquot annos, eo usus est medico. His adjecit, Variarum lectionum de re medica libros, non minore doctrina scriptos, quam superiores.

LVI. DEMETRIUS CANEVARIUS.

EX omnibus præclaris artibus ac disciplinis duæ in primis, studiosis hominibus fructuosæ quæstuosæque habentur, Medicina, ac Juris civilis scientia; elegantissimæ vero pulcherrimæque literæ, ut poësis & eloquentia, non modo nihil cultores suos quantumvis egregios competant & augment, verum etiam, nisi inter-

ea aliquid prospectum illis sit, vel aliquo alio artificio tueri se properent, ad inopiam ac mendicitatem impellunt. Itaque illis omnes decedunt, honorem habent, divitias congerunt; hos vero omnes prætereunt, despicunt, in pannis & inopia sordido vitam pane oblectare patiuntur; denique, nemo dignos eos existimat, in quos semel oculorum aciem adjiciant. Cujus rei ea in primis ratio potest afferri, quod illi corporum valetudini, vel patrimoniorum incolumitati, quæ prima apud mortales putantur, isti animum, quem plerique negligunt, excolere & ornare dicantur. Quod animadvertens Demetrius Canevarius, Therami filius, cum non solum doctrinæ adipiscendæ, verum etiam pecuniæ in primis faciendæ, cupidus esset, ac videret, medicos quosdam, mediocriter ejus artis instrumento instructos, intra paucos annos ad summas divitias pervenisse, quantumvis Genux nobili loco natus, ad medicinæ studia animum appulit, ad eamque, non ut quidam faciunt, nudus venit atque inermis, nulla cognitione rerum, nulla fere scientia ornatus, sed præclare a Latinis literis, ab exquisita rerum multarum eruditione, ac præsertim a Philosophia, in qua fere sunt omnia, instructus accessit; cujus præsidio ad intima medicæ artis cubilia penetravit, ac brevi in ea perfectus evasit. Nam primum Genux, in medicorum, nobilissimæ illius urbis, collegium cooptatus est; ad quod nemini adspirare licet, nisi, ad medicinæ scientiam, multarum etiam bonarum artium virtutumque societatem adjunxerit. Et quamvis urbs Genux, satis illi amplius atque honestus, gloriæ, quam sibi pepererat, alendæ augendæque, & pecuniæ sitis, qua æstuabat, explendæ, campus esse potuisset; tamen, sive quia audierat, quidquid ubique terrarum esset laudabile & honestum, quidquid ubique divitiarum contineretur, Romam, tanquam unum in locum, confluere, sive quia existimabat, minus eam laudem esse illustrem, quam non aulæ Romanæ judicium, quasi lumen accenderet, statuit arcem orbis omnium terrarum. Uni illius parti, coactum ex omnibus omnium divitiarum quasi fluminibus mare, unius illarum flumini, denique Romam Genux, antepone. Itaque eo se contulit, & in urbe

Leonina, quæ, ponte, Romæ adjungitur, apud Apostolorum Principis Ædium domicilium sibi constituit, in eoque annis quadraginta, hoc est, quoad vita suppeditavit, perpetuo mansit. At Romæ hominis ingenium simul aspectum & probatum est; itaque ille statim ad difficilium morborum curationes cœptus est adhiberi; in quibus fuit felix: nam plures, quorum salutis spes nulla supererat, pene ab orco reduxit. Quapropter multis summis Pont. multis Cardinalibus, carus extitit; sed Hieronymo de Ruere, Philippo Spinulæ, & Evangelistæ Pallottæ longe carissimus; qui Cardinales non alteri medico, quam illi, salutem suam tutius se credere posse existimabant. Secutus est deinde populi totius consensus; a quo certatim opera ipsius expetebatur. Unde magna illi dabatur faciendæ cogendæque pecuniæ facultas. Quam non ociosam domui habebat, sed statim sænori locabat; neque id, quod ex sænore collegerat, in usibus domesticis consumebat: sed rursus sænori dabat; atque ita deinceps perpetuo faciebat. Et ad hanc tam exactam consiciendæ pecuniæ rationem, adjugebat incredibilem in omni victu parsimoniam. Vix enim tantum cibi adhibebat, quantum esset ad reficiendas vires satis. Sed cibus erat talis, ut intra angustissimos frugalitatis & abstinentiæ fines contineretur. Nullus apud eum erat cupidinarius, nullus aucupibus, nullus piscatoribus quæstus; nullum ejus mensam extruebat obsonium paulo unctius aut nitidius; nihil in eam inferebatur, quod lex Orchia vel Fannia, vel quævis alia sumtuaria posset reprehendere aut in crimen vocare; sed tantum quotidie ab anicula quadam, quæ habitabat ibi vicinæ, in praudium ac cœnam, panis ex jure & frustulum carnis illi parabatur; quæ camistro imposita, ipse per fenestram sursum subducebat corbulis. Cum erat illi opus vestibus, eas ex taberna aliqua vestiaria novas petebat, sed parvo sumtu; ab Hebræis, obsoletas & attritas emebat. Cum igitur ad lucrum illud, quod quotidie ab ægris curandis referebat, illud etiam, quod ex quotidiano victu, suum defraudans genium, comparferat, infueret, eam vim pecuniarum conflagavit, ut medicorum omnium, qui erant Romæ, longe ditissimus ac locupletissimus.

tissimus haberetur. Verum hujus tam parce parci parsimonia passa est se vinci ab ingenti quadam gloriæ cupiditate ac nominis; quod se adepturum existimabat, si nobilem Geniæ bibliothecam instituisset, omni librorum optimorum copia refertam, quæ generi esset monumentum ac sibi. Rem miram; cum puuix non æque sit aridus, atque ille erat, ut nullam, nisi in res oppido necessarias, argenti guttam expueret, in libris tamen comparandis, quibus bibliothecam, quam excitarat, extrueret, non parcissimus ut in ceteris rebus, sed effusissimus inueiebatur; non tamen, ut nummos, libros carius emendo, profunderet, immo eos sæpe multo minoris quàm essent, bibliopolis querentibus, & injuriam sibi fieri clamantibus, auferret. Qui bibliopolæ, quamvis inviti, ideo ad ejus pactiones conditionesque veniebant, quia ille non credita sed præsentī pecunia, qua illis erat opus, emebat. In qua bibliotheca tantum sibi, apud posteros, decoris ornauentique fore existimabat, ut ducentena illi scuta quotannis testamento legaverit, quæ summam daret operam in ea custodienda expoliendaque, ne videlicet libri niues aut blattas pascere, neve ab aranearum telis, vel a pulvere, detrimenti quidquam acciperent. Cujus testamentum, ob numerum legatorum, ac rerum multitudinem quas post suam mortem fieri mandabat, tam multas paginas complectebatur, ut voluminis cujusdam instar habere videretur. Secundissima semper fuit valetudine; nihil enim in eo erat, nisi siccum & sanum; nam, quæ, in tam tenui parcoque victu, vitiosi cujuspiam humoris exuperantia poterat, ad creandos alendosque morbos, oriri? tamen ajunt (si vera est fama, neque id illi, falso, ridiculi jocique causa, ut mihi videtur, affingitur) valetudinem illum sitam, quasi navem, ad morbum nescio quæ, tanquam ad aliquem scopulum, offendisse. At ego, ut dixi, falso ad illud dedecus injectum eum fuisse existimo, idque, vel ab urbano facetoque aliquo homine excogitatum, ut risum moveret, si ea, quæ in ea illius parsimonia & in iis moribus incredibilia essent, false ridiculeque narrasset, vel ab invido malevoloque quopiam effectum ac divulgatum, cui insignis illius virtus & industria esset

odio atque molestie. Multa scripsit ediditque, in quibus manifesto appareat, quantum vir ille ingenio, eruditione, doctrinaque præstiterit: ut sunt, de rerum naturalium ortu atque interitu, ad Octavianum fratrem; de primis rerum a natura factarum principiis; de hominis procreatione; ars medica, seu methodus curandorum morborum, affectuumque præter naturam, quæ corpus humanum affligunt; agnoscendarum, prælagiendarum curandarumque febrium omnium methodus rationalis, artis medicæ præceptis instituta; de ligno sancto, adversus pseudolignum sanctum, nuper in Italiam delatum; quam disputationem tum ab eo institutam fuisse ajunt ii, qui ejus laudibus detrahere quoquo modo conantur, cum eo implicitus, quem diximus, morbo decubuit. Quod, quam alienum sit, superfluum est ac non necessarium, exponere; neque hujus tam manifestæ calumnix aliqua a nobis mentio facta esset, nisi nobis propositum ab initio fuisset, omnia persequi, quæ ad veram cujusque ingenii formam exprimendam pertinerent, eaque refellere, quæ, illi falso objectæ, ejus pulcritudinem deturparent. Non fuit in illo Latine scribendi accurata ac diligens elegantia; sed neque est admodum inquinata locutus. At mirum fuit in disserendo acumen, in re explicanda perspicuitas, in judicando prudentia. Longa ac lenta demum est febris Romæ consumtus. Illud etiam memoratur admirandum ejusdem parsimonix exemplum, quod biduo, antequam animam efflaret, quum vetula quædam, quæ ipsi ægrotanti operam dabat, ovum recens exforbeudum præbebat, novam ex armario mappam expromississet, qua os abstergeret, hoc ille animadvertens, continuo, Quænam, inquit, te mala crux agitat, ut mappam, nullius adhuc usu deteriore factam, mihi contaminandam præbeas? numne aliæ veteres & obtritæ deerant? abi hinc in malam rem, pessima.

LVII. FULVIUS TESTA.

STyli novitas, tum in soluto sermone tum in versibus, si adsit ratio iudiciumque, quemadmodum hominum sibi favorem studiumque conciliet, & quam magnam imitatorum familiam secum adducat, Fulvius Testa Mutinensis ostendit. Hic enim, quod ante ipsum pauci tentare sunt ausi, ex Græcis ac Latinis poëtis, Odis, ad Etrusci sermonis elegantiam, est transferre conatus: & res illi bene ac feliciter cecidit. Ac mihi videtur Statium in primis imitatus, orationis gravitate, verborum splendore, & ornata sententiarum concinnitate. Eum igitur, ad summam poëticæ facultatis gloriam properantem, incredibilis quædam, ac prope divina, vis ingenii, a communi atque omnium fere contrita itineribus via abreptum, eo abstraxit, ubi nemo, ante ipsum, vestigium impresserat, ac novam, & in primis laudabilem, sibi scribendi rationem invenit. Quod ubi ex ejus scriptis palam est factum, rei novitate, non minus omnium in se oculos atque ora convertit, veluti lumen aliquod, quod, quamvis ex vaporibus & exhalationibus terræ conflatum, in cælo novum apparet: ita ut in Gymnasiis, in Academiis, in eruditorum conventibus, quidquid emanasset ab ipso, si legeretur, continuo clamores & admirationes efficeret, & adolescentium præsertim studia, ad illius imitationem incenderet, ut nimirum, ipso duce, eo venire contenderent, quo sine duce ille pervenisset; atque sibi beatus esse videretur, qui quam maxime illum imitando posset effingere. Quæ scribendi novitas, cum omnibus, quemadmodum dixi, plausibilis esset, tum iis in primis admirabilis visa est, quos eadem, atque illum, cupido ac voluntas incesserat. Erant tum quidam, summo a natura ingenio, ad omnia præstantissimarum artium studia facti; hi, tanquam scædere quodam inter se iëto, in id coierant, ut illud, tum recentiorum tum veterum scriptorum, tanquam vulgare, obsoletum, ac vile, repudiarent atque respuerent, in quo purus, incorruptus, nullaque insolentiz & obscuritatis fæce inquinatus sermonis can-

dor ac nitor elucesceret, illudque tantum probaretur, quod ex ipsorum officinis prodisset. Ac principem in eis locum obtinebant, Virginius Cæsarinus, Jo. Ciampolus, alique, qui cum adhuc superstites sint, a nobis prætermittuntur. Ac Ciampolus, cum die quodam, una cum eruditis quibusdam, animi causa, tota urbe circumferretur, incidissetque sermo de scriptoribus Latinis, qui Ciceronis seculo floruisent, cœpit, joci & amœnitatis gratia, Catullianum illum hendecasyllabum recitare:

*Cui dono lepidum novum libellum,
Arido modo pumice expolitum,
Corneli?*

ac, postquam effusissimos risus edidisset: Si quempiam, inquit, e triviis & e foro, plebejum arriperetis, possentne humiliter atque obsoletius loqui? Id cum quidam, qui eadem rheda vehebatur, audisset, usque adeo elatus est ira stomachoque, ut se præcitem e rheda in terram ejecerit, sermonem segregaverit, ac domum abierit. Referebant illi, in suum ipsorum numerum, Urbanum VIII; credo, ut ab illo gratiam impirent, non autem quod re vera ita existimarent. Etenim nihil in ejus scriptis offendi, nisi purum, dilucidum, perspicuum; nihil, quod a veterum, eruditissimi illius Ciceronis seculi, scriptorum exemplo ac sanitate abhorreret: immo, cum quidam carmen, nescio quod, ad Virgilii similitudinem scriptum, attulisset, lectum laudavit, &, Gratia sunt, inquit, Deo habende, quod aliquis inveniatur, apud quem vetus illa & sana scribendi ratio non exoleverit. Illi igitur ceteris spretis ac repudiatis, novum sibi ad Parnassi verticem iter invenerunt, sed non eadem felicitate qua Fulvius. Hic enim pulcrum, facilem, amœnam, jucundam, omni florum herbarumque varietate conspersam viam sibi constravit; illi vero scruposam, salebrosam, arduo ac difficili ascensu semitam, in qua vix liceat consistere, aperuerunt. Quocirca istorum poemata, quamvis egregia, paucos amatores & imitatores inveniunt: constant enim ex constructis additisque sententiis, multorum interpretum opera cruentis, paucorum approbatione, denique Clarii, Greci illius poetæ, operis similia, quod illum, opus in magna audi-

torum corona legentem, omnes deseruerunt, præter Platonem, neque tamen, a corona desertus, deterritus est, legitque nihilominus; quod diceret, Platonem sibi instar omnium esse. At vero Testæ opera ab omnibus amantur, expetuntur, leguntur, discuntur; ac beatus sibi videtur, qui, apta ac diligenti imitatione, ad illius scribendi venustatem maiestatemque propius possit accedere. Multa scripsit graviter atque severe; ut, viro- rum principum, & illustrium amicorum laudes, de in- constantia ac varietate fortunæ, de rerum humanarum brevitate fragilitateque; ita tamen, ut ad illam severita- tem gravitatemque, suavitatis ac leporis multum inlue- ret. Multa etiam jocosæ & hilariter edidit; ut, mulie- rum quarundam formosarum laudes, amores, atque alia ejusmodi; a quorum tamen amœnitate jucunditateque gravitas ac maiestas omnino non abest. At hic vir sum- mus, quemadmodum in tribuendis sibi animi ingenii- que dotibus, naturam habuit, ut ita dicam, prodigam atque profusam, ita etiam ceteris in rebus ea usus est parca, neque ita commoda ac benigna. Etenim neque summo nec illustri ortus est genere, sed primus ipse, sua virtute, splendorem ac claritatem in illud intulit. Quamvis non adeo humili obscuroque natus sit loco: patrem enim habuit vestiarium, & ut in ea civitate, di- tem. At Fulvium animi, qua præstabat, magnitudo atque nobilitas taberna pannaria, atque ex ea parum liberali pecuniæ faciendæ ratione, foras eiecit, & ad li- terarum studia transtulit. In quibus quos progressus fe- cerit, sine mea vel alterius cuiuspiam oratione, ex scri- ptis quæ reliquit, & ex fama quam sibi peperit, patet. Ac primo, in aula Ducis Estensis, illi, qui erat Duci secretis, in exscribendis epistolis operam navavit. Ita- que cum ille habuit ad manum, scribæ loco. Verum ejus virtus clarius explendescibat, quam ut loci illius, quem tenebat, humilitas pateretur. Ideo majore habitus est provincia dignus; simulque ejus rei occasio se dedit, ex amanuensi in ejus locum sussectus est, cui arcanorum omnium summa imminet, & imperium in ceteros amanuenses habet. Neque hoc Duci visum est satis: nam in concilium eorum consiliariorum, etiam admitti eum pla- cuit,

cuit, ad quos de pace, de bello, deque universa Republ. refertur, ut togati suam iis de rebus sententiam & consilium exponant. Quas ille partes, fide, integritate, prudentia, est egregie tutatus. Regnabat ea tempestate in Ecclesia Romana Urbanus VIII Pont. max. qui poeta & ipse summus, Fulvii ingenio plurimum delectatus, cum, propter virtutem, in amicorum suorum numerum admiserat; cumque mittendus esset aliquis Romam, qui, Residentis auctoritate ac nomine, Ducis negotia procuraret, nemo visus est magis idoneus ad id munus, quam Fulvius; quod spes erat, ob eum amicitie locum, quem apud Pontificem teneret, omnia illi, quæ ageret, ex sententia successura. Neque spem, quæ de ipso erat, sefellit. Nam ita Romæ se gessit, ut magni ejus opera æstimata sit. Tum, eodem etiam cum honore ac munere, Ducis jussu profectus est in Germaniam ad Ferdinandum Cæsarem, magnis de rebus, in quibus agendis nihilo magis passus est desiderari a se fidem, diligentiam, integritatem, atque prudentiam suam; sed munus sibi delatum, iis quas diximus virtutibus, sed eundo, ita se præstitit, ut pulcre Dux ille, quanto sibi illa esset ornamento, sentiret. Sed virtutum earum splendore in Hispania, quo fuerat missus, magis enituit. Quem Rex ille ita suscepit, ut vehementer sit admiratus, & honoribus officiisque pluribus profectus. Etenim Comitibus titulo affecit, & honorariz, S. Jacobi militiæ insignibus eum cohonestavit, &, quod raro vel nunquam Italis hominibus contigit, Commenda, quam vocant, donavit, unde centena quotannis & plura scuta perciperet. Non minimam etiam Mutinensis Imperii partem, a Duce sibi traditam, prætor obtinuit; eam in præhis, quæ Lucensium, aliorumque finitimorum Principum regiones attingit. Quam etiam, magna fidelitatis justitiæque cum laude administravit. Denique, ita delatos sibi honores potestatesque, quæ dabantur a Principe, in cujus ille disione atque imperio erat, gessit, ut suam semper eidem fidem, studium, diligentiamque præstiterit. Sed nescio, quo modo, extremis temporibus, ab officio, a fide, a pietate, atque adeo a se ipso discessisse visus est. Etenim in suspicionem proditionis

venit, quod nimirum arcem quandam, loci natura manuque munitam, Hispanis tradere constituisset. Augerant suspicionem plurima in ipsum Hispanorum merita; studium ac diligentia, qua illorum amicitiam coluisset, a quibus, iis etiam quæ acceperat, majora speraret. Id Romæ Cardinali Estensi, Ducis fratri, primum oboluit; tum leviter pressis vestigiis, ad intima ejus rei cubilia licuit pervenire. At Cardinalis tale periculum haud occultum habuit, sed citatis equis Mutinam se contulit, atque de arce Hispanis a Fulvio tradenda, quæ & quomodo audierat, fratri narravit. Qui, quemadmodum æquum erat, cum, cujus consilia incertum utrum falsa an vera prodita essent, in custodiam dari mandavit; ubi de eo habita questio dicitur. Quem autem res eventum habuerit, nobis ea res, pro magnitudine, parum comperta est. Illud quidem pro certo traditur, hominem in vinculis finem vitæ fecisse; non item verò, proclamatum ipsum proditoris reum.

LVIII. BERNARDUS DE AVANZATIS.

Maximum atque firmissimum eloquentiæ fundamentum illud semper est habitum, quod in verborum optimorum electione constitueretur. Itaque illi melius ceteris loqui ac scribere dicuntur, qui verbis quam lectissimis utantur. Verba autem omnia, quibus formatur oratio, in quadruplici ratione versari, docent ii, qui recte loquendi scribendique præcepta literis consignata mandarunt. Nam quædam sunt usitata, ea nimirum, quibus consuetudo nostra utitur; quædam prisca & vetusta, & ab usu quotidiani sermonis jam diu intermissa; quædam nova, quæ a nobis ipsis gignuntur ac fiunt; postremo translata, quæ inopitè primum causa, cum verbum alicujus rei proprium non sit, tum delectationis jucunditatisque gratia, aliunde sumuntur. Atque, omittis ceteris, verba inusitata, tanquam obsoleta, atque a communi usu remota, ab oratione nostra rejicienda esse docemur, neque iis uti, nisi in longo carmine. Nam sunt licentiæ poetarum liberiores quam oratorum; ac raro habet in soluta oratione priscum ali-

quod verbum dignitatem. Atque ab his sapientibus Rhetorum præceptis institutisque non minimum mihi aberrasse videtur Bernardus de Avanzatis Florentinus, magno vir ingenio, exquisitaque eruditione, qui Cornelium Tacitum, summum historicum, ex Latino in vernaculum sermonem convertit. Ita enim est frequens in verbis jam pridem a communi usu loquendi relictis atque sepositis usurpandis, ut facilius ab eis, qui Latinis literis vel leviter sint imbuti, Cornelius intelligatur, quam ipse Bernardus. Etenim in Cornelio, præter insignem quandam brevitatem, quæ interdum orationi tenebras affert, nullum verbum invenias, nisi usitatum, nisi Ciceronis ætate, in qua Latine scribendi maturitas exitit, celebratum, nullum, nisi longe remotum ab iis versibus, quos olim Fauni vatesque canebant, ut sapienter mihi factum videatur ab iis, qui Bernardi opus post ejus e vita discessum, imprimendum curarunt, ut Latina Cornelii verba cum Etrusca illius interpretatione conjungerent. Funguntur enim interpretis cujusdam vice illis, quibus Bernardi verba minus sunt nota. Et in his non Italos solum, cujusvis illi sunt civitatis, sed Florentinos etiam numero. Audiavi ego Franciscum Nicolinum, Florentiæ summo genere natum, qui multos annos hic Romæ, magni Ducis, oratoris functus est munere, a quo etiam Avanzati librum dono mihi datum accepi; audiavi, inquam, cum diceret, se, quoties in aliquo illius auctoris verbo, quod nunquam ipsius aures acceperant, hæreret; quod sæpissime contingeret, continuo ad Latinam ipsius Taciti historiam confugere, ejusque auxilio, saltem suspitione, assequi, quid verbum illud significaret. Quod ego duabus, ni fallor, de causis ab Avanzato factum existimo: primum, ut Taciti in scribendo brevitatem imitaretur; existimavit enim, se eam aptius expressurum priscis & obscuris verbis, quam usitatis & illustribus: deinde, quod arbitraretur, sermonem Etruscum, non eadem, qua ceteræ sunt res mortales, conditione præditum esse; quarum ea natura est, ut ex iis mors aliquid quotidie decerpant, vel saltem senectus quodam eas situ obducant, ac deteriorem earum usum efficiat; itaque quæcunque ab ejusdem exorientis quasi

quasi incunabilis peperit usus, integra, inviolata, incorrupta manere, nullum ab ea verbum, tanquam ab arbo-
re solum, suo destitutum ab humore, decidisse, nullum
mortis, omnia intercipientis, imperio datum orco
fuisse, nullum venustate saltem obsolevisse. Quorum
neutrum mihi probari aliquo modo potest. Primum,
cur non potuisset Taciti sententias, ea qua ille usus est
brevitate, usitatis verbis, quemadmodum ille fecit, am-
plecti? ac tum fuisset, Tacitum imitari, vel, ut ejusdem
Bernardi laudatores asserunt, vincere. Tum, si Tacitus
honestum & gloriosum sibi putasset, nullum Latinum
verbum, jam inde ab ejus linguae ortu usque ad sua tem-
pora natum, a se rejicere, vel potius, studiose ex vetu-
statis quasi ruderibus erutum, suis scriptis inserere, nul-
lum profecto verbum reliquisset ex iis, quæ in duodecim
tabulis reperiebantur, vel quibus M. Valerius Dictator
plebem prope ripam Anienis, ad tertium milliarium
confidentem, sedavit, vel quibus Appius Claudius se-
natum jam inclinatum, a Pyrrhi pace revocavit: quam-
obrem, non ad Italos, non ad Romanos, sui temporis,
a quorum intelligentia verba illa penitus aberant, sed
ad pastores Romuli, sed ad Aborigines scripisset, atque
Bernardum, ejus in Etruscum sermonem vertendi, la-
bore levasset, cum verbum prorsus in eo nullum intel-
ligeret, qui similiter mihi videtur, cum tantopere anti-
quitatem imitari studeat, suam Cornelii Etruscæ in-
terpretationem, non Italis, non Etruscis, non Florenti-
nis, qui aperte, eam se linguam non nosse, fatentur,
concinnasse, sed iis, qui longo intervallo, ante Dantis
Aldigherii ætatem vixissent, commendare voluisse. At
Jo. Boccacius & Franciscus Petrarca, quorum præ-
stantissimis ac prope divinis ingeniis serinio Etruscus, ea
verborum elegantia, iis ornamentis auctus ac locuple-
tatus est, ut supra addi nihil possit, propius ab antiqui-
tate aberant; annis enim plus quam trecentis ante nos
fuerunt; & tamen nulla major ab eis opera data fuisse
videtur, quam ut omnem priscorum verborum fecem
a suis scriptis removerent, ne purum ac limpidum ipso-
rum orationis flumen aliqua ex parte infuscarent. Qui-
bus præsertim ob hanc causam arbitror primas ab omni-
bus

bus sine controversia deferri. Inferunt se quidem interdum in ipsorum sermonem verba aliqua paulo antiquiora; sed ea miram habent venustatem; & quia loco sunt posita, adeo omnium intelligentiæ sunt obvia atque aperta, ut nulla fere interpretis cujusquam ope auxilioque indigeant. Ideo nulla est in Italia civitas, quæ ita barbære, ita inquinatè loquatur, quin eos legat, intelligat, admiretur, ediscat. Ideo, qui post istos venustissimos politissimostque scriptores, se ad scribendum contulerunt, tum id elegantius & laudabilius se esse facturos existimant, si proxime ad illorum imitationem accederent. Ex hoc numero fuerunt, Petrus Bembus, & is quem Florentini ipsi summis in cælum laudibus efferunt, Jo. Casa, quod sit præclare locutus, & plusquam ceteri, Franciscus Guicciardinus, scriptor historiarum eximius, & cum Thucydide & Herodoto conferendus, qui a suis annalibus, gravitate prudentique plenissimis, omnem vetustatis rubiginem situmque procul esse quam longissime voluit, neque verbum ad eos quodpiam accedere, quod putridam illam ac rancidam antiquitatem redoleret. Cui etiam illi, qui eidem sunt iniquissimi, in primis quinque libris, quos eruditi cujuspiam viri lima perpolitæ fuisse contendunt, omnem Florentini sermonis elegantiam, concinnitatemque concedunt; in ceteris libris non item, quos, nullius censuræ, ut priores quinque, subjecerat. Vere, an secus, nihil ad hoc tempus. Atque illius potissimum scribendi rationem, utpote prudentem, severam, gravem, & ab ineptiis in primis abhorrentem, mihi videntur; in Italia, omnium virorum principum aulæ fuisse secutæ, tum literis dandis, tum in rebus maximis atque gravissimis explicandis. Sed per Deum immortalem, quænam hæc est ratio, quod consilium, ut, quæ tanto cum labore ad pubertatem, vel potius in maturitatem perfectionemque perduximus, ea rursus velimus ad infantie annos, suæque ad initia rudia atque impolita, reducere? vel quænam est tanta, ut Tullius inquit, in hominibus perversitas, ut, inventis frugibus, glauce vescantur? At Bernardum aliosque video, qui in hac eadem, qua ille, sunt hæresi, studio ac caritate patriæ adductos, extincta jam

vocabula ab orco reducere, ut linguam suam locupletiore efficiant; ut ejusdem, ut ita dicam, ærarium nummis, hoc est, vocibus quam plurimis, impleant. Laudo pietatem; sed habet ea quoque res rationem modumque. Etenim, si primum nummi sunt cogendi, quos communis usus in emtionibus ac venditionibus admitat; videlicet, ut vocabula sint ejusmodi, quibus nostra vendere valeamus, neque rejiciantur, eo quod non sint præsentia, ut inquit Horatius, nota signata. Deinde cavendum est, ne videamur nummulos plumbeos, quibusque nullum est pretium, velle pro aureis ac pretiosis obtrudere.

LIX. TRAJANUS BOCCALINUS.

EA Philosophia, quæ est de moribus, variis elegantissimisque rationibus ab ejus magistris & inventoribus introducta est in hominum cœtus, quibus maxime erat necessaria. Nam cum antea ii, quibus præstantissimum a natura ingenium tributum fuerat, illud a communi hominum vita, & a recta vivendi ratione, cui in primis hæzere æquum fuerat, abductum, in cœlum traduxissent, toti in variis astrorum atque orbium cœlestium motibus observandis contemplandisque versabantur; quæ res nihil planè ad extrahendum e vitiorum sordibus animum, atque ad virtutis studium traducendum, in quo sunt omnia, pertinet. Quo fiebat, ut, cum in iis rebus, quæ supra ipsos erant, defixos oculos & intentam cogitationem haberent, non aspicerent ea, quæ ante pedes essent; ac sorde turpiterque prolabentes, variis se erroribus inquinarent inficerentque. Princeps ex omnibus Socrates, Philosophiam ex cœlo deduxit, & variis doctissimisque sermonibus, in civitatibus collocavit. Quos sermones Plato, ea quæ præditus erat eloquentia, literis consignatos, omnium seculorum posteritati mandavit. Etenim cum se fingeret eum esse qui non erat, videlicet rerum omnium ignarum ac rudem, omnemque iis sapientiam, qui eam sibi arrogabant, attribueret atque concederet, hac ironia, multa percontando interrogandoque, quanto illi in errore versarentur,

tur, aperiebat, &, quid in unoquoque verissimum esset, eliciebat. Consecutus deinde est Aristoteles, qui, quo ingenii acumine rerum naturalium causas naturasque perspexerat, eodem, quæ ad mores hominum spectant, aspexit, totamque hanc de moribus disciplinam, methodo ac ratione disposuit. Inventi sunt etiam illi, qui rudibus fabularum corticibus magnam sapientie vim includerent; quibus corticibus (ut in juglandibus & avellanis nucibus accidit) quasi fractis remotisque, nucleum essent, hoc est, quasi per ludum jocumque, quod ipsis esset ex usu, perciperent. Principem in ejusmodi philosophantium genere locum obtinuit *Æsopus Phrygius*. Hic quum animantibus, ratione carentibus, sancti differendique facultatem attribuit, ex iis, quæ inter ipsos acta finguntur, aliorum exemplo, homines docti, paratiores ad sibi cavendum evadunt, & inprimis cavent, ne quid a rationis imperio discedentes admittant, cujus eos postea præverteat. At temporibus istis, in quibus versamur, ortus est alius non inelegans neque invenustus vitæ morumque magister *Trajanus Boccalinus*, vir acris ingenio, ad jocandum cum aliquo maledicto facetus, omni elegantia doctrinæ exultus. Hic librum scripsit, in quem omnia in monte *Parnasso* acta, ac *Romæ* perlata, referuntur, nempe sententiæ ab *Apolliine*, poetarum ac literatorum principe latæ, decreta interposita, præmia viris bene de *Republ.* meritis decreta, poenæ in improbos constitutæ; aliaque varii generis multa, quibus vitia designabantur, quorum invidia tum civitas flagrabat, iniqua judicia, quibus infantes circumveniebantur, aperiri constabat, supplicia, quibus hominum fraus & improbitas ad perniciem, virtus vero ac probitas ad laudem & præmia, vocanda essent, ostendebatur; denique, multorum contumacia, superbia, avaritia, luxuria, atque alii pessimi mores in odium contentionemque adducebantur. Sed, quemadmodum *Terentio* malevoli objiciebant, ipsum, in fabulis faciendis, *Scipionis Africanus*, *Lælii* qui dictus est sapiens, & *Furii Pii*, opera uti, assidueque cum illis una scribere; ita etiam de *Trajano* fama distulerat, in his actis referendis homines nobilissimos socios & adjutores habere. Verum id sibi non
mi-

minus laudi ducebat, quam Terentius, qui gloriosum sibi putabat, id quod malevoli quasi maledictum vehemens existimabant, ac sit verisimile hæc cum illis eum communicasse, quibus, ad notanda & animadvertenda aliorum vitia, eadem esset voluntas atque propensio. Sed catenus hæc ejus in notandis animadvertendisque hominum moribus libertas ferri tolerarique potuit, quoad ille in iis recte ac leviter sub illis ambagibus perstringendis sese continuit, neque certorum hominum conditionem & statum expressit: verum, ubi acumen styli, ad verberandam violendamque Regum maximorum majestatem, aperte convertit, dignus visus est habitus, ejus audacia atque temeritas gravioribus poenis coerceretur. Scripserat enim librum, cui Lydiæ lapidis nomen indiderat; ubi conabatur ostendere, Regis tum omnium maximi ac potentissimi opes ac vires non esse ita magnas, ut hominum ferret opinio, sed facile deleri posse, si quis alius Rex ad eas intingendas ac labefaciendas accederet; & simul rationem, quamobrem id fieri posset, aperiebat. Itaque die quodam, Venetiis, ubi se maxime tutum fore sperabat, a quatuor vel sex militibus, ut ajunt, circumventus, ad pulsandos verberandosque homines validissimis, & adeo ab illis, sacculis plenis arena, contusus commitigatusque est, ut ex ea verberatione supremum vitæ diem obierit, nec Apollo potuerit, cui somnum rerum omnium arbitrium tribuebat, ab eo infortunio incolumem eum præstare, nec perficere, quin styli poenas daret: ac fortasse eam ab illius capite pestem avertisset, si res acta fuisset in monte Parnasso, ubi ille regnum obtinere dicitur. Sed quia Venetiis, quo Apollinis imperii fines non pertinebant, ea ille affectus contumelia fuerat, ideo nullam ab eo opem auxiliumque potuit accipere.

IX. ALEXIUS DE ALEXIIS.

Admodum raro, vel nunquam, ut Petronius ait, præclara ingenia ab aliqua stultitiæ admistione sejuncta cernuntur, stultitiæ autem nomine, non solum hominum ineptias, eorumque omnia dicta vel facta, quæ

quæ ob deformitatem aliquam rideantur, intelligo, verum etiam vitia atque peccata complector. Nam sapiens, qui opponitur stulto, nunquam a recta rationis via deflectit; quod faciunt ii, qui vitiis possidendos se tradunt. Quemnam enim præstanti ingenio virum invenias, ex poetis præsertim, in quibus ingenii vis major elucet, qui turpissimis plerumque vitiis obligatus constrictusque non detineatur? ut, non immerito Ludovicus Arcostus in quadam satyra, deplorans miseram temporum suorum conditionem, dixerit, raro virtutem a vitiorum flagitiorumque societate distractam inveniri. Verum hæc querela non magis suorum erat temporum, quam nostrorum, atque ætatum fere omnium. Hac vero ætate, in qua versamur, haud scio, an quisquam ex iis, qui ab ingenii præstantia commendantur, vel cerebrosiior extiterit, vel ad majores ineptias stultitiasque descenderit, quam Alexius de Alexiis, Romanus. Hic, ab ineunte ætate, elegantibus literis excultus, Philosophis ac Medicis instituendum erudiendumque se dedit, atque a Marsilio Cagnato, doctore eximio, medendi artem accepit; tum, in eadem se exercendi, a Collegio Medicorum, potestatem obtinuit; jamque medici partes, ægrotis curandis & ad sanitatem perducendis, exequebatur; cum ab equite quodam levis armaturæ, ex prætoriana Pauli V Pont. max. militia, gravi est affectus injuria; qua vehementer offensus, medici habitum, una cum ægris medendi exercitatione, abiecit, &, quo injuriam sibi factam persequeretur, latus ferro præcinxit, ac militari propemodum ornatu incedens, perditissimis adolescentes moribus arcta sibi familiaritate devinxit; quorum consuetudine assuefactus, eatenus progressus est, ut congerronum illorum quasi grege coacto, quorum erat ille princeps, utpote nugator in primis, Roma discederet, ac totam Sabinam ac Latium, circulatoris more, lustraret, &, simul ac urbem aliquam ingrediebatur, continuo populum ad coronam vocabat, atque ea, qua valebat, eloquentia, quam vulgus in verborum cursu nusquam insistente, tanquam amne præcipitante, positam esse putat, tantam ejusdem ad se multitudinem attrahebat, ut eam forum, in quo nugabatur, non cape-

ret; tum, ridiculis atque facetiis, quibus abundabat, ita hominum cœtus, qui convenerant, detinebat, ut nemo, nisi ipso abeunte, discederet. Ac ridiculam in primis Neapolitani ex plebe personam agebat, quam vel Pascharellum vel Coviellum appellaret; quam ita scite, ita venuste, ita ad similitudinem veri, repræsentabat, ut Throuum ac Cucumerum, qui tum in circulatoribus primi numerabantur, & sermonis proprietate & facetiis, & ridiculorum copia dictorum, superaret. Memoria vero erat tanta, ut in hac parte animi, quæ cussos est ceterarum ingenii partium, adeo studiosis hominibus necessaria, neminem ejusdem ætatis cum illo conferendum putem; quo fiebat, ut, cum concionatorem aliquem attentius audisset, statim cunctas ejus orationis non modo sententias, verum etiam verba, ad unum omnia repeteret. Id quod die quodam ostendit in cœnobio Fratrum Capuccinorum, quorum ille ægotantium morbis medebatur. Conciones, eo anno Romæ ad populum habebat F. Capuccinus quidam Aquitanus, magno hominum omnis ætatis atque ordinis concursu; quem concursum & dicendi ridiculum genus, & gestus ab scena & histrionibus, faciebat. Hujus cum insignem quandam concionem auribus acceperisset, paulo post, joci & hilaritatis causa, eandem Patribus illis habuit; in qua referenda non solum rerum ordinem ac numerum, iisdem plane verbis quibus ille, servavit, verum etiam ita Aquilavum ipsum, oculis, voce, gestu, imitando effinxit, atque ita expressit, ut memoriam admirarentur omnes, ingenium agnoscerent. Sed cum jam ille ab eo ætatis ludo & ab improborum hominum familiaritatibus discessisset, seque ad ingenium bonum receperisset, eo animi ardore & alacritate, ad intermissa medicinæ artis studia rediit, ut, quantum eidem penitus cognoscendæ detraxerat temporis ludus ætatis, tantundem etiam laboris industrizque tribuerit discendi studium, ut doctissimus atque in Hippocratis disciplina perfectus evaserit, ex ejusque quasi ludo plures egregii in hoc artis genere exirent discipuli, vel summi potius artifices atque magistri; quorum ego singulorum laudes libenter exponerem, nisi vellem mihi constare, ut

de iis, qui nunc sunt, nihil, nisi coactus propemodum, dicam; quemadmodum nunc mihi usu venit in Petro Servio Spoletino, cujus laudem summam & vicinitatis ratio, & amicitiz necessitudo, ejusdemque summa erga me merita, cogunt me, breviter ac strictim attingere. Hic medendi artem ab illo didicit, sed quæ ab illo didicisset, ad usum, qui omnium magistrorum præcepta superat, transferendi, in nosocomio S. Spiritus in Saxia, ubi, multis abhinc annis, ægrotos curat, quotidianis exercitationibus summoque studio & diligentia est consecutus; præstat judicio, quod fere continet omnia. Nam cum genera morborum, causas, eorumque remedia, pulcre noverit, curationes, singulis morborum generibus opportunas, loco ac tempore adhibet. Ejus eruditio non exiguis facultatis unius terminis definitur, sed longe lateque excurrent, varias artium pulcherrimarum quasi regiones amplectitur. Itaque ejus oratio, quamcunque in oram disputationis delata est, in ea doctè scienterque versatur. Plures, variis temporibus, libros edidit, in quibus, præter exquisitam elegantemque doctrinam, puri atque incorrupti Latini sermonis cultus ac nitor elucet: utinam secunda uti valetudine possit (nam cum adversa eum sæpius conflictari contingit,) profecto multa, quæ egregie habet inchoata, perficeret; unde liceret intelligere, quantum ille pluribus sævi, ingenio, doctrina, prudentia, ac rerum experientia, usuque, antecederet. Sed redeamus ad Alexium, qui, postquam rediit ad sese, splendido atque elegantiviræ usus est genere. Etenim nihil unquam de eo, quod sua industria pepererat, comparuit, suum defraudans genium, sed totum, ad se nitide lepideque curandum, large fundebat; contra vulgarem atque usitatum medicorum morem, qui naturæ ac necessitati fere omnia denegantes, præterquam eorum dignitas conditioque patiatur, parsimoniz student, ut amplum hæredibus patrimonium relinquant, qui, longe diverso ab ipsis animo, suis sumptibus, illorum alant expleantque luxuriam. Discipulorum gregem ducebat secum, ut artis, quam ab ipso didicerant, præcepta, ægotantium cubilibus obeundis, ad usum exercitationemque conferrent, & tanquam

ex umbra in pulverem solemque perducerent. Etenim multos annos valetudinarium familiæ Fratrum Joannis Dei, in insula Tiberina, sive solitudini curæque commissum habuit, ex cujus exercitationis quasi palestra, complures egregii ac præstantes medici prodierunt. In his Benedictus Aquilanus. Erat comis, benignus, humanus, liberalis, in communi amicorum vita, hilaris, festivus, jucundus, & aincenitatem omnem exercens. Narrat vir quidam, genere, opibus, divitiis, ac præstantia dignitatis, longe multis excellens, nocte quadam, domum suam, inultas mulieres nobiles, ac præstantes dignitate viros, animi scilicet causa, convenisse, adfuisse etiam Alexium, qui aliquandiu; credo, ob eorum, qui aderant, dignitatem; non erat ausus sermones cum illis miscere, neque ullam partem orationis persequi ea libertate, qua solitus erat; sed tandem, provocatum illum, vel potius coactum, ex tempore, ea facundia, ea venustate atque lepore, cœpisse dicere, ut omnium, qui audierant, admiratio consequeretur, ac nobilissimus ille conventus, redundaret hilaritate & joco. Omnes Hippocratis sententias intelligentia perceptas & memoria comprehensas habebat, neque, in curandis corporum morbis, ab illius disciplina, ne minimum quidem, aberrabat, ut vix alter inveniretur, in quem melius Hippocratici nomen conveniret. Habebat etiam hoc, sive a natura sive ab arte, ut nunquam ingravescenti morbum, sine ratione provideret, neque, sine aliqua probabili conjectura, de illius eventu præsentiret atque prædiceret. Quamquam adeo erat felix, ut neminem fere ægrum curandum suscepit, quem non etiam a periculo tutum sua curatione reddiderit. Vixit annos quadraginta duos, quibus expletis, in morbum incidit; quem non potuit ea felicitate a se depellere, qua in aliis facere consueverat. Itaque necessario illi succubuit.

LXI.

ANGELUS COLI.

VIdi ego sæpenumero duos, qui altercarent inter se litigarentque, num alter alteri esset in ea, de qualis erat, arte superior; & utrumque constantissime in ea sibi principatum arrogare. Magna est, ingenii præsertim, pulcritudo laudis & gloriæ, idco unusquisque eandem avidissime expetit; &, quamquam aliis in rebus, æquo animo se a ceteris vinci patiatur, tamen, ut inquit ille, *qui velis ingenio cedere, rarus erit*. Verum, cui omnium, qui ejusdem sunt artificii, concessu, primæ sint delatæ dum vixit, plane neminem, cujus quidem meminerim, scio, præter Angelum Coli, Senensem, longe clarissimum, sua ætate, medicinæ artis antistitem. Hujus virtuti ingenioque tantum, quidquid Romæ esset medicorum, tribuebat, ut nemo inveniretur, quantumvis doctus, quantumvis, sua ipsius opinione, excellens, qui auderet se illi anteferre, quique non eidem cederet fastigiumque summitteret. Hic in nosocomio S. Spiritus in Saxia, quatuordecim annis, Assistentis, quem vocant, functus est munere; ubi tantam doctrinæ atque experientiæ vim sibi paravit, tum in ea facultate, & remediis quæ morbis, tum in ea quæ vulneribus manet, iuedetur; quam facultatem, mortuorum hominum alvum & præcordia sæpius incidendo tractandoque, fuerat adeptus, ut in magnam totius urbis existimationem honoremque perveniret, atque a Petro Card. Aldobrandino accitus sit medicus; nemini enim tutius salutem suam posse committi existimavit, quam si eam Angeli sollicitudini curæque permitteret. Hujus tam excellentis tamque præstantis in eo facultatis causa erat, absoluta atque perfecta Hippocratis doctrinæ notitia; ad cujus intima penetralia, ingenii lumine, ac studio diligentiaque, pervenerat, ut nihil in ea esset ita reconditum, quod ingenii ipsius acumen effugeret. Tanta in illius auctoritate vis inest; ad medicos præ ceteris constitutos. Sed, quemadmodum Romanæ urbis medici Hippocratis intelligentia studioque Europæos omnes medicos antecunt; ita etiam ipse Romanos, in inda-

gan-

ganda ac subtiliter perscrutanda illius auctoris sententia, infra se longo intervallo reliquit. Hospitali insani-
bilibum domui, complures annos, egregiam ac laudabi-
lem operam præstitit. Erat illi palatium, ut ita dicam,
cordis fastidiosissimum, adeo ut multa, quamvis egre-
gia, respueret, multaque improbaret, quæ præceptis
medicinæ traduntur. Erat frigidus ac parcus in laudan-
do, acer ac multus in reprehendendo, ac censor plane
metuendus; sed in communi vitæ consuetudine iucun-
dus ac lepidus ad res omnes; liberæ erant ejus ædes,
& amicis tum literatis tum facetis hominibus apertæ;
amabat enim ipse multum facetias, tum eas quæ re,
tum illas quæ dicto tractantur; neque, in jaciendo mit-
tendoque ridiculo, cum quisquam argutiis ac sale vin-
cebat. Adeo animi sui motus habebat in potestate, ut
Petrus Servius, de quo antea commemoravimus, affir-
mare non dubitet, totos quinque & viginti annos, qui-
bus eo usus est familiarissime, nunquam eum vidisse vel
iracundia elatum vel ægritudine, vel metu, vel inani a-
lacritate, hoc est, lætitiâ gestiente, commotum, sed
semper eandem in vultu animi æquitatem constantiam-
que servasse; quæ constantia, non modo in retinendis
animi perturbationibus, ne longius evagarentur, eluxit,
verum etiam in statu, incessu, sessione, ac ceteris aliis in
rebus: & ad incessum quod attinet, jam inde ab incun-
te ætate tarditatibus usus est ingressu mollissimis, ut
non minus dici posset, movere fornicinum gradum,
quam dictus est olim medicus ille, in Menæchmis, a
fœcero ad generum curandum adductus. Neque unquam,
quamvis ægri cujusquam necessitate, qui præsentem ab
eo operam auxiliumque poscebat, potuit adduci, ut fe-
stinationes ingressu majores exciperet. Quid multa?
etiam in vultu, constanter quendam quasi florem ætatis
retinere videbatur. Nam si ex oris habitu existimare de
hominum ætatibus liceat, vix quinquaginta cum annos
natum, ausus esses affirmare, cum ad quatuor & septua-
ginta pervenisset; quo anno est mortuus.

LXII. BALDUS BALDUS.

Non minor medicinæ usus, nec minor ejus artis notitia, in Baldo fuit, quam apud eos, de quibus antea commemoravimus. Etenim ingenium in eo vigebat acutum & acre, in reperiendis investigandisque latentium morborum causis sagax, in adhibendis remediis, quibus illis possit occurri, promptum ac celer, mira in consultationibus & in differendo facundia; quamquam in hoc genere multos habuit superiores; qui tamen doctrina usuque, longo intervallo, infra ipsum invenirentur, eo quod morbi, non eloquentia, sed remediis, ab ægris corporibus propulsentur; quorum perfectam notitiam si quis elinguis obtineat, longe præstantior medicus est futurus quam ille, qui sine ea, lingua celeri & incitata utatur. Sed Baldo felicitas infortunio, rerum copia exitio fuit. Nam, cum ad id honoris & commodi pervenisset, quo non altius vota medicorum ascendunt, nimirum ut summi Pont. medicus fieret, non ita multos post menses est mortuus, morbi ejusdam malignitate, cui non potuit obfisti, ex eo, ut tum erat fama, contracti, quod nova illi vitæ ratio fuerat ineunda, & vetus, cui assueverat, relinquenda. Necesse enim erat ei, qui certum vitæ genus sequebatur, quotidie ad medias noctes evigilare & cenare, & interdum, vespere jam appetente, prandere, atque alia insuper incommoda, quæ fert aula, subire. Magna erat apud medicos, suos æquales, doctrinæ & ingenii existimatione ac laude, & eximie ab omnibus laudabatur; quibus ego laudibus impulsus ante annos ferme duodecim, gravi implicitus morbo, medicum mihi accivi; sed nihil propius est factum, quam ut ejus medendi ratio, quæ ceteris salutaris esse consueverat, mihi exitium ac pestem afferret. Etenim, cum pituita, quæ pectori acriter ad hæserat, laborarem, quæ pituita, quantum poterat, extrahenda ex pectore erat; ille eam curationem adhibebat, qua ea pectori altius ac pertinacius adhæresceret, & sane me ad interitum dedisset, nisi Ludovici Mannucii opera subvenisset; qui, mutata curatione, me,

omni-

omnium opinione celerius, sanitati restituit. Quam ego rem, cum, in Manuccii laudem & gloriam, medico cuidam non in postremis exponerem, ille quasi stomachans, satius mihi fuisse ait, Baldo perperam curante interire, quam secunda Mannucci curantis opera convalescere; idque pluribus verbis conabatur ostendere. Cui ego ita me respondisse memini, nunquam se tam commode dicturum, ut id mihi, vel cuiquam alteri (nisi si illa vita odio esset) persuaderet; nemo enim, nisi stultus, longe multumque præstare non videat, imperita ac temeraria incertissimi, cujusquam manu ad sanitatem perducere, quam docta atque industria alterius vel sapientissimi opera ad interitum tradi; immo, ad salutis inextinguibilem quod attinet, multo ille major, quam hic, apud me futurus est medicus.

LXIII. JO. FRANCISCUS GROPALUS.

Nemo adeo disertus, adeo eloquens, invenietur, qui potius sit verbis explicare, quibus gaudiis, quibusque oblectationibus afficiatur mens hominis, vitis exuti, (nam voluptati obsequentibus virtus non facile se committit,) qui totus in studiis versetur, & cognitione rerum pulcerrimarum, quæ pastus suavissimus est animorum, alatur. Etenim tanta tamque admirabilis ex iis oblectatio suavitasque percipitur, ut animus pene a societate corporis avocetur, atque in iis rebus peregrinetur, ad quarum se cognitionem intelligentiamque converterit. Nonne eos sæpenumero videmus, qui sint in acerrima attentissimaque rei cujuscumque meditatione defixi, ita a se ipsis abesse, ut vocem ac sonitum prætereuntium non audiant, ut ea, quæ sunt ante oculos, plane non videant? Notum est illud de Archimede, quem neque armorum strepitus, qui totam Siciliam concusserrat, neque captæ M. Marcello Syracusæ, ex qua urbe humilis erat homunculus, neque civium captorum clamor, gemitus, stridor, neque militum, a quibus interfectus est, gladii, a pulvere ac radio, quibus erat omni mente ac cogitatione intentus, potuerunt avertere. Ex hoc genere fuit ille, de quo dicere instituimus, Jo. Fran-

ciscus Gropalus, patricius Genuensis, qui, ab ineunte ætate, ea virtutis indole fuit, ut omnem vitæ suæ cursum in studiis literarum consecrerit; atque adeo perpetuo in hac ratione vitæ habitavit, ut ab ea nunquam, neque ludis neque conviviis, neque æqualium studiis, abstraheretur; omnino voluptatibus omnibus bellum habuit indictum; vias adolescentiæ lubricas, quibus illa insilere sine casu ac prolapsione vix potest, nunquam est ingressus; sed semper directum illud ad virtutem iter incredibili animi robore tenuit; nulla rerum jucundissimarum varietate, qua ætas etiam corroborata capitur, est abductus a studiis, saltem brevi aliquo tempore; videlicet ad quietem ac remissionem sibi quampiam comparandam nulli ab eo sumtus in re minus honesta facti reperiuntur; immo, quos a parente nummulos accipiebat, ut ex libidine sua consumeret, non alibi nisi in libris cœmendis collocabat. Itaque paulatim bibliothecam extruxit, in qua mille, & eo amplius, omnium elegantissimarum artium volumina numerabantur; ac studium in primis summæ mathematicis disciplinis deditum habuit, quæ nemo ignorat quanta in obscuritate rerum, & quam recondita in arte, & multiplici subtilique versentur; atque adeo in studio metiendæ cæli & terræ continebatur, ut sua etiam manu astrolabia, sphæras, aliaque ejusmodi mathematica instrumenta fabricaretur, ea elegantia ac venustate, ut artificum quorumcumque industriam superaret. Neque minor ejus erat in illis custodiendis sollicitudo ac diligentia; ctenim iis ea custodiis septa atque munita habebat, ut nemini ad ea fas esset accedere; quod si quis forte interdum, cum non satis cautus ad ea tuenda esse posset, eadem indiligentius tractando, fregisset, vel deteriora in usum reddidisset, vel saltem digitulo uno contigisset, adeo iracundia, cum ceteroqui esset mitissimus ac placidissimus, efferebatur, ut insanire eum ac furere prope dixisses. Nullarum fere erat linguarum expertus, quibus aliquis in Europa honor habetur. Latina primum lingua ita eleganter accurateque loquebatur atque scribebat, ut non a libris neque a magistris eam accepisset, sed una cum nutricis lacte suxisse videretur: Hispanica ve-

ro ita, cum erat opus, utebatur, ut, si ortus, altus, educatusque in ea esset. Gallicus sermo supererat, cujus illi facultas nondum addiscendi suppeditaverat. Itaque, ejus agnoscendi, præter modum, cupidus erat. Sed hanc etiam sitim; uno minus mense, explevit. Cumque nullus illi nomenclator, seu vocabularium, ut ajunt, satisfaceret, scripsit Antuerpiam, ut aliquod inde sibi, ad id, quod cupierat, aptum mitteretur. Sed interea dum, donec illud afferatur, expectat, unum sibi ipse consecravit, in quo difficillima vocabula, & paulo reconditiores voces, suis interpretationibus explicatæ inveniebantur. Continebat se in suis perennibus studiis, ut cum maxime, tum Jo. Franciscus, cum acerbum quoddam in Genuenses odium, Carolum Emanuele Sabaudia ducem ad evertendam Rempubl. illorum impulit, instruxit, armavit; suas enim copias, cum ijs conjunctas quibus Aldigherius, magnus Galliarum Regis copiarum præfectus imperabat, Genuam versus adduxit, ubi perterritis civium animis, qui, ex longa sæculi unius pace, non alia arma tractare consueverant, nisi calamum; atramentum, & chartam, plena erant omnia sollicitudinis, formidinis, atque tumultus; & tum cives illi, si salvam esse patriam vellent, arma cogebantur arripere, quorum aliqua ne quo nomine quidem appellarentur, agnoverant, atque hostem a portis & a mœnibus urbis propulsare atque repellere. Verum hæc res tam insolita, tam improvisa, tam nova, catenus Jo. Franciscum, qui, ab initio ætatis usque ad id tempus, suis in studiis, tanquam in hortulis, recubans molliter ac delicate, quieverat, percussit, prostravit, afflixit, ut propinqui illius, quibus, ob morum ejusdem sanctitatem & egregiam eruditionem ac doctrinam, erat eximie carus, veriti sint, ne ex ægritudine, cui totum possidendum se dederat, mortem obiret; eoque magis, quod venerat illi nuncius ab eo, cui exercitus totius ordinandi munus incumbebat, ut proxima nocte, in quandam urbis partem, in armis, hora quinta veniret, ut inde hostem, si auderet illuc accedere, fortiter feriret, & interficeret, cui, cum non posset bilem continere, respondisse dicitur, se quidem, ex præscripto, eo quo imperabatur, esse venturum, sed non

cum aliis armis, quam cum libro; eo enim se armorum genere uti didicisse, non alio. Verum, cum ejus ægritudo, una cum periculis Reipubl. siebat in dies amplior, ceperunt propinqui consilium, ut eum extra urbis mœnia, atque adeo extra Genuensium imperii fines eduicerent. Quod non sine aliquo periculo factum ab illis est. Sed jam Respubl. ex iis malis, quibus fluctuabat, ac pene obruebatur, emerferat, cum rediit in patriam, revocatus a suis, ubi mense Julio anni c Iō Iō C XXV. lethali consumtus est morbo, tum ex ægritudine, tum ex varia cæli, quod mutaverat, temperatione contracto. Illud autem animadversione dignum est, quod ejus tum natalis tum emortualis dies, in difficillima & calamitissima Reipubl. Genuensis tempora incidit. Etenim natus est anno c Iō Iō LXXX, qui annus, pestilentia insignis, orco septuaginta & eo amplius hominum millia dedit; anno autem c Iō Iō C XXV decessit, qui itidem annus inprimis est memorabilis, ejus, de quo diximus, belli periculo, quo nullo fortasse major illa est perfuncta Respublica.

LXIV. MARTHA MARCHINA.

MAgnum ingenium atque amœnum, singularis eruditio, omnisque elegantia doctrinæ, in muliere si adsit, magnam sibi omnium admirationem benevolentiamque conciliat; quæ etiam eo admirabilior videatur, quo literarum laus ab eo sexu non expectatur, qui, ob ejus imbecillitatem, a studiis avocetur, atque, communi omnium sententia, ad acum, ad cûlum, ad lanam impellatur, & tanquam in pristinum aliquod dedatur ac detrudatur. Verum, hac ætate, ea vis ingenii, ea magnitudo poëticæ facultatis, ea omnium bonarum artium scientia, in una virgine, Martha Marchina nomine, enituit, ut, si in viro aliquo reperiretur, maximas admirationes & plausus excitaret. Hoc ornamentum, hoc decus, tam egregium, tam admirabile, urbs Neapolis Romam, quo fere confluit, quidquid est ubique bellissimum, misit. Infans tum etiam erat ea, cum parentum in gremio est delata in Urbem. Erat quidem ex parenti-

tibus, optimis ac sanctissimis moribus præditis, opera, sed humili obscuroque loco, nec ulla generis nobilitate conspicua. Sed quid ab externæ & adventitiæ claritatis lumine, ad se illustrandam, opis auxiliiue egeret ea, quæ, sua ipsius luce, a propriæ virtutis splendore profecta, illuminaretur? illi genus & majorum decora jacerent, in quibus præter sumosas imagines nihil invenitur, nisi superbia, arrogantia, & maxima vitia atque peccata. Una est atque communis omnium natura; sed ille generosissimus, qui sit virtutum ornamentis refertissimus. At parens, cui non magis nobilitas generis, quam omnia ad vitam necessaria deerant, quo sibi familiæque suæ illa suppeditaret, haud procul ab Æde Deiparæ Virginis de pace, quam vocant, officinam orbiculorum ex odorato sapone, & scopularum, instituit, eoque artificio se suosque tuebatur. Verum puella, annos vix septem nata, incredibili discendi cupiditate studioque flagrare cœpit; quam cupiditatem, ut posset explere, matris mors fecit. Ea enim defuncta, omnis ad ipsam, fratrum regendorum, cura sollicitudoque redierat. Ibant illi quotidie, disciplinæ causa, in Gymnasium Soc. Jesu, a quo redeuntes, tum manè, tum vesperti, cogeant eos repetere, quæ a magistris didicissent. Qua necessitate compulsi, attentius, quæ tradebantur, accipiebant, ac diligentius memoria custodiebant. Ea vero, quo erat ingenii acumine, ex hac illorum repetitione, multo plus intelligebat, quam quantum monstraretur; adeo ut magistros ipsos, eadem illa, posse docere videretur. Erat etiam tum parvula, cum ab eo, qui sibi erat a confessionibus, summa vi petere cœpit, ut liceret Latinos nescio quos libros perlegere. At ille irato similis, id illius postulatam, inclementi oratione, rejecit; &: Quidnam tibi, inquit, rei est cum literis? abi, atque ea perface, quæ sunt propria mulierum; quæ autem viris sunt apta, relinque; mulierum autem sunt munia, subtegmen tenue nere, telas texere, opus aliquod Phrygium vel simile quidpiam efficere. Cui illa, non sine animi dolore, dicto audiens fuit, atque aliquandiu a libris abstinuit. Sed non sine ratione id tum puellæ interdictum ab illo fuisse existimo. Nihil enim est, quod

quod minus mulieri expediat, nihil, quod magis inutile ad tutandam pudicitiam sit, quam posse unum ex his tribus facere, aut pingere vel fingere, aut versus facere, aut citharizare, & cantare ad chordarum sonum, plus quam necesse sit probæ: his enim illecebris, spectandi audiendique cupidos ad se viros alliciunt atque attrahunt; a quibus deinde ex pugna dantur, quibus vix possit obfisti, atque (ut illæ salvam suam pudicitiam servant) sermones tamen hominum non possunt effugere. Quamquam nihil horum metuendum erat ab ea, quæ nihil æque studeret, quam ut ejus virtus ab omnibus ignoraretur, nihilque tam laboraret, quam ut non solum virorum, verum etiam mulierum, sermones conventusque vitaret. Verum ille, qui nondum probe eam nosset, quique, quantum sit in literarum studiis vitii, si ad mulieres transferantur, intelligeret, ideo hanc illi interdictionem habebat. Sed, ab hoc ejus sermone, anni jam sex intercesserant, & eo amplius, cum virginis parenti fuit ille auctor, ut liberis, virilis sexus, magistrum aliquem mercede conduceret, qui eos doceret scribere, hoc est, literarum notas scite & eleganter effingere; cui parens: Est, inquit, domi Martha, quæ id præstare sine aliquo sumtu possit. Cui ille: Quid audio? ait: Martha scit scribere? Quidni? respondit parens; ac postridie attulit ille epigramma, Marthæ manu conscriptum. Quod cum legisset, quæsit, ex quonam libro illud excerptum descripsisset. Qui: A nullo, respondit; sed suo Marte confecit. Quo audito, tum demum intellexit, id quod minus antea cognoverat, eam esse Latinis literis eruditam, ac posse versus, vel quam optimos, facere; oblitusque id, quod illi ante sex annos denegaverat, plura quam ipsa vellet epigrammatum scribendorum argumenta præbebat, neque, quoscunque libros posceret, lectitandi potestatem, ut antea, eripiebat. Erant ea epigrammata adeo eleganti stylo confecta, adeo venustis argutisque conclusa sententiis, ut Antonio Quirango, qui ea legerat, fides fieri non posset, fuisse ab ipsa elaborata atque perfecta. Etenim vir ille doctissimus, & carminum in primis conficiendorum artifex summus, non putabat, esse verisimilem, tantam-

tamque egregiam in una muliercula facultatem atque industriam. Quamobrem petiit a Jacobo Volpono, Congreg. Oratorii Presbytero, qui in Æde D. Mariæ in Valticella adeuntium confessiones excipiebat, ut traderet illi argumentum aliquod, ipso præsentē, versibus explicandum, quod est factum ab ipso diligenter; nam, die quodam, transeuntem illam, ante sellam, ubi peccata confitentes sua audiebat; accersivit, jussitque, in chartula quam ei dedit, lapideo stylo, Jacobi atque Angelī hūctam unico epigrammate, lepida ac vibranti sententiola concluso ante se complecti. Paruit illa, & confestim commissum sibi epigramma eleganter atque ex argumento confecit. Quod, ita ut erat rudi penicillo exaratum, missum est ad Quærentum. Qui, virginis ingenio ac scribendi celeritate compulsus, dicitur, ad incredibilem admirationem fuisse traductus. Omnino erat illa ingenio magno, memoria summa, judicio peracri; verum is, cui animæ suæ regendæ tanquam habenas crediderat, quamvis in Deum pietate ac religione præstaret, ad humanam prudentiam quod attinet, parum a natura adjumenti habebat, sed adeo sui erat juris sententiæque, ut ab eo, quod decrevisset, dimoveri vix posset, innuo illud alacriter exequeretur, præterea, vitio senectutis, memoriā ferme perdiderat. Hic, cum existimaret, virginem Romæ frustra tempus conterere, nullique rei usui esse, persuasit illi, vel potius præcepit, ut sanctam Sophiam, quod est oppidum in Alpibus, Æmiliam inter atque Etruriam, illius patriam, peteret, ibique linguæ Latinæ ludum aperiret. Infelix mulier, quamvis intelligeret, quam sibi acerbe ac duriter ab illo imperaretur, ejus tamen imperio præsto fuit, ac pedibus ducentorum & eo amplius militum iter, una cum fratre natu minore, suscepit; qui frater itineris incommodum ferre non potuit, ac Fulginæ gravi morbo cœpit urgeri: itaque coacta est ibi subsistere. Sed cum non ita celeriter a fratre morbus abscederet, sed longum spatium ac moram poscere videretur, ne ipsa ab obedientia discederet, ac fructus, qui ab ea percipiuntur, amitteret, fratris salute, alterius sollicitudini curæque relicta, voluit cœptum iter persequi: sed Laureti red-

ditæ sunt ei literæ ab eo, cujus jussu vix illi se dederat; quibus admonebatur, ut regrederetur, Urbemque repeteret: Quæ statim venit ad eum, qui, duris acerbisque jussis & imperiis suis, pluribus ipsam annis miseram habuit. Debachabatur, per id tempus, tota ferme Italia, pestilentix vis maxima, Bononix præsertim, ubi Legati jure ac nomine imperabat Bernardinus Spada Cardinalis. Hic, quo animum a curis avocaret, nocte quadam epistolam ad P. Virginium Spadam, fratrem suum, & Congregationis Oratorii sacerdotem, una cum epigrammate, de eadem pestilentia, scripsit. Quod ille postea Patribus omnibus legit, ea hora, qua a continuis totius diei laboribus seriatim, festivis ac jucundis inter se colloquiis paululum hilaritati se tradunt; & conversus ad P. Ludovicum Santolinum, qui omnium ejus Congregationis, ac Marthæ etiam, confessiones excipiebat: A te, inquit, huic Epigrammati respondendi partes poetrix illi tutæ sunt demandandæ; nam ego alienus a Musis, nunquam didici versus facere. Cui P. Ludovicus postridie epistolam Latinam alteram, & epigramma alterum, retulit, ejus nomine, Cardinali ab ipsa rescriptum; in quibus duobus omnes de pestilentia sententias, in eum, qui scripserat, retortas, ita apte sciteque illigabat concludebatque, ut Cardinalis, a fratre de illa, quæ in scribendo ipsius vices impleffet, edoctus, ad incredibilem admirationem sit elatus, fratrique rescripserit, indignum sibi videri, in media ejus Urbis luce, tantum ingenii lumen, omnium ignorance, tanquam tenebris, opprimi, ne radios suos late diffunderet; in qua Urbe cantrices ac fidicinæ tam magnis præmiis afficerentur; proinde daret operam (quod magnus aliquis Princeps ex suis eam virtutibus ornaret,) ut diaria, quemadmodum ceteri sui familiares, si dignaretur, acciperet. Quæ primo illa constanter recusavit, sed postea ejus, cui ut diximus, peccata confitebatur, jussu coacta, de sententia decessit, & Cardinalis beneficio decem annis contenta fuit. Quibus elapsis, cum fratres ad id ætatis pervenissent, ut alterius auxilio non indigerent, sed sua possent industria sibi consulere, eo uti amplius noluit. Ardebat cupiditate incredibili, nomen ut suum

religiosæ cuiusdam sacrarum Virginum familiæ daret; nec quidquam propius est factum, quam ut Brexighellæ, in Cœnobium, juris patronatus familiæ Spadæ reciperetur; ubi severissima vitæ disciplina vigeat; postremo ut Romæ in illud alterum admitteretur, in quo Cardinalis Barberini sorores continebantur. Summa Cardinalis illius voluntate, sed divino consilio factum est, ne res eum, quem illa optabat, eventum haberet; quo videlicet ostenderetur, posse etiam virgines in media urbium, omnium maximarum, frequentia sibi secretum facere, atque ad summum sanctitatis fastigium ascendere. Erat illi ingenium versatile, & ad quascunque res, quibus illa se daret, obeundas aptissimum. Habebat, domi suæ contubernales puerulos duos, Cardinalis Spadæ fratris filios, quos ipsi ideummet Cardinalis in disciplinam tradiderat, quo, a tanta muliere, indolis illius non nihil arriperent. Ad quos accedebat quotidie Symphoniacus quidam, qui eos doceret clavicymbalo canere; at eo discedente, adeo, quod illi ab eo acceperant, referebat, ut si traditum sibi soli fuisset. Quæ autem mulierum propria sunt munia, ut suere, nere, aut acu aliquid pingere, quamquam, generosa quadam contumacia, a magnitudine animi ducta, contemneret, tamen, si usus veniret, ita præstabat, ut nemo melius. Audierat, Phrygiuni quoddam opus, ad usum Ecclesiæ Congregationis Oratorii, elaborari; voluit ipsa ad illorum, qui in id opus incumbabant, operas suas etiam pluribus diebus adjungere, quo una cum illis apud Deum veniret in societatem meritorum atque præmiorum; & quamvis ejus artificii esset propemodum rudis, nemini tamen est inventa inferior, qui ætatem ea in arte contriverant. Ex omnibus autem anni mensibus, unum tantum orbiculis ex sapone conficiendis dabat, quos per eum vendendos curabat, qui ante domi suæ fores, totos dies, spiras venales habebat; ex quorum pretio tantum illi nummorum conveniebat, quantum esset ad vitam, uno anno commode agendam, satis, neque emtorum turba deerat: quamvis multi, quo illud domum suam lucrum averterent, conarentur orbiculos illos deliciores & odoratiores efficere. Ea erat omnium de illius mercimo-

monii probitate opinio. Sed cum, ad vitam parce agendam rerum fere omnium expertus, extremis vitæ suæ temporibus, non aliunde, nisi a propriis manibus auxilium petere voluerit, suis Paulum Apostolum vestigiis persecuta esse mihi videtur, cui, ut de se ipse fatetur, nihil habent, naturæ necessaria omnia, suæ ipsius manus suffecere. Sed, num, quia ad ingenii atque omnis eruditionis laudem tantopere properabat, ad probitatis ac pietatis studia segnior aut tardior inveniebatur? at, utroque in genere, est progressa longissime. Hæc vita erat, totum fere diei tempus in assidua rerum cælestium meditatione consumere, nec a templo Deiparæ in Vallicella Cong. Oratorii discedere, nisi ad D. Petri, aliaque religiosissima Dei immortalis & Sanctorum templa adeunda, ubi vel statæ ac solemnes feriæ celebrarentur, vel quadraginta horarum preces essent indictæ. Etenim in his rebus, se Ecclesiæ, divinitus edocæ, spiritu agi & impelli sinebat. His igitur exceptis, quotidie interdiu, in ea quam diximus Aedæ, se continere, mane, ut rei divinæ, a prandio, ut sermonibus qui ibi habentur, interesset; ibi ter in hebdomade, Christi corporis Sacramenta suscipere, Adventus & Quadragesimæ temporibus; quotidie ibi, quod reliquum erat temporis, ursorum ab aliis, horarias Officii D. Virginis preces, Græco sermone scriptas, recitare; quam linguam, simul cum Hebræa, sua sponte, ac nemine monstrante, didicerat. Noctu erant illi, qui culcitra molli ac plumæ, rudes atque asperi assentes; ad ejus, cui animæ suæ maculas aperiebat, exemplum; quem omnibus in rebus imitari studebat, ut etiam, post illius mortem, eas tabulas in beneficio sibi dari poposcerit, ubi ille extremum Deo spiritum ediderat. Nunquam sandalia, hoc est, grandiores mulierum soccos ad tollendam, se altius adhibuit, sed vel calceatis vel soleatis pedibus ingrediebatur; nunquam preciosis usa est vestibus; sed erat humili ac parabili corporis cultu contenta; adeo ut, qui ignotæ faciem intuerentur, contemnerent, quique vestitum humilem & obsoletum aspicerent, nullo eam loco ac numero haberent; qui autem virtutem noverant, non poterant admirari satis. Accedebat ad ar-

tium

tium elegantissimarum studia, Philosophiæ ac Theologiæ notitia, quarum disciplinarum curricula, mira celebritate, consecerat. Verum, tanta ea vis virtutis, illudque dignum, quod nunquam moreretur, ingenium, mense Aprili, anni c1313 C XLVI in morbum incidit, quo cum graviter conficiaretur, quod stomachus, fastidians, omnia respiceret, non ita multos post dies, vitæ finem fecit. Defunctæ corpus P. Virgilius Spada, qui, in ejus confessionibus audiendis, P. Ludovico Santolino successerat, ac fiduciaris ejusdem hæres, in Æde supradicta B. Virginis in Vallicella humanum curavit, in altera ex duabus illius naviculis. Qui statim, ex fide quam dederat, bona ejus, quamvis paucilla, inter pauperes distribuenda mandavit, cum fratres, ad quos illa possent redire, ante ipsam e vita migrassent. Sepulcrum hoc eleganti epitaphio decoravit Gaspar de Sineonibus, Innocentii X Pont. max. ab epistolis Latinis.

D. O. M.

Marthæ Marchinæ, ortu Neapolitanæ Virgini,
educatione Romanæ,
cui, ad insigne pietatis ac pudicitæ studium,
mirus sapientiæ amor, vel septenni, accessit;
eoque deinceps, pari morum atque iugenii cultu,
humaniores artes, ac Latinam in primis poësin,
ad veterum normam atque æmulationem,
suo ipsa instructu, eximie calluit exereuitque;
Hebraicis Græcisque literis docta,
severiores disciplinas, fastu procul, religiose attigit;
animi quæsito magis ornatu, quam nominis;
cujus gloriam,
sponte latens in Urbis luce, dum plane abjecit,
in sinum transmisit immortalitatis.

Obiit V. Idus Aprilis anno Domini M DC XXXXVI
ætat. XXXXVI.

Patres Congregationis Oratorii,
quos illa vitæ probe accurandæ
habuerat monitores,
curatores post funeris, monumentum bene merenti
pos.

LXV. MITILDA BENTIVOLA.

Fœcunda virtutum semina, quotiescunque in animum præparatam, tanquam in agrum novatum iteratumque, contingit incidere, maximos semper ex se fructus educunt. Neque refert, quem illa nacta sint sexum, sive muliebre sive virilem. Quam multæ, omnibus fere seculis, sunt inventæ mulieres, quæ, in omnium artium maximarum studiis, multorum illustrium virorum industriæ præirent! Non repetam veterum memoriam temporum; sed in his versabor, in quibus nos sumus, & in primis occurrit nobis Mitilda Bentivola, Ferrantis Bentivoli filia. Virgo nobilissima, planeque singularis, ausa est, atque etiam nunc audet, (nam adhuc fruitur vita) in aulis summorum Principum, castitatis gloriam alere, ac Christianis virtutibus omnibus animum exornare; quod alii ut assequantur, a conspectu earum rerum remoti, quibus impelli ad contraria illis virtutibus vitia possint, ad solitudines & antra confugiunt, atque in ea se abdunt. Quod factum fuisse vidimus ab Alphonso Mutinæ Duce, ejus illa in aula perpetuo vixit. Cui cum eadem Christiani viri perfectio absolutioque proposita esset, atque virgini illi erat, desperans, tam divitem thesaurum ibi reperire se posse, ubi fures vagantur ac volitant; raro exemplo, in summa rerum omnium potestate, opibus, divitiis, ac regno se exuerat, atque una cum illorum instituto, humilem, arduum, & abjectum Fratrum Capuccinorum habitum susceperat. Non enim quemquam fas esse putabat, ibi animi demissionem, gloriæ, voluptatum, divitiarumque contemptum adipisci, ubi elatio animi, divitiarum amor, ambitio, voluptas, regnet ac vigeat; sed ibi spes est potius voti cum sui compotem esse futurum, unde vitia hæc exulent, & ubi virtutes illæ regnum obtineant. Et sane cogitaverat sæpe Mitilda, atque etiam conata fuerat, in aliquam religiosarum Deo virginum domum, tanquam in arcem, se conferre, quæ nullus adversariorum insidiis & incurfibus aditus pateat; sed variz semper causæ intercesserant, Deo nimirum operam dan-

te

te, quamobrem non posset cogitata perficere, ut in una eaque regalis sanguinis atque animi virgine, significaret, posse etiam hominem, opibus, divitiis, voluptatibus, dapibus, deliciisque circumfluentibus, ab illis non possideri, sed aspernari oculis pulcritudinem rerum, excludere auribus omnem suavitatem, denique non pati, aliquam earum rerum, quæ illum circumstent, guttam in animum suum illabi. Rem miram, ac seculis omnibus prædicandam! eximia virginæ forma, summo genere natam, divitiis ingentibus præditam, eo robore animi, atque ea indole virtutis & continentię fuisse, ut amplissimorum virorum, genere, divitiis, atque omni dignitate principum, qui ipsam, ob eximias ejus animi corporisque dotes, sibi uxorem expetebant, convivia refugeret, ut nuptias, quibus ceteræ cujusvis ordinis puellæ, vix a nutricis lacte depulsæ, inhiant, plane vehementer horreret, neque celebres suarum æqualium nuptiæ, nec magnificentissimi ludorum apparatus, nec mira spectacula, nec splendida convivia, nec aenæa palatia, nec amplæ sumtuosæque villæ, nec multarum jucundissimarum rerum varietas, eam illexerit, aut paululum inhibuerit, qui omnem vitæ suæ cursum in labore, atque in assidua cælestium rerum meditatione, conficeret. Ita fixum apud virtutem animum, amoris ejus clavo, habebat, ut nulla vi ab ea divelli ac distrahi posset. Equidem arbitror, Deo, quoties oculos in terras dignetur inferre, quo facta hominum, ut ita loquar, inspiciat, Deo, inquam, longe gratius ac jucundius spectaculum esse, adolescentem mulierem cernere, quam nec infirmitas sexus, nec ætatis calor, nec magnitudo pecuniæ, nec splendor nobilitatis, nec dignitas formæ, nec adolescentium, pulcritudinis ipsius spectantium, elegantia, amores, obtutus, obsequia, preces, possint ad nequitiam adducere, quam, matura jam ætate virum animadvertere, nullis ejusmodi machinis oppugnatum, ingenium rectum ad bonas artes habere. Spectaculum plane, superis dignum. Nam, præter Deum, quid est apud eos pulcrius? quid habent magis delectabile, si pascere oculos velint, quam, virginem nobilissimam cernere, in ipso ætatis flore blandimenta omnia, quæ

nobis natura ipsa genuit, conculcantem, omnes vias adoleſcentiæ lubricas, quas illa ostendit, sine casu & prolaſione percurrere? Hoc eſt, quod in cælo clamores & admirationes facit, majores, quam ſi immortales illi, rerum pulcerrimarum ſpectatores, quempiam videant ex iis, qui in Religioſorum clauſtra ſe contulerunt, neque arduis neque ſcrupolis neque aliquo imbutis cœno itineribus, celſum, erectum, neque titubantem, celeri ad metam curſu contendere. In hoc nemo illorum valde mirabitur; in illa omnes obſtupeſcent, clamabunt, horrebunt. Ad hujus tam admirabilis virginis, & raræ, ut dicitur, avis exemplum, ille hodie formatur ac fingitur, qui in ampliſſimo Cardinalium Collegio, tanquam edito quodam in loco poſitus, ingenii, probitatis, prudentiæ, ac magnitudinis animi lumen, longe-lateque diffundit; cujus ſimiles ſi cunctos auguſtiſſimus ille Senatus haberet ſemper, audeo dicere, fore, ut hæreticorum factiones mox dilaberentur, ut multa, quibus clericorum ordo cumulatus eſt, vitia ponerentur. Ita eſt ille in omni vita ſplendidus atque magnificus, ut nihil ſplendor de illius animi demiffionis ac ſanctitatis laude decerpat; ita eſt demiffus ac probus, ut probitas atque demiffio nihil ſplendori ac magnificentiæ detrahat.

LXVI. MARIA ISABELLA ACCORAM-
BONA UBALDINA.

Mitildæ, virginis clariſſimæ, commemoratio admonuit me, ut ſceminam leſtiſſimam ac præſtantiſſimam alteram ipſi ſubjiciam, Mariam nimirum Iſabel-
lam Accorambonam Ubaldinam, quæ etiam nunc vivens, eodem, quo illa, propoſito, maluit caſtitalis, prudentiæ, ſanctitatis, multarumque præterea virtutum laudem, in aperta Roberti Cardinalis Ubaldini aula luce, exponere, quam in domeſticorum parietum umbris clauſam & obſtructam habere. Etenim, Octaviano Ubaldino, Roberti Cardinalis fratre, cui nupta fuerat, vita fun-
cto, non fuit illi conſilium, novas nuptias atque alia con-
nubia perſequi, ſed in ejusdem Cardinalis aula fidem, quam viro ſuo vivo dederat, etiam mortuo ſervare con-

constituit. Erat tum in Maria Isabella ætatis flos ipse, generosæ stirpis splendor, & magna sanctitas morum, qui, magis quam cetera alia, mulierem ornant; aderat magnus procorum, genere, divitiis, atque omni dignitate principum, eam sibi uxorem expetentium, numerus: & tamen his omnibus, Lucretiæ Gherardeseæ, socrus suæ, familiaritatem & consuetudinem anteposuit, ac manere apud eam voluit, ut inde perfectæ viduitatis exemplum expeteret. Et quod magis miremur, socrus illa decrepita erat senectute, quæ ætas invisa atque molesta esse adolescentibus solet. Parentibus usa est diligentissimis in ipsa erudenda ad optimos mores sanctissimamque disciplinam, ac præsertim ad pudicitiam tutandam; cuius illa erat adeo studiosa, ut nemini ad eam viro, ac ne germanis quidem fratribus, aditus esset. Cum nondum e virginibus excessisset, sed adhuc, paternæ domus septis clausa, ab omnium virorum oculis removeretur, nunquam indulgebat cessationi otioque; nullum fere tempus, ab aliquo opere, nobili virgine digno, vacuum præterire sinebat: sed in primis lectioni indulgebat; quam illa remissionem animi liberalissimam honestissimamque nunquam fere dimisit; ita tamen, ut omnes il libri a gynæceo illo exularent, qui essent inutiles, neque bonum illud alerent, quod sibi esset vel a natura insitum, vel parentum diligentia partum. Sic vita erat, dum illa in parentum domo educaretur. Sed, postquam ea virtus est in clarissimam sanctissimamque Ubaldinorum familiam traducta, tanquam læta quædam arbuscula, ex natali solo atque aëre in aliud felicius cælum agrumque translata, radicibus actis, fructus ex se uberrimos ac præstantissimos edidit. Mira in ea gravitas, modestia, mansuetudo, prudentia, iuerat. Quibus rebus fiebat, ut Cardinali Ubaldino, atque universis familiaribus, merito esset carissima. Viri mores perferre; nam nemini unquam ita secundus vitæ cursus contigit, ut nulla unquam ægritudine interrumpetur; socrum, quam inter & nulum magnæ sæpe discordiarum causæ intercedunt, colere, venerari, officiis omnibus prosequi, eidemque ad nutum præsto esse; denique totam civitatem in sui admirationem attrahere; neque

solum se ipsam ad id exemplum castitatis & innocentiz, de quo diximus, fingere, verum etiam, ut honestissimam atque sanctissimam matrem familias decet, summam dare operam, quo in ceteris, sive mulieribus sive virginibus, quas circa se habet, eadem, quæ in ipsa elucet, veræ probitatis forma impressa & inusta cernatur. Nam plerunque, quæ domi est dominarum, eadem etiam est ancillarum disciplina. Etenim earum oculos, in oculis habet suis, atque eatenus earum unamquamque a custodia sua non deserit, ut, ne virum quempiam aspiciant, vel sermones cum eo conferant, per ligneam versatilem rotam cibum illis introferri jubeat; tum, ab illis exigit singulis dominicis, aliisque diebus festis atque solemnibus, ut eidem sacerdoti, quem ipsa ad confessionem adhibet, peccata confiteantur sua. Atque hoc loco interponendum videtur, quamvis a re alienum, ne parentes ac dominæ filias ac famulas suas cogant, confessariis iisdem uti, quibus ipse utantur. Nam si illarum quæpiam in aliquod flagitium, sive in effectu, sive sine effectu, cogitatione tantum, labatur & cadat, quo nihil est facilius, cum ex eadem, qua nos fragili infirmaque natura constentur, relatos illos habebunt, ac sacrilegis confessionibus animum contaminabunt; quod, licet male, vereantur, ne dominis ac parentibus suis prodantur: sed ad eos finant illas abire, apud quos sua flagitia secreta atque tacita fore existiment. Pergamus ad reliqua. Magno semper fuit animo ac forti adeo, ut magnitudine animi atque constantia longe mihi vulgus aliarum mulierum antecessisse videatur. Quam animi fortitudinem præsertim ostendit in morte propinquorum, sibi carissimorum, quo tempore mulieres dant se querelis, lamentationibus, ejulatibus. Primum, filii interitum, quem unicum pepererat, neque ita multas post horas, quam eum accepisset, amiserat, ita tulit, ut magis de sepultura quam de lacrymarum officio eidem persolvendo cogitaret. Plures vero fratres, ætate, forma, ingenio, doctrinaque præstantes, quorum interitu multis aureorum millibus amissis, omnes fere Accorambonz familiz opes conciderunt, eatenus descevit extinctos, quod pietatis humanitatisque ratio deposceret: non enim

enim ex filice nata erat. Hoc illis officio naturæ debito persoluto, animum, ut antea, ab omni perturbatione vacuum reddidit. Sed tum visa est in primis motus animi nimios ac longius evagantes reprimere, atque ratione sedare, cum speciosissimas adolescentulas duas, fratris sui filias, quarum major viro primario nupta erat, inter paucos dies phthisi consumptas amisit; etenim, in iis lugendis, non solum nihil sapientis gravitate dignum admisit, verum etiam illud animi propemodum imperturbati specimen edidit, quod a Socrate, qui prior, vel magis quam quispiam alius, docuit, oportere sapientem omni animi perturbatione carere, vix expectari potuisset. Etenim, cum vir ille primarius, cui fratris filia, quam diximus, collocata fuerat, nullum ab ea, neque virilem neque scæmineum, sexum, suscepisset, effectusque liberorum inprimis cupidus, quos educaret, generi monumentum; cum, inquam, vir ille coactus fuisset, neutiquam commota est, non revocavit sibi in memoriam cognatæ calamitatem extinctæ; non ejus, qui illius in locum successura esset, felicitati invidit, sed statim superioris uxoris, fratres iussit ad eum accedere, eidemque nobilissimi viri, cui se devinxisset, affinitatem gratulari; ipsa autem adeo novæ nuptæ aspectum non reformidavit, neque exhorruit, ut nihil habuerit prius, quam domum ad eam, salutandi ejus gratia, venire, & viri, cui illa se commendaverat, virtutes summis in cælum laudibus efferre; a quo genere officii pleræque sancto imbecilloque mulieres animo refugissent, nec sine magno animi dolore sustinuissent, eo alteram in loco collocatam aspicere, unde per suamam fortunæ injuriam suus sanguis fuisset ejectus. Multa præterea sunt, quæ dici de hac muliere possunt; sed satis hoc arbitror, ad id quod volumus, dictum. Non enim propositum est nobis, historiam vel vitas hominum, doctrinæ vel morum laude præstantium, scribere, sed tantum paucis lineis, rudi stylo, tamquam penicillo ductis, ita tamen, ut nosci possint, eorum ingenii formam exprimere, quibus vel eximia pulcritudo vel notabilis scæditas vultus a natura contigerit.

LXVII. LUCRETIA GHERARDESCA.

Multas hac nostra memoria, enumerando, proferre mulieres possumus, in quibus matronarum decus, dignitas, ac sanctitas mire eluxit: sed in nulla earum, quas quidem noverim, tot virtutum laudes convenire visæ sunt, quot, in Lucretia Gherardesca Florentina, hæc ætas nostra suspexit & admirata est. Ac primum generis claritas, ac familiæ splendor, in eâ offert; qui splendor si absit a nobis, non est magnopere dolendum; est enim donum, quod extrinsecus accidit; nec in potestate nostra est, quales majores habeamus; si adsit, non est contemnendus, immo plurimi faciendus; nam mirum in modum ea, quæ ipsis nos peperimus, bona ornat ac perficit. Generis, inquam, claritas ejusmodi in eâ refulsit, ut familiæ nobilitatem antiquitatemque non a majoribus cujusvis dignitatis atque ordinis repperet, sed ab iis referret acceptam, quas regalis fastigii majestas a communi reliquorum hominum cœtu sejunxerat. Etenim ii, a quibus ea ortum duxit, insulæ Sardinie regnum obtinuerunt: tum, urbem Pisarum, ut tum erant tempora, opibus, viris, divitiis armisque florentem, dominatu regio, ut est in historiis, sibi subiectam habuerunt; multisque præterea, in Etruria præsertim, oppidis ac vicis imperarunt: ac proximis temporibus ipsa, cum summis Pont. quorum potestas proxime ad divinam accedit, ætissimo fuit cognationis nexu conjuncta; siquidem Leonis XII Pont. max. sororis filia fuit. Neque Florentiæ quisquam est veteris generosæque prosapiæ, qui non ad eam aliquo affinitatis vel cognationis jure pertineat. Virum habuit M. Antonium Ubaldinum, popularem suum, familiæ nobilitate cum primis, non lux solum civitatis, sed totius etiam Italiæ, quamquam opibus, non suo sed fortunæ vitio, haud ita magnis, sed, quod rem continet, moribus honestissimis sanctissimisque, ac fide, ut quisquam alius, optima. Quamvis hæc sanctitatis laus non tam ipsius propria, quam universæ familiæ esset. Etenim ex tribus fratribus, Hieronymus, jam Referendarius & Cancel-

la-

larie Apostolicæ Abbreviator, innocentia, doctrina, prudentia, cum ad amplissimam dignitatem properaret, in medio honorum spatio constitit, & cursum alio direxit; nempe in Societatem Jesu se contulit, ibique paupertatem divitiis, servitutem libertati (si servitus appellanda est, quæ Christo præstatur) humilem & abjectam vitam opibus & honoribus affluenti proposuit. Quoties ille, qui rheda vectus, circumpedibus stipatus, omnes Urbis vias circuibat, conspectus est in sordida ac lacera veste, humero ad saccum ire, atque a prætereuntibus stipem emendicare! Lælius vero, Franciscanæ familiæ, arctioris disciplinæ, se legibus addixerat: verum, Alesanio Cardin. Columnæ, ingenii præstantia, doctrinæ varietate, morumque elegantia, adeo conciliatus est, ut nemo illi carior existeret, adeo ut Sublaciæ Abbatiam, quam tum possidebat, Hugoni, M. Antonii, fratris illius, filio vœtigalem fecerit; ut nimirum, pensionis nomine, ducentena quotannis ex illius fructibus scuta perciperet. At M. Antonius, quamvis perfectioris vitæ cupidus, (ad illud enim vitæ genus natura ferebatur, ad quod reliquos fratres Spiritus sancti aura compulerat) tamen coactus est uxorem genere summo ducere, ac liberos procreare, in quibus familia, ad paucos redacta, propagaretur. Qua in re, Deus immortalis, quasi erga illum animo esset, ostendit. Nam eam illi mulierem, qua cum ætatem ageret, obtulit, quam nusquam gentium deductam fuisse quidam ajebat, hoc est, probam. Erat in Lucretia Gherardesca insignis quædam probitas ac modestia, quæ sæpe virtus abest ab iis, qui nobili genere nati sunt, plurimum; quibus commune illud nobilitatis vitium inest, contemtor nimirum animus & superbia. Eam enim ab aliarum mulierum similitudine, tum natura tum virtus abstraxerat. Non illa famulis superbe ac crudeliter imperare; non viri sui studiis adversari; non eum, prius quam galli cantent, a somno excitatum rogare, ut sibi aurum, gemmas, ac vestes coëmeret, quod bono ingenio se esse ornatam mallet quam auro multo; non illo, quæ rem familiarem indiligenter tutandò perditum iret, sed quæ conservaret; non multiloqua, oblatatrix, sumtuosa, sed quæ pauca

loqueretur, quæ humaniter cum suis ageret, quæ viro obsequeretur, quæ non majores faceret sumtus quam res ipsorum perpeti posset; denique, quæ non anxie, non turbate, sed ita placide totam domum administraret, ut vix intelligeres, id agere, cum ageret tamen. Cujus probitatis exsuperantia quanta esset, ex liberis, in quos illa redundabat, licet agnoscere; qui omnes fuerunt ejusmodi, ut, si tibi ejus rei optio data esset, nescires, cujus te potissimum esse similem velles. Nam primum Lælius, cum, Alexandro Card. Mediceo, majori avunculo, ad summum Pontificatum evecto, in spem magnam honorum ac divitiarum vocaretur, si ad id, unde ille status ostendebatur, vela dare voluisset, incredibili quadam animi magnitudine, luculenta illa velificatione relicta, ad inopem, humilem, & abjectam, Carmelitanæ familiæ, Fratrum discalceatorum vitam, qui tum, ut sunt rerum omnium initia, ad summam castitatis, animi demissionis, paupertatis, omniumque virtutum laudem efflorescebant, omnibus, ut ajunt, velis remisque contendit, atque ad ipsorum se numerum admittendum adscribendumque curavit. Qua in familia, cum, annis viginti & eo amplius, summa cum sanctitatis opinione, infirmissima semper valetudine, vitam egisset, denique, cum nullam ferme valetudinis suæ rationem haberet, cum vigiliis, jejuniis, precibus, aliisque pœnis ultro susceptis, in se nimium sæviret, est mortuus. Robertus vero, singulari vir ingenio, eruditione, eloquentia, judicio, primum a Paulo V, qui hominis erat indolem odoratus, cubiculi sui Præfectus est creatus; tum ad Henricum IV Galliarum Regem Nuncius missus; postremo, cum munus illud, per annos novem, fideliter administrasset, in Cardinalium collegium cooptatus: eoque mortuo, Gregorius XV, cui, ad Pontificatum max. adipiscendum, ejus opera maxime opportuna fuerat, Bononiensem illi legationem detulit: quo munere egregie functus, Romam rediit, ibique, cum ad summam amplitudinem properasset, est calculi morbo consumtus. Octavianus autem, equitum levis armaturæ, qui Pontificis regiam tuentur, præfectus, cum familiæ propagandæ partes suscepisset, sceminam primariam, Mariam Isabel-

bellam Accorambonam, summa cum dote, uxorem accepit; a cujus amplexu, cum nullam ex se prolem reliquisset, est immatura morte diremtus. Denique Hugo, cum etiam nunc vivat, ad extremum reservatus, quadragiuta annis, Basilicæ Apostolorum principis Canonicus, ac nunc etiam ejusdem Decanus, adeo assiduam ac diligentem operam navat, ut sit omnibus exemplo, quibus morati esse moribus debeant ii, qui in sortem Domini sunt vocati; tum jam inde ab ineunte ætate, eam in opinione hominum, adeptus laudem sanctitatis, ut, quemadmodum olim Athenis Aristides ac Phocion, justus ac boni cognominibus appelletur: nec mirum; in ea domo ortus erat, unde vitia omnia exulabant, ubique, ut de Appii cæci domo narratur, vigeat mos patrius & disciplina. Eratigitur in Lucretia, ejus matre, summa probitas, erat incredibilis magnitudo animi & constantia; quæ pluribus in rebus adversis, quibus conflictata est, ita eluxit, ut vix paucos, tum ex veteri tum ex recenti memoria, referre possimus, sive virilis sexus sint sive muliebris, qui cum ea conferri æquarique posse videantur. Cujus rei, ne defatigemus lectorem, unum aut alterum exemplum proferemus. Primum, Leonis XI Pont. max. avunculi sui, a quo illa mirifice diligebatur, & apud quem, si diuturnior illi lucis usura contigisset, plurimum auctoritate & gratia præstitisset, ita celerem e vita discessum tulit, ut vix aliquod commoti animi signum ostenderit; ita in morte trium liberorum se gessit, ut proxime ad illam indolentiam accessisse visa sit, quam Stoici in sapiente requirunt. At quorum liberorum? nempe eorum, quibus, si ipsa fingere voluisset, neque meliores neque præstantiores consequi potuisset. Etenim neque gemitus, neque, ut mos est mulierum, ejulatus edidit, neque aliquam vocem, sapientis gravitate indignam, emisit. Prudentia fuit tanta, quantam capere muliebris animus potest. Fulgebant quidem in ea ingenii, nec absurdi nec inelegantis, igniculi, & quædam, non sine æuleo, in respondendo celeritas. Nam cum, Leone XI Pont. max. creato, omnium fere ad eam gratulandi causa concursus fierent, venit ob eandem causam vir quidam in primis nobilis ac dives, qui

can

eam antea non agnoverat, sed tum fatebatur, se arctā ipsam cognatione contingere. At illa: Plurimum me æquum est debere avunculi mei Pontificatui, qui cognationes, oblivionis tenebris additas, aperit, & in lucem profert; i igitur, & si quid mea tibi opera prodesse poterit, utere, ut tua. Nihil ejus ex ore exibat, nisi accuratum ac prudens, nihil nisi honestum atque exactissima disciplina; nullum ex ea factum prodibat, quod magnopere reprehenderet, vel quod saltem muliebris ingenii imbecillitatis excusatione defenderes, aut vetus illud de ea proverbium usurpares: Mulier est. Nihil poterat in ejus moribus deprehendi, siue staret siue incederet, siue ad mensam sederet, siue sola siue cum alio esset, quod non eam maxime deceret, quod non cum ejus generis nobilitate, qua præstabat, & cum ea probitatis opinione, quæ de ipsa erat, mire congrueret. Memoria erat tanta, ut totum fere Petrarcham & Dantem, quos illa poëtas ab ineunte ætate didicerat, ita memoria comprehensos haberet, ut decrepita jam ætate, mihi, cui ob arctam, cum Hugone ejus filio familiaritatem sæpe ad eam aditus patebat, plurimos ex illorum carminibus versus, nihil hæsitans, recitaret. Maximo legendi studio flagrabat; sed cum illis præsertim libris sibi res erat, cum iis se oblectabat, quorum lectione se vehementius ad amorem in Deum inflammari, & ad pietatis opera impelli sentiret. Vixit usque ad extremam senectutem. Nam ad septimum & octuagesimum pervenit annum. Sed, quamvis ætate confecta, nunquam tamen minus animo valuit. Verum semper mente integra fuit. Magnam ejus mortis causam sustinuit ædium mutatio. Nam cum ex ædibus, neque ita lucidis neque ita aëri expositis, in alias, soli aërique apertissimas, comneasset, &, qua erat in rebus familiaribus solertia ac diligentia, majorem, quam illa ætas posceret, sollicitudinem ad veteres ædes exhauriendas, ac novas instruendas & exornandas afferret, insuper operis vehementius instaret, morbum contraxit, eidemque cum plures dies restitisset, tandem superior esse non potuit, sed necesse fuit cedere. Animam agentis Aloysius Card. Capponius, Ravennæ Archiepiscopus, affuit, eidemque, ex-

tremo illo tempore, omnibus officiis pietatis caritatisque non defuit.

LXVIII. TERESA COMITISSA EX PERSIA.

PAulo ante, in exprimendis nonnullarum nobilissimarum mulierum formis, quas nobis Italici cæli felicitas dedit, nostra defudavit industria; in quibus quam maxime ad similitudinem veri delineandis quamquam tantum studii posuerimus, quantum ingenii vires nostri tulerunt, non tamen id, quod voluimus, nos affectos esse confidimus; maior enim est earum dignitas pulcritudoque formarum, quam ut eam cujusquam scribentis facultas possit comprehendere; nam, quidquid dixerit, minus erit. Nunc vicissim meam ad se operam attrahit alia, quam, rerum gestarum gloria clarissimam, remotissimæ orbis terræ regiones pepererunt, jam verò Urbs Roma possidet; quo, quidquid est ubique locorum in suo genere summum ac singulare, confluere solet. Hanc Persarum natio, vel potius Catai regio penitissima, genuit. Quam formæ dignitas, parentum splendor, viri, cui erat in matrimonio conjuncta, nobilitas, regale genus, perpetua, pro Christo, mortis contentio; immortalitati commendat; tum, magnus animus, nullisque adversis rebus infractus, ad superos effert. Hæc, Teresa nomine, patrem habuit, lingua eorum Samphut nomine, nostra Samsonem, superioris Catai partis Principem, religione Christianum. Quam, etiam tum quadrimam, amita, quæ Regi Persarum in matrimonium collocanda erat, comitem secum duxit in Persiam, atque in Regis ejusdem aula, annos quatuordecim, in filix loco detinuit, tum omnibus iis artibus erudiendam curavit, quæ in regiam virginem conveniunt; in quibus nihil illa fuit excellentius, nec magis omnibus, quæ una essent ætate, generosa progenie ac formæ bono præstitit, quam ingenii docilitate, amœnitate, & ad omnes res optimas aptitudine; liberalis, splendida, affabilis, blanda, omnium in se studia conciliabat: verum annos quatuordecim natam duxit eam uxorem domum Com-

mes Robertus Sirlæus Anglus Catholicus, Regi in primis carus, adeo, ut per illum legationes omnes, quæ essent illustriores, administrarentur; nempe ad summos Pont. Paulum V, Gregorium XV, ad Cæsarem Augustum, ad Reges Galliæ, Hispaniæ, Angliæ, omnesque alios Asiæ Europæque Principes summos. Quas ille fideliter obeundo, fiebat, ut magnam Regis benevolentiam consequeretur. Sed in illis omnibus legationibus suo semper lateri hærentem habuit uxorem. Nec minimum ex ea commodum cepit. Etenim, in multis ac maximis, quibus conflictatus est, morbis, aliisque vitæ periculis, plurimum ejus sibi esse operam, sensit, tum præsertim, cum in varias orbis terræ regiones, moribus ac linguis inter se dissidentes, ingrederetur. Nam, præter sermonem regionis, in qua illa nata erat, alias complures linguas noverat, Persicam, Indicam, Turcicam, Moscoviticam, Polonam, Anglicam, Hispanicam, Gallicam, Italicam. Unde vir, ipsa præsentē, a nemine circumveniri ac decipi, propter linguarum inscitiam, poterat. Sæpe etiam uanu ex inimicorum insidiis, in quas devenerat, illum eripuit. Cujus egregia virilis animi audaciæque facinora multa enumerantur; sed duo illa majorem mihi admirationem & laudem habere videntur. Primum, cum virum, inimicorum armis circumventum, &, comitibus ejus interfectis, in potestatem illorum redactum, vindicavit in libertatem. Namque, in medios illos irruens, ac fortiter diuicans, virum, quem vincunt secum ducebant, dimittere, suæque eos vitæ timere coëgit. Deinde, cum in magni Mogoris regno, Amazonia, securi in manus sumpta, ac sex famulis comitata, eorum, qui cum ignibus manu elaboratis venerant, ut virum domi suæ vivum comburerent, conatus repressit, audaciam fregit, impetumque cohibuit, quorum alios vita privavit, alios, vulneribus affectos, in fugam avertit. Sed, quoniam Regum in aulis, magnum sæpe aulicorum odium in se convertunt ii, quos illi pluris a Regibus, quam ipsos, fieri vident, ideo omnes, quibus molestum erat, Comitem Robertum tanta apud Regem auctoritate & gratia florere, ad illum opprimendum consenserunt, atque, cum ipsum non possent, uxorem

capitis arceſſerunt; quod, Mahometi transfuga, in Chriſtianorum caſtra ſe contuliſſet. Non enim illam eam eſſe aiebant, quæ olim Comiti Roberto nuptui data fuiſſet, ſed Mahometanam quandam, quæ, veteri religione relictâ, per ſummum nefas, Chriſtianorum baptiſmatis fonti caput ſuum polluendum contaminandumque tradidiſſet. Et ad hunc finem, pecunia corrupendum quendam ſuſceperunt, quem tum Rex maxime diligebat. Quamobrem, ut Mahometi ſunt leges, Regis ſententia fuit, ut, niſi infecta factaſeciſſet, & cum Mahometo rediiſſet in gratiam, ignibus tradita, vitam incendio finiret. Quod ubi ad Comitis Roberti aures peruenit, vix abſuit, quin ex ægritudine animam amitteret. Sed tacitus rem intra ſe coluſſebat. Verum, cum dolorem animi, oculis vultuque, præſerret, mulier, ejus rei ignara, rogavit, quidnam eſſet, cur tam ab eo omnis hilaritudo abhorreret. Quia, inquit, tibi eſſe pereundum, video, niſi Chriſtum deſeras, & ad Mahometum tranſeas; ac vereor, ut contra adverſariorum tuorum vim ſatis firmo eſſe animo poſſis. Cui illa: Iſtudne tibi ita ægre eſt? ait; omitte vero ſolicitudinem iſtam, quæ ita te macerat, & priſtinam hilaritatem ſume; nam tibi exploratum ſit velim, me millies ante vitam meam prodituram, quam Chriſti fidem. Atque hoc loco non eſt prætermittenda Regis gravitas, qui, ne temere cuivis credidiſſe videretur, mandat eunucho cuidam ſuo, ut in mulieris domum ſe conferat, rem totam diligenter inveſtiget atque cognoscat, &, inqueſitam exploratamque, ſibi denunciet. Eunuchus, Regis imperium exequens, abit, domum mulieris intrat, cauſam, cur venerit, narrat. Illa, nihil exterrita, ſed, aurea veſte & gemmis, quibus abundabat, induta, (ſtatuerat enim, eo ornatu ad mortis ſupplicium, tanquam ad epulas, ire :) Ecce! me, ait, vide, percontare, ut lubet; vera ex me audies. At eunuchus, cum in omnes ejus corporis partes aciem intendiſſet, ſtatim, eam eſſe quæ erat, agnovit, & amantiſſimis verbis proſecutus, bono eſſe animo juſſit, omnemque ab eo ſolicitudinem, id quod minime erat opus, ejicere; nam nullam antea in ſe admiſerat. Tum recta eſt proſectus ad Regem, eique fideliter, quem-

ad.

admodum se res haberet, exposuit. Sed neque Rex ejus quidem indicio est impulsus, ut crederet, rem ita esse ut ille narrabat; voluit suis magis oculis atque auribus, quam alienis, fidem habere. Quod si semper viri principes facerent, vel saltem simularent se facere. Non tam iniqua sæpenumero a suis magistratibus judicia fierent. Eam igitur Rex imperavit ad se adduci; quam, perinde ut eunuchus fecerat, simul aspexit & agnovit, ac primum humanissime complexus est; tum ad colloquium admisit, ac varios cum ea sermones, Italix præsertim de rebus, instituit; deinde rogavit, quidnam vir suus commeruisset, cur in maximum quorundam odium perveniret. Quæ respondit, non posse sibi persuaderi, virum suum cuiquam mortalium odio esse; sed magis verisimile fieri, id omnium cum amore benevolentiaque versari. Cur igitur, Rex ait, tam multi capitali eum odio prosequuntur? cur tantopere extinctum esse cupiunt? Cui: id mihi ignotum est, inquit, sed posse fieri arbitror, ut meo, quod quæris, compertum sit viro. Tum Rex admiratus est mulieris ingenium, ad mansuetudinem & ad omnes bonas artes rectum, iisque etiam æquum, quorum crudelitas ejus sanguine expleri vix poterat. Et conversus ad Reginam, vide, inquit, obsecro, sanctos & probos horum hominum (Christianos intelligens) mores; contra, improbos immanesque illorum (Mahometanos significans) animos. Eademque opera, ad quandam regie domus fenestram, illam adduxit, ac digito demonstravit ingentem lignorum struem, in medio foro constructam; atque: Hic tibi rogius parabatur, ait, si a Mahomete, ut adversarii calumniabantur tui, defecisses, neque, facti pœnitens, ad ejus cultum revertisses. Cui illa: Si mea tibi, dixit, cordi mors est, jube me quam primum ad illam adduci, nihil homini poterit gratus accidere. Contra Rex: Cave, inquit, istuc dixeris; nam, si id, quod conatus fueram, perfecissem, in quor me scelera ingurgitasset? primum insignitam, atque adeo immortalem patri tuo, viro Principi, injuriam & contumeliam imposuissem; qui, tam multis in bellis, magna mihi auxilia, nullo meo sumtu, suppeditavit; tum pelli nam Comiti Roberto, viro tuo,

de

de me optime merito, gratiam retulifsem, cujus operam, multis gratissimis difficillimisque in rebus, sum opportunam atque fidelem expertus; postremo, quod magis æstimari debet, contra jus æquitatemque fecissem, si mulierem innocentem, ignis supplicio mactari iussissem. Verum ego centum antea viros internecioni dedere, quam mulierem unam, eamque innoxiam, occidi mandabo. Ac, ne longum faciam, Regis sententia judicatum est, non videri Mahometis legibus fraudem aliquam fecisse eam, quæ, statim ut nata esset, Christianis sacris fuisset imbuta. Qua sententia adeo percussa est Mahometanæ superstitionis ministrorum immanitas, ut magnam in populo seditionem excitaverit, adeo ut Regi fuerit necesse, quoad illa quiesceret, Terefam, tuto in loco constructam atque reconditam, concitatæ multitudinis furori surripere; ipse autem, suæ salutis metuens, per quindecim dies, non sit ausus in publicum prodire, ac vulgo se credere. Hac igitur seditione sedata, & a Rege sententia, secundum ipsam, dicta, non illa propterea omnibus periculis perfuncta est; sed cum adversa fortuna acrius vehementiusque conflictavit. Primum, eodem fere tempore, gravem in morbum incidit; quo ægrotavit vir etiam suus. Sed ille ejus viam morbi ferre non potuit; verum ipsa convaluit, ac virum, Aspani, ubi tum Rex agebat, in Æde Fratrum Discalceatorum sepeliendum curavit. Deinde, vix quatuor, ab ejus excessu, menses intercesserant, cum Sciabar Rex diem obiit supremum. Hæc illi mors initium eorum malorum attulit, quæ postea sunt consecuta. Etenim, tanto præsidio, tanquam armis, exuta, continuo, adversariorum furori, qui Regis metu paululum repressus fuerat, patuit. Quamobrem illi, publicatis ejus bonis, mulieris sibi potestatem fieri postulabant, ut de ea, ipsorum moribus, supplicium sumerent, quod a Mahomete defecisset. Quamobrem Fratres Discalceati, de quibus diximus, quorum consiliis omnes ejus vitæ rationes regebantur, erant illi auctores, quo se ab adversariorum oculis, quantum potest, removeret, ut Regnum illud relinqueret, atque alias regiones, alias gentes, persequeretur. Sed, quoniam Regni illius legibus cautum erat, nec quisquam auderet

pedem ab eo foras efferre, nisi per literas publicas facta ab iis potestate, qui summum imperium omnium Regni civitatum tenerent, impetrarunt a Duce Scirach, cuius nutu omnia administrabantur, ut tuto eidem liceret abire, si vellet. Sed interea, dum literæ conscribuntur obliquanturque, adversarii, multo quam antea ferociores, adsunt, instant, urgent, ut ea quam primum igni tradatur; neque enim fas esse, ajebant, ex ipsorum manibus impune evolare eam, quæ, Mahomete relicto, ad ejus se hostes contulisset. Quorum importunis clamoribus Dux ille compulsus, non potuit recusare, quin rem illam in judicium disceptationemque deduceret. Itaque causæ cognitionem demandavit judici cuidam, qui mulieris bonis jam diu inhiaverat, eaque, spe & cogitatione, devoraverat. Qui continuo, de sacerdotum consilio, scripsit illi dicam, qua denunciabat, ut in æde Mahometana, quam sua lingua Moscheam vocant, vitæ rationem suæ redditura, se sisteret. At illa, verens, ne, si pedem intro in sacrilegum illud sanum intulisset, animum inde contaminatum ac pollutum referret, primo, ne iret, excusavit valetudinem, qua tum minus prospere utebatur; neque enim, infirmis præsertim viribus, posse se tantum iter pedibus conficere; deinde opere cum maximo rogavit, ne gravaretur, ad Ædem Fratrum Discalceatorum accedere; ibi se esse paratam, ad ea omnia respondere, quæ causam illam crimenque conflarent, ac facere illi satis. Ad id postulatum noluit ille descendere, quod, non convenire, ajebat, Mahometi sacrorum antistites, ejus Ædis limen attingere, ubi statuis & imaginibus divinus honor haberetur. Ac, ne longum faciam, post multas contentiones disceptationesque, tum mulier tum judex in eo manserunt, ut de tota ea re, in ædibus viri cujusdam apprimè nobilis, judicaretur; qui vir summo erat Scirach amore conjunctus, & Discalceatis Fratribus amicissimus. Ad constitutum igitur tempus ad diem adsunt, tum quæstor tum mulier. Sed mulieri venerunt auxilio Fratres Discalceati, ut fortasse accusatorum insidiis circumventæ opem afferrent, aut, ex metu titubanti, subvenirent, aut ex pugna debilitatæ animos adderent. Sed nihil fuit opus his rebus. Nam animo imper-

ter-

territo, liberrime, apud judicem eosque, a quibus impugnabatur, est professâ, se esse Christianam, ac millies antea, si res ita posceret, per summos cruciatus vitam amissuram, quam turpiter a Christo discederet, cui se ab ineunte ætate mancipasset, & in quo omnes suos amores, omnes salutis suæ spes, omnes cogitationes, fixas ac locatas haberet. Isque, a quibus luculenta quædam conditio offerebatur, si sententia desisteret ac fieret ipsis obnoxia, (is enim, cujus illi nuptias pollicebantur, erat vir quidam princeps, summis opibus, divitiis, & honoribus præditus,) respondit, ut sua sibi connubia, suas sibi opes, suas sibi divitias, suos sibi honores haberent; non enim habere orbem terrarum auri & argenti & honorum satis, pro quibus datam Christo suo fidem falleret, præ cuius amplitudine atque divitiis, quicumque ubique sunt Reges, quicumque, si vera est fama, aureos incolunt montes, nihil sint, nisi hominum mendicabula, atque quisquiliz. Itaque cum eam non possent promissis de sententia depellere, conati sunt minis perterrefacere; ac: Nisi, ajunt, properes in Mahometis, unde discesseris, castra redire, scias, acerbissimam tibi subeundam esse mortem in mundo. Has illa minas irrisione, quemadmodum dignæ erant, excepit; ac: Tantone, inquit, odio sum vobis? quæso, isthæc iis minitemini, qui rebus illis ducuntur, quibus a vobis primæ deferuntur, ut, honoribus, divitiis, voluptatibus: mihi si mors accidat, quæ vobis summum omnium malorum videtur esse, læta illi atque gratias agens occurram, quod, ejus opera, levata corporis vinculis, liberum in cælum cursum arripiam. Tanta hæc mulieris in retinenda fide constantia, barbaros illos ad ingentem admirationem extulit, atque ipsorum lingua, *Tattzin*, dixerunt, hoc est, mulierem fortem; quam, Sapiens, tanquam raram avem, esse inventu difficilem, ait. Postremo, eo res rediit, ut judex quæstionis abiens, domino domus imperaret, ne abire eam sineret, sed omnibus custodiis subjectam haberet, neve antea quotidiano cibo reficeret, quam ab ipso fieret ejus rei potestas. At ille, nihil ejus imperata faciens, mulierem, domum suam abire permisit; quo, sudoris plena, pervenit, ex sermonis, cum Ju-

dice & accusatoribus habiti, contentione, & ex itineris labore contracti; ex quo, ne cohorreret, multis precibus rogata est a familiaribus, ut mundam siccamque subuculam illa, quam gerebat, sordida madidaque ex sudore, mutaret. Quod primo recusavit facere; sed serio admonita, quid periculi res haberet, si subito horrore artus rigere cepissent, tandem se exorari passa est. Rem miram; dum vestem exuit, theca, in qua multæ sanctorum virorum reliquæ, & in his particula cordis S. Tereſæ, inclusa continebatur, quamque perpetuo suo appensam collo gestabat, conspecta est a mulieribus, quibus servandam eam dederat, multis conspersa sanguinis guttis. Quod primo neglexit, existimans, eas, ex aliquo vulnere, corpori hærente, manasse; sed, cum postea totum corpus diligenter investigaret atque perquireret, neque ullum in eo vulnus deprehenderet cui inederetur, percussit illico animum, ac tam eas esse Dæmonis technas, ad se decipiendam instructas, existimavit, quam se vivere. Qua suspitione vehementer offensa, accersiri iussit Fratres Discalceatos, quibus vitæ suæ gerendæ moderandæque quasi habenas tradidisset. Qui, non de nihilo illud esse putantes, quod mulier ipsos esse conventos expeteret, properarunt progredi; ac causam celeritatis, qua accersebantur, edocti, sumunt thecam in manus, aspiciunt, contemplantur, ac vident, particulæ illi cordis S. Tereſæ septem vulnera inesse, quæ sanguinem mitterent; &, quamvis essent exigua, visum tamen intuentis admitterent, nec ullum dubitandi vel inficiandi locum relinquerent. Quo aspectu, voluptate illi, quantum animo maximam capere poterant, sunt affecti. Nihil enim aliud cruor ille significare videbatur, nisi, sanctissimam illam Virginem voluisse suum pro illa sanguinem fundere. Atque, post hanc rem tam novam, tam admirabilem, tam incredibilem, aliquot illi dies contigerunt ab insidiis & insectationibus Christi hostium, vacui. Quibus elapsis, die quodam, Ædem Fratrum Discalceatorum, quo illa, ut sacro Missæ Sacrificio interesset, sese contulerat, magna armatorum manu, illi iidem, qui antea, ministri circumdant atque obsident, &, ex Ducis edicto, Fratribus pœnam capitis enunciant,

ant, nisi mulierem statim exhibeant. Illi, pro temporis ratione, capiunt consilium, ut eam furtim in templum Fratrum Augustinianorum traducant, ut, cum ibi totum illum diem delituisset, postea, vesperscente celo, in quandam sacrarum Deo Virginum Armenarum domum, quæ, ab Urbe Asporn, mille nec eo amplius passibus abest, immitterent. Quod factum ab illis est: eaque, dies aliquot, intra ejus domus claustra se in occulto continuit. Interea ministri, ubi, se duci & a Fratribus haberi ludibrio, vident, neque mulierem tradi, multa in eos maledicta ingerunt, calcibus & pugnis incurfant, hisque contusos, ac dedecoris ignominiaque plenos, in Ducis domum attrahunt, & quoddam in stabulum, mox ad supplicium abripiendos, includunt. Quod illi supplicium, ingentis cujusdam beneficii loco, numerabant: magna enim eos spes ceperat, fore, ut eo ipso die, Christi in cælum ascensionis memorie sacro atque solemni, e corporis custodia emissi, una cum illo evolarent ad superos. Itaque ingens eos alacritas & fiducia incendit, ad mortem pro Christo subeundam. Cujus tam insignis iniquitatis nuncius, simul ac mulieris aures tetigit, & quo in loco, fratrum suorum res esset, accepit, magis de illorum periculo quam de sua ipsius salute, sollicita, nullum ad celeritatem locum esse relinquendum statuit; ac misit, qui adversariis suis nunciaret, ubi ipsa parvo labore ac nullo errore inveniretur. Qui non dimittunt tempus, sed furtis, quibus agitabantur, impulsu, accurrunt, comprehendunt, obtorto collo in jus rapiunt, attrahunt, bacillis, quos in manibus gestabant, verberant, ibique, ubi sacrilegi illi Mahometis ministri aderant, sistunt: in quorum conspectu assistebant etiam Fratres illi male mulctati. Qui ministri, magna verborum contumelia, quærun ex ea, num redire ad officium velit, ac Mahometo, sicut antea fecerat, adhærescere? quod si pertinaciter in sententia maneat, in qua adhuc fuerat, conceptis verbis per Regis salutem vitamque jurant, nunquam ipsam vivam suis e manibus elapsuram. Quæ cum illi maxime loquerentur, Fratres illi, qui aderant, nutu, oculis, voce, mulieri innuebant, ac significabant, ne, terrore mortis, se abripi sineret, neve brevem ac

miseram vitam æternæ, ac bonis omnibus cumulatz, præponeret. Sed calcaria currenti addebant, ut dicitur. Nam summa cum libertate respondit, nunquam se fore tam stultam, ut veram ac germanam Christianorum fidem, pro nefaria illorum superstitione, desereret, ut Christum, quem diligeret, pro Mahomete, quem diris omnibus execraretur, omitteret. At illi, existimantes, tantam illi fiduciam atque animos ex Fratrum illorum præsentia & cohortationibus addi, eos inde ejici & in carcerem condi imperarunt; tum mulieri, minaci sane vultu: Vide, ajunt; aut tibi de pertinacia ista decedendum est, aut, altissima de turri dejectæ, ignis supplicium subeundum. Quibus illa, hilariori, quam antea, vultu: Agite, inquit, ut lubet; mihi certum est, mori pro Christo. Sed, dum maxime altercantur, ecce nuncius venit a Duce, ut judicio illi diem differrent, verum a muliere caverent, se postridie ad judicium affaturam. Parent illi; mulier dimittitur. Sed, nescio quid, accidit, cur causa non potuerit agi eo die, in quem fuerat rejecta. Itaque mulieri, tot laboribus æruinisque defatigatz, placuit ea ratio, ut tum Reginam tum Ducem per epistolam adiret, in qua exponeret, quænam esset, unde domo, quibus parentibus orta, ut septuennis, una cum amita, in Regis aulam venisset, ut usque ad decimum quartum annum in ea, regio plane cultu, educata, Rege ita jubente, Comiti Roberto nupsisset, ut, inimicorum calumnia, falso, religionis causa, in judicium capitis vocata fuisset, & quartum jam mensem iniquissimo judicio conflictaretur, neque adhuc aliquis esset miseriarum exitus. Itaque demisse humiliterque orabat, ut tandem aliquando ejus controversiæ finis imponeretur; se enim esse paratam, quodlibet judicium, quamvis iniquissimum, subire, quodcumque supplicium, quamvis atrocissimum, ferre, quamcumque mortem, quamvis acerbissimam, obire; minus enim molestam sibi fore mortem, quæ cuncta mortalium mala dissolvit, quam mortis dilationem ac moram. His literis lectis, percussit illico Ducis animum, Comitis Roberti memoria, quo fuerat usus familiarissime, cujusque nuptias suæ præsentia cohonestaverat. Scripsitque statim judicibus il-

illis, ut eam e reis eximerent, neque deinceps; ob causam religionis, aliqua molestia afficerent; etenim satis sibi constare, nihil illi unquam cum Mahomete convensisse; statim ut nata esset, Christianam ac Catholicam fidem una cum nutricia lacte suxisse. Ergo, Ducis sententia, absoluta, secum ipsa reputans, quanta esset in barbaris illis, qui negotium ipsi facerent, iniquitas atque perfidia, statuit, ex Christi sententia, exilium domo illa mutare, atque alias urbes petere. Sed, cum senatum cogitationum suarum advocasset, ut deliberaret, quamnam potissimum urbem caperet, Urbs illi Roma occurrit, ubi olim, Regis Persarum oratoris uxor, honorificentissime fuisset excepta; eaque in primis placuit; ac Fratribus Discalceatis ad id operam dantibus, mense Septembri anni celsi LXXIX, e Persia solvit, ac Constantinopolim delata est. Ubi, navium, quibus vereretur, inopia, fuit illi necesse, integrum triennium commorari. Sed demum navigandi facultatem adepta, primum in Italiam, postremo Romam, mense Decembri exeunte, diei Joannis Evangelistæ sacro, pervenit.

LXIX. VINCIOLUS VINCIOLUS.

INter eas res, quas, utpote nobilissimas ac præstantissimas, maximis difficultatibus natura munivit ac sepsit, & ad quas perveniendi non facilis cuiusvis aditus pateat, eam in primis numerandam existimo, quam qui obtineat, Regum ac Principum virorum studium, amorem, benevolentiamque, sibi conciliet, totosque suos efficiat. Adeo ut, cum dicit Horatius, principibus placuisse viris, non in minimis neque in postremis laudibus esse ponendum, non satis ille pro rei magnitudine elocutus esse videatur. Multo enim melius, & ad rei veritatem aptius, scriptum reliquisset, si illud in primis collocasset, quæ omnium admiratione & laude feruntur in cælum. Neque me præterit, non omnes ad Regum ac principum virorum benevolentiam aditus esse arduos atque difficiles; nam plures ad eam patent, multorumque contritæ itineribus, viz, quas nimirum Balliones, Phormiones, ac Gnathones aperuerunt, quibusque ad

principum virorum gratiam promerendam itur; videlicet, scorta illis adducendo, vel, causa vescendi, exquiritas terra marique epulas afferendo, ac nova condimenta, quibus condiant, inveniendō; vel animum inducendō, omnia illis assentari, &c., quemadmodum ait ille apud Terentium, quidquid illi affirmaverint, affirmare, & id rursus, si negaverint, negare. Verum, quia isti eorum, quos se simulant diligere, cupiditatibus tantum serviunt, famam autem & existimationem perditum cunt, non vera sed falsa ad illorum amorem ac benevolentiam via grassantur. Itaque, quidquid illud est, quod in eorum amicitia sunt adepti, non potest esse diuturnum; immo, cum maxime illorum amoris culmen tenere se putant, præcipiti ab eodem ruina devolvuntur. Nulla enim est capitalior amicitie pestis, quam voluptas. Atque, si velinus replicare memoriam temporum, inveniemus, eos omnes, qui, his artibus, Regum & Imperatorum animos, nempe voluptatum illecebris, tanquam homo pisces, essent conati decipere, cum primo id illis artificium visum esset in bonum exisse, demum omnes, sceleratos atque infelices exitus habuisse. Ille stabilis ac firmus est amor, qui virtutis radicibus nititur atque fundatur; illa vera est benevolentia, quam nulla nobis intercipere calamitas possit; quam optimarum voluntatum studiorumque similitudo conjunxit. Cujusmodi ille amor fuit, qui Vinciolum Vinciolum Clementi VIII, optimo sanctissimoque Pontifici, perpetuo & indissolubili nexu devinxit. Fuit ille Perusii, nobili inter suos loco, natus; atque cum ceteris naturæ bonis præcipuam habuit laudem amplissimæ pulcherrimæque corporis formæ; quam etiam gratiorem reddebant suavissimi mores, ingenua indoles, atque admirabilis ad res omnes venustas ac lepos; quibus rebus assequabatur, ut longe omnium aulicorum carissimus esset Clementi VIII. neque, negotii odium cum illum ceperat, quemquam libentius advocabat, cui res suas rerumque suarum consilia impertiret, quam illum, vel, ut Ennius inquit apud Aulum Gellium,

*Cui res audacter magnas parvasque, jocumque,
Floqueret, qua tincta malis, seu qua bona distinx,
Evomeret, si quid velles, tutoque locaret;*

neque majus loquendi, quæ vellet, libertatis jus alteri tribuebat, quam illi. Quod jus, quæ erat hominis dexteritas atque prudentia, ita usurpabat, ut, quæ loqui quæque tacere ipsum oporteret, optime nosset. Non enim linguæ frena laxabat, sed etiam intra parsimoniam opportunitatemque loquendi cohibebat, neque longius progredi sinebat, quam suæ conditionis modulus, ejusque, quicum illi erat sermo, tanto intervallo, fortuna ac dignitate superioris, majestas pateretur; demum, ut idem ait Ennius,

Scitusque, beatus,

secunda loquens in tempore,

& verborum vir paucorum; nisi si quando illius jussio imperiumque pluribus cum verbis cogeret uti. Quod tum plerumque fiebat, cum sapiens ille Pontifex, ad minuendas molestias, quibus referta est principum virorum vita, vel ad expuendam quampiam ex animo miseriam, ab ejus sermonis suavitate auxilium expeteret. Quid mirum est igitur, si iis, quæ diximus, officiorum, inferioris erga superiorem amici, quasi præceptis obtemperans, nunquam de eo, in quem ascenderat, amoris gratiæque loco deciderit, sed in eodem perpetuo, usque ad Pontificis illius exitum vitæ, permanferit? Atque idemmet Vinciolus narrare solitus erat, eatenus Clementem, suam erga ipsum benevolentiam declarasse, ut ultro sit pollicitus, se in Cardinalium Comitibus rationem illius esse habiturum, ipsique amplissimum illum honorem ac muneris dignitatem delaturum. Addebatque, Pontificem in eo, quod promiserat, permanfurum fuisse, nisi Petrus Cardinalis Aldobrandinus, illius erga ipsum benevolentiz cursum inhibuisset, & ad alterum, cujus fautor in primis erat, contorfisset. Nam Cardinalis ille, qui ceteris potentia antecire, & futuri Pontificis electionem in sua potestate habere studebat, quo eam potentiam stabiliret atque fundaret, ex sua, quam ex Pontificis familia, Cardinales creari malebat. Ita enim eos sibi magis obnoxios fore existimabat, si tantum in se beneficium, ipsi potius quam Pontifici, retulissent acceptum. Itaque Erminium Valentem, qui erat ipsi, ni fallor, a secretis, Vinciolo anteferendum curavit. Qui

Vinciolus, non solum Pontificis, sed aulæ etiam, atque adeo populi totius, propensa in se studia ac voluntates habebat. Nam nemini, comitiis Cardinalium quibusdam a Clemente habitis, cum quidam, minus ad id munus apti, cooptati in illud Collegium esse viderentur, palam homines, Vinciolo factam injuriam, queri, quod fuisset prætermisus, iisque posthabitus, qui nullum ferre amplissimo illi ordini splendorem ac decus, sicut ipse facere potuisset, afferrent. Multæ erant in eo literæ, magna antiquitatis atque historiarum omnis ætatis notitia, juris civilis intelligentia, linguarum, Etruscæ præsertim, cognitio, in qua optimos versus faciebat, & multa etiam præclara carmina edidit. Denique, omnis ejus ambitionis labor, omnes spes aulæ, omnes conatus, huc denique reciderunt, ut, Clemente mortuo, Perusium corpus annis infirmum referret, unde ætate validum Romam detulerat, postremo ibidem illud, ab anima relictum, matris nostræ, hoc est, terræ, unde originem ducimus, gremio comprehendendum & in pulverem reducendum permetteret.

LXX. PETRUS MAGNUS.

PRæclarum ac felix in excogitando inveniendoque ingenium, prompta in iis, quæ a magistris traduntur, accipiendis alacritas atque celeritas, singularis, & cujusmodi in Themistocle fuisse narratur, in omnibus, quæ legeris quæque audieris, retinendis custodiendisque memoria, in admirabilibus, & in primis expetendis rebus jure ponuntur. Sed nisi præsto sit ratio atque judicium, quod, quemadmodum iis oporteat uti, præscribat, parum eos, a quibus possidentur, vel nihil propemodum adjuvant; perinde ut eum, cui sit ampla ac pretiosa suppellex, veste, tabulis, signis, auro, argento, atque omnibus magnificis rebus instructa atque referta, sed cum ita illis utendum, cum ædes exornandæ, nullus modus ac ratio ab eo adhibeatur, nihil eorum suo loco collocetur, sed dissipate atque confuse omnia constituentur, ut ubi, verbi gratia, tabulæ sint præfigendæ, ibi signa suspendantur, serica vestis, Attalica peristromata, multo

auro argentoque distincta, quibus parietes collucere deberent, humi sternantur, præterea, superflua ac non necessaria multa, vel plura relinquendis, tollenda, temere cogantur ac coacerventur; nam si quis in eam domum veniat, dominum quidem esse divitem fateatur, sed ignarum, quisnam esset rerum & ornamentorum, quibus polleret, usus, ac propterea, qui illorum potiretur, indignum. Possumus etiam eum, qui, cum magnam rerum atque verborum copiam, tanquam uno in loco, constructam habeat, nec valeat ex iis, cum est opus, tantum assumere, quantum sit necesse ad orationem vel carmen efficiendum, quod dictis hominibus atque prudentibus, quasi epulas, anteponat, sed omnia confusa ac perturbata afferat, tanta insolentia ac turba verborum, nihil ut sit primum, nihil ut postremum; possumus, inquam, eum esse illius similem dicere, qui domus penum habeat, omnibus rebus ornatum, quæ ad corporis victum fulturamque conducant, ut lardo, pernis, sumine, falsis muriaticis, ovis, caseo, oleis, allio, cæpis, saccaro, melle, aliisque, quæ in penum eorum conveniunt qui beati putantur: verum, cum praudium vel cœna sit cuiuspiam danda, non eo sit iudicio præditus, ut tantum ex eo penu promat, quantum neque desit neque superfit, vel ut ex iis obsomnia componat, quæ naturam & conditionem habent, ut possint simul apte eleganterque componi, sed inepte, & ad stomachum movendum idonee, lardum saccaro, falsa muriatica melle, atque ovis caseum, allia vel cæpas, confusas atque permixtas in mensam apportet. Nam, quid aliud hoc convivio assequetur, nisi, ut non minus ab eo is, qui futurus fuerat conviva, refugiat, quam olim sol, solitum, ab Atrei cœna, cursum, ne tantum facinus cerneret, revocasse narratur. Omnino iudicii magna vis est, superbissimumque fastidium. Quid enim est, quod acerrimo vir iudicio, minus velit audire vel legere, quam claudicantem ineptis orationem vel carmen? Traditum literis, legimus, Hortensio dicente, oratore quidem, vulgi iudicio, omnium maximo, cui dulces magis venustæque sententiæ quam interdum utiles necessariæque, clamores admirationesque faciebant; Philippum, magnum & ipsum orato-

rem,

rem, sed gravem & a deliciis illis, in quibus Hortensius excellabat, abhorrentem, solitum esse non solum cachinnos extollere, verum etiam stomacho & iracundia vehementer efferri. Sed quorsum hæc spectat, tam alte repetita, oratio? eo nimirum, ut laus illa optimi acerrimique iudicii, in qua Petrus Magnus fuit excellens, quanta sit, intelligatur. Qua laude omnibus suæ ætatis oratoribus ac poetis antecisse mihi videtur: Nihil in ejus scriptis ineptum, nihil insulsum, nihil puerile, nihil quod jure ob has causas reprehendere possis, invenias; in orationibus præsertim, ubi in prius iudicii lex valet, in quibus ea tantum atque in opportunis illarum partibus collocata cernuntur, quæ proficere ac valere plurimum possint, reliqua, in quibus minus firmitatis sit atque præsidii, repudiata atque rejecta. In versibus autem qui cultus, qui candor, quæ suavitas, quæ amœnitas inest! ita sunt nitidi, puri, atque perspicui, ut nihil humile, nihil vulgare, nihil obscurum, nihil abjectum, præ se ferant; ita alti, exaggerati, sublimes, ut nihil turbidum, nihil tumidum inflatumque contineant; ut, qui eos legant, satis mirari non possint: ut olim contigit mihi, cum primum Balneariam veni. Nam, cum in porticu amœnissima earum ædium, quæ hortis illis proximæ, quondam a Card. Gambara, regali magnificentia, ædificatæ visuntur, confedissem, corpi me hac illac convertere, ac perlustrare oculis villas summorum virorum atque omni dignitate principum, ibidem pictas, nempe Tiburtinas Estensium, &, quæ in Cimini monte renidet, Farnesiorum, ac Balnearienses, ubi tum aderam: quarum singulis sui erant versus subiecti, quibus earum amœnitas amplitudoque commendabatur. Cum igitur hos primum legerem versus, qui Tiburtinæ villæ commendationem habent,

Tybur, & Albunea nemus, & vernantia rivis

Compita, & effosso qua fluit unda lacu,

Regis opus, regumque animos æquantis & ausa

Hippolyti, veterum deliciaque Ducum;

incredibili admiratione affectus constitui; tum reliquos sum persecutus. Quibus perlectis, adeo obstupui, adeo, eos sæpius legendo, expleri satiarique non potui, ut
et-

etiam ediscerem, atque incredibili cupiditate arderem, ejus ut nomen agnoscerem, unde tam liquida, tam dulcis, tam profluens vena manaret. Ac statim omnium mihi veniebat in mentem, qui tum, cum ædes illæ excitabantur, præ ceteris, ingenii & eruditionis fama valebant: ac præsertim subibat animum Muretus; sed qui ejus omnem scribendi rationem pulcre nossem, statim judicium meum contemsi: sed affuit, qui fecit, me ejus rei certum, ejus eram cognoscendæ in primis cupidus; nempe, ejus auctorem carminis esse Petrum Magnum. Tum omnis mihi admiratio constitit; erat enim nota hominis virtus; non enim esse mirum, si nihil tali ab ingenio prodierit, nisi ab omni parte absolutum atque perfectum. Scripsit Odas, tanta elegantia, ut Josepho Castalioni, viro eruditissimo, dignæ sint visæ, quas suis notis ac commentariis ornaret. Scripsit etiam doctissime de rebus gravissimis, & in primis de Consilio; quo libro nihil, ne excogitari quidem potest, neque elegantius neque perfectius. Vixit primum in aula Cardinalis Gambaræ. Quo extincto, cupidissime exceptus est ab Alexandro Card. Farnesio, ejus domus erat literatorum omnium perfugium; quem etiam mortuum, in Æde Soc. nominis Jesu, elegantissima & nunquam interitura laudavit oratione.

LXXI. PROSPER PODIANUS.

TAm multæ sunt res, tam varix tamque inter se diffimiles, quibus universus hic naturæ ordo conflatur atque componitur, ut, si quis eas enumerando persequi velit, nullum fere sit exitum inventurus. Neque tamen est earum aliqua, sive adeo præstans ac nobilis, sive adeo humilis ac sordida, quin magnam ad eam, hominum generi, vel natura vel Deus propensionem ac voluntatem indiderit. Itaque, in tanta studiorum varietate & copia, alium alia in re elaborare ac niti videmus. Ille, in rerum naturalium causis pervestigandis, atque in subtiliter differendi ratione perdiscenda, versatur; ille, in artium elegantissimarum, eloquentiæ nimirum ac poësis studiis, toto pectore animoque incumbit; ille, menden-

dendi artificio captus, quemadmodum morbis aut vulneribus medeatur, ex medicinæ fontibus haurit; ille, armorum militiæque magis quam pacis Otiique cupidus, quam minimo stipendio sanguinem vitamque suam divendit, pro qua retinenda ceteri opes, quas habent, divitiasque profundunt; atque, ut ad leviores artes veniam, ille pingendi, ille fingendi studio delectatur ac ducitur; ille, ut eas, novarum ædium exstructionibus, formas inveniat, ad quarum illæ præscriptum paratæ expolitæque, in usu sint dominis, & populo in speciem existant, opere non parcat suæ. Mitto ea, quæ partim infamia, partim humilia atque ab honestate remota ponuntur, quæ plures, quam opus sit Reipubl. detinent. Quam multi sint, qui pecuniæ cupiditate, æstuante ac faviente mari, fragili parvoque navigio se fluctibus tempestatibusque committunt! quam multi, qui hyeme summa, imbribus maximis, per saxa & salebras, nocturno itinere non intermisso, multorum dierum viam excurrunt, ut ad gentes, in extremis atque ultimis terris positas, amicorum aliorumque literas ferant; longum est, sigillatim omnia referre, ad quæ singuli, ex sua quisque libidine, incitato studio rapiuntur; quæ D. Augustinus in suis de Civitate Dei libris, ad mundi totius ornatum, vel potius ad ejusdem absolutionem perfectionemque, pertinere demonstrat. At Prosper Podianus Perusinus animum ad nullam earum, quas diximus, rerum adjunxit, sed ab ineunte fere ætate, in eo, omni fuit studio & cogitatione intentus, ut eorum, qui opus aliquod edidissent, cujusvis illi essent professionis, nomina, libros, eorumque pretia, nosset, meminisset, atque coëmeret. Itaque totos dies aliud agebat nihil, nisi ut bibliopolarum tabernas & fora, ubi venales libri prostant, obiret, libros, quibus careret, eligeret, atque a venditoribus percontaretur, ut, quantum pro unoquoque dandum esset, indicarent, ac facerent pretium. Ac sæpenumero, qua erat in hoc genere mercimonii sagacitate, libros carissimos ac pretiosissimos, ab iis qui illorum æstimationem non nosset, quam minimo pretio auferbat; nec imitabatur Juvenalem Ancinam ex Cong. Oratorii, qui postea Saluciarum Episcopus fuit,

&

& iisdem quibus ille temporibus vixit. Huic, cum bibliopola quidam inperitus, ex iis, qui in foris librorum acervos venales sine ullo delectu habent humi projectos, librum rarissimum, cui, ob ejus raritatem, vix ullum satis dignum constitui pretium posset, denario addiceret, non æquum visum est, suam cuiquam inscitiam fraudi esse. Atque: Sanusne, inquit, es, ut libri, qui ne atreo quidem nummo carus esset, pretium, tuæ æstimatione, ad denarium redigas? Ac continuo nummum illi aureum exhibuit. Verum, cum Prosper, quidquid haberet nummorum, in libris collocaret, fiebat, ut domi non esset quod ederet: ac facile ipse pane vitam oblectasset suam; sed uxori, mulieri indomitæ ac feroci, alia mens erat atque sententia; ideo, tum mane tum vespere, paratæ erant homini ab ea lites & jurgia. Sed cum ea clamoribus illis ac maledictis nihilo plus ageret, quam si daret operam, ut in cribrum aquam inferret, statuit voci parcere, atque alia ratione gutturi suo prospicere; atque identidem unum vel alterum, ex bibliotheca viri, librum ereptum, coquo, pistori, cauponi, vel lano cuiquam, pro obsonio, quod emerat, pignori objiciebat; quem ille deinde cogeatur, vellet nolle, redimere. Vestibus utebatur obsoletis, attritis, neque ad corpus aptis, ab Hebræis sibi divenditis, & quarum usus apud seculum prius vigeat, præsens respuebat. Ideo sagis nigris purpureas vel cæruleas manicas habebat adjunctas; pallium, collo alligatum, in scapulas totum rejecerat. Nunquam fere habuit necesse, dum Romæ fuit, domum, habitandi causa, mercede conducere; nam semper illis summorum virorum, qui bibliothecæ ipsius inhiabant, ædes patuerunt. Sed decreverat, ab urbe una cum uxore discedere, ac Perusium ire: atque audit, Jurisconsultum esse quendam, amicum & popularem suum, qui profectionem eodem adornaret; hominem adit, orat, ut se ipsi patiatur itineris comitem adjungere. Annuuit ille; atque inter eos convenit de die & hora, qua se essent viæ daturi. Jurisconsultus, ad præscriptum tempus, domum ad Prosperum venit; ac primo nullum, ante ostium, equum, nullam leſticam, quæ illum excipiat, videt; scalas conscendit, nullum item profectionis

fi.

signum animadvertit; prosequitur, atque cum, non ocreatum, non viatoria ornatum veste, sed crepidatum, & urbano, ut solitus erat, ornatu indutum, otiose ad ignem sedentem offendit: tum admirans: Quidnam agis? inquit, quid istuc ornati est? esne iturus, an non? Cui ille: Quidni? sed paululum, obsecro, antecede, meque ad portam Flaminiam expecta, nam mox adero, neque tibi ero in mora. Ille, se ab eo illudi, existimavit; sed tamen paruit, obtemperavit, abiit. At vix inde discesserat, cum adest mulio cum mulo, magnas utriusque duas cistas habente, in quarum ille unam, Prosperi uxorem, in alteram, Prosperum ipsum, imposuit, & supra arcuatz cratis lignæ convexum, cistis imminentem, linteum, ne aspicerentur, imposuit, atque ita tectos, ad portam Flaminiam adduxit. Quo cum jam pervenissent, Prosper elato paululum linteo, Jurisconsultum expectantem aspicit, advocat, atque: Entibi, præsto sum, ait; quid est moræ in nobis, quin strenue iter aggrediamur? ac Jurisconsultus, ridens: Tuus iste mulus nimis tarde gradum movet, & ego propero; proinde abeo; tu otiose ac placide iter, quod cepisti, prosequere. Abi, Prosper ait, cum omnibus diis; sed oro te, ut, quod vidisti, tacitum tecum habeas; ac præsertim, si in Gymnasium veneris, nec discipulis tale quidquam enuncies; volo enim, celatum omnibus meum illuc esse adventum; ita mihi opus est factum. Promisit ille, &, calcariibus equo admotis, se illius ex oculis cum risu proripuit. Cumque pervenisset Perusium, nihil ab eo factum est prius, quam ut omnia de mulo, de cistis, quibus ille ejusque uxor vehebantur, de linteo quo obtegebantur, divulgaret, ac discipulorum in primis turbæ, id quod minus ille volebat, exponeret. Nihil potest adolescentibus, qui Gymnasia, studiorum causa, frequentant, accidere jucundius, quam ridiculum sibi aliquem hominem dari, quem ludos faciant; ideo nihil illis longius videbatur, quam, dum comicum illum senem, muli humeris vectum in cista, riderent. Itaque mittunt ad portam urbis, qui, simul ac cistiferum aliquem mulum conspiciant, id curriculo ad ipsos referant. Nec diu fuit expectandum, Etenim non ita multo post accurrunt, ac

nun-

nunciant, non procul eum abesse. Illi continuo, facto agmine, universi se extra portam eiciunt, advolant, mulum sistunt, linteum allevant, & Prosperum in culcitra fufum inveniunt, salutant, advenisse saluum gaudent, ad cœnam invitant. Ille miser, deprehensus, ac pudore omnium maximo oppressus, non habebat aliud quod diceret, nisi, se tum primum in itineribus hoc vehiculi genere usum esse, antea non item. Atque ad uxorem conversus, pauloque commotus: En, inquit, pessima; quonam tua causa redactus sim, vide; hæc, tundendo atque odio, denique effecit, ut ad has ineptias humilitatemque descenderem. Sed discipuli, omnes læti, medium illum excipiunt, tanquam stipatorum catervæ circumstant, faustis acclamationibus in urbem introducunt, & domum usque perducunt. At libris, quotidie emendis, ea illorum multitudine bibliothecam suam refererat, ejus vix numerum quisquam posset inire, aut voluminum, quæ in ea continerentur, indices, tota sua prope dixerim vita perlegere. Quamobrem fiebat, ut ea multorum, qui ejus essent cupidi, studia commoveret. Itaque blanditiis, ac donis fortasse, inter se certabant, quisnam præsentî donatione vel saltem testamento eam ab illo auferret, ac tanti fieret muneris compos. Sed unus tandem vicit, eaque tam insignem bibliothecam donatione obtinuit, quæ revocari pœnitentia non posset; ea tamen conditione, ut ea apud donatorem, quoad ipse viveret, maneret, qui ea suum ad arbitrium uteretur frueretur, ipso vero mortuo coloniam mutaret, & in ejus domum, cui ea fuerat dono data, transfret. Sed postea, sive facti oblitus, sive ut plures a pluribus gratias iniret; iisdem conditionibus, eadem Patres religiosæ ejusdam familiæ, donavit; qui statim rem totam tabulæ marmoreæ incidendam curarunt, quæ esset & donatoris beneficentiæ & grati ipsorum erga eundem animi monumentum. Moritur Prosper; cuncti illi, ut, quod aucupati fuerant, arriperent: sed inveniunt, aucupem alterum, qui ante ipsos concinnaverat aram, offuderat cibum, illud præripuisse; itaque abeuntes, nihil domum referunt, nisi plorare; ac statim omnes e tabula marmorea, quam illi losaverant, literas detrahendas

curant, quibus hominis in ipsos liberalitas miris in ex-
 lum laudibus efferebatur, præter tres illas primas lite-
 ras, quæ omnibus fere elogiis & inscriptionibus, præfi-
 gi solitæ sunt, D. O. M. quæ res, facitorum hominum
 urbanitati, cavillandi materiam maxime præbuit; cum,
 pro suo quisque ingenio, varias illi interpretationes co-
 naretur afferre, & omnes ridiculas; sed unus præter ce-
 teros facillime, mea quidem sententia, dixit, tabulam
 illam inanem ac vacuum, ejus implendam laudibus esse
 relictam, cujus majus aliquod liberalitatis meritum in
 ipsos extaret, & ideo tres illas literas, ibi relictas, D. O. M.
 nihil aliud significare, nisi, Daturis Opes Majores, tabu-
 lam illam esse dedicandam.

LXXII. CÆSAR CAPORALIS.

QUam misera & infelix sit aulicorum conditio, cla-
 rius est, quam ut explicari oratione cujuspiam pos-
 sit. Etenim quos, Romæ præsertim, in aulis virorum,
 principum, opum, honorum, divitiarumque spes alit,
 nisi eorum domini ad summum dignitatis fastigium
 evadant, dum, quo illis magis sint decori ornamento-
 que, liberalius vestitui, ventri, aliisque extraordinariis
 sumtibus, quam res ipsorum serat, indulgent, evertunt
 se fundis, familiis, & ad incitas, ut inquit Plautus, adi-
 gunt. Quamobrem, exacta jam ætate infirma valetudine,
 in pannis & inopia, coguntur, vel domi stramentitia in
 culcitra (atque, ea si sit, magnas habent omnibus divis
 gratias,) vel aliquo in nosocomio diem supremum obi-
 re. Quibus inconvallis, superioribus annis, conati sunt
 quidam aliqua ex parte mederi, ac sodalitium, Congre-
 gationis Urbanæ nomine, Urbano VIII Pont. max.
 instituerunt, cujus opera senes, emeritis aulæ stipendiis,
 testæ exciperentur. Sed quoniam major est illorum ne-
 cessitas, quam ut illi succurri solo hospitio possit, Soda-
 litium illud est jam pene dilapsum. Cum aliis etiam plu-
 ribus miseriis, dum habet eos aulæ, consticiantur, quas
 omnes eloquentissimo facetissimoque cæmine persequi-
 tur execraturque Cæsar Caporalis, Perusinus, de quo
 referre institimus. Quod carmen, simul ac emissum est,

argumenti uovitate, adeo omnium fere hominum in se studia commovit, ut nulla esset domus paulo locupletior, in qua unum vel alterum illius exemplum non inveniretur, ubi non legeretur, ac legentibus, clamores admirationesque non faceret. Quid multa? tantam habuit commendationem, ut celebre illius nomen efficeret, adeo ut nihil ferme tota esset Italia illustrius. Et sane, ut mihi videtur, sententiarum venustate, ac sale facetiisque, omnes superiores vicit, qui in eodem ridiculi facetique carminis genere sunt versati; ut, Franciscum Bernam, carminis illius auctorem, ut ajunt; Franciscum Mariam Mollam, aliosque. Quod carmen, cum inter cetera aulae vitia referret quamdam nimis parcam, in omni victu, tenuitatem ac parsimoniam, qua aulici a domorum praefectis haberentur, factum est, ut, eo lecto, induxerint animum, domini, cœnationes elaudere, prandiorum cœnarumque usum penitus abolere, ac menstruas pro illis pecunias substituere, ut tantum singulis quisque mensibus acciperet, quantum esset illi in eum mensem ad se non illiberaliter alendum satis. Quo facto, sublatae sunt infinitae illae aulicorum querimoniae, & in domorum praefectos odia, quorum culpa, minus se delicate ac lautae, immo nimis parcae ac tequiter, tractari, querebantur. Scripsit alia etiam poemata, ut, Mæcenatis vitam, decem in partes distributam; cui, cum est edita, extrema nondum manus accesserat; quoniam celerius illum, quam putaverat, vita defecerat; quamvis vixit usque ad extremam senectutem: tum Mæcenatis ejusdem exequias, & Hortos, deinde suum, ad Parnassi verticem montis, iter, & epistolam, qua in eodem monte acta, ad nos perferuntur; postremo poemation quod Pædagogus inscribitur. Quæ carmina, sunt quidem lepide arguteque conscripta, sed nihil ad superius illud de aula, quod diximus. In quo carmine ita graphice se suosque mores & vitam effingit, ut supervacaneus noster in ea exprimeunda futurus sit labor atque conatus. Quare studiosos Caporalis, ad illud carmen, quod omnium manibus teritur, delegamus. Fuit, in omni vita, elegans, facetus, festivus, jucundus, amicis in primis, quibus suos jocos facetiasque præbebat

cum multa hilaritate, magnaue cum festiuitate. La-
tuit perpetuo in fide amicitiaue Aſcanii Marchionis
Cornix, a quo etiam, mortuus, honorifica affectus eſt
ſepultura in ſuo Caſtilioni oppido; quod illius patro-
cinium, Cæſar, tanquam hereditario quodam iure,
transmiſit ad filium. Etenim ille, mortuo patre, Mæce-
natis vitam, quaſi patrono debitam, Marchioni dicauit.
Cardinalis ille, in cuius aulam Caporalis perueniſſe ſe
dicit, eaque in ipſa paſſum, quæ in ſuo de aula carmine
lepidiſſime feſtiuiſſimeque commemorat, fuiſſe ajuſt
Cardinalem Carpenſem; & pars illius ædium, in urbis
Leoninæ via, quæ, quia poſtrema, ab arce S. Angeli ad
ædes Vaticanas directæ atque munita eſt, Suburbium
nouum appellatur, etiam nunc integra manet, ubi cubi-
culum etiam illud extare narratur, latrinis proximum,
In quod ideim Caporalis memorat ſe fuiſſe conſectum.
Totum fere illud tempus, quod ab aulæ occupationi-
bus & ab ambitionis labore liberum habuit, Peruſii, vel
in proximis illi villis, una cum uanſuetioribus Muſis, a
quibus nulla unquam fuit ſeneſtute ſejunctus, in ſum-
mo otio ac tranquillitate traduxit; ac demum ſua in
patria, vel potius in proximo illo oppido Caſtilione,
quoniam ibi filius fuiſſe humatum ſcribit, extremum
vitæ diem morte conſecit.

LXXIII. SYLVESTER PETRASANCTA.

Multos ſæpe viros, ingenii, doctrinæ, & eruditio-
nis fama clariffimos, mortuos fleui: ſed nullius,
quod meminerim, mortem uberioribus proſequutus
ſum lacrimis, quam Sylveſtri Petraſanctæ; viri, omnium
virtutum laude celeberrimi notiffimique. Et ſane mul-
tæ me cauſæ cogebant, cur, talis viri interitu, dolore,
quantum maximum animo capere poſſem, afficerer.
Primum, amicitia, quæ mihi cum illo intercedebat, ah-
nis abhinc ferme triginta inchoata, quam, non ſpes
aliqua utilitatis, non inconſultus quidam animi impe-
tus, ſed virtutis ſpecies, ſed ratio conſiliumque, concii-
liauerat; quo tempore nimirum in Gymnaſio Romano
Soc. Jeſu, iuuentutem iis artibus, quibus adoleſcentium
ani-

animi informari ad humanitatem solent, crudiebat. Et enim elegantissima Elegia, acerbum & immaturum Francisci Petrasanctæ fratris sui obitum, desilentem illum audiui: qui frater, ipse quoque clarus ingenio, Roberto Card. Ubaldino, acerrimo ingeniorum æstimatori, in legatione Bononiensi, fuerat ad manum, scribæ loco. Quid mirum est igitur, si talis inter nos amicitia, religiosa quadam virtutis necessitudine, imbuta, firmissima usque ad exitum vitæ duraverit? Deinde acerbum mihi dolorem inurebat recordatio beneficiorum officiorumque, quibus ab eo sæpe fueram ornatus. Nam libros aliquot carissimos, sponte, nec a me oratus, dono dederat; in his P. Edmundi Canipiani opuscula, quorum eram cupientissimus, summa ejus cura ac diligentia Antverpiæ quam nitidissime elegantissimeque impressa. Cumque, abhinc decennium, gravissimo periculoque, quo pene sublatum sum, morbo implicitus, lectio tenerer, me sæpius invisens, suavissimis sapientissimisque sermonibus suis, quibus omnium ad se animos alliciebat, non solum est confortatus, ne morbi magnitudine deterrerer, neve animum desponderem, verum etiam theriaca præstantissima, aliisque medicamentis, ex præcepti est conatus eripere. Quid illud beneficium, quanti æstimandum est, quod in me est ab eo collocatum! nam, cum anno cl. l. CXL, qui erat, ab instituta Societate, centesimus, quasi ludi quidam seculares, dandum a nobis esset drama in honorem S. Ignatii, qui Societatem illam fundaverat, in maximam difficultatem adducta res est, quod, neque choragus esset aliquis, unde instrumentum scenicum conducere posset, neque vir ille princeps, qui omne ex sua suppellectile se esse exhibiturum spondederat, dare quidquam amplius vellet; a priori voluntate, cujusdam opera consilioque deterritus, qui multum apud ipsum poterat, quemque nominari non est necesse. In tantis igitur rerum angustiis P. Sylvester multas egreriorum ornamentorum, quibus ille etiam invideret, qui sua commodare denegaverat, arcas, ex Collegio, cui ipse præerat, Lauretano, avehendas exportandasque curavit. Postremo, ne longum faciam, perpetuo atque inexplicabili amoris vinculo me sibi devinxit anno

cō Is C XLVI, quando patres Soc. Jesu, centum & eo amplius numero, ex toto orbe terrarum selecti, Romam ad comitia Præpositi generalis convenerant. Nam, cum illi sacellum Deiparæ Virginis assumptæ in Domo suæ Soc. professæ, beneficii gratiæque causâ, invisuri essent, simulque ut leges & instituta cognoscerent, quibus ejus Sodalitatis administratio contineretur; P. Sylvester, qui Sodalitati eidem præerat, ex omnibus Sodalibus me unum elegit, qui, perpetua oratione, de eo, cujus præsertim causa venerant, illis facerem satis: quo factò, amplissimam mihi honestissimamque ingenti eloquentiæque, si quid horum in me est, ostendendæ declarandæque facultatem & materiam dedit; secundo prorsus eventu: nam, magnam a Patribus illis, omnium gravissimis sapientissimisque, gratiam inivi, qui partim mihi coram, partim per literas, versibus in meam laudem scriptis, gratias egerunt. Neque, his finibus, P. Sylvestri in me beneficium sese continuit, sed progressum est longius: siquidem orationem illam, a me habitam, illico, sine ullo meo labore sumtuque, Patribus vehementer postulantibus, imprimendam edendamque curavit. Atque hæc privatæ sunt causæ, quæ me ad lugendum ac dolendum impellunt. Sed aliæ sunt publicæ, quæ magis commovere me debeant. Nam, in damnis detrimentisque ponderandis æstimandisque, gravior esse apud nos debet communis ratio quam propria, publica quam privata. Etenim, eo sublato, incredibilis quædam est, ac prope divina, Latine loquendi scribendique vis simul extincta; qua non solum sibi, illustrissimæque familie suæ, ornameto ac decori, verum etiam Ecclesiæ Catholicæ, ad cujus eam utilitatem usumque referebat, splendori ac commodo esset. Ita enim, quæ cogitaverat, pura, nitida, mollis, ac pellucens vestiebat oratio, ut, si cogitata illa per sese, sine aliqua orationis ope, suam sententiam potuissent exponere, non profluentius, non liquidius, in hominum animos influxissent. Nihil erat tam tenerum, quam illius comprehensio verborum; nihil tam flexibile, nihil, quod magis suo ex arbitrio fingeretur, quam illius erat oratio. Atque hæc tam aperte, tam pure, tam dilucido, animi sui sensa explicandi ratio

atque facultas, Patrum Societatis Jesu, quibus ab ineunte ætate erudiendum se dederat, & Farniani in primis Stradæ, oratoris summi & magistri singularis, præceptis institutisque formata est. Etenim vir hic longe præstantissimus, Belgicæ historiæ, quam scripsit, laude clarissimus, ut in ejus scriptis apparet, nihil tam propositum habere videtur, quam ut bonis, lectis, & illustribus verbis utatur, eaque ita componat ac struat, ut neve asper illorum concursus neve hiuleus sit, ut lucem rebus, non tenebras, afferat; denique, totus in eo est, ut plane dicat, quod intelligatur: quod, mea quidem sententia, poni in summis orationis laudibus debet. Sed, ut ad propositum redeam, hanc Sylvester Petrasancta, pure, perspicue, Latine, diligenterque scribendi loquendique facultatem ita habebat in potestate, ut, si quando opus esset, summo paucarum horarum, ad se comparandum, spacio, longam, disertam, copiosam, & in qua omnes admirarentur, orationem haberet. Atque, tam admirabilis ingenii virtutisque suæ declarandæ, tum alijs sæpe, tum his Romæ illustrem nactus est occasionem: primum, in Collegio Germanico, ubi, aliquot annos, adolescentium illorum præfuit studiis. Nam, rogatus ab Abbate Bonsio, ut Card. Bonsil, patruus sui, auper mortui, in Æde S. Ludovici, nationis Gallicanæ, funebrem laudationem haberet, cumque jam postrema diei tempestas appeteret, ita paucis eam horis composuit, ut postridie mane, multis S. R. E. Cardinalibus compluribusque Romanæ Aulæ proceribus audientibus atque admirantibus, recitaverit. Rursus, anno cId CXXXVII, Romæ, cum esset in Domo Professus Soc. Jesu, illustre extemporalis ejus facundie specimen dedit. Nam, cum esset ad Urbanum VIII, Pont. max. allatum, de morte Ferdinandi II Imperatoris, & vellet illi munus exequiarum, de more, persolvere, in quibus laudari defunctus Imperator solet; contigit, ut ab iis, qui Romæ Cæsareæ Majestatis negocia gerunt, nihil esset cogitatum de oratore, cui hæ partes committerentur: cumque, non solum dies, sed jam propemodum hora exequiarum, instaret, tum illis id venit in mentem. Itaque, hac illac excurrunt, quærun, investigant, rogant, cui

onēris illud imponant: sed nemo occurrit; omnes fugitant eam provinciam, ac segnitiam seu tarditatem suam, temporis angustiarum, in quas redacti essent, excusatione defendunt. Cum igitur illi hærerent, nec haberent quid facerent, quoque se verterent, ac prope hæc occisa spes esset; ad Patres Soc. Jesu confugiunt; aut enim ibi apud eos, aut nusquam, reperiri posse existimant aliquem, qui tam brevi temporis spacio orationem scribat, ediscat, habeat. At Patres, quibus incognita erat Sylvestri virtus atque præstantia, eam illi laudationem detulerunt. Qui quidem, quod sibi in augustissimo illo orbis terræ Senatu, ac Pont. doctissimo audiente dicendum esset, quique dubios incertosque dicendi eventus pertimesceret, verecunde ac dubitanter, delatum sibi munus accepit; sed, cum nullus recusandi relictus esset locus, sex horas, neque eo amplius, in considerata ea laudatione componendaque collocavit, impulsus incitatusque frequentibus Magistri Sac. Palatii nunciis, ad quem quia spectat, orationes, quæ, in Sacello Pontificio sunt habendæ, antea legere, probare vel improbare, earumque unum apud se exemplum, ne a dicente variari possint, habere, statuerat, non prius lecto sese committere, quam ejus sibi orationis copia fieret. Et sane, videri cuiquam possem, rem incredibilem dicere, nisi P. Jacobus Faligattus, ex eadem Societate vir gravissimus ac veritatis diligentissimus, qui tum eadem, qua ille, domo continebatur, persancte affirmaret, se rem ita habere ut dicimus. Quid multa? non aliter res cecidit, atque illi, qui cum noverant, optinabantur. Nam sic illam laudationem, tanta vi tantaque gravitate, exposuit, ut mirum atque incredibile omnibus videretur, tam brevi eam tempore fuisse confectam. Habebat crebras argutasque sententias, nec eas pueriles, inanes, ridiculas, atque etiam stomachosas, ut in quibusdam videmus, qui in ejusmodi sententiarum ineptiis, & inani quadam verborum volubilitate, eloquentiam positam esse defendunt; sed graves, utiles, elegantes, ac reconditis ex artibus, atque ex multiplici exquisitaque doctrina, qua erat excultus, ut ita dixerim, evocatas. Et enim non solum puer, antea quam Societati Jesu se man-

manciparet, ab iis magistris, quos supra commemoravimus, Latine scribendi & eloquentiæ præcepta percepit, verum etiam, tyrocinio in eadem Societate perfunctus, Philosophiæ ac Theologiæ spatia fuerat emensus, cursu adeo secundo, adeo felici, ut statim dux magisterque præesse iis posset, qui vellent in earundem disciplinarum studio curriculoque versari; atque Sents, humaniores literas docuit; ac missus est Firmum in Piceno, ut ibi iis, qui Philosophiæ præcepta haurire velent, capita & fontes ostenderet, unde Aristotelis Peripateticorumque disciplinæ flumen erumpit. Quem ceteros docendi locum multos deinceps annos tenuisset, nisi Petrus Aloysius Carafa, S. R. E. Cardinalis, qui tum Firmanam civitatem pro prætore administrabat, intervenisset. Qui cum, a re privata ad publicam, ex umbra in solem & pulverem, ex domestica exercitatione in aciem certamenque deduxit. Etenim, egregius ille Antistes, incredibili morum illius suavitate, admirabili in consiliis dandis prudentia, summa rerum maximarum scientia, omnisque elegantia doctriinæ, delinitus & captus, eo amoris vinculo se illi devinxit, ut, profecturus in Germaniam, ab Urbano VIII, Pont. max. electus Coloniz Ubiorum Nuncius, suo eum a latere divelli non sit passus, sed perpetuo eundem lateri eidem hæere curaverit; non solum ut ibi esset a confessionibus, verum etiam in omnibus gravissimis muneris illius negotiis operam navaret, quam non ignorabat, quanto sibi ornamento, Sedi Apostolicæ decori, Ecclesiæ Catholicæ utilitati, futura esset. Id quod re ipsa expertus est, in adeundis visitandisque religiosorum hominum cœnobiis, in corruptis eorum moribus notandis animadvertendisque. Sed præsertim mirum quoddam in eo Catholicæ Religionis restituendæ studium exarsit, in iis regionibus, ubi illius jam diu naufragium est factum, ejusque iis ex scopulis, ubi adhæserat, extrahendi. Qui conatus, ejus nobis morte præceptus, ob damnum, quod Catholicæ Religionis causa fecit, maximam Reipubl. Christianæ universæ, lugendi dolendique materiam affert. Itaque, quoad est in Germania Belgioque versatus, perpetuum Hæresi, ejusque propugnatoribus, bel-

lum habuit indictum : quorum complures, ceteris ac-
 ciores vehementioresque, in contentioneu certamen-
 que vocatos, ingenii acumine, doctrinæ vi ac pondere,
 eruditionis copia, tanquam armis, eloquentiæ, quæ in
 eo erat, lacertis viribusque jactatis atque contortis, ita
 male habuit, ut semper victor pugnæ discesserit, ma-
 gnamque illis formidinem sui terroremque reliquerit.
 Neque tamen, superior eventu, curam remittebat, ut,
 si, victi, certaminis potestatem sibi reddi deposcerent,
 novo studio & exercitatione corroboratus, acrior ac ve-
 hementior in aciem, non autem ocio ac desidia fractus,
 infirmior debiliorque, descenderet. Neque solum vo-
 ce, eruditis auribus digna, in disputationum contentio-
 ne & clamore cominus adversus Inferorum monstra
 contendit, verum etiam eminus, libris doctissime eru-
 ditissimeque scriptis, ea est profligare & ad internecio-
 nem dare conatus : in quibus hi enumerantur in primis ;
 Epistola contra Petrum Molinæum, cujus in eo doctri-
 nam, nostræ adversariam maxime, optimis validissimis-
 que rationibus, tanquam bellicis quibusdam tormentis,
 labefactat atque convellit ; tum, liber adversus Andre-
 am Rivetum, in quo Catholicæ Religionis propugnatio-
 nem strenue ac viriliter accipit. His accedit opus longe
 maximum atque pulcherrimum, cujus est titulus, *Thau-
 masia vera Religionis, contra perfidiam sectarum*, tri-
 bus voluminibus distinctum ; quorum primum, mira-
 cula novi ac veteris Testamenti, simul collata, comple-
 ctitur ; alterum ritus Ecclesiæ Catholicæ, miraculis con-
 firmatos, includit ; postremum, (quod nondum est edi-
 tum, quod sciam,) perpetua Ecclesiæ nostræ miracula
 profert, quibus tota Hæreticorum natio caret, atque
 horum operum nonnulla, infirmissima etiam valetudi-
 ne, scripsit, quum acerbissimis vesicæ doloribus tor-
 queretur. Et in primis, non solum opportuna, verum
 etiam utilis, ejus opera existimata est, in traducendo ab
 hæreticorum factione ad Catholicorum partes celebri
 aliquo Principe. Quod quamvis clam factum sit, tamen
 acutissimum quendam hæreticum, vel potius hæreti-
 corum antesignanum, minime fugit ; qui, ut eundem
 P. Sylvestrum, quod memini mihi eum narrare, amens si-

similis, clamabat, vociferabatur, ipſius, Ducem illum, præſtigiiſ atque cantionibus ſubornatum, captum, ac de niente conſilioque deductum. Erat Dux ille nobiliſſimæ præſtantiſſimæque cujuſdam ſcæminæ in primis cupiens, eamque ſibi in matrimonium dari, enixe petebat; ſed prohibebant, eam illi nubere, leges Eccleſiæ; tum quia arcta hominem propinquitate contingebat; tum quia Religionis diſſimilitudo atque diverſitas, quod ipſa Catholica, ille eſſet Hæreticus, nuptiarum rite & ex Eccleſiæ dignitate conjungendarum ſpem omnem adimebat. At P. Sylveſter, cui & virtutiſ ſpecies & morum ſuavitas, aditum ad Ducis amicitiam aperuerant, hortando, pro ſua virili parte, ſuadendo, monendoque, perfecit, ut ille, ſatis ſua ſponte propenſus, induceret animum, Catholicam Religionem, priſtina altera repudiata atque damnata, ſuſcipere. Sed magna ad eam rem opus erat cautione atque ſilentio, ne cuiſpiam ad eam vel odore aliquo, vel leviter preſſiſ veſtigiiſ, penetrare faſ eſſet. Itaque actum eſt inter eos, ut die quodam hora noctiſ quarta, Dux una cum Petro Aloyſio Carafa, Sedis Apoſtolicæ Nuntio, ad domum Patrum Soc. Jeſu accederet, & in cubiculo Patris Sylveſtri; per manus ejuſdem Nunci, hæreſin, quaſi veterem hominem, exueret, & novum, ſecundum Deum, Catholicam nimirum fidem, indueret. Verum id perfici, ſine domui illius Rectore non poterat, apud quem, prima face, cla- ves oſtii deponerentur; & clam etiam illum, tanta res erat agenda. Quamobrem P. Sylveſter, audacter Rectorem adit, orat, obſecrat, ut patiat, ea nocte, cla- ves domui apud ſe eſſe. Quod ille admirans: Quamobrem hoc? ait. Cui P. Sylveſter: Parce, inquit, huius rei cauſam quaerere; non enim in præſentia opus eſt prolato; interea ne tibi grave ſit, obſecro, clavium tibi copiam facere. Cumque id ſæpius inſtaret, oraret, & ſuor, cui nota erat hominiſ ſanctitas atque perfectio, non id de nihilo eſſe exiſtimavit, quod ille tantopere cla- ves peteret: itaque ſine mora tradidit. At P. Sylveſter, ut erat conventum, hora inter ipſos dicta domum aperit, Ducem & Nuncium excipit, ſuumque in cubiculum intro- ducit. Ubi Dux ſtatim hæreſin abjurat, ac deinceps in

Ecclesiæ ac Pontificis Romani potestate se fore promittit. Quibus actis, Nuncius illi Breve seu diploma Apostolicum tradidit, quo potestas eidem fiebat, ejus, quam poscebat, uxoris ducendæ, quamvis arcto cognationis nexu sibi devinctæ. Semper igitur P. Sylvester, quod in ipso fuit, studiosissimum se veræ fidei cultorem, & acerrimum propugnatorem, exhibuit: ut etiam in eo libro, quem ultimo loco scripsit, cuique, morte præventus, extremam manum non potuit addere, *Romapia* nomine; etenim in recensendis piis, quæ in ea Urbe exercentur, operibus, adversariorum nostrorum impetus repelluntur atque franguntur, quos præsertim in eam orbis terrarum arcem, imperii domicilium, veræ ac germinantæ religionis sedem stabilem ac firmam, Christi in terris Ulearii Regiam, habent intentos atque conversos. Nec minus in vita Card. Roberti Bellarmini, primum a P. Jacobo Fuligatto, Italico sermone, conscripta, & ab ipso in Latinum translata. E quibus immortalibus ac divinis ejus operibus, magnum nostra vera fides ornamentum & decus, at falsa illorum religio lethale vulnus accepit. Scripsit etiam, summa eruditione elegantiaque, de illustrium familiarum insignibus, quæ vulgo Arma vocantur. Ne multa; in singulis ejus operibus, ea vis doctrinæ, illud ingenii acumen, ille orationis cultus ac nitor elucet, ut Eryetus Putcanus, vir doctissimus eloquentissimusque, in Vindiciis Circuli Urbaniani, celestis cum ingenii æternæque eruditionis virum appellet. Atque adeo fuit studiis optimis deditus, ut ea nunquam a morum sanctitate, a summa in Deum pietate ac religione, sejunxerit, sed perpetuo cum eadem adjuncta atque connexa habuerit: quod plerique non faciunt, qui hæc duo, inter se coherentia atque conjuncta, distrahunt atque divellunt. Et, quo animum ab omni labe purum incorruptumque servaret, annos natus duodevigiinti, in Societatem Jesu, tanquam in munitissimam quandam arcem præsidiumque, confugit; ad quam omnis vitii atque sceleribus obstructus & interclusus est aditus; quæque, tanquam mare quoddam acerrimum, flagitiorum sordes, quasi corrupta mortuorum cadavera, repellit ac rejicit. Quamvis primo parentibus invitis ac

repugnantibus, qui, ob ingenii lumen, quod in eo exsplendescibat, ob morum nobilitatem suavitatemque, quā omnium ad se animos alliciebat, magnam in eo familiæ ipsorum dignitatis spem collocatam habebant. Ac primo dolorem illi suum conati sunt inanis cuiusdam simulatione timoris obtegere, quod nimirum vererentur, ne puerilis cupiditatis flatu abreptus, non autem divina Spiritus sancti aura impulsus, ad aliquod non bene consultum consilium deferretur. Itaque antea quam id, quod cogitaverat, perficeret, paulum cohibendum eum censebant esse, eidemque deliberandi spatium, aliquot nimirum menses, dandos esse. Deinde, cum, forti ac virili animo, in proposito confisteret, neque spe honoris aliqua, vel quibusvis vanis pollicitationibus, de sententia posset everti, summa illorum cum voluntate, pridie Kal. Januarii cIs Is CVIII, Romæ, passi sunt cum in Ædes S. Andreæ in Quirinali, quam Doum probationis appellant, novitium abire. Factuus est etiam periculum, in sua Republ. gerenda quid posset hominis virtus atque præstantia: ac Lauretum, ad Collegium illud administrandum, missus, inventus est sui similis. Nam, tanta Patrum suæ familiæ cum approbatione, tanta munus illud cum æquitatis prudentiæque laude gessit, tantam, in excipiendis hospitio principibus ecclesiasticis multis, aliisque præstantibus omni dignitate viris, humanitatem, amorem, comitatem, benevolentiam, & amœnitatem exercuit, ut omnes, cum ab eo discederent, aperte loquerentur, neque, lepidior ad omnes res qui esset, neque cuius mores magis ad venustatem valerent, invenisse se quemquam. Eandem ille benignitatis, caritatis, suavitatisque vim transtulit Romam, in Sodalitate Deiparæ Virginis Assumptæ, quæ est in domo professæ Societatis suæ, regenda. Nam, ut cum maxime, tum eo tempore quo eidem illi præfuit, nobilitate ac frequentia Sodalium floruit. Idque eo fuit admirabilius, quod ab eo laus excellentis optimique rectoris non admodum expectari debere videbatur, qui juventutem in literarum studiis ac bonam ætatis suæ partem apud Coloniensem Nuncium, in maximis gravissimisque negotiis, in Germaniæ Belgique luce, consumserat. Quinquen-

quennium ante ejus e vita discessum, vesicæ morbo oppressus, eodem laborare vehementer cepit. At, quænam est tanta vis orationis & copia, quæ possit verbis exprimere admirabilem ejus animi æquitatem, incredibilem in perferendis doloribus sævissimis acerbissimisque patientiam, in officio boni ac fortis viri tuendo constantiam? Nunquam exclamavit ut mulier; nullam vocem a sapientis gravitate alienam emisit: nunquam vultum mutavit; nullum tempus, doloris magnitudine, quotidianis suis occupationibus, nullam horam perennibus tuis studiis, passus est eripi; immo, patiens ante ejus obitum, an diebus an mensibus? inventus est totus in eo opere expoliendo perficiendoque occupatus, quod fuerat *Pia Roma* titulo inscribendum divulgandumque. Jam vero, cum de medicorum omnium sententia pronuntiatum esset, calculos, in vesica inclusos, tantam illi vim morbi creare, cui non aliter succurri posset, nisi sectione, ex qua ferramentis, ad eum usum factis, calculi illi extraherentur, sed in ea curatione magnam vitæ periculum adiri; ille, cui jam ultima experiri statutum fuerat, eam mortis, in qua ceteri fere omnes exhorrescunt, contemtionem ostendit, ut, cum se chirurgus incidendum daturus esset, non ad cruciatum, sed ad epulas ire videretur. Ac, nullam sibi in ea curatione spem salutis sitam esse, præsertim ostendit ex eo, quod, cum P. Præpositus generalis quingenta ipsi Missæ Sacrificia detulisset, ut ea, vel ad sanitatem sibi a Deo impetrandam, vel ad aliquid aliud, suo ex arbitratu, conferret, ille ad expiationem earum animarum adhibuit, quæ purgatorio igne cremantur; ut, simul ac vinculis illis expeditæ liberum habuissent cursum in cælum, ibi Deum pro ipso comprecarentur. Ipso curationis die P. Sylvester, pro sua salute, immaculatam Deo Filii sui hostiam obtulit, hoc est, Missæ sacrificium fecit, ea vi ardoreque animi, qui sit cuique credibilis in tanto vitæ periculo; in quo Sacrificio quam potuit Deum demississime subjectissimeque exoravit, ut, si corporis sui salus & incolumitas ex divinæ ipsius gloriæ, ex animæ suæ salutis, & ex proximorum utilitatis usu, futura esset, eam sibi propitius elargiretur; sin secus, eandem a se repelle-

leret, ac procul esse juberet: se enim non alia conditione eam velle, ac poscere ejus sibi gratiam fieri: denique, totum se divinæ ipsius voluntati potestatique permisit. Deinde (ex quo licet hominum in ipsum studium amorumque colligere) quibus horis in potestate medicorum fuit, a quibus ea illi curatio, tam dubia, tam periculosa, tam præceps, adhibebatur, tum Laureti, tum Romæ in Sacello ejus, quam diximus, Sodalitatis, cui ille præerat, sacrosancta Christi Corporis mysteria palam fuerunt exposita, & ante ea deinceps plures, in preces humiliter fusi. Et sane incisio recte sub manus successit, ac sine multo labore sex inde calculi, ovi columbini crassitudine, fuerunt extracti; quæ res chirurgiæ peritis admirabilitatem, atque affirmandi vim attulit, novum id, singulare, nec cujusquam antehac acceptum oculis, extitisse. Neque dubium cuiquam erat, quin ille ex eo morbo esset convaliturus, si vires corporis suffecissent. Verum illud, diuturna ex ægitudine, nimis attenuatum infirmumque, vim morbi sustinere non potuit. Itaque pridie Nonar. Maji, hora octava & quadrante, tanquam placidissimo quodam somno confopitus, excessit e vita; non sine multis amicorum bonorumque omnium lacrimis atque mœrore; quibus triste doctrinæ, probitatis, eloquentiæ, prudentiæque desiderium fixæ, reliquit.

LXXIV. JO. BAPTISTA SALUTIUS.

IAm dudum in eorum descriptione versamur, qui, aliqua doctrinæ vel eruditionis fama conspicui, digni nobis sunt habiti, quorum imagines, tanquam in tabulis pictas, huic tertiz Pinacothecæ mandaremus: sed, quoniam aliquis jam est illi modus ac finis constitutus; quam alterius cujusvis imagine ea definiri honestius atque elegantius potest, quam Jo. Baptistæ Salutii, Patritii Genuensis, domi forisque, tum ingenii laude, tum rerum ab ipso gestarum gloria, clarissimi? Nam fiet, ut, qui spectatum admissi in eam fuerint, recedentes fateantur, non eam magis in principio quam in fine, egregiis imaginibus, ac spectatu dignis, fuisse referant. Sed

Sed illius de virtutibus, dubito, quemadmodum exponam. Nam si voluero figillatim eas persequi, quæque de eo dici possint omnia proferre, vereor, ne non tam ejus imaginem ingenii exprimere, quam vitam videar velle conscribere; at, si tantummodo summas rerum conabor attingere, ne iis, qui sunt in Republ. Genuensi rudes & hospites, minus lucide appareat, quantus ille vir fuerit. Sed difficultatis utriusque nexu me, quantum licet, expediam, perficiamque, ut neque multitudo rerum brevitati, neque brevitatis ignorantia lectorum, officiat. Jo. Baptista natus est Genue, anno c13 L XXIX, Jo. Baptista Salutio, & Margarita Justiniana, optimis nobilissimisque parentibus; cui pater, tanquam si divinaret, quanto ille sibi patriæque futurus esset ornamento atque splendori, repudiatis omnibus aliis, suum filio nomen indidit, atque Jo. Baptistam appellari cum jussit. Puer, præter docilitatem ingenii, incredibilis vis memorie suffragabatur; quæ est in paucis ingenii signum vel maximum. Itaque, quidquid illi a magistris ediscendum tradebatur, sive oratio, sive carmen, sive aliud quidvis, ita memorie custodiendum mandabat, ut ne syllaba quidem una diffugeret; quod est a pueris, ut oratoris institutionis magistri tradunt, obtinendum in primis, atque hæc consuetudo, memorie exercitatione quærenda. Cujus rei cum alias sæpe periculum est factum ab eo, tum præsertim, cum annos vix natus novem, insigni oratione, Reipubl. Genuensis Ducem, nuper electum, patris sui amicissimum, laudavit, Senatoribus multis, atque omni fere nobilitate audiente; ea alacris promptique ingenii commendatione, ut esset omnibus admirationi, ac vix credibile videretur, posse tantam in id ætatis puerulum cadere vim ingenii atque memorie. Undecimo ætatis anno missus est a parentibus Mediolanum, ut in Braydenſi Societatis Jesu Collegio ab artium elegantissimarum magistris humaniores literas disceret. Quæ studia deinde prosequutus est Romæ, in gymnasio Patrum ejusdem Soc. ubi incredibile memoratu est, quos progressus effecerit. Ille, inter æquales nobilis, ceteris industria præire, clarius explendescere, classen ut dicitur ducere, præmia discipulis, in

literaria quasi palæstra viribus ingenii decertantibus
proposita, in magna virorum principum atque omnium
fere civium Romanorum corona, ceteris victor eripe-
re: quod adolescentibus, gloriæ studiosis, non minori
prope dixerim voluptati lætitiæque contingit, quam to-
ta olim in Græcia iis, qui victores Olympiæ citaban-
tur: ipse autem tantum in iis sibi laudis esse ducebat,
ut, senectæ etiam ætate, ea sæpius in manus sumeret,
aspiceret, ostenderet: ac veteris plausus recordatione,
ad novas laudes, quæ in eam ætatem, qua tum erat, con-
venirent, se mirabiliter excitari sentiebat. Quod autem
ego de illius præmiis ac virtutibus assero, non ex audi-
tu arguo, sed meis ipse oculis, tum spectaculo interes-
senti, accepi. Nam, quamvis paucis illi annis essem æ-
tate superior, ac propterea cursum meum jam transtur-
rissim; tamen ob usum amicitiamque, quæ mihi cum
illo intercedebat, in Sodalitate Deiparæ Virginis An-
nuntiæ in Collegio Romano contractam, quam una
cum illo frequentabam, non poterant, quæ de ipso con-
memoro, notitiam meam effugere. Sed, postquam æta-
te ex ephebis excessit, & studiis amotus puerilibus est,
contulit se ad philosophos, ac tricennium in Peripateti-
corum spatiis summa est cum laude versatus; inde ad
Jurisconsultos transiit, quorum facultatis vim prope im-
mensam, Bononiæ primum, tum Pisæ, a summis Docto-
ribus hausit, eaque, quantum esset ad gerendam Rem-
publ. satis, pectus implevit. Noluit tamen Juris utrius-
que, Cæsarei ac Pontificii, publice interpretandi, ac
consultentibus de jure respondendi facultatem, ut est mo-
ris, accipere, vel potius mercari; sed statim, ab artium
pulcerrimarum studiis ornatus, a Philosophia, a Juris
scientia instructus, ad Reipubl. suam accessit. Cujus ca-
pessendæ initium illud fuit, ut ab ea legatus una cum a-
liis mitteretur ad Petrum Cardinalem Aldobrandinum,
Clementis VIII fratris filium, qui ex Gallia per Ge-
nuensium fines Romam iter faciebat, controversiis inter
Henricum IV & Carolum Emanuel, Sabaudie Ducem,
ex utriusque voluntate compositis, ut nimirum
Rex Bressam & regionem illi annexam, Dux autem
Marchionatum Salutarum, in quem ille Gallis, Henri-

eo III e vivis sublato, in bellis civilibus occupatis, armatus invaserat, obtineret. Verum quia, anni tempore adverso, perpetui decedentes e caelo imbres Cardinalem non parum saepe consistere, ac susceptum iter cogeant abrumperet, frequens Jo. Baptistæ se dabat occasio, Cardinalis ejusdem adeundi, cum eoque sermones in multam diem noctemque producendi: quorum ille sermone suavitatem atque prudentiam mirifice delectatus, primum ipse per sese, tum per insignes quosdam, ac primarios Antistites, qui in ipsius comitatu erant interpretes, egit, ut eum in suam familiam attraheret, maxima proposita spe honorum atque præmiorum; quod tum, Pontificis maximi concessu, rerum ad eum omnium summa redierat. At ille, qui suæ se Reipubl. jam totum addixerat, non putavit, esse tanti ullas opes honoresque, ut eos patris caritati anteponeret; sed Cardinali, utpote in persequendis officiis diligentissimus, de illa tam egregia in ipsum voluntate gratiis actis, simul ac per munus illud publicum, propter quod venerat, licuit, domum se recepit. Ubi quam diu se continuit, maximis semper Reipubl. in rebus interfuit, atque honoribus, qui illi mandabantur, est functus egregie; adeo ut anno dñi M C XI Jo. Scagliæ, sororis suæ viro, misso ad Regem Hispaniarum Legato de quodam castro, Saxello nomine, in intimis ditionis Genuensium quasi visceribus sito, quod olim Respubl. ab Augusto Cæsare, cui illud vectigal pendebat, amplissimo diplomate obtinuerat; Gubernator autem Mediolani ad se suumque Regem pertinere defendebat; in hac legatione magna ejus opera Jo. Scagliæ, jam natu grandi, usui fuerit: quod declaravit temporis brevitatem, qua totum negotium confectum. Nam vix sex menses abierant, postquam domo discesserat, quum eodem, re bene gesta, reversus est; hoc est, impetratum id suis retulit, cujus gratia profectus in Hispaniam fuerat; videlicet ne Mediolani Gubernator, neve alius deinceps, qui regios in Italia exercitus duceret, ea de re molestus Reipubl. esset, in qua Regi Hispaniarum nihil juris esse constaret. Quæ res magnam Jo. Baptistæ strenui, prudentis, accurati, ac diligentis viri famam confecit, suosque cives in eam opinionem adduxit, ut

crederent, nihil in legatione aliqua, quæ Reipubl. causa susciperetur, fieri posse fortiter, prudenter, atque ex Reipubl. ejusdem dignitate, quod illius consilio & auctoritate non regeretur. Qua fama impulsus Iacobus Salutius, qui publice profecturus erat Legatus in Germaniam ad Matthiam Austriacum, ut Imperatoriam illi majestatem, nuper adeptam, gratularetur, e re publ. fore existimavit, si Jo. Baptista legationis illius sibi comes accederet. Quod cum perfecisset, nihil est opinione sua deceptus: nam illius consilio, quo par uenio illi erat, pristinum Reipubl. Genuensis Oratoribus apud Cæsarem dignitatis locum recuperavit, quem illi locum Maximiliani Cæsaris injuria, quo tempore Genuenses adversis multarum calamitatum fluctibus agitabantur, amiserant. Reversus ex Germania, vix Genuæ limen attingit, cum advenientem novæ difficilium negotiorum moles exortæ exceperunt, seque quodam modo ejus in humeros, ad quodvis publicum munus excipiendum aptos, rejecerunt; sicuti fuit Lunæ urbis Commissarii, ut vocant, jure ac nomine administrandæ provincia; quæ urbs munitissima, quoniam ex ea in omnia Genuensium ditionis loca aditus patet, cuipiam, nisi fidelissimis hominibus, committi non solet. Illi igitur ejus claustra loci, utpote fidelissimo atque ad resistendum fortissimo, sunt delata ac tradita. Quod munus totum annum cl. l. CXI legationibus abstulit: ad quas adeo frequenter adhibebatur, ut vulgo perpetuus Reipubl. Legatus appellaretur. Neque minus alii quatuor, qui consecuti sunt, anni, quibus ejus domi opera fuerat necessaria, a legationibus abductum retinuerunt. Verum, anno cl. l. CXVI tandem illis est redditus, ac missus in Hispaniam ad Philippum III: qua legatione diligenter ac fideliter ipso obeunte, Rex ille suo functus est facto. Regis morte habuit necesse, diutius quam per leges liceret, in Hispania consistere; nempe quoad pateret, quoniam novi regis, Regni administrandi ratio consiliumque spectaret. Quo cognito atque perspecto, post integrum quinquennium reversus est in patriam; ubi Prætor Savonæ renunciatus, Jacobo Salutio succellit, qui jam tempus suum expleverat. Id quod illi novo quodam

dam exemplo accidit, propterea quod Reipubl. bene gerendæ ratio pati non soleat, unum cognatum proximum post alterum in urbis cujuspiam administratione succedere. Deinde ejus opera vocata est ad persequendos bello latrones, qui, in illis regionibus, vitæ bonisque hominum insidias locantes, se cædibus ac rapinis explebant; quos etiam importuniores ferociioresque reddebat Ducis Sabaudiz favor, infensi Genuensibus, quod Zucarellum, cui ipse inhiabat, a Cæsare pecunia redimere ac suum facere conarentur; quæ præsertim causa Ducem illum anno cō lō CXXV. ad suscipiendum adversus Genuenses bellum impulit, instruxit, armavit. At eorum ille latronum conatus retardavit, impetus repressit, audaciam fregit, ac partim eorum armis delevit, partim perterritos coëgit fuga sibi consulere. Hoc tumultu sedato, maximos honestissimosque in sua civitate magistratus accepit; unde illi deinde anno cō lō CXXV. ad Senatorium ordinem gradus est factus. Tum vero homini in primis egregio latissimus apertus est campus virtutis animique sui roboris declarandi. Nam, præter innumerabiles labores, quos Senatorius ordo habet adjunctos, utpote a quibus tota Reipubl. bene gerendæ ratio dependeat, cæteri collegæ, qui, quantum esset in Jo. Baptista Reipubl. præsidii ornamentique, sentiebant, cum instaret a Sabaudis bellum, cum potissimum elegerunt, cujus opera ad conducendos undique milites, ad subsidia comparanda, uterentur; quæ ille omnia, ex Reipubl. utilitate, & ex patriæ dignitate ac salute perfecit. Cujus in patriam amor in eo præsertim eluxit, quod contradicentibus multis summa vi obstitit, ne Hispani, subsidio missi, urbem ingrederentur, sed eos intra munitiones tantum se continere permisit: quo facto patriæ libertatem, tum ab hostium tum ab amicorum insidiis periculisque, defendit, eamque in tuto collocavit. Volitabat tunc temporis circa ea littora cum exercitu Princeps Victorius a Sabaudia, ac magnam omnibus formidinem injiciebat, ne urbem Savonam, præsidiis fere omnibus nudatam, quæ traducta Genuam fuerant, in suam potestatem redigeret. In tanto igitur metu periculoque Jo. Baptista, oppidi defensione in se recepta, sum-

summo cum imperio ac potestate, una cum Augustino Centurione socio, ac magna nobilitatis multitudine, illuc est profectus. Qua re cognita vir ille princeps non est ausus oppidum obsidione atque oppugnationibus premere; nam Savonam exercitus duodecim millium, & eo amplius, virorum fortium numero, tum ex auxiliariis Hispanorum copiis, tum ex Genuensium delectibus conflatus, egregie tuebatur: qui exercitus non modo urbem ab hostium vi impetuque defendit, verum etiam strenue atque acriter dinicans, amissam oram maritimam recuperavit, &, progrediens longius, Ormeam aliaque propinqua oppida expugnavit, ac Genuensium ditioni subiecit: atque ea oppida Respubl. Genuensium usque ad annum cl. Is CXXXII suis praesidiis innita tenuit, neque antea, quam pace cum Duce Sabaudiae facta, dimisit. Quae omnia Jo. Baptistae auctoritate, virtute, consilioque fere sunt gesta. Sed Capriata, qui ejus belli res gestas elegantissima prosecutus est historia, nihil de illius laudibus, quas alii in caelum ferunt, enarrat, sed silentio involutas easdem in medio relinquit; memor videlicet injuriae cujusdam ab Octavio Salutio, Jo. Baptistae fratre, quem prior ipse laeserat, sibi illatae; in quo a legibus historiae recessisse mihi videtur, quae, scriptores rerum ab amore, ab odio, ab inimicitia, a partibus Reipubl. procul esse debere, praecipunt. At nihilominus Jo. Baptista, bello confecto, ovanti similis rediit in patriam, ibique Senatorium ordinem, in quem jam, ut diximus, venerat, tenuit usque ad exitum anni cl. Is CXXVI. Interea coeptum est agi in Hispania de pace cum Sabaudiae Duce componenda: &, cum res tanta, tam ardua tamque difficilis, summa cum prudentia, atque ex Reipubl. dignitate, tractanda esset, quemnam potius illa deligeret, cui has partes demandaret, quam Jo. Baptistam, cujus in rebus agendis dexteritatem, in perducendis ad exitum fidem, in dolis, fallaciis, praestigiisque detegendis cavendisque calliditatem atque solertiam, tam multis in legationibus summam sibi utilitati ornametoque fuisse intelligebat? Et sane non minori opus illi fuit consilii, cautionis, prudentiaeque praesidio, quod Comitis de Olivares machinis, callidis

consiliis ac technis opponeret; qui primo clam ac de infidiis, tum palam, integumentis omnibus dissimulationis eiectionis, animum suum, Reipubl. Genuensium inimicum, aperuit. Nam ille vigilantia atque solertia, ne in hominis infidias caderet, cavit; tum, magnitudine animi consiliique, ne apertæ illius inimicitiae, Reipubl. suæ quidquam obessent, effecit. At non erat facile invenire alterum, qui animosius (intra prudentiæ tamen fines) principibus viris, non solum inermibus, verum etiam armatis, sicubi res posceret, Reipubl. suæ mandata exponeret. Cujus excelsi imperterritiq[ue] magnitudo animi tum præsertim enituit, cum sublati duorum, non ætatis modo nostræ sed omnis fere memoriæ potentissimorum, Galliæ nimirum Hispaniæque, Regum animis, illisq[ue] jam non occultis odiis sed aperto inter se Marte bella gerentibus, Marchio Sanctæcrucius, Hispaniæ classis summus Imperator, Gallos quosdam, qui prope Genuensium littora navigabant, comprehensos in vincula coniecerat: nam Jo. Baptista, qui, reversus ex Hispania, omnibus erat præcipuis Reipubl. muneribus functus, nempe iterum ad Savonæ urbis gubernacula admotus, Ærarii sancti Georgii, exteris etiam nationibus celeberrimi, Protector effectus, atq[ue] unus ex quinque supremis Syndicis electus, quorum sunt partes, in quodam quasi vigilia manere, omnesq[ue] Ducis, Senatorum aliorumq[ue] magistratuum acta & consilia animadvertere, notare, eorumq[ue] decreta rescindere pœnisq[ue] constringere, si adversus leges facta essent: Joh. Baptista, inquam, missus est, qui disertis verbis hanc Marchioni edictionem haberet; vel, ut Gallos, quos habebat in vinculis, missos faceret, vel, ut portu, quem tunc tenebat, excederet, nunc Vado nomine, sed qui antiquitus Vada Sabatra dicebatur; neve ad aliquem alium Genuensium ditionis portum accederet; cum sit usu receptum, ut nullus classibus Hispanorum præcludatur, sed omnes perzq[ue] illis advenientibus pateant. Qua Marchio edictione, summa vi animi orationisq[ue] a Jo. Baptista habita, commotus, non esse cunctandum statuit, sed continuo Gallos illos e vinculis eximendos dimittendosq[ue] curavit. Nonnulla per id tempus profecta sunt ab Hispanis,

in quibus Respuhl. Genuensium offenderetur; in his, quod naves Batavorum aliquot captæ ab illis essent, quæ Genua solverant. Hinc Rex Galliarum, fœderis amicitizque cum Genuensibus conjungendæ occasionem se fuisse natum existimans, ultro illius Regni sui opes viresque detulerat, ut iis, sine aliqua exceptione vel lege, suo ex arbitrio ac voluntate uterentur. His tam magnificis tamque liberalibus Regis illius pollicitationibus Genuenses adducti, non privatim sed publice Regi agendas esse gratias, communi consilio constituerunt. Nec fuit illis diutius deliberandum, quem mitterent; nam statim Jo. Baptista occurrit. Profectus est igitur Legatus in Galliam. Sed, dum Parisiis illud officii munus, cuius causa missus fuerat, accurate diligenterque profectus, accidit ut Hispani Genuensibus, quos offenderant, facerent satis, cum eisque redirent in gratiam. Quæ res ubi facta est palam, magnam illis offensionem ad Regem eosque, quorum arbitrio Regnum administrabatur, attulit. Ac, nisi Jo. Baptiste studio, diligentia ac sollicitudine, ea offensionis illius quasi fax quædam extincta esset, magnum adversus Genuenses bellorum excitasset incendium. Neque id Cardinalis Richelius tacitum habuit; qui cum, Hieronymo Grimaldo, nondum Cardinali, sed etiam tum, apud Regem Galliz, Sedis Apostolicæ Nuntio, Jo. Baptiste laudes in astra ferret, id quoque addidit; illius prudentia factum, ut parata adversus Genuenses arma, Regis extorquerentur e manibus. In qua legatione, magni etiam æstimata est ejus opera in Principe Jo. Casimiro, nunc S. R. E. Cardinali, restituendo, qui Gallorum custodiis vinctus asservabatur. Excitabat illum, ad Casimiri causam suscipiendum, Reipubl. suæ dignitas, in illius injuria non parum offensa, quod tum ille a Gallis captus vinctusque fuisset, cum Genuensium triremi vectus navigaret in Hispaniam. Quæcunque autem Jo. Baptista in hoc egit, fusius exponuntur in libro, impresso in Polonia, hac inscriptione: *Carcer Gallicus Principis Jo. Casimiri*. Fuit Gallica illa Legatio postrema earum omnium, quas Respuhl. suæ causa obivit. Quæ quantum commendationis habuerit, declaravit in primis illa Ludovici XIII Gal-

liz Regis vox & oratio ; qui Rex , cum ad ipsum Jo. Baptista , post expletum in ea aula quadriennium , officii honorisque gratia postulatum adisset , ut , transactis jam suis partibus , sibi faceret abeundi potestatem , ceteris officiis beneficiisque , quibus eum ornavit , id quoque addidit , ut diceret , se posse liquido affirmare , & suam etiam in eo fidem interponere , neminem ex oratoribus , quorum magnus ad se numerus venisset , sua ab aula discedentem , diuturniorem jucundioremque sui nominis memoriam reliquisse , quam ipsum . Tot igitur gravissimis pulcerrimisque muneribus perfuncto , quidnam aliud nisi summa in sua Republ. dignitas amplitudoque decrat ? Ad quam cum festinaret , ac prope jam esset ut eam assequeretur , paulo post , quam e Gallia Genuam redierat , festis Paschalibus anni cdo Io C XLII , annos natus LXIII , morte subversus cecidit in cursu . Fuit hoc luctuosum suis , acerbum patriæ , grave bonis omnibus . Nam dici verissime de illo potest , neminem suæ ætatis in ea Republ. extitisse , qui illum antecederet consilio , auctoritate , prudentia , in patriam amore . Ejus autem pietatis in Deum cum multa possint exempla proferri , non vagabitur oratio mea longius , sed ea alacritate definiatur , qua Jo. Aloysium , filium natu majorem , in quo , ob singulare ingenium aliasque ingentes animi dotes , spes erat fore ut acceptam a patre gloriam multis , patriæ Reipubl. beneficio , augeter virtutibus , Christo petenti condonavit . Nam cum ille enixe per litteras ab eo postularet , ut ipsius voluntate sibi liceret Societati Jesu nomen dare , ad quam divini Numinis impulsu se attrahi & impelli sentiret , non solum sanctissimis justissimisque illius postulatis non restitit , verum etiam incredibili quadam magnitudine animi , a singulari in Deum amore studioque profecta , est eundem hortatus , ut vocantem trahentemque ad se Deum sequeretur , eidemque quam primum morigerus esset . Tantum illud admonebat , ut caveret , ne , repentino animi puerilis impetu abreptus , ad aliquod non satis maturum , nec satis bene excoctum consilium , cujus eum postea pœniteret , abstraheretur . Extant ejus ad filium hac de re litteræ , siccis ab eo oculis scriptæ , sed quæ sine multis lacrimis legi non possint .

Ve.

Verum ad has tantasque adeo excellentis ac divini prope hominis virtutes ac laudes, unum vitium est ausum obrepere, eisque se, ut dicemus, inferere; ut in eo præsertim sit comprobatum experientia, quod dicitur, nullam esse hominis gravitatem, nullam sapientiam tantam, quæ non cum aliqua levitatis imprudentiæque admistione jungatur. Hic vir, ita magnus, ita virtutibus omnibus cumulatus, qui posset ceteris consilio prudentiaque præesse, sycophantiæ improbissimo nequissimoque illudendum diripiendumque se præbuit. Qui præstigiator Parisiis ad eum accessit, ac dicendi artificio, cui vix posset obfisti, persuadere homini cœpit, auri consiciendi, quam nemo unquam assecutus esset, rationem artemque apud se esse; ac: Si induxeris, inquit, animum mihi fidem habere, id quod verbis polliceor, re ipsa præstabo; sed opus est præsentī pecunia, ad aliqua in hujus artis usum cœmenda; neque id tibi mirum videatur; nam necesse est facere sumtum, qui lucrum querit; at, si istud a te mihi subsidium nummarium suppeditabitur, perficiam brevi, ut Pichos, qui montes incolunt aureos, divitiis antecedas. Credidit vir rectus ac simplex, qui aliorum animos ex animo spectabat suo; ac non solum illi in præsentia pecuniæ, quantum poscebat, attribuit, verum etiam primo Parisiis, quoad ibi mansit, tum Genuæ, quo eum suo sumtu perduxerat, cibum ad mensam plenam affatim quotidie præbuit. Quid opus est verbis? Non aliud nebulo ille aurum ex eo artificio est visus exprimere, præter illud, quo suis sycophantis præstantissimum hunc virum emunxerat.

de

IACOBO MARTINO MODONESIO,
BARTOLDO NIHUSIO

IANUS NICIUS ERYTHRÆUS

S. P. D.

TRia profecto ætas hæc nostra vidit, nova, admirabilia, & quæ omnem fere fidem excedant; ad quæ credenda, nisi ea oculis accepissem, mea nunquam duceretur assensio. Primum, Martham Marchinam, virginem Neapolitanam, sed etiam tum infantem, Romam in parentum sinu delatam. Hæc a nemine, nisi fortasse divinitus, edocta, egregie, Græcam, Latinam, & Hebraicam linguam noverat; tum, philosophicis, theologicis, ac liberalibus omnibus disciplinis, non leviter erat sed literate perita; deinde, epigrammata Græca, sed Latina in primis, eleganter arguteque conclusa, fundebat ex tempore. Cujus elegantis ingenii formam, inter illustrum virorum imagines, qui mea ætate floruerunt obieruntque, referre non distuli. Alterum, non minus admirabile, quod ætas nostra conspexit, rusticanus quidam homo est, Benedicto Virgilii F. nomine. Hic, in obscuro pago, in asperrimis Samnitum montibus, natus, ab ineunte ætate, Patribus Collegii Rom. Soc. Jesu, ad maximas illas arationes, quas habent in Appulia, operas elocavit suas; cumque vix sciret legere ac scribere, postquam boves domum reducerat, nulla cujusquam ope sed naturali quodam bono adjutus, ad scribendos versus se dabat; atque illustri poemate, quod cum omnibus, ab aliis editis, eruditione elegantiaque æquari conferrique posse videatur, D. Ignatium Lojolam, qui Societatem Jesu fundavit, maximis atque verissimis prosecutus est laudibus. Postremo, id quod mortales omnes ad incredibilem admirationem effert, nostros ad se oculos puer, annos natus non amplius septem, attraxit,

xit, cui nomen est Jacobus Martinus Modonesius, ex ignobili agri Mutinensis pago, patre bajulo, ortus; ab eoque in spem ejusdem sive artificii sive exercitationis educatus, eo quod nollet filium, se majorem, habere; ut sæpe etiam cum eo, a quo erudiebatur, jurgio contenderet, ac quereretur, sibi filium eripi, & assidua illa exercitatione studiorum, quæ vires animi auget, corporis minueret, minus eum aptum ad bajuli munus, cui destinaverat, reddi. Missæ sacrificium faciebat, ac fortasse Parochi partes agebat, in eo pago, Frater quidam Jo. Baptista Mezzettus Servita; qui, pueri, ac pene infantis, ingenium odoratus, ex memoria, qua, tradita sibi omnia, tenaciter comprehendebat, & quia suis cum imperiis obsequentem haberet, maximam in spem venit, posse se in illa quamvis infirmissima ætate, quoddam quasi ædificium, ex omnium doctrinarum aggregatione conflatum, excitare: memor fortasse Chryssippi, qui primum ætatis in puero tempus, etiam triennium illud quod nutricibus datur, dixit, aptum ad doctrinarum institutionem, neque verendum esse, ne earum intelligentiam capere, nec discendi laborem ferre posset, vix e gremio parentis egressus. Itaque cœpit, pene infantis mentem, optimis disciplinis informare; & quod incredibile, ac, nisi experientia, rem ita se habere, doceret, stultum & ineptum aggressu videatur, tantæ molis initium non a rebus minimis, ut mos est, sed ab omnium maximis atque gravissimis, fecit; nimirum a sacris literis & a regina disciplinarum omnium Theologia, ac deinceps ad reliquas progressus est artes; hoc pacto: Docebat illum prius ejus, quam tradebat, artis vim definitione explicare; videlicet, quid sit Theologia, quid Philosophia, quid ars medendi, quid Juris scientia, quid Rhetorica, quid Grammatica. Nam, in omnibus hisce doctrinis, excultissimum eum conatus est reddere. Deinde jubebat addiscere, quænam sit illis subiecta materia, quam tractent & in qua versentur; tum quænam earum unaquæque ratione ac forma tractetur. Postremo docebat, unamquamque artem in partes tribuere, earumque nomina & definitiones assignare: atque inde occasione sumpta, præcipua eidem rerum capita, quæ in singulis

di.

disciplinis in disceptatione in disputationemque vocantur, proponebat, suamque de illis sententiam aperiebat, quam ille acceptam, ingenii, quo præstabat, acumine, adversus quoscunque, qui vellent eam oppugnare, tuebatur. Sed audi rem miram. Tradebantur ea illi omnia, a magistro, Latino sermone, ac penitus in memoria defigebantur. Quid ergo? illud etiam assecutus est puer, ut usum consuetudinemque Latini sermonis consequeretur antea, quam præcepta Latine loquendi, quæ puerilis doctrina tradit, acciperet. Itaque verba effert, quæ nemo reprehendat, eaque casibus & temporibus, & genere numeroque, conservat. Quid opus est verbis? vix triennium intercesserat a prima Fratris illius Servitæ institutione, cum tantam vim doctrinæ & eruditionis assecutus esse visus est, ut nihil sit in unaquaque elegantissimarum artium adeo constructum atque reconditum, quod non illius intelligentiæ funditus pateat. Nam, quicunque periculum faciunt, in Theologicis, in Philosophicis, aliisque liberalissimis literis, iis se eorum, quæ scire æquum est eum, qui eas artes proficitur, solertissimum exhibet; neque quisquam est, in capiendo adversario, ita versutus, qui eundem in aliquos fallacis cuiuspiam argumentationis laqueos induat. Omnes ille sedes, & tanquam donicilia, quarumcunque argumentationum novit; ille ea verbis definit; ille exemplis illustrat. Sex abhinc mensibus, venit in Urbem, continuo fama ejus adventus exivit, ac pervenit ad doctissimos viros. Dedit operam unusquisque, ac Pater in primis Sfortia Pallavicinus, ut eum nosset, aspiceret, quidque in literis posset, experiretur. Neque solum inventus est, opinioni, quæ de ipso erat, respondere, sed superior etiam existere, atque, omnium consensu, sic tum est judicatum, monstri ac prodigii cuiuspiam simile videri, tantam vim doctrinæ & eruditionis in eam ætatem convenire. Quod cum ad Quæsitores fidei esset delatum, quod suspicarentur, id quoque Dæmonum præstigiis posse contingere, est ab illis vocatus in jus; sed statim omnibus sententiis absolutus, atque insuper palma, eleganti opere elaborata, donatus. Voluit etiam (cujus causa Romam accesserat) aliquod peculiare suæ facultatis

his specimen dare. Quamobrem, propositis tota Urbe edictis, ausus est, omnes, qui vellent, & quacunq; de re vellent, in contentionem certamenq; vocare; ac locum pugnae, Aedem D. Marcelli, in via lata, ac diem ejusdem pugnae festum Pentecostes, constituit. Qui dies cum jam advenisset, tum licuit videre populi Romani universi, erga puerum illum, studium, qui nihil sibi esse faciendum prius existimavit, quam ut puerum septuennem videret, cum doctissimis viris in literario certamine compositum, quæ ab ipsis objicerentur, quasi tela, retundere atque rejicere. Ac, ne aliqua conventionis suspicio oriri posset, simul ac quisquam ad disputandum accederet, ex omnibus omnium artium disciplinis sortito capiebatur, qua de re esset differendum. Itaque tanti ad eum, omnis generis, ætatis, atque ordinis hominum, concursus facti sunt, ut iis non modo Aedes D. Marcelli, quæ satis ampla est, verum etiam viæ, Aedi proximæ, complerentur, neque illi, qui paulo serius venisset, quidquam esset difficilius, quàm cubito, humero, ac toto corporis impetu, sibi aditum in Aedem facere; adeo, ut Cardinales non pauci, parasernariis & aulicis suis stipati, cum conarentur in confertam turbam se immergere, nec possent, cogerentur conatu desistere, ac domum sese recipere. Hujus diei plausus fuit puero illi merces laborum studiorumque suorum. Etenim, non ita multos post dies, circumfluens laudibus, sed inanis a præmio, (ut scias, quantus hic virtuti sit honos,) Bononiam versus, Roma discessit, una cum magistro, qui eum, non in suam modo gloriam, verum etiam utilitatem, peculiariter fovet. Ajunt, eum, in itinere, Florentiæ paululum constitisse, & a Medicis illis Principibus, tum perhumaniter exceptum, tum muneribus amplissimis locupletatum. Ac, si aves scire, quonam genere vestium utatur, habitu incedit militari, serico auroque distincto; lateri ensiculus adhæret, & longa pileo varii coloris pluma adjungitur. Vale.

Romæ, V Idus Augusti

c 15 15 C XLVII.

INDEX IMAGINUM, Quæ in his tribus Pinacothecis continentur.

A.		Barbosa <i>Augustinus</i>	258
A ccariscus <i>Francisc.</i>	380	Barclajus <i>Ioannes</i>	616
Accorambona <i>Maria</i>		Baronius <i>Caesar</i>	87
<i>Isabella</i>	788	Bartolus <i>Io. Baptista</i>	372
Achillinus <i>Claudius</i>	100	Bellarminus <i>Robertus</i>	84
de Aciaria <i>Angelus</i>	716	Belurgerius <i>Claudius</i>	205
Aguccius <i>Io. Baptista</i>	734	Bencius <i>Franciscus</i>	453
Alamannus <i>Nicolaus</i>	125	Benignus <i>Julius</i>	712
Alanus <i>Gulielmus</i>	90	Bentivola <i>Matilda</i>	786
Albertinus <i>Petrus</i>	741	Bentivolus <i>Guido</i>	352
Alciatus <i>Franciscus</i>	445	Berettarus <i>Sebastianus</i>	410
Aleander <i>Hieronymus</i>	45	Biscia <i>Bernardinus</i>	680
de Alexiis <i>Alexius</i>	767	Boccalinus <i>Trajanus</i>	271.
Alterius <i>Marinus</i>	321		765
Amalthæus <i>Atilius</i>	328	Bombasius <i>Gabriel</i>	70
Ancina <i>Io. Iuvenalis</i>	171	Bombinus <i>Paulus</i>	17
de Angelis <i>Pompejus</i>	648	Bonacina <i>Martinus</i>	552
Angelotius <i>Angelus</i>	289	Bonarellus <i>Gustobaldus</i>	14
Ansideus <i>Balthasar</i>	109	Bonaventura <i>Federicus</i>	275
Antonianus <i>Severus</i>	36	Bonctarius <i>Marcus Anto-</i>	
Arcudius <i>Franciscus</i>	374	<i>ninus</i>	98
Arcudius <i>Petrus</i>	225	Borromæus <i>Federicus</i>	264
Ardelio <i>Zotius</i>	240	a Bosco <i>Olivarius</i>	144
de Avanzatis <i>Bernardus</i>	761	Bosius <i>Antonius</i>	233
Axelius <i>Io. Honorius</i>	438	Bosius <i>Iacobus</i>	232
Azolinus <i>Laurentius</i>	285	Bottifanga <i>Inl. Caesar</i>	356
Azpilcueta <i>Martinus</i>	1	Bovius <i>Io. Antonius</i>	113
B.		Rozius <i>Thomas</i>	93
Baccius <i>Andreas</i>	139	Braccirolinus <i>Francisc.</i>	718
Bagniolus <i>Julius Caesar</i>	79	Briccius <i>Ioannes</i>	696
Bajanus <i>Andreas</i>	258	Bronzinus <i>Christophorus</i>	655
Balduccius <i>Franciscus</i>	316	Brunellus <i>Hieronymus</i>	458
Balduinus <i>Tonfor</i>	526	Brunus <i>Antonius</i>	250
Baldus <i>Baldus</i>	230	Buccaferrus <i>Hieronymus</i>	262
Baldus <i>Bernardinus</i>	4	Buccupadulus <i>Anton.</i>	612
Barberinus <i>Maphæus</i>	450	Bulgarinus <i>Belisarius</i>	368
Barbrianus <i>Marc. Vestrinus</i>	662	Burghesius <i>Paulus</i>	121
		Burgius <i>Alexander</i>	119
			Bzo-

INDEX:

<i>Rzovius Abrahamus</i>	<u>198</u>	<i>Conzaga Franciscus</i>	<u>500</u>
		<i>Conzaga Scipio</i>	<u>336</u>
		<i>Corinus Antonius</i>	<u>635</u>
		<i>Crescentius Iacobus</i>	<u>591</u>
		<i>Crucius Julius Caesar</i>	<u>247</u>
C.		D.	
<i>Caelius Gaspar</i>	<u>228</u>	<i>Decius Antonius</i>	<u>181</u>
<i>Cesarinus Virgilius</i>	<u>59</u>	<i>Dempicianus Ioannes</i>	<u>226</u>
<i>Cassius Angelus</i>	<u>645</u>	<i>Dempsterus Thomas</i>	<u>24</u>
<i>Cagnatus Marcellus</i>	<u>97</u>	<i>Dichaeus Dischaus</i>	<u>216</u>
<i>Cagnolus Belmontes</i>	<u>19</u>	<i>Diotalleuius Franciscus</i>	<u>282</u>
<i>Caimus Pompejus</i>	<u>48</u>	<i>Donius Latinus</i>	<u>117</u>
<i>Campanella Thomas</i>	<u>41</u>	E.	
<i>Canevarius Demetrius</i>	<u>752</u>	<i>Epistamenus Archita</i>	<u>434</u>
<i>Caporalis Caesar</i>	<u>818</u>	<i>Euclio Jurisconsultus</i>	<u>659</u>
<i>Cariophilus Io. Matth.</i>	<u>223</u>	F.	
<i>Carrettonius Io. Franciscus</i>	<u>161</u>	<i>Falconius Henricus</i>	<u>53</u>
<i>Castalio Iosephus</i>	<u>167</u>	<i>Farinaccius Prosper</i>	<u>238</u>
<i>Castellinius Io. Zaratinus</i>	<u>50</u>	<i>Felicianus Porphyrius</i>	<u>133</u>
<i>Castellus Octavianus</i>	<u>293</u>	<i>Fensonius Io. Baptista</i>	<u>52</u>
<i>Cataneus Baldus</i>	<u>115</u>	<i>Figliuccius Flaminus</i>	<u>729</u>
<i>Ceba Ansalus</i>	<u>666</u>	<i>Finius Lilius</i>	<u>589</u>
<i>Cerasa Tiberius</i>	<u>640</u>	<i>Florettus Benedictus</i>	<u>404</u>
<i>Cerasola Flaminus</i>	<u>468</u>	<i>Fontana Publius</i>	<u>75</u>
<i>Cherubinus Alexander</i>	<u>722</u>	G.	
<i>Chiabrera Gabriel</i>	<u>63</u>	<i>Galileus Galileus</i>	<u>279</u>
<i>Chifius Aurelius</i>	<u>509</u>	<i>Gariglianus Pompejus</i>	<u>69</u>
<i>Chorea Thomas</i>	<u>253</u>	<i>Gherardesca Lucretia</i>	<u>792</u>
<i>Ciacconus Petrus</i>	<u>190</u>	<i>Giardinus Pompejus</i>	<u>213</u>
<i>Ciajesius Io. Dominicus</i>	<u>408</u>	<i>Gianninus Thomas</i>	<u>182</u>
<i>Clampolus Ioann.</i>	<u>361</u>	<i>Glorierius Alexander</i>	<u>602</u>
<i>Cicogninus Iacobus</i>	<u>688</u>	<i>Gracchus Rutilius</i>	<u>209</u>
<i>Cittadinus Celsus</i>	<u>472</u>	Gra.	
<i>Claverius Iacobus</i>	<u>8</u>		
<i>Clavius Christophorus</i>	<u>176</u>		
<i>Cobellutius Scipio</i>	<u>71</u>		
<i>Coli Angelus</i>	<u>772</u>		
<i>Columna Ascanius</i>	<u>447</u>		
<i>de Comitibus Marcus Antonius</i>	<u>58</u>		
<i>Conzaga Georgius</i>	<u>132</u>		

INDEX.

Gramigna *Vincentius* 77
 do Gratianis *Antonius Maria* 484
 Grillus *Angelus* 237
 Gropalus *Io. Franciscus* 231
 Guarinus *Baptista* 95
 Guarnellus *Alexander* 118
 Guidiccionus *Lalins* 425
 Guidottus *Paulus* (Burghe-
 sius) 121
 Gymnastus *Dominicus* 169
 Gyronus *Antonius* 207

H.

Henricus *Hieronymus* 155
 Herrera *Franciscus* 630
 Horstius *Jacobus Merlo* 549
 Hortinus *Int. Roscius* 514

I.

Ioannettus *Manellus* 281

L.

Lagalla *Iulius Caesar* 222
 Lallius *Io. Baptista* 130
 Lampugnani *Hieronymus* 420
 La-Sena *Petrus* 106
 Latinus *Fabius* 151
 Laurus *Io. Baptista* 254
 Leonida *Fabius* 49
 Lilius *Aloysius* 178
 Lipsius *Infus* 543
 Lucarius *Cynthia* 401
 Lurco *Fortunatulus* 519

M.

Maccius *Sebastianus* 277
 Macedonius *Marcellus* 104
 Madaffarus *Nicolaus Maria* 651
 Maffejus *Io. Petrus* 347
 Magagnatus *Hieronymus* 168
 Magius *Alexander* 489
 Magnus *Petrus* 810
 Mallonius *Daniel* 134
 Mancinus *Iulius* 377
 Mancinus *Paulus* 31
 Mansus *Io. Baptista* 600
 Manutius *Aldus* 184
 Maraffa *Antonius* 440
 Marchesius *Marcellus* 123
 Marchina *Martha* 778
 Marchisettus *Iacobus* 128
 Maretta *Lalins* 384
 Margotius *Lanfrancus* 127
 Marignollus *Curtius* 179
 Marinus *Io. Baptista* 34
 Mascardus *Augustinus* 112
 Masinus *Nicolaus* 272
 Mautinus *Hieronymus* 135
 Mazonius *Iacobus* 65
 Menicuccius *Raphael* 296
 Mercurialis *Hieronymus* 149
 Merenda *Hippolytus* 702
 Merlinus *Clement* 474
 Michalorus *Iacobus* 286
 Modonesius *Iac. Mart.* 842
 de Monte *Baldwinus* 428
 Montecalvus *Vincentius* 193
 Moricucius *Hieronymus* 108
 Morosinus *Angelus* 748
 Muretus *Marcus Antonius* 11
 Murtula *Gaspar* 33

N.

INDEX.

819

N.		Prætus Hieronymus	47
Narnienfis Hieronymus	135	Proida Genesius	797
Nicolai Petrus D.	608	de Prosperis Marcus Anto-	
Niger Nicolaus	248	nins	56

O.

Q.

Oddus Mutius	174	Quærengus Antonius	63
Olivarius Seraphinus	145		
Ongarus Antonius	186		
Oregius Augustinus	40		
Ossatus Arnaldus	147		

P.

R.

Pacinellus Augustus	398	Raimundus Io. Baptista	325
Pactius Antonius	157	Raparius Angelus	303
Palettus Paulus	564	Renaldinius Ioannes	338
Pallavicinus Augustinus	443	Riccardius Nicolaus	43
Pancirola Octavius	745	Ricerius Mutius	119
Panicarola Franciscus	81	Rinuccinus Octavius	61
Paradifus Romulus	464	Rocca Angelus	105
Paschalis & spio	260	Rogierius Franciscus	412
Paschalis Valensinus	259	Rogierius Pompeius	406
Patritius Franciscus	203	a Ruere Guidobaldus Bara-	
Paulius Io. Franciscus	54	vellus	14
Penia Franciscus	143	Ruettus Io. Andreas	246

S.

Pennottus Gabriel	467	Saccardus Crescentius	684
Peranda Io. Franciscus	671	Sacchettus Marcellus	568
Peregrinus Lalius	154	Salinorus Mathias	725
Perus Io. Dominicus	386	Salvadorus Andreas	62
Petolius Marcus Antonius	342	Salvianus Gaspar	32
Petrasanta Sylvester	820	Salvianus Salustius	751
Piccolomineus Lepidus	416	Salutius Io. Baptista	831
Pilota Vincentius	436	Sanctorius Paulus Em.	625
Podianus Prosper	813	Sanfedonius Iulius	460
Politus Adrianus	470	Saracenus Gerardus	354
Porta Theodorus	366	Sarrocchia Margareta	259
Portius Gregorius	676	Scaechus Fortunatus	494
		Sergardius Fabius	419
		▲ Serva Carolus	155

H h h

Sir-

INDEX.

Sirletus Guilelmus	268	Valerius Augustinus	170
Spada Io. Baptista	385	Valerius Lucas	236
Stella Io. Baptista	133	Vallensis Franciscus	252
Stella Julius Caesar	33	Vannozzius Bonifacius	401
Stephonius Bernardus	138	Vbaldina Mar. Isab. Acco-	
Strozza Io. Baptista	33	rambona	288
Strozza Julius	237	Vbaldinus Alexander	103
Strozza Laurentia	249	Vbaldinus Lelius	1
Strozza Petrus	331	Vbaldinus Robertus	334
Stufa Alexander	623	Vecchiectus Hieronym.	196
de Syris Io. Stephanus	480	Ventura Franciscus	323

T.

Taffonus Alexander	185	Vgolinus Bartholomaeus	201
Taffus Torquatus	24	Vgolinus Io. Baptista	29
Teggia Paulus	156	Vgolinus Vincentius	30
Teresa Com. ex Persia	797	Vgonius Pompejus	163
Tetta Fulvius	737	Victorius Loretus	513
Toletus Franciscus	136	Vignatus Ludovicus	710
Tolomaeus Lelius	232	Villanus Nicolus	188
Tonsor Baldus	326	Villifrancus Io.	699
Tronsarellus Octavius	691	Vinciolus Vinciolus	807
Trullerus Iosephus	26	Visdominus Franciscus	657
Tuccius Stephanus	576	Vitellefcus Mutus	476
Tursellinus Horatius	456	Vossius Gerardus	423
Tuscus Dominicus	32	Vrsinus Alexander	329
		Vrsinus Fulvius	2
		Vrsus Aurelius	164

V.

Z.

de Valentina Gregorius	307	Zinamus Gabriel	584
Valentinus Caesar	704		



005655179